



Ex Libris



PROFESSOR J. S. WILL

3. -

RB 5691



Library
of the
University of Toronto




Land 1894

DIVERSES PIÈCES
POUR
LA DEFENCE
DE
LA ROYNE MERE
DU
ROY TRÈS-CHRÉSTIEN
LOVYS XIII.

FAITES ET REVEVES
par Messire MATTHIEV DE MORGUES
Sieur de S. Germain , Conseiller &
Predicateur ordinaire du Roy TRÈS-
CHRÉSTIEN , & Conseiller Predi-
cateur, & premier Aumosnier de la
Royne Mere de sa Majesté.

M. D C. XLIII.



THE HISTORY OF THE

ROYAL NAVY

FROM THE FIRST

TO THE PRESENT

STATE

OF THE

NAVY

OF GREAT BRITAIN

AND IRELAND

IN THE

SEVENTEENTH

CENTURY

BY

JOHN

BARRETT

ESQ.



AV ROY.



I R E;

Il est vray , que les maisons des Roys sont des lieux sacrez, leurs throsnes sont des Autels , leurs personnes , les images viuanes de la Diuinité ; & que Pythagore disoit, qu'on change d'esprit en entrant dans les Temples , & approchant des statuës des Dieux.

Si i'ay vn iour Phonneur de me ietter aux pieds de V O S T R E M A I E S T E' , elle recognoistra que sa Royale presence ne me donne

point des sentimens nouveaux pour
 sa Dignité , & pour son Estat ; mais
 qu'elle a le pouuoir de faire paroistre
 les anciens, que i'ay cōserué avec grād
 soin. SIRE , i'ay esté fidele estant mal
 traité sous vostre auctorité : & lors
 qu'on me deshonnoroit aupres de V.
 M. ie defendois tout seul l'honneur de
 vostre Naissance. Je n'ay point cher-
 ché en cet employ d'autre satisfactiō,
 que celle qu'un homme de bien trou-
 ue en l'exercice de la Vertu : elle m'a
 conseillé de quitter mon pays, aban-
 donner mes biens, exposer ma vie aux
 dangers, & mes intentions aux medi-
 sances. Je n'ay point apprehendé tous
 ces mauuais rencontres , que i'auois
 preueu, & choisi ; mais i'ay esté extré-
 mement affligé , lors que i'ay appris
 que l'impofiture auoit eu la puissance
 de m'esloigner des bonnes graces de
 V.M. iusques à ce qu'un changement
 me donne le moyen de faire cognoi-

stre, ie ne dis pas l'innocence, mais le merite de mes actions.

SIRE, il faut aduoüer qu'un bon seruiteur est bien mal heureux, s'il est condamné ayant droict de demander recompense, pour la vertu contraire au crime qu'on luy impose. I'espere que le mesme soleil qui fera esclatter vostre Iustice, qui escartera les tenebres des confusions, & qui rendra sa lumiere à la Reyne vostre Mere; fera voir à V.M. la verité de mes escrits, & les respects qu'ils ont tousiours porté à vostre sacrée personne. Il est vray, SIRE, que i'ay crié vn peu haut contre ceux qui rauissoient à V.M. la gloire de ses entreprises, la paix de sa Maison, le repos, les cœurs & richesses de ses sujets, les places & seuretez de son Estat, qui sont les pieces de sa Couronne. C'est vn tesmoignage que ie suis fidele à mon Roy, & à mon pays, d'auoir dit en la naissance du mal, que

A V R O Y.

les estrangers pourroient tirer vn grand profit de son progres. Ce que i'ay estimé deplorable , est , que tous les desordres que ie remarquois , venoient de la part d'un homme si violent , que pour les descouvrir , i'ay esté contraint de me couvrir de la protection d'un Prince, auquel vostre Majesté a déclaré la guerre. Ceux qui pour cette considération me veulent faire passer pour mauvais François , ne sçauent pas que pour estre bon citoyen, il faut estre sage hōme: ie ne le ferois pas , si ie m'amusois, comme font les goujats dans les armées , à dire des iniures à ceux que V. M. tient pour ses ennemis ; ou si ie ne sçauois point viure dans vn pays, où la Prouidence de Dieu m'a enuoyé.

Si iamais les affaires changent , (comme ie l'espere de la bonté de Dieu qui vous aime & vostre Estat) ie demanderay à V. M. son Parle-

ment de Paris , pōur examiner mes liures, & supplieray cet auguste Senat d'en iuger par les plus seueres ordonnances de nos Roys, & par les plus rigoureuses loix des anciēs Empereurs.

Si mes œuures ont esté brullées, ie sçay que l'or & l'argent ont le mesme poids apres l'espreuue du feu; qui ne fait aller en fumée que le plomb. L'alchimie de ceux ausquels ie respons, ne craint rien tant que la coupele dans laquelle on les iettera vn iour. V. M. verra que les couleurs avec lesquelles i'ay peint les vertus de la Reyne vostre Mère, & les vices de ceux qui l'ont persecutée, estoiet minerales; c'est à dire, qu'elles pouuoient souffrir la fournaise sur vn bel apprest de crystal. Les fausses lumieres qui paroissent dans les sales vapeurs de quelques petits calomniateurs & flatteurs, seront dissipées, lors qu'un bon vent du S. Esprit aura net-

royé Pair de la France, qui est maintenant rempli de broüillards.

Pour monstrier à V. M. que i'ay eue ces pensées, i'ay imité les orfeures, en ce que i'ay mis en la place d'honneur les armoiries de ceux qui m'ont commandé l'ouurage, & que i'ay marqué en vn petit coing mon poinçon, c'est à dire mon nom, pour estre chastié, si i'employois du bas ou du faux alloy. I'ay suiui aussi l'exemple de ce grand sculpteur Phidias, lequel ayant paracheué cette belle statuë de Pallas, qui fust vn des plus rares ornemens de la ville d'Athenes, voulut, au lieu de grauer son nom sur la bordure du bouclier, releuer en demi bossé son pourtrait, qui regardoit avec vn merueilleux artifice la face de la Deesse, comme s'il receuoit ses commandemens.

SIRE, ie n'ay pas dressé à la Rey-
en vostre Meré vne statuë de marbre:

mais ie crois auoir fait vne image
eternelle , viuante , & parlante de ses
rars vertus. I'ay creu que le plus
grand honneur qui me pouuoit arri-
uer , estoit d'auoir esté iugé capable
par cette grande Princeſſe de la ſer-
uir en ce rencontre , dans lequel S A
M A I E S T É m'a donné le moyen
d'acquérir quelque reputation en de-
fendant la ſienne. I'ay laiſſé avec la
grande ſtatué de ſes belles actions , &
dans le bouclier que i'ay fait pour
leur deſenſe , quelque petit trait de
mon eſtude , & de mon eſprit : c'eſt à
dire, le crayon de mon ame.

Ma reſolution paroitra eſtrange
à ceux qui preferent le bien vtile à
l'honorable ; & qui pour flatter leur
vice , croyent qu'il n'y a plus de vertu
que dans les liures des Saincts , & des
Philoſophes. Ie ne veux pas dire que
la mienne ſoit grande : mais V. M.
qui a vne excellente memoire , ſe

A V R O Y.

pourra souuenir que i'ay serui avec courage la Reyne vostre Mere dans ses premieres afflictions : & ie peux dire, que plusieurs personnes sçauent, que dans les secondes , qui ont duré sept ans , ie n'ay pas esté corrompu par les biens & emplois qu'on me presenta au commencement ; & on ne m'a iamais veu esbranlé par les menaces des hommes violents , ny abattu par les maux qu'ils m'ont fait ressentir. Outre les maximes de la philosophie Chrestienne qui m'ont ietté dans ce parti ; ce qui m'a porté à le suiure iusques à la fin , est la parfaite cognoissance , que beaucoup d'années & de fascheux rencontres m'ont acquis des inclinations & intentions de la Reyne vostre Mere. I'ay remarqué qu'elle a tousiours conserué, & fait paroistre l'amour que la nature luy a donné pour V. M. & peux asseurer que i'ay recogneu, ce

A V R O Y.

que disoit vn ancien , que les bonnes Meres apres auoir fait l'original de leurs enfans , en retiennent vne copie, laquelle demeure dans leur cœur, qui considere tousiours ce pourtrait , & l'aime comme peint avec son sang, & ses humeurs : l'esloignement, & mauvais traitemens ne l'effacent iamais: il semble au contraire que les larmes le lauent , pour faire esclatter ses vives couleurs , & que l'obscurité des miseres est vne ombrage qui luy donne plus de relief.

Le Basilic , c'est à dire la plante Royale, reseruée anciennement pour les iardins des Roys, à cause de sa bõne odeur, rares qualitez & fleurs pourprines, croist mieux estant arrousee avec les eaux ameres & boüillantes : il est vray, qu'il passit durant les iours caniculiers; mais Plin & Theophile deux grands Naturalistes nous assurent, qu'il vient plus grand , & plus beau,

estant semé avec des iniures. Celles qu'on a dit à la Reyne vostre Mere, ont plustost releué qu'abattu ses affectiōs. Je peux dire aussi, que ces hommes noirs qui l'ont faussement accusée, ont esté semblables aux lapidaires Ethiopiens, qui baillent le feu aux rubis avec le vinaigre : & que son bon naturel a esté comme la pierre appelée Chrysolampis, qui est plus estincellante de nuict que de iour.

Ceux qui estoient obligez par ses bien-faits à l'estimer aupres de vous, sont ceux qui l'ont calomniée; & qui m'ont fait passer pour criminel de leze Majesté, parce que i'ay fait cognoistre leurs impostures. Tout ce qu'ils pourroient dire, est, que i'ay escrit avec quelque chaleur, qui a eschaufé mon courage, sans faire tort ny à ma conscience, ny à mon iugement. Si mon zele irrité par l'horreur des blasphemes, que i'ay leu & examiné, auoit

A V R O Y.

fait quelque faillie indiscrette, ie demanderois pardon à V. M. & luy remonstrerois qu'elle doit imiter la clemence de cet incōparable HENRY LE GRAND, qui vous a fait Roy avec la Royne que ie defens: mais ie crois auoir assez d'auantage dans la qualité de LOVYS LE IUSTE, pour supplier V. M. de la conseruer, en ne souffrant pas que sous vostre auctorit   on fasse du desplaisir    celuy qui vous rend vn signal   seruice, lors qu'il aduertit d'vne entreprise faite contre vostre honneur, vostre vie, & vostre Estat.

Ces aduis importants, qui pouuoient estre accompagnez d'vne hardiesse excusable, ont est   donnez    V. M. & au public avec toute sorte de modestie & de respect. Je peux dire, que i'ay pris vn grand soin non seulement d'  uiter tout ce qui pouoit desplaire    vostre Majest  ; mais de rechercher ce qui luy deuoit estre

A V R O Y.

agreable. Je ſçay , par la grace de Dieu , en quelle façon il faut dire les veritez aux Roys : il eſt neceſſaire de les appliquer comme les fueilles d'or avec le coton , & ſans cholere, qui les diſſiperoit en ſoufflant. Pour bien attacher l'eſcarlatte , les teinturiers oignent le drap avec du miel : les aduis qu'on donne aux Princes qui la portent, ne ſeront iamaïs bien reçeus, s'ils n'ont pour leur premiere couche vne grande douceur : ils doiuent eſtre ſemblables à l'eſmail , qu'il faut tirer d'une eau bien claire, c'eſt à dire, d'un cœur tres-pur , lequel, (comme dit l'Eſ-

criture ſainte en deſpit de tous les meſchâs , acquerra enfin l'amour du Roy.

SIRE , i'oſe eſperer de voſtre bonté, qu'un iour elle me iugera digne de l'honneur de ſa bien-veillance pour les meſmes ſujets que les meſchans ont pris pour me ietter dans ſon indignation.

Pr. 12.

*Qui diligit
cordis
mun-
ditiã,
habe-
bit a-
micum
Regem.*

A V R O Y.

Si ie m'estois esloigné de mon de-
 uoir, i'aurois peché cōtre le S. Esprit,
 n'ayant peu ignorer ce qu'il ordonne
 touchant le respect qui est deu aux
 Puissances souueraines. Ie me suis
 tousiours souuenu de ce que S. Hie-
 rosme dit de la sagesse de Daniel, *qu'il* D Hie-
parloit veritablement à Darius, mais qu'il rony-
adoucissoit tant qu'il pouuoit son discours, mus in
cognoissant qu'il traittoit de la part de Danie-
Dieu avec vn Roy. lem.

Après auoir appris
 par le iugement d'un sçauāt Docteur
 de l'Eglise la conduite d'un sage Pro-
 phete, V.M. aura agreable que i'esti-
 me la vertu morale de Sultan Soli-
 man, qui fist asōmer deux sacres qui
 auoiēt entrepris vne aigle, & à coups
 de bec l'auoient faite descendre en
 terre. Ce Tyran dit que ces deux oi-
 seaux meritoient la mort, pour auoir
 attenté sur leur Roy. Ie me condam-
 nerois, & me presenterois au supplice
 que des Iuges corrópus m'ont ordōné

A V R O Y.

enpeinture, si i'auois rauallé les actiōs
de mon Prince, ou abaissé sa Naissan-
ce : au contraire ie crois auoir raison
de dire , que lors qu'on m'ostoit mes
biens , ie gaignois avec iustice les re-
compenses, qu'on a donné iniustemēt
à ceux qui sous les priuileges de vôtre
sceau ont taché de vous desrober la
gloire que V. M. estime plus que sa
vie, & qui ont voulu troubler la four-
ce de laquelle Dieu vous a fait sortir.
Ie ne veux pas réplir cette Epistre des
iniures qu'on a faites à V. M. ie me
contenteray de m'estre acquitté du
deuoir d'un fidele seruiteur, les ayant
remarquées en diuers endroits de mes
escrits: dās lesquels i'espere que V. M.
verra vn iour que i'ay tousiours esté,

S I R E,

DE VOSTRE MAIESTÉ

*Tres humble, tres obeissant, & tres-fidele
seruiteur & suiet*

M. de Morgues:

A V



AV SAGE LECTEUR.



LES choses nous paroissent de differente grandeur & figure , selon qu'en les regarde , de loin , de pres , de front , de trauers, d'en haut & d'en bas : tout cela vient de la nature de nostre veüe. La diuersité de nos esprits produit des iugemens contraires , selon que les passions, la science, l'opinion, l'ignorance & l'erreur , donnent les mouuemens à nostre ame. Cette cognoissance a fait que ie n'ay point esperé vne approbation vniuerselle , que iamais homme ne rencontrera. Je n'ay pas eu la presumption de croire, que i'estois ce parfait Escrivain , qui n'a point esté , & qui ne sera pas. On dit que

la beauté d'un visage consiste en trente six points ; mais la laideur vient bien souvent d'un seul défaut. On ne trouvera rien d'accompli dans les livres , si on veut estre luge trop seücre : ce qui console ceux qui travaillent avec quelque avantage , est, qu'ils sont comme les excellens Peintres, qui ont esperance que les bons maistres recognoistront la secrette intellignce qu'ils ont caché dans leurs ouvrages ; & que les beaux esprits qui seront bons , se rendront soigneux de leur donner le iour du costé droit , qui est celuy qu'un rare tableau à pour l'ordinaire. Ceux qui se meslent d'escrire , se soulagent ou se flattent avec ces pensées : ils mesprisent les sentimens du vulgaire , & des raffineurs de paroles: ceux-cy sont semblables aux petits enfans, qui ne cherchent dans les prez que des fleurettes ; là où le sage medecin cueillit les plantes , avec lesquelles il veut composer un bon remede.

A V L E C T E U R.

Pour ce qui me regarde en particulier ; ie confesse que ie pourrois tirer quelque satisfaction de ce que le monde verra mes œuvres, en vn temps qui a desia fait cognoistre, par vne mal-heureuse experience, les hommes & les maux que ie descriis : mais ie ne pretends pas me preualoir de la hayne, qu'une infinité de personnes a conceu contre les auteurs des miseres publiques. Je ne veux prendre auantage que de la raison des sages, sans émonuoir les passions des interessez : si vous desirez d'estre du nombre des premiers, ie vous supplie de mettre en consideration six choses ; desquelles i'ay voulu rendre compte à ceux qui aiment la Vertu & la Verité.

L'insolence de celuy qui a fait imprimer in folio dans vn grand volume les diuerses pieces pour seruir à l'Histoire du téps, nous a obligé à mettre en vn corps tous les livres que nous confessons auoir fait, afin de laisser dans les cabinets des curieux les

Responſes aux libelles diffamatoires, que pluſieurs corrompus ont compoſé contre le reſpect qui eſt deu à la Naiffance du Roy. Ces eſprits (que ie peux appeller malins & fols) ont eſté ſemblables aux milans. Si ces oiſeaux tripiers & ſots voyent voler vn duc, ou vn hibou, auquel le fauconnier a attaché vne queuë de renard; ils deſcendent du plus haut de l'air, pour fondre ſur ce qu'ils croyent eſtre vn monſtre: mais ils ſont attrapez, lors qu'on lache le ſacre apres eux, qui les pourſuit dedans les nuës, & à coups de bec les rameine battant iuſques en terre. Sage Lecteur, ie ferois tort à voſtre bel eſprit, ſi ie faiſois l'application: ie vous prie ſeulement, de ne croire pas que ie me donne quelque vanité, ſi ie diſ que i'ay eu vn grand auantage ſur ces vilaines beſtes, qui ne viuent que de corruptions & d'ordure.

II. I'ay deſiré, que vous ſoyez aduertit que i'eſtois eſloigné d'Anuers, où ces œuvres

ent esté imprimées. Cette cognoissance fera que vous excuserez les fautes, & quelques repetitions de mots, qui ne se voyent iamais bien que dans l'impression, qui est plus nette que les manuscrits. Vous estes trop sage, pour vous arrester sur vne parole qui sera deux fois dans vne page, ou dans six lignes; & vous estes trop iuste, pour me condamner pour vne syllabe, si vous auez suiet de m'estimer pour tout mon discours. Je vous diray aussi, qu'en pensant des cruelles playes ie ne cherchois pas avec curiosité des belles paroles: mais ie tachois d'employer avec adresse des bons remedes. J'adiousteray, que i'ay esperance qu'un iour mes escrits seront imprimez à Paris fort correctement sous le priuilege du grand seau.

Je croy que vous ne me blasmeriez pas III.
pour auoir vsé de quelques redites: ie ne l'aurois point fait, si i'eusse composé un ouurage de suite, & sans discontinuation:

ou si vn seul homme m'eust attaqué : mais ayant à combattre toute sorte de gens , qui ne disoient que les mesmes choses, avec quelque petite diuersité , i'estois obligé de respondre à chacun en particulier, de peur que celuy qui n'auroit point de repartie, ne s'estima plus adroit que ses compagnons. Avec ce rencontre, que i'appelle necessité, ie n'ay pas esté comme l'Echo qui repete bien souuent trois & quatre fois la mesme parole. Je crois auoir dit en diuers termes en deux , ou pour le plus en trois endroits, ce que des importuns ont chanté en trente ou quarante lieux , pour grossir leur cayer de frais ; c'est à dire, pour auoir vn plus grand payement.

IV. Je prie ceux qui liront ces escrits de considerer, qu'en cette derniere impression nous n'auons changé & adiousté que fort peu de paroles, & que nous auons laissé les choses comme elles estoient dans nos œuvres imprimées separément, & en diuers temps,

depuis l'an 1631. iusques à l'an 1636. Cette declaration seruira pour faire voir, que nous auons preueu & predict beaucoup d'affaires qui ne sont arrivées que cinq ou six ans apres.

Nous auons tiré ces lumieres des regles politiques, des Histoires du monde, & de la parfaite cognoissance que nous auons du naturel & desseins de celuy qui nous a obligé à le blasmer. Nous luy protestons, que, pour le bien du seruice du Roy & repos de la France, nous aurions plustost désiré quil nous eust donné suiet de l'estimer, comme nous auons fait deuant que la prosperité l'eust changé. Mais helas ! il nous reste vn extrême regret, d'auoir veu que les choses, que la Prouidence de Dieu auoit ordonnées pour la punition de nos pechez, n'ont peu estre euitées, encore que nous les ayons predites.

Vous iugerez aussi, que nous n'auons point failli en nos premieres pieces, n'ayant

pas touché beaucoup d'Histoires, qui ont esté logées du depuis dans nos escrits à mesure que le temps les produisoit.

VI. Pour conclusion, ie confesse que ie ne recognois point de veritez pures que celles de la religion Chrestienne: mais i'ose asseurer que les miennes sont entre celles, que les Historiens peuvent dire sur des faits, & par des raisons, qui n'ont point d'autres fondemens & appuis que ceux de la cognoissance & conscience d'une personne qui escrit ce qu'elle a veu, & qui auroit horreur de mentir à toute la terre, & aux siecles suivans. Si le Zele que i'ay pour la Religion, pour la Verité, pour le service du Roy & de la Royne sa Mere, ioint à l'affection & compassion que ie porte à mon Pays, a fait paroistre quelque ardeur: c'est un peu de fiel qui a eschaufé mon courage, mais qui n'a point troublé mon iugement, ny chargé mon ame d'aucun peché.

Adieu sage Lecteur.

ORDRE DES PIÈCES

contenuës en ce Volume.

LA PREMIERE.

L *A tres-humble, tres-veritable , et
tres-importante Remonstrance au
Roy.*

La seconde.

*Le François fidelle , ou Responce au libelle
intitulé Defense du Roy et des mini-
stres.*

La troisieme.

*La charitable Remonstrance de Caton
Chrestien.*

La quatrieme.

La Responce de Nicocleon à Cleonville.

La cinquiesme.

Le Genie demasqué.

La sixiesme.

La Responce à la lettre de Balsac.

La septiesme.

La Verité defendue.

La huitiesme.

Le Jugement sur les diuerses pieces.

La neuuesme.

*L'aduis de ce qui s'est passé sur le suiet de
certaines lettres. &c.*

La dixiesme.

*Les Lumieres pour l'Histoire de France
contre Duplex.*

L'onzieme.

La Lettre de Change protestee.

La douzieme.

L'Epistre au Roy & l'aduis au Lecteur.

La treizieme.

Abregé de la vie du Cardinal de Richelieu.

Seneca lib. de Breuitate vitæ cap. x.

ILLE QUI MVLTÀ AMBITIOSE
CONCVPIIT,

SVPERBE CONTEMPSIT,

IMPOTENTER VICIT,

INSIDIOSE DECEPIT,

AVARE RAPVIT,

PRODIGE EFFVDIT,

NECESSE EST MEMORIAM
SVAM TIMEAT,

Ibidem cap. xiv.

O QVANTVM CALIGINIS
MENTIBVS HVMANIS OBIICIT
MAGNA FELICITAS.

THE NEW YORK PUBLIC LIBRARY

ASTOR LENOX AND TILDEN FOUNDATIONS

1009 5th Ave. New York

1917

1917

1917

1917

1917

1917

1917

1917

1917

1917

1917



TRES-HVMBLE,
TRES-VERITABLE,
ET
TRES-IMPORTANTE
REMONSTRANCE
AV ROY.



IRE,

Quel estrange rencontre & quel
sujet d'estonnement à la France, à
la Chrestienté, & à toute la terre,
vn Roy du sang des Bourbons, qui sont tous
bons, qui est luy-mesme tres-bon; qui est natu-
rellement fort doux, merueilleusement pieux
enuers Dieu, qui porte le titre de I V S T E, qui
est formidable à ses ennemis, & en singuliere
veneration à toutes les nations du monde, pour
sa generosité, vigilance, & autres admirables
qualitez qui sont en son ame, & paroissent en
les actions.

De l'autre costé, nous voyons vne Royne, qui est la plus grande Princesse de l'Europe, en son Mariage, en vostre Naissance, en ses Enfans, en ses Alliances, en ses entreprises, en la conduite de sa personne, & en celle des affaires de V. M. lors qu'elle en a eu le maniement durant vostre bas aage, & en ses aduis lors qu'elle a esté dans vos conseils. Vne Royne tousiours Mere, & autrefois Regente en France; Mere qui a porté & enfanté avec peine, Regente qui a cōserué avec soin, celuy duquel despend la sureté de sa vie, la consolation de son ame, & qui est les delices de son cœur; dans lequel nous ne pouuons pas dire, qu'il aye le partage d'un aîné, puis qu'il le possède tout entier, & en est aussi veritablement le Roy, comme il en est le Fils. Vne Royne, en laquelle tant s'en faut, que le vice aye alteré la nature; que nous pouuons dire, que toutes les vertus Chrestiennes l'ont perfectionnée: sa religion, ses prieres frequentes & feruentes, sa charité enuers les pauvres volontaires, malades, honteux, prisonniers & mendiens, font paroistre que la grace de Dieu est en son ame, qu'elle conduit ses actions, & l'empesche de faillir, principalement à rendre par amour & par iustice ce qu'elle doit à celuy, que la prouidence diuine a fait Roy dans son ventre, au mesme temps, qu'elle l'a fait son Enfant.

Nous remarquons aussi, que pour rendre la France heureuse, & establir sa Paix, Dieu a donné à V. M. vn Frere, qui doit estre vostre bras droit, & le fera s'il est bien mesnagé. Ce Prince n'a aucune inclination à la malice: a vne auer-

ſion naturelle des broüilleries : eſt clement , liberal; & il a bien monſtré qu'il n'auoit point de mauuais deſſein , lors qu'il ſ'eſt retiré ſans ſçauoir là où il alloit , abandonnant les places de ſon appainage , & refusant celles qui luy ont eſté offertes. L'incommodité ne luy a point fait ietter la main ſur vos receptes, ny le meſcontentement ouurir les oreilles pour eſcouter les propoſitions , qui luy ont eſté faites par les eſtrangers. Il eſt parti de vos Eſtats en ſouſpirant, avec vne petite eſcorte , qui n'a point foulé vos peuples , qui a payé par tout , & a eſté renuoyée de la frontiere ; pour monſtrer, qu'on ſ'en vouloit ſeruir non pour faire le mal , mais pour fuir ce luy qu'on auoit ſujet de craindre.

SIRE, tous ces grands aduantages, que nous remarquons en V. M. en la Royne voſtre Mere, & en Monſieur voſtre Frere vnique , ſeruent grandement à la felicité de voſtre Regne , à la conſeruation du repos de voſtre Royaume , au ſoulagement de voſtre peuple , & à la bonne intelligence avec vos allies & voiſins. Nous auons attendu tous ces biens du rencontre de ces admirables vertus naturelles , morales , & Chreſtiennes. Nous pouons dire avec verité , que nous fuſmes confirmez en cette eſperance , lors que par l'inſtante priere de la Royne voſtre Mere , il vous pleuſt de rendre Miniſtre de voſtre Eſtat , Mr le Cardinal de Richelieu. Pluſieurs perſonnes le cognoiſſoient homme d'vn eſprit ſubtil ; & qu'on ne peut aiſément ſurprendre, parce qu'il eſt toujours en garde; qu'il dort peu , trauaille beaucoup ; penſe à tout , eſt

adroit, parle bien, & est assez instruit des affaires estrangeres. On iugea lors que cette election fut faite, que le grand desir d'honneur & de gloire, qui paroissoit en toutes ses actions, le porteroit à faire les bonnes, & à detester les mauuaises. On sçait bien qu'un peu de vanité rend le Capitaine plus genereux, & le Ministre d'un grand Roy plus jaloux de la reputation de son Maistre, & de la sienne. On voyoit que c'estoit un Cardinal; c'est à dire, un homme dans le premier rang de l'Eglise, apres celuy qui est hors de rang par dessus tous. Que les qualitez de Prestre, de Prelat sacré, & à la dignité de sa Pourpre le feroient souuenir de la Paix; qui est l'heritage, que I E S U S-CHRIST naissant, resuscitant, & montant au Ciel, a laissé à ses enfans; qu'il la procureroit dedans & dehors le Royaume avec tres-grand soin, destourneroit avec prudence ce qui la pourroit ruiner, & la restablir promptement, si par quelque malheur elle estoit perdue. Chacun s'imaginoit que le premier repos, qui est celuy de vostre Maison, ne pourroit iamais estre esbranlé, tant qu'on verroit en credit un homme qui auoit tant de sujet de conseruer l'union entre le Roy & la Royne, sa Maistresse & Bienfaitrice: que de cette bonne intelligence dépendoit celle de l'Esponse & du Frere unique, par consequent, la Paix domestique, qui attireroit, avec toutes les benedictions de Dieu, celles de vostre Mariage; & asseureroit la tranquillité de vostre Royaume. On iugeoit aussi qu'il ne pourroit estre troublé par les dehors, qui sont tenus par trois

grands Souuerains vos Beaufreres, & Gendres de celle qui auoit obligé vostre principal Ministre à melnager les esprits & les affaires en telle sorte, que vos interets & vostre reputation estant à couuert, Monsieur vostre Frere, & mes Dames vos Sœurs eussent quelque satisfaction de sa conduite. Il deuoit prendre cette resolution, pour le respect qu'il doit à vostre Sang, & à la memoire des bien-faits de la Royne vostre Mere, & la leur.

Ainsi chacuns s'estoit proposé en la promotion de ce nouveau Ministre d'Estat vn siecle d'or : il l'auoit fait esperer non seulement à V. M. & à la Royne vostre Mere, mais à tous ceux ausquels il parloit : il fit les protestations publiques de ce bon dessein, avec vn discours bien preparé, & accompagné de larmes, à l'ouerture de l'assemblée des notables tenuë aux Tuilleries l'an 1616.

On a veu du depuis le siege de la Rochelle, la defroute des Anglois, & la prise de cette place, qu'on croyoit estre imprenable, si Dieu (à ce qu'on dit) n'eust inspiré à Mr le Cardinal les conseils qu'il vous a donnez. On a recogneu, qu'en suite de ce coup d'Estat frappé sur la teste de la rebellion, tous les autres membres ont esté estonnez ; & que ceux qui pouuoient reprendre quelque vigueur, ont esté liez si estroittement, qu'ils sont dans l'impuissance de troubler le repos public. Apres auoir estouffé la guerre au dedans, les allies ont esté assistez par les armes de V. M. elles ont arresté les trois plus grandes Puissances de l'Europe. La Sauoye, & vne bonne partie du Piedmont, ont receu vos

loix : Cazal a eſté ſecouru : le Prince , que vous auez voulu proteger , & qui eſtoit ſur le point d'eſtre accablé , a eſté releué par voſtre main Royale, & a eſté conſervé dans la meilleure place de ſes Eſtats. Nous aduoüons , que dans tous ces bons ſucces , les conſeils & les ſoins de Mr le Cardinal ont contribué quelque choſe , ſans nous arreſter à ſes intentions. Mais nous pouvons dire auſſi avec verité , qu'il faut reſeruer la plus grande partie de cette gloire aux genereuſes reſolutions de V. M. à ſa preſence , à ſa vigilance , & à ſa bonne conduite. Il faut auſſi confeſſer , que les forces reglées de voſtre Eſtat y ont ſerui , que vous auez eu de ſi bons Capitaines , vne Nobleſſe ſi courageuſe , & des ſoldats ſi hardis , qu'ils meritent quelque petit eſchantillon de cet honneur , encore que certains eſcriuains corrompus vous en donnent la moindre part , & n'en laiſſent du tout point à vos bons ſeruiteurs.

Helas , SIRE , qu'auons-nous veu , & que voyons-nous , durant & apres que vous auez eu tous ces grands aduantages ; & que celui auquel on donne la premiere loüange , a eſté le principal Miniſtre de voſtre Eſtat ! Nous auons veu voſtre Royaume affligé de guerre , de peſte , & de famine : les trois fleaux de Dieu ont eſté liez enſemble pour nous battre : il nous a fait cognoiſtre , qu'il y auoit quelque choſe non ſeulement en nos mœurs particulières , mais dans noſtre conduite generale , qui deſplaiſoit à ſa diuine Maieſté , & attiroit ſur nous toutes les maledictions , qu'il verſe en ſon indignation ſur

son peuple. Il y a des Prouinces en France, où vous n'avez que le tiers des sujets, qui viuoient il y a trois ans. On dit, que la peste & la famine sont du nombre de ces maladies qu'on appelle diuines; & que la prudence & la charité des hommes ne sçauroient preuenir ny guerir les maux, qui viennent de la mauuaise disposition de l'air & de la terre: mais V. M. sçait bien qui sont ceux, qui au lieu d'arrester les cours de ces desordres, vous ont fait perdre tous les iours autant d'hommes qu'il en mourroit en vne bataille. Nous voyons en ce mesmetemps, & par les mesmes causes, cinq ou six des plus importantes Prouinces de vostre Royaume, & qui sont toutes frontieres, grandement esmeuës pour les changemens qu'on y a voulu faire. Elles ont souffert depuis six années les foules des passages des gens de guerre, & les leuées extraordinaires qui ont esté faites, en argent, en mulets, en bleds, & fourniture des estâppes. La contagion les a quasi depeuplées, a rendu la campagne sterile, & la faim a contraint de manger les animaux qui seruoient pour cultiuer la terre. On adjouste à tous ces maux, celuy que le mescontentement de tous vos Officiers de Iustice a produit, pour auoir esté traitez comme des Financiers, qu'on espraint de temps en temps; ce qui leur a osté non seulement l'affection, mais l'auctorité qu'ils auoient parmi vos peuples, qu'ils ne veulent ou ne peuuent plus contenir en leur deuoir. Ainsi toutes choses sont reduites à la force, & à la necessité de retenir les villes dans l'obeissance, & de leur

faire receuoir les nouueautez par les armes : là où auparauant , l'Amour par sa douceur , & la Iustice avec la baguette d'un sergent faisoient sans bruit , ce que les armées ne peuuent faire , lors qu'on est contraint de les diuiser en plusieurs pieces , & que les hostes des soldats mal payez sont leurs plus grands ennemis.

On entend en ce mesme temps les Ecclesiastiques , qui disent qu'un seul homme possède vingt grandes Abbayes , & se descharge de ses decimes sur les pauures Prestres. La Noblesse se plaint de ce qu'on fait le procez aux personnes priuilegiées , & aux Officiers de la Couronne , comme à des roturiers , & que leur honneur & leur vie dépendent de la corruption d'un Commissaire , qu'on a veu enfariné sur vn theatre : que les Mareschaux de France sont emprisonnez sans accusation , & gardez estroitement sans forme de Iustice : que les charges & gratifications , que les Gentilshommes pouuoient esperer par leurs seruices , sont reseruées à ceux qui sont dans les interets , dans la confiance , à la suite de M^r le Cardinal , & qui sont employez pour l'acheminement de ses desseins. Les Capitaines & les soldats sont au desespoir , de se voir reduits à l'aumosne ; lors que des gardes , qui sont tousiours à l'ombre d'une salle , reçoient des bonnes monstres & bien réglées , pour estre en faction vne heure à la porte d'une chambre , le pistolet bandé , amorcé , & le chien abatu , caché sous vne roupille d'escarlata. Qu'il n'y a point de troupes bien payées & par lemaine , que celles qui gardent vn grand nombre de pla-

ces maritimes, qui sont les seules bien munies, pour servir de retraite aux thresors, & à la personne de celuy, qui persuade qu'il n'y a rien d'assuré à V. M. que ce qu'on luy confie. Il est vray qu'il employe pour l'entretien de ses garnisons plus de finances, qu'on n'en distribué effectivement pour faire subsister des armées de vingt mille hommes. Les Officiers, les marchands, & le pauvre peuple, disent, qu'on tire d'eux par voyes ordinaires & extraordinaires le dernier escu, sans que V. M. soit plus riche, lors que vos bien-faits, despences, & appointemens de vostre Maison sont retranchez d'un tiers, que vos plaisirs peuvent à bon droit estre appelez menus; que les delices ne vous coustent rien, vos bastimens fort peu; & que vos armées se desbandent à faute de payement.

Grand & bon Roy, que sera-ce lors qu'on adjousterà à tous ces desordres les deux que nous auons veus depuis peu, & qui nous ont tiré des larmes de sang? La Royne vostre Mere, qui a le plus notable interest à la conseruation de vostre vie, & de vostre gloire; qui est la Vefue de cet incomparable Henry le Grand, qui vous a fait homme & Roy avec elle; celle qui vous a defendu mineur contre vos ennemis, qui vous a rendu vos Estats tous entiers, qui vous a conseillé de prendre vne Espouse tres-vertueuse: cette Mere qui vous a aimé plus qu'elle ne fait les entrailles desquelles vous estes sorti; qui n'est ny atteinte ny accusée d'aucun crime, que d'auoir cessé d'aimer celuy, qu'elle vous a fait aimer, deuant qu'elle cognust ce que le temps

& les occasions, qui changent les mœurs & les humeurs des hommes, luy ont descouuert. Cette Royne, que son Mariage, vostre Naissance, & ses vertus rendent la plus considerable Princesse, & la plus digne de respect qui soit en toute la terre, n'a point trouué de seureté dans tous ces aduantages, ny dans vostre Maison. Ces belles qualitez, qui deuroient couvrir vn grand peché, n'ont pas eu le pouuoir de protéger vne grande innocence; son seruiteur qui seroit obligé de l'absoudre, si elle estoit criminelle, est celuy qui la condamne estant exempte de crime; & celuy qui seroit refusé par les parties de sa Bienfaitrice, si elle en auoit d'autres que luy-mesme, est son denonciateur & son iuge. Elle a esté reduite à vn estat, qui vous est inconnu, & a esté caché par les artifices estranges, pour vous rair le merite deuant Dieu, & la gloire deuant les hommes, de mettre fin à ses miseres, & au blasme que les ignorans peuvent ietter sur vous.

Nous ne dirons pas quel nom ils ont donné à la detention de la Royne vostre Mere, & ne publierons point les circonstances du mal qu'elle a enduré: ses yeux estoient, & sont encore deux fontaines de larmes; sa poictrine rend plus de soupirs, que son estomac ne reçoit de morceaux; son cœur a plus de battemens d'apprehension pour vous, que de mouuemens naturels. Son poulmon, n'ayant respiré qu'un mauuais air enfermé, se corrompoit, & se rompoit, ne receuant plus le doux rafraischissement que vostre presence luy apportoit: elle mouroit dans vn

iour autant de fois, qu'elle vous a cōſerué la vie durant neuf mois. Le regret qu'elle a de vous auoir donné pour cōſeiller à Compiègne, celuy qui luy a donné la mort au meſme lieu, luy a cauſé autant de ſyncopes comme il a receu d'elle de bien-faits. Elle a peur que ſon ambiſiō ſans fin & ſans meſure ne le rēde ingrat enuers ſon Maiſtre, comme elle a fait enuers ſa Maiſtreſſe; & ne le porte à ruiner non ſeulement voſtre Eſtat, à quoy il a deſia bien trauaillé, mais voſtre perſonne, comme il a fait la liberté, & la ſanté de voſtre bonne Mere, & de ſa grande Bienfaſtrice.

Quelques iours deuant la detētion de la Roynne voſtre Mere, Monſieur; ſans luy auoir communiqué ſon deſſein, priſt reſolution de faire quelques plaintes à Mr le Cardinal, pour le mauuais traitement qu'il receuoit de luy. Il fiſt cognoſtre auſſi, qu'il auoit quelque reſſentiment du deſplaiſir de la Roynne ſa Mere: il demeura pourtant dans les termes d'une grande retenue, & ſes paroles furent ſans aigreur; il creut que Mr le Cardinal, qui n'auoit peu ſouffrir celles de ſa Maiſtreſſe, & auoit recherché tous les moyens de ſ'en venger, ſe pourroit porter à des plus grandes extremitez contre celuy auquel il n'auoit pas tant d'obligation. Il ſçauoit auſſi que ſon Eminēce eſtoit dans vne continuelle apprehenſion de quelque violence, de laquelle l'eſprit de Monſieur a eſté eſloigné par la crainte de Dieu, & par le reſpect qu'il vous porte. Il iugea, qu'il n'y auoit point de ſeureté pour luy, ny de moyen de ſe cōſeruer vtile pour voſtre ſeruiſe, qu'en la retraite qu'il priſt dās la Capitale de ſon

appannage, où il viuoit plus en bourgeois qu'en factieux. On s'imagina, que le séjour estoit trop près de la Cour & de Paris, & qu'il falloit éloigner le peril, que la mauuaise conscience se represente tousiours. On proposa à V. M. qu'il estoit expedient d'aller à Estampes, pour auoir plus de moyen de traiter avec Monsieur, & de le rappeler aupres de vous: cependant on fit aduancer vos troupes, qui coururent iusques aux portes d'Orleans, & qui empescherent les viures d'y entrer: cela fut caché à V. M. & obligea Monsieur vostre Frere à fuir la faim, & sa maison, qu'il voyoit enuironnée de tous costez; & tantost en estat de luy seruir de prison. Il se retira par le chemin qui luy estoit seul ouuert, & se fit accompagner par deux cens hommes de guerre, iusques à ce qu'il eust trouué quelque sureté dans l'affection des siens, & compassion des estrangers.

S I R, c'est la veritable & lamentable histoire de la retraite de Monsieur vostre Frere unique, que vous auez aimé tendrement, iusques à ce que le Cardinal de Richelieu vous en a donné des mauuaises impressions. C'est ce Prince, auquel de vostre seul mouuement vous auez fait rechercher vn second mariage, ayant consenty au premier, encore qu'on eust tasché de vous en diuertir. C'est ce Frere, auquel vous auez dit par vn excez de grande bonté, que vous le teniez pour vostre fils, & l'auez traité comme s'il auoit l'honneur de l'estre. Il a grand tort, s'il a oublié toutes ces faueurs, & si le mauuais conseil a eu plus de puissance sur son esprit, que son sang,

son deuoir, & son bien. Mais V. M. considerera, s'il luy plaist, si la déplorable condition de la Royne vostre Mere a touché ce Prince, non seulement d'un extreme desplaisir, mais encore d'une viue apprehension, de se voir par les mesmes artifices, & par des raisons plus fortes en apparence, reduit au mesme estat. Sans doute on luy a voulu oster le moyen de vous faire entendre, que vostre reputation & la sienne pourroient receuoir quelque atteinte, si on n'apporte à la playe qui a esté faite à vostre Naissance, & à la sienne, un remede autant puissant, comme il vous sera aduantageux & honorable. Vous le ferez, grand Roy, lors que vous serez bien informé de l'estat de cet affaire, qui est le plus important & le plus pressant que vous ayez iamais eu, & pouuez iamais auoir, puis qu'il touche vostre conscience, vostre honneur, & vostre Estat.

C'est ce rencontre qui fait sousspirer tous vos fideles seruiteurs, & qui oblige ceux qui ont quelque cognoissance plus particuliere de ce mal, de vous en descouurir les effets, qui sont autant dangereux, cōme la cause en est maligne.

Permettez qu'on la vous face voir; & ne croyez pas, s'il vous plaist, qu'avec bonne raison & caution, les discours de ceux qui sont pris à partie, & desquels vous deuez estre le Iuge aussi bien que de nous : Que l'aduantage qu'ils ont d'estre tousiours attachez à vos oreilles ne vous surprenne pas, pour faire declarer innocens les flatteurs, & condamner comme criminels les veritables. Nous vous protestons, SIRE, deuant

la Majesté diuine, qui nous doit iuger selon la cognoissance qu'elle a de l'interieur de nos cœurs, qu'ils sont ennemis de la calomnie, amis de verité, portez à vostre seruice, tres-desireux de vostre gloire. Nos esprits ne sont pas si mal instruits en la Religion Chrestienne, que nous n'ayons appris, *que la colere du Roy est messagere de mort; & que celuy qui la prouoque, peche contre son ame.* Nous sçauons, *que la mauuaise pensée contre l'oinct de Dieu est defendue*; à plus forte raison, les paroles, les escrits & les actions qui apporteroient du scandale, qui est le plus grand de tous les crimes dans nostre Religion, estant commis contre la charité vniuerselle. Ces considerations de conscience, non la crainte des prisons & des supplices, nous portét à supplier tres-humblement V. M. d'examiner les discours & les desseins de ceux qui voudroient engager leurs maistres à les venger, en leur persuadant qu'ils sont offencez dans les plaintes qu'on fait contré des seruiteurs; qui sont tellement accoustumez à ouyr les mensonges des flatteurs, qu'ils prennent les veritez des gens de bien pour injures. SIRE, nous n'attaquons les defauts qui vous sont inconnus, & qui sont couuerts par vn grand artifice. Nous declarons, qu'il n'y a point de manquement ny de foiblesse en V. M. Si vn esprit ardent qui consume son corps eschauffe quelquefois vostre cœur; nous sçauons que l'eau forte graue plustost sur l'acier & sur le cuivre, que sur le bois & sur la cire. Il ne se faut pas estonner, si vostre ame estant forte reçoit quelque impression; & si estant bonne, elle est sur-

prise par vn Cardinal que la pieté vous fait estimer ; ny si vous estes embarrassé par vn esprit qui veille quand vous dormez , qui trauaillè iour & nuict pour vous donner des ombrages contre vos plus proches , pour trouuer les moyens de conseruer son credit, & pour fermer les fenestres à toutes les lumieres qui pourroient esclairer ses actions & ses discours. Vous estes trompé par vn grand nombre d'inuentions , desquelles les ames vertueuses ne se desient pas , que les plus sages ne peuuent descouurir ; & dans lesquelles Salomon , qui a eu le don de la plus parfaicte sapiënce que Dieu aye iamais communiqué aux Roys , auoit esté surpris. Il nous assure , que *le mal de l'aduancement des meschans* , qu'il appelle *fols*, estoit sorti de luy par la tromperie qu'on luy auoit fait.

SIRE, ce n'est pas vne imperfection aux hommes de ne faire point de miracles, & ce n'est pas vn aueuglement de ne voir pas les rayons du soleil , lors qu'il nous sont desrobez par vn corps obscur , ou en bouchant tous les trous par lesquels ils peuuent approcher de nos yeux. Vous auriez ceux de Tibere, qui estoit vn Tyrā, si vous voyez dans la nuict. Vos actions seroient plus miraculeuses que n'ont esté celles de plusieurs Saints, si dans le bruit de tous les affaires, dans lesquels on vous iette, & sur tout, dās ceux de la guerre, & des frequens voyages, vous sondiez & penetriez les intentions des hommes artificieux, avec autant de loisir & de repos que scauroit faire vn Philosophe solitaire : vous seriez

vn Ange, ſi toutes vos cognoiſſances eſtoient des reuelations. La verité ne pouuant entrer dans voſtre eſprit par le moyen des hommes; tous ceux qui ont l'honneur de vous approcher eſtans corrompus par bien-faits ou par eſperances, ou intimidez par les frequens banniſſemens & empriſonnemens de vos plus fideles ſeruiteurs. Ce n'eſt pas vn defect en vous, ſi la malice & la fineſſe vous ſurprennent bien ſouuent: voſtre aage, vos occupations, & meſme voſtre bonté, ne vous permettent pas d'examiner tous-jours des conſeils preparez. Vous ne ſeriez pas l'image de Dieu, mais luy-meſme, ſi vous eſtiez *ſcrutateur des cœurs profonds*; & vos yeux ne ſeroiēt pas mortels, ſi vous voyez auſſi clairement les penſées, comme vos oreilles eſcoutent attentiuement des paroles diſpoſées par vne grande eſtude, bien ſouuent accompagnées de proteſtations de fidelité, & quelqueſois ſuiuies de larmes.

Il ne faut pas trouuer eſtrange, ſi tous ces artifices ont donné des mauuailes impreſſions à voſtre ame; n'eſtant point croyable, que pour taſcher de la rendre ſeuere, & d'accabler vne parfaite innocence, les eſprits malins n'ayent inuenté des calomnies ſi noires, que l'enfer n'en a iamais produit de ſemblables: ſans faute, les ſoupçons de quelque entrepriſe, non ſeulement ſur voſtre Couronne, mais ſur voſtre vie, ont eſté employez pour taſcher de vous faire haïr, & ruiner ceux qui ont le plus notable intereſt à la conſeruation de l'vne & de l'autre. Ce ſont les inuentions ordinaires des mauuais ſeruiteurs,

teurs, qui veulent poſſeder tous ſeuls les affectionſ de leurs Maîtres, de leur rendre ſuſpectes les plus naturelles. Ils ſçauent bien qu'il n'y a point de perſonnes plus fideles que celles qui veillent par amour, & par intereſt; par conſcience, & par iugement : il faudroit que des grands crimes euſſent eſtouffé toutes ces choſes. Mr le Cardinal eſt obligé de les faire voir en Juſtice, là où nous demandons, que les ſiens ſoyent examinez. Il ne ſe doit pas ſeruir de l'oppreſſion, ny commencer par vne peine la plus rude qu'une bonne Mere puiſſe ſouffrir, qui eſt vne priſon, & vn eſloignement. Tout cela eſt ſuiuy d'une declaration infame, des ſaiſies des rentes & des meubles d'une perſonne qui n'eſt pas accuſée; pour reduire, ſi on pouuoit, la plus grande Princeſſe du monde à vne extrême neceſſité, & l'obliger de ſe rendre à diſcretion à ſes ennemis. V.M. les doit tenir pour les ſiens, quand ils n'en auroient iamais donné autre preuue, que d'auoir rendu l'object de la compaſſion de tous vos peuples, & de toute la terre, la Veſue & la Mere des grands Roys. Voſtre ſeruiteur & le ſien l'a contrainte, pour mettre ſa vie à couuert, de chercher vne autre terre que la France, dans laquelle Dieu s'eſt ſeruy d'elle pour vous faire Roy, & qui vous a eſté conſeruée par ſa prudence & par ſon courage. Pour vous porter, ie ne diſ pas à diſſimuler, ny à ſouffrir ce ſcandale public, mais à permettre qu'on ſe ſoit couuert de voſtre auctorité & de voſtre nom, il faut qu'on aye employé des ſuppoſitions & calomnies tout à fait diaboliques. Nous en auons

veu quelques-vnes dans vn libelle infame, qui a esté imprimé depuis peu, sous le titre de vostre défense, & de vos Ministres; & nous ne sommes pas trompez, lors que nous iugeons hardiment des discours qu'on vous peut auoir fait, non seulement par la detention de la Roynne vostre Mere, & par l'esloignement de Monsieur vostre Frere vnique, mais par ceux que les confidens de l'aucteur de ces desordres ont tenus à leurs amis; par les blasphemes que ses complices ont vomy contre vostre Sang, & par les execrables mesdisances des moindres valets dispersez dans les cabarets de la ville de Paris. On a voulu empoisonner les esprits du petit peuple par des impostures qui ont fait horreur aux gens de bien, & qui ont fait trembler les sages, lors qu'ils ont cogneu l'artifice de ceux qui ont tasché de troubler la source de laquelle Dieu vous a tiré, & de perdre celuy qui en est fort y apres vous.

Ce sont ceux-là, SIRE, qui vous blasment en effet, qui veulent oster quelque chose à la dignité de vostre Naissance. Ce sont ceux-là, SIRE, qui sont traistres descouuerts, qui fournissent aux couuerts matiere de discours estranges, & qui donnent moyen d'entreprendre à ceux qui ont des mauuais desseins. Ceux-là, SIRE, enflent le cœur aux ennemis, qui iettent la diuision dans vostre Maison, & qui appellent les voleurs en y mettant le feu. Ce sont ceux-là, SIRE, qui vous desrobent vostre gloire, qui payēt des escriuains pour faire publier par tout, qu'eux seuls ont pris la Rochelle, & domté les

rebelles; qu'ils ont batu l'Empereur; les Roys d'Eſpagne & d'Angleterre, & le Prince de Piedmont; qu'ils ont conqueſté le pays du dernier, ſauué celuy du Duc de Mantouë, & ſecouru Cazal. Ce ſont ceux-là, SIRE, qui ſe veulent eſleuer par deſſus vous, qui apres auoir rangé ſous leurs pieds la Royne voſtre Mere, & Monſieur voſtre Frere, ſont imprimer, que vous deuez imiter ce que faiſoit le Roy Ferdinand au Cardinal Ximenes; aller au deuant d'eux teſte nuë, & vous mettre à genoüils lors que vous les approcherez. Ce ſont ceux-là, SIRE, qui ſe veulent emparer de voſtre Eſtat, qui ont en leur diſpoſition voſtre ſeau, voſtre plume, vos Finances, vos canons, vos vaiſſeaux, & vos principales places maritimes & frontieres, qu'ils talchent à vos deſpens de rendre imprenable à vous-meſmes. Ceux-là ont violé le reſpect qui eſt deu à voſtre perſonne, l'auctorité de voſtre Couronne, & les loix de voſtre Eſtat; non ceux qui ne demandent rien que l'honneur de vos bonnes graces, que le reſtabliſſement de la Paix, que l'ordre en toutes choſes; & que V. M. ne croye pas, que leurs ſalutaires aduiſ ſoient eſcrits pour deſcrire voſtre gouuernement. Nous ſçauons, qu'il eſt defendu de *meſdire en ſon cœur des Roys*; & que les *oyſeaux du Ciel* (c'eſt à dire, les *Anges*) *declareront nos penſées ſecretes*. Si quelque trait de noſtre plume eſtoit mal interpreté par les ignorans & malins, nous ſupplions tres-humblement V. M. de croire, que nous ſommes plu. toſt mal adroits que malicieux. Les Eſcriuains du Cardinal qui entreprendront de nous

reprendre, ne seront pas seulement infideles à leur Roy, mais rebelles à la lumiere, qui leur fait voir ce qui est aussi clair que le soleil.

Nous protestons aussi, que nostre dessein n'est pas de sortir hors des termes du respect que nous deuons, comme enfans de l'Eglise, à la Pourpre sacrée des Cardinaux : nous aduouions que cette dignité est tres-eminente, & doit estre en singuliere veneration, comme estant la premiere parmy les Chrestiens, apres celle qui est sans pair. Nous sçauons bien, que si cette-cy nous represente IESVS-CHRIST, celle-là est l'image du saint College deses Disciples : mais nous n'ignorons pas aussi, que si entre les douze le malin esprit en a corrompu vn pour le rendre auaricieux, infidele, & ingrat, il n'en puisse plus aisément posseder vn entre les septante deux. Les pechez & crimes secrets des Prelats de l'Eglise doiuent estre cachez, de peur de scandalizer les foibles, & pour ne donner iamais auantage à ceux que les opinions nouuelles ont fait separer de nous. Mais si les boutons de cette face ne se peuuent couvrir, si les defauts de ces personnes sont non seulement publics, mais tendent à la ruine du public; sera-il dit, qu'on portera tant d'honneur à la Pourpre d'un Prince, que s'il se presente le premier à la bresche par laquelle on va prendre vne ville pour la saccager, on n'ose point tirer sur luy? Nous accusera-on d'auoir laissé perir vn grand Royaume, composé de tant de Sages & de riches, qui preuoyent & apprehendent sa desolation, & de tant de pauures qui la sentent desia

ſans qu'il ſoit loifible de dire d'où nous vient ce mal ; parce que c'eſt vn Preſtre, vn Eueſque, & vn Cardinal qui le fait ? A la verité ce ſeroit vne ſuperſtition d'une conſcience foible, vne l'aſcheté d'un petit courage, & ſurtout vne tres-grande injuſtice, d'auoir p'eſeré le reſpect qu'on veut porter à vne dignité & à vn habit, au ſalut de tant de millions d'ames & de corps qui periſſent par le deſeſpoir, par la guerre, la peſte & la famine, qui ont tantost rauagé tout ce pauvre Royaume, ont réduit à la neceſſité la moitié du peuple, & en ont tué le tiers.

Non, il ne ſera pas dit, que nous ayons abandonné la cauſe de Dieu, qui eſt celle de la Juſtice, & de la Paix, ny celle de V. M. qui eſt trompée, & mal ſeruite, ny celle de voſtre Eſtat, qui eſt tantost ruiné ; ny celle de la Royne voſtre Mere, qui a eſté detenuë priſonniere par l'ingratitude ; ny celle de Monſieur voſtre Frere unique, qui a eſté chaffé par la vengeance ; ny celle des Grands de voſtre Royaume, & Officiers de voſtre Couronne, qui ſont emprisonnez, bannis, & deſpouillez de leurs charges par l'enuie & la colere : ny generalement celle de toute la France, laquelle vous demande Juſtice contre ceux, qui ſous le Regne d'un bon Roy exercent les plus grandes meſchancetez & injuſtices qu'on aye iamais leu dans les Hiſtoires.

Et afin que V. M. recognoiſſe plus clairement toutes ces veritez, il eſt neceſſaire de vous eſcrire la ſource du mal, c'eſt à dire, le naturel de celuy qui l'a produit. On diſpute des effets

des eaux medicinales ou venimeuses , par les qualitez des mineraux par lesquels elles passent; & on iuge des inclinations, vertus & vices des hommes, par leur temperament. Il est certain, que celuy qui est le principal aucteur de tous les desordres de la France, est tellement composé, que la colere & la melancolie prédominent en luy. Cette disposition est ordinairement celle des bons esprits, qui ont de la premiere humeur la subtilité & viuacité pour comprendre, avec la facilité pour parler; & de la seconde, la sagacité, l'astuce, & multitude des inuentions. Comme le sang ainsi temperé est excellent pour les fonctions de l'ame superieure, si elle se veut porter au bien; il faut aduoüer qu'il est tres-dangereux, si elle se jette dans le party du mal, ne pouuant aller avec sa promptitude & adresse qu'à de grandes extremittez. Ainsi les Anges corrompus sont des diables; les chairs les plus delicates estant pourries sont les plus infectes, & les plus belles plumes estant brüllées sont les plus puantes. Vn esprit delié, & vne langue bien affilée, sont de bonnes armes maniées par la prudence, & tres-dangereuses entre les mains de la finesse: celle-là est conduite par la vertu, & se propose le bien public; cette-cy est poussée par le vice, & n'a deuant les yeux que son interest. C'est la gouuernante de celuy qui a souuent confessé à ses familiers, qu'il estoit en cela semblable aux singes, qu'il ne pouuoit iamais marcher par les droites lignes: aussi n'eust-il iamais sincerité, ny en ses paroles, ny en ses actions, ne faisant pas mesmes les plus naturel-

les ſans quelque déguiſement. Ce grand pilote d'Eſtat, & Amiral, eſt en cela ſemblable à ceux qui manient le timon des vaiſſeaux, qu'il tourne ſouuent le dos au lieu où il veut aller. S'il entreprend de ruiner le Parlement de Paris, ils'y fait receuoir Conſeiller: pour deſtruire la Sorbonne, il l'a fait baſtir: pour acheuer le premier mariage de Monſieur voſtre Frere, il demande acte comme il n'en eſt point d'aduiz: pour faire aller V. M. aux iours Caniculiers dans vne armée affligée de peſte, il proteſté qu'il ne le conſeille pas: pour faire emprisonner Mr le grand Prieur, il luy promet, qu'il luy procurera la conduite des armées nauales. S'il craint le courage d'un genereux & grand Seigneur, il le iette dans les hazars, qu'il appelle emplois honorables: s'il le veut incommoder, il l'oblige à beaucoup de deſpence: s'il deſire de le ruiner de reputation, il le careſſe, & le fait meſpriſer par les ſiens. Apres auoir apporté dans voſtre conſeil, & fait auancer par ceux qui dépendent de luy, des raiſons fortes en apparencé pour vn deſſein qu'il veut acheminer, & des foibles pour le contraindre; il croit qu'il ne ſera pas tenu pour vn Conſeiller hazardeux, & qu'il aura toute la gloire d'un bon ſuccez. Il fait en forte, s'il eſt mauuais, qu'il a moyen de dire, que c'eſt contre ſon ſentiment qu'on a entrepris ce qui n'a paſ reuſſi. Tels ſont les traits de ſa diſſimulation, que nous ne rejettons pas entierement, & aduoions qu'un grand Conſeiller d'Eſtat ſ'en doit ſeruir quelquefois: mais nous ne pouuons approuuer,

que celle qui cache le secret, & qui fait bonne mine en l'aduersité. Nous detestons celle qu'on appelle en ce temps fourberie, qui se sert de duplicité & menterie aux promesses & aux traitez, & ruine entierement la confiance, sans laquelle les Grands ne peuvent viure avec leurs amis, alliez, seruiteurs & sujets, ny se reconcilier avec leurs ennemis. V. M. sçait bien, que celuy que nous descriuons est maître iuré en tous ces artifices, & qu'il est en cela, comme en beaucoup d'autres choses, fort contraire à Dieu. Sa sainte prouidence permet le mal pour en tirer du bien: là où si la finesse du Cardinal fait ou procure du bien à quelqu'un, c'est pour en tirer du mal avec le temps, & pour faire qu'une pierre d'auantage soit une pierre d'achopement, auquel il conduit insensiblement ceux qu'il a obligez en apparence. C'est qu'il est generally ennemi de tous les hommes, parce qu'il les mesprise tous. Ceux qui ont des belles qualitez naturelles, & l'esprit fort ouuert, sont ceux qu'il deteste le plus, ne les auance iamais, & ne les reçoit point à son seruice, de peur qu'ils ne remarquent ses imperfections, ou qu'on ne presume dans la Cour qu'il se sert de leurs aduis. Il ne laisse pas de faire son profit de ce qu'on luy dit, encore qu'il face semblant de l'improuuer, principalement lors qu'il se trouue en desordre; ce qui luy arriue souuent dans les grandes affaires. Quand elles ne reussissent pas selonc ses intentions, & que son imprudence est descouuerte; son visage & sa parole font voir la bassesse de son courage: & nous pouuons dire avec verité,

qu'il n'est dissimulé qu'en la prosperité, & qu'en l'aduersité sa face changeante est la monstre de l'horologe destraquée de son ame. Tous ses efforts sont si naïfvement marquez au dehors, qu'il n'y a point d'homme si grossier qui ne les reconnoisse, ny de sage qui ne iuge, que c'est vn tres-grand defect en vn Ministre d'Estat. Celuy-là n'est pas moindre, de n'estre iamais rencontré deux fois en égale disposition : c'est bien vn mesme canal de riuiera, mais ce n'est pas vne mesme eau qui coule dedans. Aujourd'huy il caresse vn homme avec chaleur, demain il le reçoit avec froideur ; apres demain luy fait cognoistre que sa visite luy est à charge : cette humeur ne le quitte non plus pour ses plus proches, que pour les estrangers, & pour les seruiteurs.

Cet esprit ainsi composé est si malade, qu'il n'y a rien qui ne le blesse, & rien qui le puisse guerir : les veritables aduertissemens qu'on luy donne, sont escoutez avec chagrin & mespris, aussi bien que les faux. Il ne fait point ce qu'il dit, ne dit point ce qu'il fait ; & n'accomplit point ce qu'il promet. Il s'occupe iour & nuict à chercher ce qu'il doit dire, non seulement à V.M. pour luy couvrir la verité, mais à tous les Grands avec lesquels il doit traiter, iusques à mediter sur les complimens qu'il doit faire aux plus petits pour les amuser. Voila son principal estude, & à quoy il eschauffe son sang, qui ne reçoit point tant de rafraischissement des bains qu'il prend tous les iours, que lors qu'il voit ses piperies, ses caresses, ses protestations & ses déguisemens receus pour des naïfuetez.

Les plaisirs ou les peines qu'il prend en semblables meditations, le priuent du sommeil ; & font que s'il se iette dans les diuertissemens des musiques, du jeu, & de la raillerie, ils s'ennuye aussi-tost, la melancolie le rejettant dans la des fiance ou dans la recherche de quelque tromperie. Il a en sa ieunesse aimé les voluptez, qui luy ont fait faire des choses non seulement indignes de sa profession, mais tout à fait ridicules : on ne les publie point dans cet escrit, qui ne doit coter que les imperfections & les fautes prejudiciables à l'Estat. Les lettres ont seruy pour subtilizer dauantage son esprit, & pour le faire entrer dans la Cour : à quoy quelques predications, & les recommandations de Madame la Marquise de Guercheuille seruirent beaucoup : elle en a esté recompensée du depuis, comme chacun sçait. Les premiers tours de la souppléssé de son esprit parurent à Rome, où il trompa le Pape Paul V. luy ayant fait entendre qu'il auoit l'âge pour estre Euesque ; & apres son sacre ayant eü recours à l'absolution du saint Pere : qui dist en presence de quelques Cardinaux, qu'il recognoissoit en la façon & aux actions de ce ieune homme, que s'il viuoit long-temps, il seroit vn grand fourbe. Ces paroles sorties de la bouche de l'Oracle de verité ont esté des propheties ; & l'experience nous a fait voir, que Paul V. ne les auoit point dites comme homme, mais comme Pape, qui ne peut mentir.

De cette composition naturelle, corrompue par l'ambition & par l'auarice, viennent tous

les defauts que nous auons remarquez, & plusieurs autres que nous couurons, parce qu'ils ne tourmentent que celuy qui en est atteint, & le rendent plus digne de compassion que d'enuie. SIRE, il est certain que M^r le Cardinal eust esté estimé homme d'esprit, s'il ne l'eust trop produit, & s'il l'eust conduit par le droit chemin: il est mal-heureux en sa felicité, en ce que son bien ne le laisse non plus en repos que son mal; qu'il ne trouue le sommeil qu'apres s'estre lassé dans sonlict, où il est agité par ses irresolutions, n'osant point entreprendre tout ce qu'il desire, & ne pouuant venir à bout de tout ce qu'il entreprend. Il est tousiours en bransle, parce qu'il est suspendu entre la crainte & l'esperance, qu'il se voit obligé de viure non comme il veut & il doit, mais comme il a commencé. Il n'est point affligé d'auoir fait vn mal, mais de ne l'auoir pas acheué: il apprehende les choses legeres, & les faulx, comme les enfans. Il croit, que c'est le troubler, de le prier de quelque chose; & que c'est le mespriser, de ne le faire pas: il va tousiours vacillant, parce qu'il est trop chargé: il se fasche contre les personnes, contre les affaires, contre sa fortune, contre soy-mesme. Il aime le changement non seulement des hommes, & des choses, mais des places; comme si la maladie qui l'afflige, venoit plustost des maisons que de luy. Il voudroit tout sçauoir, sans rien apprendre d'autrui; gouuerner les hommes, sans les voir; & auoir l'honneur de toutes les entreprises, sans agir. Il continuë de faire du mal, parce qu'il a com-

mencé ; & poursuit comme ennemis ceux auxquels il n'a point donné sujet de l'aimer. Son esprit depuis peu est en grand desordre ; parce qu'il ne voit aucun moyē de sortir, & de demeurer dans le labyrinthe où il est entré, ne pouuant obeir ny commander à ses mauuais desirs. Il n'oseroit descendre du plus haut de sa fortune : il aime mieux la tenir embrassée, que de couler en bas : toutesfois quelques-vns de ses amis asseurent, qu'il la quitteroit, s'il n'estoit menacé de folie, lors qu'il sera abandonné à soy-mesme.

SIRE, voylà l'estat auquel se trouue à present celuy, qui ne se peut imaginer qu'il soit mortel, qu'il soit foible, qu'il ne soit qu'un hōme qui a vne industrie qui se plaist au tumulte, qui n'est pas sagesse, mais agitation d'esprit ; & qui boit vne bonne partie du poison, qu'il fait aualler à ceux qu'il croit estre ses ennemis. J'ay dit, que l'ambition & l'auarice luy auoient fait tous ces maux. Pleust à Dieu, que ces deux vices eussent seulement tourmenté le cœur dans lequel ils ont pris naissance, & n'eussent point affligé V. M. la Royne vostre Mere, la Royne vostre Espouse, Monsieur vostre Frere, tous les Grands de vostre Royaume, vos Officiers, vostre pauvre peuple, troublé la France, & toutes la Chestienté ! L'ambition, à laquelle l'auarice fait seruir tout ce qu'elle prend à V. M. au public & aux particuliers, doit estre descrite la premiere, comme estant la plus grande, & celle qui conduit toutes les autres passions.

Nous auons dit, qu'un peu de vanité donnoit à vne ame courageuse quelque poincte pour la

pouſſer aux bonnes actions: elle eſt comparée à la bile, que le fiel enuoye ſous l'eſtomac pour aider à la diſteſtion; mais ſi elle eſt en ſi grande abondance qu'elle regorge dedans, elle produit les maladies. L'ambition reglée, eſt l'aide de la generoſité; eſtant deſreglée, eſt la cauſe du renuerſement des Eſtats, & enterre dans les ruines celuy qui a fait tous les remuemens. La Prouidence de Dieu luy reſiſte; & tous les hommes s'oppoſent à ſes entrepriſes; apres que la diſſimulation a leué le maſque, & que l'inſolence enyurée de proſperité, s'eſt portée dans la tyrannie. Si iamais pauvre mortel a eſté poſſédé par cette furie, il faut confeſſer avec compaſſion, que c'eſt celuy qui ſe vante d'auoir domté la rebellion dans voſtre Royaume, & toutes les forces de l'Europe au dehors; qui a fait voir que ſa Maiſtreſſe eſtoit ſa captiue, & le Frere vnique de ſon Maiſtre ſon banny; qui a voulu mettre au deſſous de luy les Princes du Sang, avec leſquels il a conteſté le premier rang. Il ne luy reſte rien plus qu'à arracher la Couronne de la teſte de ſon Maiſtre apres ſ'eſtre faiſi de toutes ſes places, armes & Finances, & pour ſe rendre par la force Chef de l'Egliſe, eſſacer le peché originel des François par vn baptême de ſang. Son deſſein eſtoit de l'entreprendre, ſ'il euſt pris toutes les places d'Italie, auſſi facilement comme il fit Pignerol.

SIRE, c'eſt la nature de l'ambition d'eſtre infinie en ſes deſirs; & le ſeroit en ſes pourſuites, ſi la vie de l'homme n'eſtoit point bornée par la mort; ſi les vaiſſeaux des plus grandes felicitez

n'estoit arresté au milieu de son cours par vn petit Remora de quelque secret iugement de Dieu, executé bien souuent par les plus foibles personnes de la terre. La fortune n'a iamais si bien establi vn homme, qu'elle ne l'aye menacé d'autant de mal comme elle luy a permis d'en faire: les fruiets meurs sont alatus par vn petit vent: les bleds qui sont trop espais, sont renuersez par la moindre pluye: le feu s'esteint lors qu'il est deuenu plus clair. Ce grand Intendant des mers se deuroit souuenir que cet element se change en vn moment, & qu'au mesme lieu où les pilotes ont delployé leurs volles, leurs estendards, leurs banderoles, & tiré leurs canons, ils sont engloutis par les vagues.

C'est vn mal-heur qui accompagne, & vn aucuglement qui saisit tous ceux qui se sont abandonnez à l'ambition, que les exemples & les raisons n'ont point de puissance sur leur esprit. Ils s'imaginent, que ceux qui se sont perdus deuant eux, ont fait quelque faute, qu'ils ne commettront pas, qu'ils n'ont point preu ce à quoy eux seuls ont pris garde, & n'ont sceu trouuer le clou qui arreste la rouë de la fortune.

Ayez agreable, grand Roy, que ie vous face voir, par quels degrez est montée celle que nous tenons estre au plus haut de l'eschelle. Ses commencemens ont esté petits, encore que son extraction & sa profession fussent nobles. Il n'y auoit rien en sa personne, qu'il ne se rencontrast en beaucoup d'autres de sa qualité, que la subtilité & viuacité de son esprit, eschauffé par vn extreme desir de paruenir aux plus emin-

tes dignitez de l'Eglife, & plus hautes charges de l'Eſtat. Il y eſt arriué par les moyens que nous deſcouvrirons.

Le premier fut, de pratiquer les bonnes graces de la Mareſchale d'Ancre, en ſe ſoumettant à toutes ſes volontez; ayant eu l'entrée dans ſa chambre, & acquis quelque creance par le pre-texte de pieté, par vne ſeinte humilité, par vn diſcours préparé, par des petits aduis, & par quelques autres adreſſes que nous ne dirons pas. Barbin, bon homme mais aſſez groſſier, qui croyoit que le beau langage d'un Prelat, qui auoit la façon aſſez agreable, & luy offroit ſa ſœur en mariage, eſtoient les plus aſſeurées marques d'un cœur fidele, & d'une bonne ame, diſpoſa la Royne voſtre Mere à vous demander pour luy la charge de Secretaire d'Eſtat: on luy donna pour l'inſtruire vn vieux & fidele * Com-mis. Cet ancien ſeruiteur ne peut ſouffrir long-temps qu'on changeaſt toutes les formes d'eſ-crire, qu'on fiſt parler V. M. vn langage con-traire à ſa dignité; il priſt bien-toſt congé de ſon Maïſtre, & de ſon diſciple, & laïſſa à vn Preſtre & à vn Eueſque le departement de la guerre. Quelques Prelats trouuerent cette com-miſſion ſi eſtrange, qu'ils en firent deſſors vn grand bruit; mais en vain, car l'ambition vou-loit que cet employ fuſt le premier degré de ſon auancement, encore que la hauteur de la Mitre fuſt vn peu abaïſſée.

* Mon-
ſieur de
Beauclerc.

Les changemens qui arriuerent bien toſt apres, ayant rendu cette charge de peu de durée, & celui qui l'exerçoit ayant eu commandement

d'aller à Luçon faire celle d'un bon Pasteur ; la desiance qu'on eut que son ambition ne remuast quelque chose en Poictou, fit qu'on la borna dans Auignon, d'où elle trouua dans peu de temps le moyen de sortir. Les affaires d'Angoulesme estant arriuées, ceux qui auoient la meilleure part dans vos bonnes graces, entrèrent en vne grande apprehension des iustes ressentimens de la Royne vostre Mere, & de la generosité & fidelité de ceux qui s'estoient rangez aupres d'elle : l'ambitieux prist cette occasion au poil, & fist entendre secretement à Mr de Luynes, que s'il se vouloit confier en luy, il rendroit ce notable seruice d'employer toute la puïssance, qu'il disoit auoir grande sur l'esprit de la Royne vostre Mere : qu'il luy feroit trouuer bon ce qu'on desiroit d'elle : la tireroit des mains (ainsi escriuoit-on en ce temps-là) de ceux qui luy auoient donné retraite, & ruinerait les Seigneurs qui estoient à son seruice. Ce dessein ainsi proposé, & pressé, fut suivi : les asseurances par lettres ayant esté receües, le relegué sortit d'Auignon sans passeport, pour mieux couvrir le jeu ; ce qui donna sujet à vn peché d'ignorance que fit Mr d'Alincourt ; à la maison duquel vne bonne action a fait beaucoup de mal.

Le Conseiller de paix fourrée ayant esté receu à Angoulesme, mais assez froidement, eschauffa peu à peu les cœurs par l'ardeur de ses discours bien preparez, par l'assistance de quelques amis, & autres petites industries : il eut dans quelques iours le credit de faire changer les resolutions qui auoient esté prises pour les
gouver-

gouuernemens des chasteaux d'Angers, Chinon & Pont de Sé, & pour les distributions de quelques charges. Ces nouveautez alterent les volontez de la pluspart des seruiteurs de la Royne vostre Mere : firent cognoistre aux plus aduisez, que sa bonté estoit surprise ; & porterent le Capitaine de ses gardes, qui ne pouuoit tirer autre raison de l'injure qui luy estoit faite par vn Prestre, à se battre en duel avec son frere aisné, & le sacrifier à l'ambition de son cadet.

Cette passion, qui deuoit estre mortifiée par cette mort, se rendit plus vifue ; elle flatte ses ennemis, & prist toute sorte de moyens pour arriuer à sa fin. Celle que ce Prelat s'estoit proposée, estoit le Cardinalat ; auquel ceux de sa condition aspirent ordinairement : mais plusieurs n'y voudroient pas arriuer par des voyes peu honorables. Celles qui furent suiuiues six mois apres le traité d'Angoulesme, & la reconciliation de Tours, furent si estranges, qu'elles seront en horreur à la posterité.

On iugea bien, que la Royne vostre Mere demeurant separée de V. M. viuant en paix, on ne donneroit iamais de bonne grace le credit qu'apporte le bonnet rouge à vne personne d'un esprit remuant, & trop subtil. L'Euesque de Luçon se resolut d'arracher ce present par force, de rompre pour vn temps les intelligences secretes avec Mr de Luynes, d'esmouuoir vne guerre de la Mere contre l'Enfant, d'y engager vn Prince du Sang, dixsept Princes ou Officiers de la Couronne, ou Gouverneurs de Prouinces, & tous les chefs des Huguenots : par ce grand

bruit il vouloit obliger Mr de Luynes à venir à vn accommodement, dans lequel tous ceux du party seroient abandonnez, & perdroient leurs biens & leurs charges; & l'aucteur de tout ce mal gagneroit par le traité vn chapeau rouge, teint dans le sang de tous ceux qui moururent de part & d'autre, au rencontre ou drolerie du Pont de Sé. Cette piece d'escarlate fust aussi lauée dans les larmes de la Royne vostre Mere, dans celles des Princes & Dames qui estoient aupres d'elle; & fust cousüe aux despens de cent mille personnes ruinées par quatre grandes armées.

Il est veritable, qu'elle cousta à V. M. deux millions d'or, à la Royne vostre Mere deux millions de liures, à vostre peuple plus de dix, aux Princes, Seigneurs, & Capitaines, que l'ignorance du mauuais dessein auoit fait embarquer dans ce vaisseau, la perte de leurs Gouuernemēs & pensions. Ce qui doit estre plus considerable est, qu'on s'estoit ietté dans le danger de rendre les premieres armes de vostre Majesté malheureuses: ce qui eust porté les affaires hors d'esperance de reconciliation. Vostre Majesté ne la refusa iamais à sa bonne Mere; ayant recogneu la sincerité de ses intentions, veu en son visage, & sur tout en ses yeux, la tendresse & verité de ses affections; & remarqué dans ses discours, que si elle auoit esté mal-traitée par quelques vns, qui se disoient vos seruiteurs, elle auoit esté trompée par les siens. V. M. luy donna ces aduis, & fist voir, que par intelligence secreete l'Euesque auoit traité quelques iours deuant la desroute, & promis de faire en sorte, qu'on ren-

contreroit les choses dans l'heureuse confusion qui arriua. Je l'appelle heureuse ; parce que le grand DIEU, qui seul peut tirer le bien du mal, fit naistre l'ordre de ce desordre, fit sortir de ce conseil de tenebres la lumiere de sa gloire & de la vostre, & fit produire à ces mouemens le repos de la Royne vostre bonne Mere.

La cognoissance que V. M. & les Ministres de vostre Estat auoiét des tours de souplesse qui furent joüez dans tous ces rencontres, vous porta à reculer la promotion au Cardinalat, qui auoit esté promise pour contenter la Royne vostre Mere. Elle estoit si bonne Maistresse à vn mauuais seruiteur, & tellement pressée par les importunittez cōtinuelles de son ambition, qu'elle abandonnoit ses plus importants affaires pour auancer celuy-là. Elle croyoit que cette dignité en la premiere personne de sa Maison luy apporteroit quelque grand aduantage, & qu'elle auoit sujet de l'esperer de sa recognoissance. La Cour de Rome, qui n'aime pas les esprits trop remuans, qui estoit informée par des bons memoires enuoyez de France, qui se souuenoit de la trōmperie faite à PAVL V. & de sa prophétie, reculoit ce dessein tant qu'elle pouuoit. Le bon Pape GREGOIRE XV. auoit peine à se resoudre dans ce rencontre, quelle instance qui luy fut faite par V. M. par la Royne vostre Mere, & continuelles sollicitations du Prieur de la Cochere, depuis Euesque d'Aire, & mort bien-tost apres sa retraite, non sans soupçon d'vne fin auancée. Estant à Rome il auoit toutes les sepmaines des courriers,

l'un deſquels, nommé Papiniere, Gentilhomme de l'Eueſque, fut aſſaſſiné par ſon valet ſur le chemin; ce qui donna ſujet de parler diuerſement de ce meurtre d'un vieux ſeruiteur meſcontent. Martin ancien Secretaire du Prelat eſtoit vn autre emiſſaire, qui fut du depuis diſgratié, chaffé, & réduit à vne extreme pauvreté, dans laquelle il mourut peu de iours apres.

Les difficultez furent ſurmontées par les rencontres du temps, par la mort du Duc de Luy-
nes, ſuiuie de celle du Cardinal de Rets, par les inſtances & par les preſens de la Royne voſtre Mere, & par quelques corruptions qui font taire les raiſons. Au meſme inſtant ſur vn autre
La charge de Promiſſeur de Sorbonne donnée au meſme temps à l'Eueſque. rencontre on miſt près de la ſaincte Hoſtie ſur l'Autel de Sorbonne vn eſcrit, qui contenoit beaucoup de veritez. La nouuelle du bonnet tant deſiré & ſi viuement pourſuiuy arriua, lors que V. M. eſtoit deuant Montpellier; ce preſent fut receu à Lyon de voſtre main Royale, avec demonſtration de grande humilité, & proteſtations d'une parfaite recognoiſſance enuers V. M. & la Royne ſa Mere.

Elle ſe reſiouyſſoit de ſe voir deſchargée d'un grand ſoin, que cette pourſuite luy auoit donné; lors qu'elle fut attaquée par vne autre batterie de l'ambition. Cette furieuſe paſſion non contente d'auoir la premiere dignité qu'un Eccleſiaſtique peut eſperer en France, ſe perſuada que cet honneur luy deuoit ſeruir d'eſchelon pour monter au manient de vos affaires, & auoir l'entrée dans vos Conſeils. Il ne fut pas mal-aiſé de faire croire à la Royne voſtre Mere,

que cet employ luy seroit tres-auantageux, & vn moyen de conseruer la bonne intelligence entre V. M. & elle ; qui est le souuerain bien qu'elle s'est proposée pour ce monde. Celuy qui eust douté de la force de cet expedient, eust esté estimé priué du sens commun : celuy qui se fust défié du zele & de la fidelité d'un seruiteur obligé iusques au poinct que Mr le Cardinal l'estoit, eust passé pour vn esprit enuieux & malin. Celuy qui eust predist la moindre chose de celles que nous auons veu du depuis, auroit esté chassé avec infamie.

V. M. auoit encore quelque auersion contre cette personne, & se souuenoit des intelligences secretes, qu'il auoit entretenu contre les intentions de la Royne. Vostre prudence iugeoit aussi, que les maladies de son Estat seroient plustost gueries par des sages & experimentez Medecins, que par des Empiriques hazardeux, qui soulagent pour trois mois, & tuent pour tousiours. Elle sçauoit bien, que la trop grande subtilité est dangereuse, non seulement dans les mysteres de la Religion, mais dans ceux des Empires du monde ; & qu'il y a certains esprits, principalement ceux des ieunes Ministres, qui sont semblables au soleil de Mars, plus propres à esmouuoir qu'à resoudre. Ceux qui auoient l'honneur d'estre aupres V. M. sçauent bien les sages apprehensions que vous en auiez, & la peine qu'on eust pour les surmonter. Elles furent en fin vaincuës par les prieres continuelles de la Royne vostre Mere ; à laquelle il vous pleust de donner ce contentement

à Compiègne. Cette grace obligeoit celuy qui en auoit le fruit , à consacrer toute la douceur qu'il en retireroit , à celle qui l'auoit produit. L'ingratitude luy a fait boire au meſme lieu le plus amer absynthe, & la violence le plus cruel poison, que la puissance passée en tyrannie aye iamais fait aualler à vne bonté trop liberale, & à vne parfaite innocence.

Les commencemens de ce grand employ furent accompagnez de quelque modestie : l'ambition , qui ne s'arreste iamais , passa bien-toſt au delà des bornes, que la diſſimulation pluſtoſt que l'humilité luy auoiēt donné pour vn temps. L'année ne s'acheua point , que le nouveau Ministre ne fiſt paroistre , qu'il luy estoit impossible de souffrir ny ſuperieur ny compaignon en credit ; il failloit auoir non ſeulement le premier, mais encore l'vnique. Celuy qui s'y oppoſoit , estoit le Marquis de la Vieuille , qui ayant laiſſé vaincre la deſiance qu'il auoit d'un naturel entreprenant , approcha de V. M. celuy qui l'en eſloigna. Non ſeulement il luy fit oſter la charge , qu'il faiſoit avec ſcience & integrité , mais luy fit perdre l'honneur de vos bonnes graces , & la liberté. Ce coup eſtant fait , il ne reſtoit que le Chancelier d'Aligré dans le Miniſtere , qui n'auoit point eſté produit à V. M. par celuy qui vouloit remplir toutes les places à ſa fantaſie ; dans laquelle cet hōme de bien, & venerable vieillard , paroiſſoit trop mol. Il croyoit, que Mr de Marillac ſeroit plus hardi, & Mr Deſſiat, qu'il auoit reconnu bon œconome dans le contrerole de ſa maiſon , fort

propre pour manier à ſa deuotion vos Finances, en attendant vn Secretaire d'Eſtat, pour joindre au ſeau, & à la bourse, la plume de V. M. Celuy qui fut employé le premier, eſtant homme Religieux, donna bien-toſt quelque degouſt; mais l'opinion de ſa probité faiſoit qu'on n'oſoit pas ſ'en defaire ſi toſt: eſtant impoſſible de luy pouuoir reprocher aucune maluerſation en l'adminiſtration des Finances, & de la Juſtice. Le libelle diffamatoire des entretiens des champs Eliſées, ou Dialogue des morts d'un Lucian de ce temps, ne dit rien que ce qu'on ſçauoit bien deuant qu'on l'employaſt dans les grandes charges de l'Eſtat. Ces accusations donneroient plus de blaſme à ces bons & francs Gaulois, qui luy ont aidé pour y arriuer, qu'à celuy auquel on reproche des pechez effacez par le temps, par les Edicts, & par des connoiſſances nouuelles qui ont chaſſé les anciennes. Chacun ſçait, pourquoy il a eſté deſtitué, & ce que l'ambition a fait pour auoir l'Empire abſolu de toutes les plus importantes charges du Royaume. Elles ſont aujourd'huy poſſédées par des hommes, qui dépendent abſolument de celuy, qui par des artifices eſtranges les a fait agréer à V. M. de laquelle ils ne ſont paſtant ſeruiteurs, comme ils ſont valets de M^r le Cardinal. Son ambition & ſon intereſt les ayant mis là où ils ſont, ſon orgueil & ſon chagrin les traite comme ſes eſclaues; & en ſorte qu'eux meſmes ſouſpirent bien ſouuent, & voudroient ſ'ils pouuoient, rompre les liens de cette amitié tyrannique, qui les veut engager à ſ'enterrer dans ſes ruines.

L'auois oublié à mettre dans la chaine de tous les deſſeins ambitieux, les charges d'Admiral, & de General des Armées. Mr le Cardinal ne s'eſt pas contenté de rechercher des emplois contraires à ſa profeſſion; il a depuis ſix ans manié ſi rarement le Breuiare, & endoſſé ſi peu ſouuent la Chappe, qu'il a oublié, que ces marques de paix s'accordoient fort mal avec les piſtolets & les harnois de guerre. Il a fallu inuenter des mots nouueaux & inouiis en France, pour exprimer des dignitez qui ont eſté poſſedées par tant de Princes & Seigneurs François, qui paſſent dans l'opinion de ce grand Capitaine de terre & de mer pour des nouices d'armes. Ils n'ont iamais eſté apres vne longue experience, & pluſieurs batailles gagnées, que Generaux, là où ce moderne, ſans auoir fait apprentiſſage, eſt Generaliſſime, comme Eminentiſſime; & peu s'en faut qu'il ne ſe face appeller Miniſtriſſime, & Admiraliſſime. Il prendra ce dernier titre, lors qu'il aura joint l'Admirauté du Leuant à celle du Ponant, & qu'il ſera Generaliſſime de ſoixante galeres, comme il eſt d'autant de vaiſſeaux qu'il appelle ſiens: dans leſquels, auſſi bien que dans ſes Gouuernemens, on parle de V.M. comme d'un Roy eſtranger. Tous les commandemens, bans, & cris publics ſont faits de par Monſeigneur. C'eſt luy qui de puiffance abſolue met & deſtitue les Capitaines & autres Officiers, qui ordonne des monſtres, qui a fait fonder grand nombre de canons, qui ne portent point d'autres eſcuſſons que les ſiens; & qui a pris tous les titres & marques de Souueraineté

par tout où il n'a que vostre Lieutenance. Qu'iera-ce, si à tous ces effets d'intolérable orgueil, on adjouste ceux que nous auôs veu depuis peu?

Il est vray, SIRE, que l'ambition estant arriuée au sommet de ses pretentions, se change en presumption, audace, temerité, cruauté, & tyrannie: voyla les armes avec lesquelles elle se defend, & attaque tout ce qui la menace, ou qu'elle presume luy deuoir estre contraire: elle se plaist à faire sentir son pouuoir aux plus Grands, & à donner l'espouuante aux plus petits: craignant tout le monde, elle se fait craindre à tous; & ne pouuant, ou ne voulant se faire aimer à personne, se rend redoutable à vn chacun. Elle se fait enuironner de gardes, non comme vn Roy, mais comme vn Tyran, qui craint les efforts du desespoir, dans lequel il iette tous les hommes.

Iamais ambitieux n'a pris ce chemin dans vn Royaume libre, & parmi vn peuple nourri sous la douceur d'un Empire iuste, qui l'aye peu tenir long-temps. Si le Cardinal s'y maintient beaucoup d'années, il faut que toutes les experiences du passé soyent trompeuses; & que la Prouidence de Dieu abandonne non seulement la conduite de vostre Estat, mais la protection de l'innocence.

Qui pourra escrire sans soupirer, iusques où est allé l'orgueil d'un seruiteur, qui se voyant en possession de la bien-veillance de son Maître, des plus grands honneurs & des plus hautes charges, a mesprisé les Princes du Sang de son Roy, iusques à leur vouloir contester la

main droite , non ſeulement dans le Louure , & leur Hoſtel , mais dans ſon logis. Il a fait ſemblant de vouloir annexer au Cardinalat cette préeminence , que ceux de la meſme condition , de meilleure maiſon que luy , & attachez par des veritables ſentimens de pieté à la conſervation rigoureuſe de tous les droits Eccleſiaſtiques , n'ont iamais deſiré en France. Je ne dis rien des plaintes , que les Ambaſſadeurs extraordinaires des Roys ont fait du meſpris de la dignité de leurs Maîtres bleſſée en leurs perſonnes , que V. M. a receu avec plus d'honneur que n'a fait voſtre ſeruiteur. Il eſt certain qu'il a meſpriſé les Princes & Grands de voſtre Royaume , qu'il n'a point daigné les accompagner vn pas hors de ſa chambre ; qu'il a voulu deſpoüiller Mr de Guiſe de ſa charge d'Admiral de Leuant , ſans forme de Juſtice ; qu'il a fait acheter à Mr de Vandoſme voſtre Frere naturel ſa liberté par la demiffion de ſon Gouuernement ; & apres l'auoir publié innocent , le tient exilé du Royaume. La preſomption , la violence , & la vengeance , l'ont porté à faire bannir de voſtre Cour trois Princeſſes ; * vne, qui a eu l'honneur d'eſtre femme d'vn Prince du Sang , & laquelle eſtant tirée hors de ſon élément , eſt morte de deſplaiſir ; * la ſeconde , qui eſt voſtre Sœur naturelle , & mariée avec vn Prince genereux , qu'on a ietté dans le deſeſpoir ; * la troiſieſme , eſt la ſœur de cet incomparable Duc de Mayenne , mort pour le ſeruice de V. M. & qui a eſté regreté par tous les François , excepté par celui qui redoutoit ſon courage , & haïſſoit ſa vertu.

* La Princeſſe de Conti.

* La Duchefſe d'Elbeuf.

* La Duchefſe d'Ornano.

Je ne veux point repreſenter icy les banniſſemens de pluſieurs grandes Dames, ny faire voir à V. M. qu'une ame eſt bien cruelle, qui change en aigreurs & rigueurs les douceurs, & les courtoiſies que les plus barbares ont teſmoigné aux femmes de qualité; lors que la fragilité de leur ſexe les a portées à faire quelque legere faute. Mais il eſt vray, que ſi la colere pardonne apres vne boutade, la ſuperbe ne ſçauroit iamais uſer de clemence,

Nous avons remarqué dans ces meſmes rencontres, la civilité, gentilleſſe, generoſité & liberalité emprisonnées avec la perſonne du Mareſchal de Baſſompierre, & chaſſées hors du Royaume avec le Duc de Bellegarde: ces deux parfaits courtiſans ne ſont coupables, que de n'avoir point aimé celuy qui le veut eſtre en faiſant du mal; qui veut eſtre reſpecté en meſpriſant, & ſervi fidelement en trompant. Je ne veux pas groſſir cette Remonſtrance en dreſſant vn Regiſtre de tous les bannis, & rapportant les eſcroües de tous les emprisonnez ſans forme de Juſtice, & detenus dans l'inquiſition d'Eſtat contre les Loix du Royaume, qui ordonnent, que les priſonniers ſeront ouys dans vingtquatre heures. Il ſuffit de dire, que la Baſtille & le donjon de Vincennes ne ſont plus des lieux pour garder les criminels, iuſques à ce que leur procez leur ſoit fait: mais vne peine perpetuelle pour les innocens, ſans autre arreſt que de la partie, qui les y fait enfermer, ou pour luy avoir deſpleu, ou de peur qu'ils ne luy déplaiſent. Il fait de ces deux maiſons de V. M. vn

* *Le Grād* * Prince, vn * Mareſchal de France, & vn * Abbé
Prieur de Pādofme. ſont morts ſans autre conſolation pour l'ame,
 * *Le Ma-* ſoulagement pour le corps. Ne vaudroit-il pas
reſchal mieux auoir reſpandu leur ſang tout à la fois,
d'Ornano. que de l'auoir fait corrompre peu à peu, ou de
 * *Fancan* l'auoir tiré goutte à goutte? S'ils eſtoient atteints
Abbé de de quelque crime; vn ſupplice public, apres vne
Beaulieu. entiere conuiſtion, euſt fait eſtimer voſtre Iu-
 ſtice, & la conſtance de ceux qui l'auroient
 ſouffert courageuſement: mais on a mieux aimé
 les faire martyrs ſans gloire, & les ſacrifier ſe-
 cretement à la paſſion de leurs ennemis. On ne
 peut parler des priſons, qu'on ne ſe ſouuienne
 de celle du Mareſchal de Marillac.

SIRE, il faut confeſſer, qu'un homme eſt
 bien mal-heureux qui ne reçoit du mal que par
 occaſion, qui eſt deſhonoré comme vn traître;
 parce qu'il eſt frere d'un homme chaffé, à cauſe
 que la Royne voſtre Mere a parlé avec quelque
 chaleur, & qu'on preſume contre verité qu'il a
 animé ſon courage. Vn iour deuant cet eſclat,
 V. M. portée par ſes ſentimens, & par ſes co-
 gnoiſſances, auoit eſcrit au Mareſchal vne let-
 tre remplie de teſmoignages de ſatiſfaction,
 iuſques à confier à luy ſeul toute la conduite des
 troupes & affaires que vous auiez delà les Mōts.
 Eſt-il poſſible que cet homme ſoit deuenue &
 reconnu infidele au meſme temps que la Royne
 voſtre Mere a eſté genereuſe? S'il eſtoit meſ-
 chant, celuy qui confeſſe dans ſon Dialogue des
 morts qu'il vous a preſſé de le faire Mareſchal

de France , & qu'il luy a fait donner l'employ en Italie , est criminel de vous auoir importuné de mettre le commandement de vos Armées entre les mains d'un traistre. S'il l'est deuenu en Piedmont , au mesme instant que la Royne vostre Mere a fait paroistre à Paris sa iuste indignation ; il ne faut point faire de difficulté de renuoyer la cognoissance au Parlement , où les Officiers de vostre Couronne doiuent estre iugez , ny apprehender d'exccuter le criminel en la place de Greue. Ses amis ne sont pas si puissans , qu'il faille craindre qu'on l'oste à vostre Iustice : tout vostre peuple la loüera , & les Grands de vostre Royaume seront instruits par cet exemple , qu'il faut estre fidele à son Roy & à son Pays.

En toutes ces choses que i'ay representé à V. M. elle ne peut estre blasmée ny d'injustice, ny de precipitation , ny de colere , ny d'aucune mauuaise passion ; les Iuges qui enuoyent au supplice vn innocent , ne sont point coupables , mais ceux qui l'accusent , ou qui ont déposé faulxement.

SIRE , vous estes le Iuge souuerain de tout vostre peuple : Dieu vous a donné l'espée de la Iustice , avec celle de la guerre : les tesmoins corrompus qui vous sont produits par ceux qui ont la conduite de vos affaires , & qui rapportent deuant vous , comme les Conseillers deuant leur President , sont ceux qui condamnent les hommes , encore que vous prononciez quelquefois leur arrest. Je dis , quelquefois ; parce que ie sçay qu'on proscriit , & on emprisonne bien

souuent sans que V. M. en soit aduertie : si elle l'est, les pieces qui sont contre les pretendus criminels, sont falsifiées : celles qui pourroient seruir à leur defense, sont supprimées ; & on rend les moindres soupçons en choses legeres des crimes si estranges, que ceux qu'on veut perdre ont plus de sujet de louer vostre clemence, que de se plaindre de vostre seuerité. On met en auant, pour releuer des faicts de petite importance, le salut de vostre personne, & de vostre Estat : on leur donne le nom formidable & scandaleux de crime de leze-Majesté au premier chef ; & on dit que vostre auctorité est perdue, si ceux qu'on veut perdre ne sont perdus. Si les Cours souueraines font des Remonstrances contre des Edicts qui vont à la foule des peuples ; si les Prouinces frontieres, qu'il faut conseruer doucement, alleguent leurs Priuileges, & les confirmations qu'elles en ont de V. M. si elles s'opposent à l'establissement de quelques nouueantez, qui tendent à leur ruine ; on reduit toutes choses à l'auctorité, on appelle les supplications rebellions, & on ne vous parle iamais de bonté, de clemence, de iustice, mais de seuerité, de rigueur, & de force. On ne vous represente point la misere des peuples, les desordres des guerres, les rauages de la contagion, l'extremité de la faim : mais on vous fait dire par vn bouffon que cet oyson crie tous-jours, & se debat quand on le plume. On voudroit vous persuader, que c'est vn bon mesnage de perdre les cœurs des hommes pour conseruer le corps de l'Estat ; comme s'il pouuoit viure,

eſtant priué de ce qui luy donne la vie, & le mouuement pour voſtre ſeruice.

Ce qui eſt encore plus dangereux, eſt, qu'ayant oſté l'auctorité & l'affection aux Officiers de iuſtice, les villes & la campagne ne ſe peuuent plus conſeruer que par les armes : elles ne ſçauroient eſtre ſeparées en pluſieurs endroits, qu'elles ne ſoient foibles par tout, & quelque-fois chargées par les payſans, que les rençonnemens & inſolences des ſoldats ont réduit au deſeſpoir.

Le plus grand crime que les auteurs de ces conſeils violens commettent, eſt, de rejeter ſur la volonté abſoluë de V. M. toutes ces confuſions, & generally tout ce qui eſt trouué mauuais. Ils ont touſiours en bouche ſur les plaintes qui ſont faites, Le Roy l'a voulu ainſi : c'eſt vn effet de la colere du Roy, nous n'auons pû deſtourner le Roy de cette reſolution ; & ſemblables diſcours, qui tendent à charger vn Roy, qui veut porter le titre de I V S T E, de toutes les injuſtices qui ſe font ; lors que les plus malins ſeruiteurs ſe donnent la loüange de tout ce qui ſe fait de bon : ils ſe diſent auteurs des bien-faits & des graces, & renuoyent ſur V. M. la haine des refus, & des paroles rudes ; pour faire croire, quand voſtre bonté apporte quelque temperament à leur violence, qu'ils ont arreſté les effets de voſtre indignation.

S I R E, nous nous contenterions d'auoir deſcouuert ce crime, que nous appellons avec raiſon de leze-Majeſté au premier chef ; puis qu'il tend à vous faire perdre l'affection de

tous les Grands de voſtre Rôyaume, & generalement de tous vos peuples, & à les faire ſouſlever contre vous. Cela arriuera à noſtre grand regret, lors que vous ne regnerez plus dans les cœurs, que ces meſchans taſchent de vous oſter par mille artifices, qui vous ſont incognus, & qui meritent vne punition extraordinaire. Mais il ſemble que ce crime, & tous les deux qui ont eſté commis depuis peu; lors que la preſomption inſolente & brutale, eſt deuenüe enragée & deſeſperée.

Il eſt vray, SIRE, que ceux qui ont perdu la crainte des Iugemens de Dieu, & des voſtres, qui par la frequente habitude de nuire aux hommes ont eſtouffé la honte, qui nous eſt naturelle auſſi bien que la recognoiſſance, ſont dans vn tel auenglement, que rien ne leur eſt ſainct & ſacré. La cruauté a cela de mauuais, qu'elle croit non ſeulement eſtre obligée à pourſuiure ſa poincte, & à defendre par les crimes plus grands ceux qu'elle a deſia commis: mais l'homme violent ſe perſuade, qu'il luy eſt neceſſaire d'eſtre meſchant, qu'il ne ſe peut maintenir par autres voyes dans le credit, & dans les biens. Il voudroit, qu'il n'y euſt point de puissance qui le peuſt deſaire, ny de Iuſtice qui luy oſaſt demander compte de ſes actions.

Il n'y a point de doute que M^r le Cardinal n'aye ces intentions: elles ſont aſſez cogneuës par l'horrible attentat commis contre la perſonne qui vous eſt la plus chere, & la plus proche; & qui luy deuoit eſtre auſſi ſaincte & ſacrée que la voſtre. Les ſiecles qui ſuiuront celuy qui
a porté

a porté ce monstre d'insolence & d'ingratitude, prendront pour vn sujet de Tragedie inuenté par quelque Poëte du temps, ce que nos Histoires escriiront de cette entreprise. Elle a esté faite contre le ventre qui vous a porté, contre la meilleure Princessè de l'Vniuers, & contre la plus liberale Maistressè enuers vn seruiteur, & qui a esté si malin, de vous donner de mauuaises & faulsses impressions contre elle: il l'a esloignée de vostre presence; ce qui luy est plus insupportable que la mort; l'a priuée de la liberté: a desiré de la bannir de vostre Royaume; la contrainte d'en sortir: luy a voulu raurir la vie, en la iettant dans des douleurs capables de la faire mourir; & a noirci sa belle reputation, en la faisant passer parmi les ignorans pour vne Mere sans amour enuers son Fils aisné, & sans fidelité enuers son Roy.

SIRE, entre les pechez qui crient vangeance à DIEU, & à vous qui estes le Lieutenant de sa Iustice, l'oppression des Vefues en est vn: nous croyons aussi qu'entre les crimes de leze-Majesté au premier chef, on doit comprendre l'entreprise contre l'honneur des Roynes durant le Regne de leurs Enfans: le descri des Meres de cette condition abaisse la grandeur de la naissance des Princes; & les discours qui ont accompagné ce crime, tendoient, comme les sages l'ont iugé, à esbranler vostre Couronne. Iugez, SIRE, quelle obligation vous auez à celuy, qui a produit ce scandale par vn desir furieux de vāgeance: ce qui paroist assez dans la Declaration qu'il a cōposé, & qu'il a fait adresser sous vostre nom

à vos Parlemens, & aux Gouverneurs de v^{os} Prouinces ; par laquelle la Royne vostre Mere n'est accusée , que de n'auoir point esté en bonne intelligence avec Mr le Cardinal. GRAND ROY, contraindre d'aimer, & de hair, est vouloir rendre esclaves les deux plus libres passions de l'homme : sera-ce vn crime d'Estat qui merite la prison d'une Royne , de n'aimer pas ses ennemis ? Il est vray , que de les aimer , est le plus haut degré de la perfection Chrestienne : mais en la iustice humaine ce n'est pas vne offense de ne les aimer point ; pourueu qu'on retienne la vengeance. Cette verité doit estre suiui^e d'une autre ; que c'est vn sujet de merite deuant DIEV, & de louange dans le monde , de ne s'entendre pas avec les meschans : & c'est vn tesmoignage de fidelité en la personne, qui a la premiere place dans vostre Conseil , de n'estre pas de mesme aduis avec celuy qui ruine vos affaires dedans & dehors vostre Royaume. On sçait bien, SIRE, que vostre premiere obligation, apres celle que vous auez à DIEV, est celle de la conseruation de vostre Estat , auquel vous deuez estre bon Pere ; & que le salut d'un nombre presque infini de vos enfans doit estre preferé au contentement des particuliers. Nous n'ignorons pas aussi , que les aduis d'un sage seruiteur ne doiuent estre plustost suiuis , que les mauuais d'une Mere ; & vn valet fidele nous doit estre aussi precieux que nostre vie ; c'est la parole de DIEV. Il n'y a point de doute , que si les plus proches entreprennent d'oster cet appuy à vn Roy , qu'on ne puisse rejeter leur conseil, & leur donner le

desplaisir de voir les sentimens d'un bon seruiteur preferez à ceux d'un Parent imprudent. Mais en ce rencontre nous voyons vne bonne Mere affligée par vn mauuais conseiller ; vne Mere qui a conserué vostre Estat, esloignée par vn Ministre qui demeure aupres de vous pour le ruiner ; vne Mere renduë captiue, par celuy, qui s'est persuadé, que la liberté de cette Princesse empeſchoit celle qu'il veut auoir de perdre la personne de son Maistre, apres qu'il aura acheué de piller tout son Royaume.

Nous voyons la malice triompher de l'innocence, la calomnie de la verité, la bassesse de la grandeur, l'ingratitude de la liberalité : & recognoissons ce que le plus sage des Roys a dit, *que la terre, c'est à dire, les fondemens de la nature s'esbranlent quand vn seruiteur a trop de puissance.*

Il n'y a point de doute, SIRE, que l'esclat que fit la Royne vostre Mere la veille de la saint Martin dernier passé, n'aye donné sujet à ce grand scandale. Elle ne pouuoit plus souffrir les mespris & insolences du Cardinal de Richelieu, ny estre obligée à traiter souuent avec luy pour ses affaires domestiques, desquelles il auoit la surintendance : elle vous pria de trouuer bon qu'il en fust esloigné, & protesta que si le bien de vostre seruice le requeroit, elle le verroit dans vos conseils, ou en vostre presence, qui pourroit retenir les saillies de cet esprit arrogant. Ce feu qui parut, auoit esté retenu dans le sein de la Royne vostre Mere assez long-temps, & eust rompu sa prison apres les grands efforts de vostre maladie à Lyon, si le mesme amour

qui l'auoit produit, ne l'eust estouffé. Elle auoit peur qu'en l'estat où vous estiez, le desplaisir n'empeschast vostre conualescence, & que le changement que vous auiez tesmoigné vouloir faire, n'arrestast en quelque façon le cours de vostre gloire en Italie, & le secours de Gazal, où toutes vos troupes s'acheminoient. En cela on peut voir, que les passions que la Royne vostre Mere a pour vostre personne, & pour vostre Royaume, sont réglées par le mesme amour qui les fait joier: elles sont grandes; mais ne sont point aueugles, puis que nous les voyons conduites par la prudence qui a esgard au temps, au lieu & au rencontre des choses.

Ce n'est pas assez de dire ces veritez, il les faut prouuer, & faire voir les considerations qui deuoient porter la Royne vostre Mere à parler vn peu hautement, & à vous supplier d'elloigner de vous celuy qu'elle en auoit approché. Il est certain, SIRE, que celle qui luy a procuré cet honneur, seroit obligée de poursuiure qu'il luy fust osté, s'il en a abusé; non seulement, parce qu'elle est vostre Mere, & dans vostre Conseil, mais parce qu'elle est sa caution, qui veut estre deschargée. Vous auriez sujet de la blasmer, & tout vostre peuple, de luy sçauoir mauuais gré, d'auoir ietté dans vos affaires, & dans vostre confiance vn homme, qui auroit par indiscretion ou malice voulu perdre vostre personne, & vostre Estat. La Royne vostre Mere, qui doit veiller pour vostre interest, & pour le sien, eust descouuert la premiere le mal & se fust seruie de la liberté, que sa qualité luy donne, &

que sa reputation & sa conscience luy recom-
mandent, pour vous en aduertir. Elle n'auoit
pas encore apperceu, que depuis le siege de la
Rochelle, ceux qui pilloient vos Finances, des-
roboient vostre gloire; que la descente des An-
glois en l'Isle de Rhé estoit vn effet de la querel-
le particuliere de Mr le Cardinal avec le Duc de
Bouckingan. Que ces deux esprits, apres s'e-
stre souuent picquotez par discours rapportez
aux vns & aux autres, par lettres remplies d'ai-
greurs, & dans quelques passions qu'on ne peut
publier, en fin auoient obligé leurs Maistres à
venir aux mains. C'estoit vne grande impruden-
ce à Mr le Cardinal, d'auoir irrité vne nation
qui estoit lors beaucoup plus puissante en nom-
bre, en grandeur de vaisseaux, & en hommes de
marine, que n'estoit la nostre, qui n'auoit que
fort peu de nauires, & ne cognoissoit point ses
forces. C'utre que cette guerre commença par
malheur, lors que V. M. estoit malade à Ville-
roy, & qu'elle estoit menacée d'vne fiéure de
longue durée. La prouidence de Dieu, qui vous
aime, & vostre Estat, la retrancha miraculeu-
sement, pour vous donner la gloire d'auoir batu
la plus fiere nation du monde, domté la plus ob-
stinée rebellion, & pris la plus forte place de la
terre & de la mer.

Encore que les euenemens ayent esté heureux,
il ne faut pas douter que l'entreprise n'aye esté
dangereuse; que la Royne vostre Mere ne trem-
blast lors qu'elle vous voyoit partir n'estant pas
encore remis en santé, & n'eust mauuaise opi-
nion de ceux qui pour leurs querelles particu-

lières vous auoient obligé dans les plus grandes chaleurs de l'année, & à la fin d'une maladie, à vous trouuer dans vne armée, laquelle n'a eſté victorieuſe que par voſtre conduite admirable, & vigilance incomparable.

Nous auons ſçeu auſſi, que l'eſprit malicieux du Cardinal de Richelieu a deſiré de donner quelque deſſiance à V.M. de l'affection naturelle, que la Royne voſtre Mere a pour Meſdames ſes Filles; comme ſi elle diminueoit en quelque façon la part que vous auez dans ſon cœur, & qu'elle la portait à deſirer la paix d'Italie, avec quelque deſauantage pour V.M. ou à blaſmer la reſolution que vous auez pris de ſecourir vos Alliez, & vous rendre arbitre de la Chreſtienté.

Pour effacer cette calomnie, ie ſupplie très-humblement V.M. de ſe ſouuenir des vœux que la Royne voſtre Mere a faits pour la priſe de la Rochelle, des ſoins qu'elle a eu d'empêcher que les eſtrangers ne troublaſſent voſtre entrepriſe, & des bons conſeils qu'elle vous a donné pour la faire reuſſir. V.M. ſçait auſſi, qu'elle aſſiſtoit à tous les conſeils qui ont eſté tenus pour les affaires d'Italie, & qu'elle a eſté toujours d'aduiſ qu'on deuoit ſecourir Monsieur de Mantoüe, mais qu'il failloit rendre à l'Empereur ce qui luy eſtoit deu, & meſnager l'eſprit du Duc de Sauoye.

Tout ce que la Royne voſtre Mere a trouué mauuais, & qui l'obligea, apres vne longue patience, à vous faire ſes plaintes pour vous-meſme, eſt, qu'elle deſcouurit qu'on expoſoit trop librement voſtre perſonne, & qu'on ne ſçauoit

pas recognoiſtre de quel prix elle eſtoit. Elle a creu, que le trop bon marché qu'on en faiſoit, procedoit d'infidelité, ou à tout le moins d'une telle imprudence, qu'elle, qui a le principal intereſt à voſtre conſervation, ne le devoit pas diſſimuler. Elle auoit remarqué, outre ce que i'ay dit de la Rochelle, qu'on auoit porté V. M. à paſſer les Alpes au mois de Feurier; & à commander vne armée gaſtée de contagion dans le pays de Languedoc, aux iours Caniculiers: que l'année apres, & en meſme temps, contre les reſolutions qui auoient eſté priſes à Troyes, on auoit expoſé voſtre perſonne dans les valons de Sauoye, à la peſte, & aux fievres chaudes; qu'apres vne atteinte de maladie à Saint Jean de Morienne, on vous faiſoit arreſter en ce Pays là, où il ſembloit qu'on auoit conjuré de vous faire perdre la vie. Elle l'auoit veüe au retour de ce beau voyage reduite à telle extremité à Lyon, que l'Extreme-Onction ayant eſté apportée dans voſtre chambre, elle tomba en deſaillance, & fut en auſſi grand danger de mourir de douleur, comme vous de maladie.

Elle fut à la veille de vous perdre, & ſur le point de voir la deſolation entiere de voſtre Royaume deſpourueu d'armes, d'hommes, de Finances, & de Conſeil, toute la cognoiſſance de vos affaires eſtant dans la teſte du Cardinal de Richelieu.

Elle a eſté bien aduertie, qu'en ce temps, auquel tout voſtre peuple eſtoit en prieres & en larmes; & que V. M. luy donnoit vn exemple ſingulier de pieté, & de meſpris des Couronnes

de la terre ; celui qui estoit la principale cause de la ruine qui nous menaçoit , recherchoit la protection d'un Prince peu affectonné à la Royne vostre Mere, & à Monsieur vostre Frere. Voila, SIRE, les plus grands & importans sujets de ses desplaisirs. Voila ce qui la devoit faire resoudre, aussi-tost que Dieu vous auoit remis en santé, & luy auroit fait la grace de vous voir, de vous aduertir courageusement de vous defier de ceux qui faisoient si bon marché de vostre personne, qu'on pouuoit iuger qu'ils l'auoient vendue à vos ennemis estrangers, ou à ceux qui regardent vostre succession.

La Royne vostre Mere à sçeu aussi, que les resolutions prises à Paris, deuant le despart de Mr le Generalissime, auoient esté changées. Ses instructions portoient, de donner toute sorte de satisfaction au Duc de Sauoye, V. M. ayant iugé, que la bonne intelligence avec luy estoit tres-necessaire pour le secours de l'Italie. Il y auoit vn si notable interest, qu'il ne le pouuoit oublier que par le desespoir, dans lequel on le ietta par vn si grand mepris de sa personne, & des tromperies si estranges, qu'on le precipita contre sa volonté dans le party contraire. Ce fut vn effet du despit, qui est vne passion qui perd les ames les plus genereuses, & leur fait abandonner non seulement les biens, mais la vie. Ceux qui ont eu quelque cognoissance de la suite de vos affaires, sçauent bien, que cette diuision est venue de la haine furieuse, que Mr le Cardinal auoit conceu contre Monsieur le Prince de Piedmont, & contre l'Abbé de l'Escaille,

Ambassadeur en vostre Cour pour Monsieur de Sauoye.

Le sujet de cette querelle vint de ce que Mr le Prince de Piedmont, en son dernier voyage à Paris, se plaignit hautement de ce que Mr le Cardinal, ayant fait retirer vos armes d'Italie sans traité de Paix, l'auoit abandonné aux Espagnols protecteurs des Genoïs: de ce qu'après luy auoir promis la Lieutenance de V. M. en Italie, on auoit fait en mesme temps le traité de la Valtoline de l'an 1627. sans luy en rien communiquer, ny faire mention des interets de sa Maison. L'Abbé de l'Escaille s'estant souuent plaint avec quelque chaleur de ces mespris, ayant parlé courageusement à celuy, qui apres auoir offensé son Maistre gourmandoit son Ambassadeur; il le piqua si viuement par la generosité de ces paroles, & luy donna vne telle apprehension de la force de son esprit, qu'il ne trouua point d'autre remede, que de le faire sortir de la Cour. Il iura deslors qu'il ruinerait son Maistre; & a fait gloire de l'attaquer, s'imaginant qu'il passera pour vn grãd personnage, lors qu'il aura querelle avec des Souuerains, & qu'il disposera de vostre puissance pour ruiner vos Alliez.

GRAND ROY, il est certain, que cette passion couste à V. M. ou à son pauvre peuple, cent millions de liures, & la vie à deux cens mille François, morts ou en Piedmont de maladie, ou en France de faim & de peste, que les passages de quatre-vingts mille hommes de guerre ont laissé dans les logemens. Que si Mr de Sauoye eust voulu de gayeté de cœur rompre avec V. M.

c'est vne chose asseurée, qu'apres que Monsieur le Generalissime luy eust fait cognoistre qu'il auoit tort, ayant pris sans resistance la ville, chasteau & citadele de Pignerol, la paix d'Italie se pouuoit faire. Elle fut offerte plus auantageusement, qu'on ne la fera iamais, apres la mort de cinquante mille Capitaines, ou soldats François, la ruine de cent mille familles, la despense ou larcin de cinquante millions, & apres auoir espuisé la France d'argent, de bleds, de cheuaux, & apres auoir enleué tous les mulets qui seruoient au commerce de trois ou quatre Prouinces. La Royne vostre Mere a cognu cette mauuaise conduite, que quelques-vns accusoient d'imprudence, & les autres d'infidelité. Elle a veu qu'un homme accablé de ses bien-faits, qui estoit par son moyen dans vos bonnes graces, obligé d'espargner hors de vos interests Mesdames vos Sœurs, & de suiure les bonnes inclinations & iustes sentimens de sa Maistressè; estoit celuy qui s'y opposoit le plus, qui luy rendoit des mauuais offices aupres de vous; qui donnoit des interpretations sinistres à ses conseils, & croyoit la pouuoir tousiours payer par des discours affectez, & preparez pour sa iustification. Elle a veu, que celuy qui deuoit empescher qu'il ne se passast rien dans vostre Cour, contre le respect deu à sa Bienfaitrice, soustenoit les actions, & prenoit contre elle le party de ceux qui auoient voulu marier Monsieur vostre Frere, sans luy rien communiquer, non plus qu'à vous, qui avez le principal interest en cet affaire.

Elle a apperceu qu'on ruinoit vostre santé, en vous iettant dans mille apprehensions, & vous donnant cent fois le iour des faulx alarmes de la part de vos plus proches, & de vos plus anciens & fideles seruiteurs, comme s'ils estoient ennemis de vostre vie, & de vostre Estat : artifices detestables, & ordinaires aux mauuais seruiteurs, qui veulent posseder leurs Maistres tous seuls, & attirer tous leurs bienfaits. Ils rendent la fidelité de tout le reste des hommes suspecte, & mesme celle des personnes qui ont plus d'inclination & d'interest à vostre conseruation, si quelque horrible peché ne leur a renuersé la nature, ou si vn notable iugement de Dieu ne leur a fait perdre l'esprit, apres qu'ils ont abandonné la conscience à toutes sortes de crimes. Il faut que ces hommes malins les marquent dans la conduite & actions de la Royne vostre Mere, s'ils entreprennent de la faire passer pour desnaturée : estant chose veritable, que les pechez contre nature ne sont iamais les premiers qui attaquent vne ame, mais la punition de tous les autres.

Nos Peres ont veu dans la Cour de France des furieuses factions entre les Grands du Royaume, du Regne des Roys François II. Charles IX. & Henry III. Le chef d'un party estoit le Cardinal de Lorraine, homme de bon esprit, Prince d'extraction, grand Prelat de condition, & courtisantres-accord : de l'autre costé estoit vn Connestable de France de tres-bonne maison, & auquel les Roys & l'Estat auoient des tres grandes obligations. La Royne Ca

therine Mere des Roys employoit toutes ses industries, pour empêcher que les mauuaises intelligences, qui estoient entre des personnes de si grande consideration, & dans le rencontre des premiers efforts de ceux de la Religion pretendue reformée, n'apportassent quelque desordre, & ne pouuoit si bien faire, qu'elle ne desobligeast tantost les vns, tantost les autres. Nous ne disons pas qu'elle fust dans le crime: mais nous sçauons bien, qu'elle estoit soupçonnée de n'aimer pas esgalement ses Enfans; & sommes asseurez que François II. & Charles IX. en auoient quelque defiance, sur laquelle il eust esté aisé au Cardinal de Lorraine de luy procurer du desplaisir: mais ce Prince sçauoit trop bien le respect, qui estoit deu à la qualité d'yne Royne Mere, & le danger qu'il y auoit de mettre ses doigts entre le bois & l'escorce; que Milon le plus robuste des hommes s'estoit engagé les mains, & auoit esté mangé des loups, en voulant separer vn arbre. Qui ne sçait aussi que le bon sang peut boiüllir pour peu de temps, mais qu'apres il se remet en son temperament; que les naturels bien composez ne s'alterent iamais pour tousiours; que ceux qui entreprennent de desmolir ce qui est par dessus leur teste, courent fortune d'estre accablez sous la ruine.

Il est vray, qu'il n'y a que les hommes desesperes qui attaquent les personnes Royales: & les Histoires de toutes les nations du monde nous ont fait voir, que ceux qui ont entrepris de leur faire du mal, & sur tout les ingrats, ont plustost trouué la punition de leur entreprise,

que la ruine de ceux qu'ils ont voulu perdre. Pardonnez-moy, SIRE, ſi i'vſe de ce mot de perdre, pour vous faire cognoiſtre ce que vous n'avez point ſçeu; parce que ſans doute vous ne l'euffiez iamais permis. On a taſché de vous perſuader, que le bien de vos affaires requeroit, que la Royne voſtre Mere fuſt ſeparée de vous pour quelque temps; pour luy faire ſentir, qu'elle auoit tort de ne s'eſtre point accordée avec Mr le Cardinal de Richelieu. Cette ſeparation eſt à la Royne voſtre Mere, qui vous aime tendrement, vn ſupplice; & cette conſideration luy apporte non pas vn blaſme (car nous ſçauons bien que vous eſtes trop bon pour luy en donner) mais vne grande loüange. Nous auons veu depuis voſtre depart de Compiègne, que cette ville & voſtre chasteau, dans lequel la Royne voſtre Mere fut laiſſée, ont eſté enuironnez d'un Regiment de gens de pied, & toutes les aduenües gardées par voſtre caualerie legere; qu'un Mareſchal de France a eu charge de voir & examiner tous ceux qui entreroient ou ſortiroient; & que les ſeuls domeſtiques neceſſaires pour le ſeruite de la perſonne de la Royne voſtre Mere, ont eu permiſſion de l'approcher. Nous croyons tous, que ſi vous n'avez point donné ces ordres, pour empescher que quelque meſchant, animé par les calomnies qu'on a inuenté contre la Royne voſtre Mere, n'entreprift ſur ſa perſonne, vous les auiez ignorez: & l'avez aſſez teſmoigné, lors qu'en la reſponſe, que vous avez fait à la ſeconde lettre de Monsieur voſtre Frere, vous avez aſſeuré, que la Royne

vostre Mere estoit en liberté. Sans faute vous l'avez escrit, comme vous l'avez creu, sa déplorable condition vous ayant esté cachée; ceux qu'on vous a produit pour y enuoyer, ayant esté instruits de ce qu'ils vous deuoient dire, & n'ayant iamais veu les lettres de la Royne vostre Mere, on les vous a rendües suspectes par vne execrable calomnie, iusques à vous dire, qu'elles pourroient estre empoisonnées. Mr le Cardinal dans ces belles apostilles sur la lettre de Monsieur a déclaré aussi, que la Royne vostre Mere n'estoit point prisonniere, parce qu'elle se pouuoit pourmener à l'entour de Compiègne. Nous attendions qu'il dist, parce qu'elle respiroit, voyoit le soleil & n'estoit point en basse fosse chargée de fers aux pieds. SIRE, quand estre estroitement gardée, dans vn vieux chasteau, par mille hommes de pied, & par trois cens cheuaux, ne seroit pas vne detention (ce que nous auons plus honte de dire, que Mr le Cardinal n'en a eu de le faire) la Royne vostre Mere, & tous les gens de bien, qui ont l'honneur de cognoistre ses sentimens, croiroiēt qu'elle ne peut auoir vne prison plus estroite, plus puante, & plus obscure que d'estre esloignée de vous: elle n'a point de liberté, si elle n'a celle de vous approcher, ny de lumiere, que celle qui luy vient de vos yeux: hors de vostre presence, la plus grande Prouince de vostre Royaume luy est vn cachot; & si Dieu l'auoit tant infortunée de vous perdre, toute la terre luy seroit vn bannissement. Cela estant veritable, comme il est, qu'on donne le nom qu'on voudra

pour couvrir vn grand ſcandale , & l'opreſſion de l'innocence de la plus grande Royne du monde , & de la meilleure Mere : nous croyons , SIRE , que ce qu'on a inuenté n'eſt pas tant pour tromper la France , & les Pays eſtranges , qui ſont bien informez du contraire , comme pour deſguiſer les choſes à V. M. ſans faute elle y apporteroit des remedes genereux , ſielle ſçauoit au vray le traitement qui eſt fait à celle , qui vous a fait Roy , en conſeruant voſtre vie dans ſon ventre , & voſtre Couronne durant ſa Regence.

SIRE , d'où vous pourroit venir la cognoiſſance de la déplorable condition de la Royne voſtre Mere ? Sera-ce de la part de celuy qui a eſté autrefois ſon Secretaire ; & maintenant eſt le voſtre ? Il ſemble , que ſ'il y a homme dans voſtre Cour obligé à ſeruir cette grande Princeſſe , que celuy-là le doit faire , apres tant d'honneurs & tant de bien-faits qu'il a receus de ſa bonté. Il en a tous les iours le moyen , eſtant la ſeule perſonne qui reçoit vos commandemens , qui confère des affaires les plus importantes , & qui eſt touſiours attaché à l'oreille de V. M. Mais il ſuit le chemin ordinaire des ingrats , qui ſ'eſtiment beaucoup obligez aux meſchans , qui pour leur intereſt particulier les ont produits , non aux bons Maiſtres qui les ont receus ; parce qu'ils ſe deſient dauantage de la malice que de la bonté , ils ſeruent plus fidelement celle-là , qu'ils ne font cette-cy. C'eſt ce qui fait , SIRE , que voſtre Secretaire , qui eſt vn clerc à gages de celuy qui vous l'a preſenté , a oublié que ſa Maiſtreſſe luy a donné ou laiſſé prendre plus

de cent mille liures de rentes, & a procuré vn honorable & vtile mariage à son fils, qui luy en apportera autant. Il ne se souuient plus, que la premiere charge de Secretaire qu'il a eu, a serui de fondement à la seconde; & que la recommandation de la Royne vostre Mere luy a procuré cet employ qu'il ne meritoit pas. Il se maintient en la mauuaise humeur, qu'il a tousiours eu d'estre mal-faisant, fourbe, ennemi des hommes d'honneur & de cœur, enuieux de tous les bien-faits, médisant, & enclin à faire des mauuais offices à toute sorte de personnes, pour estre tout seul riche & puissant. C'est le propre des petits esprits & des lasches, n'y ayant que les bons & genereux qui sçachent, vueillent & puissent dire, desirer, & faire le bien. Celuy que V. M. cognoist assez, & souffre trop, n'est pas de cette trempe; il ne se plaist qu'à destourner vos bonnes volonteés, & à remplir vostre ame de mauuaises impressions; ayant serui d'instrument pour y ietter les plus noires contre la Royne vostre Mere, & pour tascher de vous persuader contre elle, & Monsieur vostre Frere; ce que le plus malin demon des enfers n'oseroit auoir suggeré à celuy, qu'il recognoist & craint comme l'Oinct de DIEU. SIRE, il est certain, que les particuliers & longs entretiens que cet homme a avec vous, & l'apprehension que vos seruiteurs ont de cet espion, qui s'imagine que c'est vn crime de vous auoir parlé à l'oreille, empesche que vous ne soyez aduerti au vray de ce qui se passe en vos affaires, & que vous ne descouviez le miserable estat auquel
est

est reduite la Royne vostre Mere. Si vostre bon Ange, qui est le tutelaire de la France, n'agist dans vostre esprit, par quelque puissante inspiration ; nous n'auons plus d'esperance qu'au temps, qui est vn mauuais medecin, parce qu'il ne fait cognoistre les maladies que par des crises trop violentes, & bien souuent par des pertes de sang si estranges, qu'on a beaucoup de peine à les arrester. Mais la Prouidence de Dieu reserve tousiours quelque merueille dans les extremitez : c'est pour faire esclater dauantage sa gloire, qui est plus grande lors que les hommes non seulement n'y ont rien contribué, mais y ont apporté toute sorte d'empeschemens.

Sur ce propos, il me souuient d'auoir leu dans vn Historien digne de foy, que l'Empereur Basile auoit donné sa confiance à vn Moyné nommé Sandabarenus. Les gens de cette profession sont quelquefois violens, & veulent gouuerner les Princes & hommes libres avec cet empire absolu, qu'ils exercent dans leurs cloistres, où ils exigent vne obeissance aueugle. Ce Moyné accoustumé à cette façon de regner, & enflé de la vanité que luy donnoit l'entiere & paisible possession des bonnes graces de son Maistre, ietta son esprit dans la desiance de la fidelité des principaux Officiers de l'Empire, & les fit banir, ou emprisonner. Ayant commencé par la ruine des seruiteurs, entreprit de poursuiure & finir par celle de Leon fils de Basile, & heritier presomptif de l'Empire. Il persuada à son pere jaloux, de ce qui veut estre possédé sans pair, quel'ambition & l'impatience de son fils auoient

entrepris de le deſplacer de ſon thrône , pour ſ'y loger deuant le temps. L'Empereur ſe porta à faire mettre ſon fils dans vne eſtroite & obſcure priſon , où Sandabarenuſ auoit volenté de le faire mourir : la crainte que tous les ſeruiteurs auoient des mauuais offices de cet eſprit malin , qui aſſiegeoit touſiours Baſile aſſez colere & ſeuere de ſon naturel , empescha que perſonne n'entreprift de l'aduertir du miſerable eſtat auquel eſtoit reduit ce pauvre Prince , qu'on n'oſoit pas meſme nommer. Mais Dieu protecteur de l'innocence , & qui ſe plaiſt à deſtruire par des foibles moyens , les deſſeins que les malicieux ont bien appuyé ſelon leur aduiſ ; fit qu'un oyſeau , qui eſtoit nourri dans le cabinet de l'Empereur , oubliant ſon ramage ordinaire , ou dreſſé par quelque valet , forma ces paroles bien diſtinctes , *Ha pauvre Leon !* & les diſt ſi ſouuent , que le pere commença à croire que Dieu l'aduertiſſoit de la miſerable condition de ſon fils ; & comme il faut fort peu de choſe pour eſmouuoir vn bon ſang , l'Empereur ſe reſolut de le retirer de la priſon. Apres auoir examiné plus meurement , & ſans paſſion , les actions de Leon , & la vie & conſeils de ſon Moyne , declara celui-là ſuccelleur de l'Empire , & chaſtiâ rigoureuſement cettuy-cy.

SIRE , cette hiſtoire , qui nous donne ſujet d'admirer la Prouidence de Dieu , & de craindre ſes iugemens ; nous fait eſperer , que celui qui a fait cognoiſtre la verité à vn meſchant Empereur d'Orient , par vne voye extraordinaire , pour tirer d'oppreſſion vn Prince ; en trouuera quelque autre , pour faire cognoiſtre à vn

bon Roy la violence qui est faite à vne Princefse , que son Mariage & vostre Naissance. ont rendu la plus grande de la terre, & que le Ciel a fait la plus vertueuse.

Ce n'est pas vn petit Moyne qui l'a reduite à l'extremité où elle est ; mais , si nous croyons à vn de nos Historiens , le petit fils d'un Gentil-Popeliniere. homme qui auoit esté Moyne : ce n'est pas vn Moyne, mais vn homme qui a pour son principal conseiller vn Moyne, le plus violent de vostre Royaume. C'est celuy , SIRE , que vous cognoissez ; qui est Agent de Monsieur de Mantoue : il n'est pas expedient que ie le nomme, de peur de scandalizer son Ordre rempli de gens de bien , qui n'approuuent point ses actions. C'est ce bon Pere qui creue d'ambition dans vn sac de penitence ; qui veut tirer à soy les plus grandes dignitez de l'Eglise avec vne grosse corde, & qui a caché sous vn rude capuchon, le desir d'auoir vn bonnet d'escarlatte. C'est vn homme qui a voulu fonder autrefois sur vne reuelation feinte, vne Cheualerie qui ne dura que six mois, & qui deuoit prendre le grand Turc dans vn an : c'est vn esprit petit, inquiet, qui parle beaucoup & ne dit rien de bon. En fin c'est celuy qui avec vn autre Prestre corrompu a entrepris d'asseurer vostre conscience ; qui ne pouuoit consentir à l'emprisonnement de la Royne vostre Mere. Les deux faux prophetes , qui ont trompé non pas vn mauuais Roy d'Israël ; mais vn bon de France, ont esté si execrables, qu'ils ont tasché de vous persuader, que la resolutiõ de faire arrester la Royne vostre Mere vous auoit apporté trois benedictions, la facilité à parler, vne meilleure

ſanté, & la ſecondité de voſtre Mariage. Ils ne ſe ſont pas contentez de vous repaiſtre de ces impoſtures, ils les ont fait debiter dans voſtre Royaume, & par toute la terre. Les imprimez de Paris nous aſſeuroient de ces trois miracles; & ſur tout, que la Royne voſtre Eſpouſe n'eſtoit deuenüe groſſe que depuis la detention de la Royne voſtre Mere, qui auoit empesché ce grand bien que nous ne voyons pas encore; & auquel, apres vous & la Royne ſa Belleſille, elle a plus d'intereſt que perſonne du monde. SIRE, deſſiez-vous de ceux qui vont aux delices, & aux honneurs par des chemins contraires, des Religieux, qui n'ont que les apparences de Religion; qui eſtans laiſſez de leur profeſſion, cherchent les diuertifſemens dans les affaires du monde; & ſont ſemblables aux beſtes de charge, qui ſont recreües, lesquelles ne vont plus fermement dans le droit chemin, mais chancelent tantost à droit & tantost à gauche. J'ay eſté forcé par la verité de dire ce que ie dis, & d'aſſeurer V. M. que ce Moyne a eſté la principale cauſe de toutes les violences qui ont eſté faites. Il ne s'eſt pas contenté de diſpoſer le Cardinal qui l'eſcoute, & qui ſe laiſſe gouverner par luy (comme il dit) de donner des bons penſionnaires à ſon frere, mais l'a pouſſé aux eſtranges entrepriſes; qui ont eſté faites contre la Royne voſtre Mere, & contre Monsieur voſtre Frere. Perſonne ne l'oſe deſcouvrir: mais nous eſperons, que Dieu enuoyera bien-toſt vn oyſeau du Ciel (c'eſt à dire, vn bon Ange) qui chantera aux oreilles de voſtre cœur: Ah, pauvre MARIE,

*Le frere
du P. Ioseph
gouverneur de
la Baſtille.*

qui estes la Vefue & la Mere des Grands Roys !
& qui estes indignement traitée par des serui-
teurs ! qui estes dans vne grande innocence , &
dans vne grande misere ! Ah , pauvre M A R I E ,
qui estes toute fonduë en larmes ; non pour le
mal que vous souffrez , mais pour celuy que vous
craignez , pour vos deux Fils ! Ah , pauvre M A -
R I E , qui auez à force de pleurer tantost perdu
les yeux ! qui ne peuuent plus veiller à la con-
seruation de la santé du Roy ; & qui ont leu dans
vn escrit infame le vray coup frappé sur la teste
de l'Estat , que le Conseiller qui a souuent ietté
la vie de S. M. dans les hazards des guerres &
des pestes , & qui abrege ses années par mille
apprehensions , est celuy que Dieu luy a donné
pour le salut de sa personne ; comme si ceux qui
ont le plus grand interest , & les veritables af-
fections , auoient quelque dessein de la perdre.
Ah , pauvre M A R I E , qui auez semé tant de
bien-faits dans vne terre qui ne vous a produit
que des espines , qui vous perçent le cœur ! &
qui apprenez aujourd'huy , qu'une petite obli-
gation fait vn homme recognoissant , & vne trop
grande le rend ennemi ! Ah , pauvre M A R I E ,
qui auez esté prisonniere , non pas de vostre
Enfant , mais de vostre creature , & plus mal
traitée que n'ont iamais esté les moindres Prin-
cesses prises dans vne guerre , qui ont rencon-
tré quelque respect & humanité parmi les plus
cruels & les plus insolens vainqueurs ! Ah ,
pauvre M A R I E , qui auez esté contrainte de
sortir d'un chasteau , dans lequel vous ne pou-
uiez regarder la terre , sans voir les corps de

garde qui vous environnoient ! qui auez ſçeu, qu'on veut faire croire au peuple, que voſtre detention n'eſtoit pas vne priſon, parce qu'elle eſtoit vn peu large. On l'auoit rendu eſtroite, par la iuſte apprehenſion qu'on vous auoit donnée, qu'une promenade de mille pas vous pourroit produire vn voyage de trois cens lieues, & vn bannillement hors du Royaume. Vous eſtes bien aduertie, que ce deſſein n'eſt pas venu à la cognoiſſance du Roy ; mais qu'il eſtoit dans l'ame de celuy qui ne fait voir ſes reſolutions que piece à piece ; qui deſeſperant du pardon de ſa faute, taſchoit en vous renuoyant, renuoyer bien loin la punition, qui luy viendra pluſtoſt du Ciel que de vous. Ah, pauvre M A R I E, qui ſçauiez & voyez comme on pille voſtre cher Fils, & ſon Royaume ; & qu'on prend, avec les Finances, toutes les places fortes ; qu'on altere toutes les Loix, & toutes les volontez ; & cependant vous n'aez plus de moyen de crier aux voleurs, aux meſchans, ſecours, Juſtice ! Ainſi l'Ange de D I E U vous parlera, Grand R O Y, puis que tous les hommes ſont reſolus de ſe taire, ou par corruption, ou par apprehenſion : nous croyons, que le remede à tous ces deſordres & ſcandales eſt à la porte, & que ceux qui en ſont les auteurs, ſeront chaſtiez dans peu de temps.

Vn mal-heureux nommé Felician auoit eſté auancé & enrichi par Elizabeth Royne d'Hongrie : c'eſtoit vn homme qui auoit * l'ambition & la malice fort couuertes. Ce meſchant ayant attaqué le Roy Charles, luy porta vn coup

* D'ſimulata huic iniquitas & ambitio.

d'eſpée ſur la teſte : la Royne voulant pater
 avec la main, & defendre la vie de ſon Eſpoux,
 * eut quatre doigts coupez, qui auoient eſté les ** Illi qua-*
 miniſtres, comme dit l'Hiſtorien, d'vne tres- *tuor digi-*
 grande liberalité enuers cet ingrat. SIRE, *tos ampu-*
 ceux qui ont emprisonné & chaffé la Royne *tauit quos*
 voſtre Mere, ont entrepris de luy oſter le *habuerat*
 moyen de s'oppoſer au mal, qu'ils vous veu- *profuſiſi-*
 lent faire; ont coupé la main qui vous defend, *me libera-*
 & qui leur a donné autrefois les biens qu'ils *litatis mi-*
 employent maintenant contre elle. Iean Gou- *niſtres.*
 uerneur de Croace par vn excez d'ingratitude *Bouſi-*
 emprisonna Marie auſſi Royne d'Hongrie; &
 ſachant que le Roy Sigismond venoit pour la
 deliurer, luy donna la liberté, apres auoir
 extorqué vn ſerment ſur des ſainctes Reliques,
 qu'elle ne ſe reſſentiroit iamais de l'injure
 qu'il luy auoit fait : mais cette Princeſſe ſça-
 uoit bien, que les priſonniers ne ſont pas obli-
 gez de garder des promeſſes tirées par force,
 & dans vne priſon. Iean qui s'en defia, ſe
 retira dans la forte ville de Dobor, de laquelle
 il eſtoit Gouverneur : il y fut aſſié-
 gé, & ſe voyant preſſé, voulut chercher le ſalut par la
 fuite; en laquelle il fut pris, & peu de iours
 apres puni ſeu-
 rement. Sous l'Empereur Mi-
 chel fils de Theophile, ſa Mere Theodora, qui
 auoit eſté fidele Regente, fut chaffée de la Cour
 avec ſes Filles, fut dépouillée de tous ſes biens,
 & emprisonnée par vn ingrat nommé Bardas.
 Quelque temps apres la Mere fut reſtablie
 aupres de ſon Fils, & Bardas aſſaſſiné par des
 perſonnes qui n'auoient point d'intention de

vanger Theodora. Alexis Sebastocrator , l'un des plus cruels & des plus scelerats qui ayent jamais abusé du nom & de la puissance d'un grand & bon Prince , poursuivit avec tant de rage la pauvre Marie sœur d'Alexis Comnenus, qu'il la contraignit , pour garantir sa vie , de se retirer dans le temple de sainte Sophie, & d'embrasser l'Autel. Ce meschant homme la vouloit faire arracher de cet azyle ; mais le Patriarche & le peuple s'y opposerent. Elle fut bannie ; & son persecuteur , apres avoir exercé des grandes cruautéz , apres avoir pris toutes les charges importantes , emprisonné , pros crit , & pillé tous les tresors de l'Empire, eut les yeux creuez, & fut condamné à prison perpetuelle.

SIRE, ces exemples font voir à V. M. que M^r le Cardinal de Richelieu n'est pas le premier, qui a attaqué les Meres des Roys; il ne sera pas aussi le dernier que D I E U chastiera : il est d'autant plus coupable qu'il est le premier de sa profession, qui a attenté sur les personnes sacrées. Il a contraint non vne Marie sœur d'un Empereur d'Orient esleué à cette dignité par des soldats brutaux ; mais vne Marie Mere d'un Roy de France fait Roy par la sainteté & fidelité de son Mariage , & conserué par la vigilance & sagesse de sa Regence. Ce n'est pas un barbare Sebastocrator , qui l'a contrainte de prendre pour lieu de refuge un temple sacré , & de s'attacher à un autel , autrement que par le recours qu'elle a tousiours à Dieu ; mais qui l'a forcée par sa violence , & par ses artifices de quitter la France , où elle auoit demeuré trente

vn an, Regnante, Regente, fidele Conseillere, & tousiours bonne Mere. Elle n'a point eu de regret de laisser tout le bien qu'elle y auoit apporté, celuy que le feu Roy, & Vous luy auez fait; mais le souuerain bien qu'elle possède en terre, qui est la douce présence de vostre Personne, à laquelle elle ne peut penser qu'en soupirant, & qu'elle ne sçauroit nommer qu'en pleurant. Ce cœur qui brule d'amour pour vous, ces yeux qui ne peüent plus veiller pour vous, cette bouche à laquelle il est defendu de parler pour vous, ces entrailles qui vous ont porté, ces mains qui vous ont defendu, ont par contrainte & auec regret demandé protection à vn beau Fils, & à vne bonne Parente, pour se garantir des injustes poursuites d'vn seruiteur ingrat. Il s'est rendu criminel, pour l'essoignement, detention, & autres violences qu'il a exercées contre sa Maistresse; mais elle a esté si charitable enuers luy, qu'elle a mieux aimé fuir, que de rendre coupable de sa mort celuy, qui ne l'est que trop pour luy auoir rendu la vie amere.

Et afin que V. M. cognoisse, que la Royne vostre Mere s'est retirée auec plus de raison, que de passion; il est necessaire que vous soyiez informé des desseins de M^r le Cardinal, & de la suite de ses fineïsses ordinaires. Il n'a pas sujet de se plaindre, ny de faire des declarations contre ceux qui ont assisté la Royne vostre Mere en sa sortie, ny de luy rendre des mauuais offices sur ce sujet; puis qu'elle n'a fait que ce qu'il a desiré, & disposé par vn grand artifice. Il esloigna de quelques lieües les gardes des gens de

La Capelle : le
gouverneur fust
trompé par
les entre-
metteurs
du Cardinal.

pied ; fit presenter subtilement vne * place à la frontiere, & ouvrir vn peu de iour pour seruir de pantiere ou fenestre, afin de la faire prendre au passage. Elle s'estoit iettée dans ce danger pour garantir sa vie, que l'air relant d'un vieux chateau, terrassé iusques au second estage, eust estouffé ou grandement incommodé dans les humiditez de l'Automne. Mr le Cardinal dit, qu'on l'a pressée de prendre d'autres retraites : mais outre qu'elles sont aussi mal saines que celle-là, elle n'a pas voulu, pour conseruer l'honneur de vostre Naissance, estre trainée en triomphe au trauers de trois ou quatre Prouinces, ny courir fortune d'estre bannie hors de vostre Royaume. Elle eust aduis, qu'on auoit dessein de luy faire acheuer par force le reste du chemin duquel elle auroit fait volontairement la moitié. Elle a demeuré à Compiègne tant qu'elle a peu, & a resilté à ceux qui la pressoient d'en sortir, s'estant persuadée, que ce lieu là estant assez proche de la ville de Paris & du Parlement, on auroit plus d'apprehension de l'enleuer par violence, ou de la reserrer plus estroittement, ou de luy oster tous ses seruiteurs, pour exposer sa vie à la corruption de ceux que ses ennemis luy enuoyeroiét. Elle est sortie pour se garantir d'oppression, & pour chercher la liberté, qui est naturellement désirée, non seulement par les plus vils de tous les hommes, mais par les oyssillons. La plus rigoureuse Theologie nous assure, que ce n'est pas vn peché à vn criminel de rompre sa prison, à plus forte raison à vn innocent : Dieu mesme nous commande d'al-

ler de ville en ville, pour fuir la perſecution. Mais on a pris retraite parmy les eſtrangers; & ſur tout dans les terres d'un Roy, que V. M. tient pour ennemy de ſon Eſtat. Se retirer dans une place frontiere, euſt fait crier M^r le Cardinal à la reuolte, à la rebellion; & l'eueſt porté à faire dans peu de iours d'une citadele une priſon. Où pouuoit aller une Vefue d'un Roy affligée, qu'aupres d'une ^{* L'Infan:} Princeſſe Vefue, & qui ^{te Iſabelle} eſt entre les plus vertueuſes que la terre aye ia ^{de glorieu-} mais porté? Cette conſideration, le voiſinage, ^{ſe memoire.} la ſeureté, l'alliance, la parenté, ont porté la Roynes voſtre Mere à prendre la route des Pays bas, & à demander protection apres y eſtre entrée. Ce qui deuroit tirer les larmes des yeux, faire frapper la poitrine, & arracher mille ſouſpirs à celui qu'elle a tant obligé, & mis dans la puiffance qu'il exerce contre elle, le fait eſcumer de rage en apparence: car dans ſon cœur il eſt tres-content de voir ce qu'il a voulu & acheminé. Il eſt auſſi tres-aiſé d'auoir un prétexte pour dire qu'on eſt dans la deſobeyſſance, dans les pratiques avec les eſtrangers, parmy ceux qu'on a voulu faire croire à V. M. auoir eſté ſecretemēt fauoriſez dans les rencontres des guerres d'Italie. Par ces diſcours & impoſtures on taſche de rendre cette demeure odieuſe, & de fermer la porte à la liberté ſainte, que la Roynes voſtre Mere a recherché pour faire cognoiſtre à V. M. à vos Cours ſouueraines, à la France, & à toute la Chreſtienté, ſon innocēce, l'abus abominable de voſtre nom & auctorité pour acabler une Vefue.

SIRE, nous n'auons que ce ſeul moyen, & nous

n'en voulons point employer d'autre, de peur qu'il ne desplaise à D I E U, & à Vous : mais tant que nous aurons des voix & des plumes, nous demanderons Iustice : si nos requestes, denonciations, & accusations ne sont ny responduës, ny receües, ny leües, nous adresserons nos plaintes au Ciel ; c'est là où vont nos vœux pour vostre prosperité, & de là viendra vostre lumiere & nostre secours. On pourra menacer de la prison ceux qui seront enuoyez à V. M. de la part de la Royne vostre Mere : tous ses seruiteurs iront chercher ces marques honorables de leur fidelité. Et encore que les effets de vostre douceur & bonté naturelle soyent arrestez pour quelques temps, apres lesquels ils couleront avec plus de force, ceux de la Royne vostre Mere ne seront point interrompus. Sans auoir dessein d'apprendre la disposition de vos affaires, puis que vous ne l'auiez pas agreable, son parfait amour la rendra soigneuse & curieuse de sçauoir l'estat de vostre santé ; & la seule recommandation qu'elle fera à ses ennemis, sera de la mieux mesnager qu'ils n'ont fait.

S I R E, apres cet estrange effet de presumption & de violence, il semble que tout ce qu'on pourra dire, sera de petite consequence, & que l'esloignement du Frere vnique d'un Roy, apres la detention d'une Royne Mere, n'est pas vn crime, mais vne faute legere. Si est-ce qu'elle paroistra bien grande, estant considerée en toutes ses circonstances : c'est le seul Frere legitime que D I E U vous a conserué : c'est vn Prince qui n'est point ambitieux, malicieux, entreprenant

& broüillon : c'est vostre bras droit , & la personne apres la Royne vostre Mere , en laquelle vous pouuez vous confier dauantage , la force du sang n'ayant point esté corrompuë en luy par aucun vice. DIEU pour nos pechez ayant differé la fecondité de vostre Mariage, encore que tout vostre peuple desire que personne ne puisse recueillir vostre succession , qu'apres cent ans d'aage , & quatre-vingts & dix de Regne : iusques à ce que la Prouidence diuine y aye pourueu autrement, Monsieur vostre Frere est vostre Enfant , & vostre bonté luy a protesté souuent qu'elle l'aimoit non comme Frere , mais comme Fils. Avec tous ses auantages qu'il a trouué dans vostre bon naturel , & que sa naissance luy a acquis , il a esté chassé hors de vostre Royaume , & contraint de mendier l'assistance des estrangers pour viure , & se conseruer pour vous seruir vn iour. I'ay dit , qu'il a esté chassé non par vostre mauuaise volonté , SIRE , car nous sçauons tous que vous l'aimez tendrement ; mais par l'artifice , apprehension , ambition , & vangeance de ceux qui ne le pouuoient plus souffrir , ny aupres de vous , ny en France. Ils ont apprehendé sa qualité & vostre affection qui luy donnoient quelque liberté de parler hautement , & de vous dire la verité de ce qui se passoit. Ils ont creu , qu'il ne pouuoit demeurer dans vostre Cour , sans faire du bruit sur l'emprisonnement de la Royne vostre Mere , qui estoit resoluë dans le secret conseil des malins deuant son depart de Paris. Tout estoit disposé pour faire ce scandale , sans que vous en ayez rien sçeu qu'à vostre

arriüée à Compiègne. Dans ce mesme triumvirat, qui prist cette abominable resolution, on auoit fait dessein de vous porter par des grandes considerations d'Estat, & horribles calomnies, à vous asseurer de la personne de Monsieur. Il en fut bien aduertý, & se contenta de dire des paroles genereuses, qu'un esprit plus violent que le sien, & qui n'eust pas eu tant d'apprehension de vous desplaire, eust accompagné de quelque grand effet de colere : mais Dieu le defend; vous n'en eussiez pas esté content, & l'inclination de Monsieur n'y est pas portée. Il ne laissa pas de partir de Paris, ne voulant point estre obligé de faire le mal, ny sujet à le recevoir : il vous aduertit de sa retraite, qui fut dans la Capitale de l'appannage que vous luy auez donné; il vous fit toutes les protestations d'obeyssance que vous doit un bon Frere & fidele vassal. Il ne manda ses gardés, les gensdarmes que vous entretenez sous son nom, & quelques Gentilshommes voisins, que lors qu'il fut bien informé qu'on le vouloit surprendre dans sa maison. Il sceut aussi, qu'on auoit practiqué quelques personnes parmy ceux de sa suite, pour ietter la diuision entre les siens, & le faire vendre par le party qui surmonteroit l'autre. Il cognut en suite de cela, que V. M. s'approchoit de luy apres la detention de la Royne sa Mere; & que vostre bonne amen'ayant autre intention que de le r'appeller aupres de vous, celle de vostre principal Ministre estoit, ou de le faire prendre dans Orleans, ou de l'en chasser. Pour faire reussir ce dessein, on faisoit auancer

vos troupes : cette ville estoit sur le poinct d'estre blocquée & affamée, les viures qu'on y apportoit ayant esté arrestez.

SIRE, il n'y a personne qui ne fuye dans ces rencontres, n'ayant point de volonté de faire mal, ny de puillance pour resister : en ce cas, il ne reste qu'à practiquer le commandement de nostre Seigneur. Monsieur vostre Frere sortit d'Orleans, & prist le chemin qui seul estoit libre : sans incommoder vos sujets, il passa iusques en Bourgongne, pour voir si vn* seruiteur que vous luy auez donné le receuroit ; & croyant estre en seureté en vne frontiere, où il vouloit viure sans faire violence, & sans crainte de la souffrir. Il n'y fut pas plustost arriué, qu'on fit entendre à V. M. que cette retraitte dans vne Prouince gouuernée par le plus paisible Seigneur de vostre Royaume, le menaçoit de ruine ; qu'il estoit necessaire de la preuenir par vne diligence extraordinaire, autrement que tout estoit perdu. Cette alarme porta V. M. à faire le voyage de Bourgongne, à y entrer en armes, à depossseder le Gouverneur, à reduire Monsieur à la derniere place sur les limites de la Franche Comté. Ceux qui le vouloient chasser hors de France, & le rendre Criminel, pour s'estre ietté entre les bras (comme ils disent) des anciens ennemis de l'Estat, furent trompez lors qu'ils virét que Monsieur fut d'aduis de prendre sa retraitte dás les terres d'un Prince allié de vostre Couronne, qui estoit affectionné au service de V. M. & outre qu'il est du Sang de France du costé des femmes, a espousé vne petite niepce

* Le Duc
de Belle-
garde.

de la Royne vostre Mere. Durant tout ce voyage de Monsieur, V. M. a receu par ses lettres, & creances données aux Gentilshommes qu'il a enuoyé, toute sorte de tesmoignages de respect, de soumission, & de desplaisir de ce que pour sa conseruation il estoit contraint d'abandonner vostre Royaume, & sur tout de s'esloigner de la douceur de vostre presence & de la Cour. Ces lettres contenoient aussi quelques plaintes contre celuy qui auoit fait arrester la Royne vostre Mere, & les raisons qui obligoient Monsieur à sortir hors de vostre Estat: elles donnoient quelque tendresse à vostre bonne ame; on fist arrester Mr de Briançon, qui fut porteur de la derniere, afin de couper chemin aux cognoissances qui vous pouuoient venir de ce costé là. Ce conseil fut donné à V. M. pour mettre les affaires hors d'esperance d'accommodement, qui est tout ce qu'on desire; & pour forcer Monsieur à se perdre par la tristesse, qui luy a desia causé vne maladie, ou par desespoir qui le poussa à entreprendre quelque chose qui vous peut desplaire. On veut couvrir tous ces crimes, en disant que les seruiteurs de Monsieur sont des meschans. Nous ne voulons point faire icy vn Apologie pour eux; il se peut faire qu'il y en aye quelqu'un qui ne soit pas homme de bien: mais il est certain, qu'ils ne sont pas violens. S'ils auoient eu le credit de faire sortir leur Maistre hors du Royaume contre raison, ils auroient eu le pouuoir de le porter à faire quelque violence contre Iustice. On leur reproche qu'ils ont esté corrompus par argent; ceux
qui

qui ont désiré de les acheter, leur ont voulu enseigner à se vendre : mais ils ont trouué la fidelité enuers leur Maistre toute entiere ; & n'ont pas veu qu'ils ayent employé les biens qu'ils ont receu de luy pour l'emprisonner & le chasser. S'ils estoient fols & insensez, comme on a publié dans ces belles apostilles, ceux-là sont des meschans qui se vantent de vous auoir porté à les faire Iuges des sages.

Le plus grand mal qui aye esté fait en suite de cette sortie de Monsieur, est en la premiere declaration adressée au Parlement de Paris, & tres-mal dressée, en ce qu'elle comprend tous ses domestiques, sans excepter ceux qui le seruent : il semble qu'on le vueille contraindre de se rendre à ses ennemis, en l'obligeant à faire bouillir sa marmite, & à tirer ses chausses. Chacun a creu, que si sa personne n'y a point esté comprise, la bonté de V. M. ne l'a peu souffrir ; & les sages ont iugé, que la violence qui a esté faite à vostre Parlement de Paris, pour auoir differé la verification de cette declaration mal conceüe, est vne grande bresche faite à vostre auctorité & reputation : tant s'en faut que ce delay aye blessé l'une & l'autre, comme on vous a voulu persuader, pour vous porter à employer le pouuoir absolu. C'est vne piece que vous ferez jouër quand il vous plaira : mais iamais homme de bien, ny seruiteur fidele, ne vous conseillera de la faire valoir que dans vne grande extremité.

Et afin que V. M. soit pleinement informée de cette verité, qui est de tres-grande importance, il est necessaire de vous représenter, pour quelle

considération nos bons & iustes Roys ont establi les Parlemens, & autres Cours souueraines : ils leur ont donné le pouuoir de verifier leurs Edicts, Declarations & Lettres patentes, avec la permission de faire leurs tres-humbles remonstrances sur la consequence de ce qui leur est adressé, pour estre examiné par eux, non pour estre simplement enregistré, ce qui n'est l'office que des Greffiers. Ce n'est pas SIRE, que ces Corps soyent les contreroleurs de vos actions, ou tuteurs des Roys, qu'ils ayent vne puissance par dessus la vostre, & soyent comme Tribuns du peuple. Ceux qui les voudroient rendre odieux le veulent faire croire ; ou peut-estre quelques particuliers de ces Compagnies qui ignorent leur institution, se sont imaginez cela, & le peuuent auoir dit. Il est vray, SIRE, qu'ils sont tous vos subjets, & vos Officiers ; ils n'ont point de puissance que celle qu'ils tiennent de vous, & ne doiuent vser d'aucune repartie, quand vous commandez en Maistre. Mais vous me permettez, s'il vous plaist, de vous dire vn secret qui vous a esté caché.

Les bons Roys vos predecesseurs auoient appris, ce que tous les anciens Politiques ont escrit, & que toutes les Histoires des Empires du monde ont confirmé, que les Monarchies qui n'auoient point de temperament d'Aristocratie, estoient de petite durée ; parce qu'elles se rendoient premierement suspectes, & apres odieuses aux peuples, qui leur donnoient vn mauuais nom. Nos Roys ont voulu fuir non seulement l'effect, mais le soupçon : ils apperceurent que les loix de leur Estat, & la soumission des François, leur acque-

soient vne entiere disposition de la vie & biens de leurs subjets, & mesme de faire des nouueautez, impositions, creations d'offices, & declarations, selon le rencontre & necessité des affaires. Pour faire receuoir ces choses auëc plus de raison & apparence de iustice, ces mesmes Roys se sousmirent volontairement à les faire examiner & verifier par les Cours souueraines, tant pour la descharge de leur conscience deuant Dieu, que pour celle de leur reputation deuant les hommes, se reseruans tousiours d'vser de l'auctorité absolüe, conformément à ces mots qu'ils mettent en toutes leurs Lettres patentes & Edicts; *Tel est nostre bon plaisir*. Les bons Princes, comme vous, se contentent de faire escrire ces paroles sur le parchemin, pour monstrier leur puissance: mais ils ne se seruënt iamais de tout le droit de la Souueraineté, qui doit estre bien mesnagé; & ne le scauroit mieux estre qu'en suiuant les chemins ordinaires, qui font aimer comme bon, & estimer comme iuste celui qui les tient. Au contraire, on murmure contre celui qui les quitte, & on a mauuaise opinion de son gouvernement: ce qui dispose peu à peu les esprits à la rebellion. Pardonnez-moy, si ie vous descouure cette verité tres importante: ce n'est pas aimer vostre personne, & vostre Estat, de la cacher; & c'est haïr l'une & l'autre, de la faire mespriser. C'est le dessein de ceux que la Iustice de Dieu & la vostre renuoyeront bien-tost deuant les Iuges, qu'ils ont voulu rendre odieux à V. M. Ils sont plus fideles seruiteurs estans interdits, proscrire, bannis & traitez avec paroles rudes, que ne sont ceux qui ont

maintenant l'honneur de vos bonnes graces , & sont chargez de vos bien-faits.

Tout ce que j'ay representé à V. M. tendoit à faire voir l'ambition, l'orgueil & la violence de celuy qui est le principal Ministre de vostre Estat; & qui est arriué iusques à vn tel auuglement d'insolence, de faire publier dans toutes les ruës de Paris vne genealogie qui le fait descendre de la coste de Louys le Gros. Il ne manque rien à cela, que de renuerfer par les armes, Finances, & places qu'il a en sa disposition, la Loy Salique, & à se faire Roy; s'il ne se contente de faire sa niepce Royne. Il traueille à cela, & c'est ce qu'on appelle chez luy le grand dessein. Il l'auroit desia acheminé, s'il n'eult rencontré dans l'esprit d'un Prince de vostre Sang l'entiere auersion d'un mariage, que personne n'a esté si hardi de luy proposer. Chacun a bien iugé, qu'il estoit impossible de faire resoudre vn Prince courageux, & bien appuyé sur les racines de sa naissance, & sur le merite particulier de sa personne, d'espouser vne Dame, à la verité fort pieuse; mais qui l'est iusques à vn point; qu'elle a fait vœu de religion, qui a desia de l'aage; qui est petite fille d'un Notaire, & les restes d'un pauvre Gentilhomme.

Après auoir fait cognoistre à V. M. vne partie des effects de la plus desreglée ambition, & du plus fier orgueil qui aye iamais possédé l'ame d'un Courtisan; il est necessaire de dire quelque chose de son auarice, qui est d'autant plus dangereuse qu'elle est plus couuerte. Je peux dire aussi, que peu de personnes, sur tout ceux qui ne iugent que par les apparences, ne se peuuent imaginer,

qu'il en soit tourmenté comme il est. On voit vn grand luxe, vne despenle Royale, des gardes montez à l'auantage, quantité de Noblesse pensionnaire, beaucoup de Secretaires, Pages, E taffiers, Officiers, & Faiseurs d'affaires bien couuers, plusieurs Escuyries remplies de cheuaux de grand prix : on entend & on compte vne bande de vingt-cinq ou trente mulets chargez de sonnettes, & tous couuerts de broderie : on remarque les despenles excessiues de la bouche, des bastimens superbes, & améublemens magnifiques : comment peut-on dire que l'auarice se rencontre parmi toutes ces profusions, qui meritent plustost le nom de prodigalité : ou pour escrire en termes plus doux, de magnificence Royale ; estant chose veritable, qu'elle passe celle de la maison de nos Roys qui ont vescu deuant François Premier.

SIRE, V. M. iugera, que toutes ces choses qui semblent contraires à l'auarice, sont les vrayes sources ; apres que ie luy auray fait voir, qu'une ame est capable en mesme temps des deux extremittez, qui ruinent la liberalité, & la modestie. Il est certain, & nous le remarquons tous les iours dans vostre Cour, & dans la façon de viure de quelques Seigneurs de vostre Royaume, que ceux qui despensent en Roys, questent en gueux : qu'il n'y a personne plus hardie à desrober au public, plus importune à demander aux Princes, ny plus cruelle à exiger des peuples, que ceux qui veulent paroistre par vne grande suite de Noblesse & valets, par des beaux bastimens, meubles precieux & habits magnifiques, qui sont grands

joüeurs, qui ne ſçauent point donner, mais diſſiper; & ne peuuent meſnager avec honneſte prudence, ce qu'ils ont ramallé avec vne ſale auarice. Cette verité eſtant bien reconnuë, & prouuée par l'experience, il ne reſte qu'à faire voir, que celuy que nous deſcriuons à V. M. eſtant le plus ſplendide qui aye iamais eu part aux bonnes graces d'un grand Roy, eſt auſſi le plus auaricieux. Il ne ſe peut faire autrement, qu'outre les bien-faits de ſon Maïſtre, & ceux de ſa Maïſtreſſe, il n'aye pris ſous main plus de trois quarts de ce qu'il a employé & reſerué depuis dix ans: ſi nous mettons en ligne de compte ce qu'il auoit deuant ce temps, la deſpenſe qu'il a faite du depuis, & ſon eſpargne, nous deſcouvrirons aiſément ſa recepte.

Chacun ſçait, que ſes reuenus eſtoient fort petits, lors qu'il vint d'Auignon à Angoulefme; & qu'auſſi-toſt apres il fit cognoiſtre, que ſon auarice luy faiſoit preferer le bien vtile à l'honorable, lors qu'il rechercha & trouua les moyens pour faire perdre les debtes de ſon pere & de ſon frere, & qu'il fit caſſer le teſtament du dernier, & lais pieux faits en vn temps, auquel, comme il diſoit, l'affliction auoit troublé ſon eſprit. Les artifices qui furent practiquez, les tours de ſoupleſſe qu'on fit pour deſgager les biens de ſa maiſon, & ruiner des pauures creanciers, ſont cognus par pluſieurs perſonnes. La cognoiſſance particulière de toutes ces friponneries fait tenir vn * homme priſonnier à la Baſtille, & l'a rendu depuis quatre ans Penſionnaire de V. M. Il n'eſt coupable d'autre crime, que d'auoir ſçeu ce qui s'eſt

* L'Anglois.

practiqué en ces affaires ; qui ont fait voir que l'avarice auoit mis ſous le pied l'honneur & la conſcience , puis qu'elle a porté Mr le Cardinal à faire declarer ſon pere ſafranier , & ſon frere ainſé inſenſé. Cette paſſion a trouué dequoy éguifer ſon appetit , non dequoy ſe remplir dans l'Intendance de la maiſon de la Royne voſtre Mere, dans laquelle il eſtoit maĩſtre abſolu de toutes les Finances. Il a receu , comme il a confeſſé autrefois en preſence de pluſieurs perſonnes , en bienfaits , & argent comptant , neuf cens mille eſcus, ſans les ameublemens , buifets de vaiſſelle d'or & d'argent , pierreries , & chapelle qui a couſté plus de cent mille piſtoles. Adjouſtez à tout cela, que la pluſpart des parties caſueles ſont demeurées entre les mains , & que perſonne n'y a eu part durant ſon gouuernement : qu'il a vendu les charges de Grand Aumoſnier , & d'Intendant ; qu'il a gardé le profit des deux avec la recompense : qu'il a fait la guerre d'Angers pour ietter les deſpenſes dans la confuſion , & pour conuertir la plus grande partie en ſes vſages , ou des ſiens : qu'il a entretenu la Nobleſſe qui le ſuiuoit , & la pluſpart de ſes parens & domeſtiques , avec les penſions de la Royne voſtre Mere : que ceux qui ne ſe rendoient elclaues de ſes volontez , n'ont eu que la miſere & le deſeſpoir. Vous recognoiſtrez la tyrannie que ſon avarice a exercé , & qu'elle a retiré durant l'adminiſtration des biens de ſa Maĩſtreſſe pour ſoy , ou pour les ſiens , plus de deux millions d'or. C'eſt en ce temps là qu'il a liquidé & augmenté de beaucoup les reuenus de ſa maiſon ; qu'il a achetė Limours quatre

vingts dix mille eſcus; qu'il y a fait des reparations pour plus de cent mille, qu'il a acquis, fait baſtir & embellir magnifiquement ſa maiſon de Paris; qu'il a adjouſté à ſa terre les Domaines de V. M. les Greſſes, & Offices qui eſtoient à ſa bienſeance; qu'il a recherché curieusement par toute la France & en Italie les meubles precieux; qu'il a corrompu ceux qui ſ'oppoſoient à ſon bonnet rouge; qu'il a fait des grands preſens à ceux qui le pouvoient aider pour ſurmonter les difficultez; qu'il a entretenu quantité de ſolliciteurs; qu'il a grandement releué ſon train, qu'il a fait des feſtins exceſſifs, & tenu bon ordinaire, ayant fort peu de rentes, & ſans rien emprunter. Tout cela ſ'eſt fait aux deſpens de la Royne voſtre Mere, qui reçoit aujourd'huy vn beau payement, non ſeulement des biens qu'elle a fait de bonne grace, mais de ceux qu'elle a ſouffert qu'on luy deſrobaſt ſans crier.

Que ſi l'auarice a fait ces pillages ſur vn petit bras de mer, & dans vn eſquif; quel brigandage aura-elle exercé ſur l'Ocean avec vne flotte? Si dans la maiſon de la Royne Mere, qui n'eſt qu'un ruiſſeau de la voſtre, on a puisé tant de richesses, qu'aura-t'on fait dans la ſource? Ce que ie diray ſurpaſſera toute créance; & neantmoins il eſt certain, que c'eſt pluſtoſt au deſſous qu'au deſſus de la verité. Outre que tout le fruit de la recherche des Financiers tomba dans la bourse de M^r le Cardinal, ou dans celle des ſiens: V. M. a de quoy tirer quelque aduantage contre les ennemis de ſon Eſtat, de ce que ie veux dire; & a vn moyen de leur faire voir voſtre puiffance, lors que l'au-

ray prouué qu'un seruiteur, avec ceux qui ont esté en intelligence avec luy, vous a pris dans six ans plus de dix millions d'or. Le bastiment de Richelieu fait par ambition sur le plan de celuy de Luxembourg, & trois autres maisons basties par celuy, entre les mains duquel M^r le Cardinal a mis vos Finances, vous coustent plus de huit millions de liures, & les ameublemens plus de six millions. V. M. a fait à Versailles un petit logement d'un Gentilhomme de dix ou douze mille liures de rente, & vostre Louure demeure imparfait.

Mais que sera-ce lors qu'on vous fera voir les reuenus qui ont esté adjouctez à ces magnifiques maisons? Richelieu, qui n'estoit qu'un petit fief releuant d'un Gentilhomme voisin, est maintenant une terre de plus de cent mille liures de rente. Celuy qui porte le nom de Surintendant de vos Finances, & en effet n'est que l'argentier du Cardinal qui vous l'a donné, n'a pas acquis moins de reuenue en Auvergne, en Touraine, & en Anjou. Chacun d'eux possède en diuers endroits, & différentes sortes de biens, plus de cent mille escus de rente; sans comprendre les benefices de M^r le Cardinal, qui valent autant, & sans faire estat des appointemens, pensions, entretenemens, gratifications pour ces charges & places, sur tout pour l'Admirauté, dequoy on ne scauroit faire un compte certain. Tout cela est à discretion & sans discretion augmente tous les iours. Pour la marine il n'y a rien de réglé; la pluspart de ce qui est contenu en cet article s'employant en un comptant, quoy que vostre Châbre des Comptes puisse dire au contraire. On y fist passer par iussion

& commandement exprés de V. M. il n'y a pas long temps, vn comptant de deux millions de liures, pour l'entretien de vos vaisseaux, sans fournir aucun estat de la despenſe.

- C'est sur ce mot de comptant, que nous aurions vn grand ſujet de faire voir les horribles brigandages qui ſe font dans vos Finances. Si on vous veut deſrober cent ou deux cens mille eſcus à la fois, & prendre (comme on a fait au ſiege de la Rochelle) le tiers ou la moitié d'une voiture de Finances; cela ſe fait pour abreger chemin par les menus de comptant, ſur leſquels on expedie vn ou pluſieurs acquits de comptant, pour la deſcharge des Treſoriers de voſtre Eſpargne en la chambre des Comptes: mais on n'a garde d'y faire voir les menus, qui deſcouvroient la volerie. Ce chapitre des comptant ne deſpend que de voſtre Surintendant; c'eſt là où il ſert ceux qui l'ont mis en charge, & ne ſ'oublie pas. Pour couvrir ce jeu, on fait bailler des certifications par des hommes affidez, & perſonnes de neant, comme s'ils auoient receu les deniers de V. M. ou pour employer en affaires ſecrettes, ou pour l'entretien des vaiſſeaux, ou pour les trauaux aux ſieges des places, ou pour acheter des munitions & des viures, ou pour payer ſes eſpions, ou pour voyages, & autres inuentions qui ſe pratiquent. C'eſt vne choſe aſſeurée, que pour la digue, tranchées, & forts de la Rochelle, il ſe trouuera à l'Eſpargne pour plus de ſix millions de liures de certifications, baillées par vn valet de chambre de ſon Eminence, qui de boulanger de la rue de la Mortellerie à Paris eſt deuenu tout à coup grand

Seigneur ; aussi bien qu'un autre, qui de lacquais est un beneficiier d'importance , & riche de trente mille livres de rente. Ces gens là , & plusieurs autres , ne sont remplis que de miettes qu'on leur a abandonné, lors qu'ils ont seruy pour bien couvrir la table de leur Maistre. Si on supputoit les biens de ceux qui n'ont pris avec la ligne que les petits poissons dans l'eau trouble de vos Finances, sous la protection de Mr le Cardinal, on trouueroit que cela monte à plus de cent mille livres de rente, seulement dans deux ou trois maisons de petits fripons : de là on peut conjecturer, ce que doiuent auoir fait ceux qui avec des grands filets n'ont pesché que des monstres.

Nous pourrions faire voir en detail beaucoup de choses , desquelles nous auons de tres-bons memoires ; il suffit de monstrier au doigt ce qui paroist & esclatte au soleil, & qui n'est pas venu du Ciel, ny des rentes des anciennes familles. C'est assez que chacun a horreur de voir , que ceux qui ont pillé V. M. & son peuple , n'ont pas caché leur larcin ; qui seroit un tesmoignage de quelque pudeur, mais ont publié leur peché, comme s'ils en faisoient gloire. Ce qui est plus à craindre ne se voit pas : il y a des Finances recelées, lesquelles dans une disgrâce & recherche pourroient estre employées contre V. M. & pour la dissipation de l'Estat.

Une partie de ces tresors, en bagues & argent monnoyé, sur tout ce qui auoit esté desrobé dans la guerre d'Italie, fut apporté de Lyon en Aui-gnon. C'estoit un effect de l'apprehension que la maladie de vostre Majesté donna à celuy, qui

au lieu d'auoir recours aux prieres enuers Dieu, & d'affilter aux conſultations des Medecins, mettoit à couuert ſes richelies, & cherchoit en meſme temps des protections contre vos plus proches.

*Mōſieur
de Cha-
ſteau
neuf. Et
le Preſi-
dent le
Gay.*

La Royne voſtre Mere auoit ſceu toutes ces choſes, & pluſieurs autres que la prudence luy faillit reſeruer à vne autre ſaiſon. Le coupable ſe defia de ſa mauuiſe cauſe, craignoit voſtre Juſtice, & l'autorité & les raiſons de ſa partie, iuſques à vn point qu'il auoit reſolu de ſ'enfuir. Il fut arreſté par le conſeil de deux Officiers, qu'il vous fit prendre pour recompenſe de l'aduiſ qu'ils luy donnerent de ſ'opiniſtrer contre le mauuais rencontre. Cependant ſa defiance fut telle, qu'il enuoya le plus precieux de ſes meubles dans la citadele du Havre de Grace; & fit embaler par vn des ſiens, qui l'a dit par meſgarde, cent ſacs de piſtoles d'Eſpagne, qui pouuoient faire en tout enuiron quatre millions de liures: on a transporté au meſme lieu, depuis peu, vingt-cinq charges de mulets d'or monnoyé. Il eſt probable, que Broüage n'eſt pas moins fourny, ou de ce qu'on y a apporté, ou de ce qui s'exige ſur toutes les coſtes de Guienne, Poictou, & Bretagne, ou de ce qu'on retire des Salines. C'eſt choſe veritable, que cette place vaut au Gouverneur cent mille eſcus tous les ans, & en couſte à V. M. plus de deux cens mille. Mais comment ne feroit-on en ce lieu là de grandes voleries, puis que le gouuernement, pour ſeruir à ce deſſein, a eſté volé à la Royne voſtre Mere? Elle aperçeut la tromperie qu'on luy auoit faite, apres auoir payé la recompenſe. Elle

ne fiſt point d'instance pour entrer en poſſeſſion d'une place de laquelle vous l'auiez pourueü; parce qu'elle ne deſire point d'autre ſeureté en France, que celle de vos bonnes graces, & ne veut point d'appuy, que celui que voſtre Naiſſance & ſon innocence luy doiuent donner. C'eſt là où elle cherche ſa retraite, & où elle logetous ſes treſors; & croit fermement, qu'il n'y a que ceux qui ont mal fait, ou qui veulent mal faire, qui marchandent & fortiſient les meilleures citadeles du Royaume. Il eſt vray auſſi, que la crainte de la punition pour les crimes commis, ou le deſſein d'en adjoûter de plus grands, le portent à ſe cantonner, & à faire amas de richelles contre voſtre Juſtice & voſtre Puiffance.

SIRE, il eſt certain, que celui qui voudroit vous perſuader qu'il eſt vn pauvre Preſtre, qui n'a point d'argent caché, en a aſſez avec ſon argentier & ſon clerc, pour releuer tous les affaires de V. M. & ſoulager voſtre peuple. Le Garde des ſeaux de Marillac auoit fait vn eſtat de ce qui eſtoit venu à ſa cognoiſſance depuis cinq ans, qui montoit à des ſommes immenſes, ſans ce qui eſtoit paſſé par les comptans, rabais de vos fermes, preſens des partiſans, Edicts nouueaux, ce qui auoit eſté practiqué dans les viures, artillerie, achat des munitions, monſtres deſrobées aux gens de guerre, & ſur tout dans la marine que perſonne ne cognoiſt. Ce rolle qui ne comprenoit rien de tout ce qui eſt prouenu de tous ces articles, & des charges qui ſont toutes entre les mains de deux hommes, deuoit eſtre preſenté à V. M. par Mr de Marillac. Il fut trouué dans ſa layette de laquelle

* Le Sur-
intendant
Deſſiat,
& Bois-
tiller Se-
cretaire
d'Eſtat.

on se saisit ; elle a esté apportée à celuy qui n'auoit garde de faire mettre en inuentaie ce papier , & encore moins de le vous faire voir. Il eust esté plus soigneux de vous monstrier quelque piece , qui eust seruy pour mettre entre les mains de la Iustice celuy , qui s'est imaginé auoir esté son grãd ennemy , & qu'il appelle ingrat dans son Dialogue des morts. Nous pouuons asseurer avec verité , qu'il n'a point esté ny traistre ny larron : si on eust trouué seulement vne conjecture du premier crime , & quelque marque du second , on n'eust pas manqué de le publier , comme on a fait ce qui s'estoit passé durant les troubles de la Ligue. S'il a fait paroistre vne grande inclination pour l'establissement des Monasteres nouueaux , s'il a facilité les affaires des Religieux , & leur a procuré quelque bien ; il estoit aisé de retrancher les effects d'un trop grand zele de pieté. On doit plustost blasmer l'hypocrisie de celuy qui donne vos Finances avec profusion , non seulement à tous les Conuents de Paris , mais à toutes les maisons Religieuses qu'il rencontre en son chemin , pour se faire prescher dans les chaires grand seruiteur de Dieu & du Roy , innocent administrateur de son bien , & protecteur du pauvre peuple. Nous sçauons aussi , que dans les visites frequentes que font quelques Moines à Paris & ailleurs , il leur fait combattre la verité trop clairement recognuë , & trop viuement sentie. C'en'est pas la seule inuention qui se pratique , pour acquerir quelque reputation d'homme de bien , & effacer la creance publique. En tous les festins qui ont esté faits de vingt , trente

& quarante mille liures, à l'enchere les vns des autres, lors que le pauvre peuple languissoit de faim, que les soldats estoient mal payez, & que les affaires de V. M. estoient reculees; il n'y a point eu de Maître d'Hostel; d'Escuyer de cuisine, bon patissier, & officier de bouche, qui n'aye eu vne ordonnance de cent ou deux cens escus pour la bonne chere. Ainsi vostre Majesté payoit non seulement les banquets excessifs, mais elle recompensoit par excez ceux qui les auoient dresséz.

Tout ce que nous auons dit, n'est qu'un petit abregé du luxe & de l'auarice de ceux qui ont pillé vos Finances, qui ont ruiné vos peuples, qui ont dissipé vos gens de guerre, qui ont appauury vos Officiers de Iustice, & les ont contrainsts de vendre à vos subjects trop cherement en detail, ce qu'on les a forcez d'acheter à grand prix, & en gros. Avec tout cela, ils ne peuuent asséurer à leurs heritiers ce qu'on leur liure, qui n'est qu'un peu de parchemin & de circ.

V. M. a un notable interest à faire cesser tous ces desordres, & ceux qui ont l'honneur de gouverner vostre conscience, sont bien demeurez en arriere de ne l'auoir iamais aduertie, de ce qu'ils ne peuuent ignorer, qui leur creue les yeux, & leur rompt les oreilles; vne sainte liberté eust deschargé leur conscience, & eust soulagé la vostre. Nous sçauons, SIRE, qu'elle est tres-bonne, & louons DIEU de ce qu'il vous a donné vne belle ame; vne pieté admirable, & vne parfaite inclination à la Iustice. Mais toutes ces qualitez, tres aduantageuses pour vostre salut, pour le conten-

tément de vos plus proches, & pour le gouuernement de voſtre Etat, doiuent eſtre aidées par quelque lumiere qui vous vienne de dehors, & qui face valoir l'interieure que DIEU vous donnera. Ceux-là attirent la malediction de tout voſtre peuple, qui la deſtournent, où qui l'eſtouffent. Prenez garde ſur toutes choſes, SIRE, à celui qui veut faire paſſer pour des grandes prudences, des petites fineſſes qui ne ſont pas de durée; ſont aiſement recognuës, effarouchent tous les eſprits, & ne ſçauroient conſeruer vn Royau-
me, qui doit eſtre gouuerné par des maximes certaines & ſolides. La premiere & principale eſt, de faire iuſtice à vn chacun; & de commencer par celle qu'il faut rendre à ſoy-meſme, & à ſon ſang. La Royne voſtre Mere, & Monſieur voſtre Frere vnique, la vous demandent. Comme les loix du Royaume les aſſujettiſſent à voſtre auſtorité; les meſmes loix, & celles de la nature veulent, que ceux qui les ont accuſez fauſſement deuant vous, qui les ont calomniez deuant voſtre peuple, & qui les ont ſcandalifez à la face de toute la Chreſtienté, ſoyent ſeuerement punis. Outre que vous y auez vn intereſt d'honneur, trois grandes & vertueuſes Princeſſes vos Sœurs, trois des plus releuez Princes de la Chreſtienté, qui ſont leurs maris, & l'eſprit meſme du feu Roy, vous demandent cet exemple. On ne le veut point porter aux extremitez, où il deuroit aller pour le faire reſpondre aux fautes extremes; mais il eſt neceſſaire, qu'il ſoit fait en la façon qu'il vous plaira, & le pluſtoſt que vous pourrez, pour la gloire de DIEU; pour la ſeureté de voſtre perſonne, pour la deſ-
charge

charge de la reputation des vostres, pour la satisfaction de vos Officiers, & pour le iouagement de votre pauvre peuple. Rappellez les esprits effaroucez, rechauffez les cœurs refroidis, donnez la liberté aux prisonniers, remettez en leurs places ceux qui en ont esté challez par la violence; laquelle ne peut continuer sans leur mort qui met en danger vostre vie. Ne croyez pas ce qu'on vous a voulu persuader, que les frequens changemens des Ministres d'Estat apportent vn grand desordre à vos affaires. Il est vray, SIRE, que les mutations des Medecins & des remedes ordinaires empeschent la guerison des malades; qu'il est dangereux de percer vn vieux abscez, encore qu'il incommode le corps; que c'est le propre d'vn desgousté de taster vn peu de chascue viande. Ceux qui se seruent de ces maximes, qui doivent conseruer les gens de bien dans la conduite des affaires des bons Roys, ne les ont pas proposées lors qu'ils vous ont fait faire plusieurs changemens, iusques à ce qu'ils n'ont veu personne qui ne dépendist plus d'eux que de vous. Après auoir exigé de V. M. des sermens injustes & abominables pour obliger vostre ame à ne rien escouter à leur prejudice, ou à leur declarer tous les bons aduis qui vous seront donnez contre eux; ils voudroient vous faire croire, que l'action de la plus grande iustice que vous sçauriez faire, seroit vntesmoignage de legereté. Il font publier par des escriuains infames, & qui sont à leurs gages, que vous les deuez garder pour les grands seruices qu'ils vous ont rendus. Ils disent qu'ils ont pris la Rochelle. Qu'avez vous donc fait, puis

fant & genereux Monarque? n'estiez-vous en ce siege qu'un petit volontaire? On ne compte pour rien les actions de tant de braues hommes, qui ont bien executé vos ordres. On ne dit rien du Marefchal de Schomberg, qui a chargé si viuement les Anglois, du Marefchal de Thoiras, qui les a soustenus long temps sans apparence de secours; du Commandeur de Valancé, qui donna l'inuention de le faire passer; & de beaucoup de sages Capitaines, & vaillans soldats, que vostre conduite a dressiez, que vostre presence a animez, & leur courage a porté dans les hazards. On diroit, à ouyr parler les flatteurs de Mr le Cardinal, qu'il a esté l'Ange qui a tué tout seul l'armée de Sennacherib, lors que celle des Israélites dormoit; & que Dieu nous a enuoyé un Samson, qui sans aide d'aucune personne, & sans maschoire d'asne a defait les troupes des Philistins. On imprime, que non seulement l'Estat doit sa conseruation, mais la Religion sa liberté à un autre qu'à vous; & par un crime qui passe le premier de leze-Majesté, on vous oste la gloire, que vous estimez plus que la vie. A la verité ce seroit vne grande merueille, si la Religion deuoit quelque chose à ceux qui tesmoignent n'en auoir point. Les progresz quelle a fait dans vostre Royaume sont deus à la solide pieté de V. M. & aux conseils de plus gens de bien, que ne sont ceux qui destruisent la vraye Eglise en Allemagne, & dans les Pays-bas. Je ne veux point examiner les considerations d'Estat, qui vous ont porté à vouloir assister les Princes & Republiques qui ont alliance avec V. M. Je diray seulement, qu'il y a certains aduis qui ne doi-

nent point venir des Ecclesiastiques, & sur tout des Religieux qui se disent bien reformez.

Le mariage, le trafic, & condamner les criminels, sont choses bonnes à la Republique; elles sont defenduës aux gens d'Eglise. Tout ce qui est bon ne doit pas estre practiqué indifferemment par tous les hommes, & la diuersité des professions fait en vne vn crime, ce qui est vne vertu en l'autre. Il n'est pas bien seant, que les Ambassadeurs d'Hollande, & les Agents du Roy de Suede soient adresséz à vn Religieux, quand mesme il seroit bon pour l'Estat de les assister. C'est vne chose plus estrange, que ce Møyne aye procuré l'assemblée de Leipzig de vingt-cinq Princes, ou villes Ansiatiques, des sectes de Caluin ou de Luther, pour leur faire resoudre vne Ligue protestante contre la Catholique; pour laquelle ce mesme homme a esté autrefois Solliciteur en vostre Cour. C'est vn crime execrable d'auoir voulu corrompre vn ingenieur François, qui sert le Roy de Pologne, pour luy faire trahir son Maistre, & donner entrée au Turc dans trois ou quatre places; de peur que le Polonois n'assistast l'Empereur: ce dessein est bien esloigné de l'inuention ou reuelation de la milice Chrestienne, qui avec cent hommes & sept vaisseaux deuoit prendre le grand Turc, & le conduire en triomphe dans la place Royale.

En toutes ces choses nous ne parlons pas des raisons d'Estat, mais nous asseurons, que les Ecclesiastiques, qui font publier qu'ils sont les restaurateurs de la Religion, deuroiét laisser à d'autres les soins des affaires des Protestans, & tesmoi-

gner dauantage de pieté & de charité qu'il n'en paroift en leurs actions. Ils ſont obligez par leur profeſſion à nous faire paroître l'eſprit de Paix, que I E S V S-CH R I S T a laiſſé pour heritage à ſes enfans: elle leur doit eſtre tellement recommandée, que S. Auguſtin ne fait point de difficulté de dire, que celuy qui ne l'aime pas, eſt enfant de perdition, & Ante-chriſt.

Quelle qualité donnerons-nous à nos Eccleſiaſtiques, qui recherchent les guerres pour ſe rendre neceſſaires, pour piller dans les confuſions qu'elles apportent, & pour faire perdre la cognoiſſance de leurs crimes? Ils ne ſe contentent pas d'irriter les ennemis eſtrangers, mais chaffent les Enfans de la Maiſon, les Grands du Royaume, ſurchargent les peuples, pour les ietter par deſeſpoir dans les factions, & dans la rebellion. Apres tout cela, ils diront qu'il n'y a qu'eux ſeuls qui ſoyent fideles, qu'il n'y a point de places, ny point de gouuernemens aſſeurez à V. M. que ceux qu'on leur met entre les mains: vous diſpoſent à donner des recompensés exceſſiues à ceux qu'on veut depoiſſeder; rendent leur fidelité ſuſpecte, pour y loger ceux qu'il en faudra tirer avec beaucoup plus de fraiz, qu'on n'en a fait pour les y mettre.

SIRE, on vous deſcouure vn des plus grands abus de voſtre Royaume, dans lequel les changemens des Gouverneurs des places fortes ſ'eſt rendu auſſi frequent que celuy des Miniſtres de voſtre Eſtat. Ceux que vous auez à preſent ne ſe veulent point maintenir par la reputation des bonnes actions, & ſur tout en recherchant les moyens

qui les aſſeureroyent pour long temps de la continuation de voſtre bien-veillance: ils achètent au prix du ſang de vos ſujets les meilleures retraites: ils ne ſe contentent pas d'une ou de deux, mais en veulent avoir vingt ou trente. Ces entrepriſes ſont d'une perilleuſe conſequence, non ſeulement parce que le plus clair de vos Finances y eſt employé, mais qu'on ne ſçauroit eſtimer combien vous couſtent les conſtructions des citadelles nouvelles, les reparations des anciennes qu'on munit contre vous, l'entretien des garniſons trop fortes pour conſerver les places, & eſtimées trop foibles pour garder les treſors qui y ſont. Les autres places frontieres n'eſtans point entretenues, ont contraint les Gouverneurs de les venir offrir à ceux qui trouvent le moyen de vous faire agréer leur demiſſion, en leur payant autant comme elles couſteroient ſi on les retiroit des mains des Eſpagnols, ou des Anglois. Cet infame & dangereux trafic a continué depuis la mort du feu Roy, mais il n'eſt iamais venu au point où il eſt mis, par ceux qui l'ont autrefois blaſmé en autrui pour trois ou quatre places, & qui maintenant en poſſèdent en leur nom ou de leurs parens, alliez & affidez, plus de trente, & en tiennent en marché plus de dix de tres-grande importance.

Je ne ſçaurois oublier vne ruse qu'on a pratiqué pour oſter au Mareſchal de Thoiras le gouvernement de l'Isle de Rhé: celui qui vouloit eſtre Maistre de tout l'Ocean de France, de ſes Ports, de ſes Forts, de ſes Iſles & de ſes vaiſſeaux, apres la priſe de la Rochelle, perſuada à V. M.

pour se rendre plus aisément Gouverneur de cette Isle, qu'il estoit necessaire pour le bien de vos affaires, de raser la citadele de S. Martin. Elle auoit esté tres-bien bastie par le soin & conduite dudit Marechal; lequel ne laissa pas de tesmoigner quelque petit regret de voir, comme il disoit, couper la teste à sa fille aisnée. Mais comme il est sage, & fort obeyssant aux commandemens de V. M. il ne dist pas tout ce qui pouuoit seruir pour arrester ce dessein. Celuy de M^r le Cardinal estoit, de faire rebastir la citadele, & d'obliger V. M. à vne double despenſe, qui est tousiours colorée par quelque pretexte nouueau. Les bons esprits n'en manquent iamais, pour venir à bout de leurs entreprises: elles vont à se cantonner, & partager le Royaume avec vous, ou à faire vn effort pour l'enleuer tout entier, si la Providence de Dieu & vostre prudence ne les arrestent bien-toſt.

Le remede à ce mal est, d'oster le moyen de se mettre à couuert contre vostre iustice, & de troubler le repos de la France, à ceux qui ont sujet d'apprehender vostre indignation, & le ressentiment de vos plus proches qu'ils ont voulu perdre. SIRE, il est necessaire d'empescher que ceux-là ne fassent les tyrans dans les extremités de vostre Royaume, qui l'ont fait trop long temps au milieu, & mesmes dans vostre Maison. Vn bon reglement qui sera saintement iuré, coupera chemin pour l'aduenir à l'ambition, auarice, & dessein pernicieux de ceux cui veulent auoir le gouuernement de plusieurs places. Que les plus fideles seruiteurs n'en ayent qu'une, & les Mini-

ſtres de voſtre Eſtat, ny leurs parens du tout point, pour leur donner ſujet de ne le conſier qu'en leurs bonnes actions, & en l'affection de vos ſubjets ; & ſur tout , en voſtre bien-veillance. Elle protegera toujours ceux qui feront bien , comme au contraire elle chaſtiera ſans apprehenſion de mauuiſe ſuite , ceux qui abuſeront de l'auctorité que vous leur mettez en main. Mais dequoy ſeruiront les plus fortes citadeles , ſi V. M. eſt contrainte pour les retirer, de faire arreſter les Gouverneurs, iuſques à ce qu'elles ſoient rendües ? Mr le Cardinal a grandement failly , n'ayant pas ſceu reconnoître, que le iugement de Dieu nous perd bien ſouuent par les meſmes choſes dans leſquelles nous auons cherché noſtre affermiſſement. La qualité de Mr le Cardinal l'exemtoit d'un plus rude traitement que d'un congé : il ſemble que les places qu'il tient , & les treſors qu'il y a retirez, luy donnent la hardieſſe de s'enſuir , ou obligent V. M. à ſ'alleuer de ſa perſonne. Elle a mieux aimé courir le hazard de tomber du plus haut de ſa fortune ſur les baſtions & canons du Havre de grace ou de Broüage, que ſur les liëts molets, & riches tapifferies de Richelieu.

Le bon & ſolide iugement de V. M. auoit preueu ce mal , & auoit trouué vn moyen de luy couper chemin , lors que de ſa bouche Royale, & par la preuoyance ſeule , elle commanda au Secretaire d'Eſtat , qui expedia les prouiſions du Surintendant de vos Finances , d'y attacher & faire mettre ſous le contre-ſeel vne declaration, qui portoit , que le Marquis Deſſiat ne pourroit iamais pretendre d'eſtre Miniſtre de voſtre Eſtat ,

d'auoir ſceance dans voſtre Conſeil eſtroit, d'eſtre Gouverneur de Prouince, ny de place forte, ny aspirer à aucune charge d'Officier de voſtre Couronne. V. M. voulut par ces loix arreſter non ſeulement l'ambition & l'auarice de celuy qui entroit dans cet employ, mais luy faire cognoiſtre, que ſ'il auoit plus de ſoin de ſes intereſts que des voſtres, il n'y auroit aucune apprehenſion de remuement, ny conſideration de dignité qui empeſchast de le traiter, comme on feroit le moindre de vos Financiers conuaincu de peculat. V. M. pour luy donner plus de crainte, retira la copie ſignée de ſes prouiſions, avec celle de ladite declaration; dequoy elle a tres-bonne memoire, comme de tout ce qui eſt iamais venu à ſa cognoiſſance, qui ſçait bien que nous ne mentons pas, & que cette declaration n'a point eu d'effect. V. M. iugera auſſi, ſ'il n'eſt pas expedient de ne receuoir iamais vn Miniſtre ny Secretaire d'Eſtat, ny principal Officier, par les recommandations & pourſuites importunes de celuy qui eſt le plus puiffant dans voſtre Conſeil eſtroit, qui en fait vn à ſa mode, qui fait ſceller ce qu'il veut par l'vne de ſes creatures, ſigner les yeux fermez par l'autre, deliurer argent ſans compter, mettre des canons dans ſes citadeles ſans nombre, & des munitions ſans peſer par le troiſieſme: faiſant cognoiſtre à ce triumvirat par la puiffance qu'il a eu de l'eſtablir, qu'il n'en a pas moins pour le ruiner quand on le faſchera. **SIRE**, cette trop grande intelligence, principalement quand elle ſe porte au mal, eſt la cauſe de la deſolation de voſtre Eſtat; comme la trop grande deſunion en peut reculer le bien. C'a eſté vne fatalité, que depuis la mort du

feu Roy la pluſpart des Miniſtres del'Eſtat ont attaché leur eſprit, & perdu le temps qu'ils deuoient employer à vos affaires, aux intrigues de Cour, & à faire des cabales pour ſe challer les vns les autres, ou pour ſ'entendre à voſtre pre-judice.

V. M. qui eſt par la grace de Dieu tres-bonne meſnagere, eſtant aduertie des larcins qui ſe font dans vos Finances, les arreſtera en oſtant par vn arreſt ſeuere les comptans qui ſeruent de couuerture à tous les pillages. C'eſt choſe veritable, que celui de vos menus plaiſirs qui ſont au deſſous de la mediocrité, & celui de l'entretien de quelques eſpions & penſionnaires ſecrets, vous font deſrober plus de quatre cens mille eſcus tous les ans, & en temps de guerre la moitié dauantage. V. M. iugera auſſi, ſ'il n'eſt pas expedient de regler les deſpences de la marine, d'en prendre cognoiſſance, & la donner en detail à voſtre Chambre des Comptes, afin qu'on voye là où va le quart de voſtre Eſpargne, qu'on dit eſtre englouty par la mer.

Il eſt auſſi tres-important, que V. M. examine les deſſeins de ceux qui voudroient faire entreprendre des guerres mal à propos, ou qui ne les termineront pas quand ils trouueront vn plus grand auantage pour voſtre gloire, conſeruacion de vos Capitaines, ſoldats, munitions, Finances, & pauvre peuple, que de les continuer avec la ruine de toutes ces choſes; pour ſe rendre plus neceſſaires, & vanger leurs querelles particulieres. Cela eſt abominable deuant Dieu, & puniſſable dans toutes les Juſtices des Empires du monde. **SIRE**, les bons & ſages Roys ne ſont iamais

portez à entreprendre vne guerre, que par necessité; & ne la font que pour establir la paix dans leurs Estats, ou pour l'acquiescer à leurs Alliez. Lors qu'on l'a demandée, & que l'occasion s'est présentée de la donner, ou de l'accepter sans vn notable prejudice de la reputation, il la faut embrasser comme vne fille de Dieu, sœur de la Justice, mere de l'abondance, tutrice de la pieté, & le plus riche present que le Ciel puisse enuoyer à la terre, & les Roys donner à leurs sujets.

Nous sçauons bien, que V. M. a vn bon dessein de pouruoir au soulagement des siens; & l'auroit desia fait, si elle n'eust esté retenue par les affaires qu'elle a eu au dedans & au dehors de son Royaume. Tous ces embarras ne viennent que des mauuais conseils de ceux qui protestent en vostre presence, dans les assemblées publiques & dans leurs imprimez, qu'ils recherchent les moyens de descharger vostre peuple, & qu'ils le feront paroistre dans peu de temps, apres que toutes les guerres, qu'ils veulent faire, seront terminées, c'est à dire, que nous recognoissons la science d'un admirable operateur, apres que l'Estat sera tout relaxé & rompu: qu'on fera l'essay d'un excellent baume, apres qu'on nous aura tous blessez à mort; & on nous donnera vn bon remede, lors qu'on nous aura tous empoisonnez; ou plustost que ce grand restaurateur & sauueur descendu du Ciel (ainsi baptisé par le Sr de Guiron) nous resuscitera tous, apres qu'il nous aura tue par peste, par guerre, & par faim; & qu'il créera vn beau monde nouveau, lors qu'il aura fait de l'ancien vn chaos de confusion. Il recherche, dit-il, tous les moyens pour soulager la Fran-

ce. Il achemine ce bon deſſein en mettant toute ſorte de mauuais eſprits , en queſte de partis nouueaux : il fait doubler & tripler les droits de voſtre grand ſeau, qui eſt la ſacrée marque de voſtre Juſtice, & de voſtre parole Royale : il reduit le huiſtième du vin au quatrième : il preſente trente Edicts à la fois à trois Cours ſouueraines : il crée des millions d'Officiers, qui ſont autant de ſanguës : il diuertir & pille les deniers du Taillon : il retient les monſtres des gens de guerre , pour les faire nourrir & payer par les payſans , qui n'ont pas le moyen d'auoir vn morceau de pain pour eux-mêmes, & empruntent à cent pour cent des uſuriers.

SIRE, nous ne doutons pas, que voſtre bonté & pieté n'euffent vne grande compaſſion de tant de pauvres Chreſtiens & François , que Dieu a rangez ſous voſtre auctorité ; & qui ſont les images de ſa raiſon, comme vous eſtes celuy de ſa puiffance ; mais leur miſere vous eſt cachée. On ne vous dit pas , & vous ne ſçauriez voir le grand nombre de ceux qui s'en vont peupler les pays eſtrangers , & faire des ſoldats à vos ennemis : combien la famine, fille de la guerre, & mere de la peſte, vous en a rauï ; & quelle deſolation ces trois fleaux ont apporté dans quelques Prouinces. Celles-là & toutes les autres n'eſperent qu'en voſtre bonté ; prient Dieu tous les iours, & le ſont prier par les ames innocentes pour voſtre proſperité & ſanté : elles demandent à ſa ſainte Prouidence qu'elle vous donne vn conſeil compoſé de gens de bien , qui ſecondent vos intentions pour leur ſoulagement , & pour l'appuy

de voſtre dignité Royale ; qui conſiſte, comme dit Salomon, *en la multitude du peuple.*

SIRE, il eſt aiſé de iuger, que ce grand bien n'arriuera iamais que par quelque changement ; duquel tous les diſcours de ceux qui ont l'honneur de vous approcher, & les eſcrits publics veulent detourner V. M. comme d'une choſe qui apporteroit quelque prejudice à voſtre reputation, & ruineroit vos affaires. Cela ſeroit vray, ſi les hommes eſtoient tels qu'ils ſe deſcriuent eux-mêmes ; & ſi leurs actions cognûes par beaucoup de milliers de perſonnes n'eſtoient plus puiffantes pour vous faire condamner les coupables, que les belles paroles des parties, ou les groſſieres de trois ou quatre flatteurs, pour les faire abſoudre. SIRE, il eſt vray, que ſi c'eſt vn teſmoignage de legere-té, ou de colere, de chaſſer vn ſerviteur fidele ; c'eſt vne marque de bon iugement, & action de Juſtice, d'en chaſtier vn meſchant. Mais celui qui eſt accuſé, eſt vn autre Cardinal Ximenes : il eſt vray en ſon orgueil, & en ſon luxe ; comme il eſt vn Cardinal d'Amboiſe en ſon ambition d'eſtre Pape, vn Cardinal d'Yorck ou Cleſel en ſon ingratitude, & vn Cardinal d'Hongrie en ſes fourberies, qui broüillèrent toute la Chreſtienté, & contraignerent vn bon Empereur de ſ'en de-faire par vne voye extraordinaire. Voſtre Miniſtre a tous les vices de ceux-là, & n'a pas vne de leurs vertus. On nous loue ſes conſeils, qui ont eſté ſi perilleux, qu'encore qu'il y en aye qui ont reuſſi, ils ſeroient tous blaſmez par le Senat de Sparte, ou de Rome ; dans lequel on ne conſideroit iamais les choſes par l'euenement, mais par la prudence qui les auoit propoſées, & con-

duites. Qui doute, que la temerité n'aye prouoqué les Anglois, lors qu'il failloit reduire à la raiſon les Rochellois? & que la vangeance particulière n'aye tres-mal à propos irrité Monsieur de Sauoye, lors qu'il eſtoit neceſſaire de ſecourir le Montferrat? Ces deſſeins ont eu vne aſſez bonne iſſuë, parce que la generoſité des executions a mis à couuert l'imprudence des reſolutions; & que l'aſſiſtance de Dieu, qui aime V. M. & a toujours eſgard à la ſincerité de vos intentions, a fait reuſſir toutes choſes à voſtre auantage: mais cela n'a pas eſté ſans vne grande perte de braues hommes, que les ennemis & les maladies ont tué, ny ſans vne deſpenſe extraordinaire qui a fort incommodé voſtre peuple. Il reſte peut-eſtre quelque ſuite, qui nous pourroit faire voir, ſi Dieu n'y met la main, que V. M. a eſté mal ſerui. *SIR*, c'eſt vn mal-heur qui accompagne ordinairement tous les bons maîtres, d'auoir des mauuais ſeruiteurs; les deſians, & les ſeueres, les tiennent plus en crainte, qui leur fait peſer plus exactement ce qu'ils conſeillent, & craindre ce qu'ils font. Ceux qui rencontrent vne grande douceur & liberalité, abuſent bien ſouuent des graces & bien-faits qu'ils reçoient de ces belles vertus; & ils ſe perſuadent, que les auantages qu'elles leur donnent, viennent de leur merite, & de leurs ſeruices. Ainſi peu à peu la fortune ſe rend insolente: eſtant aueugle de ſa nature, & yure par accident, elle oublie d'où elle vient, & ne voit pas où elle va; elle frappe aſſi-toſt ſur l'ami, que ſur l'ennemi; & deſtruit plus ordinairement le bien, que le mal. En fin elle ſe precipite elle meſme dans quelque abîſme de mal-heur; où la

Iustice de Dieu la fait perir, & cognoistre non seulement meschante & furieuse, mais encore forte & ridicule.

SIRE, voyla au vray l'estat où se trouue cette prodigieuse faueur, que le vulgaire estime, que les sages mesprisent, que les Grands redoutent; qui s'est faite sentir à toutes les conditions de vostre Royaume, & qui a esté au plus haut point de sa violence, lors qu'elle a attaqué la Royne vostre Mere. On l'a veüe se herisser contre sa Maistresse, cracher contre le Soleil qui l'a engendrée, & renuerfer l'appuy qui l'auoit soustenuë. Elle a violé le respect qui est deu à la Naissance, qualité, & vertu de la Royne vostre Espouse; elle a bouleuersé toute sa Maison: elle a poursuiui à picques baissées Monsieur vostre Frere vnique: a entrepris de faire passer en vne procession les escussions d'un petit Gentilhomme, deuant ceux des legitimes Enfans de France: elle nous a voulu enseigner, que si nous auions creu qu'ils succedoit par ordre à la Couronne sans sauter sur la teste de personne, qu'à l'aduenir vn Prince pourroit estre Roy apres auoir esté inferieur à celuy, auquel il commanderoit. Quels desordres sont cecy? Il ne reste rien plus à cette fortune insolente & entreprenante, qu'à se mettre à vostre costé, & apres à vous laisser derriere. Arrestez-la, GRAND ROY, faites-luy cognoistre, que vous la pouuez defaire aussi facilement comme vous l'avez faite: si la Puissance l'a esleuëe, que la Iustice l'abate: vous la deuez à vous-mesme; & apres Vous, à la Royne vostre Mere, qui est vostre premiere Subjete; & comme telle, vous la demande, non comme Mere. La querelle de cet-

te qualité, eſt la voſtre ; puis qu'elle vous a fait homme, & Roy ; que ſes ſoins aſſeurent voſtre vie, & ſa vertu voſtre Couronne. Les meſchans la veulent eſbranler par des artifices ſecrets, & que nous n'oſerions publier. Ils attaquent auſſi voſtre perſonne, non ſeulement en meſnageant mal voſtre ſanté, & rempliſſant voſtre eſprit de mille apprehenſions ; mais encore ils vous veulent priuer, ſ'ils peuuent, de la benediſtion de la longue vie, & de la ſecondité du mariage, qui ſont les deux graces que Dieu enuoye aux enfans qui conſolent leurs Meres. La ſaincte Eſcriture aſſeure, que *celuy qui chaſſe ſa Alere, eſt infame & mal heureux*. Nous ne doutons pas, que le reſpect ne ſoit tout entier dans voſtre ame ; mais vous eſtes obligé de donner l'exemple public à tous vos ſujets. Vous en eſtes tres-humblement ſupplié par tous les Peres & Meres qui ſont la meilleure partie de voſtre Royaume ; & par toutes les Vefues, qui vous demandent, pour leur conſolation, celle de la Vefue du Grand HENRY voſtre Pere : elle ſ'en va mourante, lors que ſa ſolitude luy donne loifir de conſiderer & bien examiner toutes les circonſtances du ſujet de ſa douleur. Son amour, & les cognoiſſances qu'elle a de l'eſprit de ceux qui ont preuenu le voſtre, la font trembler à tout moment, lors qu'elle voit mille dangers qui enuironnent voſtre perſonne, & qui menacent voſtre Eſtat. Vous ne trouuerez pas auſſi mauuais, que le cœur qui vous a donné la vie, & qui a ces mouuemens pour vous, aye quelque ſentiment pour Monsieur voſtre Frere. Vous trouuerez toujours plus de ſeureté en la vigilance

d'une bonne Mere, en l'affection d'un bon Frere, & en vostre Sang, qui n'est point alteré par le vice, que vous ne scauriez faire dans l'ame corrompue d'un seruiteur, qui ne vous aime que pour son profit.

SIRE, vous pouuez facilement remettre toutes choses en leur ordre naturel, & les tirer de l'estat de violence, sans en faire à vostre Ministre. Il est vray, que les offenzés ne la demandent pas: mais si vous voulez auoir plus d'esgard à la condition des personnes qu'à leurs fautes, ils vous supplient tres-humblement, de faire reparer, par les voyes les plus douces que vous pourrez trouuer, la bresche qui a esté faite à vostre reputation, les ruines de vos affaires, les injures que les vostres & les Grands de vostre Royaume ont receu; & de donner pour l'aduenir vn si bon ordre, que les maux publics & particuliers, que nous auons decouuert, ne viennent iamais plus des sources qui les ont produits. Dieu vous commande ces deux choses: & quels déguisemens que les flatteurs y puissent apporter, vous ne pouuez conseruer la grace, auoir la tranquillité de vostre esprit, faire Iustice à vostre peuple, le descharger, luy donner la paix, estre arbitre de la Chrestienté, ny meriter le titre de Iuste que cela ne soit fait. Pour en venir à bout, il ne faut qu'escouter la nature, l'inclination que vous auez au bien, & vostre prudence: ne prenez point d'autre conseil; vous n'en auez iamais eu de plus mauuais, que lors que vous en auez trop pris d'autrui. On fait tous les iours des assemblées de cinq & de six heures, dans lesquelles la tromperie, qui est vne grande discoureuse,

coureuſe, ſurprend la verité, qui n'a pas beaucoup de paroles : le feu Roy la trouuoit chez ſoy, comme vous ferez dans vous-mêmes, & dans vn ou deux tours de gallerie avec vn ou deux hommes ſages & vertueux. La France, voſtre Cour, la ville de Paris, ne ſont pas tellement deſpourueües, que vous n'en rencontriez de plus capables, & de plus gens de bien, que ne ſont ceux qui veulent perſuader qu'ils ſont les Hercules, & les Atlas, qui ſeuls peuuent ſouſtenir le Ciel de voſtre Eſtat. La Prouidence de Dieu l'auroit bien abandonné, s'il n'y auoit qu'un homme qui le peult conſeruer ; & l'honneur qui vous eſt deu vous ſeroit rui, s'il y auoit vne autre perſonne que la voſtre qui nous fuſt neceſſaire. Auſſi ce mauuais eſcriuain du Coup d'Eſtat nous aſſeure, qu'il vaudroit mieux auoir perdu deux villes que ce grand Conſeiller : c'eſt trop peu, ſi la France ne ſubſiſte que par luy, & n'a point de gloire que celle qu'il luy a acquis, comme il veut faire croire. Mais nous dirons au contraire, qu'il vaudroit mieux qu'un ennemi euſt enuahé deux de vos Provinces, que de garder plus long-temps celui qui les ruine toutes. Il commence des guerres dans les Eſtats des Princes voiſins ; & au deſpens de la France, il vange ſes quereles, & contente ſes vanitez. Il ne hazarde ny ſa perſonne, ny ſes biens, ny ſes ſujets ; mais il abuſe de voſtre Nobleſſe, de vos ſoldats, & de vos Finances. GRAND ROY, qui voulez porter le titre de IVSTE ; & qui pour le conſeruer auez fait des Edicts ſi rigoureux contre ceux qui ſe batent en duel ; vous auez chaſtié avec raiſon quelques Seigneurs qui ne

ſçauoient pas eſtimer le ſang de vos Gentilshommes, ny meſnager le leur. V. M. punit avec iuſtice en vn particulier le meurtre d'un homme; & voſtre Miniſtre vous veut perſuader, que c'eſt vne gloire d'exterminer les nations entieres, & de faire mourir les peuples à millions. Vn laquay ſera pendu pour auoir aſſaſſiné ſon compagnon: & vn Preſtre voudra eſtre loué apres qu'il aura fait mourir par la guerre, peſte & famine, vne infinité d'hommes, de femmes & de petits enfans, dans voſtre Royaume, & dans toute l'Europe. Nous ſçauons qu'il veut viure, ou perir dans les confuſions; & en laiſſer, s'il peut, des plus grandes apres luy. Rien ne le trouble tant que l'apprehenſion de la paix, parce qu'un eſprit agité craint dauantage le repos, que le tumulte. Arreſtez ſon ambition, ſon auarice, & ſa violence, GRAND ROY: appelez aupres de vous ceux qui par le droit de la nature y doiuent eſtre, & le meritent par leur vertu: ne receuez perſonne dans voſtre Conſeil eſtroit par l'importunité de ceux qui ont l'honneur d'y eſtre: ayez deſiance de ceux qui ſe preſentent, & ſe font de feſte: reculez ceux qui s'approchent, & approchez ceux qui reculent: ceux-là ſont les ambitieux, auaricieux, & imprudens, ceux-cy ſont les modeſtes, les deſintereſſiez, & les ſages. Voyez où ſont vos Finances, où ſont vos canons, vos munitions: ſoulagez voſtre pauvre peuple: & Dieu vous donnera vne parfaite ſanté, le repos de l'eſprit, la paix au dedans & au dehors, vn meilleur conſeil que celuy que vous auez des Officiers fideles, vn Royaume obeiſſant, & vous comblera de toute ſorte de benediſtions. Ainſi ſoit-il.



VRAIS ET BONS ADVIS

D E

FRANCOIS F I D E L E,

Sur les calomnies & blasphemes du
S^r des Montagnes, ou Examen du
Libelle intitulé, *Defense du Roy &
de ses Ministres.*

A V R O Y.



I R E,

Si la porte de la Iustice eust esté ou-
uerte à la Royne vostre Mere, ceux qui
la calomnient ne prendroient pas le che-
min de l'insolence, apres avoir suivi ins-
ques au bout celuy de la violence : ils n'adjousteroyent
point aux plus cruelles actions qu'on aye iamais veu, les
plus horribles blasphemes qu'on aye iamais leu : Mr le
Cardinal ne ietteroit point dans la source de vostre vie,
& dans celle de son bien, la bouë de laquelle il a esté tiré,
& se contenteroit de l'auoir remplie d'amertume.

H ij

Nous supplions tres humblement V. M. si les plaintes & les larmes de la Vefue injustement affligée, qui montent iufques au thrône de Dieu, ne peuvent arriuer iufques au vostre, pour vous demander iustice pour vous-mesmes, de permettre à vos fideles seruiteurs d'entreprendre vostre defense, avec celle de la Royne vostre Mere. Personne ne peut trouuer mauuais, que la recognoissance & la verité employent avec modestie les armes, desquelles l'ingratitude & le mensonge se sont seruies avec effronterie.

Nous garderons le respect, qui est deu à vn Grand Roy, & nous souuiendrons du bon aduis que donnoit Parysatis mere d'Artaxerxes à ceux qui vouloient faire des remonstrances à son fils, d'vser de paroles de fin lin. C'est l'intention de la Royne vostre Mere, qu'en defendant son honneur, qui est le vostre, on ne blesse pas le vostre, qui est le sien; & qu'on ne tombe point dans le crime, qui a esté commis par ceux que nous accusons. S'ils ont esté si lasches de se mocquer des innocens, qu'ils ont rendus miserables; nous ne serons pas si foibles de repartir avec l'aigreur, qui pourroit estre excusée par la force de nostre douleur.

SIRE, nous auons bien creu, que la France ayant produit vn Achitophel, qui poursuiuoit sa Maistresse & Bienfaitrice, pleurante, & despoüillée de ses biens, elle rencontreroit dans son chemin quelque Semei, qui luy ietteroit des pierres, & la maudiroit. Nous vismes aussi tost apres sa detention l'Entretien des champs Elisées, & le Coup d'Estat. Ces libelles, ausquels on n'a rien reparti, ont donné la hardiesse à des Escrinains beaucoup plus impudens de faire distribuer dans la ville de Paris, de semer par toute la France, & enuoyer aux pays estranges, des liures tres-infames. L'Enfer en a horreur, encore qu'il aye recognu son stile, & son encre, & que les

plus malins de ses esprits les ont dicté aux plus meschans de la terre.

Celuy qui les a tous surpassez, est vn homme qui s'est persuadé qu'il deuoit appuyer par ses escrits l'aduis qu'il auoit donné en Theologien, ou plustost en faux Prophete, pour la detention de la Royne vostre Mere. Ce liuret execrable a esté suiui d'une grande quantité d'autres : ils ont rempli de scandale toute la Chrestienté, & ont fait tant de bruit dans Paris, que les pauvres malades ont esté sur le point de faire presenter requeste au Lieutenant civil, pour faire taire mille faineans, payez pour les crier par toutes les rues & carrefours.

Si tous les peres & meres de vostre Royaume se pouuoient assembler, ils feroient sans doute vne deputation solennelle pour se plaindre des pernicieuses instructions, qu'on donne à leurs enfans, & de ce que les Predicateurs n'osent plus prescher le commandement de Dieu; qui est le seul qui porte promesse d'une longue vie en ce monde, & de l'eternelle en l'autre. 1. Tim. 4.

C'est pour cette raison que Philon le Iuif appelle la pieté enuers les peres & meres, l'arbre de vie planté dans tout le monde; parce qu'elle conserue & restablit l'huile de la lampe du cœur, lors qu'il aime & honore ceux desquels il l'a tiré. Platon dit, que nous deuons garder aupres de nous ceux qui nous ont donné la vie, comme images viuantes & domestiques de la Diuinité, qui nous apportent plus de bon-heur que toutes les statües des Dieux.

Si tous les enfans ont cet interest commun, il faut aduoüer, que celuy des Roys est tres-particulier; lors que la naissance leur donne la Couronne: elle est tousiours assaillie, bien souuent esbranlée, & quelquefois abatüe par les defauts qu'on remarque dans leurs meres, & qui leurs

sont imposez malicieusement par ceux qui regardent la succession de leurs enfans.

Pag 29
91. 94.
95. 96. SIRE, V. M. n'est pas seulement offensée par cet attentat, mais elle pourra remarquer dans cet imprimé qui porte le nom de vostre Defense, que celuy qui est ingrat enuers sa Bien-faëtrice, iusques à conuertir ses bien-faits en injures, a desja par la mesme ingratitude conuertti les vostres en reproches, & les a reduits à rien. Il se plaint fort au long, & par plusieurs exemples, que M. V. n'a point fait pour luy ce que les Roys vos predecesseurs, & les Princes qui regnent à present dans les autres parties de l'Europe, ont fait pour ceux, qui ont esté honorez de leurs bonnes graces. Il dit qu'ils n'ont pas rendu la centiesme partie des seruices que V. M. a receu de Mr le Cardinal, & qu'elle ne scauroit recompenser non seulement en luy prestant sans caution vostre Royaume (comme il publie que V. M. veut faire) mais en le luy donnant tout entier, & ne se reseruant que Versailles.

GRAND ROY, c'est ainsi que l'ambition, l'auarice, & les prodigieuses fortunes sont tousiours ingrates; elles sont comme la pierre Siphnie, qui s'endurcit estant arrousee d'huile. Celuy qui croit auoir meritè le tout, n'estime iamais vne partie; & s'il veut auoir le reste, non seulement il mesprise ce qu'il possede, mais il tient pour injuste celuy qui se reserue quelque chose, & il deuient son ennemi. Il ne faut pas trouuer estrange s'il l'est de ceux qui entreprennent de le faire cognoistre meschant, puis qu'il l'est de celuy qui le fait paroistre grand; ny s'il veut perdre ceux qui le blasment pour les biens qu'il a extorquez, puis qu'il voudroit ruiner celuy qui ne les a pas tous abandonnez.

Sa puissance qui est conduite par la malice, & sa finesse qui est accompagnée de violence, ont commis, & ont

voulu déguiser les maux que la Royne vostre Mere a soufferts : mais elles ne scauroient courir les diffamations scandaleuses publiées avec priuilege, & noms des Imprimeurs. Cette entreprise a fait trembler les sages, pleurer les gens de bien : elle nous a forcé de prendre la plume, pour aduertir V. M. du danger, auquel sa personne, sa reputation & sa Couronne sont exposées.

Si en témoignant nos bonnes intentions, & saintes affections, nous sommes traités avec toute sorte de rigueur; nous chercherons la consolation dans nos consciences, & dans le Ciel. Nous nous souuiendrons, que l'Empereur Basile, surnommé le Macedonien, estant emporté par vn grand cerf, vn bon & adroit seruiteur coupa la ceinture de son Maistre, par laquelle il estoit acroché à vn andouiller : ce braue homme qui auoit sauué la vie à ce Prince, fut tué par vn flatteur, qui dist qu'il auoit tiré l'espée contre l'Empereur.

S I R E, si nous sommes si mal-heureux, que nos ennemis, qui ont l'auantage d'estre attachez à vos oreilles, persuadent à V. M. que nous l'attaquons, nous dirons pour nostre defense, que nous voulons couper les liens, par lesquels nostre Roy est attaché à vne beste farouche qui l'emporte. Nous croirions estre Martyrs en mourant apres auoir conserué vostre vie, & defendu l'honneur de la Royne vostre Mere, sur tout la part que V. M. y doit prendre.

Nous la soustiendrons sans apprehension des violences secretes & publiques de Mr le Cardinal; nous sommes assurez, que nos plumes estant celles de la verité, qui est vne aigle genereuse & clair-voyante, deuoreront celles des oyseaux de nuit, qui sont les imposteurs & flatteurs que Mr le Cardinal employe & entretient à vos despens.

Il trouuera plus de repos dans le silence que dans le bruit : son train & ses actions en font assez, sans y ad-

jouster celuy des Colporteurs. Ils crieront vn iour avec liberté les veritez, qu'on n'ose voir qu'en cachettes, cependant que le mensonge publie hautement les triumphes de l'injustice.

V. M. recognoistra en nous plus de sincerité, plus de courage, & peut-estre, plus de capacité pour son service, qu'on n'en peut trouuer parmi les valets des faueurs : ils employent toute sorte d'estayes tirées du desbris de vostre auctorité, des ruines de vostre Estat, des eselats de vostre gloire, & adjoustent les festus de leurs foibles plumes pour appuyer la grandeur de Mr le Cardinal.

Dieu qui aime vostre personne, & vostre Royaume, qui protege les innocens, & qui a pitié des opprimés, qui resiste aux ambitieux, & qui deteste les violens, fera cognoistre en son temps toutes ces veritez à V. M. & nous le prierons sans cesse pour vostre prosperité & santé.

S I R E,

De VOSTRE MAIESTÉ

Tres-humble, tres-obeissant, & tres-fidèle
seruiteur, & subyet

FRANÇOIS FIDÈLE.



VRAIS ET BONS ADVIS

D E

FRANÇOIS FIDÈLE.



SERONS-nous pauvres habitans de la vallée de larmes, ie ne dis pas attaquer, mais regarder le seigneur des Montagnes, qui soustiennent le Ciel ? Elles iettent des feux & des flammes, comme celles de Sicile ; ou plustost comme Sina, sur laquelle on nous veut faire voir le Exod. 32. grand Dieu, tonnant, ardent, consumant, & vn Moyse, qui descend avec les tables de la Loy. Il employe l'Escripture sainte pour nous reprendre, & menacer : il entre en vne telle colere, que si nous luy repliquons la moindre parole, il cassera sur nostre teste les deux pierres, sur lesquelles il dit que Dieu a gravé ses commandemens. Iettons nous à genoüils deuant luy, prions-le d'estre pour nous, & luy tesmoignons que nous desirons de nous convertir. Mais i'ay peur que cet homme à reuelations, qui se dit le seigneur des Montagnes, ne soit point le bon Moyse ; mais cet imposteur de Candie, qui fit precipiter, noyer, & mourir

dans les deserts tant de pauvres Iuifs, qui alloient avec luy au rencontre du Messie. Ce qui m'en fait desier, est qu'il s'appelle Seigneur (ce que le vray Moysc ne fit iamais) qu'il confesse qu'il est transporté de furie comme Balac ennemy iuré des Israelites ; qu'il abuse de l'Escripture sainte , appliquant aux Lons Catholiques les descriptions que l'Apostre S. Iude a fait des heretiques, desquels il est solliciteur general. Il ne faut point faire de difficulté de l'aborder , ny craindre de toucher cette montagne , encore qu'il semble qu'elle soit toute en feu. *Je sçay bien qu'elle fumera si on la frappe. Qui en doute ? puis qu'elle a vommy tant de flammes, de charbons & de cendres, pour brusler, noircir, & accabler des innocens qui estoient esloignez par respect & par crainte.*

Il estoit question de refuter les faits contenus dans vne lettre de Monsieur Frere vnique du Roy. S. M. auoit respondu en termes generaux, sans vouloir, pour quelques considerations, examiner tous les articles & chefs des accusations contre son principal Ministre. On demandoit Iustice à celuy, qui la peut, & doit faire aux plus foibles de son Royaume contre les plus puissans, & qui permet par les loix de son Estat, que ses Parlemens la rendent en choses ciuiles contre luy-mesme. Ce grand & bon Prince porte le nom de Iuste, & le sera tousiours, encore que les effets de sa iustice soient (en ce qui nous regarde) arrestez pour quelque temps. C'est par la malice de ceux, qui luy voudroient oster la plus belle vertu de son ame, & rompre le plus riche fleuron de sa Couronne; parce qu'ils ont sujet de craindre celle qui

Nu. 23.

Ps. 143.

a la puissance , & qui aura bien-toft la volonté de les chaïtier. Nous l'esperons ainſi , quels artifices qu'on puiſſe apporter pour deſtourner le cours de la Prouidence diuine , pour couvrir les crimes qui meritent punition , & pour fermer la bouche aux accuſateurs. Le ſecret iugement de Dieu veut, que la flèche qui partira de ſon arc frappe d'autant plus rudement, que la corde ſera plus tendue, que les pechez des coupables ſ'augmenterõt, que la patience des innocens leur aura acquis plus de merite : ſur tout, lors que l'oppreſſion de la Veſue ſe rendant plus violente aura fortifié la voix , qui demande à Dieu la vangeance : le cœur de l'affligée ne la deſire pas , mais qu'il plaiſe au Roy de faire reparer l'injure qui eſt faite à ſa Naïſſance, & les ruines de ſon Eſtat , par les voyes que ſon bon naturel & ſa prudence luy ſuggereront.

Cette grande Princeſſe ne demande autre choſe ny au Ciel , ny en la terre : elle ſe ſouſmet à la volonté de Dieu , & à la Juſtice du premier Parlement de France , dans lequel elle a eſté declarée Regente, deſchargée de ſon gouuernement, remerciée & loüée par la bouche du Roy , de l'affection, de la fidelité, & du courage qu'elle auoit teſmoigné en la conſeruation de ſa perſonne ſacrée , & de ſon Eſtat.

Failloit-il ſur le ſujet d'vne lettre eſcrite par Monsieur, qui ne contient que des faits qui le touchent, & ne parle au Roy qu'en paſſant du mauvais traitement qui eſt fait à leur bonne Mere , prendre occaſion de faire vn libelle diffamatoire, impie , execrable, & digne d'eſtre brûlé avec ſon

aucteur ? Failloit-il deschirer les entrailles qui ont porté le Roy , & interesser non seulement S. M. mais tous les Princes & Princesses de la Chrestienté à la defense de la reputation de leur Mere, de leur parente, & de leur alliée ?

C'est à ce coup que vostre dessein a esclaté, que vostre fiel s'est creué, que vostre poison s'est respandu, que la colere a surmonté vostre dissimulation, & que vous avez mis au iour les secrets, que vous auiez caché dans les tenebres d'une profonde hypocrisie. Nous ne parlerons plus d'artifices que d'un seul, pour lequel tous les autres ont esté inuentez, & pratiquez. Vous sçavez l'exacte recherche que vous avez fait l'hyuer passé de quelques papiers, que vous iugiez pouuoir seruir contre le Roy, au cas qu'il voulust employer sa Iustice, & sa Puissance, pour chastier celuy qui a trop abusé de sa bonté : vous prepariez desia des pieces, pour mettre toutes choses en confusion. Je n'en diray pas dauantage ; parce que la main me tremble, mes yeux s'ébloüissent, & mon cœur pantelle, lors que ie pense au chemin que la furie de l'ambition veut prendre, quand elle se verra pressée de rendre compte de ses actions. Il suffit de dire, qu'elle veut estre ingrate iusques au dernier poinct, & faire dire, que ce n'est pas sans raison, que saint Paul dans les marques des derniers temps a joint *les ingrats* avec *les scelerats*. Si l'ingratitude s'augmente avec les bien-faits, il ne faut pas douter qu'ayant paru tres-grande apres les tres-grands de la Roynne Mere, elle ne soit extreme dans les extremes que Mr le Cardinal a receu du Roy, & qu'elle ne se

3. Ti. 3.
Ingrati,
scelerati.

porte à la ruine de l'Estat, & de la personne de son Maistre, & principal Bien-facteur.

Si Dieu, les Saints, & la raison ne defendoient de redire les blasphemes qui ne doiuent estre ny supportez, ny repetez; si nous n'auions plus de honte que vous d'effronterie, & si nous n'estions meilleurs Chrestiens que vous n'estes Religieux; le public liroit des accusations, & des preuues qui les souleueroient contre vous, & feroient des-pauer les ruës pour vous assommer: mais Dieu se reserue la gloire, & au Roy l'honneur, de vous auoir chastiez.

Vostre rage deuroit estre assouuie, apres auoir esloigné des conseils du Roy celle qui est naturellement sa premiere Conseillere, si l'infidelité ne l'a priuée de ses droicts, non le manquement d'affection enuers vn seruiteur infidele. Vous ne vous estes pas contentez d'oïster à la Royne Mere de S. M. la cognoissance des affaires; mais vous avez enfermé les yeux, qui veilloient pour la conseruation de la personne & santé du Roy: ils esclairoient de trop près vos actions, & s'offensoient du bon marché que vous avez fait de sa vie; de laquelle celle de la Mere despend aussi veritablement, comme il est asséuré que le Fils en a tiré la sienne. N'estiez-vous pas contens dans cette detention déguisée au Roy, qui n'a iamais sçeu la moindre circonstance de ce scandale, d'auoir donné tous les iours mille sujets d'affliction à celle qui seroit morte de douleur, si la consolation de Dieu, son courage, & le desir qu'elle a de se conseruer pour le Roy, n'eussét fortifié son cœur? Ne vous arrestez-vous pas, apres auoir eu la satis-

*Voyez
la pre-
miere
declara-
tion du
23. Fev.
1631.*

faction d'auoir contrainct de sortir hors de France celle qui luy a donné vn bon Roy : elle n'y a peu estre plus long temps sans mourir, ou sans vous rendre criminels d'une violence, qui eust esté plus estrange, que celles que vous auez fait ; encore que nous auons sujet de croire, que vostre double artifice a donné iour à cette liberté, pour tirer du mal de ce bien : mais la Prouidence de Dieu vous confondra, & fera naistre le bien de ce mal.

Vous Sr des Montagnes, qui auez esté vn des principaux conseillers de ces scandales, vous auez contrefait le Theologien, pour persuader au Roy (qui a la conscience tres-bonne, & qui resistoit au dessein de Mr le Cardinal) que S. M. estoit obligée d'elloigner, d'emprisonner, & de faire enleuer par force la meilleure Mere, & la plus grande Princeesse du monde, & de chasser son Frere vnique. Vous qui faites mettre tant de personnes en pension à la Bastille, pour enrichir vostre frere, & qui portez celuy qui vous croit à demander, acheter, & prendre hardiment tous les Gouuernemens des Prouinces & places de France. Vous qui deuez vous arrester dans ces conseils & *ouurages du demon de tenebres*, vous estes seruy de *celuy du midy*, pour mettre au iour l'escrit abominable & furieux, que vous auez fagotté avec precipitation & colere. Laisant à part quelques passages de l'Escriture sainte, de laquelle vous abusez : nous pouons dire avec verité, sans zele & sans passion, qu'en voulant plaider contre la nature, vous l'avez perduë, que d'homme estes changé en beste farouche, ou plustost du plus ma-

lin esprit de ce monde, vous estes deuenu le plus malin esprit de l'Enfer.

Vous dites, *que vous estes le fils de Cresis*; nous Pag. 3.
sçauions bien que vous estiez son principal Ministre, comme il est celuy du Roy: nous auons veu à Lyon vn train, qui approchoit de celuy d'un Prince, & vne liurée de gris & de iaune, qui a fait cognoistre que vous auiez quitté votre façon de viure, & vouliez abandonner vostre cloistre: mais nous ne croirons iamais, que vous puissiez estre comparé à vn muet, fils de Roy: il y a long temps que vous ne parlez que trop, & ne dites rien de bon; quand vostre langue auroit esté liée iusques à present, l'occasion que vous dites qui se presente de defendre le Roy, qu'on veut attaquer en sa personne, ne doit pas faire vn grand effort sur les organes de vostre voix: mais ie croy que vous prenez pour le Roy celuy qui le voudroit bien estre, qui prend toutes les marques de la Royauté, & les chemins pour y paruenir; & qui promet, s'il y peut arriuer, que vous serez son Cardinal, & son grand Aumosnier. Si vous lisez sans passion ce que nous auons escript, vous ne trouuerez pas que nous ayons iamais dit, qu'il faille attenter sur sa vie, & que nous l'ayons demandée, ny au Roy, ny à son Parlement. Nous desirons la fin & le remede des maux, non le sang & la mort des personnes. Nous croyons, que c'est vn sacrilege d'assassiner les Prelats sacrez; mais nous n'osons rien dire des tyrans vsurpateurs: c'est vne grande preuue, que nous ne les voulons pas massacrer, de ne l'auoir pas fait, & d'auoir retenu les mains de ceux qui ont le zeile d'Abisay. Nous

ne demanderons pas avec le Roy, qui estoit selon le cœur de Dieu : *Seigneur injatuez le conseil d'Achitophel.* Au contraire nous supplions sa diuine bonté, que ses conseils soient salutaires au Roy : nous sommes asseurez, que s'ils le pouuoient estre les innocens y trouueroient leur salut, les affligez leur consolation, le peuple le soulagement, & le Roy sa gloire ; que nous desirons avec plus de verité, & de passion, que vous ne faites avec flatterie & dissimulation.

Vous estes donc bien esloigné, Mr des Montagnes, d'estre en ce rencontre semblable au fils de Cresus : il n'y a pas vn de nous qui ne voulust exposer mille vies pour celle de son Roy ; & qui n'aimast mieux auoir receu vn coup de poignard dans le sein, que si nostre Prince auoit vne esgratignure sur la main. Oseriez-vous bien douter des veritables & sinceres affections de la Royne Mere de S. M. & de Monsieur son Frere, & preferer à ce bon Sang les feintes protestations, & larmes hypocrites d'un seruiteur flatteur ? Faites cognoistre le vice, qui a estouffé la nature ; & le monstre de peché, qui a arraché les cœurs. Montrez-nous que la perte du iugement aye suiuy celle de la conscience, qu'une mere soit deuenue non seulement meschante, pour desirer la ruine de son enfant, mais fole, pour se reduire à l'vnité, en laquelle il y a fort peu de seureté, & qui l'approche du danger de tomber entre les mains de ses ennemis. Nous auons bien sceu, que des valets, des tireurs de laine, & des filous auoient esté semez dans les cabarets suiuan la Cour, & dans ceux de Paris, pour vomir des blasphemés semblables à ceux

à ceux que vous escriuiez : mais nous n'eussions
 jamais creu , qu'on les eust imprimez dans la ca-
 pitale du Royaume avec priuilege , & le nom au
 Libraire ; qu'on les eust vendus au Palais , & sur le
 Pont neuf , qu'un Religieux les eust composez , &
 qu'un Cardinal les eust fait distribuer.

La consolation des affligez est , qu'ils voyent
 l'abomination montée dans cet escrit detestable
 au sommet de son precipice , & qu'elle n'a rien
 qu'à faire le saut dans l'enfer. Vous entrepre-
 nez , pour tascher de ruiner nostre innocence , ce
 que la malice (si nous en auions) desireroit qu'on
 fist , pour nous vanger de vos injures. Vous fai-
 tes paroistre , que la fin de vostre tragedie s'ap-
 proche ; lors que pour faire rire les fols , & pleu-
 rer les sages , deuant que de renvoyer la compa-
 gnie , vous presentez sur le theatre , que vous
 auez ensanglanté , ceux qui estoient appelez par
 les Romains , les Andabates : ils auoient les yeux
 bandez , & vne massüë en main , avec laquelle au
 lieu de frapper sur leurs ennemis , ils eussent des-
 chargé des grands coups sur les Senateurs & vier-
 ges Vestales , qui estoient aux plus bas sieges , si
 les barreaux ne les eussent defendus. Ne voyez-
 vous pas , que vous escriuez dans vn Royaume , où
 la naissance fait & assure les Roys ? ne reconnois-
 sez-vous pas , que dans l'opinion de toute la ter-
 re , la vertu de la mere fait honneur aux enfans ?
 GRAND ROY , souffrirez-vous long temps cet-
 te injure , & laisserez-vous impuny ce crime de
 leze-Majesté au premier chef ? Si toutes les iusti-
 ces de vostre Royaume sont non seulement sour-
 des pour le present , mais aueugles pour l'adue-

* Le Li-
 braire
 est Esli-
 ne Ri-
 cher, &
 le pri-
 uile est
 signé par
 son ser-
 ecre-
 taire du
 Roy

nir, & si on leur a lié les sens avec les mains; le Ciel par quelque notable iugement joindra le chastiment du crime commis contre la personne de V. M. qui est attaquée en celle de la Royne sa Mere. Comme nous auons sujet de dire, que vous estes plus offensé qu'elle; nous auons aussi occasion d'apprehender, que l'ingratitude ne soit plus grande contre V. M. nous le iugeons par cette regle, que la mesconnoissance croissant avec les bien-faicts, & la malice avec la puissance, elles produiront des plus estranges effects contre V. M. que n'ont esté tous ceux que nous auons veus contre la Royne vostre Mere. Chacun sçait comme elle a esté traitée par les actions; voicy comme on la deschire par les escrits.

Pag. 4.

Le Sr des Montagnes fait semblant de vouloir répondre à la lettre de Monsieur Frere vnique du Roy, & de la conuaincre de faux en tous ses chefs & articles: les fumées de la colere luy font perdre tout aussi-tost la souuenance de sa proposition: son bel esprit & sa belle memoire ne luy fournissant rien, pour opposer aux veritez de ce qu'il appelle Manifeste. Il fait vne inuectiue d'un homme forcené contre la Royne Mere de S. M. & baissant sa teste pointuë d'un mesme coup, il hurte le ventre qui a porté le Roy, qui reçoit la plainte, & le Prince qui l'a faite. Il croit qu'il sera estimé bien sage apres qu'il aura fait vne prote-

Pag. 5.

station grossiere, *qu'il demeurera dans les termes du respect, qui est deu à la naissance de Monsieur; lors qu'il met en pieces les entrailles qui l'ont porté, & qu'il rend son extraction non seulement vile, mais infame. Il dit, qu'il entreprend la defense du*

Roy ; & luy conduit vn si foible secours , qu'on peut iuger aisément , que c'est vn pauvre Moyne qui l'a dressé. Il dit , que *nous auons escrit avec mespris* ; mais ses paroles sont des blasphemes : & les loiianges qu'il donne à S. M. sont si froides , & si petites , que nous pouuons dire , que c'est vn Ad-uocat preuaricateur ;

Et afin qu'il recognoisse les veritables & bons sentimens que nous auons du Roy ; nous l'honorons de tout nostre cœur , non seulement pour sa dignité Royale , mais pour les admirables qualitez de sa personne : & adjouſtons ce que vous luy ostez , la grandeur & le lustre qu'il tire de la vertu de sa source. Nous sommes François en Flandres , & comme les Perses nous adorons par tout nostre Roy. Nous disons qu'il est trompé par les meschans , comme Salomon l'a esté avec toute sa prudence , & Dauid avec sa grande pieté par Achitophel , qui estoit son premier Conseiller. Tous les bons & sages Empereurs l'ont esté , plustost que les seueres & cruels qu'on a apprehendé , & que les plus simples , qui sont ordinairement desians. Nous publions , que ce n'est pas chose estrange , qu'un Prelat de l'Eglise surprenne vn Roy pieux , qu'un esprit rusé desguise la verité à vne bonne ame : qu'un grand discoureur la face rendre , plustost en la laissant , qu'en la persuadant : qu'un burin d'acier graue sur l'or , que par la force d'une rouë & d'un ciseau bien acéré vn diamant soit taillé : que les rayons du soleil paroissent rouges , s'ils passent au trauers d'un verre qui est de cette couleur ; ny que Phaëton brusle le monde , lors qu'il se mesle de conduire le chariot du soleil.

Nous ſçauons , & declarons à toute la Chreſtienté ; dans laquelle nos eſcrits ſeront mieux receus que les voſtres , & qui ſera plus ſoigneuſe de conſeruer les veritez que les flatteries : Que le Roy eſt bon , & pieux ; encore que les effets de ſa iuſtice , pour ce qui regarde la Roynie ſa Mere , Monſieur ſon Frere , pluſieurs particuliers , & le ſoulagement de ſon peuple , ſoient arretez par la malice & injuſtice de ceux , lesquels peuuent retenir le cours de ces belles eaux , auſſi bien que celui des larmes. Mais nous ſommes aſſeurez , qu'elles ſ'enſient dauantage , & qu'elles rompront & emporteront bien-toſt toutes les digues , noyeront les ouuriers qui les ont inuentées & dreſſées. Le feu de l'amour naturel ne pouuant paroître au dehors , & eſtant enfermé dans vn bon cœur , ſera redoublé par vos froideurs qui l'environnent : vous le rendez ſi fort , qu'il eſchauffera les innocens , & qu'il deſſechera leurs larmes , lors qu'il tirera celles de vos yeux , & vous noircira & brulera comme criminels. En ſin , Mr des Montagnes , noſtre affliction ne pouuant eſtre plus grande , ny la malice de ceux que vous defendez plus inſolente , nous n'auons rien plus à craindre que pour le Roy , & pouuons eſperer quelque ſoulagement de ſa bonté , lors que vous eſtes tourmentez de la continuelle apprehenſion de ſa iuſtice. Nous aimons mieux eſtre dans la patience accompagnée d'eſperance , que dans la violence bourrelée par la crainte. Si nous ſommes tenus pour mal-heureux en ſouffrant le mal , nous nous eſtimons bien-heureux de ne le faire paſs.

Vous faites ſortir de voſtre plume des choſes,

qui n'ont iamais passé par nos pensées ; pour tascher de nous rendre sacrileges , vous estes scandaleux. Les sages doiuent plustost supprimer qu'imprimer les blasphemes de fols. Il n'appartient qu'aux impies d'en inuenter & à forner des monstres , non pour les combattre , mais pour leur faire attaquer l'Oinct de Dieu. Nous n'auons iamais desiré des iuseaux , que pour raser la veille d'une bonne feste vostre teste cauterisée & puante , qui a trop de cheueux , pour cacher vostre ordure , & vostre profession. Nous serions fort contens de vous voir dans vostre Cloistre , avec vne couronne bien faite , & de vous auoir persuadé , que tout ainsi qu'elle vous reproche , qu'estant vne fois mort au monde , vous n'y deuriiez pas viure comme vous faites ; que nous sommes prests de mourir tous pour soustenir celle du Roy. Pour ce sujet nous honorons , se uons , & assistons l'ouuriere qui l'a faite , qui a l'interet à sa conseruation , qu'un seruiteur qui la rompt pour emporter les pieces , & qu'un Moine flatteur qui la ternit avec les sales vapeurs de sa bouche pourrie , & la noircit avec l'encre de sa plume mal taillée.

Après cela sa colere nous maudit , au lieu que sa charité nous deuroit exhorter pour nous conuertir , si nous estions meschans. Ce grand Predicateur , qui allegue à tout propos la parole de Dieu , n'y a iamais leu , que Moÿse fut tansé pour auoir frappé la roche , à laquelle il deuoit parler doucement ; & que l'enfant ne resuscita point touché par le baston , mais eschauffé par le soufflé d'Elisée. Contre ces maledictions nous disons ce

Pag. 7.

Nu. 20.

4. Re. 4.

qui fut dit à Dauid par vne belle & vertueuse dame : *Nous ne sommes esmeus, ny par vos benedictions flatueuses, ny par vos maledictions furieuses. Vous n'estes point nostre Pasteur; vous n'estes pas bon Religieux: vous n'avez ny iurisdiction dans l'Eglise, ny credit enuers Dieu. Nous ne prouoquons pas son indignation par vos violences, mais nous l'appaisons par nos patiences: nous le prions qu'il vous rende sages, & qu'il conuèrtisse ceux qui nous persecutent par effect, par parole, & par escrit.*

Pag. 7. Vous dites, que nous representons le Roy comme esclau: ce mot est scandaleux; il est trop grand pour le deuenir, & trop genereux pour le souffrir. Nous disons, que la verité luy est déguisée par le mensonge, & cachée par l'artifice: que toutes les portes & fenestres sont fermées aux bonnes lumieres: que par corruption, ou par crainte, on ne luy dit point ce qui se passe, & on luy dit ce qui ne fut, & ne sera iamais; qu'on chasse tous les iours ceux qu'on presume auoir intention de luy donner quelque bon aduis: que vostre bon parent, agent principal, espion majour, & clerck à gages de celuy qui l'a produit, est tousiours attaché aux oreilles de S. M. pour la remplir d'impostures si grandes, que c'est vn tesmoignage de la bonté du Roy, de ce qu'il n'employe point toute sa puissance pour nous faire perir. Nous pouons dire à l'image de Dieu, ce qui a esté dit à Dieu mesme: *Si nous ne sommes pas consumez, nous le deuons à la misericorde du Seigneur.*

Pag. 7. Vous nous reprochez, que pour rendre le Roy glorieux, & appeler les estrangers en France, nous le

representons comme Prince d'un Estat ruiné, & d'un peuple qui mangé l'herbe. Sauf correction de vostre capuchon, ce n'est pas nostre dessein; mais de faire voir par nos tres-humbles Remonstrances, ce qui ne se peut cacher qu'à celui qui apporteroit le remede, si vous ne couvriez le mal, qui descouvroiroit les pillages, les profusions, les recelemens, & diuertillemens des deniers tirez du sang des pauvres, par le doublement des tailles, estappes, passages de gens de guerre, par les contributions, par l'establissement des Officiers nouveaux, qui sont autant de sangsues appliquées sur les veines de l'Estat, qui sont les marchands, & les laboureurs, & par les impositions sur toute sorte de marchandises & d'aprées. Nous disons, que les deniers qui prouiennent de toutes ces inuentions, ne seruent que pour remplir la bourse des larrons, leur faire baltir & meubler des superbes palais, acheter des rentes sur le Roy, & sur le peuple, avec toutes les terres des voisins; faire à tour de bouquet des festins de trente ou quarante mille liures, récompenser tous les Gouuernemens de France, faire rebastir les citadeles & fortifications d'esmolies; bref, tenir en marché tout le Royaume, & acquerir avec le sang conuerty en or, ce qu'il faudra retirer avec l'or conuerty en sang. Nous disons, qu'au mesme temps qu'on fait ces infames trafics, le peuple en plusieurs endroits a esté priué de la nourriture des hommes, pour prendre celle des bestes: c'est vne chose que le Roy doit sçauoir, pour y apporter le remede. Si vous l'auiez proposé au lieu d'augmenter le mal, & de vous en mocquer, nous serions

trez-aïses que vos consciences eussent deschargé les nostres , & que des bons aduis particulie s eussent empesché l'esclat public. Vous concluez, que cela donne sujet aux ennemis de l'Estat d'entreprendre sur nous: mais outre que la misere est plus desc uuerte par elle-mesme , que par nos escrits, ils sçauent bien que nos ruines sont plus riches que leurs bastimens; que nos mines sont d'or monnoyé, semé par toutes nos terres couuertes de soldats, que la guerre, que l'ambition & imprudence de Mr le Cardinal ont mis dans toute la Chreienté, a reduit tous les Princes & Republiques à l'incommodité, & a fait que chacun escoute la voix de son peuple, lors qu'il pense à attaquer le nostre. Outre cela nous les aduertissons, que sans la faulx moïoye que vous faites battre par des prisonniers, & entre autres par le Flessis (ce qui vient de l'inuention du Sr des Montagnes) nous sçauons deux caches qui peuuent entretenir deux ans deux armées de cinquante mille hommes: il n'est question, pour auoir ces grands tre-sors, que de loger deux meschantes personnes en vn lieu qu'ils ont rempli de gens de bien, pourueu qu'ils ne soyent pas gardez par le frere du Sr des Montagnes, qui leur feroit trop bonne chere.

Au reste, vous apprendrez, quand il vous plaira, à parler mieux que vous ne faites de la Royauté: vous n'establissez sa grandeur, *que dans l'opinion, & apprehension de la seule puissance*. vous aurez agreable que ie vous aduertisse, que sous le nom de la defense du Roy vous le trahissez, lors que vous n'affermissez son auctorité, que par l'opinion, non par la raison parmi les hommes, & dans

la parole de Dieu entre les Chrestiens. Vous avez tort de n'appuyer point les Couronnes des Roys sur la iustice, plustoit que sur la Puissance: celle-là produit l'amour, & cette-cy ne donne que la crainte, qui cherche toute sorte de moyens pour s'asseurer.

Il ne se faut pas estonner, si vous avez oublié la premiere & la plus grande vertu Royale; parce que vous avez fait vœu de n'en parler iamais, & ne mettez rien deuant les yeux de S. M. que le pouuoir absolu. Vous faites passer par là toutes choses, sans vous souuenir du titre que le Roy a pris, & que vos conseils violens luy auroient desia osté, s'il n'estoit plus retenu, & plus iuste que vous. Je laisse à part le reste de vostre discours, bas, rude, & grossier, sur les loiianges de la dignité Royale; que vous estes plus capable de faire mespriter que de faire estimer.

Pag. 9.
& 10.

Vous nous imposez, que nous auons dit, que le Roy a triomphé de ses ennemis estrangers, & a domé ses sujets rebelles plustost par miracle de Dieu, que par sa conduite. Nous rendons à Dieu ce qui est à Dieu; & reseruons à Cesar ce qui est à Cesar. Il est vray, que dans vostre Coup d'Estat, & Entretiens des chāps Elisées, vous n'avez rien donné, ny à Dieu, ny au Roy; de peur d'oster quelque chose à Mr le Cardinal. Il ne se faut pas estonner, si celuy qui prend tout, ne laisse non plus de gloire à Dieu, & d'honneur à son Maistre, que de finances & de places. Nous recognoissons comme bons Catholiques, que Dieu a fait des miracles pour le Roy, & que le Roy a fait des merueilles pour Dieu; que Mr le Cardinal a fait des ruines estranges

Pag. 11.

22.

dans l'Europe, & vous des grandes sottises dans vos escrits.

Pag. 12. Et afin que vous ne doutiez plus de nostre creance, & ne la descriez point au peuple, comme injurieuse au Roy; nous disons que la sainteté des intentions de S. M. ses prieres & ses vertus ont attiré toutes les graces de Dieu, qui luy ont donné les auantages qu'il a eu; & que les sinistres intentions, l'orgueil, l'auarice & l'imprudence du principal Ministre ont arresté le cours des victoires de son Maistre, & sont les causes de tous les desordres & confusions que nous voyons. Nous disons, que sous son ministere la Rochelle a esté prise, les rebelles ont esté chastiez, les estrangers repoullez, & les alliez secourus; mais nous ne sommes pas d'accord, que ce soit par son ministere.

Nous le cognoissons, & sçauons que ses conseils sont temeraires, ou timides; & que ses actions sont violentes, ou lasches: il n'a rien proposé nettement, ny executé genereusement. Nous soustignons, que pour perdre le Marechal de Thoiras, il a voulu perdre Rhé, & sauuer la Rochelle; & prouuerons, que le secours est entré dans l'Isle contre son aduis: que sa passion, & celle du feu Euesque de Mandé son cousin, appellerent les Anglois; & que ce n'est pas son courage qui les a chassés. Il irrita & rendit ennemi feu Monsieur de Sauoye, pour se vanger de Monsieur le Prince de Piedmont, qui s'estoit plaint de luy. Il a pris Pignerol sans resistance, a triomphé sans combattre; & lors que les belles occasions se presentoyent, il a abandonné l'armée, pour venir demesler, comme il a déclaré, des petites menées

qui se faisoient à la Cour contre luy. Nous sommes encore à voir quelque bon reglement pour l'Eglise, pour la guerre, pour la Justice, pour les Finances, pour le soulagement du peuple : ces emplois estoient dignes d'un Cardinal, & d'un Prestre ; non l'Admirauté, la conduite des Armées, & les gouvernemens des Prouvinces, & des places. Vous dites, *que les troubles ont empêché l'exécution de ses bons desseins* : que s'il n'eust fait ces grands exploits de guerre, nous aurions veu des belles ordonnances, & bien executées dans la paix : que cet Alchimiste, qui a réduit tout le bien de la France en cendres, eust conuertit tout le cuivre en or, & tout l'estain en argent ; & que le siecle de Saturne n'eust pas esté seulement dans la citadele du Hayre, mais dans toute la France. C'est donc la faute de ceux qui l'ont empêché de souffler, ou qui l'ont fait trop souffler en le mettant en colere, qui a tout gâté, & qui a fait que par despit il a mis par tout, au lieu de l'abondance de la paix & de la santé, la famine, la guerre, & la peste, qui sont les trois beaux presens qu'il nous a fait, & qu'il a portez en Italie. De sorte que nous pouvons dire, que sans compter le sang, qui a esté employé pour teindre son bonnet, il est cause de la mort de plus de deux millions de personnes. Voyla les miracles de ce nouveau saint, qui veut faire croire au peuple, que pour oster la gloire à nostre Roy, nous publions qu'il a pris la Rochelle, & les villes rebelles de Languedoc, avec l'Arche de Dieu, & les trompettes Sacerdotales ; parce que nous n'aduoions pas, que Mr le Cardinal les a prises tout seul, qu'il a esté

Demetrius Poliorceces , qui avec la grande machine de son esprit, a renue. sé les bastions, demi-lunes, cornes, & tenailles, comme si la presence du Roy, & sa conduite, les forces de l'Etat, les Mareſchaux de Camp, les Officiers de l'artillerie, les Capitaines, & les soldats, n'y auoient rien contribué. On nous dit, que l'esclat de la pourpre a esbloüy les yeux des ennemis, que la creste de ce coq a fait fuir les lions, que les accords de sa voix & de son luth ont charmé les tigrés, & ses enchantemens endormi les dragons.

*Le Cardinal de
Riche-
lieu bon
joüeur
de luth.*

Pag. 13.

Nostre escriuain, apres nous auoir fait vne Lelle leçon monachale, & parlé en vray Muloz de la dignité Royale, veut par vn artifice grossier noir-cir toutes les actions de la Royne Mere du Roy. Pour auoir sujet de faire voir, que les plaintes contre les Ministres de l'Estat ne sont pas nouuelles, il a ramassé fort soigneusement celles qui furent faites, non pas contre le gouuernement & la Regence, où il ne trouue rien à mordre, mais contre le credit & les conseils de la Royne Mere du Roy, és années 1611. & 1617. Son dessein n'est pas de prouuer par ces pieces, que les querelles contre les Ministres du Roy n'ont pas commencé depuis six mois; mais de faire voir par lambeaux & haillons coupez çà & là dans les Manifestes des Princes, qu'il y a eu quelque chose à redire dans la conduite de la Royne Mere de S. M. Cette inuention fait voir, que la passion a estouffé le iugement du Sr des Montagnes; & que sa furie est si grande, que pour se defendre il prend l'espée par le trenchant; & comme ce Gobrias enragé, il se veut percer le premier, pour tuer au trauers de

**Pag.
14.**

son corps l'ennemi qui est derriere. Mr le Cardinal estoit Secretaire d'Estat, principal Ministre, & confident de celuy contre lequel les Princes ont fait les remonstrances: s'il y auoit du mal, il en estoit l'auteur. Pourquoy donc met-il en auant pour sa defense; ce que les ennemis de sa Maistresse ont escrit contre luy, qui estoit au temps de ses reproches vn valet nouueau, prest à tout faire, ardent, hardi, violent? s'il s'est fait quelque mal, il est certain qu'il y a eu la meilleure part. Il ne se contente pas d'auoir fait extraire les pieces des Manifestes de 1617. mais il en apporte encore de celuy de l'an 1619. comme n'approuuant pas ce que la Royne escriuit, de Loches & d'Angoulesme. Il est vray, qu'il n'estoit pas encore arriué pour trahir sa Maistresse. Il se deuoit souuenir, que la sortie de Blois, & la retraite à Angoulesme, auoient produit le rappel de son bannissement, & que la guerre d'Angers, la drolerie du pont de Sé, & les lettres de l'année 1620. estoient de son inuention. Tout cela ne se faisoit que pour arracher le chapeau de Cardinal: mais il failloit, pour remplir l'ouurage du Sr des Montagnes, mettre en suite ce que luy-mesme escriuit en ce temps-là contre le Roy & ses Ministres. Vray est, que dans l'imprimé, qui porte pour titre, Discours au Roy touchant les libelles faits contre le gouuernement de son Estat, il dit, que *Mr le Cardinal a bien serui le Roy dans les affaires d'Angers*: ce qu'il ne sçauroit auoir fait dans ce rencontre, qu'il n'aye trahi sa Maistresse; puis qu'il luy auoit fait leuer les armes contre S.M. & qu'il estoit non seulement l'auteur, mais le directeur de cette guerre,

Pag. 15.
& 16.

pag. 17.

Ces belles allegations ayant esté bien rangées, & n'y ayant rien d'oublié que celles d'Angers ; le Sr des Montagnes dit , *qu'il ne faut point faire estat des plaintes , qu'on fait contre les Ministres du Roy ; parce que ce ne sont que des accens estudiez , & representez comme des comedies , qui partent moins du cœur , que de la coustume.* Voyla les beaux traits de sa plume ; & les jolies inuentions de son bel esprit ; pour tascher de prouuer , que le Roy & le peuple doiuent regarder comme des farces les tragedies qu'on a fait , en chassant du Conseil la premiere & la plus fidele Conseillere de l'Estat de France, en arrestant prisonniere la plus grande des Roynes du monde , en blasmant la plus vertueuse des Meres des Roys , la contraignant d'abandonner le Royaume de son Fils , bannissant le Frere vnique du Roy, le poursuiuant à picques baissées iusques à la frontiere , emprisonnant les Mareschaux de France , & beaucoup de gens de qualité , faisant retirer & mourir de regret les Princesses , & deshonorer les Dames. Il est vray , que ces persecutions sanglantes , & actions tragiques , ne vous fournissent que sujet de rire ; & ayant eu iusques à present vne issuë agreable pour vous , ie trouue que vous auez raison de les appeller comedies : mais ceux qui souffrent , les nomment tragedies.

Nos accens ne sont pas estudiez , comme vos piperies : il faudroit estre vne statuë de marbre ; encore celle d'Apollon pleura à Cumes , lors qu'on ruinoit le pays. Nous serions frappez de la maladie de Sardaigne , si nous rions en mourant ; & sur tout cette grande Royne , qui s'est veüe esloi-

gnée du Roy, emprisonnée, gourmandée par des discours rudes & menaces étranges, contrainte de sortir du Royaume, despoüillée de ses biens, ses rentes arrestées, ses meubles inventoriez, ses seruiteurs mis dans la Bastille, pros crits, poursuivis, volez sans forme de Justice. Elle verse plus d'eau de ses yeux que sa bouche n'en boit : elle soupire autant de fois qu'elle respire ; & Dieu par miracle retient son ame dans son corps, pour faire que sa vie serve à la conservation de celle du Roy, & de Monsieur son Frere, & à leur reconciliation, afin qu'un iour S. M. aye la gloire de faire reparer l'injure qui a esté faite à sa Naissance, & sa bonne Mere la consolation de le voir destrompé. C'est pour lors, mon bon ami, que les sanglantes tragedies seront converties en comedies ; parce que nous ne desirons pas que le sang humain soit res pandu, & que la catastrophe soit horrible, si Dieu par un iuste iugement ne l'ordonne autrement. Lors que vous nous faites pleureurs de saint Innocent à gages, & par coustume, vous desirez par ces discours estouffer les tendres resentimens du Roy ; auquel ne pouvant plus cacher le mal que vous faites à la Roynne sa Mere, vous dites qu'elle le reçoit, & s'en plaint en riant. Un infame bouffon autrefois chargé de bastons, & maintenant d'une des plus belles charges de la Cour, a eu depuis peu cinquante mille liures, pour convertir en risée & en farces les choses les plus serieuses, & plus importantes qui soient iamais arriuées en France : c'est en ce sens, que vous changez les tragedies en comedies ; mais prenez garde, que Dieu ne charge vos co-

medies en tragedies. Sr des Montagnes, qui faites le sçauant en l'Escripture sainte, souuenez-

- Pro.14. vous qu'elle dit, *que la r. sée sera m. sée avec la douleur, & que la fin de la ioye sera la tristesse.* Nous vous
- 1.Co.4. dirons avec S. Paul: *Vous regner & sans nous, & plaise à Dieu que vous regniez:* c'est à dire, selon les re-
- Eccl.10 gles de la Iustice. Craignez celuy qui renuerse les sieges des Conseillers orgueilleux & violens, & met les humbles & les doux en leur place. Ne vous mocquez point des miserables, sur tout de ceux que vous auez rendus tels. Contentez-vous d'auoir esté cruels; ne soyez point si lasches de vous resiouyr apres auoir mal fait. Apprehendez les iugemens de celuy, qui a permis qu'Achitophel & Iudas traistres & ingrats ayent seruy contre eux-mesmes de bourreaux à sa Iustice: celuy-là fit fuir deuant son Enfant son Bientaëteur & son Maistre; cettuy-cy vendit I E S V S-C H R I S T, & fist pleurer sa sainte Mere.

- Tous les combats du Sr des Montagnes iusques à la page 18. n'ont esté que legeres escarmouches;
- Pag.18. il commence à faire choquer le gros, & à donner bataille à la Royne Mere du Roy Il range diuers escadrons de citations, d'exemples, de figures, de consequences: tout cela est capable de faire peur au petit peuple, semblable à ce valet, qui estoit
- 4.Rc.6. espouuanté, iusques à ce que le Prophete luy eust monstré le secours de Dieu: le voicy. En premier lieu vous injuriez le Roy, & dites des mots que vous tirez par vne consequence en a gée, ausquels personne de nous n'a pensé: nous vous auons fait nostre declaration au contraire, & vous meritez d'estre chastié, non seulement pour nous auoir calom-

calomniez, mais pour auoir fourni des pensées Pag 19.
horribles à ceux qui perdront le temps, & offen-
seront Dieu en lisant vos abominables escrits.

Vous dites, que *si la Royne Mere du Roy a quelque* Pag. 20
mal, elle ne doit pas s'en prendre au Roy, mais à elle
mesme. Ce sont vos termes; ausquels ie respons,
qu'elle ne se plaint point du Roy, & qu'elle ne
s'accuse pas, parce que le Roy est surpris, & qu'elle
est innocente. Estre trompé n'est pas vn peché,
ny tousiours vne marque de manquement d'esprit;
les plus vertueux & les plus sages l'ont esté. Estre
dans l'affliction, n'est pas vne conuinction de cri-
me, ny d'imprudéce; les plus gens de bien ont
esté persecutez, & les plus aduisez ont souffert les
violences des plus fols. Vous dites, que *la Royne*
deuant ces derniers rencontres auoit la souveraine aucto-
rité. Vous faites tort au Roy qui ne la doit iamais
abandonner à personne. Vous adjoustez, *qu'elle*
estoit aimée de tous les François. Il est vray, qu'elle
estoit, & est encore honorée & respectée par les
gens de bien. Vous la voulez faire mespriser, &
rendre odieuse par vos discours de tauerne, & im-
primez du Pont neuf, qui ne sont que pour sedui-
re les ignorans, & pour amuser vos partisans. Vous
luy reprochez, *qu'elle a eu plus de reuenu, & de gra-* Pag 21.
tifications que les Roynes d'auirieres qui ont esté deuant
elle. Vous n'avez iamais veu l'estat de leurs rentes,
ny les acquits de leurs pensions. Vous estes malin:
vous n'escruez que pour les harangeres, & pour
faire entretenir par les chanteurs de Paris les va-
lets qui cherchent maistre, & les artisans, que les
frequés voyages que vous faites faire au Roy, ont
lailié sans employ, & dans la faim.

Catherine de Medicis que vous mettez la première sur les rangs, a eu les biens qu'elle a voulu auoir, estant dans la puissance. Si vous iugez des Finances des Roys ses Enfans, & du temps auquel on viuoit, on baptisoit, on entretenoit, & on récompensoit les seruiteurs à fort bon marché; vous verrez que vous estes trompé en vostre calcul: vous ne deuriiez aussi compter qu'avec le chapellet, ou les neuds de vostre corde. Pour les trois Roynes sans Enfans, que vous nous alleguez; outre qu'elles ont esté peu de temps en France, & qu'elles y ont apporté fort peu de chose; si la passion ne vous auoit aveuglé; vous sçauriez bien recognoistre, que d'estre Veuue d'un grand Roy, & en auoir fait un autre Grand, sont considerations, qui meritent quelque aduantage par dessus les Roynes steriles. Je vous dis outre cela, que la nostre a eu plus en Mariage, que toutes celles que vous auez cotté; que le doüaire va tousiours à proportion de la dot; & qu'un Prince qui a desfia quelque aage fait auantage à vne fille. C'est Henry le Grand qui a assigné le principal bien: le Roy son Fils a creu avec raison, que sa Naissance, & les soins de la Royne sa Mere durant sa Regence le deuoient augmenter plustost que le diminuer: la Royne Mere du Roy avec ses deniers a retiré des estrangers & Princes protestans d'Allemagne les terres qui demeuroient engagées avec quelque deshonneur pour la France: & le fruit de ce mesnage reuiendra tout au Roy; si M^r le Cardinal; qui iouyt à present de tous ces reuenus, ne se fait donner la confiscation, apres qu'il aura reduit la plus grande Royne du monde à la com-

passion & pension des estrangers , comme il a fait Madamoitelle d'Orleans , à vne extrême incommodité. Il monstre que sa rage veut persecuter la Mere , les Enfans , & les petits Enfans , & attaque non seulement l'innocence des mœurs , mais encore celle de l'aage. Je vous confesse que j'entrerois en colere , si ie ne craignois qu'elle fust tort à mon iugement : ie le veux conseruer , pour faire cognoistre que vous n'en auez point , lors que vous mettez en jeu , comme vraye & paisible Royne de France , la Royne Marguerite. Vostre discours seroit capable de persuader , qu'on a dit vray , quand on a asseuré , que Mr le Cardinal & vous auez fait vne exacte perquisition de certains papiers , que vous ne pouuez auoir recherché sans vous rendre criminels de leze-Majesté au premier chef , & auoir merité d'estre traitez comme Rauaillac. La Royne Marguerite estoit vne grande & bonne Princeesse : mais tant s'en faut , qu'elle aille du pair avec les Roynes Meres des Roys , qu'elle n'est pas mesme dans le nombre des femmes des Roys : vous en sçauiez aussi bien les raisons , comme vous ignorez ou faites semblant d'ignorer les rentes & pensions , desquelles elle iouyssoit : elles montoient iusques à quatre cens mille escus , ainsi que ses Tresoriers & Partisans vous diront ; là où vous ne faites aller qu'à vn millio de liures celles de la Royne Mere de S.M. Voila comme vous escriuez avec esprit & verité.

Après cela vous nous representez la Royne Mere du Roy , comme sortie par la faute du Paradis de tant de felicitez , d'hōneurs & de biens qu'elle possedoit , & tombée dans l'abisme des afflictions ;

Pag. 22.

vous asseurez, qu'elle n'y est plongée, pour s'estre embarquée dans quelques desseins & vnions qui ont despleu au Roy. Pour les desseins vous estes encore à les declarer, & elle à les faire voir: si vous les eussiez decouverts, vous les auriez publiez, comme vous avez fait des calomnies plus abominables que tout ce que vous scauriez dire.

Comment pourriez-vous cacher quelque chose vraye, puis que vous n'en laissez point en arriere de fausse? Mais où sont ces vnions dans lesquelles vous dites que la Royne Mère de S. M. s'est embarquée? Mr le Cardinal declare au contraire qu'elle n'a esté arrestée à Compiègne, que pour vne desunion. Il n'est pas à se repentir, de n'auoir allegué à toute la France, que ce sujet de la detention d'une grande Royne, Mere de son Maître, & sa Bien-factrice: il voudroit bien pouuoir arracher des registres des Parlemens, des cabinets des Gouverneurs des Prouinces, & de la memoire des hommes, cette belle raison, comme il a tasché de supprimer toutes les copies de la seule piece qui a esté faite avec quelque naïfueté. Apres vn crime recent la mauuaise conscience trembloit encore, la grande suite des violences ne l'auoit point asseurée, & les attentats contre la Maison Royale n'auoient point tiré toute la honte, qui feroit rougir sa face, si elle n'estoit plus colorée du sang d'autrui, que du sien.

Pag. 23. Il vous a fait escrire, qu'il n'est rien arriué de nouveau ny d'estrange en tout ce qui s'est passé depuis sept ou huit mois contre la Royne Mère, s'estant trouuée dans les mesmes rencontres apres la mort du Marechal d'Ancre. Ainsi on auctorise vn crime par vn autre cri-

me , parce que l'innocence a esté opprimée vne fois, il faut qu'elle le soit deux ; & que Mr le Cardinal couure sa faute par celle de Mr de Luynes encores que ses actions soient iustificées & sanctifiées, si on les compare avec les vostres. Celuy-là estoit creature du Roy, vous estes celle de la Royne sa Mere. Celuy-là s'estoit imaginé, que le cours de sa fortune estoit arresté par la Royne Mere du Roy, la vostre a esté faite par elle ; & vous n'avez point de bien, de dignité, & d'employ, que sa bonté ne vous aye ou donné, ou procuré. Celuy-là n'auoit iamais esté domestique de la Royne Mere du Roy, & vous l'avez esté long temps. Celuy-là a fait vne action de temerité ; vous en avez fait cent de malice, de trahison, & d'ingratitude. Celuy-là a fait releguer la Mere de son Maistre dans vne des plus belles maisons du Royaume, & l'a l'aislée là avec ses domestiques, & dans la ioyissance paisible de tous ses biens : vous avez fait arrester dans vn vieux chasteau vostre Maistresse & Bien-faëtrice, l'avez enuironnée de gardes, avez emprisonné ses domestiques, & entre autres son premier Medecin ; avez banny les Princesses qui estoient aupres d'elle, l'avez voulu chasser hors de la France ; avez saisi ses rentes, avez tasché de la diffamer par vos escrits, & l'avez forcée par artifice & violence de quitter le Royaume, auquel elle a donné vn Roy, & dans lequel elle vous a fait grand. En fin, vous avez accompli ce que vous avez dit autrefois ; que si vous estiez en la place de Mr de Luynes, vous feriez bien sentir autrement vostre puissance à la Royne Mere du Roy : sa bonté croyoit que c'e-

flloit vne raillerie, mais elle voit que c'estoit vne menace insolente. Osez-vous bien apporter l'exemple de ce qui a esté fait l'an 1617. pour faire passer pour vne chose ordinaire ce que nous auõs veu l'an 1631? le n'ay qu'un dilème pour vous faire voir, que vous n'avez point perdu l'ame sans perdre l'entendement. Ou ce qui arriua apres la mort du Marechal d'Ancre, estoit iuste, ou ne l'estoit pas. S'il n'estoit pas iuste, il ne vous peut seruir pour monstrier, que vous avez eu raison de faire encore pis: s'il estoit iuste, vous Mr le Cardinal & pour lors Mr de Luçon, fustes iustement chassé de la Cour, iustement banni en Auignon, & injustement rappellé de vostre exil, pour estre enuoyé à Angoulesme. Quelles armes prenez-vous pour vous defendre? celles qui vous ont blessé, celles de vos ennemis, celles des personnes auxquelles vous avez fait la guerre? Certes vous faites paroistre que vous avez eut tort, s'ils auoient bien fait, & que vous avez trahi vostre conscience en leuant les armes contre toute Iustice. On croira plustost ce que les plus aduisez remarquerent, que pour auoir un bonnet de Cardinal, vous auiez vne intelligence secrette avec celuy, duquel vous loíiez maintenant les conseils.

Ces traits d'auenglement sont suiuis de ceux de la menterie, qui representerent l'histoire de ce qui s'est passé à Compiègne tout autrement qu'el-
 Pag. 13. len'est. On dit, que la Royne Mere du Roy a esté laissée il est vray, mais c'est comme les Preuosts & Huissiers laissent les prisonniers entre les mains
 Pag. 24 des Concierges & Guichetiers. On assure, qu'on
 & 25. luy a offert la retraite de Molins, avec le Gouvernement

de Bourbonnois : celle de Neuers ou d'Angers ; & que la Royne Mere a fait esperer, qu'elle se disposeroit pour obeir à S. M. mais qu'elle a fort souvent changé de resolution, & pris diuers pretextes pour se dispenser de garder sa parole. Icy Mr le Cardinal est semblable à Fimbria, qui fut si impudent, que de mettre en iustice le pauvre homme, qui auoit esquivé le corps, lors que ce meschant luy vouloit donner vn coup d'espée dans le cœur. On sçauoit bien, que M^r le Cardinal apres les premiers quinze iours de la detention (c'est à dire, apres le desespoir du pardon) ne desiroit qu'une sortie hors des murailles de Compiègne, pour acheminer vn bannissement hors du Royaume; qu'il n'osoit point faire prendre au colet vne grande Royne dans vne ville voisine de Paris; qu'il luy seroit plus aisé de changer vn cocher & vn postillon dans la campagne, & de faire escarter vingt & cinq gardes par cinq ou six cens cheuaux legers. La Royne Mere du Roy, n'a pas esté si imprudente de se ietter dans ce desplaisir, qui luy eust causé la mort; ny si mal-heureuse, qu'elle n'eust eu aduis du mauuais dessein, par des personnes auxquelles la colere peu secreete de M^r le Cardinal l'auoit fait cognoistre. Entre les excuses qu'elle a apporté, celles de sa santé estoient veritables, les autres estoient remplies de prudence, & procedoient d'affection enuers le Roy. On ne s'en vouloit pas esloigner de trois cens lieues, ny faire dire, que durant son Regne sa bonne Mere eust esté bannie des Estats, que le le bon-heur & fidelité de son Mariage luy auoient acquis, & que ses soins luy auoient conseruez.

Pag. 27.

Vous reuenez à Compiegne, & dites, *qu'on a donné en ce lieu là des gardes à la Royne Mere du Roy, par honneur.* Si vous ne vous moquez de toute l'Europe, vous escriuez pour l'Amerique, & voulez tromper les Margajats, & les Canadins. Vous deuiez dire, que vous auiez logé douze ou quinze cens hommes de pied dans la ville de Compiegne, & deux cens cheuaux sur les auenües; que vous auiez mis des corps de garde à la porte, & sous les fenestres du chasteau, pour empescher que les loups de la forest ne mangeassent la Mere du Roy, & que des hallebardiers conduisoient tous ceux qui entroient dans la ville deuant vn Marechal de France, pour estre examinez, s'ils auoient intelligence avec Mr le Cardinal, & avec quelque empoisonner ou assassin. La Royne vous remercie de la peine que vous avez pris pour l'honorer, & conseruer: vous ne croirez pas, qu'elle en estoit si honteuse, que cette consideration l'a portée à vous descharger de ce soin. Personne aussi, si ce n'est * Maniquet, ne se persuadera, que ce que vous escriuez soit veritable; & nous pouuons dire, que vostre respect a esté semblable à celuy des Iuifs, qui bailloient des soufflets au bon Dieu, en luy faisant vne profonde reuerence.

*C'est
vn petit
enfant,
avec le-
quel le
Cardi-
nal se
joüoit.*

Vostre bel esprit dit, *qu'il ne sçait point de loy qui oblige vn fils de demeurer tousiours avec sa mere:*

Pag. 28.

nous sommes d'accord, qu'il n'y en a point d'escrite que dans les cœurs, ny contre les ingrats aussi: ce n'est pas à dire qu'il le faille estre, ny qu'il soit honorable à vn seruiteur, d'emprisonner & de tâcher de diffamer la Mere de son Maître, & sa Bien-faëtrice. Le Roy a trouué bon,

quele palais de Luxembourg, basti par les soins & aux despens de la Roynes sa Mere, fust le lieu de sa retraite, lors qu'elle ne pourroit, ou ne voudroit plus suiure S. M. en ses voyages, ou assister à tous ses conseils. On la pouuoit prier de se retirer en ce lieu-là, encoré qu'on l'eust trouué vn peu rude durant le credit de Mr le Cardinal, & sans autre sujet que celuy qui touche son interest; ainsi qu'on peut voir en la premiere declaration. Les separations des Roys, & de leurs Meres, sont des eclipses, qui apportent tousiours quelque incommodité à la terre; elles ne peuvent estre fondées sur des causes si legeres: non seulement les Parlemens en doiuent auoir cognoissance; mais sur ce rencontre il faudroit assembler les Estats Generaux; sur tout quand vne Mere a esté Regente, & qu'elle a vn second Fils, que les mauuais desseins de ceux qui regardent la succession de ses Enfans peuvent desunir & entreprendre de ruiner l'vn par l'autre, & les deux à la fin. Vne bonne Mere doit faire tout ce qu'elle pourra pour demeurer aupres de leurs personnes, estant leur plus seur garde, leur plus fidele conseil, le lien de leur bonne intelligence, & le seul moyen de la renouer lors qu'elle sera rompuë. Les Meres des Roys, ausquels Dieu n'a point donné d'Enfans, & qui n'ont qu'vn seul Frere, s'acquitteront mieux de ce deuoir, qu'vn Conseiller flatteur & ingrat, si le vice n'a corrompu la source de la vie & du sang du Roy: si apres la perte de la conscience & du cœur, la folie n'a tellement troublé l'entendement & le cerueau, qu'vne Vefue estrangere de naissance, vueille perdre ses deux

Fils pour tomber entre les mains de ses ennemis ; ou pour en fauoriser vn, se defaire de l'autre, afin d'estre reduite à l'vnité, en laquelle il y a fort peu de seureté, & qui la met à la veille d'vne miserable orbité. De sorte que ie n'ay qu'à faire ce petit argument à M^r des Montagnes : Ou la Roynne Mere du Roy est vertueuse, & par principe de vertu elle voudra conseruer ses Enfants ; ou si elle estoit vicieuse, par maxime d'interet, qui est la seule reglé des meschans, elle ne les voudra point perdre. Il ne vous resteroit qu'à dire, qu'elle a perdu l'esprit ; auquel cas vous feriez vn bel honneur au Roy, vous seriez dementi par toutes les actions de la Roync, par sa race qui a porté les plus sages Princes du monde, & mesme par sa physionomie. Cela seroit vn tesmoignage, que celuy qui a eu & a encore dans sa maison quantité d'insensez ; qui a des accez de cette maladie, est de fol par interualles deuenu enragé pour tousiours, & doit estre enfermé avec sa sœur.

Pag.31.

Mais que dirons-nous de l'ignorance, de la malice, & de l'effronterie du S^r des Montagnes ? Il n'a sceu trouuer dans toutes les histoires vn exemple d'vne mere, qui aye voulu oster la Couronne de la teste de son fils aisné, pour la mettre sur celle du puisné, ou d'vn gendre : il en a fabriqué deux qui sont faux, comme il les a proposez, & dans la verité sont contraires à ce qu'il veut prouuer. Le premier est celuy de Constance femme du Roy Robert, & mere de Robert & Henry.

Pag.32.

Ce fidele & sçauant homme dit, que cette Princeesse voulut faire regner Robert puisné au prejudice d'Henry. Tous nos Historiens, excepté les plus suspects, &

un bon homme, qui est à present aux gages de Mr le Cardinal, pour auoir fait sa genealogie de Louys le Gros, disent, & il est vray que Robert estoit l'aîné de Henry; lequel pour estre plus genereux, fut couronné Roy par l'ordre du Pere; & que la Mere, qui desiroit de garder la regle de iustice, voulut conseruer la Couronne à Robert, qui volontairement quitta ses droits à son frere, lequel ne laissa pas d'honorer grandement, & de traiter favorablement sa Mere. Nos Historiens l'assurent ainsi, hors de Mr des Montagnes, qui nous fait vne genealogie nouuelle, & rapporte contre nous vne fable, qu'il a inuenté pour nous faire chercher vne veritable histoire, qui est contre son dessein. Pour celle d'Elizabeth de Bauiere, femme de Charles V I. outre que Monstrelet ne dit pas vn mot de ce que vous luy faites dire, elle est non seulement forgée à plaisir, mais impossible. Vous assurez que cette Royne apres la mort de Charles V I. fut couronner Roy de France, Henry d'Angleterre, qui estoit son gendre. ce qui ne se pouoit faire, veu qu'il estoit mort cinquante iours deuant Charles V I. Toutes les Chroniques de France & d'Angleterre, sans en excepter vne, l'assurent ainsi; & nous enseignent, que les Ducs de Bourgongne & de Bethfort firent couronner à Paris Henry petit fils d'Elizabeth. Aucun aucteur n'a dit qu'elle y fust consentante; au contraire, ils nous assurent tous, qu'elle estoit presente à Bourges au couronnement de Charles V I I. son fils, qui fut fait aussi-tost apres le deceds de Charles V I. & quelque temps deuant celuy de Henry Roy d'Angleterre. Ainsi le mensonge feint

Voyez
Aymon,
Helduin-
dus, Pa-
radin,
du Hai-
lan, Ga-
guin,
Paul
Ioue,
&c.

*Bosinius
Rerum
Hunga-
ricarum
lib. 5.*

ses auctoritez, & ses exemples; & ne trouuant point ou fort peu de meres desnaturées, il faut en inuenter, pour tascher de raurir aux bonnes les cœurs de leurs enfans, & les conseruer à des seruiteurs infideles. Ils ont esté en si grand nombre, que nous pourrions alleguer mille histoires estrangeres & domestiques, pour représenter ce qui se passe aujourd'huy en France. Je me contenteray d'en rapporter vne, qui semble auoir esté faite exprès, & qui est tres-veritable. Amalasonte (qui dans la creance de plusieurs siecles, & dans l'opinion de tous les sages, est vne des plus vertueuses & des plus courageuses Roynes, & des meilleures Meres que la terre aye iamais porté) estant regenté d'Athalaric, appella aupres d'elle, & mit dans les conseils de son Fils vn nommé Theodat. Cet homme fut si meschant, qu'ayant acquis le credit que la Mere auoit auparauant, & luy ayant desrobé les affections de son Enfant, il la fit emprisonner à Rauenne, puis bannir dans vn Isle, où en fin il la fit assassiner dans le bain, pour executer le dessein qu'il auoit de se faire Roy. Il y paruint; ayant ruiné de santé & de reputation son Maistre, & s'estant defait de la Mere, qui pouuoit toute seule par sa fidelité, par son amour, & son courage luy en oster les moyens, & s'y opposer genereusement. L'Empereur Iustinian enuoya Bellisaire en Italie pour vager cet injure.

Pag. 33.

Vous avez adjousté, pour faire trois histoires, vne calomnie contre la Roynie Catherine de Medicis, & apportez vn soupçon & vne mesdisance pour vne chose veritable. Nous croyons, que vous cotteriez à la marge la vie de sainte Cathe-

rine, ou quelque libelle diffamatoire des Huguenots. Vous employez des beaux mots pour delchirer la reputation d'une Royne, quand vous dites, *elle a esté soupçonnée*. Si on fendoit là dessus des veritez bien recognuës, il n'y auroit personne qui fust exemte de crime : si ceux que vous impoiez estoient bien verifiez, ils ne seruiroient pas pour monstrier que la Royne Mere du Roy a failli ; comme nous prouuons clairement ; que Mr le Cardinal a esté le premier de sa robe, qui a joint avec l'ambition, la violence ; & avec l'auarice, l'ingratitude. Nous ne cherchons point d'exemple dans son Ordre, comme vous faites parmi les Roynes Meres ; parce que nous sommes asseurez, que nous n'en trouuerions point ; & ie m'estonne, comme escriuant pour Mr le Cardinal, vous osez parler du soupçon des empoisonnemens.

Vous seriez plaissant, si vous n'estiez trop meschant, lors que vous dites, *que Henry III. cacha* Pag. 34.
à la Royne sa Mere le dessein du massacre de Blois. Cette dissimulation fut aussi auantageuse à ce Prince, que l'exécution : celle-là fut vne marque de l'imprudence de son conseil, & celle-cy de sa foiblesse. Vous sçauiez les matix qui en sont sortis, & les riuieres de larmes & de sang, que ce petit ruisseau a produit. La Royne Catherine, qui mourut de regret six iours après, l'eust arresté, & peut-estre eust donné vn meilleur, vn plus iuste, & plus genereux expedient, si on luy eust demandé son aduis. Je vous prie, n'apportez plus des fautes que les mauuais seruiteurs ont fait faire aux Roys, pour couurir celles que font les Ministres de ce temps. Nous aurions plus de sujet de dire ; Que si

le Roy Henry III. poussé par l'aduis des meschans, a fait massacrer vn grand & genereux Cardinal; la jalousie que donne vn homme de la mesme profession, & bien esloigné de sa naissance & de son merite, est bien plus forte, & pourroit disposer quelque esprit peu affectonné à Mr le Cardinal, à faire cette estrange consequence, qu'il est en danger de receuoir vn traitement pareil avec plus de raison & de iustice, & avec moins de danger & de suite. Vous ne deuiez pas esmouuoir cette querelle, si vous ne vouliez suggerer cette pensée.

Prou.
6.

Vn homme de vostre condition a encore plus mauuaise grace de se rendre abominable deuant Dieu, qui a dit, qu'il deteste celuy *qui seme la discorde entre les freres*. Vous y adjoustez par vn mesme trait celle de l'Enfant & de la Mere, & bien tost apres de l'Espoux & de l'Espouse, afin qu'il ne reste rien de saint & sacré dans la maison du Roy, qui ne soit violé par vn sacrilege attentat. Vous n'avez iamais appris ny practiqué la maxime d'un ancien Pere de l'Eglise, qui disoit, *qu'il estoit plus expedient de iuger des choses cachées par les manifestes, que de condamner les manifestes par les incognues*. La Royne Mere du Roy a tousiours soutenu ouuertement l'auctorité de S. M. & la iustice de ses resolutions contre les petits mescontentemens de Monsieur son Frere; elle a procuré & entretenu la bonne intelligence, & fait cognoistre que les droicts d'ainelle & de souueraineté emportoient la meilleure partie de son cœur. Si Monsieur a eu la place, que la nature luy pouuoit donner avec iustice; la part du Roy n'a pas esté

Tertul.
in A-
pol.

moindre. S. M. l'a recognu, & en a esté satisfait, iusques à ce que vostre malice luy a voulu persuader le contraire; & que d'un mesme coup elle a blessé l'esprit du Roy, l'ame de la Mere, & la reputation de Monsieur. Dieu fera voir dans le temps qu'il a destiné à l'esclaircissement de la verité, que tous les bons mouuemens de la Roïne Mere du Roy, & tous les ressorts de ses affections estoient conduits par le grand & petit poids de l'amour maternel. Vous avez rompu la corde qui les tenoit liez, avez destriqué toutes les rouës de la nature. Elle reuiendra; & vous serez punis par les iugemens de Dieu, que vous ne craignez pas; & qui sont autant immuables, comme ils sont secrets.

Vous croyez auoir bien prouué, *que ce n'est pas* Pag. 34.
seulement dans le rencontre des affaires presentes, que le & 35.
Roy se plaint des menées (c'est vostre beau mot) de
la Roïne sa Mere. Vous apportez la piece d'une lettre escrite à Angoulesme l'vnzième d'Auril 1619. c'est à dire, vous taschez de rendre coupable la Roïne Mere du Roy, & de monstrier, que Mr le Cardinal est innocent par le tesmoignage de Mr de Luynes. A cela il failloit adjouster les lettres enuoyées à Angers; pour responce à celles que vous auiez escrites en ce lieu-là. Vous auriez bien plus de sujet d'vser du mot de *menées*, pour faire voir. les souflemens des deux tiers de la France, & les leuées de cinquante mille hommes, que vostre ambition auoit armez, & qu'elle desarma apres auoir receu les assurances, & les despêches pour le bonnet rouge. Ainsi quand vous avez pris le preseruatif de l'auctorité

du Roy, vous vous empoisonnèz hardiment, pour ietter sur nous le venin de vostre soufflé : mais pour le repercuter contre les basilics, & les faire mourir, nous auons le miroir de cristal de la verité, laquelle (comme dit S. Iean) nous deliurera.

10an.7. Vous dites, que la Royne Mere du Roy s'est laissée
 Pag.36. gouverner par le mauuais conseil de ceux qui s'estoient rendus maistres de son esprit : personne ne s'en est iamais emparé, que ceux qui ont employé la magie, qui par la force de cet art l'ont endormie, lors qu'ils la pilloient; l'ont liée, lors qu'ils la vendoyent; & l'ont liurée à ses ennemis, lors qu'ils ont chassé & desesperé tous les bons seruiteurs. Vostre rage vient de ce que vous auez esté descouuerts, & n'auiez peu continuer vos maléfices. Dieu seul, plus fort que les demons, a rompu ces liens, & dissipé ces charmes, & arresté les effets des enchantemens : il n'y en a point eu depuis ce temps là, & nous n'en craignons plus pour l'aduenir.

Pag.38. Vous tesmoignez vostre ignorance, lors que
 3. Reg. vous dites, que Salomon a mesprisé Bethsabée. Vous
 2. ne sçauiez donc pas, qu'aussi-tost qu'il fut assis sur son thrône Royal, il fit mettre celuy de sa Mere à sa main droite, & luy protesta qu'il luy octroyeroit tout ce qu'elle desireroit. Elle fut refusée pour l'affaire d'Adonias, parce qu'elle le vouloit estre. Il ne se faut pas estonner, si elle estoit vn peu dissimulée contre le fils de son mari, pour le salut du sien; ny si elle n'assistoit pas Adonias avec fidelité, puis qu'elle n'auoit pas gardé celle de son premier mariage.

Mais vous estes fort indiscret, lors que vous comparez ouuertement vne putain avec vne femme de

me de bien ; & couuertement vn demi frere, qui auoit attenté à la vie du Roy , à vn frere des deux costez , qui est exempt de ce crime. Voudriez-vous bien imiter ce Mage scelerat , qui fit mourir Merges frere de Cambyfes , pour faire regner Oropastes ?

Pour les autres histoires que vous apportez, elles sont hors de propos, & fausses. Sur la premiere du gouuernement qu'Alexandre laissa à Antipater, non à sa Mere ; il failloit adjoûter, qu'une larme d'Olympia ruina Antipater. Apres qu'il eust pris vne grande peine, vsé de toute sorte d'artifices , & employé plusieurs impostures, pour endurcir le cœur de ce lyon ; l'eau forte des yeux de la Mere y graua tout ce qu'elle voulut , & effaça tout ce que le fauori y auoit imprimé. Vous n'avez point trouué de moyen, que la separation du Fils & de la Mere , pour empescher que la mesme chose ne vous arriuaît ; & vous n'avez point voulu qu'ils se soient veus pour se dire adieu. Sçanez-vous bien que ces deux bons & tendres cœurs s'uniront en s'approchant ; & que les torrens , qui sortiront de leurs yeux, eront assez forts pour vous noyer, & pour lauer toutes les sales impressions que vous avez donné ? Vous pensez faire perdre vne bonne source d'amour ; mais vous ne faites que l'arrester , afin qu'elle coule avec plus grande abondance pour vous emporter.

L'exemple de Philippe Auguste est contre vostre dessein , puis que sa Mere est associée au gouuernement : encore que vous eussiez mieux dit, que le Roy luy donna pour conseil l'Arche-

uesque de Rheims. Vous n'avez eu garde de proposer l'exemple de saint Louys, & de Blanche sa Mere; cela estoit trop commun. Vous voudriez qu'il fust osté de nos Histoires, & qu'on n'y peust lire que le testament de Louys XI. non les actions d'un grand Saint. Elles doiuent estre plustost imitées par un Roy qui porte son nom, que celles du Roy trop artificieux, & deuenu sur la fin de ses iours imbecile d'esprit; sur tout lors qu'il disoit, ce que vous proposez pour regle de conduite à un Roy bien sensé.

Pag. 37.

Vous dites, *que dans toute l'Ecriture sainte il n'y a point de passage, qui nous enseigne que les Meres des Roys doiuent gouverner leurs Enfants, & leurs Estats.* Nous en sommes d'accord, & ne pretendons pas aussi que ce droit leur soit acquis, ny par la parole de Dieu, ny autrement, apres les minoritez. L'intention de la Royne Mere du Roy n'est pas d'auoir autre conduite que celle de sa maison: elle prie seulement qu'on luy permette d'obeir à la loy de Dieu, qui luy commande de veiller sur la santé de ses Enfants; d'entretenir la bonne intelligence qui doit estre entre-eux, de les aduertir des mauuais desseins de ceux qui les veulent perdre l'un par l'autre, ou tous deux à la fois; & qui partagent le Royaume avec ceux qui regardent leur succession. Elle veut seruir & honorer celuy qui regne, & retenir en son deuoir celuy qui ne regne pas. Si tout cela n'est point escrit dans les tables de la loy de Moyse, il est graué dans celles des cœurs, qui sont le fondement de toutes les autres.

Mais vous qui avez feuilleté les saintes Let-

tres avec vn si grand loin, pour asseurer qu'il n'y a rien pour nous, & beaucoup de choses contre nous; n'y auez-vous point rencontré, & compté les trente maledictions que Dauid le plus doux des hommes iette sur Achitophel, le nom duquel signifie frere de la ruine, & qui auoit seduit le fils de son bien-facteur: *Que la mort le saisisse, qu'il descende viuant en enfer, & qu'un autre prenne son Euesché*, c'est à dire ses charges, &c. N'aez-vous point remarqué tant de belles sentences du Sage en faueur des Meres? Ne croyez-vous pas, puis que les Roys viennent au monde comme leurs subjects, que ces regles leur sont communes: parce qu'elles sont de Dieu, qui les ordonne pour tous; & que le Roy de tous les mortels, & des immortels, est la loy de Dieu, comme disoit Pindare. Ces ordonnances sont fondées en la nature, qui nous rend tous semblables par la conception, par la naissance, & par la mort. Je crois que vous auriez enuie de ietter la Bible dans le feu; comme fit vne Dame trop prompte, & tres-ignorante, qui n'entendit pas ces paroles, *L'injustice de l'homme est meilleure, que la femme bien faisante*. Aussi quand vous lirez: *L'affliction ne se retirera pas de la maison de celui, qui vend le mal pour le bien. L'esperance de l'ingrat se fondra comme la glace de l'hyuer, & s'evanouïra comme vne eau superflüe*: Et dans saint Paul, *La pieré* (il entend enuers les peres & meres) *est vile à toutes choses, ayant la promesse de la vie presente & de la future*. Vous desireriez que tout cela fust effacé du liure de vie; & si vous osiez, vous les deschireriez.

Pl. 108.

Eccli. 3.

& 7.

Prou. 20.

Eccli. 42.

Prou. 17.

Sap. 16.

1. Tim. 4.

avec la mesme impieté, qui vous fit defendre le Carefme passé aux Predicateurs de Paris, de parler du respect & de l'honneur que les enfans doiuent aux peres & meres : parce que cet *in illo tempore*, n'estoit pas de saison *in hoc tempore*; & que vous faites, comme disoit le grand saint Hilaire, *la foy du temps, non de l'Evangile eternal*, auquel vous ne croyez pas.

Hilar. de
Trinit.

Vous concluez, sauf à y reuenir bien-tost, apres les discours horribles contre la Royne Mere du Roy, par la raison que vous dites, que *S. M. a eu ce la laisser à Compiègne; parce que Monsieur estoit mescontent à Orleans*. Il me semble que la conclusion eust esté plus forte, & plus raisonnable, si vous eussiez dit, qu'il failloit conseruer la Royne Mere dans la Cour; afin que son entremise y fist reuenir Monsieur, que sa parole l'assleuraist; & que son auctorité luy remonstraist ce qui estoit de son deuoir, s'il s'en estoit esloigné, ce qu'il n'a iamais fait. Mais vous n'avez voulu, ny la Mereny le Fils, pour tesmoins de vos actions: auez craint leur liberté de parler, & l'opposition qu'ils pouuoient former à vos mauuais desseins: vous sçauiez bien, que si la vertu ne l'eust point faite, elle deuoit venir de l'interest.

Pag. 41.

Ne dites pas que l'Espagne fauorisoit les mescontentemens de la Royne Mere du Roy, & de Monsieur. Il n'est pas vray, sauf correction, que l'Espagne, deuant les scandales que vous avez produit, ny apres, aye eu intelligence avec la Royne contre le seruice du Roy: mais il est vray, que depuis six mois l'Espagne a esté

dans les ressentimens de toute la terre, & que le
 Roy & la Roynie de ce Pays-là en ont eu de fort
 tendres, que l'alliance & le sang leur ont don-
 né. Que si la Serenissime Infante a esté esmeuë
 de compassion en voyant souffrir vne Princesse
 qui est sa parente, elle a tesmoigné son bon na-
 turel, qui a tousiours esté d'aimer les siens, & de
 les assister en leurs afflictions. Vous en auez vn
 desplaisir, parce que vous desiriez que la Roynie
 Mere du Roy fust abandonnée à vostre rage, &
 que sa Naissance & son innocence ne trouua-
 sent point de couuert, *iniques à ce que l'inju-* *Donee*
stice soit passée, & que la violence aye fait sa *transact*
poincte. *iniquitas.*
Psal. 56.

Vous tournez tout court, & vous vous ruez
 sur les Parlemens, entre autres sur celuy de Pa-
 ris: vous croyez, que s'il n'est pas allé si viste
 que vous auez desiré, il n'a pas esté retenu par
 la belle Astrée, mais par la belle Paulette. Vous
 faites tort à cette Auguste Compagnie, de la
 faire conduire plustost par la fille d'un Parti-
 san, que par la fille de Dieu. A la verité vous
 luy oltez vn grand honneur: mais vous en don-
 nez tant à celuy qui employe vostre plume, que
 vous n'en laissez point, ny au general, ny au
 particulier. Prenez garde à vous: le priuilege
 de vostre robe ne vous exempte pas de la iurisdic-
 tion des Parlemens: ils vous pourroient vn iour
 faire gloser vostre escrit, comme Monsieur de
 Lorraine a voulu depuis peu faire interpreter
 les memoires remplis d'impostures, que vous
 auiez donné à deux de vos freres, pour descrire
 dans les Estats la Roynie Mere du Roy. Sans

l'entremise d'un de ses bons seruiteurs on eust ferré les pources, & apres le col à ces porteurs de calomnies, & on eust veu lequel des deux eust mieux fait la mouë au bois. Vous ramassez grand nombre de defenses faites aux Parlemens de se mesler des affaires d'Estat : nous ne doutons pas de la puillance que les Roys ont sur leurs Officiers. Ceux qui les peuuent establir, interdire & destituer, peuuent à plus forte raison borner leur auctorité : mais vous qui estes si scauant en l'Escripture saincte, scauez bien qui est celuy qui a dit ; *Tout m'est loisible, mais tout ne m'est pas expedient*. Taschez de faire trouuer bon tout ce que le Roy veut, non tout ce qu'il peut. Nos Roys n'ont pas pris la regle des Parlemens ; mais la leur ont donnée pour temperer en quelque façon le pouuoir absolu de leur Monarchie ; ils ont apprehendé qu'elle ne se rendist odieuse aux peuples ; comme elle le deuient insensiblement lors qu'on vse de la plaine puillance, & qu'on ne fait les choses que par auctorité. Vous seruez tres-mal vostre Maistre, en ne luy preschant que cela : vous choquez son inclination qui est portée à la iustice, & jetez dans l'esprit de ses subjects vne mauuaise impression de son gouuernement. Sa Majesté ne vous en scaura point de gré ; la terre vous maudira, & le Ciel vous punira.

Pag. 44.
& 45.

1. Cor. 6.

Pag. 51.

Vous reuenez à Monsieur, & vous comparez ses seruiteurs avec des empoisonneurs, sorciers, & fondeurs de statues de cire, la Mole, Coconas, Tourtay. A quoy portez-vous les affaires ? voulez-vous obliger le Roy à perdre son Frere ; comme il deuroit

faire, s'il croyoit ce que vous dites, & s'il n'estoit plus sage, & plus iuste que vous? Les trois scelerats que vous nommez, n'ont iamais esté employez par le feu Duc d'Alençon: & il n'y a personne dans la maison de Monsieur qui les voulust imiter, il les feroit brusler, s'il les auoit descouverts; & vous seriez traistres au Roy, si vous ne les auiez declarez: comme vous estes des meschans, de donner ces soupçons sans auoir aucune preuue. Si vous ne fuyez de dire quelque chose à l'aduantage des Meres des Roys, vous eussiez peut-estre adjousté à ces histoires scandaleuses, que la Royne Catherine fit faire le procez à Coconas, la Mole & Tourtay.

*Du depuis
le Cardinal
de Riche-
lien s'est
allié avec
ceux qu'il
accusoit de
ce crime.*

Vous donnez le change pour l'affaire de Chalais. Monsieur *n'accuse point sa condamnation d'in-* *Pag. 52.*
justice, (comme vous dites) mais descouure les *& 53.*
tours de souplesse qu'on a fait pour le porter à declarer plus qu'il ne sçauoit, & enueloper dans ses depositions beaucoup de gens de bien par la promesse de l'impunité. Il n'eit pas vray, que les Ducs de Bellegarde & de Reths ayent signé aucun tesmoignage contre luy; non plus que le Commandeur de Valencé, qui n'a iamais veu l'accusé dans la prison avec Mr le Cardinal. Son Eminence sçait bien trouuer les artifices, pour tascher de donner quelque part dans ses fautes aux braues hommes, & leur oster celle qu'ils doiuent auoir aux bonnes actions. Vous pensez auoir prouué, que Louuigny estoit homme de bien, parce qu'il estoit de bonne maison; comme s'il n'y auoit point de fausse monnoye d'or, aussi bien que d'argent: ce que

vous dites ne couure point son peché, mais le fait paroistre dauantage.

La rage du Sr des Montagnes entre dans le cercueil de feu Monsieur le grand Prieur, luy cassé les os, & fait voir, que ceux qui l'ont emprisonné, ne se contentent pas de luy auoir osté la vie, mais luy veulent encore raurir l'honneur. Ils sçauent bien, que ce Prince de bon & genereux esprit a mieux aimé mourir captif, en defendant son innocence, que de viure en liberté, en confessant vn crime qu'il n'auoit point commis. Vous alleguez Madame d'Elbeuf, pour la rendre odieuse, apres l'auoir bannie: vos parties ne peuuent estre vos tesmoins, & vous ne sçauriez auoir pour vous, ceux qui sont contre vous.

Pag. 54. Vous prenez la deposition du Nau, pour celle d'un homme sage: apres l'auoir corrompu par argent, & fait parler de gayeté de cœur contre son Maistre, vous voulez que cet homme de trois lettres luy face tout seul le procez, que vous n'avez iamais peu commencer. Vous avez voulu forcer ce Prince de prendre vne abolition, pour couvrir vostre injustice, & le tenir prisonnier apres la confession d'un peché qu'il n'auoit point fait. N'ayant peu tirer de luy vostre descharge, vous avez aduancé sa mort, & avez esté tres-contens qu'elle vous aye gueri de l'apprehension des iustes ressentimens de celuy, auquel vous auiez manqué de parole pour la charge d'Admiral.

Pag. 56. Pour le Colonel, qui est encore vne des victimes de vostre vangeance, vous dites, *qu'il a*

esté conuaincu de plusieurs mauvais conseils. Mais comment peut-on, si ce n'est en vostre Pays, & à vostre mode, conuaincre vn homme, qui n'a pas esté accusé, contre lequel on n'a pas ouy des tēmoins, qui n'ont esté ny recolez, ny confrontez? On n'a fait aucune procedure; mais on l'a laissé pourrir en prison, pour ne rien dire dauantage.

Vous dites, que Mr le Cardinal n'a point perdu Mr le Cardinal de Berule; parce qu'il luy auoit procuré le bonnet rouge, & beaucoup de bien. Mon bon ami, nous sommes en vn temps, auquel non seulement celuy qui fait, défait, mais celuy qui a esté fait, défait celuy ou celle qui l'a fait. C'est vne chose bien plus estrange, qu'un seruiteur perde sa Maistresse & Bien-taëtrice, qu'un Cardinal son compagnon, & son obligé. Si l'ingratitude prend occasion d'imposer vn crime sur vn bien-tait receu, à plus forte raison la vengeance trouuera sujet de fonder la ruine d'un homme sur vn bon office rendu: & ie vous peux dire avec verité, que c'est la mode de Mr le Cardinal.

Mais afin qu'il n'y aye pas vn de ceux que son Eminence a fait mourir en prison, qui ne perde par son moyen l'honneur avec la vie; vous n'avez pas voulu oublier Fancan, que vous faites passer pour vn insensé, & compagnon de Cormeil. Mr le Cardinal a tiré de luy toutes les instructions des affaires estrangeres: il s'en est serui dans des negotiations tres importantes en Allemagne, & au Pays bas: il luy a fait dresser durant deux ans toutes les dépesches, memoires, & instructions de grande consequence: il a eu

Pag. 57.

Pag. 58.

tous les iours des conferences de deux & trois heures avec cet homme fort sensé, & grandement desinteressé. Vous qui escriuez, & qui rongez ses os, auez pourluiu sa ruine, apres auoir tasché de le faire assassiner: contentez-vous que les voistres qui le gardoient, & desquels sa vie dépendoit, ont eu son Abbaye; & qu'elle a esté demādée deuât qu'il fust attaqué par la maladie de laquelle il mourut. Cela est d'un tres-mauuais exēple, & de consequence tres-dangereuse.

Pag. 59.

Si la Royne Catherine a interrogé le Duc d'Alençon, la Royne Mere du Roy n'a pas interrogé Monsieur; parce qu'il n'a iamais esté criminel. Vous l'effarouchez, lors que vous parlez de la prison; & encore plus, lors que vous proposez à S. M. l'exemple d'un Roy qui a, comme vous dites, fait mourir son Fils. La vie d'un enfant despend plus absolument d'un pere, que ne fait celle d'un frere de son frere. Vous auez grand tort de mettre dans l'esprit du Roy, qu'il puisse auoir sujet de faire sans forme de Iustice, ce qui a esté fait (s'il a esté fait) par des considerations que la prudence paternelle a caché, & que nous deuous presumer auoir esté tres grandes, puis qu'elles furent plus fortes que le sang d'un Prince tres-sage.

Pag. 60.

Après ces discours vous deuenez furieux, & nous dites toutes les injures qui sont dans l'Epistre de S. Iude, contre les heretiques. Vous dites, *que vous sentez que la passion de Balac payen, & ennemi des enfans de Dieu, vous saisit.* A la verité, vous vous comparez à un honneste homme, & nous faites beaucoup d'honneur de dire, que

nous sommes les Israélites. Mais vous nous faites peur, lors que la tranchée de S. Mathurin vous prend : nous chercherions vne corde pour vous lier, si nous n'en trouuions vne sur vous, qui pourroit faire l'office. Nous fuyrions deuant vous, si vous portiez cette echarpe blanche, que vous auiez mis autour de vostre capuchon, pour en faire vn turban à l'attaque des barricades de Suze ; ou si vous estiez comme à Priuas, monté sur ce beau cheual entier de l'escuyrie de Mr le Cardinal. Vous vous souuenez bien, comme cette mauuaise beste, qui sentoit que vous n'estiez pas trop bon caualier, & n'auiez que des gamaches & vn esperon, ayant rencontré vne iument, luy sauta sur la croupe. Apres ce facheux rencontre, vous fistes serment à Dieu, que vous ne monteriez plus sur cet impudent & luxurieux cheual ; auquel depuis ce temps le nom d'impudent est demeuré : dequoy Mr le Cardinal, & vostre bon ami Mulot, ont fait des belles risées. Voyla les hazards que vous avez couru en guerre, & les exploits que vous y avez fait ; qui ne sont pas meilleurs que ceux que vous faites avec la plume.

Vous dites, que vous avez pitié de nos dis- Pag. 61.
cours, & cependant nous appelez demons ; c'est vn signe, que vous nous prenez pour des bons demons : car vous n'auriez point de compassion des meschans ; vous les chasseriez avec la croix & l'eau beniste : mais i'ay peur que cette-cy vous manque, apres en auoir donné abondamment à Mr le Cardinal, par vne digression que vous faites sur ses loüanges, & principalement sur ses

Pag. 36.
Sueton. in
Vita Cali-
gulæ c. 46.

belles victoires, & triomphes de guerre, qui ont esté inuisibles, n'ayant iamais gaigné bataille, ny fait combat, ny emporté ville d'assaut, ny par siege, que Pignerol, qu'il prist sans resistance. Mais nous esperons, qu'ayant tous les Ports de Bretagne, il triomphera, comme fit Caligula, des huïstres & coquilles de cette mer.

Pag. 64.
* Le Pre-
sident de
Verdun.

Vous nous renuoyez brusquement, & sans suite, à Messieurs du Parlement; desquels vous ne faites estat, que lors que vous croyez qu'ils sont de vostre costé; autrement vous les méprisez, & basoüez comme vn homme qui a perdu son procez. Vous dites, *que nous apprendrons d'eux à parler des puissances superieures.* Vous apportez l'auctorité d'un* homme, qui auoit trop de memoire, pour auoir beaucoup de iugement. qui n'a point trouué de preuue, dans le procez de la Mareschale d'Ancre, de ce qu'il auança; & qui fut non seulement son iuge, mais sollicitateur contre elle.

Pag. 65.

Vous trouuez mauuais, qu'on aye representé au Roy la misere de son peuple: on en a caché beaucoup plus qu'on n'en a dit. Si vous estiez Prouincial de vostre Ordre, comme vous auez esté autrefois, vous apprendriez en faisant vostre visite, par le recit de vos Freres, que l'extreme pauvreté des villes, & de la campagne, se fait sentir dans vos Couuents. Si vous n'estiez traité comme premier Conseiller du premier Ministre de l'Estat, vous auriez plus de pitié de ventres vuides, ou remplis de pain d'auoine, de cheneuis, de fougere, de mar de noix, d'herbes des prais, & des racines des montagnes, des

quelles vous estes Seigneur. Pour monst^{er} que les plaintes, que nous faisons à vn Roy Sage, sont mal fondées; vous alleguez l'exemple de celles, qui ont esté faites à Charles V I. lors qu'il auoit perdu l'esprit, & estoit en tutele. Pensez mieux vne autrefois à ce que vous escriuez. Je m'estonne, comme en parlant des maux que le peuple souffroit du temps de Charles V I. vous ne vous souuenez que le Cardinal d'Amiens est accusé d'en estre la cause: les Historiens disent, qu'il s'enfuit en Flandres, & de là emporta en Auignon les tresors qu'il auoit pillé en France. Voyez Gaguin.

La colere & la precipitation vont ensemble, Pag. 66. quand vous descouurez vn escrit fait contre celuy qui vous entretient vn carrosse, & vn chariot à la campagne; qui vous traite bien par tout, & qui vous a fait dispenser de l'obeissance que vous deuez à vos Superieurs. Vous ne tachez que de respondre promptement, pour tesmoigner vostre zele & prompt esprit; non sagement, pour faire paroistre vostre bon iugement, ny veritablement, pour monst^{er} que vous auez bonne conscience. Vous dites, *que les guerres sont les seules causes de l'affliction du peuple.* Donc celuy là est à bon droit en execration, qui les a recherchées & entretenues; qui par ses querelles particulieres a irrité les estrangers, a voulu accabler les alliez, & perdre les enfans de la maison. Vous dites, *qu'il a esté bon mesnager, en esparnant au Roy l'entretien des garnisons dans les places inutiles, qu'il a fait raser.* Parmi celles-là nous remarquons la citadele de Xaintes, qui luy

nuisoit : & nous n'en voyons point des siennes ; ny de celles de ses amis ; encore que Saumur, Chinon , & Angers soient au milieu du Royaume, & des nids de petits tyranneaux. La construction de la citadele du Haure , qui ne sert ny pour la mer , ny pour l'emboucheure de la riuere de Seine , a plus consommé de deniers , que les mortes payes de quelques petits chasteaux, desmolis par vengeance & enuie ; ne pouuoient couster de deux cens ans : l'entretien des garnisons , & la garde des tresors de Mr le Cardinal, sont plus à charge à l'Estat , que tous les gens de guerre qui peuvent seruir à sa conseruation. Voylà ses beaux mesnages que chacun sçait ; voit, & sent.

Pag. 69.
70. & 71.

Vous ne pouuez quitter les loüanges de vostre bon Seigneur & ami, vous y rentrez aussi tost : *vous l'exaltez de sa candeur & sincerité* : vous ne pouuez pas mieux rencontrer entre toutes ses vertus : vous en auez choisi deux bien reconnus ; & auez trouué le moyen de faire estimer faux prophete le Pape , qui auoit predict, que Mr le Cardinal seroit vn grand fourbe. Vous dementez la croyance vniuerselle ; & ne faites pas plaisir à celuy , qui aime mieux passer pour vn finet & deslié, que pour vn homme simple, & peu dissimulé.

Pag. 72.

Vous tâchez de monstrez , *que sans mauvais dessein, ny imprudence* on a publié cette belle genealogie, qui le fait descendre de Louys le Gros. Vous dites, *qu'il y a des maisons plus riches, & plus pauvres dans le Royaume, qui se peuvent vanter d'acquiescer le mesme auantage.* Nous demeurons d'accord ;

que des plus pauvres l'ont ; mais des plus riches ; non. Ainsi vous ne pouvez jamais dire verité qu'à demi : mais au lieu des plus riches, vous avez voulu dire de plus nobles. Nous avons raison de blasmer de vanité celuy, qui en son credit, & parmi les soupçons qu'il donne, a tant fait crier dans Paris cette genealogie, que les sains & les malades en ont esté importunez & tourmentez. Son imprudence a ietté les curieux dans la recherche des titres de la maison du Pleffis : ce qui n'a pas esté fort avantageux, parce qu'on a trouué vne plume qui a arresté celle de beaucoup de flatteurs, & entr'autres la vostre.

Vous dites, qu'il faudroit accuser ce fidele Ministre d'avoir employé sa puissance, pour faire venir les estrangers en France. A la verité, sa puissance n'a pas fait ce mal : mais son imprudence, sa vengeance, sa vanité, & ses querelles particulieres.

Pag. 73.

Il n'a pas rendu aux ennemis les places consignees à sa foy (ce sont vos termes ;) il ne le fera pastant qu'il sera en credit : mais il est fort dangereux qu'il ne prenne ce chemin, lors que la iustice du Maistre voudra regler le trop grand pouvoir de son seruiteur ; il sera ingrat enuers luy, comme il a esté enuers sa Maistresse.

Ceux qui acquierent, ne vendent pas. Il faut avoir adjousté aux Gouvernemens qu'on possède ceux qu'on tient en marché, & recevoir quelque desplaisir. On verra apres cela, si le desir de se conserver à quel prix que ce soit, l'ingratitude, la vengeance, & la peur seront aussi fideles ; comme la prosperité, l'autorité, l'ambition,

& le dessein de posseder toutes choses , font semblant de l'estre. On fera bonne mine, iusques à ce que tout le Royaume qu'on acquiert piece à piece, trouue vn marchand qui l'achete en gros, ou qui le partage avec celui, qui n'est pas capable de le garder tout entier.

Vous comparez à l'innocence de IESVS-CHRIST celle de Mr le Cardinal, & nous aux Iuifs, qui l'accusoiert de se vouloir faire Roy. Si le Sauueur du monde; qui n'auoit point de retraite, eust esté Gouverneur de trente places dans la Palestine, ou dans l'Asie; s'il eust entretenu pour leur garde dix mille hommes de pied; & pour la sienne plus de caualerie & de suite que le Roy; s'il eust eu trois cens mille escus de rente, ou d'apointement, sans le tour du baston, s'il eust caché dans ses tresors vingt millions de liures, sans les bagues & meubles precieux; & si au lieu de faire des miracles bien-faisans, de resusciter les morts, faire marcher droit les boiteux, & voir les aueugles, il eust fait mourir les viuans, fait estropier les adroits, & emprisonner les libres, sur tout la Mere de Cesar: les Iuifs eussent eu sujet d'en donner vne grande defiance à l'Empereur: iamais Pilate ne se fust laué les main deuant que de le condamner à mort, & nous ne croirions pas qu'il eust esté le vray Messie.

Selon vostre aduis, les memes choses qu'on escriit contre Mr le Cardinal, ont esté dites contre la maison de Guise, Monsieur d'Espernon, & le Marechal d'Ancre. Il n'est pas question de rapporter ce qui a esté dit, mais d'examiner les raisons sur lesquelles on appuye les discours. Les faux tes-
moins

moins parlent comme les veritables. Il ne faut pas dire, qu'il n'y a point de crimes, parce qu'il y a eudés calomnies. Il n'y a rien qui ressemble plus à vne femme sage, qu'une desbauchée; ny à vn enfant legitime, qu'un bastard. Nous n'examinons pas ce qui a esté dit au temps passé, mais ce qui se fait à present. Comme il est sans exemple, vous vous tourmentez en vain dans la recherche de ceux de la ligue. Tout ce que vous en pouuez tirer, quand on demeureroit d'accord de leur verité, est, que vous n'avez pas esté les premiers accusez: mais nous soustenons, que vous estes les premiers conuaincus.

Il semble que vous ne recognoissiez qu'une beste en l'Apocalypse: encore qu'il y en aye qui vous representent; & d'autres, celui que vous soustenez. Vous pouuez estre comparé à vne saute-relle du puits de l'abyssme, & luy au dragon roux, ou rouge, qui veut deuorer la femme, & son enfant: mais Dieu donne des ailes à la Mere: elle s'enfuit, de peur d'estre noyée dans les eaux, qui sortent de la gueule du dragon, & la terre l'aide. Nous esperons que le Ciel nous donnera ce bon secours, & que la terre s'ouurira de sept pieds, pour engloutir le monstre qui nous poursuit.

Les vers de Ronfard que vous employez, sont plus propres pour descrire vos defenses, que nos plaintes. Nous n'auons rien mis dans nostre lettre, qui ne soit tiré des Aucteur sacrez & profanes, anciens & modernes, & sur tout de l'Escripture sainte; que vous deschirez sans respect, pour en faire vn manteau de cent couleurs,

& d'autant d'estoffes, avec tous vos ramas d'allégations fausses, & hors de propos. Nostre vérité, toute simple & naïfue, ne s'est point servie de tous ces recueils pedantesques & puerils; elle n'a rien cité que les histoires, que vous avez fait depuis quelques années: elle a creu, que son innocence estoit assez belle sans atours & sans fard, & vostre malice assez noire sans encre, & sans charbon.

Vous alleguez la puissance absoluë du Roy: à cela nous n'auons rien à dire, si la volonté sert de raison: mais nous sçauons bien, que vous ne serez pas aduoüez par LOUIS LE IUSTE, qui porte avec le Sceptre la main de Iustice; à laquelle nous nous adressons. Ne luy faites pas ce tort, & à nous, de la luy arracher: nous aimons mieux qu'elle nous chastie, si nous sommes calomnieux, que si elle estoit perduë pour l'appuy des innocens. Vous tesmoignez bien que vous la craignez, lors que vous la voulez rompre; & soustenez, que tout ce qu'on veut est equitable, parce qu'on le peut: cependant vous seriez bien marri, qu'on vous fit foïetter par cette regle; & diriez bien-tost, que c'est vne tyrannie. Icy

Pag. 81. vous dites *que nous sommes les fabuleuses harpiës*; & nous asseurons que vous estes les veritables.

Pag. 83. Vous portez parole de la part de M^rle Cardinal; & dites, que vous estes fondé en bon pouuoir & procuration, pour asseurer, *qu'il est prest de remettre à S. M. tout ce qu'elle luy a confié de places, & de charges.* A cela ie ne vois qu'un danger: c'est que les gens de vostre condition

sont des fort mauuaises cautions, sont grandement sujets à defaueu, & n'ont pas dequoy payer que de leur peau, qui n'est bonne à rien. C'est assez que vous nous ayez tesmoigné par ce discours, que vous estes dans la parfaite confiance; & par consequent, non seulement suspect en la defense que vous entreprenez, mais del'couuert: non pas tant par vostre mauuais stile, & passages mal employez de la sainte Esriture, que par la familiarité que vous confessiez. A la verité, puis que vous voyez son Eminence Ducale en cette bonne disposition & belle humeur, vous qui croyez estre Theologien, & fort sçauant dans le liure de Dieu, luy deuriez proposer l'exemple de Ionas, qui dist aux Matelots: *Si ie Ion. 1.*
suis cause de la tempeste, iettez moy dans la mer. Ou
 si vous en voulez vn plus doux, celui de Iacob, *Gen. 31.*
 lequel apres s'estre enrichi dans la maison de son beau-pere, & voyant que les freres de ses femmes commençoient à murmurer contre luy, il leur dist, qu'il estoit plus à propos qu'il se retirast, que de fournir vn sujet d'enuie & de discorde. Saint Ambroise dit, *que l'homme de bien D. Ambr.*
doit faire retraite, lors qu'il voit que sa desunion entre l. 2. c. 5.
les proches arrive pour son sujet. Vous sçauiez bien *de Iacob &*
 que nos Casuistes enseignent, que pour deliurer *uita beata:*
 vne ville d'vn siege, l'innocent qui sera deman- *Melius est*
 dé par les ennemis, se doit liurer soy-même, pour *sine lite*
 garantir vn grand nombre de peuple de la *abire. quâ*
 mort, & de la ruine. Ceux de Calais le firent *resistere*
 ainsi. Le Fils de Dieu s'est volontairement ex- *cum iug-*
 posé à la mort de la Croix pour le salut du monde. Vous auriez plus de merite de faire ces *gio.*

exhortations à celuy que vous voulez cautionner, qu'à composer des liures, qui vous desorientent, & luy aussi.

Vous avez creu, que vous pourriez estre caution suffisante de Mr le Cardinal, depuis que vous estes deuenu Ministre secret, comme il est Ministre public: & que vous avez eu quatre Secretaires de vostre robe, ausquels vous avez distribué par départemens tout ce qui vous est renuoyé. Le premier, à Rome & l'Italie, sur tout Mantouë; le second, à la France, le troisieme, à l'Espagne, & les Princes Catholiques; & le quatrieme, qui est le plus employé, à les dépesches pour l'aduancement des Protestans d'Allemagne, des Hollandois, & de ceux de la Religion pretenduë reformée de France. Tout ce qui regarde le progrez de ces gens-là, est à vostre disposition, ne s'ordonnant rien pour leur auantage que par vostre rapport. Il n'y a point de lettres, memoires, ny d'instructions, pour ce qui regarde leurs affaires, qui ne soient expedies par vos ordres, que le Secretaire d'Estat, qui vous est affidé, reçoit, & met la signature du Roy, & la sienne, là où l'on iuge que la vostre n'est pas suffisante. Quel monstre est cecy? que des personnes qui ont baillé vn si rude coup de pied au monde, que les pieds leur en seignent bien souuent, se fourrent si auant dans le monde, qu'ils ayent dressé vn Royaume dans vn Couuent? qu'on dispose de la vie, de la liberté, & des biens des hommes, en vne Maison de simplicité, & pauvreté? qu'on donne les premiers mouuemens aux armes de France, d'Italie, d'Al-

lemagne , & des Pays bas , dans les logis de la paix : & que dans vn port , où tant de gens de bien se sont retirez pour fuyr les tempestes , on soufleue tous les orages de la terre & de la mer ? Vn nommé Busulaire de l'Ordre des Hermites de saint Augustin , fut enfermé dans vne cage de fer à Versel , par le commandement du General de l'Ordre , pour auoir voulu soustraire la ville de Pauie de l'obeyssance du Marquis de Montferrat , & la faire tomber entre les mains des Visconti. La sentence du saint Personnage qui condamna son Religieux à vne si rude penitence , ne portoit autre chose , que ces belles paroles de saint Paul : *Personne ne combat sous l'en-* 2. Tim. 2.
seigne de I E S V S- C H R I S T , qui s'embroïlle dans les affaires du siecle. Il n'est pas de merueille , si ayant intention de faire ce que vous faites , vous l'auiez commencé par la dispense d'obeir à vostre General , qui souspire tous les iours avec vn grand nombre de gens de bien , qui sont dans vostre Religion , de voir l'abomination de desolation plantée dans les lieux saints. Nous protestons , que ce discours ne veut point combattre les raisons d'Estat , que S. M. peut auoir pour le secours de ses alliez : mais nous soustien-
drons iusques à la mort , que les moyens qu'on prend , ne doiuent point passer par les mains & par les plumes des Religieux , qui se disent des plus reformez , & qui ont beaucoup de Confre-
res , qui le sont par effect. L'honneur que nous leur portons , nous fait apprehender , que ce grand corps fort vtile à l'Eglise de Dieu , ne perde par les crimes d'vn homme , & de ceux

qu'il a desbauchez, vne partie de la bonne reputation qu'il auoit acquis: mais les fautes sont personnelles.

Pag. 84.
85. 86.
&c.

Après vous estre présenté pour estre caution d'un riche Cardinal, encore que vous ne soyez qu'un pauvre Moyne, vous faites paroistre que vostre zele, ou peut-estre quelque bon vin que vous aimiez, vous a tellement eschauffé, que vous chocquez teste baillée la cognoissance publique, en escriuant des choses contre la vostre: il ne faut que repeter vostre discours pour le refuter; pour vous rendre plus digne de compassion, que de colere, & declarer indigne d'indignation. Vous dites, *que dir le Cardinal n'a autre chose que la charge de la mer, à moindres conditions que les Admiraux du temps passé; & qu'il la possede avec titre onereux, sans gages, & avec moins de places que n'auoit l'Admiral de Ioyeuse.* Vous mettez dans vostre liure pour le rendre plus espais, & faire plaisir au Libraire, les lettres de prouision que le Roy Henry III. donna à Monsieur de Ioyeuse, par lesquelles il paroist, que les Gouvernemens du Havre & de Diepe furent joincts à l'Admirauté. Par vostre foy, croyez-vous, ie ne dis pas auoir trouué des raisons & des exemples pour conuaincre les sages & les sçauans, mais des amusemens pour les fols, & pour les petits enfans? Ie crois que vous seriez plus propre à faire des jolietz pour les vendre aux portes des Eglises le iour de la feste de Parroisse, que pour dresser des Apologies. Vous dites, que celuy qui sans Estat signé du Roy, & sans rendre compte, employe à la marine le tiers du reuenu

de la France , & qui a fait son Peru de l'Admirauté , engage pour la faire valoir les biens de la succession de son pere ; qu'il a moins de places qu'en avoit Monsieur de Loyeuse , qui estoit Gouverneur du petit chasteau de Diepe , & de la chetive tour du Havre. Tout cela ne valoit pas la moitié d'un bastion de la citadele , qui a plus cousté (sans pouvoir jamais servir qu'à la retraite d'un criminel de leze-Majesté , & à la garde de ses tresors) que toute la maison de Loyeuse n'a receu de bien-faits du Roy Henry III. Mais que sera-ce , lors qu'on adjousterà à cette place toutes celles que vous avez dans les costes & embouchures des rivières de Normandie , Bretagne , Pays d'Aunis , Xaintonge , & Guienne : si on vous fait un denombrement des villes , citadelles , forts , ports , isles & rades que vous avez fortifié ? Outre le Gouvernement & Lieutenance pour le Roy en Bretagne , qui est la Prouince la plus forte en havres & gens de marine , vous avez sur la mer Oceane le Havre , Brest , Morbien , Marans , la Rochelle , Broüage , Calais , les Isles de Rhé , d'Oleron , de la Tremblade , d'Alleuvert , du Croisil : sans parler de Blaye , qui est à vostre deuotion , de Blauet , & de Nantes que vous marchandez. Vous gardez toutes les embouchures des rivières , avez sur les deux plus grandes le Pont de l'Arche , & Saumur , sur la terre ferme Angers , Verdun , Pontoise , Dijon , saint Jean de Laune , Bellegarde , & plusieurs autres que nostre memoire ne nous peut fournir. Dans la disposition absoluë de la France , vous avez à present celle de la Bretagne , de la Picardie , de la Champagne , &

de la Bourgongne. Nous y pouuons adjouster le Languedoc, que vous auez fait gouuerner, il y a vn an passé, par vn Maistre des Requestes; à l'auarice & furie duquel vous auez abandonné cette grande Prouince; & auez voulu perdre Monsieur de Montmorency, pour la faire tomber entre les mains du Marquis de Brezé.

Vous croyez, que M^r le Cardinal tient tout seul le registre de ses places, pour faire bien payer ses garnisons, & pour soulager sa memoire, qui ne se souuiendrait pas de ce grand nombre. Vous vous estes imaginé, parce que vous voyez les mains engourdies, & les langues attachées, que les esprits sont endormis, & les yeux fermez; pour ne cognoistre, & ne voir pas ce qui ne peut estre ny ignoré, ny caché.

Vous deuriez auoir quelque honte de publier, que le Roy Henry III. entretenoit dans chacune des deux places qu'il joignoit à l'Admirauté vne compagnie de gens de pied: c'est à dire, ou cinquante, ou soixante hommes; là où dans le Havre il y en a à present deux mille de garde, dans Broüage douze cens, dans Brest cinq cens, & ainsi à proportion dans les autres places: de sorte que le Roy soldoye à Monsieur le Cardinal vne grande armée, qui couste plus que celles qui sont en campagne mal payées: tous les plus clairs deniers sont employez à l'entretien de trente garnisons: il ne se faut pas estonner si la terre est pauvre, puis que la mer engloutit tout.

En suite de ce beau & iudicieux discours, vous faites deux comparaisons fort odieuses avec la maison de M^r le Cardinal de Richelieu: La

premiere de celle de Montmorency ; la seconde de celle de Guise ; & dites assez clairement , que ces deux familles ont rendu moins de services , & ont receu plus de recompenses. Que diroient les Claudes , Charles , & Henrys de Guise , les Annes & François de Montmorency , s'ils estoient en vie ? ne seroient-ils pas à l'exemple de nostre Seigneur vn foiet de corde , pour chasser ces vendeurs , & ces acheteurs hors du temple , dans lequel ils n'ont pas manié si souuent la croffe , & porté la chape , qu'eux ont à la campagne mis la main à l'espée , & endossé le harnois. Ils ont plus fait de combats , gagné de batailles , & forcé des villes , que ces modernes fripons n'ont trafiqué des places , & desrobé des millions ? Apres cela , ils preferent non seulement leurs exploits inuisibles , mais leurs maisons inconnues à celles d'un grand Prince , & du premier Seigneur de France ; ils tâchent de nous persuader , que le Commandeur de la Porte , le Marquis de Brezé , la Milleraye & le Pont de Corlet sont plus vaillans , que n'estoient les freres de la maison de Guise , ou les quatre enfans de ce grand Connestable , entre lesquels il combatit , & fut tué en la bataille de Sainct Denis. Mais vous dites , que vostre Generalissime n'a point esté prisonnier de guerre , comme celui là qui fut pris à la journée de Sainct Quintin. C'est que Mr le Generalissime ne s'est iamais trouué dans ces occasions. Mais il n'a pas esté racheté par la restitution de tout le Piedmont ; au contraire cettui-cy en a conquis une bonne partie. Par tout vous estes ou trompé , ou trompeur : le Piedmont ne fut pas restitué

par cette consideration, mais par celle du mariage ; encore retint-on cinq des principales places, entre autres Pignerol , qui est le pris immortel , & sans peril de vos conquêtes. Vous ne croyez pas , mais vous dites, qu'elles ont obscurci toutes celles des siècles passés ; & ont fait voir, sans coup frapper, que non seulement les Guisars , & les Monmorency n'ont esté que des argolets , mais qu'Alexandre , Scipion , & Cesar n'ont esté que des petits piôs, & des clerks d'armes.

Après la comparaïson des exploits , vous venez à celle des alliances , des biens , & des Gouvernemens ; & ne vous souvenez pas , qu'outre les extractions qui sont bien différentes, nonobstant la coste de Louys le Gros, ces maisons ont esté faites dans plusieurs siècles, que les biens y sont entrez par des grands mariages, que les charges ont esté acquises à coup d'espée, non par l'argent ; & ont esté achetées avec le sang de ceux qui les ont possédées, non avec celui du pauvre peuple. En fin ces gens là ont plus veu de canons pointez , des picques & des lances baissées , & d'espées tirées contre eux , que Mr le Cardinal , qui se fait seigner toutes les semaines , & bailler des clysteres tous les iours , n'a veu de lancettes de Chirurgien , & de siringues d'Apoticaire. Et après tout cela vous trouvez , que vous vous estes abusé en vostre calcul , & que ces deux maisons ensemble n'ont par eu tant de Gouvernemens que Mr le Cardinal en a tout seul. Il faut aussi considerer , que vous comparez toutes les branches des Guisars à vne personne, qui a plus de benefices & de charges

que tous ceux-là ; sans mettre en ligne de compte les offices de Garde des Seaux , de Surintendant des Finances, de Grand Maître de l'Artillerie , & de Secrétaire d'Etat , que Mr le Cardinal fait exercer par commission par ses creatures & esclaves , ayant vni à sa personne les charges de Conestable & d'Admiral.

Vous osterez aussi du role des Gouuernemens, que vous trouuez dans la maison de Guise, la Picardie, la Bourgongne, & la Guienne, & tantost l'Auuergne : ces deux-là comme desia confisquez ; le troisiéme comme n'estant tenu que par vn allié , & le quatriésme comme marchandé par Mr Deffiat. Il ne se peut faire, que cette maison estant grande en son origine, & establie il y a six vingts ans en France, n'aye fait plusieurs alliances, dans lesquelles on trouuera des charges, & des biens. Vous auez mauuaise grace de leur en faire reproche, & vous estes trop entreprenant de les vouloir raurir. Vous auriez desia emporté la Prouence, si on ne vous eust résisté ; & tous les Gouuernemens de Messieurs de Guise seroient reduits à celui de leurs maisons, si vous ne les logez dans celle du Roy, apres que vous les aurez despoüillez.

A vous ouyr parler, le Cardinal d'Amboise, Pag. 214
par les conseils & generosité duquel quasi toute l'Italie a esté assujettie aux François , n'a esté qu'un Grimelin ; parce qu'il ne fut iamais Generalissime, & n'a point esté peint armé avec un baston de commandement , donnant ordre aux attaques de Pignerol, qui n'ont point esté faites ; & au passage de la Douaire, qui vous fut

abandonné sans coup frapper. Tout ce en quoy nous pouuons comparer ces deux grands Cardinaux, est en la volonté de monter sur le thrône de S. Pierre, en faisant marchepied de vingt ou trente mille corps morts, qui eussent fait vne riuierede sang, pour noyer le peché originel de nostre nation. Mr le Cardinal de Richelieu vouloit acquerir sur elle cette obligation, & nous combler de cette benediction : mais ses Astrologues le tromperent en deux choses, en la facilité de la conquête de l'Italie, qu'il pretendoit d'auoir subjuguée dans le mois d'Octobre, & en la mort du Pape, qu'on luy auoit asseuré deuoir arriuer en ce temps là : mais par la grace de Dieu sa Saincteté se porta bien ; & le conquérant, qui n'auoit pris qu'une place par hazard, se trouua bien estonné à Lyon, dans la maladie qu'il auoit fait gagner au Roy. Au lieu de faire son entrée à Rome, il ne pensa qu'à enuoyer en Auignon ses bagues, sa vaisselle d'argent, & ce qu'il auoit profité en la guerre d'Italie ; parce qu'il estoit trop esloigné du Havre de grace, & encore plus de la Papauté, qu'il deuoit plustost trouuer dans le chasteau de Pierre Ancise, que dans le palais de S. Pierre de Rome.

Pag. 93. Mr des Montagnes, qui cherche des exemples par tous les Pays, & dans le temps passé & present, va en Angleterre, en Espagne, & en Allemagne ; pour compter avec ses doigts tous les bien-faits, que le Duc de Buckingham, le Comte Duc d'Olinares, & le Prince de Kemberg ont recen de leurs Maistres, sans auoir rendu (comme il dit) la centiesme partie des services que le Roy a receu de Mr de

Cardinal. C'est vne espece de reproche fait à S. M. & ensemble vn éguillon pour la pousser à faire plus de bien qu'elle n'a fait à ce pauvre homme, qui n'a point eu le soin de faire ses affaires, il n'a iamais pensé qu'à celles de son Maistre; au seruice duquel il a mangé tout le bien de sa maison, & celuy qu'il a emprunté de ses amis. A la verité, c'est vne grande honte au Roy, de s'estre laissé surmonter par l'Empereur, & les deux Roys ses Beaufreres; & de n'auoir rien fait encore pour celuy, qui ne sçauroit plus clairement tesmoigner son ingratitude, qu'en faisant publier, qu'il est plus mal traité que les fauoris des autres Princes; ayant esté plus sage, plus genereux, & plus vtile qu'eux.

GRAND ROY, cet homme, qui tient la moitié de vostre Royaume, la moitié de vos Finances, la moitié des grands benefices de France, ne peut estre plus ingrat, qu'en voulant persuader que vous l'estes, iusques à ce que vous luy ayez abandonné le reste, avec le titre de Souuerain, & le pouuoir de guerir des escroüelles, si la terre le donnoit, & si l'vsurpation l'acqueroit. C'est le propre de l'ambition d'estre mesconnoissante; elle ne considere pas d'où elle vient, mais où elle va; & n'estime rien ce qu'elle possède, au pris de ce qu'elle desire d'auoir, & croit auoir mérité. C'est ce qui a fait dire à nostre Escriuain, que si le Roy n'auoit donné des Pag. 101 grands biens à Mr le Cardinal, il auroit fait tort à sa reputation. Il veut monstrier que son Eminence a receu les bien-faits plustost de la iustice, que de la liberalité; & qu'il les doit à soy-mesmes, non

à la bonté de son Maistre: qui seroit tout à fait ingrat, s'il en auoit vsé autrement; & l'est encore à demi, de n'auoir pas resigné son Royaume, comme vn benefice à celuy qui l'a mérité tout entier.

Pag. 103. En suite de ce beau discours, pour monstrier l'ingratitude du Roy, & la pauureté de Mr le Cardinal, on nous dit (comme on feroit à des Mores) que nous voyons vn enfant de quatre ans, qui possède par bon-heur trois fois plus de benefices, que les seruices de Mr le Cardinal n'en ont acquis. Sans doute on s' imagine, que tous ceux qui liront ces discours seront des bestes, que personne ne considerera, que ce Prince qu'on nomme enfant, a recueilli par les bien-faits du Roy, & auantages que sa Naissance luy donne, les benefices de deux oncles Cardinaux: il en faut excepter trois ou quatre, entré autres vn des principaux, qui est l'Abbaye de Clugny. Mr le Cardinal par le moyen de quelques petits eschanges a tiré ce Chef d'Ordre de la Regle, pour le remettre en commande, & faire qu'un corps noir eust vn General rouge, en mesme temps qu'on a veu vn Prestre armé à la teste de vingt mille hommes. Pardonnez-moy, si ie vous dis, que vous estes malin, lors que vous vsez de ce mot *d'enfant*. Si c'est pour monstrier l'abus, vous blasmez non seulement le Roy, mais encore sa Sainteté. Si vous voulez par là faire cognoistre le peu de merite de celuy, que vous faites possesseur de tant de grands benefices, vous deuriez iuger, qu'on a mis en consideration celuy de ses Predecesseurs. Ils ont plus fait pour la Religion

Catholique que vous, qui vous vantez de la prise de la Rochelle, comme si le Roy avec toutes ses forces eust esté endormi durant tout le siege. Vous estes blasmé par les bons Catholiques d'avoir (estant Prestre, & assisté d'un Moine) beaucoup contribué, pour faire tomber entre les mains des Hollandois, non seulement Bolduc & Vezel, avec trois cens Paroisses voisines de ces deux places, mais d'avoir fait conquerir aux Protestans d'Allemagne trois ou quatre Prouinces, & plus de cent villes. Outre cela, vous avez tort de vouloir persuader, par ces mots *nos jours voyent vn enfant* de dixneuf ou vingt ans, qu'il n'en a que quatre ou cinq.

C'est vn Prelat tres-bien esleué, c'est desia vn bon Theologien; & qui rendra, si Dieu luy conserue la vie, des seruices plus fideles, & plus grands à l'Eglise, & à l'Estat, que ne sont les vostres. Vous estes aussi vn mocqueur, lors que vous dites avec dessein de reproche au Roy, & avec esprit d'enuie contre ce Prince, qu'il a trois fois plus de benefices que Mr le Cardinal : nous vous monstrierions, que celuy que vous nous descriuez comme vn pauvre Prestre, a beaucoup plus de reuenu en bien d'Eglise, que Monsieur de Rheims; si vos Abbayes n'estoient en si grand nombre, que l'estat en destal de leurs rentes meriteroit vn escrit aussi grand que vostre libelle. Contentez-vous de posseder les trois plus grandes sources des Priorez de France, Clugny, Marmoustier, & la Chazedieu; & que pour vous acquerir & corrompre beaucoup de personnes, vous auez plus de collations,

que tous les Officiers du Royaume n'ont de beu-
uètes. Ne vous plaignez pas de vostre petite
fortune, mais apprehendez qu'elle ne soit trop
grande. N'accusez point le Roy de mesconnois-
sance, mais defaites-vous de ce vice. Ne regar-
dez pas ce que les autres ont de bien, mais iugez
que vous en auez trop. Si vous croyez que vous
n'aurez rien iusques à ce que vous aurez tout;
vous auez trouué le moyen de ne jouir iamais de
ce que vous possédez, & de le perdre bien-tost.

L'ambition ne regarde que ce qui va deuant
elle: mais l'auarice tourne la teste, pour voir ce
qui la suit; & est autant enuieuse des mediocres
que des grandes richesses. Vous regardez d'un
mauuais œil celles d'un vieux Tresorier, qui a
trauailié cinquante ans, & de deux marchands
Ioualliers. Contentez-vous, que vostre bourse
s'est enflée de la recherche de celuy-là, apres
que vous auez fait chasser de la Cour, & empri-
sonner son gendre vostre bien-facteur. Vous
sçauiez aussi, que les deux Orfèvres ont plus gai-
gné aux presens, que la Royne Mere du Roy
vous a faits, & par les recognoissances que vous
auez tiré d'eux, qu'ils n'auoient fait dans le trafic
de plusieurs années: ne leur enuiez pas les profits
qu'ils ont fait, si vous ne voulez qu'ils vous re-
proches vos griuelées.

Vous croyez que vous serez innocent au temps
present, si vous pouuez faire paroistre, qu'au
temps passé la Royne Mere du Roy a esté coul-
pable: pour monstrier que vous estes espargnant,
vous paroissiez ingrat: vous mesnagez mal vo-
stre reputation, pour faire voir, que vous auez
bien

Pag. 104.

*Monsieur
de Beau-
marchais.**Roger &
des Iar-
dins.*

Pag. 105.

bien mesnagé les Finances du Roy. Vous dites, *que durant la Regence de la Royne on a veu les vraies profusions, & qu'on a dissipé douze ou quinze millions de liures.* Ceux qui firent ce reproche à la Royne Mere du Roy auoient eu la plus grande partie de l'argent, qui fut employé pour acheter leur fidelité, & la paix, & pour gagner par cette perte le temps, auquel le Roy peut faire valoir son auctorité. Cela acquist le repos au Royaume durant la minorité. On ne cria que lors, qu'il n'y eust plus rien pour faire taire les mescontens. Apres que les raisons d'or eurent manqué, on voulut faire valoir les pretextes du fer; & les demons ne se mirent en campagne pour troubler le Royaume, & esmouuoir les tempestes, qu'apres qu'ils n'eurent plus des tresors à garder dans la Bastille.

Vous n'avez pas bien considéré ce que vous dites *des promesses, qui furent trouuées dans les pochettes du feu Marechal d'Ancre.* S'il en estoit chargé (ce qu'on ne croit pas) Mr le Cardinal, comme Secretaire d'Estat, par son moyen, & son confident, auoit signé les acquits & les comptans. Pour blasmer la memoire d'un mort, il donne des memoires contre sa propre vie; & les mesmes pieces qu'il produit pour faire le procez à son bien-facteur, ne seruent pas seulement pour le faire declarer ingrat, mais pour le conuaincre d'infidelité en sa charge.

Pour monstrier que la Royne Mere du Roy Pag. 105;
n'a pas esté si bonne mesnagere que vous, vous & 106.
rapportez vne piece de la Remonstrance, que le
Parlement fit au Roy l'an 1615. par laquelle on

asseuroit, que dans quatre ans on auoit peu espargner vingt millions de liures. Il est vray que cela se pouuoit faire, si les considerations que ie vous ay alleguées, n'eussent fait ouurir la bourse pour fermer la porte à la guerre; & si les raisons de la prudence n'eussent esté plus fortes, que celles de l'espargne. Les Romains gardoient les tresors publics dans le temple de Saturne; pour monst^rer, que le temps & les occasions les deuoient employer. Il failloit durant le bas aage du Roy entretenir ceux qui pouuoient bien seruir, ou nuire dauantage; recompenser liberalement les fideles, & retenir fortement les infideles; ce qui ne se pouuoit faire sans despen^se. Si vous la trouuez extraordinaire de vingt millions, dans quatre ans de minorité du Roy; on trouuera bien plus estrange, qu'on aye volé autāt dans la guerre d'Italie en quatre mois, & le triple depuis que l'Argentier de Mr le Cardinal garde la bourse. Lors qu'on permettra aux Iuges de faire Iustice, on prouuera ce qu'on auance, & on fera voir par l'estimation de quatre bastimens, & de leurs ameublemens, que ceux qui les ont faits dresser & garnir, y ont consumé plus de trente millions, qui ne sont pas prouenus des rentes de leurs peres: ie ne dis rien de ce qu'ils ont caché & employé en acquisitions; & nous voulons croire, que leurs reuenus & les appointemens de leurs charges suffisoient pour les despen^ses excessiues de leurs maisons. Vous adjoustez l'Arrest de l'an 1615. par lequel il est dit, qu'on pourra repeter les dons immenses faits à gens de peu de merite. Nous voudrions que ce reglement fut gardé: les

Marquis de Brezé & de la Milleraye n'auroient pas assez de bien pour faire restitution, ce qu'ils ont reçu sans auoir rendu aucun seruice; vn infame bouffon, & vn grand nombre de valets qui ont presté leurs noms incognus, pour couvrir des friponneries, dans lesquelles ils ont eu quelque petite part, retourneroient à leurs premiers mestiers: les maistres d'hostels, les cuisiniers, les patissiers, & les officiers des maisons, qui ont fait festin à Mr le Cardinal, & à ses Commis dans les principales charges, rendroient ce que la friandise de Monsieur Desfiat leur a donné à prendre dans les coffres du Roy, apres qu'ils luy ont remply la panse.

Vous estimez aussi *l'ordonnance qui fut faite contre le luxe des meubles, sur tout de la vaisselle d'or & d'argent.* Où est-elle en plus grand nombre, & plus precieuse, que chez Mr le Cardinal? qui a vne chapelle de cent mille pistoles, vne autre de vingt mille escus volée à la Roynne d'Angleterre, vn buffet de deux cens mille liures, pour plus de cinquante mille escus d'autre argenterie, pour quatre ou cinq cens mille escus de bagues, & pour autant de meubles, achetez par ambition & par fantasie; entre lesquels il y a vn cabinet d'Allemagne de quarante mille liures. Peut-estre, que par cette regle du retranchement des meubles de grand pris, Mr le Cardinal a voulu qu'on fist l'inventaire de ceux de la Roynne Mere, qui sont à Luxembourg; encore qu'elle ne soit ny en effect, ny par declaration criminelle. Mais ce grand ami de Iustice a creu qu'elle auoit violé les loix somptuaires; que luy,

qui est par dessus la loy , merite d'auoir la confiscation. Il ne se veut pas contenter de ce qu'on luy a donné ; mais il s'imagine qu'il a droit de prendre tout ce qui se trouuera dans la source, en laquelle il a puisé tout ce qu'il a de plus riche & de plus beau , afin que tout cela serue pour releuer la Majesté de la Roynie Gilete , qui est sa niepce : elle s'est placée de plain saut dans le throne du petit Luxembourg , où elle commande à baguette , au lieu d'executer ce qu'elle a voué à Dieu : mais elle ne desire pas d'estre Carmelite (c'est à dire l'espouse de I E S V S-CHRIST) si elle peut estre femme d'un Prince du Sang ; & ne veut point quitter le monde tant qu'il luy sera fauorable , ny penser à aller au Ciel , que la terre ne l'aye chassée : elle fera bien de minuter sa retraite de bonne heure. Le Prince qu'elle recherche , est trop genereux pour la prendre en mariage ; & Dieu est assez misericordieux , pour la receuoir en Religion.

Nostre hermite des Montagnes se releue , & se plante sur la pointe d'un rocher , pour nous faire un sermon contre la mesdisance , apres auoir dit mille blasphemes ; & en voulant adjouster des plus execrables contre la Mere, l'Espouse, & le Frere d'un grand Roy , toutes personnes sacrées. Apres qu'il nous a appelez meschans, insensez, calomniateurs, pires que diables, il nous dit, *qu'on merite d'estre ietté dans le feu*, pour auoir dit à son Frere, *Tu es un fol*. Qu'il face cette remonstrance à son compagnon d'office, qui dans son discours touchant les libelles diffamatoires, donne le nom de Pierre du Puy à un

Pag. 107.
& 108.

Matth. 5.

des plus releuez Magistrats du Royaume : il luy fait present de la surintendance des petites maisons, & luy remplit le cerueau d'atomes & de visargent. Ayant ainsi qualifié le premier Officier de Monsieur, il dit, *que le Secrétaire de ses commandemens a derobé autrefois vn million.* Chacun sçait que sa reputation a esté deschargée par Arrest du Parlement de Paris, qui n'a rien trouvé de criminel dans sa vie, recherchée par les poursuites de ceux qui auoient le plus grand credit, & les premieres charges de la Cour.

Nous auons cet auantage sur nos ennemis, qu'ils se condamnent les vns les autres, & eux mesmes au feu, & à estre iettez dans la mer, avec *une meule de moulin pendue au col, pour auoir causé scandale.* Il ne peut estre plus grand, ny plus public, que d'auoir emprisonné, & voulu faire mourir la Mere de son Roy, sa Maistresse, & sa Bien-faëtrice, d'auoir tasché de la deshoner par declarations & escrits infames, & sur tout par ce libelle qui fait horreur à la nature. *Mau-* Luc. 19.
uais seruiteur, nous vous iugeons par vostre bouche : laquelle n'ayant pas assez de vertu pour confesser son crime, est forcée par la verité des'ordonner sa peine.

L'escriuain fait en passant vne apologie pour *soy*, & dit, *qu'il n'est pas vray, qu'il se soit serui des reuelations, pour acquerir plus de creance à ses inuen-* Pag. 110.
tions. Je prens à tesmoin Mr le grand Maistre, & tous les confreres de la Milice Chrestienne, qui ne dura que six mois, si ce bon Pere ne l'auoit point fondée sur vne reuelation, qu'il auoit eu à Rome (comme il disoit) & qui est

conuaincuë d'imposture par la prompte extinction de cet Ordre de Cheualerie, les œunres de Dieu estans de plus longue durée. On sçait bien que dans vos discours ordinaires vous dites, que Dieu par des lumieres interieures, vous fait cognoître, non seulement les intentions des personnes, mais les euenemens des affaires; & que vous auez souuent asseuré, apres auoir bien repeu, que Mr le Cardinal n'agissoit que par inspirations du Ciel. Ce beau courtisan desintéressé, & teste de souri, qui s'est meulé de ronger la lettre de la Royne Mere du Roy, pour s'intéresser dans vn Euesché, despoüiller son bon amy, & le neveu du Protecteur de son Ordre, vous deuoit aduertir, qu'en Turquie (que vous auez voulu conquerir avec cent Cheualiers, & sept vaisseaux, & où il a appris l'Arabe, qui sçait mieux que le François) on tient que les fols sont Prophetes, & il y passoit pour tel: mais en France on dit naïfement, que ceux qui se vantent d'estre Prophetes sont des fols. Il est bien vray que sur le poinct de l'emprisonnement de la Royne Mere du Roy, on produisit ces deux auteurs modernes, qui estoient comme ces faux Prophetes de la Palestine entousiasmez, & armez de cornes de fer, pour seduire les Roys de Iuda, & d'Israël. Le plus pieux de toute la terre, qui ne pouuoit consentir à ce scandale, fut persuadé par ces deux hommes, qui firent vne Theologie à leur mode, semblable à celle de Petit, qui voulut prouuer, que le meurtre du Duc d'Orleans auoit esté fait en conscience.

Sans faute vous estiez dans ces transports furieux, lors que vous auez *veu des Sybilles*, que

vous auez rangé leurs feüilllets de laurier, & y auez trouué ce qui n'y fut iamais escrit. Pour cōmencer de donner creance à vos blasphemés, vous iettez pour fondement, *qu'il n'y a que les Italiens, qui soient curieux de s'enquerir par voyes defendues, des choses qui doiuent arriuer.* Vous pouuiez vous abstenir de blasmer cette nation, de laquelle on tire les Souuerains Pasteurs de l'Eglise, & de laquelle le Roy est sorti de par sa Mere. Mais puis que vous la traitez si mal, & luy donnez le coup de mort d'as le cœur, il ne se faut pas estonner si vous deschirez son Pays. Elle, ses Enfans, ses Parens, ses alliez & ses seruiteurs doiuent demander Iustice & reparation au Roy, de l'injure que vous faites à sa Naissance, à son Mariage, & à son Sang, trois choses sacrées. La declaration faite au Parlemēt, & vos discours publics & particuliers ont assez interpreté vos enigmes, & par lesquels vous taschez de rendre abominable deuant Dieu, & deuant les hommes, la Mere, l'Espouse, & le Frere. Vous voulez fermer pour iamais le chemin au retour de la premiere personne: vous ouurez celuy du diuorce pour la secōde; & ne laissez à la troisieme, menacée de l'exclusion de Charles de Lorraine, que celuy du feu, du fer, & du desespoir: & tout cela fondé sur vne lettre que vostre malice a faullement fabriquée. Si l'imprudence extrême l'auoit tirée de la fragilité d'une femme, l'apprehension du scandale vous deuoit faire estouffer ce monstre en sa naissance, au lieu de le presenter au Roy, & le rendre le plus affreux que vous auez peu; pour donner à S. M. des terreurs paniques, qui sont capables de la faire mourir. Celles qui firent

perdre l'esprit à Charles V I. estoient moindres. Nous louions Dieu , qui a fortifié celuy du Roy , & a fait paroistre son cerueau si fort & si ferme , que toutes les secousses que vous luy donnez ne l'ont pas encore esbranlé. Cela nous fait croire aussi , qu'il recognoist vos fantosmes pour ombres & lutins d'enfer ; & sçait qu'il ne se peut faire, que le cœur d'une tres-bonne Mere, la pensée d'une Espouse tres-fidele , & les desseins d'un Frere tres-bien né , les ayent produits. Mais vous en avez engendré de si horribles contre toutes les loix de la nature , qu'on ne trouuera point estrange , que vous soyiez les peres de ceux-cy.

Celle qui est principalement attaquée , est tres-Chrestienne : elle sçait bien , que c'est une curiosité criminelle deuant Dieu, *de s'enquerir du salut de son Prince* : elle est Mere , & cette qualité luy fait desirer avec passion sa santé , & la vie de son Enfant ; si quelque horrible peché n'a estouffé en elle , non seulement les vertus Chrestiennes & morales ; mais les naturelles , qui sont les dernieres qui meurent en nous. Apres cette perte non seulement nous sommes au dessous des bestes , mais nous n'auons rien dans le monde , qui soit l'image de nostre malice. Monstrez ce vice qui a esteint la grace & la nature , & qui a fait de la plus grande Royne du monde , non la plus miserable (car cela ne vient que de vous) mais la plus meschante des meres , & la plus imprudente des femmes.

Pag. 113. Vous flattez en François la playe que vous avez faite en Latin à la reputation de la Royne

Regnante ; & apres auoir dit des choses que nous n'oserions auoir repeté, ny en nostre langue, ny en vne autre, vous baillez vn nouveau coup de rasoir sur la face de la Royne Mere du Roy, & ne couurez sa blesseure qu'avec vn crepe. Vous dites, pour respondre aux accusations qu'on fait de quelques sourdes cruantez de Mr le Cardinal de Richelieu, que Catherine de Medicis a esté accusée d'auoir fait empoisonner plusieurs personnes, entre autres Monsieur le Dauphin Frere aisné de Henry I I. trois de ses enfans, le Duc d'Anguien, & plusieurs autres par l'artifice de Cosme Roger. Vous citez trois Auteurs impies : les memoires de Charles I X. compilées par ceux qui firent battre des testons au Roy morueux; la vie de saint Nicaise faite par vn athée contre l'Abbé de Clugny ; & l'histoire d'Aubigni, brulée par main de bourreau. Voylà les plus serieux, & plus secrets entretiens que vous auez avec le Roy, pour luy rendre l'affection & fidelité de sa Mere, de sa Femme, & de son Frere suspects. Vous trauallez pour luy prouuer, que rien n'a esté fait par vne Royne Italienne, qui ne se puisse faire par vne autre ; ny attenté par vn Frere de Roy, que Monsieur ne vueille entreprendre : & ainsi sur des faux exemples vous donnez des faux soupçons ; & par vne finesse, ordinaire à tous les calomniateurs, apres auoir allegué des faicts execrables, vous dites entre vos dents, & en souffrants, *que vous ne les croyez pas*. En escriuant ces choses au long, & taschant de les prouuer, vous adjoustez laschement, *que ce sont impostures* : pourquoy les publiez-vous donc ? Mais pourquoy

*Cogitare
de secundis
nuptiis
superstite
marito, fa-
crum est.*

*C'est la
Loy citée
par le Sr
des Mon-
tagnes, &
qui n'est
que cōtre
les fem-
mes ma-
riées.*

*Pag. 115.
& 116.*

en soustenant vn Cardinal, n'espargnez-vous la reputation d'un autre? Vous ne croyez pas, que celuy de Richelieu puisse passer pour vertueux, si tous les autres n'ont esté vicieux; sur tout celuy de Lorraine, que vous appelez *pere putatif de l'Abbé de Clugny*; & dites, *qu'il a esté empoisonné par son fils*. Ainsi d'un mesme coup vous massacrez l'honneur d'un Prince, qui a possédé la qualité que vous avez à present en l'Eglise, & d'un Abbé, auquel vous avez succédé, & qui a augmenté de la moitié les reuenus de Clugny duquel vous jouïssiez. Contentez-vous d'estre ingrat enuers les viuans, & ne le soyez pas enuers les morts: n'adjoustez pas aux blasphemés contre les Roys & les Roynes, ceux que vous vomissez contre les Prelats: arrestez-vous après auoir deuoré ceux que vous tourmentez en ce monde, & n'entrez pas dans les tombeaux pour casser les os de ceux qui reposent en paix.

Pourquoy dans vn liure rempli de calomnies contre la Mere d'un Roy, & dressé pour la defense d'un Cardinal, rapportez-vous tous les escrits infames, qui ont esté faits contre vne Roynie, si ce n'est avec dessein d'en blasmer vne autre? Si Catherine auoit esté mauuaise Mere, (ce qui n'est pas) son peché ne rendroit pas Marie criminelle. Il nous sera plus aisé de trouuer des seruiteurs traistres à leurs Maistres, que des Meres sans amour enuers leurs enfans. Pour rendre au Roy la fidelité de Mr le Cardinal suspecte, il ne faut point feüilleter des liures; mais représenter comme il s'est comporté enuers sa Bien-faëtrice. Il n'y a point d'exemple plus fort

que celuy qu'on tire de nous-mesmes : nous n'ayons point de part aux crimes qui ont esté deuant nous ; ils ne seruent qu'à faire voir , que le monde n'a iamais esté sans meschans. Les siecles suiuaus iugeront du nostre , comme nous auons fait de ceux qui nous ont precedé : il n'y aura que cette difference , que dans tout ce qui est passé on ne trouuera point vne ingratitude , ny vne violence contre vne Roynie innocente , & vne bonne Maistresse, pareille à celle qu'on lira dans l'histoire de nos iours.

Vostre grossier & malin artifice poursuit son dessein plus viuement , & ramasse tout ce qui a esté dit de plus abominable contre la Mareschale d'Ancre ; pour ietter quelque goutte d'encre sur la face de la Roynie Mere du Roy. Rien de tout ce que vous dites ne fut prouué contre cette pauvre miserable , qui fut condamnée à mort pour d'autres considerations *que pour les pechez de magie , & d'empoisonnemens*. Le Parlement , que nous ne voulons pas blasmer, ne trouua point de preuue du premier, & ne vid point d'accusation du second. Il y a encore des Iuges viuans qui en pourront tesmoigner quelque chose. Vous adjoustez à cette imposture *les extraits du Manifeste des Princes de l'an 1617*. & prenez les salies de la colere pour des preuues de verité. On ne peut dire , qu'un homme soit empoisonneur, s'il n'a donné ou voulu donner du poison à quelqu'un : c'est vn tesmoignage de malice d'asseurer qu'il a cette meschante qualité, deuant qu'on aye monstré, quand , comment, & contre qui il s'en est serui. Ouurez-nous la porte de

Pag. 101.

la Tournelle de Paris, & vous verrez que nous sçauons mieux descouurer, & prouuer vn crime, que vous ne le sçauiez defendre & déguiser.

Pag. 120. Ce que vous dites de l'impieté de Montalto, & de Saint-Mabé, ne peut seruir à vostre dessein. Ces personnes n'ont iamais esté domestiques de la Royne Mere du Roy, ny employées par elle. Sa pieté a eu tousiours en horreur ceux qui estoient atteints du plus grand crime, qui est de ne cognoistre pas Dieu, qui ne peut estre ignoré. Elle ne s'est iamais seruié d'heretiques, ny de libertins; & sa maison a esté tousiours vne escole de Religion, de Vertu, & d'Honneur. Mais vous qui croyez, que tous les impies qui ont esté à Paris, ou à la Cour, durant la Regence de la Royne, luy doiuent apporter quelque blasme; dites-nous (s'il vous plaist) qui est celuy qui nous accuse, & qui estes-vous qui le defendez? Je veux pardonner à la Pourpre sacrée, & ne descouurer point les taches qui sont en sa doubleure; ie suis marri qu'on voye trop clairement celles qui sont au dehors. Mais pour vostre bure, qui est taillée en habit de Religieux bien reformé, ie ne sçauois m'empescher d'escrire qu'elle couure vn homme, la Religion duquel nous ignorons. Nous le voyons solicateur general des Mahometans, des Lutheriens & Caluinistes; Procureur de tous les blasphemateurs du nom de Dieu, & de son Fils I E S V S - C H R I S T, des renuerseurs d'Eglises, des massacreurs de Prestres, & des violateurs de Nonains. Nous sçauons que ces gens-là poursuiuent leurs desseins par vostre conduite, & par l'assistance que vous

leur faites donner, cōme directeur de tous leurs affaires, & possesseur des bonnes graces de Mr le Cardinal, duquel vous avez voulu estre caution. Dites-moy, comment se peuuent accorder ces emplois avec vostre habit, vostre Breuiaire, vostre Messe, & avec la Religion estroite & reformée, de laquelle vous faites profession? Je ne dis pas *professez*, comme vous; qui meritez en escriuant en si mauuais termes d'estre prou fessé. A tout le moins vous deuiez procurer la liberté de conscience (puis que vous la laissez dans la Rochelle) aux Catholiques de Bolduc & Vezel; cela eust vn peu caché vostre jeu. Mais vous avez voulu faire, & publier le peché, qui fait dire, sans se mettre en danger de porter vn iugement temeraire, que vous n'avez rien de Chrétien que le Baptesme, de Catholique que le nom, & de Religieux que l'habit.

Je ne me peux assez estonner de vostre imprudence & malice, lors que vous dites, *que ce qui fut escrit contre le Marefchal d'Ancre, sa femme, & les personnes qui estoient engagées avec eux, est à present redit plus grossierement par ceux-là mesmes qui estoient dans leurs conseils, & qui estoient en execration au Roy, & à toute la France.* Rappelez vn peu vos esprits esgarez, frotez le derriere de vostre teste, où vous avez vn jeton, secouiez vostre memoire qui dort, esueillez vostre prudence qui est assoupie, & resuscitez vostre conscience qui est morte. Le seul homme que nous cognoissons aujourd'huy du conseil du Marefchal d'Ancre, & de sa femme, est Mr le Cardinal de Richelieu, qui n'est pas avec nous, mais contre nous; com-

me vous sçauiez. Celuy qui a escrit sous Monsieur la lettre, qui donne sujet à vostre libelle; n'a point esté de ce temps là, ny dans les affaires, ny dans la Cour, ny dans la maison de la Royne Mere; & n'a iamais parlé à ceux, desquels vous le faites confident, pour oster la creance à la verité qu'il a dit. C'est icy où ie vous descouure preuaricateur en la cause que vous defendez; & si vous ne l'estes par malice; aduoüez que c'est par sottise: Mr le Cardinal vous pardonnera plustost la premiere que la seconde. Il aime mieux que ces escriuains soyent malins que grossiers. Vous estes l'un & l'autre, & ne faites voir autre chose, si ce n'est que Mr le Cardinal a esté accusé en deux diuers temps; que ses conseils ont esté tousiours dangereux, & sa conduite desauantageuse à la France. Vostre Apologie le charge de grandes fautes durant le premier employ, qu'il auoit il y a dixsept ans; & ne le descharge pas de celles qu'il a fait depuis peu: ainsi vous le faites trouuer criminel en toutes occasions, avec cette difference, que le credit qu'il a maintenant, estant sans comparaison beaucoup plus grand, que celuy qu'il a eu autrefois, si par vostre confession il merita vn bannissement, quelle peine luy ordonnerez-vous pour les crimes qui sont deuenus aussi grands que sa fortune, & plus prodigieux que sa puissance?

Pag. 113. Il semble que vous auéz entrepris de faire parler alternatiuement, sur le theatre de vostre libelle, l'Imprudence & la Meschanceté. Celle là vient de dire son rolet: voicy l'autre qui rapporte les articles de l'Edict de London, & des sales

lambeaux des plaintes de la Noblesse Françoisise, dressées par vn badin, qui voulut faire gagner quelques pistoles aux Colporteurs de Paris, & en auoir sa part. Vous auez remué & ramassé toutes les vilenies, qui estoient dans les infames escrits faits en vn temps, auquel la licence passa si auant, que ce qu'on souffroit estre chanté sur le Pont neuf, estoit non seulement prejudiciable à la reputation du Roy, mais encore à sa Couronne. Vous faites couler toutes ces ordures dans vostre liure, & croyez qu'on ne sentira pas vostre puanteur, & la leur; lors que vous direz, *On disoit*. Vous faites glisser les noms d'*Atalia*, & de *Iesabel*, & assurez que les dominations funestes ne furent pas oubliées. Vous estes le premier qui auez escrit ces choses, qui sont inuentions de vostre teste, cauterisée comme vostre conscience. Voylà les belles consolations que vous enuoyez; ie ne dis pas à vne grande & vertueuse Royne, laquelle apres auoir fait beaucoup de biens à vos Conuents, a esté emprisonnée, & chassée; mais à vne pauvre Vefue affligée, & à vne bonne Mere. Vous luy auez desrobé la presence de son cher Fils, & l'auiez priuée du moyen de reconcilier ses Enfans, & vous desirez de ruiner l'vn par l'autre; pour faire emporter par M^r le Cardinal & les siens, tout le butin de la maison Royale, dans laquelle vous iettez le feu. Vous liez les bras à ceux qui peuvent apporter de l'eau pour l'esteindre: vous chassez le secours, & fermez la bouche à ceux qui l'implorét. Ne craignez-vous pas que Dieu vous face perir dans les flammes que vous allumez;

& commencer vostre Enfer, là où vous faites trouuer le Purgatoire à beaucoup de gens de bien? GRAND DIEU, Pere de misericorde, & Roy de paix, conuertissez plustost les mauuais desseins de ces gens-là en bonnes pensées, leurs blasphemés en vos loüanges, & leurs actions maudites en œuures de benediction: vous aurez plus de gloire, & nous plus de contentement en leur conuersion, qu'en leur punition; & vous ferez vn plus grand miracle en les faisant gens de bien; qu'en les chastiant pour le mal qu'ils ont fait: toutefois vostre volonté soit faite: de toutes vos dispositions nous tirerons ou merite, ou consolation; & nous les receurons non seulement avec patience, mais avec grand respect.

Pag. 124. *La derniere guerrè nous fâsche, parce qu'elle a esté glorieuse au Roy.* C'est vostre discours: vous soustenez cette gloire, à laquelle vous qui avez renoncé au monde, n'avez rien; & asseurez que celle, à laquelle la nature en donne la meilleure part, a esté marrié d'un bien qui luy est arriué. Diagoras Rhodien mourut de ioye, en voyant les triomphes de son fils; & vous faignez que la Royne meurt de tristesse, en voyant ceux du Roy: donc le sang n'a plus de force dans son cœur, & l'enuie en a banni l'amour. Qui croira ce que vous dites, & que vous ayez plus de zele pour le reestablissemēt de Monsieur de Mantoüe, l'ayant veu en reuelation à Rome, qu'une bonne Mere pour la reputation de son Enfant, qui est chair de sa chair, & os de ses os? qui est une Vefue, à laquelle son Espoux n'apporte plus de lauriers

lauriers & de palmes; & ne se peut refioüir, ny se glorifier, que dans les victoires de ses deux Fils.

Il est vray, qu'elle eust esté tres-aïse, qu'on eust fait la paix deuant la perte de cinquante mille hommes François, & la dissipation d'autant de millions de liures; & sur tout, parce que les bonnes Meres detestent la guerre, & craignent tousiours quelque mauuais récontre pour leurs Enfans. Mais les affections de la Royne Mere du Roy estant réglées par la prudence, elle a desiré vn traité auantageux pour la France, & a esté faschée de ce que la vanité de Mr le Cardinal auoit negligé, ou laissé eschapper avec mauuais dessein l'occasion de la conclurre, deuant & apres la prise de Pignerol. Vous qui deuriez estre Peré pacifique, auez tousiours aimé les armes; principalement depuis que vous auez chargé l'escharpe blanche, & que vous estes monté sur l'impudent, il semble qu'il a emporté vostre pudeur, que de trompette de l'Euangile vous estes deuenu corneur de guerre. Vous conseillez les violences, pour obliger ceux, auxquels elles sont faites, à se ietter dans la deffense naturelle, apres que la patience Chrestienne aura esté forcée; que la iustice, à laquelle on auoit eu recours, a eu les mains liées, & que son bandeau luy a non seulement fermé les yeux, mais bouché les oreilles.

C'est la puissance absoluë de Mr le Cardinal, & vos aduis qui l'ont mise en cet estat. Souue-
nez-vous, qu'elle est fille de Dieu qui la deliurera avec la verité : vous les detenez prisonniers avec la
mesme cruauté, qui a chassé la Mere, & le Frere;

Horat.
*Bellâque
matribus
detestata.*

Rom. 1.

& qui cherche les moyens d'en faire autant à l'Espouse. Apres cela vous n'aurez rien de saint & sacré à ruiner que le Roy ; pour lequel vous reseruez & preparez desia vos derniers efforts, si la main pesante de Dieu n'arreste la vostre qui va aussi viste que vostre langue, & vostre plume.

Pag. 126.

Le Cardinal de Richelieu, & le Surintendant logez à Paris près de l'hospital des aveugles.

Il ne vous reste plus qu'à dresser vne petite defense pour l'administration des Finances, & à tascher de prouver aux aueugles des quinze vingts, qu'ils doiuent auoir grand regret de ne voir pas vn monde nouveau, qui a esté fait de rien par deux de leurs voisins, qui l'ont remply de bastimens superbes, de meubles precieux, de iardins, de parterres, de vergers, de fontaines, de parcs, de canaux, de fossées à fonds de cuue, de grottes, de boscages, d'allées couuertes à perte de veüe, & qui ont surmonté tout ce que la magnificence de nos Roys, & les richesses des plus puissans Princes de l'Europe ont fait à grands frais, & avec le trauail d'un nombre presque infini de leurs subjects.

C'est encore en plus grand miracle, d'auoir fait & soustenu tant de grandes guerres dedans & dehors le Royaume, avec si petite despanse, qu'elle ne va pas (à ce que vous dites) à la moitié de ce qui a esté employé les années precedentes, pour acquerir de la honte à la France. Vous la representez comme ruinée de reputation, deuant que Mr le Cardinal eust releué son honneur, & l'eust tirée du lieu infame. Contre tous ces beaux discours, ie ne veux pas produire les comptes de l'Espargne, ny les estats de l'ordinaire & extraordinaires des

guerres, ny celuy des receptes ; tout cela se peut voir à la Chambre des Comptes. Mais ie veux asseurer trois choses ; La premiere, que depuis cinq ans on a volé au Roy, aux gens de guerre, & au public soixante millions. Si quelqu'un, comme vous dites, a asseuré qu'on auoit pillé deux cens millions, il a parlé sans adueu, & sans charge de personne : mais pour soixante nous le prouuerons par bons teimoins ; & le premier sera le soleil, lors que les fenestres du Palais luy seront ouuertes. En second lieu nous monstrerons, que depuis quatre ans on a doublé les tailles & tailion, on a fait verifïer vn grand nombre d'Edicts, on a retranché les pensions, gratifications, entretenemens, & les bastimens. Il faut donc que la despense aye excédé pour le moins de la moitié celle des années precedentes ; ou qu'il y aye de l'argent en reserve, ou qu'on aye beaucoup desrobé. Ces consequences sont fort aisées à faire. En troisieme lieu, on iustificera qu'il n'y a eu iamais tant de Comptans, qui sont les vrayes moyens de dissipation & de confusion ; les menus n'estans point employez dans les comptes de l'Espargne. Nous prouuerons, que tous les ans on a tiré par cette voye plus de douze cens mille escus, sans ce qui va à la marine, qui n'a ny riue ny fonds. Que depuis peu on a tenu ce chemin des Comptans, pour donner au Marquis de Brezé cent mille liures, & à la Mileraye autant, pour les seruices qu'ils ont rendus à l'Estat dans les Academies du jeu. Que deux hommes ont eu, l'un cinquante, & l'autre quarante mille liures, pour seruir à des mauuais

desseins. Cela n'est qu'un petit exemple venu à nostre cognoissance, & un eschantillon de la piece, qui sera desployée un iour avec l'infamie de ce corrompu Intendant des Finances, qui trouue les inuentions pour couper la bourse au Roy: le Surintendant l'emporte, le Cardinal la garde, & donne quelque part du larcin à ceux qui l'ont aidé à le faire.

En fin, Mr des Montagnes vous deuriez auoir descouuert de la plus haute de vos Seigneuries la pauureté de la campagne; à laquelle on a fait mourir depuis huit mois tous les gens de guerre, & bailler les prests qui leur ont tenu lieu de monstres. Il est vray, que Mr le Cardinal a fait esperer au peuple, qui luy rabatroit sur la taille ce qu'il auroit auancé. Pour s'acquitter de cette parole, comme des autres, il a doublé les impoits; & par ce moyen a rendu la France si miserable, qu'il est impossible de la faire subsister, qu'en luy donnant un peu de loisir, pour reuenir de sa defaillance, & se remettre. L'expedient seroit de fouiller dans les caches du Havre, & de Broiage, & dans la bourse de trois ou quatre signalez larrons: il vaut mieux les reduire à la fortune de leurs peres que de laisser dans la pourriture, & dans la faim, un nombre presque infini de Chrestiens, & de François, qui demandent iustice & soulagement à Dieu & au Roy.

Pag. 133.
& 134.

Je croirois, que sur la fin de vostre libelle le travail vous auroit estourdi, si vous ne l'eussiez cité dès le commencement. Vous dites deux choses contraires: en la page 133. *que les ministres de Monsieur ont eu grand tort de luy auoir fait quitter la*

conduite des armées de la Rochelle & d'Italie, qui l'eussent rendu glorieux parmy toutes les nations de la terre. Ce qui destruit entierement ce discours est en la page 134. où vous dites, *que le Roy n'a iamaïs voulu, comme tres-sage, faire la guerre par procureur, ayant désiré d'estre par tout.* Comment s'accordent ces deux choses ? que Monsieur aye eu le moyen dans le commandement des armées de se rendre glorieux, & cependant que la volonté du Roy a esté de se trouver par tout, & par consequent d'oster la conduite à Monsieur son Frere, qui n'en a point là où le Roy est : le trouue aussi plaissant ce que vous dites, *que Mr le Cardinal eust obey à Monsieur dans les armées* : ce seroit bien abaisser l'Eminentissime, & estreindre le Generalissime, Monsieur n'ayant iamaïs esté que General. Vous sçavez, qu'à la Roche Mr le Cardinal luy osta le Regiment des gardes, pour le mettre deuant sa porte, & fit retirer Monsieur à Paris, l'ayant aussi fait rappeler deuant qu'il arriuaist à la frontiere d'Italie, où il vouloit auoir employ, qu'il rait à celuy qu'il appelle son Maistre.

Vous dites, *qu'il est sorty de France pour descrire sa patrie, les affaires de son Royaume, & ses ministres.* Vous avez tort de dire qu'un Prince chassé à picques baissées soit sorty de gayeté de cœur ; & encore plus, lors que vous luy reprochez *qu'il a descrié sa patrie.* C'est vostre stile aussi grossier que vostre robe. Ce grand Prince, duquel vous parlez avec si peu de respect, est le premier, & le seul Enfant de la maison, de laquelle le Roy est le Pere : & iusques à ce que Dieu aye

enuoyé la benediction que nous desirons, & que vous esloignez, Monsieur est Frere & Fils; & la bonté du Roy luy a donné ce dernier titre. Osez-vous bien dire, qu'il est ennemi de son pays? voulez-vous estre du nombre de ceux que Dieu deteste, pour auoir *semé discorde entre les freres*? Vous assurez, qu'il n'est sorty de France que pour deshonorer le Roy. Le plus grand respect qu'un seruiteur puisse tesmoigner à son Maistre, qu'on a irrité contre luy, est de s'oster de sa presence, iusques à ce qu'il soit appaisé. Monsieur n'a point quitté Orleans, que lors qu'on l'a contraint de se retirer, & qu'il a sçeu l'emprisonnement de la Royne sa Mere. Il a creu que si on auoit violé la nature en sa racine, on ne l'espargneroit pas en ses branches; & que les bien-faits n'ayant point de pouuoir sur M^r le Cardinal, le respect en auroit encore moins.

Appellez-vous *vn descri de Ministres*, de dire les crimes publics, les maux qu'on ressent, & ceux qu'on a iuste sujet d'apprehender? Voulez-vous que le Frere vnique d'un Roy sans enfans, ne prenne point d'intérêt à la conseruation de l'Estat? qu'un Fils de France souffre le mauuais traitement d'un seruiteur? qu'un Prince de cette qualité n'ose dire mot, lors qu'on emprisonne sa Mere; & que pour soustenir l'honneur de la sienne, le fils d'un bourgeois soit excusé, quand il aura assommé un valet insolent?

Vous parlez des combats du Pont neuf, & vous employez un rencontre de quelque gayeté, pour un sujet de mépris: vous meriteriez, & celuy qui vous met en besongne, si vous n'estiez

Prestre, qu'on fit sur vous vn assaut de reputation deuant la statuë de Henry le Grand. Vous auez entrepris de deshoner sa memoire, & son Mariage, d'emprisonner sa Vefue, & de chasser son Fils. Vous ruinez le Roy heritier de la Couronne, qu'il luy a conseruëe avec ses sueurs & son sang, avec trois cens sieges, cent combats, & sept batailles : cependant vous faites si bon marché, & achetez à si vil prix les pieces, qui ont tant cousté.

Vous rendez plaisante la conclusion de vostre comedie, lors que vous dites : *Ne valloit-il pas mieux aller briguer l'Empire en Allemagne, ou l'Vnion des Princes Chrestiens contre le Turc, que d'intenter des actions au Parlement, & tesmoigner vne si grande crainte du Cardinal, qu'on demande d'en estre esloigné, pour éuiter sa main funeste ? L'amaïs on n'a ouy dire, que les Princes François ayent eu peur d'aucun peril, estans naturellement vaillans.* Voilà vostre discours mot à mot ; qui est à proprement parler celuy d'un petit escolier, qui entretient son compagnon reuenant de l'escole ; ou de la femme d'un artisan de Paris, qui sert Mr le Cardinal, laquelle caquette avec sa voisine acouchée ; ou d'un crocheteur plus rempli de vin que de sens, qui en compte à perte de veuë ayant les coudes sur la table du cabaret. Je m'estonne, que vous auez escrit comme ces gens-là parleroient ; apres que vous auez negocié en Allemagne, & recogneu les forces de l'Empire, vous croyez qu'on le peut acquerir par vne brigade comme vn Escheuinage de ville, ou vne Deputation de Prouince. Vous qui auez tant de credit

Pag. 135.

aupres de Mr le Cardinal, deuiez, pour faciliter les moyens de cette conqueſte, faire donner à Monsieur vne armée de cent mille hommes, cent pieces de canon, & dix millions d'or: sur tout, il seroit expedient de vous faire passer premier pour employer les intelligences que vous auez avec les Electeurs Ecclesiastiques & Catholiques. Vous les auez rendus ennemis de la France: & ils ne vous appellent pas autrement que Moyne Lutherien. Vous ſçauiez bien, qu'un Gentilhomme appelé Montpinſon fut emprisonné, il y a quatre ans, pour auoir proposé à Monsieur vn deſſein hors du Royaume, qui n'estoit ny si grand, ny si hardi que celui que vous mettez en auant.

Mr le Cardinal n'a peu souffrir sans donner jalousie au Roy; parce qu'il auoit apprehension pour luy-mesme, que Monsieur aye commandé vne armée de vingt mille hommes en France; & vous faites semblant, que vous luy en deſirez vne de cent mille: vous luy oſtez le rang & l'autorité que sa Naissance luy a acquis aupres du Roy, & luy voulez procurer l'Empire: vous estes des moqueurs.

La seconde sottise que vous adjouſtez, est, que vous dites, que Monsieur deuoit procurer l'Union des Princes Chrestiens contre le Turc. Vous luy donnez bien de la besogne à la fois, d'enleuer l'Empire, & de ruiner le Turc. Vous reuenez à vos reuelations, & estes encore coiffé de vostre Cheualerie; ou vous escriuez cecy, pour vous monſtrer zelé contre les ennemis de I E S V S-CHRIST, cependant que sous main vous auan-

cez leurs affaires contre les Chrestiens. Souuenez vous de l'Ingenieur du Roy de Pologne, de l'aduís que vous auiez donné l'année passée, de faire descendre l'armée du Turc en Italie, & de ce que vous traitez à present aupres du Roy de Maroc, pour luy faire surprendre quelque port dans les terres d'un Prince Chrestien.

Le demeure d'accord, que ces conquestes, qui Pag. 134.
sont hors de vos intentions, *seroient plus releuees que de presenter vne requeste au Parlement* : c'est en quoy il faut auoir pitié du malheur de la France, & detester l'ambition & la malice, qui ont contrainct Monsieur Frere du Roy de prendre à partie vn dissipateur de l'Estat, qui luy a osté les pensées de ses interests, pour luy donner celles du salut du public & du sien. On le cherche plustost dans la Iustice, que dans la violence : vous ne doutez pas qu'on n'eust peu, si on eust voulu, vser de cette-cy. Mais Dieu ne le veut pas : cela eust offensé le Roy, & les pros crits ne l'ont pas désiré, de peur de raur la gloire à S. M. qui apportera le remede au mal, lors que sa Iustice vous chastiera. Si nous nous adressons à elle, c'est vn tesmoignage de nostre grande vertu que vous deuez estimer, & de nostre extreme misere que vous deuriez deplorer, au lieu de vous en mocquer ; lors que vous dites, *que nous auons tesmoigné peu de courage par nostre retraite*. Vous sçavez bien, qu'il faut fuir le peril dans lequel il n'y a point d'honneur à acquerir ; ce n'est pas poltronnerie de sortir d'une maison empestée, de ceder à vne plus grande force n'est pas lascheté, mais prudence ; & c'est vne marque de bonté & de respect ; de ne se presenter point de-

uant son Maistre, lors qu'il est en colere. Ceux qui feroient cent lieues pour se trouuer en vne bataille, en doiuent faire autant pour se garantir d'une oppression, & d'une prison. Vous dites, qu'il faudroit estre insensé pour y loger le Frere unique d'un Roy, qui n'a point d'enfans. On a esté donc enragé d'y mettre la Mere sans crime, & sans accusation. Il n'y a point de fils qui voye arrester sa mere innocente, qui n'apprehende vn plus rude traitement. Puis qu'on vouloit estre meschant, il y auoit bien plus d'apparence de faire violence au Frere, qu'à la Mere de son Maistre, & à sa Maistresse, & à sa Bien-faëtrice. Mr le Cardinal a non seulement eu intention de s'asseurer de la personne de Monsieur; mais se repent tous les iours de ne l'auoir point fait. Je suis fasché de vous reconnoistre menteur sans memoire. Souuenez-vous de ce que vous auez rapporté du Duc d'Alençon,

Pag. 135. Vous appelez *la main de Mr le Cardinal* funeste: c'est la seule verité, que vous auez dit dans tout vostre libelle, estât plus funeste que celle de Cassandre, qui fit mourir la Royne Barbiné & Alexandre son fils, pour s'emparer du Royaume de Macedone.

Pag. 137. Vous concluez à la mode du Gouverneur de Marans, Capitaine des flagorneurs, parasites, sicophantes, flatteurs à gages, & escriuains payez pour mentir. Vous louiez tous vos bons amis, les appelez *fauteurs & adberans de Mr le Cardinal*: vous auez raison de leur donner ces beaux titres, & encore plus de bailler à chacun vn peu d'eau beniste de Cour, de peur que le malin esprit, qui les guette, & ne vous craint pas beaucoup, ne les emporte en vostre presence.

Vous commencez par Mr l'Archiministre, &

dites des merueilles. Vous n'avez oublié qu'une chose, pour monstrier, qu'il ne se faut pas estonner s'il a mal traité la Mere de son Maistre; puis qu'il a voulu faire mourir de faim la sienne, & l'a tuée de regret. Cette bonne Dame dans la desroute du bien de son mari, & du sien (parce qu'elle auoit parlé dans les contracts à la mode de Paris) se trouuoit incômodée sur la fin de ses iours, & viuoit de quelque petit secours, qu'elle tiroit de l'Euesché de Luçon. Mr l'Euesque qui se voulut mettre dans la vanité, & dans l'amour, luy retrancha sa pension, & la laissa dans vne si grande incommodité, que le desplaisir ou la misere la firent mourir. Plusieurs personnes sçauent, que ses dernieres paroles, apres auoir receu l'Extreme Onction, & apres beaucoup de remonstrances, furent, qu'elle pardonnoit à cet ingrat Euesque de Luçon. Ne vous estonnez pas, s'il a esté méconnoissant iusques au dernier point enuers sa Maistresse, puis qu'il l'a esté iusques à procurer la mort à sa mere.

*Pensant
plaire à
une Dame
qui se mo-
quoit de
luy, il a
dansé estât
Euesque
avec un
habit de
satin vert,
ayant le
chapeau,
la plume,
le bas, &
les souliers
de mesme
couleur.*

Vous dites, qu'il a rendu beaucoup de seruites. Nous soustenons que ses actions ont deux faces, comme ses pensées; & que tout ce qu'il a fait, est fort problematique. Il a ruiné la Rochelle. C'est le Roy qui l'a fait avec ses forces; & Mr le Cardinal tout seul, qui la fait fortifier avec dessein (si elle n'est surprise) de la remettre entre les mains des Huguenots, pour estre assisté de leur parti. Il s'est présenté deuant Pignerol, qui luy a esté rendu: mais il le faut restituer avec honte, l'ayant peu faire avec honneur, & en sauuant la vie à cinquante mille hommes François. Que s'il auoit fait tout seul, & avec bonne intention tous ces mira-

cles que vous dites, il est homme sujet à changement, & à vanité : ces deux choses le pourroient auoir rendu autre qu'il n'a esté : & nous ne disputons pas tant de ce qu'il estoit, il y a quatre ou cinq ans, comme de ce qu'il a esté depuis vn an. Les maux qu'il a faits sont plus sensibles, que les biens que vous luy attribuez : il n'a pas executé les plus hautes entreprises d'un homme, & a fait les plus mauuaises actions d'un malin esprit : quand il seroit autheur de tout le bien, que vostre flatterie luy donne, il est emporté par le mal que la verité recognoist : & tous les bons & sages iugent, ou qu'il n'a iamais esté bon & sage, ou qu'il est deuenu meschant & imprudent, sur tout, lors qu'il a attaqué la Mere de son Roy, sa Maistresse, & Bien-fa&rice. Il s'est trop fait cognoistre, & a esté comme le cerf dans les fables, lequel apres auoir esté caché sous la vigne, euita la mort tant qu'il y demeura en repos à l'ombre de sa ramée forte & espaisse : il fut descouuert par le grand bruit, & remuemens qu'il fit en mangeant les feüilles, & pampres de celle qui l'auoit protégé & garanti contre ses ennemis : vous aurez peut estre l'esprit d'appliquer ce que ie dis.

Pag. 145. Sur la fin vous nous demandez *nostre mission*, comme on fait aux heretiques ; ou *nostre obedience*, comme à des Moynes estrangers. Encore que vous ne soyiez ny nostre Euesque, ny nostre pere Gardien ; ie ne feray point de difficulté de vous dire, que *nostre mission* vient de Dieu, du Roy, & de la Loy de nature. De Dieu, qui nous

i. Tim. 5. commande de reprendre publiquement *Mr le Cardinal* qui peche publiquement ; & de luy resister en face.

parce qu'il merite d'estre tansé. Il veut aussi que nous defendions nostre honneur, que vous attaquez par vos escrits, lors qu'il dit ; *Aye soin de la bonne reputation.* Nostre mission vient du Roy ; qui ne seroit pas LOVYS LE JUSTE, s'il ne permettoit à tous ses sujets, & principalement à sa Mere, & à son Frere, de luy demander iustice contre toutes sortes de personnes : il la fera à la fin ; parce que sa vertu sera plus forte que vos artifices, & que nostre patience vaincra vostre malice. En second lieu, le Roy est amy de verité : chacun a le pouvoir de la luy dire avec respect, & il ne faut point de lettres patentes pour cela : aussi bien Mr le Garde des sceaux ne les seelleroit pas, & Mr le premier President s'opposeroit à l'enregistrement. Nostre mission vient aussi de la Loy de nature. L'eussiez-vous demandée au fils de Cresus, (auquel vous vous estes comparé au commencement de vostre bel ouvrage) lors qu'il aduertit son pere, pour luy faire esquivier le coup de mort ? Vous demandez la mission à vne Mere, qui donne aduis à son Fils qu'on ruine sa santé, & qu'on veut respendre le sang qui est son sang, & perdre la vie qui est sa vie. Souvenez-vous que c'est vne Mere, qui seroit lasche, si elle n'auoit que des larmes muettes, & des soupirs sans voix. Souvenez-vous, que c'est la premiere Conseillere de l'Estat de France ; que cette qualité est fondée sur celle de Mere, & n'en peut estre separée que par l'infidelité, qui n'a point esté, & ne sera jamais en elle. Pour Monsieur, vous sçavez quel interest il a à la conseruation de l'Estat.

Eccli. 41.

Ce que j'escriis, est plus à propos que vostre

passage de Seneque ; qui conclud plustost contre vous , qui estes mesdisant, imposteur , & insolent en vostre prosperité ; que contre nous , qui sommes veritables, modestes & humbles en nostre affliction. Nous prions Dieu pour la conuersion de M^r le Cardinal, & pour la vostre : nous supplions tres-humblemēt sa diuine bonté, de faire cognoistre au Roy , que la Roynie que vous persecutez, luy a esté , luy est , & sera tousiours tres-bonne Mere , & que nous n'auons esté, ne sommes, & ne serons iamais que ses tres-fideles seruiteurs : la violence nous a peu faire changer de pays ; mais elle n'est pas assez puissante, pour nous faire changer ny d'affection, ny de discours. Nous serons iusques au dernier soupir de nostre vie, sans flatterie, desireux de la gloire de nostre Roy, sans autre interest que celuy de nostre nation, joyeux de ses auantages ; & sans lascheté ny trahison, amateurs de la paix. Si dans ces bonnes intentions, & saintes affections, nous sommes mal traitez ; nous ne croirōs pas, que Dieu chastie les pechez qu'on nous impose ; mais qu'il nous veut oster quelques imperfections que nous pouuons auoir, & prend plaisir à l'exercice de nostre patience. En attendant qu'il en soit satisfait, nous nous consolerons dans le tesmoignage de nos consciences ; & dans cette ferme esperance, qu'avec le temps la lumiere de Dieu fera discerner lēs bonnes actions d'avec les mauuaises ; & que le soleil se leuera pour nous, lors qu'il se couchera pour tous ceux qui se sont opposez à nous. Nous scauons bien, que la Prouidence qui gouuerne le monde, & qui aime la vertu , ne peut abandonner la protection de

cet Estat, & la defenſe de l'Innocence: ce grand Dieu, *qui a le cœur du Roy en ſa main pour le faire* Prou. 21.
pancher là où il veut, le fera tourner vers ſa Mere, vers ſon Frere, & vers ſon Peuple.

Pour conſeiller, ie m'adreſſe à vous mon Reuerend Pere, pour vous prier de conſiderer, combien vous vous éloignez de voſtre deuoir, en conſeillant des guerres, & en eſcriuant des calomnies. Les diſcours que vous faites au Roy, & les liurets que vous ſemez dans le monde, ſont des menteries; mais la plus grande de toutes eſt en voſtre habit: il ſemble que vous ne le portez que pour déguifer vn Preſtre meurtrier, vn Religieux ſans pieté, vn Chreſtien ſans foy, & vn homme ſans humanité. N'avez-vous iamais penſé à la grande charge que vous mettez tous les iours ſur voſtre conſcience, lors que vous dépeſchez à toute heure vos Emiſſaires traueſtis qui vont troubler l'Europe, & faire armer les Princes Chreſtiens les vns contre les autres? Vous faites ces choſes pour contenter la vanité & la violence de celui qui vous employe, ou pluſtoſt pour conſeruer voſtre carofſe, voſtre train, vos Secretaires, voſtre bône table, voſtre credit, vous exemter de la rigueur de voſtre Regle, & de la ſainte priſon de voſtre Cloiſtre. Si vne goutte de ſang crie vengeance au Ciel contre celui qui l'a répandu, quel bruit doiuent faire deuant le thrône de Dieu plus de mille torrens de ſang humain verſé en autant de batailles, ou de combats, ou de ſieges de places? Si la petite larme qui coule ſur la jouë de la Veuë affligée va de la terre iuſqu'à l'épirée pour demâder iuſtice, quels jets d'eau peuuent faire cent mille fontaines de

pleurs qui montent avec impetuosit   iusques au Paradis? Si la plainte d'un pauvre ouvrier frustr   de son salaire retentit dans les oreilles de Dieu, quels tonnerres & esclats feront les cris de tant de millions de paysans, artisans, femmes & enfans chass  z de tous leurs travaux, & mourans dans les flammes, dans les rivi  res, dans les bois, dans les hospitaux, dans les ru  es, & par tout? Quelle satisfaction devez-vous    Dieu pour avoir con  seill   tant de guerres, qui ont d  peupl   l'Europe pour peupler les enfers; o   le d  sespoir en a pr  cipit   davantage, que la patience n'en a esleu   dans les Cieux? Tous ces maux ne prouviennent que du trait   que vous fistes avec le Roy de Suede: cet ouvrage fust de vostre seule inuention: vous signates cette ligue avec la m  me plume qui vous auoit s  rui pour signer la paix de Ratisbonne. Esperez-vous qu'un soupir    l'heure de la mort effacera tous ces pechez? Estes vous ass  ur   que vous aurez la grace de vous repentir? & pensez-vous que sur le rapport de quelque simple Religieux, le scandale que vous avez donn      toute l'Eglise de Dieu, s  ra bien repar  ? Conuertissez-vous de bonne heure mon Reuerend Pere. Pour vous rendre, en vray disciple de nostre Seigneur, le bien pour le mal; ie vous donne ce bon conseil, au lieu des injures que vous nous avez enuoy  .



CHARITABLE
 REMONSTRANCE
 DE
 CATON CHRESTIEN
 A MONSEIGNEVR
 L'EMINENTISSIME
 CARDINAL
 DE RICHELIEV

Sur ses actions, & quatre libelles diffamatoires, faits par luy ou ses escriuains.



OSTRE Eminence, qui a dans le loisir de sa ieunesse leu autant d'Histoires, comme elle en a fait depuis quelques années, aura peut estre remarqué celle d'un Orateur Romain, qui par l'effort p'une grande maladie perdit tellement la memoire, qu'il ne se souuenoit plus de son extraction, de sa qualité, ny mesme de son nom. Ce rencontre nous fait voir que l'homme, qui s'estime beaucoup, est fort peu de chose; puis que son cerueau, qui est le lieu où l'ame exerce ses plus hautes fonctions, est aisément destriqué. Vn petit change-

ment de temperament naturel , fait non seulement , que ses actions ne sont plus raisonnables , mais les rauale au dessous des bestes , qui ont quelque souuenance de ce qui leur a esté fauorable , ou contraire. L'ambition , qui est la plus violente maladie de nostre esprit , nous ayant ietté dans des syncopes si estranges , que les plus sages & plus sçauans Medecins de l'ame ny cognoissent rien , nous oste en fin la memoire de ce que nous auons esté , de ce que nous sommes , & de ce que nous pouuons estre. C'est cette fieure ardente , qui a effacé toutes les especes , non seulement de ce que l'estude vous a acquis , mais de ce que la nature vous a donné. Il est vray , qu'ayant tant de noms & de qualitez qu'à grand peine les peut-on retenir , estant Iean Armand du Pleffis , de Richelieu , Cardinal , premier Ministre , Admiral , Connestable , Chancelier , Garde des seaux , Surintendant des Finances , Grand maistre de l'Artillerie , Secretaire d'Estat , Duc & Pair , Gouverneur de trente places , Abbé d'autant d'Abbayes , Capitaine de deux cens hommes d'armes , & d'autant de cheuaux legers ; estant contraint de comprendre par vn &c. le reste de vos titres ; il y a moins de sujet de s'estonner de vostre oubliance , que de celle de Messala Coruinus. Outre cela ; auez eü tant de noms , que les nouueaux vous ont fait oublier les anciens. Nous auons apperceu que vous auez quitté Iean pour Armand ; parce que le nom d'Armand qui approche des armes que vous aimez , ou d'Aman que vous imitez , vous est plus agreable que celui de Iean , qui est vn Saint qui annonçoit la paix &

la grace de Dieu. Si Armand vous a fait quitter
Ieun, Richelieu vous a fait quitter le Plessis. Le
nom que vous avez retenu, est non seulement plus
noble, mais encore plus riche : & vous avez rai-
son de faire chasser le vieux qui estoit incogneu,
par celui qui est entré le dernier dans vostre mai-
son. C'est la consideration, qui vous a porté à
baptizer plustost Monsieur vostre frere Cardinal
de Lyon, qu'à luy donner le nom de vostre fa-
mille ; ayant iugé prudemment, qu'on trouueroit
plustost Lyon, qui est vne grande ville ; que vo-
stre Plessis, qui ne fut iamais ny villiage, ny bourg.
Vous n'avez dans vostre esprit que Richelieu ;
que vous avez rendu riche de pauvre, ayant con-
uertit en Duché & Pairie, vn petit fief releuant
d'une Baronnie voisine, apres que vous auez vny
tout le pays d'alentour, & le lieu mesme qui
vous rendoit vassal. Vostre bastiment fait, sur
le modele de celui de la Reyne Mere du Roy,
plustost acheué, plus richement meublé, mieux
accompagné de canaux, parterres, terrasses, &
grand parc, vous a tellement agréé, que pour le
rendre riche, vous avez mis la pauvreté par tout.
Vous avez abaissé toutes les grandeurs de la Fran-
ce, pour releuer la vostre ; & pour vous en souue-
nir, vous avez oublié, Premièrement, qu'il y a vn
Dieu qui a dit, *que celui qui estene trop son edifice, cher-*
che la ruine. qu'il resiste aux superbes. qu'il destruit les
maisons dressees avec iniustice. qu'il dissipe les biens des
violens. fait fondre cōme la glace l'esperance des ingrats.
qu'il iette le mal dans la famille de celui qui le rend pour
le bien. qu'il oste sa benediction à l'heritage qu'on acquiert
avec trop de precipitatiō. qu'il fait, si nous voyōs en passāt

Pro. 17.

Iacob 4.

lec. 22.

Iob 27.

Sap. 16.

Pro. 17.

Pro. 20.

Pſal. 36. l'impie eſleué comme le cedre du Liban , qu'en repaſſant
 Eccl. 10. nous ne le voyons plus. qu'il renuerſe les thrônes des Ca-
 pitaines orgueilleux , & met les doux en leur place. qu'il
 Job 40. cache dans la pouſſiere les inſolens. qu'il rend captifs
 Job 12. les mauuais Preſtres , ſupplante les Chefs des Conſeils
 Iſai. 19. des Roys , leur ceint les reins avec vne corde , leur en-
 & 29. noye l'eſprit d'aſſouppiſſement & de vertigo , ſurprend les
 Job 5. ruſez dans leurs ruſes , & les fait tomber dans la ſoſſe
 Pſal. 7. qu'ils ont preparé pour attraper les innocens. Vous
 auriez oublié la Theologie en laquelle vous eſtes
 Bachelier , & les predications que vous auez fait
 autrefois à ſaint André des Arcs , ſi vous n'auiez
 plus la ſouuenance de ces belles ſentences de l'Eſ-
 criture ſainte. Comment pourriez vous eſcou-
 ter ces leçons du liure de Dieu , ayant fermé les
 oreilles pour n'ouyr point la voix de la nature,
 qui vous aduertit tous les iours par les infirmi-
 tez , & par les frequens remedes que vous pre-
 nez, de ce que vous eſtes, & de ce que vous n'eſtes
 pas? Il ne faut point de valet de chambre qui vous
 crie tous les matins (comme on faiſoit au Roy de
 Perſe) Souuenez vous que vous eſtes homme: les
 maux de teſte, les ardeurs du ſang, les fieures de
 lion, qui ne vous quittent point, les ſiringues, les
 lancettes , & les baignoires vous donnent aduis,
 non ſeulement que vous eſtes mortel , mais que
 vous poſſédez la vie avec des cōditions onereuſes.
 Vos ennemis pourroient dire, que vous eſtes ſem-
 blable aux malins eſprits, qui ne prennent point de
 diuertiffemēt dans leurs peines ordinaires, qu'en
 faiſant du mal aux hommes.

Il n'eſt pas poſſible que vous croyez que
 voſtre vie ſoit bornée ; qu'elle ſoit non ſeule-

ment fragile , mais entre les plus foibles , qu'elle est dans les dangers communs à tous les hommes, & qu'elle en prouoque de tres-particuliers: que les années la doiuent finir , & les violences la peuuent abreger : que vous estes guetté par tous les accidens du monde, & par tous les ressentimés des maux que vous auez fait aux Grands , qui ont la puissance de vous faire perir ; & aux petits, qui en ont la volonté, & qui au trauers de vos gardes seront maistres de vostre vie, lors qu'ils voudront abandonner la leur. Ne considererez vous iamais, que les iours que vous destinez à la ruine de cent mille personnes , peuuent estre au delà des vostres? que le temps qui vous flatte en vous promettant la mort de vos ennemis , leur fera voir vostre enterrement ? que les saisons que vous attendez , & sçauiez si bien ranger, pour adiouter des nouveaux appuis à vostre grandeur , & à l'acheminement du principal dessein qui tend à la Souueraineté, ou du tout, ou d'une bonne partie, verront la pourriture de vos os ? Il n'est pas possible , que vostre Eminence. n'aye oublié les conditions avec lesquelles Dieu vous a donné la vie, faisant si bon marché , comme vous faites, de celle d'autrui. Le grand soin que vous prenez pour vous faire garder , vous persuade, que vostre fin ne pouuant arriuer par la violence du dehors , vous estes aussi exempt de la mort qui vient du temperament du dedans. Vous croyez que vostre prudence, ou plustost vostre finesse , a fermé toutes les portes , par lesquelles la mort ou les ruines sont entrées, pour faire perir ceux qui ont en quelque façon appre-

ché de vostre auctorité. Vous ne sçavez pas, que si vous avez mille artifices pour vous establir, Dieu a vne infinité de moyens pour vous perdre: que ceux-là mesme, que vous prenez pour vous affermir, sont ceux qui vous affoiblissent: ils n'empeschent & ne reculent pas vostre cheute, mais l'auancent & la rendent plus grande, parce que vous tomberez avec vne charge plus pelante.

Vous faites toutes les semaines quelque progresz, & vous hastez pour monter au sommet de la felicité: lors que vous y ierez, vous n'aurez plus qu'à faire le saut. Il n'y a point d'estat de consistance en ce monde: l'homme qui y est arriué à ses plus grandes forces, commence à les perdre: les fruits après la maturité se destachent des arbres; ceux qui viennent promptement, se pourrissent bien tost: & ce que la nature a voulu conseruer long temps, comme l'or & les diamans, elle l'a fait avec beaucoup d'années. Vous ne considerez pas, qu'on va à la puissance par des chemins estroits & difficiles, mais qu'il n'y en a du tout point pour la retraite: que cette fortune malicieuse, qui taille les degrez pour nous faire aller au plus haut, les rompt après que nous sommes passez; & nous fait voir non pas vne descente là où nous auions trouué vne montée, mais vn precipice. Il n'y a qu'une minute entre les caresses des Empereurs, la conduite de leurs Estats, les richesses prodigieuses, les commandemens des armées; & vn croc pour estre traîné dans vne ville, vne potence pour estre pendu, cent mille picques pour estre percé, & vn chemin public pour mandier son pain.

*Seian.
Amin.
Ruffin.
Bellisai-
re.*

C'est la nature du monde, qui suit les ordres de la Prouidence, que vostre prudence ne peut changer, & que vos artifices n'arrestent pas. Ceux qui s'y opposent, sont plustost & plus violemment emportez, & meritent d'auoir non seulement le nom de meschans, mais encor d'insensez. Dieu se mocque d'eux, comme nous ferions de ceux qui voudroient faire vne digue au milieu de l'Ocean, qui entreprendroient de renuoyer les grandes riuieres à leur source, ou avec leur petit soufflé arrester vne tempeste, poussée par vn vent impetueux. Quand vous n'aurez rien leu dans les liures que vous avez feuilleté autrefois, & que les grands affaires que vous avez traité depuis peu, vous auroient fait oublier ce que l'estude vous auoit enseigné; vous deuriez vous souuenir, que sur le theatre où vous estes *Le Mar-* vous avez veu vne mort violente, & dans *eschal* la fleur de l'aage vne naturelle, qui ont arresté *d'An-* le cours de deux grandes felicitez. A la verité, *cre, &* elles ne se peuuent comparer à la vostre: mais *le Duc* prenez garde aussi que vos appuis ne vous char- *de Luy-* gent trop; & que le respect qu'on peut porter à *ne-* vostre Pourpre, ne vous exempte pas d'affliction.

C'est ce qui m'a poussé à vous représenter, que vous n'avez pas seulement oublié vostre nom, vostre naissance, & vostre nature, mais encore vos qualitez. Les plus releuées & plus saintes, sont celles de Prestre, d'Euesque, & de Cardinal. La Pre- *2. Cor.* strise vous deuroit faire souuenir, que tout ainsi *5.* qu'elle est vne ambassade enuers Dieu, pour faire descendre sa misericorde sur son peuple; ainsi elle vous donne l'auctorité de prescher au Roy

la clemence , & de le ſupplier d'vſer ſouuent de
 cette belle vertu Royale. Vous pouuez & devez,
 ayant le caractere du Sacerdoce , retirer quel-
 quefois du ſupplice les criminels qui n'ont point
 failli contre l'Eſtat , mais contre vous ; & eſtes
 obligé d'appaiſer la cholere du Roy, ſ'il eſt plus
 irrité pour voſtre intheret , que pour les ſiens.
 Vous aurez peut-eſtre leu dans les Prouerbes de
 Salomon cette belle ſentence: *Delivre ceux qui ſont*
menez à la mort. Sainct Ambroïſe dit : *Toy qui eſt*
Preſtre , retire par tes prieres enuers Dieu , & par tes
ſupplications & faueurs enuers les hommes , ceux qui
ſont conduits à vne fin ignominieufe. Ce que vous
 pratiquez tous les iours , eſt bien eſloigné de ce
 qui vous eſt comandé par l'Eſcriture ſaincte , &
 conſeillé par les Saincts. Il ſemble qu'il n'y a plus
 de crime de leze Majeſté , que celui qui vous of-
 fenſe : vous rempliſſez les priſons d'Eſtat , & les
 rendez vne peine perpetuelle : celles-là n'eſtant
 point ſuffiſantes pour retenir le grand nombre de
 vos ennemis , vous en employez qui n'ont iamais
 ſerui à ces vſages ; comme la tour de la Porte
 neufue. Le Loure , qui eſt vne maiſon d'aſyle &
 de grace , eſt des-honoré par l'infamie d'un ca-
 chot qui le touche ; & de la galerie qui va aux
 Thuilleries , on peut entendre les cris lamenta-
 bles de ceux qui ſont dans les tenebres , & dans
 les fers. Vous transportez , & eſgarez ſans forme
 de Juſtice, ceux qui ont eſté quelque temps dans
 la Baſtille: vous oſtez à leurs amis la cognoiſſance
 du lieu où vous auez deſſein de leur faire ſentir
 vne longue mort : vous ſçauiez qui ſont ceux que
 vous retenez dans le chateau d'Angers , & ail-

D. Am-
 broſ. in
 Pſa. 114
 Serm. 8

*Eripe eū
 qui du-
 citur ad
 mortem,
 hoc eſt,
 eripe eū
 intercef-
 ſione ,
 eripe
 gratiā tu
 acceſſos.*

leurs. Tant s'en-faut, qu'en faisant l'office d'un bon Prestre, vous taschiez de donner la vie & la liberté à ceux que vostre cholere & vostre ambition ont rendus criminels; que non seulement vostre puissance, mais vostre industrie, s'employe tous les iours pour les faire perir. Nous dirons vne chose horrible, mais veritable, & que vous ne scauriez auoir denié ny deguisé. Vous scauez ce que vous pratiquez ordinairement pour ietter dans les pieges de la mort & de l'infamie, ceux qui par vos poursuites & pour vos interests sont dās les prisons. Vous qui estes en effect leur partie, les visitez en habit deguisé, ou les faites cajoler par les vostres, sur tout par deux Dames qui vous sont fort acquises, & par vostre Capitaine de la Bastille. Ce que ie diray, est bien plus estrange: c'est que de vostre autorité particuliere vous les enuoyez querir la nuict dans des carrosses. Vous leurs faictes des grandes protestations de compassion, d'affection & de desir de leur deliurance, que vous leur promettez à foy de Prestre & de Gentil-homme, s'ils veulent dire ce que vous leur suggerez, & charger des personnes que vous desirez ou perdre, ou des-honorer. Comme il faut aduouër que la nature vous a donné des grands aduantages pour la viuacité d'esprit, & facilité de la parole, vous enjolez tellement ces pauvres gēs, qu'estās ennuyez de leur longue captiuité, surpris par vostre beau langage, attirez par vos feintes douceurs, quelquesfois accompagné de larmes, aïseurez par vos sermens, & par les promesses non seulement d'impunité, mais de grandes recōpenses; ne se pouuans imaginer, qu'un homme de

vostre profession soit meschant iusques au point que vous l'estes ; ils disent cent fois plus qu'ils ne sçauent deuant des tesmoins cachez. Ainsi ces pauvres miserables se mettent la corde au col , & attirent dans leur ruine ceux ausquels vous desirez d'oster ou la vie, ou la reputation. Vous ne pouvez nier , que vous n'en ayez vsé ainsi à l'endroit du Comte de Chalais, que vous avez veu souuent en prison; enuers Rôdin, que vous avez fait mettre aux galleres ; enuers Marcel, les sieurs Vaultier, Senele, du Val ; & plusieurs autres , que vous avez fait amener chez vous de nuit. Vous avez fait tout ce que vous avez peu, tantost par esperances, tantost par menaces, pour faire dire aux trois derniers quelque chose contre la Reyne Mere du Roy, ou contre Monsieur; affin d'auoir vn moyen de les ruiner dans l'esprit de sa Majesté , & de les diffamer dans le public. Voila les detestables artifices que vous pratiquez , bien esloignez de la qualité de Prestre, qui doit plustost rompre les pieges qu'on a dressez aux mal-heureux, que d'en faire pour les surprendre, & pour estouffer la cognoissance de vostre tromperie qui deshonnore les innocens. Ainsi, vous estes partie, examinateur, commissaire & iuge de ceux que vous desirez de perdre. Vous faites d'auantage; car vous les rendez criminels par la confession d'un peché qu'ils n'ont pas commis : & les portez à mentir, non seulement contre leur conscience, en accusant les gens de bien; mais contre leur vie , en se recognoissans coupables.

Vous ne sçauriez auoir oublié que vous estes Prestre , & vous souuenir que vous estes Eueq

que; cette qualité est appuyée sur l'autre. Je vous proposeray l'exemple d'un grand Prince, & Pere des Pasteurs & des Euesques, qui est Saint Gregoire; afin que vous reconnoissiez combien vous estes esloigné de ses mœurs, & de vostre condition. Ce bon Pape disoit: Si ie me voulois mesler dans la mort des Lombards, il est certain que cette nation n'auroit point de Roy, ny de Capitaine: mais parce que ie crains Dieu, j'ay vne grande apprehension de m'embarrasser dans la mort de qui que ce soit. Helas! Monsieur, pourriez-vous iamais dire les paroles de ce grand Saint, vous qui par les guerres que vous avez faictes mal à propos, estes coupable de la mort de plus de deux millions d'hommes, sans compter ceux qui ont esté egorgez pour teindre vostre chapeau avec leur sang, ny ceux que vous avez mis entre les mains des bourreaux, & fait mourir en prison? Vous aurez (peut-estre) leu vn Dialogue feint, qui fait trouuer vne tres-grande armée à la suite d'un Prelat, qui se presentoit à la porte du Paradis, d'où il fut chassé ignominieusement par Saint Pierre. Si l'Allemand, qui composa cette raillerie, viuoit au temps de vostre mort, il auroit vn beau subject pour faire paroistre les inuentiōs de son esprit, & mōstrer que le vostre a esté trop guerrier pour vn homme de cōditiō Episcopale: mais vous l'exercez si raremēt qu'il ne faut pas trouuer estrange si vous en avez perdu la souuenance, qui vous a quité avec l'habit violet. C'est encore vn plus grand sujet d'estonnement, que vous ayez oublié que la couleur que vous portez est celle du sang du fils de Dieu, sur lequel

Greg. in
Epist.

son Eglise est fondée, en laquelle vous tenez rang de Prince, mais pacifique. Vostre liurée est celle du feu de la charité, non du feu de la guerre, comme vous vous estes imaginé, & que nous reconnissons dans vostre conduite. L'escarlatte vous remet en memoire, que vous devez chercher les occasions du martyre pour la Religion, pour la Verité, & pour la Iustice : au contraire, vous le faictes trouuer à la Religion, à la Verité, & à la Iustice, lors que vous bannissez, emprisonnez, & faites mourir ceux qui les soustiennent. Vous protestates à la Royne Mere du Roy, en la remerciant des grandes instances & dépenses, qu'elle auoit fait pour vous procurer la Pourpre Sacrée; que vous ne la porteriez iamais, que pour vous faire souuenir de l'obligation que vous auiez de respan dre vostre sang pour elle. Vos actions ont fait voir que le credit, que cette dignité & les soins de vostre bonne maistresse vous ont acquis, a esté employé, non pour vous disposer à verser vostre sang pour son seruice, & pour tesmoigner vostre reconnaissance; mais pour tirer, si vous pouuiez, celui de ses veines; comme vous auez fait les larmes de ses yeux. C'est en quoy vostre ingratitude paroist extrême, & vous est reprochée par l'habit que vous prenez tous les iours. Il ne faut pas s'esmerveiller, si vostre pourpre n'a pas assez de force pour vous faire souuenir de la Maistresse qui vous l'a procurée, puis qu'elle n'a pas le pouuoir de vous remettre en memoire l'Eglise qui vous l'a donnée. Par cette couleur rouge elle vous exhorte à l'amour de Dieu, & de vostre prochain; au lieu qu'il semble qu'elle vous effarouche comme un

taureau, & vous fait heurter teste baissée ; non seulement tous ceux que vous rencontrez dans vostre chemin , mais les Maistres qui vous ont nourri.

Je recherchois ces iours passez d'où procedoit cette furie & fièvre frenetique , qui a produit en vous vne si grande oubliance de vostre nom , de vostre naissance, de vostre nature mortelle & fragile, de la Prestrise, de l'Episcopat , & du Cardinalat ; vous laissant à penser , si ayant perdu la souuenance de toutes ces choses , on peut croire que vous ayez retenu celle de Dieu. Je croyois au commencement que quelque magicien vous auoit enchanté , & lié les plus nobles facultez de l'ame, ou qu'un negromancien vous auoit fait apporter de l'autre Monde l'eau du Lethe, & vous en auoit fait boire par surprise : ou qu'un herboriste Oriental, ayant trouué le Lothos d'Homere, vous en auoit fait part, & que par mégarde vous l'auiez mangé, comme fit Ulysse. I'ay trouué trois causes , qui sont , selon mon aduis , les plus certaines. Et afin que ie ne me rende pas vostre semblable, ie ne déroberay rien à mes Maistres, & confesseray libre-

Seneca
de Be-
nef. lib.
3. cap. 4.
Memo-
ria mi-
nimum
tribuit,
quisquis
spei plu-
rimus.

ment que Seneque m'a appris la premiere , lors qu'il dit, *que celuy-là oste quasi tout à la memoire , qui donne beaucoup à l'esperance.* I'ay trouué par cette regle, que vous qui esperez tout , ne vous souue-

nez de rien , que de ce qui conduit vos desirs, ou de ce qui les arreste, & les recule. I'ay aussi reconnu, que vous ne pouuez estre yure de la douceur de vostre fortune, sans estre oublieux de celle que vous auez quitté, & de ceux qui vous en ont tiré. Vous allez avec telle impetuosité à ce que vous

voyez deuant vous, que vous ne tourniez iamais la teste pour voir ce que vous auez laissé derriere. Vous ne regardez ny la terre, où vous remarqueriez vostre origine, & vostre fin; ny le Ciel, qui vous aduertiroit de vostre foiblesse, & de vostre petitesse : vous ne faictes pas reflection sur vous-mesmes; & nous pouuons dire avec verité, ce que Dieu disoit de Moab, *que vostre ambition va par dessus vos forces.* Elle s'estend non seulement au delà du Royaume, dans lequel vous auez le plus grand credit, & tantost la meilleure part; mais au delà du monde, & d'autant de mondes que l'orgueil d'Alexandre en desiroit deuant qu'il rencontrast sept pieds de terre, apres la conqueste de la centiesme partie du pays que nous habitons.

I'ay aussi attribué vostre défaut de memoire aux flatteurs qui vous enuironnent, que vous cherissiez grandement, & qui vous esleuent par belles paroles & meschans escrits, au delà des Cieux, iusques dans les espaces imaginaires de vostre vanité : dequoy on ne s'estonne pas; mais de deux choses : l'une, qu'on entreprenne de persuader au public tout ce qu'ils vous ont fait croire, & qu'ils ne croient pas; l'autre, qu'il se trouue non seulement des parasites & sicôphantes, qui veulent par vos loüanges changer leur condition en vne meilleure, mais des plus grands du Royaume de toutes qualitez, qui se rendent esclaués de vostre puissance, & s'etellent au chariot de vostre gloire pour vous conduire à la fin de vos desseins, s'ils en peuuent trouuer vne arrestée.

Il faut que ie vous confesse, que les soumissions basses, les seruices lasches, & les respects

de ces gens-là qui sont dans leur cœur vos ennemis, m'ont fait souuenir d'une Histoire que j'ay leuë autrefois dans Iustin. Il dit, qu'un homme d'assez basse condition, nommé Sandrocot, fut esleu Roy des Bactrians par un estrange artifice : il auoit fait appriuoiser des Lyons, que le peuple croyoit estre sauuages, qui le venoient lecher lors qu'il dormoit à la campagne; il y faisoit aussi rencontrer un elephant priué, qui se couchoit deuant cét homme, & le receuoit sur son dos avec témoignage de quelque veneration.

Ces ruses donnerent vne si ferme opinion aux Bactrians, qu'il y auoit quelque diuinité dans Sandrocot, qui estoit recogneuë par les plus fiers animaux, qu'ils se resolurent de le faire leur Roy. Il est vray, que beaucoup de Seigneurs, que nous estimions des lions, vous ont leché avec leurs langues flatteuses; & que des elephās (c'est à dire les plus releuez du Royaume) ont fait des soumissiōs si basses deuant vostre puissance, que cela vous a persuadé que vous pourriez estre Roy : le petit peuple a crû, que vous l'estiez en effect, lors qu'on vous a veu flatté par tant de vaillans, & porté sur le dos de tant de Grands. Cela vous a esté autant honorable en apparēce, comme il est infame par effect à ceux qui ont abaissé leur naissance pour releuer la vostre. Les ambitieux, & les auaricieux sous l'esperance de quelque augmentation de fortune incertaine, ou d'un employ ruineux, ont serui à l'acheminement de vos desseins, & ont presté leurs mains pour vous ayder à destruire le Royaume & la Royauté. Entre deux Princes du

qui estoient en estat de vous resister, vn s'est mis au dessous de vous pour recueillir ce que vous auez mesprisé : l'autre , tres-generoux , a refusé l'alliance de vostre sang , comme indigne d'estre meslé avec le sien ; s'est maintenu dans son rang, & tout ce qu'on a peu gagner sur luy, a esté, qu'il cacheroit son ressentiment , que la dissimulation ne scauroit retenir lōg temps sans faire tort à son courage. Nous auons veu vn Prince sorti d'vne des plus grandes maisons de l'Europe , & des mieux establies dans la France , qui s'est rendu suiuant de celuy qui est ennemy iuré de sa famille, depuis le siege de la Rochelle , & a fait vœu qu'il la ruinerait ; à quoy il a desia bien trauaillé. Celuy que nous designons n'a pas sceu recognoistre, qu'on luy fera la grace du Cyclope , de le manger le dernier , apres qu'on aura fait vne seconde querelle à sa femme : ce qui sera bien aisé , & arriuera bien tost. Pour les Seigneurs , qui estoient des plus estimez de France , & qui auoient rendu beaucoup de preunes de leur generosité ; on s'estonne comme ces ieunes lions , qui auoient desia secoué leur crin , & fait sentir leurs ongles , se sont laissez emmuseler & rendre esclaués , parce qu'on les nourrit d'vne vaine esperance, qu'il leur a fait quitter l'honneur solide pour courir apres vn ombre qui leur paroist plus grande. Apollonius voyant vn charlatan , qui auoit dressé vn lion à tendre la patte pour demander l'aumosne , se prit à pleurer ; & dit, qu'il auoit compassion d'Amasis Roy d'Egypte , l'ame duquel estoit dans cet animal. N'est-ce pas vn object digne de larmes, de voir des esprits que la creance publique tenoit
pour

pour genereux , mandier la faueur d'un homme, qui fait semblant d'en vouloir faire part à plusieurs, & la reserue tousiours pour soy? C'est chose bien plus estrange , que ces Messieurs flattent vostre vanité , & se soumettent à vn vsurpateur, pour le porter sur leurs espauls , & le mettre, s'ils pouuoient , sur leurs testes. Entre ceux-là nous remarquons des Prelats , qui tiennent des premiers rangs en l'Eglise , qui ont abaissé leurs dignitez & leur courage , iusques à prendre des charges & qualitez de grand Vicaire, & le contre-rolle de vostre maison. Je ne dis rien d'un tas de flatteurs de toutes conditions, qui vous assiegent, & vostre table ; qui sont payez aux despens du Roy & du public pour chanter vos loüanges , & pour vous seruir de mouchars. Entre ceux-là sont vos escriuains à gages , qui sont la pluspart vos pensionnaires , & comme domestiques , nourris & recompensez pour aller de maison en maison releuer vos actions , & faire toutes les sepmaines des libelles remplis de calomnies contre ceux que vous n'aimez pas, & farcis de flatteries pour vous. Vous imitez en cela ce Psaphon, qui auoit dans des cages quantité de perroquets, merles, pies, geays, sanfonnets , & autres oyseaux de semblable nature ; ausquels ayant enseigné , avec vntres-geand soyn , à dire souuent *Psaphon est vn grand Dieu*, & les ayant laschez , ces escoliers qui repetoient tousiours la seule leçon qu'ils sçauoient, attirerent le peuple ignorant à dresser des autels à cet imposteur. Vos flatteurs, par parole, & par escrit, vous procurent tant qu'ils peuuent les mesmes honneurs ; & ne tient pas à eux que vous ne montiez

au ciel *par les eschelōs du mensonge*, ainsi que Tertul-
lian disoit *qu'en auoit entrepris d'y faire aller Romulus*.

Pardonnez-moy, si ie vous dis, que prenant
vostre vol au ciel, ou aux espaces imaginaires;
vous nous deuriez donner quelque benediction,
plustost que les maledictions qui sont dans vos
escrits. Vous feriez mieux de nous laisser le pre-
sent de la paix, à l'exemple de nostre Seigneur,
que de nous ietter dans la guerre, que vous pro-
curez par ambitio, ou prouoquez par le desespoir.
N'avez-vous point de moyen de vous faire riche
en loüanges, qu'en desrobant tous les honneurs
de la terre, sans considerer que vous seriez bien
malheureux, si vos vertus n'estoient releuées que
par les vices d'autrui; ny vos belles actions re-
cognuës, si celles de tout le reste des hommes ne
paroïssoient fort laides?

Voilà l'estat auquel vostre orgueil & les flatte-
ries vous ont reduit: qui est tel, si nous croyons
à saint Gregoire, *que vous estes semblable à l'Ange*
apostat; parce que vous ne voulez pas estre semblable aux
hommes qui ont esté deuant vous, qui viennent avec vous,
& qui viendront apres vous. Cette presumption des-
reglée pourroit estre excusée par la folie, si elle
n'estoit accompagnée de malice, ou de rage, lors
que vous rendez le principal object de vostre fu-
rie, la personne qui deuroit estre celuy de vostre
reconnoissance, ou au moins de vostre cōpassion.
Vous estes tellement abandonné à vos passions,
qu'il est hors de vostre pouuoir de les retenir; &
la maladie de vostre esprit est si pressante, que
vous ne sçauriez trouuer vn diuertissement.

Vous faites des propositions de respondre à la

l'écriture de Monsieur, ou de luy faire vne belle remonstrance : apres cinq ou six lignes vous ne vous souuenez plus de vostre dessein ; vous quittez là Monsieur, & deschargez vostre rage sur la Reyne Mere de S. M. Il est impossible, que vostre chole-re estant eschaufée, vous oubliez ce qui a esté par vn iuste iugement de Dieu, prouoqué par vostre crime, la seule cause du renuersement de vostre cerueau. Au lieu d'employer vostre plume pour la defense du Roy (comme vous dites) ou pour dresser vne belle instruction à Monsieur, vous iettez là le stile, & prenez la stilette pour blesser la Mere de celuy que vous voulez defendre, & de celuy que vous desirez d'instruire.

Je diray bien d'auantage, sans apprehension de paroistre scandaleux, parce que ie suis tant que ie peux d'estre semblable à vos escriuains. Vous tachez de redre leur plume plus cruelle que le foiet avec lequel ce sacrilege Estienne, Persan de nation, & le Moyne Theodote, semblable à celuy qui est auprès de vous, batirent la bonne & sainte Imperatrice Anastasia, Mere de Iustinian, surnommé Pogonat, ou la grand' barbe. Elle souffrit cet affront, pour s'estre opposée à la ruine de son fils, lequel vangea à son retour cette iniure : & les deux scelerats peu de temps apres furent bruslez tous vifs. Il est vray que vous n'avez pas en la puissance de venir à ces extremitez ; mais vous avez eu l'effronterie de battre iusques au sang, avec les foiets des langues & plumes mesdisantes, la plus grande & la plus vertueuse des Reynes de la Chrestienté : elle possede avec cette qualité celle de Mere de vostre Roy, & celle de vostre Maistresse &

Bien-faëtrice ; & vous n'avez rien de grand que sa bonté ne vous aye ou donné, ou fait donner. Ce qui est le plus fascheux, est, que l'ingratitude soit cachée sous la pourpre d'un Cardinal ; que vous soyez un poireau sur cette belle face ; qu'on vous voye comme une tache en cet habit des Princes Ecclesiastiques ; que vous ayez fourni quelque sujet de mespris aux esprits foibles des enfans de l'Eglise, & prouoqué les blasphemés de ses ennemis. On espere que ces maux seront reparez, non seulement par les blasmes que ceux qui possèdent plus dignement cette dignité eminentissime vous donneront, mais par les déclarations publiques que la Sainteté fera à toute la Chrestienté, que vostre conduite, qui est contre les reigles de Dieu, doit estre reprouvée. Le saint Pere garde les ordres de l'Euangile, il commence par les aduertissemens charitables, & particuliers : mais lors que la prudence aura recogneu qu'ils sont inutiles, & que les huilles qu'on veut mettre sur vos playes ne font qu'allumer les feux de vos passions, elle employera sans doute des remèdes plus cuisans. Apres qu'on aura rapporté à l'Eglise, de laquelle il est le Chef en terre, ce que vous faites contre elle tous les iours en France, en Allemagne, & aux Pays bas, & les scandales que vous produisez en iettant la discorde entre le Fils & la Mere, l'Espoux & l'Espouse, & entre les Freres, on déclarera que vous devez estre tenu pour un payen & publicain, qui ne voulez plus escouter la voix de vostre Mere, mais qui entreprenez de ruiner celle des enfans de Dieu, comme vous faites celle des enfans de France.

Cette iustice fera changer de langage à tous ces bons Religieux, & petit peuple, qui vous ont estimé vn Beat, apres la prise de la Rochelle; & qui ont perdu vne partie de cette bonne opinion, lors que vous la faites fortifier pour la vendre ou la laisser surprendre. On commence à cognoistre que vous n'avez pas cherché la gloire de Dieu, mais la vostre; ny le bien de la Religion, mais vos auantages; que vous estes maintenant, non le fleau des heretiques, mais celuy des Catholiques; &, comme disoit le Prophete, *le marteau qui brise toute la terre.* Vous l'avez troublée par la guerre que vous mettez par tout, & par la faim & la peste qui l'accompagnent. Ier. 50.

En quelle execration serez vous, & où trouuerez vous seureté, si tous les esprits sont destrompez, & si vos artifices ne peuuent plus cacher aux fols ce que les sages ont descouuert il y a long temps? C'est en vain que vous prenez & donnez la peine de faire des liures à vostre loüange & iustification, & pour des-honorer ceux que vous avez ietté dans la misere. Le liure que vous avez rendu public, & qui est leu par les sçauans & ignorans, par les vertueux & vicieux, est celuy de vos actions, qui sont recognuës d'vn chacun; celuy-là refute tous ceux que les colporteurs de Paris crient, & que vous faites disperfer avec beaucoup de soin. Comme le grand Dieu faisoit Ezech. 43. monstrier à son peuple, pour le confondre, la desolation que leurs pechez auoient mis dans le temple; il nous suffisoit aussi de faire voir les ruines que vous avez fait en France, & ailleurs, & de presenter les effects de vostre ambition, iniustice,

violence, & auarice, au lieu de nous amener à répondre à vos escrits. Mais nous sçauons que vous estes pointilleux, & que vous & vos flatteurs tâchez de tirer auantage de toutes choses, sur tout de nostre modestie. Vous la prenez pour confession des crimes que vous nous imposez, & pour vn adieu de ce qui est dit à vostre louange. Pour ces considerations, nous auons iugé qu'il estoit à propos, en vous marquant les fautes que vous auez fait, de vous coter aussi les calomnies & impertinences que vous auez escrit & fait escrire.

Nous commencerons par la Remonstrance que vous auez fait à Monsieur, parce qu'on croit qu'elle est de vostre stile; & que par honneur vous meritez de passer le premier entre les escriuains. Je trouue à l'entrée, que vous auez bronché, & auez mal debuté, lors que vous dites, *Monseigneur, les monstres d'enuie, d'auarice, & d'ambition, qui vous environnent.* Ce mot de *monstres* est capable de faire peur ou horreur: vous n'avez pas sceu que les commencemens des escrits doiuent estre doux & honnestes, pour obliger & engager toute sorte de personne à les lire. Ces regles ne sont bonnes que pour les âmes exemptes de passion; la vostre, qui est tousiours agitée par la cholere, la fait paroistre dans la premiere parole, & nous iugeons que vostre discours sera quelque monstre, puis qu'il commence, *Monseigneur, les monstres*: certes vous deuiez vn peu flatter, avec la main plaisante, le bras auquel vous vouliez bailler vn coup de lancette; mais vous le faites apres. Vous donnez des louanges impertinentes à celuy que vous auez representé comme environné de monstres,

R. *Ronse*
à la Re.
monstrā-
ce faicte
à Mon-
sieur.

qu'il n'a pas l'esprit de recognoistre par leurs figures estranges, qui ont la teste d'un dragon d'enueie, les mains d'une harpie d'auarice, & les ailes d'une aigle d'ambition. On voit bien que vous n'escriuez pas avec intention de conuertir Monsieur, ny de l'instruire, mais de l'effaroucher, & de donner quelque apprehension de ses monstres au petit peuple, qui se doit mocquer de vos escrits malins, iniurieux, & impertinens.

Après les monstres, vous taschez de faire voir à Monsieur le beau visage de la paix, *que vous dites estre grandement alterée par son estoignement.* Qui est la cause de ce mal-heur? ceux qui souffrent toute sorte d'extremitez, ou ceux qui les font souffrir? ceux qui ont emprisonné la Reyne Mere, & chassé Monsieur Frere unique du Roy, ou ceux qu'on a voulu accabler? Il est certain, que la paix de la maison du Roy assure la publique; que les troubles dans la source de nostre bien paroissent dans tout le cours de la riuere; qu'il est impossible que les chefs de la famille Royale soyent frappez, que tous les membres ne soyent estonnez: les nerfs, qui sont les forces de l'Estat, ont leur origine en la teste; elle ne peut estre blessée que tout le corps ne tremble. Trouuez-vous estrange qu'un Frere unique d'un Roy sans enfans, prenne quelque part à la conseruation du Royaume? se garde d'oppression, & resiste à celuy qui a toutes les marques d'un vsurpateur? Vous reietez ce nom, iusques à ce que vous ayez acheué ce qui est desia bien auancé, & vous reseruez le titre de Souuerain pour la derniere chose que vous desirez de prendre.

Nous confeſſons avec vous, & reſſentons plus tendrement que vous ne faites, que c'eſt vn grand mal-heur pour le peuple; & diſons avec ſouſpirs & larmes : *Cependant que le ſuperbe s'eſtue, le pauvre eſt brulé.* Nous eſperons que vtilité publique ſera plus grande, que le mal qui ſera ſouffert par quelques particuliers. Si vous eſtiez charitable, vous y apporteriez le remede, qui eſt tres-aiſé, puis qu'il ne conſiſte qu'en voſtre retraite : mais vous eſtes obſtiné en vos pourſuites, & comme vous auez dit ſouuent, il faut que vous voyez iuſques où la fortune peut porter vn homme; ſans conſiderer que les felicitez ſont ſemblables aux palais enchantez de Menippus. Apres auoir veu beaucoup de maiſons & de meubles magnifiques, on ſe trouue aſſis ſur vn fumier. Les faueurs extraordinaires des Roys viennent avec impetuoſité, comme rauines qui paſſent avec vn grand bruit, & ne laiſſent que de l'ordure & du ſable. Si vous quittiez vos meditations de vanité, pour prendre comme Prelat de l'Egliſe, comme Chreſtien, & homme ſage, celle que ie vous fournis, nous aurions la paix, & vous feriez voir ſa beauté dans les terres de France, telle que vous taſchez de la dépeindre dans vos eſcrits. Vous la deſchirez avec les meſmes mains qui prennent la plume pour nous faire ſon excellence & grande magnificence; & vous eſtes conuaincu de pecher contre le ſaint Eſprit, en deſtruiſant vn bien duquel vous cognoiſſez les auantages.

Vous nous aſſeurez, *que le Roy eſt d'un acceſ tres-facile* : & vous dites vray; on l'approche plus aiſement que vous. *Il eſcoute plus que Prince du monde les*

plaintes de ses sujets : vous ne mentez pas ; mais il le feroit plus souuent sans vous. *Tous ceux de la Cour luy parlent tous les iours* : nous l'aduouons, pourueu que ce ne soit pas contre vous , & en particulier, vous y auez donné si bonne ordre, que la verité des maux que vous auez fait, que vous faites & voulez faire, ne peut aborder le Roy : on fait plus d'essay des personnes qui doiuent entretenir sa Majesté que des viandes qu'elle doit manger. Si ceux qui ont vn grand interest à sa cōseruation, & de son Estat, estoient asseurez que les chemins sont aussi bien fermez aux fièvres qui peuuent attaquer son corps , comme aux lumieres qui peuuent esclairer son esprit, le leur iouïroit d'une grande tranquillité.

Vous sçauiez bien, & vous l'auez practiqué ainsi ailleurs , que c'est vn crime capital de parler à l'oreille du Roy, si on n'est dās vostre cabale, & pour donner quelque aduis qui vous soit agreable ou profitable. Que si on auoit dit en secret quelque chose indifferente , sur la simple conjecture & iugement temeraire , vous rendez mauuais office à celuy qui a esté si hardi , sans vous estre affidé, de parler ou en cachette, ou tout bas. La seconde qu'il entreprend la mesme chose, il est chassé par la supposition du crime , qui est aujourd'huy le plus grand , d'auoir intelligence avec la Reyne Mere du Roy , ou avec Monsieur son Frere unique. Vous sçauiez-bien que cette presumption a fait bannir les sieurs de Belingant & Iacquinoz, premiers valets de Chambre fort fideles , & enfans de bons & vieux seruiteurs : que le mesme soupçon a fait cōmander de se retirer à Messieurs

de Souuray & de Liancourt , premiers Gentils-hommes de la Chambre , à Monsieur Deſguilly, & à pluſieurs autres : ils n'ont eſté eſſoignez & diſgraciez que parce qu'on a crû que leurs charges & les bonnes graces du Roy leur dōnoient les moyēs & le credit de parler avec quelque liberté, & en ſecret. Perſonne ne poſeroit entreprendre : il ne reſte aupres de ſa Majeſté que vos creatures corrompuës, ou ceux que les frequents banniſſemens & autres violences ont eſpouuantez, & ils ſouſpirent pour la tyrannie que vous exercez ſur l'eſprit du Roy & ſur leurs langues.

Par ces diſcours vous voyez que nous ne diſons pas qu'il y aye du manquement du coſté du Roy , qui ne ſçauroit auoir cognoiſſance du mal , auquel par ſa bonté & Juſtice il apporteroit les remedes ; eſtant enuironné de plus de gardes contre la verité , & contre ſes amis & ſeruiteurs , qu'il n'en a contre ſes ennemis. Nous pouuons dire, avec tres-grande douleur, que vous eſtes comme ces ſorciers , qui pour faire voir des illuſions enferment vn homme dans vn cercle , duquel il ne peut ſortir ; ou comme cét insolent Popilius, Romain , qui en fit vn à Antiochus pour faire reſoudre là dedans tout ce qu'il auoit enuie de tirer de luy. Nous n'accuſons pas le Roy : mais nous en auons compaſſion ; & nous ſerions tres-marris de luy auoir donné la moindre partie du blaſme, qui vous doit eſtre reſerué tout entier : comme nous aduoüions qu'il n'y a point de Prince plus vertueux que luy , nous ſommes auſſi forcez de confeſſer qu'il n'y a point d'homme qui le ſoit moins que vous.

Il semble que vous entriez dans les reproches de ce que vous auez fait pour Monsieur ; vous dites *que vous l'auiez trouué esloigné des affaires, lors que vous y estes entré : vous ne l'en auez pas approché, & l'auiez esloigné non seulement des affaires, mais des bonnes graces & de la presence du Roy ; l'auiez poursuiuy en armes, chassé hors du Royaume, & réduit par la saisie de ses reuenus, à l'assistâce des estrangers. Vous ne luy auez iamais procuré du bien, & luy auez fait beaucoup de mal : c'est le premier Enfant de la maison, en laquelle vous n'estes & ne pouuez iamais estre que seruiteur : vous deuriez dire que vous estes inutile, comme nostre Seigneur vous l'enseigne, quand vous auriez fait tout ce que vous pouuez pour le seruice de celuy auquel vous estes obligé de le rendre.*

Pag 8.

Vous commencez les Histoires du temps passé, par celles que vous dites que le Marechal d'Ornano (que vous n'omez Colonel) a fait : vous luy d'onnez les qualitez *d'homme hardi & ambitieux*, vous appelez hardi tous ceux qui ont entrepris de vous resister ; & ambitieux, tous ceux qui ont voulu auoir quelque part à la puïssâce que vous auez desiré de posseder tout seul. Côme vous trouuez tous les iours quelque moyen pour faire du mal aux viuâs que vous n'aimez point ; vous inuentez aussi quelque crime contre les morts qui ne se defendēt pas. C'est d'oc depuis trois mois seulemēt, & quatre ans apres la mort du Marechal, que vous auez sçeu *qu'il formoit dedans la France, & au dehors, des grandes factions* : Il le faut croire ainsi, parce que vous le dites sans preuue, comme vous l'auiez fait mourir sans iustice ; à laquelle vous le pouuiez

Pag 9.

Pag. 10.

renuoyer auſſi hardiment , que vous auez fait le Mareſchal de Marillac , pour faire déplaiſir à la Reyne Mere , deuant meſme qu'elle fuſt arreſtée. Ce que vous faites contre ceſtui-cy par corruption de teſmoings , vous l'auiez fait contre l'autre par oppreſſion , n'ayant rien trouué dans ſes actions contre le ſeruiſe du Roy & le bien de l'Eſtat , auquel luy & les ſiens ont eſté tres-fideles & tres-vtiles. Maintenant vous nous voudriez perſuader , que ſon ombre a traité avec celle de feu Monsieur de Sauoye , avec lequel il n'a iamais eu intelligence en ce monde, ny à la Cour avec l'Abbé de l'Eſcaille ſon Ambaſſadeur. Vous n'apportez point de preuue de ce que vous dites; & la confirmation de ce que i'auance eſt tres-forte, parce que vous auriez eſté infidelle au Roy, & auriez dérobé vn grand exemple au public, ſi vous n'euffiez fait chaſtier courageuſement par les Iuges ordinaires vne trahiſon faite contre le Roy & ſon Eſtat , par vn Mareſchal de France. La conſideration de Monsieur ne vous deuoit point retenir; vous luy auez fait plus de déplaiſir de faire pourrir en priſon ſon ſeruiteur que vous des-honorez, que de le mettre entre les mains d'vn bourreau, qui d'vn ſeul coup euſt tranché ſa teſte & ſes miſeres : outre que ce ſupplice , ayant découuert les pretenduës menées

Pag. 11. du Mareſchal, euſt peut-eſtre arreſté les deſſeins ſur l'Italie , & la ruine de tant de villes & de peuples, que vous faites ſortir de cette conſpiration, & qui viennent en eſſect pluſtoſt de voſtre ambition, & de vos querelles particulieres. Il faudroit eſtre beſte pour ne le croire pas , & on paſſeroit pour ignorant des affaires du môde, ſi on prenoit

le change que vous voulez donner , pour tromper tous les viuans, aux despens de la reputation d'un homme que vous auez fait mourir , & l'honneur duquel vous tuez aussi impunément comme vous auez fait son corps.

Pag. 12
 Afin que vous ne croyez pas que ie sois aussi injuste que vous , & que ie n'approuue rien de tout ce qui part de vostre plume , ie confesseray que i'ay trouué vn fort bon traict , & vne belle verité que vous auez dit , en voulant faire le Politique & homme serieux ; voicy vos paroles : *Ne doutez pas, Monseigneur, que les desseins de ceux qui ont l'honneur d'approcher les grands Princes, ne montent tousiours & qu'apres s'estre donné creance aupres de leurs Maistres, ils ne les portent à tout entreprendre. Il y en a peu qui le fassent pour auancer leur gloire ; mais pour leur tesmoigner qu'ils leurs sont tout a fait necessaires , & de là s'acquerir vne auctorité dans leurs actions , dont bien souuent ils abusent.*
Pag. 9.
 Je croy que Dieu vous a forcé, comme il a fait quelque fois le malin esprit, de dire ces belles veritez, que nous recognoissons par vne mal-heureuse experience en vous. Nous ne les auons pas decouuertes encore dans les actions des seruiteurs de Monsieur ; auquel l'exemple de vostre insolence , & de l'abus que vous faites de l'auctorité du Roy vostre Maistre , seruira de meilleure instruction que tout ce que vous pouuez iamais escrire.

Vous parlez apres à vostre mode par enigmes,
 Pag. 13
 comme les Oracles ; pour tascher de persuader que les factions du Colonel ont esté grandes, & que Monsieur en a voulu entreprendre pour le salut de son seruiteur : qui doute qu'il ne feust

tres-aisément tiré de prison, si le respect qu'il a toujours rendu au Roy n'eust retenu son courage & sa main. C'est faire tort à l'innocence, de la deliurer par la violence, qui fait soupçonner qu'on craint la découuerte de quelque crime: celui qui en est exempt, doit plustost estre accompagné au supplice avec larmes, que d'en estre retiré avec les armes. Le Fils de Dieu tança le Disciple, qui le vouloit garantir d'oppression avec l'espée. Le Maistre s'accuse, qui rompt la prison dans laquelle on a mis son seruiteur. Il faut faire ce qu'on peut avec sollicitations & prieres, pour conseruer la vie à vn homme de bien; mais il ne se faut pas rendre coupable, pour monstrier qu'il ne l'est pas. Monsieur & son Conseil ont suiui ces maximes, en l'affaire du Colonel: on n'a point fait d'entreprise pour le mettre en liberté, parce qu'on n'a pas crû qu'on le peust faire mourir par iustice; & on a esperé que le tēps, qui a esté preuenu par sa mort, pourroit faire cognoistre la verité.

Pag. 14

C'est vn crime, dites vous, d'attenter aux Ministres de l'Estat, qui sont comme les organes de la Monarchie. Vous appelez attenter aux Ministres de l'Estat, de leur resister ou de faire paroistre leurs mauuais desseins, non pas d'entreprendre sur leurs personnes. Vous ne doutez pas, que si on eust voulu prendre ce chemin, que quelques esprits violens croyoient estre le plus court, on n'en fust venu à bout, nonobstant toutes les gardes qui vous donnent la hardiesse de faire mal, & ostēt l'apprehension d'en receuoir. Vous ne prenez aussi ce mot d'attenter, que pour s'opposer; en quoy vous m'pardōnerez, si ie vous dis libremēt que vous auez tort de parler en ces termes. Vous ne doutez pas

par exemple, qu'un Frere unique d'un Roy sans enfans, ne puisse se faire entendre par viues raisons, & mesmes par armes s'il y estoit contrainct, contre un Ministre d'Estat qui prendroit toutes les marques d'un vsurpateur, & qui voudroit perdre tous ceux qui ont quelque interest à la conseruation du Roy, & de son Royaume: vostre proposition est donc trop generale. Or vous scauez bien, qu'un organe ou membre estant pourri on le retranche si on peut, de peur que la gangrene ne saisisse le cœur, & qu'il ne se fasse transport au cerueau; ce qui cause des terribles conuulsions, & en fin apporte la mort: il la faut tousiours prevenir, si on peut, iusques à employer le fer & le feu, s'il est impossible de sauuer autrement tout le corps. Pour un homme qui vse souuent de la medecine, vous estes aussi mauuais Medecin qu'Escriuain.

Vous faites paroistre que vostre Remonstrance, qui deuroit estre remplie de respect (si vostre intention estoit que Monsieur en fist son profit) n'est autre chose qu'une medifance, & un descri de sa personne, si elle en pouuoit receuoir par la vostre. Vous luy dites, *que la vanité de ses efforts l'a descrité dans la France, & chez les estrangers.* Ces efforts ont esté inuisibles par le passé; ce mot signifie une entreprise ouuerte par les armes qui n'ont pas reüssi: nous n'en auons point veu d'heureuses ny de mal-heureuses, deuant la publication de vostre escrit: vous auez eu sans doute des visions; elles vous sont ordinaires, sur tout quand vous craignez & desirez. La France, & les autres Pays, ont tres-bonne opinion de la personne de Monsieur; l'auront de la prudence de ses resolutions, lors que vous le contraindrez d'en

Pag. 35.

prendre des genereuses, & loueront ses executions si le salut du Roy & de l'Estat l'obligent à en venir iusques-là. Pour lors on fera trouver faux ce que vous dites, *que Monsieur est pour esmonvoir des grands troubles, & pour en terminer bien peu.* Sans doute vous auez deuant les yeux vostre fortune, lors que vous auez escrit de celle de Monsieur. Vos exploits paroissent grâds auez des lunettes d'approche, que la flatterie & la presumption vous ont donné. Ceux qui voyent sans artifice ce que vous auez fait, trouuent que vos desseins ont eu quelque prosperité iusques à present, parce que vous n'avez rencontré personne qui vous aye résisté viuent, & que trois choses vous ont grandement aidé: la foiblesse de vos ennemis; la mort, ou procurée ou autrement arriuée, de ceux qui vous pouuoient arrester, en faisant cognoistre la verité au Roy, ou en s'opposant genereusement à vos entreprises; & en troisieme lieu du Roy, sa conduite, ses forces reglées, & ses Finances. Avec tous ces aduantages nous ne voyons rien de parfait; & pouuons dire avec verité que toute l'Europe, mais principalement la France, sont émeuës par vostre imprudence & malice. Personne ne peut croire, que vous ayez moyen de bien deuider toutes ces fusees, si vous n'employez les Parques, comme vous auez desia fait fort souuent, pour couper beaucoup de filets: mais souuenez-vous, aussi, qu'elles portent des ciseaux pour le vostre; vous n'estes qu'un seul homme, mortel, & de petite santé.

Vous entrez dans la raillerie, & tésmoignez
 Pag. 15. d'auoir du regret, *que Monsieur n'aye faict eslection de mini-*

de ministres semblables à ceux du Roy; parce que vous ne seriez en peine, que d'escrire les combats qu'il auroit gaigné sur les ennemis de l'Estat, & la prise de tant de villes, où sa naissance & son courage luy donnent droit.

A la verité si Monsieur auoit la bourse & les armes desquelles vous disposez, il auroit fait ce que vous faites semblant de desirer. Vous l'avez tousiours empesché, n'ayant peu souffrir qu'il aye commandé dans les armées; & ayant donné des ialousies estranges au Roy, parce que vous auiez apprehension de la puissance de Monsieur; & aussi que la vanité & l'auarice vous ont porté à estre Generalissime. Vous estes remercié des belles offres que vous faites d'estre escriuain des exploits de Monsieur. Il dit qu'outre que vous estes peu veritable, & n'estes point iudicieux, vous avez vn stile fort grossier; il veut auoir vn meilleur trompette de gloire: & comme il ne desire point d'historien passionné pour luy, il reietté ceux qui mentiroient contre luy: outre cela il voit, que vous estes tellement accoustumé à vous attribuer l'honneur de toutes les executions, que vous ne laissez rien ny au Roy, qui a commandé, ny à ses seruiteurs qui ont esté dans les perils, & ont perdu la vie, lors que vous estiez mieux gardé que le Roy vostre Maistre, & dans vn logement bien retranché, celuy de S.M. ne l'estant pas.

Après auoir tesmoigné vostre regret de ce que vous ne pouuez estre l'historien de Monsieur, vous faites voir que vous voulez estre denonciateur contre luy, & son Iuge, sur la deposition de Chalais, & de ceux qui viuent encore; lesquels se vengeans dans la misericorde du Roy, ont fait passer Monsieur pour

coulpable en quelque choſe. Voylà voſtre diſcours : contre lequel , pour ce qui regarde le Comte de Chalais , on employe ce qui eſt dans la lettre de Monsieur ; à quoy vous n'avez rien peu repartir. Ce qui deſcouvre voſtre malice, eſt, que vous faites ſemblant dans deux ou trois mots de cacher des grands myſteres , qui ont eſté eſuentez ; ce que vous diſſimulez. Il faudroit auoir les depoſitions , & le procez , pour le produire contre ceux que vous deſirez de rendre ſuſpects : mais comme vous avez ſacrifié vn homé à voſtre artifice , vous avez auſſi ſacrifié toutes les procédures qui ont eſté faites contre luy, & ſes déclarations, à l'honneur des perſonnes qui ſeruent à preſent à voſtre deſſein. Nous ne condamnons pas les Iuges, mais les teſmôins que vous avez corrompu : & nous ne déclarons pas innocent celuy qui par vos perſuaſions & promeſſes d'impunité s'eſt confeſſé coulpable ; il méritoit de mourir pour cette laſcheté ; mais non pas d'eſtre haché de trente deux coups. Si ſon procez ne faiſoit voir vos tours de ſoupleſſe , non les mauuais deſſeins des Miniſtres de Monsieur, vous l'auriez pluſtoſt conſerué pour le mettre en lumière , que de le ietter dans le feu, comme vous avez fait.

Pag. 17. Quand aux abolitions qui ont eſté priſes, vous déclarez aſſez par la ſuite de voſtre diſcours de qui vous parlez. Pour laiſſer à part les pieces qu'on a ioué pour extorquer quelque confeſſion ſi generale qu'elle ne conclud rien ; vous ſçavez bien dans voſtre ame , & quand vous ſeriez ſi eſfronté de le deſnier , les lettres du grand Seau & les regiſtres du Parlement prouuerôient contre

vous, qu'il n'y a aucune declaration ny cōtre Monsieur ny contre ses Ministres. S'ils aubient esté chargez en quelque chose, ils auroient esté obligez de prendre vne abolition, deuant que de s'asseoir avec vn mortier sur les fleurs de Lys du Parlement. A quoy pensez-vous ? mais à quoy ne pensez-vous pas ? n'est-ce pas sur cette calomnie horrible que vous desirez d'appuyer vos menaces de Charles de Lorraine ? Prenez garde que vous n'ayez pris la tour de Loches pour celle d'Orleans ; & que vous ne soyez plustost le Cardinal de Balüe, que Gaston de France Charles de Lorraine. Monsieur est vne personne, pour la conseruation de laquelle tout le public s'interesse, comme il fait pour vostre ruine, ou pour le moins, pour celle de vostre auctorité. On vous iuge si pernicieux, qu'il n'y a iamais eu monstre contre lequel tant d'hommes se soient armez, comme on en verroit pour vous exterminer, si le Roy vous auoit abandonné, deuant que vous ayez le loisir de bastir cette grande & forte Ville, de laquelle les Cōmissaires de S. M. ont desia tracé les murailles. On est seulement en peine de sçauoir le nom que vous luy donnerez : on dit, que si vous luy laissez celui de Richelieu, on l'appellera Riche lieu des ruines de la France, Riche lieu de la desolation de l'Estat, Riche lieu du sang du peuple, Riche lieu des larrecins faits au Roy & aux gens de guerre. Quelques-vns ont voulu dire, que Boisbel ayant esté basti, il n'y a pas long tēps, on appelleroit vostre ville Babel, apres les confusions que vous auez mis dans le Royaume, dās la maison Royale, dans les Loix, & dans les Finances. On adioute,

que vous ferez vne tour au milieu , comme Nemrod , pour donner l'eſcalade au Ciel , apres que vous aurez pris toute la terre & la mer : mais Dieu vous arreſtera par la diuerſité des langues. J'ay auſſi eſcouté quelques perſonnés, qui ont dit qu'il y auoit dans les Indes Orientales vne Ile de larrons : ſans aller ſi loïn , l'Ifle d'Oleron a eſté appellée par les anciens l'Ifle des larrons ; vous ne vous contentez pas d'en eſtre Gouverneur & Seigneur , mais vous auez voulu auoir en terre ferme vne ville des larrons : & c'eſt peut-eſtre , pour ce ſujet que Mr. le Surintendant des Finances y a deſia fait baſtir le premier & le plus grand logis , & y a retenu place de bõne heure: cela ſoit dit en paſſant.

Fig. 18. Vous eſtes en belle humeur, lors que vous dites , *que depuis que le Sieur de Monſiegot a debité les notions qu'il auoit acquiſes, pendant qu'il eſtoit Secretaire du Conneſtable de Luynes , les affaires de Monſieur ne ſe faiſoient pas ſi à contre-temps.* Je n'ay rien à reſpondre à voſtre raillerie , qu'une choſe : c'eſt qu'on vous cognoiſt pour vn homme qui ne craint pas tant les grâdes notions, puis qu'il vous plaift qu'on ſe ſerue de ce mot , comme les courages bien reſolus , qu'il faut oppoſer à vos finceſſes pour vous combattre par armes contraires. Ceux deſquels vous vous mocquez comme groſſiers , & que vous dites *auoir fait des lourderies* , ont eu aſſez d'eſprit pour cognoiſtre vos artifices ; ont beaucoup de generoſité pour s'y oppoſer, vne tres grande fidelité pour ſeruir leur Maiſtre , & vne parfaite recognoiſſance du bien qu'ils en ont receu. Vous n'aez pas ces belles qualitez, vous eſtes plus fin , parce que c'eſt vn vice ; & n'eſtes pas ſi pru-

dent , parce que c'est vne vertu.

Vous remarquez les fautes que son conseil a fait commettre à Monsieur, qui ne sont pas en si grand nombre que les vôtres , parce que vous n'en cottez que trois. La premiere est, *qu'ils luy ont fait quitter le siege de la Rochelle pour le ramener à Paris.* Vostre face deuoit estre aussi rouge que vostre robbe, si l'effronterie ne vous auoit plus osté de bon sang, que les frequentes seignées, de mauuais. Ne vous souuenez-vous point de ce que vous auez fait escrire dans le libelle de vostre Defense, imprimé vn mois deuant vostre Remonstrance , *que le Roy, qui n'a iamais voulu faire la guerre par procureur, auoit désiré de commander au siege de la Rochelle?* Monsieur s'en retira, non seulement à cause de l'arriuée de S. M. qui luy ostoit sa charge par sa presence; mais encore , parce que vous fistes aussi tost les actions de Lieutenant Generalissime, & en pristres toutes les marques. Deuant que Monsieur partist, vostre temerité fut si grande, que de faire entrer en faction deuant vostre logis le regiment des gardes du Roy, ayant fait retirer de celuy de Monsieur: il ne pouoit plus souffrir cette insolence, sans se porter à vne grande extremité contre vous; ny estre plus long temps qu'avec des-honneur dans l'armée, en laquelle vostre ambition ne luy laissoit plus que la qualité de volontaire. Tant s'en faut donc qu'il aye esté mal conseillé par ses seruiteurs, qui furent d'avis qu'il se retirast; qu'au contraire ils sont dignes d'une grande loüange de ce que la generosité de leur Maistre, qui ne pouoit souffrir vostre orgueil, & sa prudence qui ne le voulut point chastier, furent accompagnées de leur approbation. Le vous

prie, pour l'honneur que ie porte à voſtre dignité, non pas d'eſcrire avec plus de pudeur (car ie croy avec grand regret, que vous l'avez toute perduë) mais avec vn peu d'auantage de memoire; & de concerter vos eſcrits, afin que les propoſitiōs nouvelles ne ſoyent pas contraires aux anciennes. Comment pourriez-vous remarquer ce defaut, & auoir ſouuenance de ce qui a eſté eſcrit vn mois auparauant, veu que les paſſions qui vous agitent, vous oſtent en eſcriuant dans la ſeconde feüille, ce que vous avez couché ſur la premiere? Pour vous moſtrer que ie me trompe moins que vous, prenez garde, s'il vous plaiſt, qu'apres auoir deſteſté en cet eſcrit *les troubles que Monſieur pourroit faire; apres luy auoir predict qu'il ne peut rien entreprendre contre la volonteé du Roy qui luy reuſſiſſe bien; meſmes apres l'auoir declaré incapable de conduire à vne ſinglorieuſe ce qu'il auroit commencé;* vous luy dites ſur le ſujet de la Princeſſe Marie, *que tout le monde ſe preparoit pour l'aſſiſter dans vne boucade d'amoureux, & qu'il euſt trouué vingt mille ieunes hommes qui pouuoient entener ſa Maiſtreſſe: n'eſtoit-ce pas vne ſedition, de ſe mettre à la teſte d'vne ſi grande armée; & vne violence, de rompre la maiſon du Roy? vous monſtrez ſes forces à Monſieur, & luy enſeignez qu'il doit dans quelques rencontres ſ'enſeruir. Mais vous dites, que celui de l'enleuement de cette Princeſſe n'eſt point fait de deſplaiſir au Roy. Qui pouuoit eſtre aſſeuré que cette diſpoſition fuſt dans l'âme de ſa Maieſté, qui faiſoit paroître tout le contraire? Vous qui avez toujours ioué les deux ieux, qui ne ſçauriez faire autrement, & cherchiez en ce temps-là,*

comme vous faites à present, des pretextes pour ruiner Monsieur dans l'esprit du Roy, eussiez crié au tumulte, à la sedition. Vous eussiez eu peur que ces vingt mille hommes, ayant assisté Monsieur en cette occasion, ne l'eussent vn iour fuiui contre vous. Vostre discours est bien esloigné de vostre pensée; vous le faites plus seruir au tēps qu'à la verité, & vous le changez selon que les faisons & les passions vous conduisent.

Ie n'en vois qu'une qui demeure tousiours ferme, qui est celle qui prend sujet de toutes choses pour mesdire de vostre Bien-faëtrice, & pour luy oster tous les droits que Dieu & la nature luy donnent sur ses Enfans. Vous dites que si Monsieur eust enleué avec vingz mille hommes la Princesse Marie, il n'eust offensé que la Reyne sa Mere, & qu'il n'y a point de loy qui nous oblige d'obeir à nos parens en leurs passions. Voylà des belles maximes pour vn Prestre, pour vn Theologien, pour vn Euesque, pour vn Cardinal, & pour vn seruiteur tres-obligé: toutes ces qualitez rendent vostre crime autant infame, comme elles sont honorables. Monsieur, dites-vous, n'est offensé que la Reyne sa Mere. Est-ce vne personne de si petite importance, qu'il ne faille point apprehender de la fascher? n'est-ce pas vne Reyne, vne Mere, & vostre Bien-faëtrice? La premiere condition qui a fait Mr vn grand Prince, ne luy dōne point de priuilege de mespriser sa source, mais de l'estimer d'auantage; parce qu'elle est celle non seulement de la vie, mais de la qualité qu'il possede. Tant s'en faut donc que les Roys, & les Enfans des Roys, puissent estre dispenscz par leur puissance du

reſpect qu'ils doiuent à leurs Meres, que les biens qu'ils ont receus de la fidelité de leur mariage, & par les ſoins de leur education, eſtans beaucoup plus grands que ceux que le reſte des hommes tire de ſes parens, les Princes ſont obligez par la loy de Dieu & de la nature, de teſmoigner plus de recognoiſſance à ceux qui leur ont donné les couronnes avec la vie. L'Eſcriture ſainte, qui a dit,

Eccl. 3. *que celui là eſt maudit de Dieu qui afflige ſa Mere, ne vous a pas enſigné de dire à vn enfant, Vous n'eufſiez offenſé que la Reyne voſtre Mere. Le meſme liure de Dieu, qui dit que la benediction du Pere affermit la*

Eccl. 3. *maison des enfans, & que la malediction de la Mere arrache les fondemens; vous aduertit qu'il ne faut iamais drefſer ſa famille, & baſtir ſa maiſon (ce qui ſe fait par le mariage) contre la volonté des Peres*

D. Ambroſ. de Benedictionib. Auguſt. de Ciuit. Dei. Origenes. *& Meres. Saint Ambroſe dit qu'il faut auoir apprehenſion de leur malediction mal fondée. Saint Auguſtin l'aſſeure, que la vergongne naturelle retient tousiours quelque reſpect enuers les Parens, qui ne peut eſtre effacé par la plus grande malice. Et Origene a dit que le nom du Pere eſt de grãd myſtere, & celui de la Mere de grande reuerence. Si vous auez apporté l'attention que*

noſtre reſpect doit à la parole de Dieu, ſans faute vous aurez remarqué, que ſa Prouidence recommande avec plus de ſoin, & ſous des plus grandes peines, l'honneur & l'obeiſſance que les enfans doiuent à leurs Meres; à cauſe que l'infirmité de leur ſexe eſt ſouuent expoſée au meſpris & iniures de leurs enfans qui ont plus de puisſance, & quelquefois ſont en condition plus releuée. Si le liure de Dieu nous enſeigne, que celui qui ſe moque de ſon Pere

Pro. 30. *aura les yeux creuëz par les corbeaux & par les aigles.*

elle nous monstre aussi, pour estre condamné à ce supplice, il ne se faut pas mocquer de sa Mere; mais qu'il suffit de ne faire point assez d'estat des douleurs de son accouchement. Si le desplaisir du Pere qui vient de la part de son fils, rend celui qui en est auteur infame & malheureux; les mesmes punitions luy arriuent, s'il donne suiet à sa Mere de s'enfuir, ou de se retirer d'aupres de luy. Si celui qui abandonne son Pere perd la reputation; celui qui aigrit sa Mere, à la malediction de Dieu: qui est plus horrible que la perte de l'honneur. Mais que dirons nous lisant dans le Liure de Dieu, que sa bonté a eu tant de soin des Meres, & particulierement des veufues, qu'elle nous promet que si nous dissimulons les fautes de nos Meres quand elles auroient failly, nous en recevons du bien, que la iustice de Dieu sera pour nous, qu'au iour de l'affliction elle nous deliurera, & mesmes qu'elle effacera nos pechez. Si vous dites ce que vostre malice plustost que vostre ignorance a persuadé à vn Roy craignant Dieu, que toutes ces ordonnances en faueur des Meres sont reglées par les interests d'un grand Estat, auquel les Souuerains doiuent plus qu'à ceux qui les ont fait hommes: ie vous respondray, que vostre passion & vostre interest ne doiuent pas estre les iuges de ce different, mais les Peres de l'Eglise, qui sont les vrais interpretes de la volonté de Dieu. Sainct Ierosme vous dira, que le Sauueur du monde blâme les Pharisiens pour auoir enseigné aux enfans de preferer le Sacrifice à la nourriture des Peres & Meres: d'où ie tire cette consequence, que si Dieu prefere l'assistance qu'on doit aux Parens à vne action de Religion, il n'y a point de consideration politique

Hiero.
in Mat.
cap. 6.

qui doie faire priuer des alimens & de ses biens propres vne Mere, qui n'est accusee que de ne s'estre point accordée avec vous. V. E. scait-bien aussi, que la proposition du salut de l'Estat, preferable à celuy de quelque particulier, n'a point de force, si on ne fait voir que le crime de cette personne va iusques à la ruine du public. C'est ce que nous n'auons pas veu iusques à present en la Reyne : mais nous scauons par vne miserable experience, que vostre conduite, depuis son emprisonnement & esloignement, a fait cognoistre que vous estiez ce criminel, qu'il falloit plustost perdre sans violer la nature, que de ruiner vn grand & puissant Royaume, qui ne se perd que pour conseruer vostre fortune. Dites moy de grace, Monseigneur, le salut de cét Estat que vous voulez sauuer par la misere de la Reyne, est-il plus precieux que le salut general de tout le monde? le Roy est-il plus grand & plus absolu que le Fils de Dieu? & ne croyez-vous pas que toute l'Eglise est de plus grande importance qu'une Principauté de la terre? Cependant Sainct Ambroise nous assure, que le Fils de Dieu en l'arbre de la Croix differa la conclusion du salut des hommes, pour donner à sa Mère les tesmoignages de l'honneur qu'il luy deuoit. Le mesme Docteur passe plus auant, & dit : Ce vainqueur de tous les tourmens fist plus d'estat des offices de pieté qu'il rendit à sa Mère, que de l'ouuerture du Paradis. Et il me semble que ce discours est fondé sur ce que l'ouuerture de Paradis estoit vne action de grace : Mais honorer sa Mère estoit vne action de Iustice. Pour vous monstrier que ie ne me trompe point, escoutez Sainct Paulin de Nole qui

Amb l.
3. Epist.
Epi. 25.

estoit François de nation , & grand Prelat , mais non pas corrompu , comme l'Euesque de Saint Malo, vostre pretendu Theologien : ce bon saint & scauant Docteur dit , que le Fils de Dieu en recom-
mandant sa Mere à son Disciple Saint Iean, lega à vn homme les droicts de la pieté humaine. Vous voyez par ces admirables paroles, que la Diuinité n'effa-
çoit pas les droicts que la Vierge auoit sur l'hu-
manité : & vous voulez que la Royauté les efface en telle façon , qu'elle ne donne rien à la Mere pour des raisons d'Estat. Elles ne peuuent rien contre les Loix naturelles & diuines, quand mes-
mes ces considerations seroient veritables : mais les vostres ne sont qu'imaginaires , & saintes par vostre mauuais dessein, & horrible vengeance. Ah Monseigneur ! s'il plaisoit à V. E. & à vos deux Theologaux , de proposer ces saintes Loix de Dieu, & ces belles pensees des Peres de l'Eglise à vn bon Roy, vous trouueriez que son ame, portée au bien, les receuroit avec plus de facilité qu'elle ne fait vostre fausse doctrine. Nous sommes bien informez, que S. M. a tesmoigné vne si grande re-
pugnance, qu'elle a souuent soupiré, pleuré, arraché ses cheueux, & mordu ses ongles, apres vous auoir escouté sur ce sujet. Vous n'avez point eu de moyen (ie ne dis pas pour estouffer ses sen-
timens, car ils ont encore quelque vie de laquelle vous vous desiez, mais pour les appaiser vn peu) qu'en vous seruant du pretexte de la Religion contre la Religion de la nature, & de l'Escripture, pour surprendre vn Prince Religieux. Vous direz que ie fais le Predicateur : ie ne le contrefais point , car ie le suis, non du mensonge, mais de

S. Pau-
linus
Episto-
lâ 58 ad
Augu-
stinum
Delegat
homini
iura
pietatis
humane

la verité; pour laquelle ie sacrifieray ma vie aussi librement comme i'ay fait mes biens, desquelz vous auez disposé. Pour vous rendre le bien pour le mal, ie represente avec charité à vostre Eminence ce qu'elle a peut-estre presché autresfois: mais ie crains que ces instructions, dignes d'estre données à vn Roy par vn Cardinal, n'ayant esté effacées de vostre memoire, au mesme temps que l'ingratitude vous a fait oublier les bien-faicts de celle qui vous en a tant donné, qu'elle s'accuse d'auoir confondu vostre memoire. Il vous deuroit rester vn peu de conscience pour retenir vostre main, lors qu'elle escrit ces paroles scandaleuses, *qu'il n'y a point de loy qui nous oblige d'obeyr à nos Peres en leurs passions*. Vous ne scauez donc pas, que les passions des Peres & Meres sont excusées deuant Dieu, & par les hommes sages; & que nostre Seigneur reprit bien les deux Disciples, non la Mere, qui auoit fait vne demande qui partoist d'ambition. On ne peut pas aimer beaucoup les siens sans passion, puis que l'amour est vne passion: on ne scauroit craindre pour les siens sans passion, autrement la crainte ne seroit pas vne passion. Si les enfans estoient dispensez d'obeyr à leurs Peres & Meres, quand ils ont quelque passion pour eux, ils ne leur obeyroient iamais. Il n'y a rien qui nous puisse tirer de ce deuoir qu'un commandement de Dieu, aussi clair qu'est celuy qui a dit: *Honore ton Pere & ta Mere, afin afin que tu viues longuement sur la terre*. L'Eglise demande pour les Mariages leur consentement, la iustice du Monde le veut aussi; on tient pour vn rapt ceux qui sont faits autrement. Nous auons veu bien souuent, qu'ils

sont punis dans l'an, de quelque notable iugement de Dieu, dans lequel vous voudriez precipiter Monsieur, pour vous en défaire, ou pour le priver de la benediction d'une belle suite d'enfans, que vous apprehendez. Contentez-vous d'avoir deffendu la predication de la quatriesme Loy de Dieu; ne la destruisiez point par escrit, & par mauvais exemple : vous portez les deux tiers du Royaume à desirer vostre ruine, lors que vous mettez la guerre & la desolation dans les familles, en desbauchant les enfans, & attirant sur eux la malediction de Dieu: il a voulu que le mépris envers les Parents soit puni, de la mesme peine qu'il a ordonné aux blasphemateurs de son nom.

Je veux encore avoir cet avantage de vous convaincre la malice, lors que vous faites passer la Royne Mere du Roy pour passionnée contre le mariage de Monsieur avec la Princesse Marie. Je soustiens que la resolution de s'y opposer partoit de prudence : vous le sçavez aussi bien que moy; & quel a esté le sujet de la sage apprehension de la Royne Mere. La personne estoit tres-agreable pour son merite & plusieurs belles qualitez que chacun recognoist en elle; il n'y avoit point d'ini-mitié contre sa maison, qui arrestast le contentement des siens. Monsieur la recogneu, & s'est retiré peu à peu de ceste recherche : les conseils de ses serviteurs que vous blasmez, ont esté tres-fideles. Vous faites semblant de l'ignorer, & nous attaquez sur ce rencontre parce que vous croyez bien que vostre insolence ne forcera point nostre discretion à publier le secret de cet affaire.

*Æquali
pena in
Deum
blasphemas
Parentibus
maledicentes
puniantur.*

Exod.

25.

Levit.

20.

Matth.

15.

meilleures actions de la Reyne Mere du Roy , & des plus auantageuſes à ſes Enfans , pour la diuiſer d'auec eux : vous vous rendez deteſtable deuant Dieu, qui ne peut auoir horreur de celui qui ſeme la diſcorde entre les freres , qu'il n'en aye beaucoup d'auantage du meſchant qui la iette entre la Mere & les Enfans.

Vostre rage ne s'arreſte pas apres auoir produit la mauuiſe intelligence entre le Roy & la Reyne ſa Mere : vous voulez que la deſ-vnion ſoit avec Monſieur : vous la chargez de tous les déplaiſirs qu'il a receu ; & representez les effets de ſon amour & ſageſſe , comme actions de haine & de vengeance. Quel feu, ſ'il n'eſt d'enfer, peut chaſtier vostre crime ? & quelles peines , ſi elles ne ſont eternelles , ſeront ſuffiſantes pour reſpondre à vos pechez ? La perſonne que vous devriez le plus eſpargner parlant à ſon Enfant , eſt celle que vous deſchirez plus cruellement. La Princeſſe qui vous a chargé de tant de bien-faits , eſt celle que vous chargez de tous les maux du monde , pour l'accabler dans la ruine de ceux, que la Prouidence de Dieu a tiré de ſon ventre. Laissez-luy (ſi la furie le vous peut permettre) le plus ieune de ſes Fils , apres luy auoir deſrobé le cœur du plus grand , & que pour l'appuy de cette Monarchie elle s'eſt priuée de la douce preſence & conſolation de trois Filles.

*Tertul.
in apo
lóg.*

Vous dites à Monſieur , que la Reyne ſa Mere toute pleine de deſirs de vengeance contre la maiſon de Mantouë à ſans ceſſe trauerſe ſes affaires , pour en perdre le chef. Vn ancien Docteur , parlant de l'innocence des premiers Chreſtiens , diſoit que ceux

qui sont ennemis de personne, à plus forte raison ne le seront pas de l'Empereur : ainsi ie vous dis que la Reyne, qui ne se vange d'aucun ennemy, se vangerà encore moins de la maison de Mantouë. Si elle rendoit quelque mal pour celuy qu'elle a receu, vous en auriez sceu des nouvelles, & n'auriez pas eu le loisir d'escrire ce que vous escriuez. Vous sçavez bien, que vous n'avez iamais esté en peine dans vostre credit, d'arrester les effects de sa cholere contre ceux qui l'auoient offensée; & vous n'en avez point senti, encore que vous l'avez prouuquée plus que iamais homme ne sçauroit faire. Je diray bien d'auantage, qu'on accuse plustost sa patience, pour estre trop facile à pardonner & n'estre propre qu'à prouoquer les injures, que sa passion, pour estre trop prompte à tesmoigner ses ressentimens. Nous pouuons dire sans flatter, & sans calomnier, que vous n'oubliez pas plustost les bien-faits, que la Reyne Mere du Roy fait les offenses. Parquoy seroit-elle ennemie de la maison de Mantouë qui la tousiours honnorée, & qu'elle a fort aymé? n'est-ce pas de sa bonne sœur, & Marreine du Roy, que les Ducs predecesseurs de celuy qui est à present sont sortis? & n'est-ce pas sa petite niepce qui est la Princesse? pourquoy voudroit-elle contribuer quelque chose à la ruine de son Sang, qui ne luy a point rendu de desplaisir? Si vous croyez qu'elle en aye receu autrefois de Monsieur de Mantoüe; pensez-vous que le temps ne l'aye pas effacé d'un esprit qui ne retient point le mal? ne sçavez-vous pas ce qu'elle a contribué pour son establisement dans l'Italie, & que ses

aduis ont toujours eſté qu'il le falloir garder d'oppreſſion? n'ayant iamais blaſmé que le mauuais chemin qu'on a pris contre les règles de Juſtice & Prudence. Elles ont eſté violées par voſtre vengeance; laquelle eſt auſſi veritablement la cauſe des miſeres de la France, & de la ruine du Piedmont, du Montferrat, & de la ville de Mantouë; comme il eſt faux qu'elle aye eſté dans l'ame de la Reyne Mere du Roy contre la maiſon de Mâtouë. Vos conſeils temeraires, & la vanité de vos emplois l'ont miſe en l'eſtat où elle eſt à preſent.

Ne dites donc pas que les diuerſes negotiations aupres des Princes arméz pour la deſtruire, les lettres ſurpriſes pendant la maladie du Roy, ſans parler de beaucoup d'autres choſes que vous ayméz mienx taire que publier, ſeront d'aſſez puiſſans teſmoignages aux ſiecles aduenir de ce que vous eſcriuez. Lors que les preuues bien claires vous māquent, vous parlez par Enigmes & par myſteres: vous ſeriez capable de perſuader que le reſpect vous faiçt retenir quelque choſe, ſi vous ne l'auiez entieremēt perdu. Croyez vous qu'ayāt vſé d'impoſture aux choſes que vous auez publié, on ne iuge pas que vous vous en ſeruez plus éffrontement en celles que vous faites ſemblant de tenir cachées? Produiſez non ſeulement en Juſtice, mais dans vos libelles, les pieces que vous dites eſtre contre nous; afin que nous ayons moyē de les debattre, & de faire voir que vous les auez fauſſement fabriquées. Quelle apparence y a-il, qu'une bonne Mere, laquelle durant la maladie du Roy eſtoit toute fōduë en larmes; qui prenoit quelque peu de repos durant le iour, apres auoir vueillé toute la nuit; qu'i aſſi-

ſtoit

Estoit avec grand soin aux consultations des Medecins, & tomba en defaillance lors qu'elle ouyt parler de l'extrême-Onction; durant tous ces accidens estranges, & syncopes, s'occupast à escrire & faire escrire quantité de depesches aux pays estranges, & se seruist pour deseruir son Fils du rencontre de son indisposition? Nous escrirons plus clairement de vostre mauuaise conduite durant ce temps d'affliction; parce que la verité ne se cache pas, comme fait le mensonge. Vous scauez bien que vostre imprudence, ou meschant dessein, estoit asseurement la cause de la maladie du Roy. Pour couvrir vostre indiscretion, & vostre malice, qui auoient ietté sa Majesté dans vn air empesté, & enfermé dans le vallon de saint Iean de Morienne, vous tirastes par force vn certificat du premier Medecin, qui tesmoigna, que cet air, & le voyage que sa Majesté auoit entrepris, ne pouuoient estre contraires à sa santé. C'est vne des premieres pieces que vous ioiiastes pour amuser les ignorans; celles que vous fistes à Lyon, sont plus malignes. Vous qui asseurez que la Reyne Mere du Roy, qui ne mania iamais plume pour escrire en ce temps-là, fit des grandes depesches; ne scauriez desnier, que vous n'en ayez fait vne, qui fut enuoyée par courrier exprés, pour demander contre la Royne & contre Monsieur la protection de Monsieur le Prince. Vous scauez bien aussi, qu'en cette lamentable saison, vous qui estiez en deffiance de toutes choses, & sur tout de vostre peché, enuoyastes en Aignon les deux layettes remplies de vos bagues, qui estoient, depuis vostre depart pour aller en

Sauoye , entre les mains de Monſieur le Cardinal de Lyon : ces threſors furent accompagnez des Finances qui auoient eſté deſrobées au Roy, & aux gens de guerre en Piedmont , & du plus precieux de vos meubles. Vous voyez que nous ne parlons point en termes generaux ny obſcurs ; mais que nos veritez ſont claires & naiſues , pour taſcher de vous prouoquer à en dire quelque vne contre nous , ſi vous en ſçauiez : voſtre qualité vous obligeroit à eſtre ſi religieux en eſcriuant, qu'il ne deuroit rien ſortir de voſtre main , qui ne peult ſeruir dans le Parlement de Paris de piece iuſtificatiue à voſtre innocence , & qui ne fuſt aſſez forte pour faire condamner ceux que vous accuſez : vous reconnoiſtrez avec le temps, que nous en auons vſé ainſi ; & que rien n'a eſté auancé de noſtre part, que nous ne prouions deuant les plus ſcrupuleux Iuges de la terre , & dans le temps de la iuſtice, qui arriuera apres que celui de l'oppreſſion ſera paſſé.

Pag. 23.

Vous dites que le pillage de Mantouë , & de tant d'autres places, avec les maux ſoufferts par tant de milliers de perſonnes , les meurtres , & les violemens qui s'en ſont enſuiuïs, ſont les effets de la paſſion de la Reyne Mere , & de Monſieur. Vous imaginez-vous qu'on le croira (comme diſent les petites artiſannes de Paris) parce qu'il eſt moulé ; & que tous les ſages prendront le change ſur voſtre rapport & ſans preuue ? Qui eſt celui qui ne ſçait que la guerre d'Italie. & tout ce qui eſt venu en ſuite, ſont les effets de vos querelles particulieres avec le Prince de Piedmont, & l'Abbé de l'Eſcaille ? que tous vos deſſeins tendoient, ou à arracher la tiare

qu'on appelle le regne, sur des fausses propheties, ou à ruiner en passant tout le Piedmont, que vostre vanité vous auoit fait croire d'aussi facile conquête que la pleine de Vaugirart ? La prise & le pillage de Mantouë, les meurtres, brulemens, & violemens dans la France, Piedmont, Montferrat & Mantouian, sont les effects non seulement de vostre mauuaise conduite, mais de vos vengeâces, & de vos pernicious desseins. Ils estoient, ou de vous faire Chef de l'Eglise ou, si cela manquoit, de trouver plus de facilité dans la cōquête de l'Estat, apres que vous l'aurez affoibli par la dissipation des armes, & Finances, & par la mort de tous les vieux Capitaines & meilleurs soldats : ils ont esté les victimes de vostre ambitio iusques à 50. mille, sans compter les habitans d'çà & delà les monts, que les pestes & famines ont rauagé iusques à vn nōbre presque infini. Toutes ces âmes, avec celles qui ont versé leur sang pour la teinture de vostre chapeau, attendent la vostre : elles demādent vengeance à Dieu, & ioignent leurs cris lamentables avec les larmes de la Vefue calomniée. Son ambition n'a iamais fait inourir personne, parce que ses qualitez & ses vertus la rendent assez grande, sans faire marchepied des corps morts pour se releuer. Si sa colere estoit cause de la perte d'un seul homme, elle auroit choisi celuy qui l'a le plus cruellement offensée ; & en la ruine duquel on ne doute point qu'il n'y eust plus de merite, que de crime.

Afin que la Reyne Mere du Roy soit la cause Pag. 24
de tous les maux que Monsieur a soufferts, vous adioustez, que de peur de l'irriter, il refusa le commandement de l'armée d'Italie, Vous estes tres humblement

ſupplié de vous expliquer ſur cet article, & de nous dire, ſi vous entendez parler de l'armée de l'an mille ſix cens vingt-neuf, ou de l'an mille ſix cens trente. Pour la premiere, Monſieur l'auoit acceptée, & s'eſtoit mis en chemin pour la conduire : mais vous ſçavez bien, que le Roy par voſtre Conſeil le rappella, & voulut commander en perſonne. Cette reſolution ayant eſté priſe deuant que Monſieur euſt rien fait, ne peut pas eſtre fondée ſur ſa mauuiſe conduite, mais ſur voſtre ialouſie. On ne peut dire auſſi, que s'eſtant mis en deuoir, & acheminé pour obeyr à ſa Majeſté, & ne s'eſtant retiré que par ſes ordres tres-expres, ſuiuis de la perſonne du Roy, il aye refusé ce que la meſme auctórité qui l'auoit mis en charge luy oſtoit. Il faut dire, que vos ſecondes penſées effacerent les premieres (comme il vous arriue bien ſouuent) ſur tout apres auoir eſcouté mille fripons, qui vous approchent pour griueler quelque choſe ſous voſtre auctórité, & pour vous donner deſiance de tout ce qui ne deſpend point abſolument de voſtre pouuoir. Vous le deſiriez auoir tout entier dans les armées d'Italie; & commencer l'an mille ſix cens vingt-neuf, par la charge de Lieutenant General du Roy, pour eſtre l'an mille ſix cens trente Monſieur le Generaliſſime. Tout cela ne ſe pouoit bien accorder avec les emplois que la naiſſance & le merite de Monſieur luy acquierent; il a fallu violer l'un & l'autre, pour faire place à voſtre vanité & vengeance: elles vous ont porté à reuoquer le premier pouuoir de Monſieur, & vous ont empesché de luy preſenter le ſecond, que vous priſtes pour vous ſeul.

Il est vray, que vous fistes approcher le Roy, lors que vous auiez perdu la tramontane, & recognu que la conqueste d'Italie & le passage iusques à Rome n'estoient pas si aisez qu'ils paroissent dans la carte de vostre chambre, & par les discours de vos flatteurs.

Là où ie descouure que vous n'avez point de Pag. 277 conscience, c'est quand vous marquez pour vne des fautes de Monsieur, & imprudence de son conseil, que *durant le secours donné à l'Italie, & deuant la conqueste du Languedoc, pendant laquelle les maux pressans, & les cœurs esleuez luy donnoient beaucoup d'entreprendre pour se faire escouter, on l'eust fait reuenir avec toutes les satisfactions qu'il eust sceu souhaiter.* Ce discours me fait dire, où que vous estes preuaticateur en la cause que vous defendez & en l'accusation que vous faites, ou que vous n'avez plus la souuenance de vostre dessein. Ce qui me porte à faire la premiere conclusion, est, que vous prenez vne vertu pour vn vice; c'est à dire, la fidelité de Monsieur & des siens pour vne lascheté. Vous taschez de persuader qu'il a laissé échapper vne belle occasion de tirer par les troubles du Royaume, & diuertissement des armes du Roy, toute sorte de contentement, mêmes au prejudice des affaires & de la reputation de S. M. & vous dites qu'il merite d'estre blasmé avec ses conseillers, de ne s'estre point serui du temps, qui luy estoit si fauorable. Ce reproche est vn crime de leze Majesté; cette instruction est punissable de mort, sur tout estant donnée par vn Ministre de l'Estat: c'est vn aduis pour l'aduenir qu'on doit chercher son profit dans les mal'heurs de la Frâce;

& c'est vouloir faire passer vn tesmoignage de bonté & d'affection enuers le Roy pour vn manquement de courage & de sagesse. Il me semble qu'on peut dire qu'il vous est arriué comme à Baalam, de changer tout à coup le dessein de ietter des maledictions, en paroles de benedictions, & les iniures en louange. Vous auiez fait vn project au commencement de vostre escrit, de coter toutes les fautes que les Ministres de Monsieur luy ont fait faire, & apres vous ne remarquez que des bonnes actions que Monsieur a fait, ou des meschantes qu'il n'a pas voulu faire; & donnez quelque part dans sa conduite à ceux qui ont eu l'honneur d'estre en quelque consideration aupres de luy. S'estre retiré de la Rochelle apres vne charge finie par l'arriuée du Roy, & les marques du commandement ostées par vostre ambition, est non seulement vn effect de courage & de prudence, mais de crainte de Dieu, de n'auoir pas arresté le cours de vostre insolence avec celui de vostre vie. Auoir obey au Roy, qui a reuoké le pouuoir de Monsieur, & l'a rappelé, lors qu'il s'enalloit en Italie commander les armes de France, est vn tesmoignage de vertu que vous desirez de conuertir en vice. Depuis que vous auez renuerié toutes choses, il ne faut pas trouuer estrange si vous changez aussi les noms & les qualitez, & estes de ceux qui sont maudits en l'Escripture sainte, pour auoir appelé *vn mal vn bien, & vn bien vn mal*. Vous l'avez fait non seulement en ces deux

Isaies. chefs que i'ay marqué, mais encore lors que vous dites, que Monsieur a deu prendre son tēps pour se faire donner la dague à la gorge; ce que la

generosité ne veut auoir que par iustice & par merite. Vous mettez dans le nombre des fautes pretenduës, de n'auoir point armé & exposé à la mort vingt mille ieunes hommes, pour leur faire réplir de leurs corps les fossiez du bois de Vincennes, manger les murailles & les portes : sur tout vous nous representez, cōme vne foiblesse de courage, de n'auoir point destourné le Roy, par vne guerre ciuile, de l'assistance de ses alliez d'Italie, & du chastiement de ses sujets souleuez en Languedoc.

Après toutes ces choses, qui sont glorieuses pour Monsieur, & honorables à son conseil, vous apportez pour comble d'abomination ces belles paroles : *il vous ont vni avec la Reyne : i'aduois que c'est vn acte de pieté, de reduire vn fils dans l'obeissance de sa mere, pouru que ce soit à bonne fin, car il faudroit estre bien simple, pour ne sçauoir pas qu'on peut aussi bien offencer Dieu en obeissant à vne mere qui comuanderoit chose mauuaise, comme en luy desobeissant en chose bonne.* Je suis fort aise que vous ayez icy esueillé vostre Theologie : elle est tres-bonne, mais tres-mal appliquée, en ce que vous ne n'ostrez pas, ny ce que la Reyne Mere du Roy a commandé à Monsieur, ny ce que Monsieur a fait par ordre de la Reyne sa Mere contre la loy de Dieu : vous n'auriez pas manqué de le faire valoir, si vous l'auiez descouuert. Monsieur n'a donc peu faillir en obeissant, & a grandement merité deuant Dieu en tesmoignant ses ressentimens & bons mouuemens pour les desplaisirs qu'on a rendu à la Reyne sa Mere. Vos ingratitude & vos mespris dōnerent lieu, à la liberté des paroles qu'il vous dit, & à sa retraite. Si vos violences qui sont venues en suite,

Pag. 146

& les cognoissances qu'on a eu de vos desseins, ont fait embrasser à Monsieur la defense de l'honneur de la Naissance du Roy, & de la sienne ; si la Mere n'a point vsé de l'auctorité que la nature luy donne sur son Fils , pour l'obliger à la vanger ; si son bon naturel , sa prudence, & les aduis de ses fideles seruiteurs l'ont porté à faire paroistre, qu'il ne pouuoit approuuer vostre conduite sans vn notable prejudice de sa reputation, & mesmes de ses droits; trouuerez-vous dans l'Escriture sainte, & dans les liures des SS. Peres , qu'on aye offensé Dieu, en obeissant non pas à la Mere, qui n'a rien commandé ny recommandé que la paix , mais à la nature , qui a fait la premiere loy sur laquelle Dieu a fondé non seulement celle de Moyse, mais

Math. 6 encore son Euangile ? Vous sçauiez ce qu'il dist aux Pharisiens , qui la vouloient destruire pour establir leurs traditions. Mais que direz-vous, si vous rencontrez iamais dans l'histoire de Polongne, que le Roy Ladislaus, autant estimé pour sa pieté que pour sa valeur , fit pendre vn des premiers de son Royaume , & qui luy auoit rendu de tres-grands seruices , appelé Witoud , parce qu'il auoit mesdit de sa Mere ? qu'eust-il fait, si apres des emprisonnemens , & autres violences estranges , il eust fait imprimer ce que nous auons veu dans vos libelles, & sur tout dans vostre Defense ? Dauid commanda par testament qu'on tuaist Semei qui l'auoit maudit, & luy auoit ietté des pierres dans son affliction, encore qu'il luy eust pardonné dans la chaleur de sa cholere , pour faire iustice lors qu'elle seroit passée: quelle peine eust-il ordonné à Semei s'il eust

entrepris de des-honorer sa Mere, de l'emprisonner & de la vouloir faire mourir avec son Frere? Si le priuilege du Temple & de l'Autel ne peut garantir la vie de cét homme; où trouueriez vous vn asyle, si la iustice vous estoit faite par vn Roy qui est bon & pieux comme Dauid, & comme Ladislaus.

Vous concluez vostre dénombrement des fautes que Monsieur a fait, par l'aduis de son Conseil, en disant, *Voila des iolis Conseillers d'Etat!* Mais confessez, si vous n'avez autre chose à dire: Voila des gens de bien, & des bons seruiteurs, desquels pour conclusion de toutes leurs louanges, vous dites qu'ils ont reüni Monsieur avec la Reyne sa Mere; ce qu'ils n'ont pas fait, parce qu'il n'y a iamais eu des-vnion: il est bien vray, qu'ils n'ont rien entrepris pour la faire naistre, comme vous avez fait entre le Roy & sa Mere, & taschez de faire par cét escrit avec Monsieur. Mais qui estes vous, qui avez l'effronterie de nous conseiller? nostre capital ennemi, celuy qui nous avez chassé de nostre place & de nostre bien; qui voudriez si vous pouuiez, nous boucher tous les chemins pour nous empescher d'y rentrer & d'arrêter vostre vsurpation. Vos violences contre la Mere & l'Enfant, n'ont fait qu'une cause des deux. Si la froideur de vostre malice n'auoit point redoublé la chaleur de ces deux cœurs, la nature auroit produit cét effect, & auroit ietté Monsieur dans les ressentimens d'un bon Sang, quand il n'auroit point esté offensé en son particulier. C'est en vain que vous employez vos artifices & vos escrits, pour rendre les bons seruiteurs suspects, & pour

les diuiser entr'eux ; vos finesses sont découuertes : les brebis ne reçoient point de conseil des loups ; elles les cognoissent non seulement par leur puanteur , mais par les vestiges de leur pattes ; c'est à dire , qu'on vous voit dans vos mauuaises actions, & encore mieux dans vos escrits.

Vous quittez la poursuite des Ministres de Monsieur, & n'abandonnez point celle de la Reyne Mere : vous ne vous laissez point de dire du mal de celle qui ne s'est point laissée de vous faire du bien. Vous dites, *qu'elle a assemé les Ministres de Monsieur, par Messieurs de Marillac, de vostre pere* : vous sçauz que ces Messieurs , sur tout le Marechal, n'auoient pas les bonnes grâces de Monsieur , & par conséquent ils estoient mal avec ceux qui les possédoient. La Reyne Mere du Roy vous a peu ruiner à Lyon, & se seruir de la mauuaise satisfaction que le Roy auoit de vous peu de temps deuant sa maladie: vous sçauz que l'obligation que vous auez à Messieurs de Marillac , ie n'en diray pas d'auantage.

Pag. 28 Vous representez la vanité des esperâces de Monsieur, en ce que le Roy trouue tant de *seuretez en la fidelité du Cardinal*, qu'il souffre plustost l'esloignement de sa Mere, que la perte d'un homme tant utile au bien de ses affaires, & de son Estat. Ie trouue vn bon mot dans ce discours: vous dites que le Roy souffre l'esloignement : c'est donc signe qu'il n'en est pas l'autheur, autrement vous parleriez mal à propos ; ce que vous fuyez plus soigneusement que de mal faire. Il est vray que le Roy souffre ce scandale , comme Dieu, duquel il est l'image ; souffre & permet le peché, mais en fin il le chastie, & fait paroistre

sa iustice , apres qu'on a long-temps abusé de sa clemence. Vous vous chargez du crime , & le Roy de la dissimulation d'un estoignement : c'est le mot honneste que vous donnez à vne prison , & mille violences qui l'ont accompagnée. Vous continuez tousiours dans vos déguisemens , qui n'ont iamais esté receus par le public ; mais qui peuvent encore tromper le Roy , parce que vous faites en sorte qu'il entend le dernier les veritez qu'il deuroit sçauoir le premier. Vous luy donnez la loüange d'auoir preferé vn mauuais seruiteur à vne bonne Mere, celuy qui prend toutes les meilleures places de son Royaume à celle qui les a toutes conseruées , & vn ingrat à sa Bien-faïtrice.

Vous traitez comme égal avec Monsieur , en vsant de ces termes , *qu'il vous auoit iuré amitié*. Par tout on voit vostre orgueil , & vostre mespris insupportable, en parlant de la plus grande Royne du Monde , *si le cœur luy en dir ; & apres , que la foiblesse d'une femme estoit trop peu de chose pour opposer aux pernicieux desseins que vous faisieZ éclatter contre l'Estat*. Ainsi la presumption vous rend semblable à Poyson qui a mâté de la cigüe: elle vous fait leuer la teste en haut , & apres la ietter tantost à droit, tantost à gauche: vous parlez en homme yure de prosperité ; auez oublié qui vous estes, où la bonté de la Reyne Mere vous a trouué , & où elle vous a conduit. Elle a eu assez de puissance pour vous esleuer ; & lors que vous dites *qu'elle est trop foible pour s'opposer à vos desseins*, vous luy donnez cet auantage d'auoir eu le moyen de vous rendre plus fort qu'elle n'est , & de n'auoir iamais eu la volôté,

Pag. 29

Pag. 31

Pag. 32

depuis que vous vous estes rendu indigne de ses bônes graces, d'employer son auctorité pour vous ôter le credit duquel vous abusez. Ne parlez point de la foiblesse, qui a esté trop forte pour vous faire grand ; & qui l'est assez pour vous perdre, si elle n'aimoit mieux vous donner le loisir de vous conuertir. Vous vous seruez de ce mot de *femme*, comme si vous parliez d'une petite damoiselle. Si vous voulez oublier les qualitez que sa Naissance, son Mariage, & ses Alliances luy donnent ; souuenez-vous que c'est la Mere de vostre Roy, de vostre Bien-faicteur, & de celuy qui vous protege : portez quelque honneur à celle qui l'a donné à la France , & qui vous a donné à luy. Mais vous avez oublié ce qu'elle est, lors que vous n'avez plus eu de souuenance de ce que vous estes, avez esté, & pouuez estre lors que Dieu vous fera Iustice.

Vous auancez beaucoup de choses, & n'en prouuez pas vne : la bonne opinion que vous avez conceu de vous-mesmes, vous fait croire que toute la terre dira de vos escrits, ce que les disciples de Pithagore disoient des leçons de leur Maistre. *C'est luy qui l'a dit.* N'avez-vous iamais pensé que vos actions peuuent auoir osté quelque creance à vostre pourpre? que vous auez esté si souuent surpris en menterie, à faute de memoire & de probité? qu'il vous est necessaire d'auoir des fortes raisons, & des cautions meilleures que celles du P. Ioseph & de vostre Confesseur Mulot?

Vous dites que la Reyne Mere du Roy a voulu ranger Monsieur dans l'alliance de Florence, que c'estoit son principal dessein, & ce qui a plustost armé sa resolution

*contre vn homme qu'elle n'eust iamais abandonné, apres
 l'auoir si hautement protégé, & luy l'auoir si dignement
 serui. Vne chose de si grande importance ayant
 esté auancée, il la falloit appuyer de quelque pie-
 ue iustificatiue, ou d'une conjecture. Vostre dessein
 n'estant que d'emprisonner à petits frais, le petit
 peuple, vous ne voulez faire que des liures d'un
 sol ou de dix-huict deniers : outre que vous seriez
 bien en peine d'apporter quelque preuue, n'en
 ayant point en main. Si le Mariage de la Princesse
 de Florence avec Monsieur estoit le principal des-
 sein de la Reyne Mere du Roy ; c'est vne grande
 merueille de ce qu'elle l'a si bien caché que per-
 sonne ne l'a apperceu : les choses qu'on a si fort à
 cœur ne s'oublient pas aisément, & ne se cou-
 urent pas facilement : rien n'empescheroit (au
 moins à present) qu'on ne fust paroistre cette
 volonté ; sur tout, lors qu'il n'y a rien en ceste al-
 liance du costé des parties, qui en doie destour-
 ner. La Princesse est d'aussi bonne maison que la
 Reyne Mere du Roy, & Monsieur n'est pas de
 meilleure maison que le Roy Henry le Grand. Si
 on auoit pensé à ce Mariage, il n'y a ny manque-
 ment de iugement, ny entreprise contre l'Estat, ny
 rien qui puisse donner soupçon qu'il seroit priué
 de la benediction des enfans, ce que nous deuons
 rechercher. Vous auez tort de dire, que le desir
 que la Reyne Mere du Roy a eu de cette Alliance
 a esté cause de ce qu'elle vous a abandonné. Vous
 sçauiez que cela n'a iamais esté mis en considera-
 tion, mais d'autres choses qu'on vous a desia dit,
 & que vous faites semblant d'ignorer. Si la Reyne
 vous a protégé hautement, cela vous obligeoit à la*

ſeruir dignement. la fin qui couronne & découure toutes les œuvres, & toutes les intentions, a fait voir les vostres; & ſi vous auez ſerui plus fidellement voſtre Maiſtreſſe, que vous ne vous eſtes ſinement ſeruy d'elle, pour arriuer là où vous eſtes. Apres voſtre grand eſtabliſſement, vous luy oſtez les biens que ſa condition & ſa vertu luy auoient acquis, pour vous maintenir dans ceux que vous tenez de ſa bonté: ſouuenez-vous, que vous auez deſſein de reduire à la neceſſité celle qui vous a donné le moyen de tenir la meilleure table de France.

Vous venez ſur la fin à voſtre apologie; vous taſchez de monſtrer, qu'il ny a point d'apparence que vous entrepreniez contre le Roy & l'Eſtat, pour auoir quelques gouuernemens, & quelques charges, avec vne compagnie de gardes, qui n'eſt que pour vous deffendre contre tant d'attentats que l'on a faiſt contre voſtre vie: ce qui n'eſt pas ſuffiſant pour conquerir vn Royaume, &c. Il me ſemble que i'entens l'Hiſtoire d'un riche Portugais, qui ſe retiroit en ſon pays, apres auoir fait des grands profits au Mexique, & declaroit en ſecret à un ſien ami, qu'il auoit dans le vaiſſeau deux cens mille eſcus. Le Marchand eſtant mort, ſon compagnon alla trouuer le Roy d'Eſpagne Philippe II. pour luy demander quelques quartillos, que ſon ami, qui n'auoit point d'heritiers, luy auoit laiſſé. Vous dites que la moitié des fortes placés du Royaume, & trois ou quatre grandes Prouinces, qui ſont en vos mains ou de vos cōfidens, toutes les grandes charges de l'Eſtat vnies à voſtre perſonne, ou exercées par vos cōmis, toutes les finances, un regiment des gardes, vne cōpagnie

de gensdarmes, vne de cheuaux legers, vne troisième de carrabins, dix mille hommes dans vos forts & citadelles, & l'absoluë disposition de toutes les forces de France, sont quelques petits gouuernemens, des petites charges, des petites gardes & des petits biens. Il n'y a rien en tout cela de grand que vous, & vos actions. C'est vn témoignage de cette ingratitude que vous auez souuent reproché au Roy : comme c'est aussi vne preuve que vous estes bien mal-heureux, d'estre enuironné & pressé par tant de gens, de peur des entreprises sur vostre vie. Elle seroit en seureté & liberté: si l'amour des grands & des peuples vous gardoit. Vous auez tellemēt irrité les particuliers & le public, que vous craignez comme vn tyran: il vous semble que tous les hommes qui vous approchent sont des assassins, tous leurs doigts des poignards, & tous les fers de leurs esguillettes des stilets. C'est qu'il est impossible de faire le mal, sans auoir apprehension de le receuoir; & Dieu l'a ainsi ordonné, que l'homme criminel seroit le premier bourreau de sa Iustice. C'est ce qui vous rend plus digne de compassion que d'enuie; & qui portera ceux qui cognoistront les craintes qui accompagnent vostre pouuoir, à desirer plustost d'estre dans la basse, estroite & obscure condition d'un pauvre Curé de village, que dans l'esclat de vostre Escarlatte Eminentissime, de vostre Lieutenant Generallissime, & de vostre Admirauté Illustrissime. Si les titres, les biens, & les flatteurs rendent les hommes bien-heureux, vous le deuez estre: si les vrayes & fausses alarmes, les chagrins & les infirmités les peuuent faire mal-heureux,

humiliez vous, en confeſſant que vos maux ſont plus ſenſibles que vos biens. Le moindre déplaiſir altere vn grand contentement, comme vn grain de poiſon corrompt la ſanté de tout le corps : la picqueure d'un moucheron eſt plus cuſante que toutes les voluptez du monde ne ſont agreables ; & le Sage a bien dit, *que la malice, c'eſt à dire l'affliction d'une heure, nous fait oublier vn plaſir de longue durée.*

Eccl. 2.

Pag. 34

Le renuoye à la liſte de vos charges, gouvernemens, & benefices, la refutation de ce que vous dites, *que vous ne poſſedeꝝ pas d'avantage que les favoris des Roys qui ont precedé le noſtre.* Pardonnez-moy ſi ie vous diſ, ou que vous ayez receu tant de biens de voſtre Maiſtre, & de voſtre Maiſtreſſe, qu'ils ont confondu voſtre memoire, ou que vous les eſtimez ſi peu de choſe, au pris de ce que vous croyez avoir merité, que dans voſtre imagination le poids de vos actions emporteroit celui de tout le Royaume. Voſtre diſcours eſt mauuais, lors que vous vous appelez *fauori*, qui eſt vn mot qui vient de faueur, & n'eſt pas bien employé pour repreſenter vn homme qui tient tout du merite ; qui n'eſt pas vn petit complaiſant, qui attire les bienfaits en ſe rendant agreable ; ce qui eſt, à proprement parler, eſtre *fauori*. Vous eſtes vn grand Miniſtre, auquel, comme vous dites, *le Roy conſie non ſeulement ſes ſecrets* ; mais les principales pieces des Pays de ſon obeyſſance, ne les pouuant conſigner à perſonne plus vigilante & plus vaiſſante. Si vous n'avez fait cét écrit, reprenez hardiment ce ſot Eſcrivain, qui vous a appellé *fauori*, qui eſt aujourd'huy le nom des chiens de couchette.

Lors

Lors que vous dites que le feu Roy a eu des Ministres qui partageoient les affaires ; vous n'avez pas remarqué qu'ils ne partageoint point le Royaume. Iamais homme du viuant de ce grand Prince n'a eu deux gouuernemens d'importance , ny mesmes les places fortes de la Prouince où il a esté Lieutenant pour S. M. iamais Prestre n'a commandé , ny sur la mer , ny sur la terre : iamais Ministre de son Estat n'a composé vn conseil à sa mode : iamais on n'a veü la moindre chose de celle que nous voyons, & que nous n'oserions auoir représenté. Nous vous supplions de ne parler pas indignement de son Regne, comme vous avez fait de sa personne , pour releuer vos actions sur les siennes. Si cet Hercule endormi, que vos pigmées mesurent impunement avec leurs petits poulces, se releuoit , il vous abatroit, & tous vos mirmidons, avec le souffle de sa bouche.

Vous nous demandez la paix , pour faire des merueilles ; & dites, *Laissez nous en paix seulement, & vous verrez que le Cardinal, apres s'estre reconcilié avec vous, & la Royne Mere* (que vous mettez la derniere) *il fera tout ce qu'il luy sera possible pour acquerir les benedictions du peuple.* Vous avez bonne grace de dire, *Laissez nous en paix* : vous ne parlez pas de la publique , que nous n'auons pas troublée ; mais de la vostre particuliere que vous desirez de conseruer : c'est à dire , faire ce que vous faites , & auancer tousiours vos desseins sans que personne s'y oppose, ny par paroles, ny par escrits, ny par actions. Au moins si vous estiez semblable aux dieux d'Epicure, qui ne vouloient ny faire ny souffrir le mal, vous auriez quelque raison de de-

Pag. 36.

mander le repos en le donnant à tout le monde : mais vous eſtes reſolu de le garder ſi vous pouuez , en le rauiffant à la Reyne Mère du Roy , à Monſieur, à beaucoup de Grands du Royaume, à pluſieurs particuliers, à la France, & à toute l'Europe. Vous aſſeurez que vous ferez fleurir ce Royaume, après que vous ſerez reconcilié avec ceux deſquels vous cognoiſſez le bon naturel : ils honnorent le Roy , aiment l'Eſtat , & ne ſont pas vindicatifs : mais la grandeur de voſtre peché , & la priuation de la grace de Dieu , vous font dire avec le premier qui reſpandit le ſang humain, *Mon*

Genef. 4. offerce ne merite point le pardon. Ce deſeſpoir vous a fermé les yeux , & a fait obſtiner voſtre eſprit au mal ; auquel il ne ſçauroit courir à toute bride, ſâs rencontrer bien toſt vn achopement, & la cheute, qui ſera la fin des miſeres d'un grand nombre de gens de bien. Vous ſçaez que la reconciliation ne ſeroit pas mal aſſée du coſté des perſecutez , qui doiuent deſirer de rentrer dans leurs pays, dans leurs charges, dans leurs biens, ſortir des priſons, & de la neceſſité. Sur tout , vous n'ignorez pas que la Reyne Mere du Roy, & Monſieur, ne vouluſſent eſtre en la place que Dieu & la nature leur ont donné ; en eſtre dehors, eſt vn eſtat de violence : le centre de ces deux cœurs eſt celui du Roy ; c'eſt le lieu de leur repos , duquel vous les auez arrachez pour les laiſſer en vne continuelle agitation. Ils cherchent tous les moyens raiſonnables pour y reuenir : mais ils vous trouuent cōme vne barriere en leur chemin ; vous les repouſſez avec les armes, avec les calomnies ſecrettes dâs l'oreille du Roy , & avec les publiques dans les eſcrits.

Vous ne les appelez, ny avec la langue, ny avec la main, & encore moins avec l'esprit: on le cognoit estre si double, de si petite foy, & rempli de tant d'inventions, que vous ne manquerez jamais, après vne réconciliation simulée de vostre part, d'entourer vn iour sous vn mesme filet la Mere, & le Fils. Si vous les voulez atraper, ie vous aduoüe franchement qu'il faut présenter des cautions meilleures & plus suffisantes, que ne sont les deux hommes que nous auons nommé.

Le reste de vostre escrit, & de vostre esprit, s'employe pour représenter à Monsieur *sa foiblesse, & les forces de la France.* Il est vray, que Monsieur est bien aise d'estre plus foible que le Roy; & bien marri de l'estre plus que vous, qui auez toutes les forces, & les meilleures places du Royaume. Nous voudrions que l'Estat fust encore plus puissant que vous ne le dépeignez: il le seroit sans les ruines que vous auez fait, sans les diuisions que vous y auez apporté, s'il auoit les homes que vous auez fait perdre mal à propos; si les munitions & canons qui sont dans vos places estoient dans les Arsenacs; & si les Finances que vous auez mis dans le Haure & Broüage, estoient en la place des prisonniers de la Bastille dans des sacs entassez, au lieu de tant de pauvres miserables qui sont les vns sur les autres. Il vous faut résoudre, pour continuer vos violences, de la descharger, si vous ne voulez que la contagion s'y mette pour vous en defaire, & accuser de la mort de tant de gens de bien vne fièvre de pourpre, encore qu'elle soit procurée par la vostre.

Pag. 37.
38. 39.

Pag. 40.

Vous dites pour conclusion, que vous occipez

toutes les affections du Roy, & ne pouvez eſtre d'humeur
 de quitter la place que vous tenez dans l'Eſtat. La
 Reyne Mere du Roy, la Reyne Eſpouſe du Roy,
 Monſieur Frere vnique du Roy, tous les Princes
 du Sang, les autres Princes & Grands du Royau-
 me, tous les ſeruiteurs de S. M. & ſon peuple,
 ſont à ce compte bien mal-heureux de n'auoir
 rien dans cette affection; ce qui ne peut eſtre, ſi
 vous l'occupez tout. Puis que nous n'auons point
 de place dans ce cœur Royal, nous croyons que
 les ſemences de quelque compaſſion y ſont enco-
 re; & qu'elles germeront avec le temps. Permet-
 tez nous au moins de flatter nos eſperances pour
 l'aduenir, puis que vous ne nous laiſſez rien pour
 le preſent, & que vous parlez d'occupation &
 poſſeſſion, comme feroit vn demon, ou vn for-
 cier. O Dieu, où ſommes nous, à quel point eſt
 montée l'impudence ! on nous appelle aupres du
 Roy; & on nous dit en meſme temps, qu'il n'y a
 plus de part dans ſa bien-veillance pour nous,
 comme ſi nous pouuions eſtre en ſeureté ſans cela.
 Celuy qui nous a chasſé non ſeulement du Roy-
 aume, mais de l'eſprit de noſtre Roy, tient la
 moitié de celuy-là, & celuy-cy tout entier, com-
 me il confeſſe luy-meſme. Apres cela il dit, *qq'il*
ne ſera pas en humeur de ſe deſfaire de la place qu'il a
dans l'Eſtat. C'eſt que vous croyez la poſſeder
 à vie, comme vn benéſice dans le titre duquel
 vous voulez mourir. Vous croyez que l'aucto-
 rité que vous auez, eſt acquiſe par quelque droit,
 & aſſeurée par les loix Royales & Imperiales.
 Cela ſeroit vray, ſi la meſme poiſſance qui l'a don-
 née par excez de bonté, ne la pouuoit oſter par

raison & iustice; & si les seruiteurs des Roys n'estoient point de iettons dans les mains de leurs Maistres, qui s'en seruent pour vn grand & pour vn petit nombre. Aduouëz que vostre fortune est non seulement malicieuse, mais folle; son auement nous feroit rire, si elle n'estoit plus meschante que plaisante; & si nos maux n'estoiët plus sensibiles, que vos impertinences agreables. Vous exhortez Monsieur *de retourner sans traier*. Il ne le fera pas par vostre conseil, mais par sa bonne inclination: lors que les empeschemens que vous apportez seront ostez, & qu'un article sera vuidé, on n'en desirera point d'autres. Vostre puissance est suspecte, vos violences trop recognuës, & vostre naturel trop dāgereux: toutes les vertus, sur toute la generosité & bonté doiuent estre cōduits par la prudence, qui enseigne à Mr. par l'experience du passé, ce qu'il doit faire pour l'aduenir.

Vos remonstrances seroient receuës, si vous Pag. 42. estiez non pas comme vous dites *son ami*, mais son seruiteur. Vous dites *qu'il touchera le cœur du Roy par vn repentir de bonne grace*. Dequoy voulez-vous qu'il se repente? de ne s'estre point laissé emprisonner dans le bois de Vincennes? de ne s'estre point laissé prendre dans Orleans? d'estre sorti du Royaume, lors qu'on l'a chassé avec vne armée? d'auoir trouué mauuaise la detention de la Reyne sa Mere? de s'estre plaint du traitement qu'un seruiteur ingrat luy a fait, & des crimes qu'il luy a imposez?

On ne demande point pardon des maux qu'on a souffert, ou auxquels on s'est opposé; mais de ceux qu'on a fait ou laissé faire: la penitence ne suit

point la patience, mais l'offense : puis que vous seul estes dans cette-cy, cherchez le remede de celle-là ; & pour la rendre parfaite, ayez toutes ses parties : à sçauoir le desplaisir d'auoir fait le mal, la confession de vos fautes, & la restitution des Finances, places, & charges que vous avez pris au Roy. Sur tout reparez la reputation que vous avez rani par vos calomnies, que vous avez porté iusques dans les oreilles de S. M. & ietté dans le public par les declarations, & escrits remplis de diffamations scādaleuses & impostures abominables. Dieu ne vous donnera iamais l'absolution de ces crimes, que vous n'ayez rendu l'honneur que vous avez osté. Si vostre Confesseur, en la personne duquel vous avez dit souuent que vous auiez vni la charge de vostre bouffon, ne vous oblige à cette satisfaction, il se damne avec vous ; & vous estes aussi sage que luy, lors que vous proposez encore à Monsieur l'exemple de Charles de Lorraine. Vous ne pouuez dire la moitié d'une histoire, sans faire penser que vous avez le dessein de la rendre entiere ; ce qui des-honore le Roy, l'aduertit de son salut, & monstre le chemin que vous desirez de prendre, si on ne vous arreste.

Voilà sommairement ce qu'on peut vous remontrer sur le sujet de vostre Remonstrance : de laquelle ie peux dire, ce que dist vn meilleur Cardinal que vous n'estes, à vn meschant Antipape qui fit vne lettre pour la reformation de l'Eglise ; qu'il feroit mieux de luy monstre des bōs exemples, que de luy enuoyer des grandes harangues.

Nous vous demandons ceux-là, comme tres-necessaires à vostre salut ; & mesprisons celles-cy,

Mules.

Pag. 43.

comme remplies de calomnies & d'impertinences : on les voit entassées les vnes sur les autres, non seulement dans vostre Remonstrance, mais dans tous les escrits, que vos flatteurs, louez à pris d'argent, ou attirez par l'esperance des dignitez & charges, ont composés ou fagotez. Entre ceux-là nous auons remarqué *le vieux Courtisan des interressé* : lequel ayant effrontément menti en toutes les paroles du titre de son escrit, il ne se faut pas estonner si tout le corps de son discours est menteur ; n'y s'il a esté peu iudicieux dans l'election des choses qu'il a dit, puis qu'il paroist fol en l'inscription de son ouurage.

Second
libelle,
le vieux
Courtisan
des inter-
ressés.

Il dit qu'il est *vieux Courtisan*, sans estre vieux. Il dit qu'il est *Courtisan*, & est Religieux. Il dit qu'il est *vieux Courtisan*, estant sorti de la Cour fort ieune, & s'estant ietté dans vn Couuent aussi tost qu'il y est rentré. A la verité, ayant esté plus long temps dans la Cour d'un Prince infidele que dans celle d'un Roy tres-Christien, il pourroit passer pour *Courtisan*, s'il eust adiousté du Turc. Il ne se peut aussi appeller *desinterressé*, ayant pris la plume lors qu'il s'est interressé dans vn Euesché, qu'il a rui contre les droits de la Reyne Mere du Roy, contre les intersts de son amy, & du Protecteur de son Ordre ; ayant couru sus à trois affligez, pour leur arracher leur bien. Son pere qui auoit employé son bien au seruice de nos Roys, eust detesté ceste friponnerie. V.E. aduertira donc cet Escriuain, qui a chambre & entretien en vostre hostel, & qui a, apres le breuet de l'Euesché, voulu tesmoigner son zele & recognoissance, prenât vne plume pour vostre defense, qu'il a bronché,

comme vous en vostre Remonstrance , au premier pas qu'il a fait. Il n'est pas plus ferme dans la suite de son discours, qui est en effect vne censure critique , ou vne anatomie non pas d'un braue Chirurgien, mais d'un sale chercutier , de la lettre que la Royne Mere escriuit au Roy, apres sa sortie de Compiègne; pour rendre compte à S. M. des sujets qui l'auoient portée à prendre la route des Pays bas. V. E. qui a , comme l'Empereur Constantin , des souris dans son Palais ; en a trouué vne qui a rongé les lettres de la Reyne vostre Bien factrice. Vous auez voulu que ce bestion laissast couler sus le papier la baue venimeuse de sa folle passion, pour empoisonner ceux qui li ont les saillies de son petit esprit. Je me contenteray de vous en représenter quelques vnes, ne voulant point perdre le temps , ny abuser de vostre loisir pour vous les estaller toutes. Les pensées sont grossieres & malignes ; les paroles sont d'un homme qui a oublié le langage François, dans le long temps qu'il a esté & trafiqué parmi les Barbares.

Il commence, *Ayant veu courre la lettre de la Reyne* : il a veu courre vne lettre; il est vray, qu'il a esté le chien qu'on a lasché & ameuté apres cette lettre. Il adioute, qu'il a creu *que le Roy ne trouueroit pas mauuais que ie fisse quelques reflexions, que la raison peut faire à tout esprit non interessé, vn peu clair voyant, & capable de ratiocination.* Quel galimathias est-ce là ? quelle construction peut-on donner à ces paroles ? diroit-on pas que c'est vn escrit de Desuiettes de Normãdie, ou du Bouriquet de la Martegalle de Prouence ? Voylà vn eschantillon d'eloquence bien embarrassée , qui deuroit estre plus nette

à l'entrée , pour ne degoutter point le Lecteur. Voicy le bon sens du vieux Courtisan : il dit , *La Reyne attribüe la cause de sa sortie à la dureté de sa prison ; mais cette cause est sans estre , & sans fondement. Quand elle est partie de Compiègne, elle y estoit avec pleine puissance, sans gens de guerre , & sans gardes de la part du Roy: en quel pays cela s'appelle il dure prison ? mais il luy estoit dur , peut estre, d'estre traité avec tant de respect , & n'avoir pas pretexte de se feindre prisonniere , estoit vne Croix & vne prison à son esprit desireux qu'on la creust bien durement arrestée , pour faire pitié & donner couleur à ses plaintes.* O l'escolier de Cour ! ô le mal adroit homme pour vn vieux Courtisan, duquel V.E. a fait vn lourd & grossier Escrivain ! Il n'y a pas vn mot en tout ce discours qui parte du sens commun de l'Autheur , & qui ne choque celui du Lecteur. Quand il dit , *que c'estoit vne Croix à la Reyne d'estre traitée avec tant de respect* , il parle en vray conte de la Croix , ou autrement Herti des petites maisons. Lors qu'il adjouste, *qu'elle a désiré qu'on la creust bien durement arrestée pour faire pitié*, il tasche de persuader aux foibles esprits semblables au sien , que la plus grande Princeesse du monde a voulu souffrir vn mal cuisant pour esmouvoir vne compassion , qui n'est iamais vn remede. Elle auroit moins d'esprit & de courage que les gueux de la Cour des miracles pres la porte de Montmatre à Paris , qui se font des playes & irritent leurs vlcères pour émouvoir la charité des passans , desquels ils tirent quelque aumosne. Mais à quoy sert de souhaiter le mal, qui ne fera qu'horreur aux hommes , & les portera à soupirer ? De la mesme ceruelle , qui a

Pag. 8.

conceu ce beau discours, est sorti celuy qui est en la page huiëtiesme; là où pour déguiser la detention de la Reyne à Compiègne, il dit : *Elle y estoit avec toute sa maison, bien payée des Estats & pensions que le Roy luy donne, obeye en tout ce qu'il luy plaisoit de commander, en pleine liberté de s'aller pourmener par tout où elle voulou.* Ainsi parlent les voleurs qui ont battu, desualisé, & despoüillé vn pauvre Marchand : ils disent qu'il leur a vne grande obligation, parce qu'ils luy ont donné la vie. La Reyne doit confesser par le discours de vostre Escrivain, que vous luy avez fait beaucoup de bien de ne la reduire pas au pain des prisonniers, de ne l'avoir pas mise en basse fosse, & de n'avoir pas mis à ses pieds des fers de cent liures : en fin vous luy avez laissé l'air & le iour libres ; car pour la campagne que vous luy avez présenté, vous sçavez que c'estoit vne leurre : mais les aigles ne s'y prennent pas.

Il est plaisant lors qu'il dit, *que la Reyne Mere du Roy estoit obeye à Compiègne en tout ce qu'il luy plaisoit de commander.* Qui croira ce que vous escrivez, puis que vous ne le croyez pas vous mesme ? Je vous demande si le mot qu'elle donnoit en apparence n'estoit point changé, si l'entrée & la sortie des siens dépendoit d'elle, ou du Gouverneur que vous y aviez mis ; si ses domestiques n'estoient point conduits deuant luy par des hallebardiers, & s'il n'est pas vray qu'il interrogeoit ceux qui attriwoient plus soigneusement, qu'on ne fait les estrangers aux portes des plus importantes places du Royaume ? Les corps de gend de vostre Infanterie estoient iusques dans la

bessecour du Chasteau, la Cauallerie tenoit le dehors. Vous ostates les gens de pied pour inuiter la Reyne à vne sortie, que vous desiriez de rendre funeste : vous auez voulu prendre cét oyseau Royal au passage, mais Dieu a rompu vos filets. Vostre Escruiain Leuantin parle de ces choses comme s'il estoit encore à Constantinople, informé par les aduis de Monsieur de Guron.

Ce qui est en la page dixième, est encore plus ridicule. Vous dites *que la façon dont le Roy s'est* Pag. 10
gouverné en sa separation d'avec la Reyne sa Mere,
monstre bien qu'elle n'a pas esté arrestée en criminelle :
elle n'y a du tout point esté arrestée. Voila les considerations de vostre Courtisan, qui escrit en vray Secrétaire de Saint Innocent. Il loüe en la façon avec laquelle le Roy s'est separée d'avec la Reyne sa Mere, laquelle n'a pas eu l'honneur de voir sa Majesté pour luy dire adieu; comme elle fit l'an 1617. estant renuoyée à Blois. Deuant que S. M. partist de Compiègne, les corps de garde furent posez par les ordres de V. E. autour du chasteau, le premier Medecin auoit esté pris, les clefs des portes auoient esté ostées aux siens: apres cela *elle n'a pas esté arrestée en criminelle.* Comment appelez vous cét arrest fait de sa personne? est-ce pour matiere ciuile, & pour les debtes qu'elle a fait pour vous enrichir, ou parce qu'elle estoit deuenue furieuse? Nous n'auons pas ouy dire qu'elle aye fait aucune extrauagance: mais nous voulons demeurer d'accord qu'elle *n'a point esté arrestée en criminelle*, car elle est innocente. Vous aduoüez donc qu'elle a esté arrestée, non pas en criminelle, parce que vous recognoissez qu'elle ne

Il estoit pas. Vostre Courtisan corrige son discours impertinent par vn autre plus sot, lors qu'il ad-
jouste : *Elle n'y a point du tout esté arrestée.* Je trouue donc fort estrange qu'elle ne soit allée à Paris, & n'aye pris sa retraicte en son Palais du faubourg Saint Germain, puis que rien ne la retenoit à Compiègne, & qu'elle estoit en pleine liberté. On voit l'effronterie de vostre barboüilleur de papier, en la suite de son ouurage, lors qu'il assure que la separation du Roy & de la Reyne sa Mere n'a point esté pour vostre suiet : Il iure non pas à foy de Prelat, car il ne l'est pas encore, que la declaration du vingt troisieme de Feurier n'en fait point de mention. Vous croyez que les registres du Parlement n'en sont point chargez, & que toutes les copies sont perduës : c'est vn fait trop public, vostre imprudence vous a porté à l'imprimer, & vostre malice l'a voulu supprimer. Vous forgez maintenant des causes nouvelles & chimeriques, en termes generaux. Vous n'auiez pas encore dit ces beaux mots que la Reyne affectoit d'estre en mauuaise intelligence avec le Roy. Au contraire (puis qu'il se faut seruir de vos paroles) vous sçauiez que la Reyne ayant affecté d'estre bien avec le Roy, son amour la conduisit au lieu qui estoit destiné pour luy seruir de prison. Le desir ardent de veiller à la conseruation de la santé de S. M. d'estre aupres d'elle pour empescher vos mauuais offices, & pour effacer de son esprit les impressions que vous donniez contre elle, la fit opiniastrer (contre les aduis de ses seruiteurs, & en apparence contre vostre dessein) à suiure le Roy par tout. Vous sçauiez-bien les efforts que vous fistes semblant de vouloir faire

pour rompre sa resolution : mais si l'amour maternel fut plus fort que vos artifices, s'il fist partir la Reyne Mere de Paris, & l'obligea à ne quitter iamais le Roy ; nous pouuons dire avec verité, qu'à Compiègne vos finesses furent plus fortes que l'amour maternel, qui se trouua arresté par vostre violence.

Vostre censeur est plaisant, lors qu'il asseutē *que la lettre que la Reyne a escrit aussi-tost apres la sortie de Compiègne, a esté dressée par la cernelle du Coigneux.* Ainsi (pour parler en termes de Paris) on coigne tousiours sur ce pauvre Coigneux. Mais prenez garde, qu'en le voulant faire passer pour meschāt, on ne le recognoisse pour saint: il ne se peut faire que par miracle, qu'en mesme temps il aye esté à Auenes, en Artois, & à Remiremont en Lorraine, & qu'il aye escrit vne lettre sur la sortie de la Reyne, & sur sa retraite aux Pays bas, deuant qu'il sceust ces nouuelles. Si vos Escriptuains ne sont plus sages, ils feront receuoir pour Prophetes ceux que vous descriez comme insensez, & vos Prophestes seront estimez des fols à la mode de Turquie.

Vostre Courtisan est-il si vieux, qu'il a oublié, comme on parle à la Cour, lors qu'il dit *que la Reyne avec vne inexcusable fermeté a tousiours demandé au Roy, qu'il trouuast bon qu'elle ne fist rien de tout ce que pour la seureté de son Estat, il desiroit d'elle: tant, qu'en fin la condescendance trop grande du Roy en son endroit, luy a donné moyen d'exécuter le dessein de sa retraite?* Icy les meilleurs esprits de France seroient bien empeschez de iuger, si le sens de ce discours est plus sot que les paroles: ceux qui ne co-

gnoiſſent pas ce bon autheur, croiront, en voyant le titre de vieux Courtiſan, que c'eſt quelque bon homme de cent ans, qui radote, & parle comme on faiſoit du temps des Romains.

Pag. 16. Pour faire paſſer pour actions de Juſtice & de zele au ſervice du Roy toutes les violences que vous avez fait, vous dites que *beaucoup de gens croient qu'aux affaires paſſées d'Italie on avoit quelque intelligence avec les eſtrangers*. Eſt-il poſſible que vous ayez fait tant de declarations, écrit tant de lettres, composé vn ſi grand nombre de libelles, ſans en decouvrir quelqu'une? que vous ayez rempli vos imprimez de toute ſorte d'injures, & que voſtre diſcretion aye caché quelque hiſtoire qui pouvoit redre la Reyne Mere du Roy criminelle, & faire paroître voſtre innocence? Si vous auiez peur de la diſſamer, voſtre reſpect auroit pluſtoſt retenu les calomnies qui ſont dans voſtre *Deſenſe du Roy & des Miniſtres*, que les veritez, que vous faites ſemblant de ſçauoir. L'emprisonnement d'une Reyne doit eſtre accompagné de la publication du mal qu'elle a fait, afin d'arreſter les plaintes des ſiens, & d'étouffer la compaſſion des peuples. Apres auoir fait tout ce que vous pouuez de mal; dites tout ce que vous avez ſur le cœur. La Reyne Mere du Roy vous en deſie, & dit qu'il n'eſt pas en voſtre puissance de faire voir, que ny de volonét, ny de parole, ny par eſſect elle aye rien entrepris contre le ſervice du Roy. Toutes les condempnation's ſont fondées ſur des faits particuliers: il faut monſtrer quel meurtre a fait celuy qu'on appelle meurtrier; qui a eſté empoisonné par l'homme, qui eſt accusé d'eſtre empoisonneur. Il eſt

aussi necessaire, de faire voir avec quels estrangers quand, cōment, pourquoy, & à quelles conditions on a traitté contre le bien de l'Estat, & intentions du Roy. Vous verrez, comme la découuerte & la poursuite d'un crime se doiuent manier, si les portes de la iustice sont vn iour ouuertes contre vous. Vous n'avez leu dans nos écrits que les etiquettes des sacs; qui sont remplis des pieces que nous voulons employer: & vous aurez peu cognoistre, qu'avec nostre misere, & vostre grande puissance; nous sçauons bien de vos nouuelles, encore que nos recherches ne coustent pas tant au Roy comme font les vostres.

Le vieux Courtisan nous veut faire croire qu'il ne sçait que les nouuelles de la basse-court, quand il dit, *qu'il seroit bon de sçauoir qui sont ceux qui ont fait telles menaces à la Royne Mere, iamaïs on n'y pensa.* On voit bien par ce discours, que Mōsieur le vieux Courtisan n'est sorti de son Cloistre pour rentrer dans le monde, que depuis quatre iours. Il a esté appellé pour faire passer pour œuvre de grand merite deuant Dieu l'emprisonnement de la Reyne Mere du Roy, & gagner vn Euesché en faisant vne Theologie nouuelle à la Courtisane, ou à la Turque, & prenant l'Alcoran pour l'Escriture Saincte. Si ce Frere ignorant veut sçauoir au vray qui a menacé la Royne Mere du Roy, & luy a dit des paroles bien rudes: sur tout qu'on luy osteroit tous ses Officiers, si elle ne vouloit reprendre ceux que vous luy auiez donnez pour espions; il s'en faut enquerir de Mr. le premier President, qui est Chef de la premiere cōpagnie de Iustice du Royaume: il a fait autrefois

profession de Cauallier, sans doute il dira franchement ce qu'il sçait, & preferera la décharge de sa conscience à l'affection qu'il a pour vous. Le Marechal de Schöbert & Garde des Seaux en pourroient bien dire quelque chose, s'ils vouloient: mais il ne les faut pas presser, parce qu'ils sont vn peu choleres, & qu'ils craignent de vous offenser. Vostre vieux Courtisan, qui les voit tous les iours se peut enquerir d'eux tout doucemēt, & apprendre ce qu'ils ont dit à la Reyne Mere à Paris, & à Compiègne, pour obeyr à vostre passion contre leur sentiment.

Vous confessez *que vous auez esté à la Reyne son Medecin*: ce qui ne s'accorde pas avec ce que vous auez dit en la page dixiesme, qu'on auoit laissé la Reyne à Compiègne avec toute sa maison: en laquelle le premier Medecin estoit vn des principaux, le plus nécessaire, & personne qui vous deuoit estre sacrée: mais vous dites *qu'il estoit vn broüillon, factieux, & boute-feu*. Sur quoy vous alleguez Caton, & luy faites dire ce à quoy il ne pensa iamais. Peut-estre que vous auez désiré des choses du Medecin de la Reyne pour le restablissement de vos parens aupres d'elle, que les poursuittes d'vn seruiteur n'ont peu gagner sur la raison de la Maistresse: nous ne sçaurions croire qu'il vous aye fait esperer plus qu'il ne pouuoit & deuoit: vous qui estes sa partié, l'auiez fait amener chez vous, & luy auez baillé la question (de parole s'entend) sur cet article, & plusieurs autres. C'est vn tesmoignage qu'il est innocent; & que ses depositions ne vous peuuent seruir contre la Reyne, parce qu'il est viuant.

Si vos

Si vos actions n'estoient des plus assurez
 tesmoignages de la perte de vostre respect, que
 vos escrits, on diroit que vous l'avez perdu en
 parlant d'une grande Reyne, & de vostre Bien-
 factrice, comme d'une petite marchande de Paris.
 Je laisse à part, qu'en la page deuxiesme vous
 avez dit *qu'on peut sans crime douter de la sincerité*
deses paroles: & que dans tout cet escrit, au lieu
 que vostre recognoissance ne deuroit point espar-
 gner cette repetition, *la Royne Mere du Roy*; vous
 dites, *elle, elle*. Souvenez-vous au moins que
 c'est elle qui a fait vn bon & grand L. & que
 vous avez tant d'obligation à cet ouvrage, & à
 Pouffiere, qui est celle de vostre auancement,
 que vous deuriez tancer ceux qui escriuent pour
 vous. *On luy offre de s'aboucher avec le Roy; elle en*
tire suiet de plainte: on luy propose Marie & Chartres;
elle veut qu'elle soit à Compiègne. On a respondu à
 cet article, dans les observations sur vostre De-
 claration: mais parce qu'on recognoist par l'ou-
 bliance des bien-faits que vous avez la memoire
 fort courte, on vous repetera que cette entreueüe
 que vous avez offert en passant, quand elle n'eust
 pas esté suspecte, ne pouuoit produire que des
 larmes, des soupirs & des sanglots, capables de
 faire mourir la Reyne Mere du Roy. Elle eust
 trouué sa Majesté tellement preuenüe par vos ar-
 tifices, qu'un demi quart d'heure ne pouuoit gua-
 rir les maux de quatre mois; & un adieu ou com-
 pliment semblable à celuy du départ pour aller à
 Blois, estoit suffisant d'enuoyer la Reyne aux
 abois. Vous estes fasché de ce que sa prudence a
 cogneu vostre artifice: vous escumez de rage lors

L.
 Louys.

qu'on descouure vostre jeu ; vous estes autant marri quand on est sage , que vous estes ioyeux lors qu'on est temeraire : vous voulez faire & escrire le mal, & vous estes au desespoir lors qu'on s'y oppose ; ou qu'on fait des Apologies. En fin, vous estes tellement accoustumé de faire la guerre sans resistance , que lors que vous en trouuez dans les esprits que vous esueillez , & dans les escrits que vous prouquez , vous entrez en furie. Il vous faut pourtant resoudre , ou à ne faire ny escrire les mauuaises choses , ou à souffrir qu'on s'y oppose par bons conseils & bonnes responses. Il n'est pas raisonnable , que vous , qui n'estes & ne pouuez iamais estre que seruiteur , ayez cet auantage sur vostre Maistresse , & sur la Mere de vostre Roy , de pouuoir mal faire & mesdire , & qu'elle n'aye ny le courage ny la puissance de se defendre. Elle seroit aussi tres-mal'heureuse , si vostre fortune auoit rencontré des personnes qui vous donnent des mauuais aduis , & font pour vous des libelles ; & que sa vertu fust abandonnée de toute sorte de secours. Vous auez beau à crier & à menacer ; tous les hommes ne sont & ne seront pas ingrats comme vous. En fin, quand vous aurez fait, dit, & escrit tout ce qui vous plaira ; on fera, dira, & escrira ce qui ne vous plaira pas.

Fig. 20.

Vostre Escriptuain poursuit avec aussi peu de respect que de sens : Il dit qu'en elle toute l'Europe eust esté menée en triomphe , pource que ses Enfans y dominant ; comme si les Reynes ses Filles appartenoint à elle seule , & non point au Roy. Je croy que vostre Courtisan refusoit , & croyoit que le feu Roy viuoit, lors qu'il a escrit , parlant à vne Mere , que

les Enfans appartenoyent aussi bien au Roy qu'à elle. Vous aduoierez, s'il vous plaist, qu'il y a quelque difference entre frere & sœur, & Mere & filles; nous deuons la vie à nostre source, non aux ruisseaux qui en sont sortis deuant, ou apres. La premiere & plus grande obligation de la nature est pour les Peres & Meres; ils vont immediatement apres Dieu: les affections qui montent ou descendent en droite ligne, sont plus fortes que les collaterales: les respects & les amours que se doiuent rendre ceux qui sont sortis de mesme ventre, sont fondez sur le sang duquel ils ont esté formez; s'il les porte à s'honorer & aimer les vns les autres, à plus forte raison ce qui en est la cause & le lien. Cela nous fait voir, que les Reynes d'Espagne & d'Angleterre (puis que vous ne voulez point faire mention de Madame la Duchesse de Sauoye, qui n'est pas de pire naissance pour n'estre point Reyne) appartiennent à la Reyne leur Mere d'autre façon qu'au Roy. Elles sont obligées par la nature, & par la loy de Dieu, de prendre vne grande part à ses des-plaisirs, & à tesmoigner leurs ressentimens contre tous ceux qui en sont les aucteurs. Si vostre Courtisan auoit estudié en Theologie naturelle & diuine, autant de temps comme il a fait en l'Alcoran & en l'Arabe, il auroit appris ceste belle leçon, & escriroit autrement; pourueu que la recôpense de la mitre, qui ne luy fera point changer la ceruelle, ne luy fist point changer de discours.

La teste de vostre Escruiain s'estant eschaufée, Pag. 22.
est deuenue de folle furieuse; elle fait vn essanc
d'un forcené attaché au pilier de S. Mathurin en

Gastinois, ou de saint Benigne de Dijon, lors qu'il dit, parlant de la Reyne Mere du Roy: *Si elle cunctinē, elle auroit à craindre de paroistre en fin ennemie de l'auctorité du Roy, & de donner lieu de croire, qu'elle la hayt mesme en sa personne, & non seulement en celles de ses serviteurs: vrayement le Roy a vn bon tuteur de sa personne, & de son auctorité. Par vostre foy (s'il vous en reste) cet homme qui se dit desinteressé en toutes choses, est-il plus interessé en la conseruation du salut du Roy & de son Estat, que la Reyne sa Mere? aura-il plus de vertu, apres auoir vendu sa conscience pour vn Euesché, que la Reyne qui est despoüillée de son bien, pour n'auoir point voulu dissimuler vos vsurpations?*

Monstrez-nous le vice qui a corrompu ce bon Sang; il y a long temps que nous vous pressons sur cet article, qui est le seul que vous proposez au Roy. Vous le deuiez cacher au public comme la plus grande de vos meschancetez: vous estes obligé de blasmer cet indiscret, qui reuele vos secrets mysteres, qui sont de persuader au Roy que la Royne sa Mere *est ennemie de sa personne*; à laquelle son cœur ne pense iamais que sa poitrine ne souspire, & que ses yeux ne pleurent. Elle voudroit perdre la vie de laquelle Dieu a tiré celle de sa Majesté, si sa mort pouuoit estre vtile non seulement à sa santé, mais à sa prosperité. Vous scauez bien qu'elle est de bon naturel; le Roy l'a souuent recogneu: & parce que le sien qui est de mesme trempe, ioignoit facilement ses affections avec celles de la Reyne sa Mere, vous n'auiez point trouué de moyen de les desunir,

qu'en separant les personnes. Vous y auez ad-
iousté la violence des soupçons que vous auez
donné à cette ame Royale: mais elle sera surmon-
tée par la puissance inuincible d'un Sang aussi ge-
neroux qu'il est noble. Nous ne le supplions pas
qu'il se vange sur le vostre, de l'injure que vous
auez fait au sien: nous prions Dieu qu'il suggere
à sa prudēce d'autres moyens pour vous chastier,
& que S. M. apporte des remedes iustes & puis-
sans, aux maux que vous auez fait, & aux blasphem-
es que vous auez escrit.

Vostre Escriuain dit, *que la Verité, Royne des* Pag. 22
hōmes & des Anges, a bien perdu son credit aux esprits
(pour dire dans les esprits) de ceux qui ont dit que
V. E. auoit dessein de perdre l'Estat. Est-ce vn iuge-
ment temeraire contre lequel il faille inuoyer la
Verité, & faire des exclamations d'enfant, lors
que nous disons qu'on voit les apparences d'inua-
sion d'un Estat, en la distribution de toutes les
grandes charges du Royaume, & en la recompēse
des plus importantes places, qui sont es mains de
ceux qui depēdent plus de vous que du Roy? Vous
auez depuis peu, ou pris, ou fait dōner à vos amis
& creatures les Gouuernemens de Bretagne, de
Poictou, de Picardie, d'Anjou. de Bourgongne, &
d'Auuergne; voila le tiers du Royaume. Vous
auez trente Villes ou Citadelles, desquelles vous
& les vostres estes Gouuerneurs: vous auez vni à
vostre personne les charges de Connestable &
d'Admiral, & faites exercer par vos procureurs
celles des Gardes des Seaux, de Surintendant des
Finances, de grand Maistre de l'artillerie, & de Se-
cretaire d'Estat. Iamais les Anglois ny la ligue

dernieres n'ont eu ces auantages en France : ils ont, peut estre, tenu plus de places ; mais il n'y en auoit pas vne si bonne comme est la moindre des vostres. Les Officiers de la Couronne n'estoient pas à leur deuotion, ny les Fināces dans leurs coffres, ny les armes & toutes les munitions dans leurs magazins, ny le Roy preuenu & assiegé par eux, cōme il est par vous, & ceux de vostre faction. Apres cela, nous ne sommes point criminels deuant Dieu, de dire que vous auez toutes les marques d'un vsurpateur, ou dissipateur ; prenez de ces deux titres celuy qui vous agréera le plus. Ne iuger pas que vous deuez porter l'un ou l'autre, seroit vn telmoignage de sottise ; & ne le publier pas, seroit vne conuiction de trahison. Nous scauons mieux les cas de cōscience que vostre Theologien ignorant, & corrompu : il y a long tēps que S. Augustin nous a enseigné, qu'il est loisible de iuger hardiment des choses manifestes ; & nous scauons bien que pour estre vray Chrestien, on n'est pas obligé d'estre grosse beste.

pag. 23.

Sur ce qui auoit esté escrit que vous auiez dessein de faire mourir la Reyne entre quatre murailles, vostre Courtisan se met en cholere, & dit, *que si le respect qu'on veut rendre à la Reyne n'estoit extraordinaire, on le perdrait en cette occasion* ; comme s'il n'auoit pas esté foulé aux pieds il y a long temps, & qu'on ne l'eust pas recogneu par les actions, par les paroles & par les escrits. Mais afin que la mauuaise humeur de vostre Courtisan s'appaise, & qu'il ne trouue pas si estrāge ce qu'on a dit ; il remarquera, s'il luy plaist, que ceux qui ont eu le pouuoir & l'audace de faire arrester la

Reyne Mere du Roy , ont peu passer au delà de cette violence , & la faire reserrer plus estroittement. Cela estoit plus aisé apres vn emprisonnement, & moins extraordinaire, que de luy oster la liberté toute entiere. On s'estõne fort peu, quand on dit qu'un prisonnier, qui se pourmenoit sur les tours & remparts de la Bastille , a esté reserré; mais de le voir pendre dans Paris , cela espouuâte tout le monde. Celuy qui offense , ne pardonne iamais; la mauuaise conscience ne se pouuant asseurer, porte ses entreprises iusques aux extremitez. Dans l'ame malicieuse vn crime attire l'autre, le desespoir vient à la fin qui iouie de son reste , & croit que les ressentimens des maux qu'il a fait, ne se peuuent estouffer qu'avec les personnes qui les ont soufferts. Vous le prendrez comme il vous plaira : mais ie trouue qu'il y a plus de distance de la pleine liberté d'une grande Reyne à la captiuité dans vn Chasteau , ou dans vne Ville, que de ce Chasteau ou de cette Ville à vne seule chambre ; ce qu'elle a appellé quatre murailles. I'abandonne volontiers le reste du discours de vostre vieux Courtisan , parce qu'il va de mal en pis; & est tellement despourueu de iugement, qu'il est plus digne de compassion que d'indignation, & de risée que de responce : tout ce que ie vous peux dire, est, que pour destruire vne bõne cause, & en soustenir vne mauuaise , vous auez choisi vn tres-impertinent Aduocat. Mais vous, qui en voulez auoir de toutes façons , auez iugé que cestuy feroit bon pour les espiciers , droguists, charlatans, esguilletiers, rubaniers, & beurriers de Paris, pour plier leurs marchandises avec les feuilles

de ce pretendu deſintereſſé , qui ſe tire d'une Compagnie religieuſe pour arracher vn Eueſché à ſes amis affligez. S'il veut oſter ſes droits à la Reyne, il luy deueroit laiſſer la reputation, & pour mieux couvrir le meſpris de ſes intereſts, il feroit bien de ne ſe ſeruir point du temps pour chicaner ceux qui ne ſe peuuent defendre. *La charité*, dit ſaint Paul, *ne cherche point ce qui luy appartient ; à plus forte raiſon ce qui ne luy appartient pas : & nous pouuons dire que ce n'eſt pas eſtre deſintereſſé, de paſſer au delà de ſes intereſts, pour deſrober ou prendre hardiment ceux d'autrui. C'eſt vne petite remonſtrance que vous ferez, ſ'il vous plaift, à voſtre aduocat ; & que vous deuez appeller protecteur par raillerie, comme vous faites le bon Duc de Montbazon.*

Nous en auons veu vn autre qui eſt d'humeur bien differente, encore qu'il ſoit aſſez vieux Courtiſan ; ayant eſté banni de la Cour du temps du feu Roy, pour auoir mal fait ſon premier meſtier, qui eſtoit d'eſtre miniſtre d'amour : Il eſt vray qu'il exerçoit cette charge vn peu plus honorablement, que ne font les huiſſiers de la Samaritaine. Il a eu honte de s'appeller deſintereſſé, parce que toute la Cour a ſçeu qu'il a eſté quelque temps hors de vos bonnes graces, pour auoir trop groſſierement eſcroqué vingt mille liures en la recherche des Financiers, & auoir lourdement couppé la bourse en faiſant branſler la ſonnette. C'eſt ce bon Seigneur, qui eſt Aucteur d'un eſcrit de quatre fueilles (c'eſt à dire, de deux ſols) & qui s'appelle *Discours au Roy touchant les libelles faits contre le Gouvernement de ſon Eſtat.*

L'Eueſché de S. Malo, de la nomination de la Reyne.
1. Cor.
13.

Reſponſe au troiſieſme libelle.

Ce beau discoureur est semblable à Don Quixote, qui ne trouuant point d'ennemi, combattoit contre les aîles des moulins à vent. Deuant cét imprimé, & les autres qui ont prouqué les deffenses de la Reyne Mere du Roy, & de Monsieur, on n'a point veu de libelles, si on ne donne ce nom là à des lettres enuoyées, & receuës par S. M. auxquelles on a respondu.

Cét Escruiain, qui n'est pas apprentif comme l'autre (car il a fait la premiere & seconde Sauoisienne, l'Entretien des champs Elisées, & autres œures du temps) nous a fait esperer qu'il refuteroit quelques escrits : mais il a voulu combattre plus au large, & n'a rien proposé de ce qui a esté escrit contre vous. Il parle par tout en termes generaux, & s'égaye en l'air, comme vn oyseau qui a pris l'essor. Son commencement est semblable aux prefaces que font ordinairement quelques compositeurs des imprimeries de Paris : pour auoir moyen de faire vn bon repas, inuentent vn iour de petite feste quelque histoire d'vn monstre né, ou d'vn prodige apparu, ou d'vne défaite aux Indes, & pour remplir la feüille employent les deux tiers du discours en auant-propos. Vostre Apologiste en fait de mesme ; & parce qu'il cognoist bien que vous auez vn esprit assez delicat, qui aime mieux les choses belles que les bonnes. & les apparentes que les solides, il a fait sur vostre table trois ou quatre seruices d'oyseaux & poissons peints à la mode d'Heliogabale, afin que cette gentillesse fust plus agreable à la veüe qu'à l'appetit. Apres ce festin de viandes creuses, il a dressé vn theatre comme vn Tabarin, & fait venir vn

Astrologue, vn Physionomiste, & Chiromantiste, auxquels il fait voir l'horoscope, le visage, & la main du President le Coigneux, & fait conclure à tous trois qu'il est insensé. C'est ainsi que vos gēs, pour vous diuertir de vos melancholies, conuertissent en risée les plus importantes & plus serieuses affaires qui soient iamais arriuées en France. La Royne Mere du Roy, la plus grāde & meilleure Princeesse du monde, estoit en prison; le Frere unique du Roy, qui est sans enfans, estoit chassé hors du Royaume; la Chrestienté esmeuë par ces scandales; toute la France affligée de peste, & la plus grande partie de famine: on conuertit toutes ces choses en bouffonnerie. On ioüe dans le Royaume vne sanglante tragedie, & on la fait passer deuant le Roy pour comedie: on luy deguise tous ces maux, en disant que le premier Officier de Monsieur a perdu l'esprit, & mesme qu'il est né sans ceruelle. Chose estrange, qu'il aye esté sage lors qu'il a esté en bonne intelligence avec vous, & qu'il soit deuenu fol lors qu'elle a cessé. Si cela estoit, il faudroit que Dieu fist des grands miracles pour vous: car de dire, que le defaut que vous imposez, soit deuant la rupture; vous vous accuseriez ou de sottise, ou de malice: pardonnez-moy, si ie vous dis, que vous passeriez pour stupide, si vous n'auiez pas apperceu le defaut de cét homme, ayant traité si souuent avec luy de tant d'affaires importātes, dans lesquelles il estoit aisé de recognoistre ces imperfections. Si vous en auiez eu quelque cognoissance, vous estes vn meschant de n'en auoir pas aduertit le Roy, la Reyne sa Mere, & Monsieur. Vous auez esté encore plus

naïf de l'auoir assisté (comme vous luy repro-
chez) pour auoir la charge de President au mor-
tier, & de payer pour monter en vne place, en
laquelle il doit estre arbitre, non seulement des
biens, mais de la vie & de la mort des plus grâds
& des plus sages de Frâce, & mesmes estre vostre
iuge, si la haine que vous declarez, & l'injure que
vous luy faites, ne vous seruent de moyens de re-
cusation. Vous tesmoignez encore vne meschan-
teté plus noire, lors que vous aduoiez, que vous
auez porté le Roy à demâder vn chapeau de Car-
dinal pour le mettre au dessus d'une marote. Vous
des-honorez aussi bien le College Eminentif-
ime par vos discours, comme vous faites par vos
mœurs & actions : & vous faictes paroistre que
vous n'estes pas sage, lors que vous auez desiré de
vous rendre compagnon des fols. Je supplie tres-
humblement V. E. Ducale de receuoir vn bon cõ-
seil, que ie desire de luy donner. Vous ne deuriez
iamais permettre qu'on parla deuant vous si sou-
uent, comme on fait, de ceux qui ont perdu l'es-
prit : vous sçauiez que la testament de vostre frere
aîné a esté cassé, sur ce que vous auez allegué
qu'il estoit deuenu fol : & vous n'ignorez pas, que
vous auez vne sœur qui a esté enfermée pour vne
estrange imagination qui la tourmente depuis dix
ou douze ans. Apres ces badins, qui vous re-
presentent vos ennemis comme insensés, viennent
vos Docteurs en Theologie à la mode, qui iurent,
que Dieu par vn iuste iugement fait fondre &
couler par le nez toute la ceruelle à ceux qui
s'opposent à vos desseins : que vouloir troubler
le courant de vostre fortune, fai- perdre le sens

aux personnes , comme faisoit l'eau de cette fontaine en Grece , si on ne la beuvoit dans le sein d'un asne : le soulier de vostre Escrivain pour ne bien auoir cette vertu.

C'est vne chose veritable , que ceux que vous desirez de faire passer pour hommes qui ont perdu l'esprit , ont tesmoigné qu'ils en auoient beaucoup dans les charges & deputations publiques dans les harangues de la part de la chambre des Comptes faites au Roy , & receuës avec admiration , dans les affaires traitez avec vous , & dans le Conseil de S.M. Tant s'en faut que le iugement de Dieu leur aye osté le leur en vous resistât, qu'au contraire ses graces & assistances extraordinaires les ont rendus & fait paroistre plus aduisez, lors qu'ils ont approuué & fortifié les resolutions de Monsieur. Il seroit, peut-estre, mort de déplaisir, ou autrement dans le Donjon de Vincennes , & eux dans la Bastille, & apres cela l'Estat en proye. Si vous appelez ces préuoyances des folies, c'est que vostre plus grande impieté consiste en ce que vous croyez ; que c'est estre priué de raison d'auoir vne bonne conscience.

Pour vous monstrier que le proverbe est veritable, Tel Maistre tel valet ; vos flatteurs ne sont pas mieux timbrez que vous. Nous vous ferons remarquer quelques impertinences & sottises qu'ils ont fait , en voulant defendre vostre cause. Elles sont si éuidentes, qu'il n'y a que leur folie reconnüe qui les puisse mettre à couuert du crime de preuariance : comme lors que vostre discoureur dit en la page septiesme , que c'est vne espee de sacrilege de disputer du iugement du Prince , & de reuer-

que en doute , s'il a bien ou mal fait à quelqu'un. Si pour excuser vostre Escrivain on ne met en suite de ses paroles avec raison ; & qu'on n'assure que cel est demeuré au bout de sa plume , il faut necessairement qu'il passe pour insensé, s'il veut dire que ce soit sacrilege de douter si le Prince a fait bien ou mal à quelqu'un. Ce ne sont point articles de foy diuine, ny morale, ny naturelle: faire du bien & du mal à quelqu'un sont des faits desquels on peut douter sans peché mortel , & à plus forte raison sans sacrilege. Il y a mesme du merite de se défier si le Prince a fait le mal , duquel vous estes plustost l'auteur que luy , & qui vous peut estre imputé avec certitude, par ceux qui cognoissent la vertu du Roy. Si entrer en doute d'où vient le bien que S.M. fait , est vn crime ; qui est plus coupable que vous, qui vous faictes auteur de toutes les bonnes actions que le Roy fait , & le chargez des mauuaises que vous faictes? Ainsi par vn horrible peché, qu'on peut appeller double sacrilege plus à propos que ce que vous dites , vous faites cét échange abominable de donner à vostre Maître la haine des maux que vous faites , & de luy desrober les louanges, & les recognoissances des biens qu'il a fait.

De la mesme source de folie vient cét autre discours en la page douziesme , que les Ministres de Monsieur vous auoient donné assurance que leur Maître ne s'opposeroit point à vostre grandeur, & rechercheroient toute sorte de moyens pour ayder à vostre auancement. Il est vray que le sujet de tous les troubles vient de l'opposition à cette grandeur , non à la gloire du Roy, & à la paix de son Royaume. Je laisse à pen-

fer, si Monsieur a esté si lasche de vous promettre qu'il vous porteroit sur sa teste, & donneroit secours pour la conqueste ou dissipation de l'Etat.

Vous iugerez aussi, si c'est discourir en homme sage, d'escrire en la mesme page, que le Roy craignant que la grosse nuë du desplaisir de Monsieur, sous prétexte de son principal Ministre, ne se deschargeast sur sa personne & sur son Etat, iugea qu'il falloit d'estacher son Frère d'aupres de la Reyne sa Mere; gratifier le Coigneux de la charge de President au mortier, & de l'esperance du Chapeau de Cardinal. Où est le iugement de vostre Escrivain, lors qu'il dit que le Roy a eu peur de Monsieur, qu'il a mis la diuision entre luy & la Reyne sa Mere: cela est vn peché. La bonne intelligence n'auoit point de mauuais dessein, & n'a iamais eu autre fondement que celuy du Sang, & du seruice du Roy, avec quelque dégoust de vos imprudences, malices, & insolences. Vous faites aussi vn grand tort à sa Majesté, & la descrivez parmi son peuple, lors que vous dites, qu'elle a donné vne charge de President au mortier à vn homme qu'elle estimoit fol & meschant, & luy a présenté le lurre d'un chapeau de Cardinal pour le faire venir sur le poing, & le chaperonner. Vous nous representez le Roy qui est genereux & bon, comme timide; vous tachez de persuader, qu'un Prince, qui ne doit rien auoir en plus grande recommandation que sa foy & sa parole, se mocque de ceux auxquels il l'a donnée.

Pour monstrier que vostre discourueur est tellement depourueu de sens commun, qu'il ne corrige iamais ses premieres pensees par les secondes,

& ne fait aucune eslection ny des paroles ny des choses : il dit en la page treiziesme, que les Ministres de Monsieur auoient promis au Roy, qu'ils retiendroient leur Maistres dans l'obeyssance aueugle. Vous desirez de Pestendre iusques à souffrir le renuement, le pillage, la dissipation, la ruine, & l'vsurpation de l'État ; vous voulez que Monsieur ne se plaigne non plus de l'emprisonnement de la Royne sa Mere, qu'un Moyne bien reformé, qui fait profession d'obeyssance aueugle, d'un changement de Conuent ou de chambre, ou un Soldat d'estre mis en faction.

En la page quatorziesme nous remarquons que les paroles genereuses & trop douces, que Monsieur vous dist en partant de Paris, sont appellées *frasque honorable pour vous*. Il est vray, que la retenue fut, peut estre, trop grande, & accompagnée de quelque respect rendu au Roy, & à vostre dignité; mais le mot de *frasque* est tres-mal employé.

De pareille estoffe sont les termes, avec lesquels on fait que le Roy vous parle apres le départ de Monsieur. Vostre Escriptuain dit, que S. M. vous promet de vous assister enuers tous, & contre tous. Quand la bonté de sa Majesté se seroit abaissée iusques à vser de ces paroles de pair à compagnon, vostre modestie deuroit publier que le Roy vous auoit pris en sa protection. On diroit en lisant cet écrit, que vous auez vne querelle, & que vous croyez que le Roy sera vostre second ; ou que vous estes un Souuerain, avec lequel le Roy fait vne alliance.

Tous les manquemens de iugement que nous auons remarqué, semblent estre à couuert par ceux

qui ſ'enſuiuent. Vous parlez en la page quinziesme des affaires d'Angers , & les appelez *la rebellion du Pont de Sé*. Vous auez donc eſté le chef des rebelles. Toute la France ſçait que vous fuſtes le ſeul auteur de ces mouuemens, pour gagner dâs vn traicté le chapeau de Cardinal. Il fut la recompenſe de cent tours de ſoupleſſe que vous fiſtes , & qui vous ont donné le nom de Cardinal de la trahiſon : belle qualité , que vous porterez dans les plus veritables Histoires de Frâce. Vous ſçauiez que vous eſtiez d'accord lors que vous fiſtes tuer cinq cens hommes, & ne tint pas à vous, que plus de dix mille ne fuſſent aſſommez. Vous croyez qu'on ne ſçait pas que vous donniez tous les iours les aduis des reſolutions , que vous preniez avec les Princes & Grands qui eſtoient aupres de la Reyne , & que vous ſeul deſcouuriſtes au Roy, apres la déroute, le deſſein que la Reyne auoit d'aller paſſer la riuere de Loire à Anſenis. Vous ne le deſiriez pas , de peitir que la Reyne ne rencontraſt en Angoumois & en Cuyenne des puiffans & fideles ſeruiteurs, qui luy euſſent deſcouuert vos menées. Le Roy, qui les auoit ſceus, entira ſa gloire, & nous en loions Dieu : mais ſa Maieſté vous meſpriſoit , & deteſtoit ſi fort pour ce double ieu, qu'elle recula de deux ans voſtre promotion au Cardinalat, & de deux autres apres voſtre entrée dans ſes conſeils : le Roy n'alleguoit point d'autre raiſon à la Reyne Mere , qui eſtoit portée par ſa mauuaiſe deſtinée à preſſer ſa Maieſté de vous donner cognoiſſance de ſes affaires.

Vous auez bonne grace , lors qu'en la page ſeiziesme, reuenant ſur les affaires d'Angers, vous

ditez

dites, que vostre prudence pacifia le tout. Je vous prie, ne faites pas ce tort à cette belle vertu, de luy donner quelque part dans vos finesses & laschetes, nni ont fait disputer aux plus sages, si le dessein de cette guerre a esté plus infame, que la conclusion. Il suffit de dire, que le commencement & la fin sont de vostre seule inuention, & que Dieu a tiré du bien de vostre peché, comme il a fait le salut des hommes de la perfidie d'un Apostre.

En la mesme page vous faites parler le Roy en si beaux termes, & luy donnez des pensées si releuées, lors que S. M. apres la rupture tascha de vous remettre dans les bones graces de la Reyne sa Mere, qu'il est aisé de iuger que vous auez dresé ce discours pour ietter la Roynie dans son tort, la faire blasmer de mespris enuers le Roy; & de trop grande rigueur contre vous. Outre que ces paroles bien recherchées par vostre Escrivain, ne sortirent iamais de la bouche de S. M. qui parle bien, mais en Roy: vous sçauiez qu'il n'autoit iamais dit *que vous l'auiez si dignement serui, ny que vous auiez preferé ses interests à tous autres.*

Nous renuoyons la refutation de ce discours à la cognoissance publique: personne ne dira que vous n'ayez eu plus de soin de faire vos affaires que ceux de vostre Maistresse, ayant fait en sorte, que vous auez plus de reuenu qu'elle. On ne croira point aussi que vous ayez mangé le bien de vostre maison auprès d'elle; au contraire, vous l'auiez tiré de la discussion generale, & l'auiez augmenté au centuple. Ce que vous escriuez, pourra, peut estre, surprendre ceux qui n'auront aucune cognoissance de l'estat auquel la fortune vous

trouua, lors qu'elle vous prit pour vous presenter à la Reyne Mere du Roy.

Pour donner plus d'auctorité à vne imposture plus grande, vous dites en la page 17. avec vne esfronterie estrange, que le Roy dist aussi à la Reyne sa Mere, qu'il ne mettoit point en ligne de compte les continuelz seruices que vous luy auiez rendus, lors qu'elle n'estoit plus regardée de personne, ny les desplaisirs que vous auiez recens durant son estoignement de la Cour en Auignon. Vous n'avez pas esté le page (car c'est trop peu pour vous) qui avez porté le flambeau deuant vostre Maistresse; mais vous croyez auoir esté ce soleil qui a esclairé cette pauvre Princeesse, qui demerroit incognüe dans les tenebres. Sa Naissance, son Mariage, ses Enfans, & sur tout le Roy, sa Regence, ses Vertus, ses bonnes actions ne la faisoient point cognoistre sans vous: toutes ces lumieres n'estoient que des vers luisans, iusques au leuer du bel Astre de vostre puissance & de vostre conduite; qui ont dissipé les broüillards obscurs, qui enueloppoient & auoient mis la Reyne hors de la consideration, & de la vüe de toute la terre. Elle estoit en toutes façons inuisible comme les Rosescroix, lors que vous avez ietté vos rayons sur elle pour la faire voir & admirer. Mais que voulez-vous dire, & de quel temps entendez-vous parler, lors que vous dites, que personne ne regardoit la Reyne Mere, lors que vostre clarté a fait esclatter la gloire? si c'est lors que vous fustes enuoyé à Angoulesme par Monsieur de Luynes; vous scauez le vōtraire, que tant s'en faut que vous l'ayez esclairée, que vous fistes en sorte que tous ces bons & genereux ser-

uiteurs ne la regarderent plus, qu'ils se retirèrent mescontans, & abandonnerent les interests. Le Capitaine de ses gardes, qui deuoit estre le dernier en cette retraite, tua vostre aîné, pour tesmoigner par cet exemple dans quel desespoir vous auiez ietté les seruiteurs de la Reyne.

Si vous dites *que vous l'auiez fait regarder* dans les affaires d'Angers, vous le pouuez dire de l'œil de compassion; car pour l'assistance & le seruice des Grands, elle n'en fut priuée que par vostre mauuaise conduite. Vous sçauiez le degoust qu'ils eurent apres vostre traité, d'as lequel tous leurs interests furent sacrifiez à vostre chapeau de Cardinal; qui fut cause que dix-sept ou Princes ou Officiers de la Couronne, & plus de dix mille Gentilshommes ne regarderent plus la Reyne mere du Roy. Vous estiez vn brôüillard espais qui leur desrobiez sa lumiere & ses influences: & vos mauuais offices les chasserent du lieu où son merite & leur affection les auoient appelez. Nous vous pourrions nommer ceux que le desplaisir fit mourir de regret, ceux qu'il precipita dans les morts violètes, ceux qu'il fit cacher dans les Cloistres, & retirer dans leurs maisons. Nous qui sçauons cōme les choses se passerent, & les tyrannies qu'avez exercé du depuis, pouuons dire avec verité, que tant s'en faut *que vous ayez fait regarder la Reyne, lors qu'elle ne l'estoit de personne*; qu'au contraire, lors qu'elle estoit regardée de tous les Grands du Royaume, vous l'avez emprisonnée, pour faire en sorte qu'on ne la regarda plus. C'est que vous auez voulu que leurs yeux fussent employez à cōtempler, admirer, & adorer vostre puissance absolue, qui est tant brillante &

brillante, qu'il y en a desia beaucoup d'aveuglez par les esclairs & ardeurs de sa gloire.

Vous reprochez aussi à la Royne les maux que vous avez soufferts en Auignon en sa consideration, durant son éloignement de la Cour. Dites plustost que vous estes la seule cause des cruels desplaisirs que la Royne a receu à Blois, & que son depart de la Cour, & les affaires qui arriuerent deuant & apres, sont les effects de vos mauuais conseils, & de vos violences. Vous estiez seul aucteur de tout ce qui despleut au Roy. S. M. qui a vne memoire excellente, se souuiendra bien, que vous estiez le grand Conseiller de ceux qui perdirent l'honneur de ses bonnes graces, les biens & la vie; & que toutes les choses qui furent trouuées mauuaises, estoient sorties de vostre inuention. Ce n'est pas donc le mal de la Reyne Mere, qui a fait le vostre, mais le vostre qui a fait le sien; & vous avez plus de sujet de luy demander pardon, que de luy faire vn reproche.

Vostre discoureur dit, pour monstrier que vous auez bien fait d'emprisonner la Royne, ce que vous appelez *pretendu arrest*, qu'il faut donner le coup pour ne le recevoir point. Quel coup vous a-on voulu donner, que vous n'ayez deu souffrir. deuant que de frapper la Reyne? vous estiez obligé de mourir plustost que de viure dans l'infamie de l'ingratitude. Où sont les entreprises contre vostre vie, ny contre vostre liberté, ny mesme contre vostre faueur, qui vous ayent peu porter à venir aux extremitez que vous auez pris, & à donner ce coup pour ne le recevoir pas? Dans le discours que vous appelez *Comp. d'Etat*, vous dites que vous

âvez resisté pour le bien du Royaume , auquel vous croyez estre autant necessaire comme Dieu au mōde; & dites avec luy, *Par moy les Roys regnent.* Prou.³ Cela est autant esloigné de la verité comme de la modestie ; il y auroit mēme quelque impieté de croire, que la Prouidēce diuine n'eust point d'autres moyens que ceux que vous pouuez fournir pour conseruer le Roy , & son Estat : vos actions persuadent le contraire , & ne peuuent produire que toute sorte de mal'heurs ; si vos desseins ne sont arrestez par la puissante main de Dieu , qui appuyera celle des hōmes qui s'opposerōt à vous.

L'impudence de vostre Escriuaain paioist en la page dix-neufiesme , là où il se mesle de faire vne reprimande au Roy : apres auoir representé à sa Majesté *que la cause essentielle de tous les mal-heurs de la France , est la promesse faite au Coigneux d'un chapeau de Cardinal* ; il a dit : *Vne autrefois V. M. sera plus retenue , & considerera avec plus d'attention, à qui elle depart ses liberalitez.* N'est-ce pas tancer le Roy d'imprudence, precipitation & temerité, de n'auoir pas eu l'esprit de considerer, quand, cōment, à qui , & ce qu'elle promettoit ? Que pourriez vous dire d'auantage , si le Roy estoit vn petit escolier , & vous son pedagogue ? Ce discours est suffisant pour confirmer ce qu'on a voulu persuader, que vous entrepreniez de reprendre & gourmander le Roy ; & qu'en arrachant les plus belles pieces de sa Couronne, vous mesprisiez la teste qui la porte, sans cōsiderer que sa main de Iustice vous peut donner sur les doigts. Si nous , qui sommes dans la defense de l'innocence, & dans la souffrance des maux qu'on nous fait sous l'auctorité de S. M.

auions escrit avec cette irreuerēce, on publieroit que nos escrits deuroient estre bruslez par la main du bourreau : les vostres remplis d'iniures cōtre le Roy sont impunement criez dans Paris, & distribuez par tout le Royaume.

Ce qui augmente l'estonnement, est, que Messieurs du Parlement dissimulent non seulement le mespris de la Majesté, mais encore de la Iustice Royale, qui est entre leurs mains. Cōment ont-ils peu souffrir ces paroles qui sont és pages vingt-six & vingt-septiesme, *que le Roy enuoye & adresse les Edicts & declarations aux Parlemēs plustost par honneur, pour estre publicz & pour estre enuoyez aux Iuges inferieurs, que pour estre auctorisez.* Il adjouste plus bas, *qu'il faut recevoir les Edicts & declarations, comme articles de foy :* & en l'autre page il dit, *que Messieurs du Parlement refuserent la declaration contre Monsieur plustost par ialousie, que par raison.* Ainsi escrit cet infame Sycophante, qui a souvent dit en vostre presēce, qu'il failloit chastier ces pedants du Parlement ; encore qu'il y en aye dans ce grand corps vn bon nombre de meilleure maison, que ce poltron, qui ne tira iamais l'espée du fourreau, & auquel on peut contester sa noblesse. Les Roys ont voulu que les Parlemens retinssent quelque apparence de l'ancienne liberté des peuples, & representassent en certaine façon les trois Estats, qui ne peuuent estre appelez dans tous les rencontres des affaires de grande consequence. Pour ces raisons, cette auguste Compagnie a esté cōposée de gens d'Eglise, & de Nobles, & le tiers Estat y a eu entrée du depuis. Les bons & iustes Princes n'ont pas voulu que les Edicts

nouveaux & les declarations importantes fussent adressées aux Cours souveraines par ceremonie, pour laquelle il ne faudroit point prendre la peine de demander les opinions, de les peser, & de les compter : il seroit seulement necessaire d'écouter la lecture de ce qui est apporté, & de le mettre dans vn registre ; afin que la posterité le trouuast là dedans, non pas comme approuué, mais comme insinué, & pour estre gardé dans les archiues du Roy : Si on en vouloit vser ainsi, la presence de sa Majesté ne seroit point requise, mais il suffiroit d'enuoyer les Edicts par le Commis de quelque Secretaire d'Estat ; & aux Parlemens esloignez, par les messagers ordinaires. Si le genereux President du Harlay viuoit, on feroit bonne & briefue iustice à ce beau discoureur, & on condamneroit au foüet tous ceux qui crient dans Paris, & mesmes deuant la porte du Palais, ces infames escrits : mais il faut esperer qu'Astrée fera à son tour Nemesis.

La conclusion de ce bel ouurage est à la mode de cet Escriuain, qui finit tousiours par vos eloges, parce que son dessein principal est de vous plaire. Il sçait bien que ce qu'il escrit ne peut agréer qu'à vous seul, qui estes la personne du monde qui se laisse le plus piper par les louanges : & nous pouuons dire, que la maladie de vostre cerueau est semblable à celle des femmes, qui est plutôt appaisée par les puantes odeurs que par les douces. Les plus infames flateries sont les meilleures pour vous ; entre lesquelles la prise de la Rochelle est la premiere : c'est vne gloire en laquelle Dieu & le Roy ne trouuent point de part ; elle est

toute reſeruée pour vous , qui en auez avec l'honneur le profit. Voſtre insolence eſt paſſée plus auant : nous auons ſçeu d'un grand Prelat, fort ſage & tres-vertueux , qu'après la reddition de cette place , lors qu'il vous teſmoigna ſa reſiouiſſance, vous fuſtes tellement transporté , que vous luy diſtes ces paroles ; qu'il eſcriuiſt hardiment , que vous auez pris la Rochelle en deſpit de trois Roys, entre leſquels celui qui vous auoit donné le plus de peine eſtoit le Roy de France: pour les autres deux , vous entendiez les Roys d'Eſpagne & d'Angleterre: cela eſt auſſi veritable, qu'il eſt vray ſemblable que vous eſtes vn ingrat.

Voilà quelques eſchantillons de trois pieces, qui ſont imprimees non ſeulement ſur voſtre approbation, mais par voſtre commandement ; & dans leſquelles , ſur tout en la premiere , il y a quelque choſe de voſtre façon. Si nous voulions refuter toutes les choſes, & anatomifer les paroles, nous remarquerions autant de traits de malice & d'imprudene, comme il y a de ſyllabes. Cela nous obligeroit à faire des liures trop eſpais : nous ne voulons employer contre vous que les pieces de voſtre production: nous declarôs auſſi, que ſi nous auions l'auctorité en France, nous n'aurions pas la volonté de defendre la lecture de vos eſcrits, comme vous faites des voſtres. Nous prions tous les François de lire les œuvres de vos flatteurs , qui ſont auſſi mauuiſes que vos actions, & nous pouuons dire avec verité , que iuſques à preſent vous n'auiez point trouué de bon eſprit qui les aye voulu ſouſtenir ; il ſemble auſſi que Dieu vous a oſté le voſtre, depuis que vous auez quitté la vertu.

Vostre Eſcriuain, qui à la plume ſeconde, nous a enuoyé vn libelle nouueau, qui porte ſur ſon front effronté le tiltre d'innocence iuſtifiée; qui luy eſt donné avec autant de raiſon & de pudeur, cōme à vne deſbauchée le nom d'vne femme de bien. C'eſt en effect vn liuret diffamatoire contre le Duc de Vandosme, & contre le Preſident le Coigneux, Chancelier de Monſieur: ce qui nous fait voir que vous croyez vous eſtre iuſtifié, lors que vous aurez fait voir que vos ennemis ſont coupables. A la verité, cela vous pourroit ſeruir en quelque façon, ſi vous monſtriez qu'ils ont eſté malicieux en vous calomniant, & que vous euſſiez cét auantage de refuter par bonnes pieces & raiſons les crimes qu'ils vous auroient impoſez. Nous ne voyons rien de cela dans voſtre *Innocence iuſtifiée*; nous n'y liſons au contraire, que des reſcriminations cōtre le Preſident le Coigneux qui ne ſont pas iuſtifications pour vous; & des impoſtures nouuelles contre le Duc de Vandosme, qui ne vous a iamais ny accuſé ny offenſé, qui a ſouffert avec patience & ſilence que vous payez deſpoüillé de ſon Gouvernement de Bretagne, & honneſtement chaſſé de France. Vous n'avez point de raiſon d'appeller ſon peché, & celui du Preſident le Coigneux (ſ'ils en auoient fait) voſtre innocēce, laquelle ne dépendra iamais deſ fautes pretenduës d'autruy, mais de vos bonnes actions. Vous ſeriez mal-heureux, ſi vous ne pouviez eſtre homme prudent & vertueux, ſi vos ennemis n'eſtoient ſols & vicieux; & vous deuriez craindre qu'ils ne vouluſſent par dépit eſtre gēs de bien, pour vous faire paroître méchant & inſenſé.

Reſponſe
au libel-
le inti-
tulé l'In-
nocen-
ce iu-
ſtifiée.

Proq.
22.

Nous auons vne autre preuue pour monstrez que vous ne pouuez iamais estre iustificié innocent. elle est tirée de la parole de Dieu, qui a dit , *que celuy qui se haste pour estre riche ne sera point innocent.* Qui s'est plus hasté & precipité que vous , qui auez acquis dans sept ou huit ans deux cens mille escus de rente , auez basti & meublé des maisons pour plus de deux millions d'or, & auez mis dans deux citadelles trois fois autant , sans beaucoup d'autres choses que nous ne dirons pas. Il faut aduouer , ou que la parole de Dieu n'est point veritable (ce qui seroit vn blasphemé) ou vous ne pouuez estre ny innocent ny iustificié; vous qui autrefois auez disputé sur les bancs de Sorbonne, ne scauriez respondre à cét argument. Je ne rangeray point en bataille , pour cōbattre vostre pretenduë innocence , tous les maux que vous auez faits , tous les hommes qui ont esté sacrifiez à vostre ambition, tous les pauvres que vostre auarice tuë tous les iours , toutes les violences que vous auez fait souffrir à vostre Maistresse & Bien-faëtrice, & celles que vous continuez à pendroit de trois cens prisonniers de toutes qualitez, qui sont les victimes de vostre vangeance. Si apres tout cela vous meritez les titres d'innocent & de iustificié , nous ne croyons pas qu'aucun homme puisse estre coupable deuant Dieu , qui a dit , *que tout homme viuant, & sur tout comme vous faites , ne sera point iustifié deuant luy.*

Psa. 142

Vostre flatteur remplit vne des cinq feüilles de son libelle d'une grãde Preface. qu'il tasche d'embellir de similitudes , comme on fait l'entrëe des Eglises vn iour de pardon de quelque lierre & pa-

piër peint. Pour mostrer sa pieté, de laquelle il n'a iamais eu que les cōtenances & les mines, ayāt esté plus soigneux de porter les marques dans sa pochette, que les effects dans son cœur; il tord sa teste à l'accoustumée, il roule ses yeux en haut, & dit en ton d'hypocrite & caffard : *O donc Sainte Verité, fille du Ciel, ie vous inuoque, & vous coniuire de faire voir que vous m'inspirez ces paroles; & que comme vous estes belle, simple, & naïfue, elles sont pures, sans art, & en leur pureté i'examineray toutes choses.* O le beat, qui est plus capable de presenter vn poulet d'une main, en tenant vn chapelet de l'autre, que de faire descendre la Verité du Ciel ! ô le Saint Personnage, qui veut seruir d'Escuyer à la fille de Dieu; ayant rendu à ce qu'on dit & continuant de rendre cét office aux Dames, qui ont prostitué leur honneur à la puissance, aux faueurs, & aux Finances ! n'est-ce pas cét homme qui fut chassé par le feu Roy pour auoir voulu faire vne cabale dans la Cour, en se seruant en mesme temps de deux choses bien contraires, de la Religion, & de l'amour ? Il a si grande peur de n'estre pas recogneu, qu'il dit en la page vingt-troisiesme, *qu'il conroit le cerf avec le feu Roy* : mais ce vieux chasseur ne dit pas qu'il fut chassé pour n'auoir pas si bien entendu la venerie de Venus, comme il a fait du depuis la volerie de Mercure. Il dict aussi en la premiere page, qu'il est *authheur du discours fait sur les libelles, touchant le gouuernement de l'Estat.* Quand il ne l'auroit pas dit, nous l'aurions bien recogneu ; & qu'il est vn des Escruiains ou Secretaires de vostre cabinet, dans lequel il apprend les nouuelles que vous desirez

Pag. 9.

qu'il sçache : car pour les secrettes , nous voyons bien ou qu'il les ignore, ou qu'il les déguise, lors qu'il dit *que vous possédez les cœurs & les courages des plus vaillans, & des plus habilles.* Sans doute vostre flatteur croit estre le chef de ces deux sortes de personnes : mais comme le bon Seigneur ne vous donne que la mine, à cause du bien que vous luy faites , nonobstant la mauuaise opinion que vous auez de luy ; il s'imagine , que les contenances de ceux qui sacrifient quelque visite , compliment , protestation , & mesme quelque seruice à vostre pouuoir, en mesprisant & detestant vostre personne & vos desseins , vous donnent leurs cœurs & leurs esprits. Ces offrandes sont de celles que les anciens appelloient representations, qui se faisoient auec de la cire & de la paste , auxquelles on changeoit de figure selon la necessité & les occasions. Pensez-vous que celuy qui escrit pour vous , vous offre autre chose ; & ne croyez-vous pas , qu'il seroit contre vous, si la fortune vous auoit tourné le dos ?

Pag. 10.

Il dit , *que nous trouuerons que tous les mulets desquels nous auons parlé , c'est à dire , qui ont porté vos trezors au Hure , n'estoient chargez que d'auoine & de foin, pour repaistre des asnes comme nous sommes.* Ainsi escriuent ceux qui sont plus voisins de Mirebalais que nous. & qui vous ont fait acheter cette terre ; afin que vous fussiez Seigneur comme vous estes Maistre des plus grands asnes de France. On verra vn iour , lors que la porte de la Iustice nous sera ouuerte, si on éludera deuant ceste auguste Compagnie du Parlement de Paris ce chef d'accusation contre vous : si on dira , que vingt-cinq mu-

lets partis avec vne escorte de gens de guerre n'ont point logé dans les villes & dans les bourgs pour porter dans des barils & ballots à trente cinq lieuës de Paris du foin & de l'auoine.

Vostre Escriuain saute des asnes aux Dieux, & dit que ce n'est pas merueille si on vous fait descendre des Rois puis que les Payens faisoient sortir les grands personnages des Dieux. A la verité, il y a peu de chose à oster de Dreux à Dicux : mais comme les idolâtres des Empereurs mentoient, aussi font les vôtres, qui vous font descendre de la maison de Dreux; & ont obligé les curieux à la recherche de vostre généalogie, & à tirer vn certificat d'vn Couuent des Cordeliers, qui ne vous est pas honorable.

Pag. 11.

Vous avez fait dire en la page onzième que vous n'avez peu résister à la bien-veillance, & à la liberalité du Roy, qui vous ont forcé de prendre les charges & honneurs que vous possédez. Si cela est que vous soyez riche & puissant par contrainte, vous estes plus digne de compassion que d'enuie; & vous vous estes acquité d'une très-grande obligation, lors qu'on vous a cablé de tant de dons, de dignitez, de places, de gouuernemens, & d'emplois contre vostre volonté, que vous gemissiez souz ses fardeaux. On ne croit pas pourtant que vous desiriez d'en estre deschargé, n'ayant point trouué iusques à present qu'vn pauvre Moyne qui aye voulu estre caution de ce dessein. Je m'assure que cét Escriuain, qui a par vostre moyen quelque chose à perdre, ne s'offrira pas seulement pour estre certificateur.

En la
Défense
des Mi-
nistres.

Il dit, que le Roy vous a cheri des lors que vous estes

Pag. 12.

entré en ſon ſervice par vne liaiſon d'eſſrits cauſée par auanture par vne occulte conſpiration des aſtres. Il ne ſçait donc pas que iamais ſa Maieſté n'a eu auerſion d'homme comme elle a eu de vous , qu'elle a reculé de deux ans voſtre promotion au Cardinalat; & que durât deux autres années vous n'approchiez iamais du Roy , qu'il ne diſt, en tournant le dos. *Voicy venir la fourbie* ; que ſon viſage ne changeaſt, & que ſon eſprit ne fuſt en garde. Sans faute, les Aſtres n'auoient point operé dans les naiſſances , & cette ſympathie imaginaire ne vient pas du Ciel, ſi par quelque notable reuolution les conſtellations ne ſe ſont rencontrées depuis ſix ans ſeulement. Vous ſçauiez bien la peine qu'on eut à ſurmonter les influences qui vous eſtoient contraires , & les ſoins que la Reyne (que vous traittez avec tant d'ingratitude) priſt pour vous les rendre fauorables. Souucnez-vous de la peine qu'elle a eu pour vous remettre dans les bonnes graces de S.M. & combien de fois vous vous eſtes ietté à genoux deuant elle, pour la ſupplier les larmes aux yeux de vous conſeruer , lors que vous auez eſté ſur le point d'eſtre chaffé. Ce qui excuſe voſtre flatteur, eſt, qu'il die *par auanture* ; & nous adjouſtons, pour eſtre plus barbares, & plus veritables que luy, par mauuaſe auanture.

Pour monſtrer que vous n'eſtes pas content de la plus grande partie des ports de l'Océan, & qu'il faut que vous ayez le reſte, & ceux auſſi de la mer Mediteranée , vous faites que voſtre iuſtificateur dit au Roy: *Pour les ports de mer, la loy de bienſeance, qui porte ſon thrône par tout, les donne & les attache à ſa charge de Surintendant des mers.* A ce compte là noſ

Roys n'ont point gardé cette loy de bienſeâce, n'ayant iamais dōné trois ports à vn Admiral. Ie croy auſſi, que par *cette loy de bienſeance* vous ne parlez point de celles des Rois, mais de la voſtre, *qui porte* cōme vous dites, *ſon trône par tout*, c'eſt à dire, qui veut regner par tout. Si on ne lui reſiſte, elle eſt par ce droit de bienſeance maiſtreſſe du Royaume. S'il n'y a rien à faire, lors qu'on a la puiſſance, qu'à prendre tout ce qui nous accōmode; il n'y a point de doute, que vous n'ayez trouué le moyē de porter vōtre trône non ſeulement ſur la royauté, mais ſur l'Empire, & principalemēt ſur la Papauté. Par ce diſcours on voit où voſtre aueuglement vous fait broncher, & où l'ambition vous conduit.

Pour empeſcher que le Roy ne s'y oppoſe, & pour le diſpoſer à vous dōner le reſte du royaume duquel vous & vos creatures tenez deſia preſque la moitié; vous dites, *que les favoris ſont les parcellies & images du Prince: lors qu'il ne luiſt plus ſur eux, & pour eux, ils tombent dans le neant: c'eſt pourquoy il n'y a rien à craindre.* Quand on leur donne ou qu'ils prennent toutes les prouinces, places & charges, pourueu qu'on garde le nō de Roy: il ſera ſuffiſant, à ce que vous dites, pour deſaire celui qui en aura l'eſſect. Cōme ſi les hiſtoires n'enſeignoiēt point par mille exēples, que les ſeruiteurs deuenus trop puiſſans ont chafſé leurs Maiſtres, qu'ils ont partagé les Royaumes auec eux; qu'ils ont reſiſté, lors que ceux-là meſme qui les auoient faits les ont voulu deſaire; & que la ruine de leur fortune a plus couſté de ſang & d'argent, que n'auoit fait le baſtimēt. Outre cela, tout Souuerain doit conſiderer qu'il eſt mortel: Cette condition le fait ſouuenir,

que ſi Dieu ſ'appelloit deuant ſon fauori , peut-eſtre qu'il ne ſeroit point en humeur de rendre au ſucceſſeur les pieces de la Couronne qu'il auroit en ſa main. Les Roys n'en peuuent diſpoſer que pour leur vie , qui doit eſtre reglée par la prudence : elle enſeigne de n'abandonner iamais tout ſon Eſtat à la volonté d'un homme : la liberalité ne permet pas auſſi qu'on donne tout à vn. Ces vertus doiuent pluſtoſt conduire les actions d'un grand Prince qu'une affection trop chaude , & trop prompte , qui n'eſt pas une eſtoille pour eſclairer les Roys , mais vn feu folët qui les meine dans vn precipice.

Ce meteore qui ſert de guide à l'eſprit de voſtre Eſcriuain, luy fait dire au Roy : *Voſtre Maieſté qui commence encore, ſ'il faut ainſi dire, à pouſſer dehors les boutons, les fleurs, & les fruiçts de ſon courage.* C'eſt une belle louange que vous donnez à vn Roy de trente ans : vous diriez que c'eſt depuis que le vent de voſtre bouche a eſchaufé le grand arbre qui nous couure , & à l'ombre duquel nous viuons ; qu'il nous a donné des feuilles, des fleurs, & des fruiçts : qu'auparauant c'eſtoit vn alôës, qui auoit demeuré trente ans rempant en terre, eſtant monté tout à coup, comme fait cette plante , lors que vous l'auiez arrouſée. Toute la France & les Pays eſtrangers auoient veu avec admiration les fruiçts excellents des vertus de S. M. deuant que vous, qui vous en donnez toute la gloire, les euſſiez deſrobez.

Pour monſtrer. que vous eſtes par tout contraire à vous-meſme ; vous qui louiez les boutons & les fleurs naiſſantes de ſa Maieſté , depuis que
vous

vous avez esté aupres d'elle, estimez les fruiçts de la iustice que le Roy fit du Marechal d'Ancre, il y a quatorze ans : à vostre compte, les fruits estoient donc venus deuant les fleurs, & vous les auiez sentis en vostre bannissement que vous approuuez.

Vostre Escriuain veut faire passer le feu Roy pour Prophete, & dit qu'il est tesmoin de la prediçtion de ce grand Prince, qui assoura que son Estat seroit mal gouuerné apres sa mort par *Conchine*. Celuy qui escrit cette histoire, a logé cent menteries dans vn liuret de cinq feüilles, & en a mis cinq ou six dans trois lignes. C'est icy où il dit qu'il chassoit avec le Roy Henry le Grand: il veut faire croire qu'il estoit en consideration aupres de ce Prince, qui mesprisoit cet homme par dessus tous ceux de son Royaume. Pag. 23

Il adioust, que nous auons veu les effects de ceste prophetie, & quelques restes du gouuernement defectueux des femmes. Se peut-il bien faire, que ceux qui escriuent pour vostre defense, blasment vne conduite dans laquelle vous avez eu tant de part, que les esclats de son reuersement tomberent sur vostre teste, & peussent brisée, si la mitre ne feust vn peu defenduë? Vos violences & imprudences firent les maux à la Reyne, que vous rejettez sur elle. Osez-vous parler du gouuernement des femmes, vous qui en avez receu tant d'auantages : & le nommez vous defectueux, apres qu'il a si bien establi vostre fortune? Les ennemis de la Reyne ny trouuerent rien à redire que vostre auancement : vous estes d'accord avec eux contre vous mesme ; & pour faire mespriser vostre Mai- Pag. 24

348 *Remonstrance de Caton Chrétien*

stresse , vous aduoüez qu'elle a mal fait de vous auoir fait ce que vous estes. Si la protection du Roy , & la puissance que vous auez iniustement vsurpée , ne vous seruoient de preseruatif , vous ne vous empoisonneriez pas si hardiment comme vous faites : vous estes semblable à vn charlatan, que nous auons veu sur le pont-neuf: il mangeoit les testes de vipères avec du sublimé , parce qu'il estoit asseuré du remede qu'il auoit éprouué.

Pag. 24 Vous renenez tousiours à Chalais , & vos Escriuains luy baillent autant de traits de meschâte plume , comme le sauetier que vous fistes passer maistre bourreau luy donna de coups avec la vieille espée d'un Suisse. Vous citez deux tesmoins, qui sont enterrez, comme son corps est brustlé.

Pag. 25 Vous dites que Chalais protesta deuant que de mourir , qu'il n'auoit chargé personne au preiudice de la verité que Madame de Cheureuse , qu'il auoit deschargé. Passe pour l'honneur des Princesses que vous honnorez , & desquelles vous ne deuriez parler, ny en bien ny en mal. Il ne les faut iamais mesler dans nos discours, ny dire qu'on les charge & descharge. Je m'estonne fort , que vous n'ayez tancé vostre indiscret iustificateur, qui a oublié de dire, que Chalais repeta plusieurs fois sur l'eschaffaut, *Ab traistre Cardinal !* Vous sçauiez bien aussi ce qu'on fit au Minime qui l'auoit confessé; & où ce pauvre hōme a esté enfermé, & peut estre estouffé. Il n'y a point de doute, que dans vos frequentes visites , durant la prison de Chalais , vous ne payez porté à accuser ceux que vous croyez estre contraires à vos desseins , apres luy auoir promis

impunité ; pour luy faire dire plus qu'il ne sçauoit. Cet artifice n'estoit qu'une suite de celuy qui auoit commencé la Tragedie , qui estoit toute de vostre inuention. Il n'y a rien de plus vray que ce qui est dans la lettre de Monsieur sur ce sujet, qui vous a tellement picqué, que vous y portez tousiours la main, & vos Escriuains leur encre, qui aigrit plustost qu'il ne guarit cette playe.

A quoy pensez-vous, lors que vous dites Pag. 25 que le grand Prieur fut accusé par Chalais d'auoir proposé, que pour tirer le Marechal d'Ornano de prison, il vous failloit poignarder, & si on estoit pressé s'en aller en Flandres ? Cette deposition prétendue estant postérieure à l'emprisonnement du grand Prieur, il n'en pouuoit estre la cause: il est donc bien plus probable, que pour iustifier la detention précédée, vous avez extorqué cette declaration; ainsi vous avez arresté vn Prince non seulement sans crime, mais deuant qu'il fust accusé. Si vous l'eussiez sçeu lors qu'on se saisit de sa personne, & de celle de Monsieur de Vandosme son frere, vous n'auriez pas manqué de le publier : mais au lieu que la condamnation presupposoit vn peché, vn accusateur & des tesmoins, vous condamnez des hommes à la prison. Apres ces procedures qui commencent par l'exécution, vous supposez des crimes, & cherchez des accusateurs & des tesmoins, pour tascher de môstrer qu'une persécution sans cognoissance de cause a esté vn iuste chastiment. Il vous souuiendra aussi, s'il vous plaît, d'auoir dit il y a trois ans, qu'une personne

qui poſſede maintenant vos bonnes graces, eſtoit le chef du conſeil pris de vous aſſaſſiner. Cela faiſt voir qu'il faut que cette hiſtoire ſoit inuentée ; car ſans doute vous ne vous fieriez iamais, iuſques au point que vous faiſtes , à ceux qui auoient tenu les dez , avec leſquels vous avez dit qu'on ioüoit voſtre vie , & qu'on iettoit au ſort qui auroit la commiſſion de la vous oſter. Ce que vous dites du deſſein d'éleuer le Mareſchal d'Ornano, n'a point d'apparence, parce qu'il y eut fort peu de temps entre ſa detention & l'enuoy que vous fiſtes de Monsieur le grand Prieur, pour luy faire conduire innocemment Monsieur ſon frere en priſon. Le Mareſchal ſur ces commencemens eſtoit gardé dans le donjon de Vincennes , avec tant de ſeureté , qu'il n'y auoit point de puiſſance qui le peuſt oſter à celle du Roy , ny de corruption à la voſtre. Apres tout cela , pour vous conuaincre entierement d'impoſture , il vous faut faire ſouuenir d'une choſe que vous avez dit ſi ſouuent , qu'on peut iuger que c'eſt pluſtoſt le manquement de conſcience que de memoire , qui vous fait eſcrire , que dans le meſme conſeil, où on auoit traité de vous poignarder , on auoit auſſi delibéré de mettre en liberté le Mareſchal. Vous ſçavez bien que vous avez aſſeuré cent fois , que cette reſolution d'attaquer voſtre perſonne auoit eſté priſe deuant ſa detention : ce qui fit croire à ceux qui entendoient ce diſcours , que la fauſſe creance que vous auiez eu de cet attentat, eſtoit la vraye cauſe de ſon empriſonnement. Elle fut auſſi celle de la mort d'un

Prince, & d'un Mareſchal de France : en qu'elle façon que ce ſoit, vous les avez perdus. Vous dites que *celuy-là eſtoit mal ſain, & eſtoit fort incommodé de la pierre* : il le fut encore bien d'avantage par celle du donjon de Vincennes; l'autre eſtoit ſuiet à vne ſuppreſſion d'vrine: ces deux maladies ſe guariffent ou ſe ſoulagent par vn peu d'exercice; vous l'avez oſté par vos grandes rigeurs, qui ne leur ont iamais permis la ſortie hors d'une petite chambre : vous avez donc tué ces deux perſonnes! comme celuy qui laiſſe mourir de faim le pauvre, l'eſtrangle. Ainſi par voſtre confeſſion nous voyons le ſujet de l'emprifonnement, & de la mort, ſans nous arreſter à ce que la lumiere de Dieu eſclairera vn iour.

Vous dites auſſi que *le Cardinal de Berale eſt mort de repletion*. Comment ſe peut accorder cette repletion avec le rapport des Chirurgiens qui l'oururent, & aſſeurerent qu'il n'auoit point de ſang dans le corps?

Pour Fancan voſtre Medecin des corps & des eſprits, dit qu'*il eſt mort de remors de conſcience, pour auoir eu, eſtānt Preſtre, de trop grandes communications avec ceux de la Religion pretendūe reformée*. Il eſt vray qu'il en pouuoit auoir eu par les meſmes ordres, que vous avez donné du depuis à vn Moyne des plus reformez en habit, qui traite de voſtre part avec les Proteſtans, & les Turcs. Celuy-là n'a eſté ruiné que pour vous auoir trop cognéu, & ſceu vos ſecrets qui tiennent encore ſon frere priſonnier : voſtre Moyne n'en ſera pas peut eſtre meilleur marchand. Vous eſtes comme ces

Dames, qui croyent auoir trouué le moyẽ de cou-
rir leur mauuaife vie, en ſe defaiſant de ceux qui
ont eſté les miniſtres de leurs amours. La recom-
penſe des miniſtres de violence eſt vne petite gra-
ce, lors qu'ils commettent les crimes; & vne grãde
haine, apres qu'ils les ont commis.

Parmi ces choſes non ſeulement ſerieuſes,
mais deplorables, voſtre Eſcriuain en meſle des
ridicules, comme lors qu'il dit, *que ſi le Mareſchal
d'Ornano ne fuſt point mort d'vne ſuppreſſion d'vrine, on
l'euſt mené à la Conciergerie.* Vous n'avez pas vou-
lu dire qu'on luy euſt donné des Commiſſaires,
comme on a fait à vn autre de meſme condition;
mais vous dites que ç'a eſté vn grand bon-heur
pour luy qu'il ſoit mort (comme on dit à Paris)
de ſa belle mort, parce qu'il en euſt ſouffert vne
fort ſale. Au meſme endroit vous dites, *que Ma-
dene & de Haian auoient eſté ſes principaux conſeillers.*
Pourquoy donc les avez vous gardez en priſon
trois ans apres la mort du Mareſchal? pourquoy
les en avez vous tirez ſans forme de iuſtice, ou
ſans abolition? pourquoy les avez vous fait con-
duire à ſoixante lieuës de la Cour, pour de là les
renuoyer chez eux? pourquoy avez vous eu ap-
prehenſion qu'ils ne viſſent quelque vn à Paris, ou
aupres, pour decouurir vos iniuſtices? Mais pour-
quoy ne les avez vous enuoyez à la Conciergerie
du Palais? Il n'y a point de doute, que le priuilege
de celuy qui eſtoit Secretaire du Roy ne vous euſt
porté à le faire, ſi vous euſſiez eu dequoy luy faire
faire ſon procez. Je vois bien qu'il y auroit moyẽ
de vous faire rougir ſur ces affaires, & ſur vos

escrits, s'il vous restoit vn peu de bon sang. Si c'est l'esclat de vostre pourpre, ou les frequentes saignées, ou la grande habitude de mal faire qui empeschent que vostre honte ne paroisse, ie m'en rapporte; nous auõs vne autre question à traiter.

En la page 28. de vostre Iustification vous entreprenez vn grand discours, pour monstrier que le Roy a eu raison d'oster le Gouvernement de Bretagne à Monsieur de Vandomme, parce qu'il a tasché de diuertir le peuple del'obeissance qu'il doit à cette Couronne (vous parlez en Roy) parce qu'il s'est fait appeller Monsieur le Duc sans querre; (prenez mieux garde à ce que vous escriuez) qu'il a fait mettre dans les prieres du Missel, *pro famulo tuo Duce nostro*; qu'il a voulu corrompre le Lieutenent du chasteau de Nantes; qu'il s'est serui du Pere George, Recollet: qui sous pretexte de quelques predications & confessions dispoisoit les femmes d'eminente condition, (regardez bien à qui vous donnez l'eminence) de persuader à leurs maris de prendre son parti. Bref qu'il a tasté le poux de la Noblesse, des Parlemens, de la chambre des Comptes, & du tiers Estat; (iamais Medecin n'en tasta si grand nombre) & que tout cela ne tendoit qu'à se faire Duc. Toutes ces cognoissances vous doiuent fournir plus de mille tesmoins cõtre ce Prince, qui n'estoit pas en estat ny les siens de les intimider; vous n'auiez eu qu'un miserable emballeur de mensonges de Lambale, qui changeoit tous les iours de nom & de qualite, & qui a esté pendu à la Croix du Ti-roir, pour auoir dit qu'il auoit esté corrompu par argent pour deposer cõtre Monsieur de Vandomme. On n'a point veu de tesmoins, qui ayent ouy ces

prières *pro Duce nostro* ; point de Dames pratiques par le Pere George , point d'homme des trois Estats ausquels on aye parlé, ny de Lieutenant du chasteau de Nantes qui aye esté interrogé. Si vous eussiez eu ces preuues publiques, vous n'aurez pas manqué de les produire ; vous n'aurez pas eu recours à vne demission du Gouvernement , qui a esté le pris de la liberté de ce Prince, mais vous l'aurez osté avec Iustice. Pour montrer que ses fautes ne vous en ont point donné, vous changez de batterie, & dites , *qu'il a esté dépoussédé par raison d'Etat ; qui ne peut souffrir que celuy qui pretend quelque droit sur vne Prouince, pour estre descendu de ceux qui en ont esté Souuerains, en aye le Gouvernement.* Sur quoy vous dites , *que Henry III. faillit en donnant celuy de Bretagne à Monsieur de Mercœur ; que le feu Roy fit la mesme faute, en le metiāt entre les mains de Monsieur de Vandomme.* Vous alleguez aussi vn *Factum* de feu Madame de Mercœur ; de laquelle vous dites , *que toute sainte qu'elle estoit, ne laissoit pas de faire mention de ses pretensions.* Vous dōnez poids à vos raisons par l'auctorité du Cardinal d'Osat ; qui escriuit à Monsieur de Villeroy, *qu'il s'estonnoit de ce que le Roy donnoit les Gouvernemens des Prouinces à ceux qui auoient des pretensions, quoy qu'elles fussent vieilles ou prescriptes.* Il est certain, que si cette loy rigoureuse , de laquelle nous ne disputons pas auoit lieu , le Roy l'a violée en vous faisant Gouverneur de Bretagne , ou il faut que vostre genealogie soit faulse. Vous aurez agreable, s'il vous plaist, que ie la vous represente le plus succinctemēt que ie pourray, & que ie me serue de vos armes pour vous cōbatre. En la page

soixante & deuxiesme & soixante & troisieme de vostre genealogie , qui vous fait descendre de Louys le Gros par la branche de la Maison de Dreux , & qui est venuë iusques à vous par vostre grand Mere Françoise de la Rochechoüard, vous dites qu'elle estoit issuë de Marie de Bretagne Contesse de S. Paul, & fille de Jean II. Duc de Bretagne, & de Beatrix d'Angleterre. Vous asseurez aussi au mesme endroit , que vous descendez de Blanche de Bretagne. Vous ne pouuez donc pas auoir le Gouvernemēt par la reigle que vous avez fait , si vostre genealogie , appuyée par vostre puissance , n'est plus forte que vostre Loy. Souuenez-vous qu'en l'an mil six cents vingt six, pour ietter le fondement de la destitution de Monsieur de Vaudosme , vous fistes coucher sur les registres des Estats de Bretagne , tenus à Nantes en presence du Roy , la resolution qui fut arrestée , que *S. M. seroit tres-humblement suppliée de ne donner point le Gouvernement de cette Prouince à ceux qui seroient descendus de la maison de Bretagne , & qui pourroient auoir pretensions directes ou indirectes sur la Souueraineté de ce Pays.* Au préjudice de cette deliberation vous avez fait , que les mesmes qui l'ont prise vous ont demandé pour Gouverneur. Ou supprimez vostre genealogie, ou declarez la fausse; ou aduoïez que vous faites des Loix assez fortes pour déposseder les Enfans des Roys , & trop foibles pour empescher les vsurpations du fils d'un petit Gentil-homme.

Ce que vostre Escruain adiouste, n'est pas moins contre vous que les Ordonnances que

Voyez
la Ge-
nealo-
gie.

vous avez fait : il dit, qu'il ne faut point irriter l'ambition & le courage des Grands, puis qu'il faut toujours octroyer en vn Estat la moindre puissance a celuy, qui à le plus de naissance. Par cette maxime, vous qui estes descendu de nos Roys, de ceux d'Angleterre, de Nauarre, & des Ducs de Bretagne & de Normandie, des Comtes de Prouence, de Champagne, & de Thoulouse; qui estes par dessus tout cela Prince de l'Eglise; ne deuez pas auoir tant de puissance, sur tout en vn Pays où vous tenez toutes les meilleures places, avec lesquelles vous estes tres-aisé de vous rendre Souuerain quand il vous plaira.

Pag. 31. Vous dites au Roy que vous estes trop attaché à sa fortune pour luy donner de l'embrage. Vous visez avec sa Majesté de termes d'un camarade de guerre : au lieu de dire que vous estes trop obligé à sa bonté pour luy donner ombrage, vous dites que vous estes trop ataché à sa fortune. Pardōnez moy si ie dis que vostre Fortune parle comme yure; & que vous avez aveuglé celle du Roy, si elle ne voit pas les insolences & les entreprises de la vostre.

Et parce que nous sçauons bien où elle va, & que son dessein n'est pas de s'arrester en Bretagne, mais d'aller iusques en Prouence, pour tenir le Royaume assiégué par les deux bouts, & enuironné par les deux mers; nous iugeōs bien que vous desirez de faire valoir contre Monsieur de Guise la mesme loy de bienseance, qui porte, comme vous dites, son thronne par tout, & qui vous a serui pour chasser Mr. de Vandomme de Bretagne. Vous rendez la regle trop generale, pour ne vous en seruir pas pour la

Fortu-
née
dulci-
bria.

Prouëce; pour laquelle vous alleguez la lettre du Cardinal d'Offat faite sur ce sujet. Mais vous en ferez exclus, cōme de la Bretagne, par vostre genealogie, qui vous fait descendre (dans les pages soixante-deuxième & soixante-troisième) des Comtes de ce Pays-là par Eleonor de Prouence, que vous dites estre issuë de la maison Royale d'Arragon. Vous inferez par là, que nos Rois l'ont vsurpée sur l'Arragonnois, & que S.M. & tous autres pretendās n'y ont point de droit à vostre exclusion. Cela est capable, si on ne vous veut punir de vostre crime, au moins de vous fermer la porte à ce Gouuernement; Dieu vueille que le temps ne découure pas, que la guerre de Genes, à laquelle vous donnez vn si beau pretexte, ne soit point entreprise, pour persuader au Roy qu'il est expedient, pour tenir l'Italie sujette, que vous ayez le Gouuernement de Prouence avec les meilleures places, & la Generalité des Galeres. Vostre Genealogiste se tourmente bien, pour vous faire descendre des Rois de Nauarre, & rencontre en fin que vous estes de ce Sang Royal de deux costez: à sçauoir de par Blâche de Nauarre fille de Thibaut Comte de Châpaigne, & par Marguerite de Nauarre sœur de Thibaut II. aussi Comte de Châpaigne, & de Henry I. Roy de Nauarre.

Vous trouuez aussi que vous estes sorti des Contes de Thoulouse & d'Artois, & des Ducs de Normâdie & de Guyēne; qui ont possédé ces Prouinces en souueraineté: mais vous vous attachez principalemēt à la Bretagne, Prouëce & Nauarre: ce qui doit estre fort suspect, parce que ce sont les

dernieres pieces qui sont venuës à la Couronne. Vous voyez de combien de Gouuernemens vostre vanité vous auroit priué, si vous ne croyez que vostre auctorité aura plus de puissance que toutes les Loix; qui sont aux plus grands Princes du Royaume des barrieres bien fortes, & à vous des toiles d'aragnée.

Ce seroit vne grande merueille, si vous auiez assez de prudence pour accorder ce que vous faites avec ce que vous escriuez; mais cependant qu'on entretient les ignorans par les escrits, vous faites progrez par vos actions: c'est à dire, vos charlatans amusent le peuple, lors que vous luy coupez la bourse: vous opposez les Loix à ceux qui vous attaquent, vous les enuoyez contre ceux qui vous resistent; & vous tesmoignez que vous desia dans la Souueraineté, en vous mettant par dessus elles.

Pag. 34. Vostre Escriuain qui suit vostre passion, comme vostre faueur les flatte toutes deux en méditant du President le Coigneux, le plus souuent & plus effrontement qu'il peut. Pour finir son libelle comme il l'a commencé, le charge de trois notables calomnies, qu'il croit estre pieces iustificatiues de vostre innocence. La premiere est l'accusation d'auoir laissé perir Chalais, parce que Monsieur le Duc de Bellegarde, qui estoit son parent, poursuiuoit son abolition. Il assure que des gens de qualité luy maintiendront qu'il l'a dit: il ne prendroient donc pas en mauuaise part s'ils estoient nommez en cet écrit; puis qu'ils sont prests à se declarer pour soustenir ce que vous dites: mais comme la

chose n'a point d'apparence, ce que vous escriuez des tesmoins en a encore moins; & vous les auriez produits assez hardiment, si vous les cognoissiez, sur tout étant asseuré que vous ne leur feriez point de déplaisir.

La seconde piece est, que le mesme President le Coigneux empescha la bonne volonté que Madame de Guise auoit de poursuivre la liberté du Marechal d'Ornano; & vous dites qu'elle fut destournée de cette loüable & sainte resolution. Vous ne vous souvenez pas que vous avez escrit, que le Marechal estoit atteint de crimes horribles, tous de leze Maïesté? Comment peut-on appeller sainte & loüable la resolution de faire instance pour sa liberté, veu qu'il n'est point permis de solliciter, si ce n'est aux plus proches, pour ceux qui ont conspiré contre le Roy & l'Estat? Croyez-vous que cette Princesse, qui ne fait rien qu'avec grande consideration, eust entrepris cette poursuite? Et si elle l'eust trouuée iuste, pensez vous que le President qui dit qu'il n'auoit iamais parlé à elle, deuant le iour auquel il receut le commandement du Roy de luy aller dire, que S. M. auoit resolu le Mariage de Monsieur avec Mademoiselle de Montpensier sa fille, eust eu le pouuoir de la diuertir d'une œuvre que vous appelez sainte & loüable? Je croy que le President ne me desdira pas, lors que i'asseureray qu'il se tiendra pour conuaincu en ce chef, si vous estes aduoüé par le tesmoin que vous alleguez, sa personne ne receuant point de reproche. Il n'y a point d'innocent qui ne se confesse criminel sur sa deposition,

& qui n'adjoulte autant de foy aux yeux & aux oreilles de Madame de Guife, qu'au témoignage de ſa propre conſcience. Je diray bien d'auantage, que dans tout le traité de Mariage de Monſieur, il ne fut iamais parlé de la liberté du Mareſchal.

Vous auez reſerué pour la dernière & plus furieufe calomnie, vne recrimination, pour éluder l'accuſation des empoisonnemens, deſquels on a dit que vous eſtiez ſoupçonné : vous croyez que c'eſt le plus beau trait de viſage de voſtre innocence iuſtifiée, de monſtrer la laidéur d'un abominable peché du Preſidēt le Coigneux. Vous dites qu'il a empoisonné ſa troiſieſme femme, & qu'il eſt ſoupçonné d'en auoir fait aũtant à la ſeconde. Je m'eſtōne comme vous n'y auez encore mis la première : pour la ſeconde, deux mille perſonnes ſçauent qu'elle a languĩ long-temps apres vne mauuiſe couche: ſes parents, qui ſont de grande qualité, lès Medecins, Chirurgiens, & Apōticaĩres l'ont veuẽ fort ſouuent durant ſa maladie; iamais perſonne n'a eu la moindre penſée de ce que vous dites; & chacun a ſçeu que c'eſtoit vn tres-bon & tres-heureux Mariage, que la mort naturelle a rompu. Pour ce prétendu troiſieſme, nous pouuons dire qu'il n'a iamais eſté. Nous auons bien ſçeu, qu'une certaine femme, qui a eſté entretenuẽ autrefois par feu Moiffet, & qui auoit prostitué ſes filles, auoit perdu la dernière, qui mourut quelque temps apres le départ du Preſident le Coigneux. Elle fut enterrée comme fille en la Paroiſſe de Saint Euiſtache; c'eſt à dire avec les draps, parements, cierges blancs, & chapeau de

fleurs: ce n'est dōc pas signe que cette mere la tint pour femme mariée; encore qu'on dit qu'elle n'estoit pas fille; & que vos parens & alliez en sçauēt plus de nouuelles que ceux que vōus accusez. C'est donc par le moyen de ceux-là, & par la corruption de vōtre argēt, que trois sepmaines apres cette mort, la mere s'est aduisee de dire que le President, qui estoit bien loing delà, auoit fait empoisonner sa fille, par l'entremise de l'Euesque de Madore, Suffragāt de Mets, qui n'a iamais veu la Damoiselle, ny ouy parler d'elle que dans ceste Histoire. Pour laisser à part la question, si le President la cognoissoit aussi peu que l'Euesque, ie vous diray franchement, que c'est vne chose qui ne peut estre faite, que durant vōstre gouuernement, & par vōstre puissance absoluë, de receuoir la plainte d'une femme abandonnée qui a vendu ses filles. Elle dit, trois sepmaines apres vn enterrement, qu'une morte qui a eu vn conuoy de fille estoit mariée, qu'une prostituée estoit femme d'un President au mortier, & qu'elle a esté empoisonnée apres qu'elle a esté pourrie. Où sont les Medecins qui ont veu les marques deuant & apres la mort? où est le procez verbal de l'ouuerture du corps? où sont les tesmoins qui disent avec quoy on a donné le poison, & qui l'a apporté? où est le contract de mariage? Tout ce crime est reduit à la plainte achetée d'une femme qui a abandonné son ame, apres auoir abandonné son corps; & qui s'est contentée de faire du bruit, pour voir si le son de l'argent l'appaiseroit. Ceux qui vous auoient promis qu'ils feroient bien iouer cette piece,

ont publié le des-honneur de la Mere & de la fille, ont descouvert vostre malice, & ont porté quelques curieux à rechercher vostre vie priuée; de laquelle on ne veut rien dire, à cause du respect qu'on porte à la Pourpre sacrée. Si nous le voulions entreprendre, nous dirions que ce ne sont pas des femmes impudiques, mais des plus vertueuses, qui se plaignent des attentats & violences que vous auez voulu faire sur leur honneur: vous sçauiez aussi qu'on vous a soupçonné de plus grands crimes en ce genre de peché. Nous ne croyons pas le mal si legerement comme vous faites; nous ne le publions pas temerairement, & nous ne finuentons pas malicieusement. Nous sçauons qu'il y a vn flambeau de verité, qui es-

1. Cor. 4 *clairera les choses obscures, & manifestera les conseils des cœurs, & pour lors louange sera donnée de la part de Dieu à celuy qui aura bien fait: comme le meschant receura aussi le blasme & la punition de son vice. Deuant ce Iuge on n'aura point d'Eminence que celle de sa vertu, point de gardes que ses bonnes œuvres, point de citadelles que son innocence, point de thresors cachez que les aumônes, les prieres, & les ieusnes.*

Vous dites que le President le Coigneux a confessé, que les songes qu'il auoit eu depuis peu de iours, luy auoient fait penser qu'il y auoit vn Dieu: & vostre Escriuin dit, qu'il l'a leu dans la lettre d'un Gentilhomme, qui ne peut estre ami du President, & doit estre suspect, s'il l'a escrit: s'il ne l'a point fait, comme il est plus probable, vous luy imposez le

sez le plus grand crime , qui est de n'aüoir point
 cogneu celuy qui ne peut estre ignoré. Vous faites
 paroistre que s'il a esté si abominable , Dieu l'a
 assisté d'une grace extraordinaire pour le conuer-
 tir , lors qu'il a entrepris de vous resister : ce qui
 feroit dire que la Majesté diuine approuue gran-
 dement son dessein : mais vous ne scauriez des-
 mentir la croyance publique , dans laquelle le
 President est tenu pour homme craignant Dieu.
 Laissons là les songes qui sont mensonges; s'il s'y
 failloit arrester , on rapporteroit icy les tesmoi-
 gnages de ceux qui ont couché dans vostre cham-
 bre , qui ont dit fort souuent , que vous en auez
 de plus espouuentables que celuy d'Appollodo-
 re , qui songea que les furies luy auoient arraché
 le cœur , & dançoient toutes en feu autour de la
 marmite dans laquelle il bouilloit. Vous scauez
 ce que l'Escripture sainte a dit, *que la conscience agitée*
presume & craint tousiours choses cruelles : la vostre
 doit estre dans ces troubles , estant impossible
 qu'elle soit en repos, lors que vous raiſſez celuy
 du Roy vostre Maistre , de la Reyne vostre bonne
 Maistresse & Bien-faëtrice , de la Reyne Espouse
 du Roy, de Monsieur Frere vnique de S. M. des
 Princes & Grands du Royaume , de deux Mares-
 chaux de France, de plusieurs personnes de haute,
 mediocre, & basse condition, que vous tenez pri-
 sonniers ; de tout le peuple de France que vous
 affligez par la guerre, la famine, & la peste; de rou-
 te l'Europe que vous renuerſez; de l'Eglise de Dieu
 qui patit dans ces mouuemens , & perd en beau-
 coup d'endroits l'exercice de la Religion , que

Sap. 17.

vous chafſez par l'afſiſtâce que vous donnez à ſes ennemis.

Quand toutes ces choſes ne vous oſteroient point la tranquillité de l'eſprit , la pouuez-vous conſeruer eſtant tourmenté par les quatre bourreaux de la vie , qui ſont l'ambition , l'auarice , la vengeance, auſquelles on dit que depuis peu vous auez adjouſté l'amour ? La premiere paſſion vous porte à faire tous les iours quelque nouveau progrez à joindre au Cardinalat , au premier Miniſtere , à la Conneſtablerie , à l'Admirauté , aux Gouuernemens des plus grandes Prouinces & des meilleures places, les titres de Duc & Pair , à chercher des Eſcriuains qui vous font deſcendre de nos Roys, de tous les anciens Princes de France, & paſſer pour vn Dieu.

L'auarice vous fait entaſſer finances ſur finances, terres ſur terres, benefices ſur benefices : elle vous pouſſe à doubler les tailles , & contraindre les pauvres à les payer par auance , pour mettre tout ſor de France dans vos citadeles , qui ſeront pluſtoſt remplies que voſtre cœur.

La vengeance vous fait ietter tous les iours quelqu'un dans la Baſtille , & dans les autres priſons du Royaume , qui ſont plaines de pauvres innocens qui ſe ſont plaints de voſtre tyrannie, qui s'y 'ont oppoſez , ou qui ont leu quelque eſcrit qui la deſcouuroit. Voſtre rage a eſté ſi grande , qu'elle n'a point eſpargné ceux qui ont eſté enuoyez de la part de la Reyne Mere du Roy pour apprendre des nouuelles de la ſanté de S.M. vous auez contre le droit des Gens emprisonné

Le Sieur de la Barre, & auez traité plus indigne-
ment vn Gentil-homme, que le plus cruel enne-
my de la France n'auroit fait vn Tambour ou vn
Trompette, qui seroit allé pour demâder vn pri-
sonnier de guerre. Cette furieuse passion vous a
fait chercher tous les moyens pour faire mettre
sur vne rouë deux hommes, comme criminels de
leze Maiesté au premier chef; dans les procez
desquels les Iugés, que vous auez choisi, n'ont
rien trouué qui merita la mort.

Je ne parleray point de vos amours, qui nous
font croire que vous estes entre les mains de vo-
stre dernier Maistre, & donnent sujet d'esperer
que celui-là deliurera la France, & tous les gens
de bien que vous persecutez: c'est l'escueil où
ceux qui ont esté plus sages que vous ont fait
desbris; c'est le banc où les vaisseaux des plus
grandes fortunes se sont eschoüez, & c'est le feu
qui a bruslé les plus riches & les plus grandes
maisons. Le desir que nous auõs de sauuer vostre
ame, fait que nous vous descourons charitable-
ment ces dangers, que nous vous deurions cacher,
si nous estions portez à poursuiure vostre perte
plustost que vostre conuersion. Lors que vous ne
penserez qu'au mal que vous auez fait, vous au-
rez de la peine à vous persuader qu'il y aye au mō-
de vne misericorde plus grâde que vostre peché:
& si la Clemence de la Reyne Mere du Roy, qui
est celle que vous auez le plus cruellement offen-
sé, ne vous assure, ie crains que les maux que
vous adiousterez à ceux que vous auez desia
faits, ne soient des effects de vostre desesper.

Souuenez-vous , que ce mauuais conſeiller peut pouſſer voſtre uiſſance à la ruine de ceux que vous n'aimez pas ; mais ſans faute vous y trouuez la voſtre. Les preſens que le mode vous fait, ſont des pommes d'or qu'il iette deuât vos pieds, pour vous atraper & poignarder : les perſonnes que voſtre cholere pourſuit , ſont des coureurs qui vous conduiſent dans vne embuſcade. La belle ſtatuë de Fenele vous preſente le riche globe de l'Empire du monde ; mais ſi vous y touchez, il en ſortira vne fleſche qui vous percera le cœur.

Arreſtez le cours de vos deſſeins, & ne donnez point cette gloire à ceux qui peuuent eſtre inſtrumens des iugemens de Dieu de les auoir rompus , ou à la mort de les auoir eſtouffez. Tout ce que vous poſſédez en honneurs & en biens, vous a peu tirer de la baſſeſſe & de la pauureté ; mais il ne vous ſçauroit offer ny la fragilité, ny la mortalité : vous auez les bonnes graces d'un grand Roy , & le trompez ; mais vous ne pouuez auoir la vie qu'avec ces conditions, vous ne tromperez point celuy qui vous l'a donnée, & qui eſt ſur le point de la vous demander, avec le compte de vos actions. Regardez entre les mains de qui tombera ce que vous auez ramalſé, & entre les mains de qui vous tomberez. Craignez celuy qui meſpriſe vos citadeles,

Sap. 6. & vos gardes ; & qui a dit que *les uiſſans ſeront punis uiſſamment*. Donnez vous la paix, & nous la procurez ; elle ſ'accordera mieux avec la plus belle de vos qualitez , que la guerre que vous

mettez par tout. Ne vous imaginez pas qu'elle puisse estre eternelle, pour vous fournir le moyen de regner tousiours parmi les confusions, dans lesquelles vous perirez plustost que dans l'ordre, qui vous conseruera avec l'Estat. Vostre fortune est de verre, encore que vous la croyez de diamant, parce qu'elle est fort riche. Cōment pourroit elle estre de longue durée, veu que vostre vie ne l'est pas, & qu'elle est violente? Reconnoissez que vous estes aujourdhuy Maistre de la liberté de cent millions de personnes, & pouuez estre demain le prisonnier d'un chetif guichetier. On monte par plusieurs eschellons au plus haut de l'eschelle de Pittacus; mais il n'y a qu'un saut à faire depuis le sommet iusques au pied. La Bonté de Dieu est sur le ppinct d'estre contente de la patience de ceux que vous affligez, & sa Iustice n'est pas esloignée de vostre insolence: son Iugement ne scauroit estre arresté par le vostre, & vostre bel esprit ne peut persuader à personne que vous ne l'ayez prouqué.

Si vostre Eminence ne reçoit pas nostre charitable Remonstrance, la rejette avec indignation, & employe tous les moyens que sa grande puissance luy fournit, pour nous faire du mal; nous declaron, que vous nous avez attirez au combat, & que vous avez fait si grande quantité de libelles diffamatoires, que nous auons esté contrains de mettre la responce à quatre dans vn mesme traité. Si vous vous plaignez de nostre hardiesse, nous vous supplions de nous dire, sur quel droit vous fondez la licence de mesdire de la

plus grande & meilleure Reyne de la terre, de la Mere de vostre Maistre, & de vostre Bien-faëtrice, de Monsieur Frere vnique du Roy, vous qui estes seruiteur, & tres-obligé. Sur quelle loy vous appuyez les despits & les rages que vous auez conçu contre nos réponses; & pour quelle raison vous tâchez de ruiner ceux que vous presumez en estre les aucteurs? Si vous estes fâché de voir des pauvres carabins qui vous attaquent, vous en auez des plus chetifs qui les irritent. Mais on se prend à vous qui estes Cardinal, & Generalissime: vous ne pouuez entrer en la melée, que ceux qui sont du parti contraire n'ayent droit de se defendre contre vous, comme on feroit contre le moindre de vostre armée, sur tout en vn combat d'honneur. Cela vous doit faire cognoistre vostre imprudence d'auoir escrit tant de liurets, pour nous obliger à repartir aux despens de vostre reputation. Si vous & vos Escriuains la mesnagez mieux pour l'aduenir, & si vous espargnez la nostre, nous demeurerons dans le silence, & dans l'esperance. Si vous nous contraignez de rompre celuy-là, vous en aurez fort peu de consolation; si vous entreprenez de nous raurir cette cy, nous prierons, sospirerons, regarderons le Ciel, & croirons fermement, que Dieu tout seul aura la gloire de vostre chastiment, & de nostre deliurance.

Les cognoissances que i'ay de vostre esprit, & les defiances que i'ay de mon mal-heur, & du peu de credit que i'ay auprès de vous, me font douter, si vous serez assez sage, & moy assez heureux,

Pour vous destourner du dessein que vous auez de remplir le monde de liurets qui vous estiment, & calomnient vos ennemis. Je vous prie d'abandonner cette poursuite, & de croire que ie n'apprehende pas la peine que les reparties me donnent ; mais que ie suis tres-marry de la continuation de vostre peché. Je ne peux estre arresté par la crainte du mal que vous me pouuez faire, n'ayant rien à perdre que la vie , que ie veux sacrifier à la defense de la Verité ; laquelle , si vous usez de violence, me fera martyr de la Iustice. Je vous conjure au nom de Dieu , de ne rendre pas vostre ingratitude plus noire , en la faisant lauer avec l'encre de vos Escriptuains. Receuez en bonne part deux aduis que ie vous donne. Prenez garde que le desir d'estre louié par excez durant vostre vie , & credit, ne vous fasse blasmer par excez apres vostre mort, ou disgrace. Considérez aussi, qu'en voulant oster l'honneur à ceux qui vous l'ont donné, vous le perdez en faisant vne action infame ; & qu'en nous iettant dans la necessité de rechercher vostre vie, & d'examiner vos conseils, vous auez trouué le moyen de troubler vostre repos. Les loix diuines & humaines nous permettent de fournir des reproches publics contre les faux tesmoins qui nous accusent publiquement. La personne que vous attaquez à l'auctorité de vous dementir, & peut estre auia vn iour la puissance de vous faire chastier.



ADVERTISSEMENT

D E

NICOCLEON

A

CLEONVILLE,

Sur son aduertissement aux Provinces.



LÉONVILLE, ce n'est pas l'apprehension de ton stile, mais l'horreur de ton discours, qui m'a fait dire, apres auoir leu ton escrit, ces paroles de Dauid : *Sauuez moy Seigneur, parce que les verueux ont esté*

affoiblies, ou fardées par les enfans des hommes. I'ay recogneu, que tu auois eu plus de soin de faire vn bel ouurage, que de le rendre bon; que tu as trauaillé avec esperance d'estre recompensé, & sans crainte d'estre censuré; & que ton dessein a esté d'acquerir la reputation de gentil Escriuain, plustost que d'homme de bien. C'est toute la louange, que ma conscience

permet de te donner, au mēſme temps qu'elle me force de te dire , que ton menſonge peut paſſer parmi les eſprits communs , pour vne aſſez iolie & aſſez bien parée deſbauchée ; mais les plus releuez diront que tu es ſemblable à cēt ouurier, qui eſtant dans le deſeſpoir de ce qu'il ne pouuoit peindre Heleine avec quelques traits de beauté, ſe reſolut de la couvrir toute d'or.

Nous auons veu les mēſmes choſes que tu as dit, dans le liuret du Seigneur des Montagnes, auquel on a reſpondu : tout ce que tu as adjouſté à cette vieille piece, eſt vn peu de fard. Nous deſcouurons , que tu preſentes ſur le theatre de l'eſfronterie les mēſmes calomnies mieux coiffées ; tu as auſſi employé plus de temps pour les agencer. En fin, Cleonuille eſt des Montagnes mieux couuert: celuy-là auoit fait voir ſes menteries veſtues en furies , tu les habilles en Nymphes : ſes flatteries eſtoient puantes , les tiennes ſont parfumées : il aboyoit comme la Charybde, tu chantes comme les Sirenes: il donnoit du poiſon, comme vn pauvre Moyne , dans vne eſcuelle de terre, dans laquelle il beuuoit deuant qu'il euſt quitté le Couuent ; tu le preſentes dans vn verre de cristal : il a meſlé le ſublimé dans du pain-bis, tu l'as glacé ſur du maſſe-pain : ſa baue eſtoit celle d'vn ſale crapaud , ton venin eſt celuy d'vn ſerpent bien émaillé. Je peux dire, que ton deſſein a eſté ſemblable à celuy de ce riche meſchant, qui dans les Declamations de Quintilian empoisonna les fleurs de ſon iardin, pour faire mourir les abeilles de ſon voiſin. Tu as reſpandu ton poiſon ſur

quelques fleurettes, antitheses, petits rencontres, mots choisis, pour corrompre les esprits des curieux sans iugement ; qui estiment les choses par les paroles, & qui croient, que tout ce qui est assez bien escrit, a esté fait avec iustice & verité. On voit bien que tu as esté le premier, auquel ton ouurage a agréé ; & on s'imagine que tu l'as souvent recité à toy-mesme, en branlant la teste, & frappant du pied. Ayme-toy, tant que tu voudras, dans ton ouurage : si tu te plonges & te perds là dedans, tu ne peux iamais estre changé en Narcisse, & encore moins en vne Immortelle, tu ne seras mesmes vne Hemerocale : ta beauté ne peut durer vn iour, ny seulement vne heure qu'on perdra pour lire ton escrit. Et afin que tu recognoisses, que ce n'est pas l'enuie qui me porte à iuger ainsi de tes escrits ; ie te marqueray quelques points, dans lesquels ie feray voir tes fautes & impostures, mesmes à ton aveuglement.

Tu commences par l'Afrique, qui produit tous les ans quelque monstre, à cause du meslange des animaux de diuerses espèces qui se rencontrent aupres des eaux fort rares en ce pays là : tu n'as pas pris garde que le nom de Cleonuille, que tu as choisi, estant composé du Grec & du François, ne peut signifier autre chose qu'un monstre ; & ce mot de Roman nous fait croire que ton liure est vne fable plustost qu'une Histoire. Tu dis que tu es la gloire de ta Ville : cela seroit bon, si apres Sidonius Apollinaris elle n'auoit plus porté de tres-sages & tres-sçauans hommes, en toutes sortes de professions ; & si Sauaron & ton oncle n'en estoient point sortis vn peu deuant toy.

Tu enuoyes vn Aduertiffement aux Prouinces, fans leur donner vn conseil profitable, ny la bonne nouuelle de leur foulagement; qu'elles receuroient avec plus de ioye que ton papier, qui ne contient & n'enuelope ny vne recepte, ny vn remede contre les maux qui les accablent. Tu t'esgayés en ton exorde assez long; & deuant que de frapper de ton espadon, tu fais cent moulinets en l'air, croyant que nous aurons peur lors que nous le verrons briller au Soleil: ou pour mieux dire, apres nous auoir fait attendre vn bon repas, le premier mets que tu apportes est vn grand plat de creme foietée, qui est toute en escume, & dressée en rochers sur des branches defenoüil ou de rosmarin. Tu fais des belles protestations, que tu veux conseruer avec grand soin l'honneur & le respect que tu dois à la Reyne Mere du Roy, & à Monsieur; cependant on iuge sur tout par la fin de ton discours, qu'il n'y a point eu d'Escriuain menteur & cruel comme toy. Il est vray, que les autres ont esté plus brutaux, & nous ont attaquez en taureaux & en ours; mais tu nous picques en serpent: Ceux-là nous pouuoient casser quelque iambe ou quelque bras, mais tu portes ton venin droit au cœur.

Pour te monstrier qu'il y a long-temps que nous n'auons veu Monsieur le Cardinal, qui dans ses resueries a accoustumé de rongner les ongles à ceux qui sont aupres de luy; nous sommes resolus de te monstrier les nostres, & de commencer par la premiere atteinte que tu nous donnes.

Après auoir employé quinze pages en auant propos, tu dis en la seiziesme *que nous sommes bannis volontaires.* C'est, amy Cleonuille, que tu Pag. 16. crois qu'on ne peut estre banni, si après auoir eu le fouet & la fleur de Lis, on n'est conduit à la porte d'une Ville avec vn trompette & vn bourreau : c'est ainsi qu'on te chasseroit, si on te faisoit iustice, pour auoir médit de la Mere, & du Frere de ton Roy : mais pour les personnes de cette condition, on les bannit, lors qu'on leur oste la place que la Nature leur donne ; qu'on les poursuit avec armes, ou qu'on les emprisonne ; ou qu'on les enuoye hors de la Cour : C'est vn exil pour ceux qui y doiuent estre en repos comme en leur centre, & seureté comme dans leur maison.

Après nous auoir donné ce coup de bec en passant, tu te perches pour chanter les loüanges Pag. 17. de Monsieur le Cardinal, & commences l'Hi- 18. 19. stoire de sa vie depuis ses estudes, comme tu &c. auois fait dans ton Coup d'Estat : tu redits les mesmes choses avec quelque petite diuersité ; dans laquelle nous voyons ta disette, qui te contraint de rapporter les miserables restes déguisées d'une viande, qui nous fut présentée il y a tantost vn an ; où nous pouuons dire que tu es semblable à ces Comediens qui n'ont que quatre ou cinq acteurs, pour iouir trente personnages, & font en vn instant des hommes & des femmes, des Roys & des valets, avec des habits, des masques. & des vers.

Tu dis, *que du temps du Marechal d'Ancre sans* Pag. 20

Monsieur le Cardinal on eust fait encore pis : qu'il demanda souuent son congé ; mais que le besoin qu'on auoit d'une teste comme la sienne, le luy fit refuser absolument. Prends garde Cleonuille, tu accuseras le Roy d'injustice, pour auoir chassé de sa Cour, & apres de son Royaume, vn homme qui à ton compte auoit tres-bien serui S. M. & son Estat, & qui n'estoit point coupable des maux que tu dis auoir esté faits en ce temps-là. Tu asseures qu'il diuertit le Marechal d'Ancre de bailler Quillebeuf aux Espagnols, & que la lettre qu'il escriuit sur ce sujet fut veüe dans le procez de la Marechale : pourquoy teniez vous cachée iusqu'à present cette verité ? pourquoy est-ce qu'on a bruslé avec le procez cette piece excellēte ? pourquoy est-ce que les iuges la supprimerent, si elle seruoit pour faire voir l'innocence de Monsieur le Cardinal ? pourquoy fut-il banni apres le iugement, s'il auoit rendu ce grand seruice ? pourquoy n'en a on point parlé lors que la plus part des Iuges viuoient ? quelqu'un de ceux qui restent peut-estre s'en souuiendra ? tirez-vous ce témoignage de la bouche du President de Bellieure, ou du Procureur general ? Escriuons avec plus de verité ; & disons, que iamais le Marechal d'Ancre n'eut intention de faire ce que l'ingratitude de celuy qui auoit esté auancé par sa femme luy impose. Il est plus probable qu'on decouurit quelque chose contre le Cardinal, puis que dans la suite de cēt affaire on le fit sortir de Luçon ; où il auoit esté renuoyé, & on le relegua en Auignō. Il faut aduoüer que tu es vn plaisāt bouffon, lors que tu dis, que le premier

employ donné à Mr. le Cardinal par la Mareſchale fut ſon apprentiſſage, & que la reconciliation apres la deſroute du Pont de Sé fut ſon chef d'œuvre. Tu as ren- Pag. 28
contré à ce coup, & les ſages l'ont creu comme tu le diſ: il n'y a que cecy à adjouſter, que la France paya bien cherement ſon apprentiſſage, & que le chef d'œuvre, pour le faire paſſer maïſtre, fut fait aux dépens de beaucoup de vies & de biens. Il fut trouué ſi beau, qu'il en eut vñ chapeau de Cardinal; & il tira de cét ouurage incōparable, le plus rare qu'il aye iamais fait, le nō qui luy demeurera touſiours, à ſçauoir de Cardinal de la trahiſon.

Tu es mauuais animalïſte, lors que tu diſ, *le voy-là Cardinal tout auſſi toſt apres ſon chef d'œuvre*: tu ſçais bien qu'il y eut deux ans entre la promeſſe, & la promotion. On a dit ailleurs les raiſons qui portèrent ſa Sainteté & le Roy à laiſſer vñ peu tréper ce bōnet dans la teinture, & à luy donner le loïſir de ſe ſeicher. Tu diſ avec la meſme temerité, *qu'il fut chef du conſeil quelques années apres*: tu ſçais bien que cela ne peut eſtre qu'apres qu'il en a chaffé la Reyne ſa Maïſtreſſe, & que cette qualité dās ſon eſloignement eſt acquiſe à Mr. le Cardinal de la Rochefoucaut, comme eſtant le plus ancien, encore qu'il n'en faſſe pas ordinairement la fonction.

Tu employes ſept ou huiſt pages pour deſcrire les auantages que la Religion & l'Eſtat ont retinē de la priſe de la Rochelle; que tu deſcris comme la citadelle de l'impieté & de la rebellion. Nous ne doutons pas que le fruit de cette priſe ne ſoit bien grand: tu nous permettras auſſi de te dire qu'il euſt eſté plus auantageux, ſi Mr. le Cardinal

378 *Aduertiffem. de Nicocleon à Cleonuille*
n'eust retenu la place , & la gloire ; s'il ne faisoit
fortifier celle-là , & ne gardoit avec tant de soin
cette-cy ; qu'il est fort à craindre que le Roy n'en
ayant du tout point , ny dans tes escrits , ny dans
ceux de tes compagnons , il n'en aye pas d'avan-
tage dans cette Ville , s'il souffre que ses rempars
soyent reestablis. Je confesseray pourtant , que tu
aurois plus de suiet d'appeller cette prise vn chef
d'œuvre , que la drollerie du Pont de Sé. Iete
prie de me permettre de donner vn Aduertisse-
ment à celuy qui adresse le sien aux Prouinces ;
c'est de prendre garde , que dans la description
des grands exploits de Mr. le Cardinal, tous vous
autres Mrs les Escriptuains fauez tousiours nom-
mé , estimé , & louié tout seul , comme si person-
ne ne l'auoit assisté. Nous voyons que dans les hi-
stoires des sieges , batailles & combats , on re-
marque les belles actions de ccux qui ont sage-
ment commandé , & courageusement combattu :
on les nomme pour laisser à la posterité quelque
tesmoignage de leurs seruices ; cela est deu à leur
vertu , & en vser autrement est vn larrecin d'hon-
neur. Dans vos escrits on ne fait point de men-
tion du Roy, on ne dit rien des ordres qu'il a don-
né, des peines qu'il a pris , & des inuentions qu'il
a trouué. C'est vne chose plus estrange, que Mr. le
Cardinal a dit à vn homme d'aussi grande qualité
que luy , qu'il auoit pris la Rochelle en despit du
Roy. Ne t'estonne donc plus s'il a inuenté , que
ce genereux & courtois Seigneur , que sa seule
vertu a rendu prisonnier , auoit tenu ce discours,
Nous serons si fols que de prendre la Rochelle. Quand
ces

ces paroles seroient sorties de sa bouche, les bônes
resolutions, & les executions hardies ne laissoient
pas de sortir de son cœur. Contentetoy que tes
escrits taschent de luy desrober la reputatiô, com-
me le Maistre, qui t'employe, a fait la liberté. Nous
sommes plus equitables que vous : sans oster ce
qui peut estre deu aux cōseils de Mr. le Cardinal,
& sans vouloir disputer ce qui est renuoyé aux af-
faires qui arriueront dâs quelque tēps, pour faire
iuger si ses aduis ont esté salutaires, ou temera-
res ; nous disons qu'il faut apporter aux pieds du
Roy toutes les despoüilles ; & que la iustice veut,
qu'apres auoir couronné sa teste de lauriers, &
chargé ses mains de palmes, on en donne quelque
petite branche pour le siège de la Rochelle, pour
la reddition des villes rebelles, pour les affaires
d'Italie, aux Mareschaux de la Force, de Schom-
berg, de Montmorency, de Thoiras. Vous per-
mettrez qu'on y adioust les deux pauures pri-
sonniers, si vous ne voulez qu'on leur oste la gloi-
re avec la liberté. Je ne dis rien de tant de sages
Mareschaux & Maistres de Camp, braues Capi-
taines, & hardis soldats, ausquels il ne faut point
refuser vn peu de nostre encre, pour recompense
du sang qu'ils ont respendu. Vous n'avez point
loué ny nommé iusques à present que ce grand
Cardinal : vous le rédez aucteur de tous les biés,
& logez ses ordres par dessus les ordinaires de
Dieu, en ce que vous le faites operer sans causes
secondes: on dit de luy, comme de Menetho, qu'il
fait tout, tout seul: mais comme ce Grec, qui luy
voyoit exercer plusieurs charges de la republi-

*Le Ma-
reschal
de Bas-
sompierre.
Pag. 30.*

*Mes-
sieurs de
Bassom-
pierre
& de
Maril-
lac.*

que, predict apres en auoir fait le denombrement; qu'il auoit trouué beaucoup de moyens pour chercher le repentir; nous croyons aussi que Mōsieur le Cardinal n'en est pas esloigné.

Nous ne parlerons pas icy des fautes qu'il a fait dans tous les rencontres desquels il tire tant de gloire, ny de la temerité de ses conseils, ny de ses interelts particuliers, ny de ses querelles & vengeance: tout cela a esté remarqué ailleurs; & nous ne voulons pas vser de redites, comme tu fais, ny rendre nos pages petites comme les tiennes: en quoy tu monstres que tu es vn Aduocat corrompu, en faisant beaucoup de roles, pour auoir vn plus grand payement.

Pag 35.

Vous iouëz vne piece nouuelle, lors que vous dites, *que la Reyne Mere du Roy, ayant esté d'aduis d'assister Monsieur de Mantoue, deuint Espagnole par les persuasions du Cardinal de Beule, & du Garde des Seaux de Marillac, durant le voyage que le Roy fit à Suze.* Vous ne donnez point de marques de ce changement, & nous en auons du contraire. La Reyne Mere du Roy assista l'année suiuite au Conseil, qui fut tenu pour resoudre le second secours; elle l'approuua, & que Monsieur le Cardinal eut la charge de le conduire: mais elle fut d'aduis qu'il mesnagea l'affection de Monsieur de Sauoye: auec lequel son imprudence, sa vanité, & sa cholere, le firent rompre. La Reyne, ny pas vn esprit sage ne le pouoit trouuer bon; non plus qu'on ne scauroit aduoier, que les deux personnes qu'on veut faire passer pour affectionnées à l'Espagne, ayent trahi leur pays, & suiui les anciennes maxi-

sur son aduertissement aux Provinces. 381
mes de la Ligue. Qui seroit plus coupable de ce
crime que le Cardinal, qui s'est vâté de les auoir
auancéz, ayant sceu le parti qu'ils auoient tenu
durant les troubles du Royaume, & le zele qu'ils
auoient tesmoigné : il estoit changé en vne par-
faite affection pour la Religion, pour le Roy, &
pour l'Estat ; & ils ont tousiours creu, comme
font tous les gens de bien, que ces trois choses
estoyent inseparables.

Comme il n'appartient qu'à Monsieur le
Cardinal de faire des loix, lors qu'elles luy sont
favorables ; & de les rompre, lors qu'un des-
sein nouveau les a renduës contraires : aussi luy
seul peut impunément présenter des hommes au
Roy, luy dire qu'ils sont les plus vertueux de son
Royaume, & les plus fideles à son Estat ; ius-
ques à ce qu'ils s'opposent à ses volontez. C'est
pour lors que non seulement il leur impose des
crimes nouveaux, mais qu'il se desdit sans honte
de tout ce qu'il auoit dit auparauant. Il se blasme
de temerité en ses choix, & aime mieux se rendre
infame pour auoir mis dans les affaires ceux qu'il
appelle meschans, que de se voir en danger d'en
sortir. Il vse de ces artifices, lors qu'il se voit des-
couuert par ceux, auxquels il a procuré quelque
employ ; plustost pour les rendre ministres de ses
mauuais intétions, & se descharger sur eux de la
haine de ses violéces, que pour leur faire part des
bonnes graces du Roy, & de la gloire qu'on peut
acquérir en le seruant avec affection & fidelité.

Après auoir apporté, pour la premiere cause de
lauerfion contre le Cardinal, les conseils d'un

mort, & d'un prisonnier, qui ne le defendent que deuant Dieu; tu as voulu reietter le deſeſpoir de
 Pag. 37. l'Exempt Baranton, ſur la grande haine que la Reyne auoit conçu contre Monſieur de Mantouë, pour lors Monſieur de Neuers. Toute la France ſçait, que le malin eſprit porta le foible de cet Exempt (qui fut deſaduouié des deux coltez) à le defaire ſoy-meſme; & la Reyne fut tres-mariée que cet enragé euſt adjouſté la perte de ſon corps, & de ſon ame, à celle de ſon honneur.

Pag. 38. La ſeconde cauſe de l'auerſion de la Reyne, n'eſt
 & 39. pas ſelō voſtre aduiſ (car vous ne le croyez point) mais eſt ſelon voſtre diſcours, le deſſein du Mariage de la Princeſſe de Florence. Vous aſſeurez que ſa Majeſté creut que le Cardinal s'y oppoſoit avec les Miniſtres de Monſieur, pour auancer celui de la Princeſſe de Mantouë. Tu diſ que *cette imagination achua de le perdre.* Il faut confeſſer que tu travailles ſur des mauuais memoires. Si ce qu'on te fait eſcrire eſtoit vray, la Reyne euſt dès ce temps là chafſé de ſa maiſon le Cardinal, & les ſiens: il n'y auoit point de conſideration qui ſ'en peuſt empeschier. On te dira bien d'auantage, que le Roy eſtoit plus diſpoſé à ſ'abandonner qu'il n'a eſté apres: il ne faut pas douter que l'auctorité de la Reyne eſtant plus grande, & le credit du Cardinal moindre, il n'eſt eſté tres-aifé de le ruiner. Par où tu peux iuger que les raiſons, qui ont porté la Reyne à l'eſloigner de ſes bonnes graces, & à parler comme elle fit au Roy, ont eſté tirées de la mauuiſe conduite, & pernicious deſſeins que le Cardinal a fait paroître vn an apres. Il commença deſlors à tres-mal meſnager la

santé, les affaires, les Alliez, & les Finances de son Maistre; & sur tout, les biens & les bien-faits de sa Maistresse. Il prist, à la veuë de tout le Royaume, les Marques d'un vsurpateur ou d'un dissipateur de l'Estat. Et parce que nous auons apporté ailleurs toutes ces raisons, & que la France iuge mieux parce qu'elle voit & qu'elle ressent, que parce que nous pouuons dire & escrire; nous te renuoyons à nos autres escrits, & à la cognoissance publique, pour te dire que tu as tort, en parlant de la Reyne, d'employer ces termes: *Les exemples du passé nous apprennent ce que peut ordinairement sur l'esprit irrité d'une femme, & d'une femme de cette marque: la violence de ses mouuemens irreguliers, qui iettent par fois la raison des plus sages hors de son accoustumée assiette.* Tout beau, Cleonuille, tout beau; tu t'eschaufes vn peu trop pour vn Auvergnat. Le temperament que tu veux apporter en la page 41. disant que la Reyne n'est pas vindicative, est vn foible remede à ce destraquement de cerueau, que tu veux persuader estre arriué, & à cette possession des malins esprits, que tu dis s'estre meslez dans les humeurs de la Reyne. Pag. 39. Pag. 41. Pag. 42. Apres luy auoir donné les deux mauuaises qualitez qu'on peut tirer de ce discours; quel deguisement que tu puisses apporter, tu ne scaurois adoucir l'injure que tu dis, ny excuser ta folie, ny couvrir la rage de celuy qui t'employe.

Tu te mets fort en peine pour rechercher les exemples des Princesses qui ont esté choleres: nous iugerions plus rares ceux des Dames qui ont esté exemptes de cette imperfection. La pa-

Eccl. 25 role de Dieu nous enseigne, qu'il n'y a point d'indignation plus grande que celle de la femme; & vn gentil Poëte Romain a dit, que son infirmité la porte à se plaire à la vengeance.

Lucan. --- *Nempe pusilli Semper & infirmi est animi exiguiq;
voluptas. Vltio : continuo sic collige, quod vindictâ* *Nemo magis gaudet quàm femina.* ---

Pag 43. Tu nous represente vne grande cabale, que tu appelles amas de broussailles & ordures au dessus d'une escluse, qui est à la fin emportée par l'impetuosité de l'eau arrestée partant de bris trauffersez. Tu te fers en cet endroit du mesme discours presque mot à mot que tu as fait dans ton Coup d'Estat : c'est vn témoignage de la disette de tes pensées, qui t'ont contraint d'estre larron à toy mesme : c'est aussi vn argument que tu veux remplir ton liure, & le rendre de la grandeur de l'autre, pour payer tous les ans par vn ouurage de mesme poids, que tu presentes à la fin de l'année pour retirer l'ordonnance de ta pension. Si tu dis que nous appellons desordre dans l'Estat tout ce qui ne va pas bien dans nostre maison; nous te pouons repartir, que ce qui fait bien aller la tienne, est par toy nommée excellente conduite du public. Nous ne sômes pas marris qu'on te fasses du bien, mais de ce que tu le cherches au preiudice de ta reputation, & de ta conscience, ne pouuant dire autre chose de toy; si ce n'est que tu es sottement trompé avec les plus innocens, ou que tu es malicieusement du nombre des trompeurs. Si tu es entre les premiers, tu es digne de la compassion des honnestes gens, & du salaire de ceux qui t'employent : si tu es entre les seconds, tu merites plustost chastiment que recompense.

Tu nous veux faire passer pour miracle de S. Martin ce qui arriua le iour de sa feste, comme si ce bon Sainct estoit le protecteur du Cardinal, *parce qu'il l'est de la France* : tu deuois adiouster, parce que ce bon Seigneur a son Abbaye de Marmoustier, & son Doyenné de Tours. Ie ne trouue point de personnes qui fassent meilleur marché des miracles que font les Escriptuains du Cardinal; ny d'homme qui les attire, & qui y croye moins, que fait son Eminence.

A quoy sert, ie te prie, si ce n'est pour faire paroistre beaucoup de besongne à ton Maistre, la description curieuse que tu fais dans six ou sept pages du naturel & de l'education de Monsieur? Tu representes à vn Prince, qui a des enfans, ce qu'on luy a dit estant petit enfant : tout cela est hors de propos pour les affaires du temps; non pour les tiennes, comme i'ay dit. Pag. 46 ad 53.

Pourquoy, escriuant contre la Reyne Mere du Roy, blasmes-tu le conseil de ses ennemis, qui mirent le Colonel aupres de Monsieur: Pourquoy entres-tu dâs les tombeaux de deux Marechaux de France, pere & fils, & du grand pere generoux Capitaine. pour leur casser les os, & te redre semblable à d'Aubigny, qui a esté le seul avec toy qui a mesdit de ces deux fideles seruiteurs de nos Roys? Si tu trouues dans leur vie quelque action qui doie estre reprise, cela ne redra pas innocent celuy que tu soustiens, qui est accusé d'en auoir fait dix mille mauuaises. Pag. 32. Mes-
heurs
d'Orna-
no.

Lors que tu dis, qu'un Ecclesiastique est arger *auoit esmen le venin du Colonel*, tu as digne l'Abbé. Pag. 53.

de l'Escaille ; qu'on deuroit traiter plus doucement apres la paix faicte avec son Maistre, & la reconciliation avec luy. Nous voyons bien que l'orgueil du Cardinal est si grand, que l'affection de tous les Princes du monde luy estant indifferente, il choque amis & ennemis : comme il fait le Prince de Piedmont dans sa puante Satyre, & la memoire du feu Duc de Sauoye son Pere dans ses lettres de Duc & Pair. Mais il faut croire, qu'apres le mespris de la Reyne sa Maistresse, & Mere de son Roy, & du Frere vnique de sa Majesté, rien ne luy est saint & sacré. On ne doit point trouuer extraordinaire s'il perd le respect avec les Princes estrangers, puis qu'il veut vser de ces termes, *que Monsieur auoit iuré amitié avec luy.* Certes il faut qu'il passe, ou pour vn tres-mauuais courtoisan, ou pour vn homme tres-orgueilleux : nous le cognoissons, & sommes asseurez que sa conscience luy fera plustost confesser vn crime, que sa vanité ne luy fera auoüer vne sottise.

Pag. 55

Pag. 56

Tu apportes des beaux exemples, pour prouuer qu'il faut mettre Monsieur en tutelle : tu dis, *qu'un Roy a fait tuer un Secretaire de son Frere naturel, parce qu'il guindoit l'esprit de son Maistre à choses trop hautes.* C'est à dire, que tu voudrois qu'un Roy fust meurtrier, & qu'il traitast comme vn bastard son Frere legitime. Si Monsieur se desfiot de ce que tu conseilles, & si ses seruiteurs craignoient l'assassinat duquel il semble que tu es d'aduis ; par ta foy aurois-tu trouué le chemin de la paix ? ne vois-tu pas, que celuy qui s'employe, a intention de porter les choses au desespoir, lors

qu'il approuue ce que tu escriits, apres ce que nous scauons qu'il a dit?

Pour l'exemple de remuë-mesnage que fit Charles Cinquiesme dans la maison de Ferdinand son Frere ; nous te respondons, que les seueritez qui sont sagesse en Espagne, seroient des cruau-pag. 58tez en France : les esprits de nos Princes ne les souffriroient pas ; & les extremitez dans lesquelles on les porteroit, causeroient des plus grands maux, que ne peuuent faire leurs petits déplaisirs, ils sont plus facilement appeisez qu'ils ne sont esmeus ; sur tout, quand on ne represente point aux Roys (comme tu fais) qu'ils peuuent tuer leurs Freres, leur oster tous leurs seruiteurs, & faire massacrer ceux ausquels ils se confient.

Tu n'as eu garde de dire, en parlant du chagement que fit * Ximenes dans la maison de Ferdinād, que l'auteur que tu as cité dit, que ce Prince n'estoit qu'un enfant ; auquel tu compares un Fils de France qui a des enfans. Ce mesme historien dit que Ximene osta des gens de bien à Ferdinand par vengeance & inimitié qu'il auoit contre Nonnius de Gusman, Cautelier tres-geneux &

* Aluarus Gomes lib. 7.

Hæc omnia quantum ad fidem & integritatem Petri Nonny & Osorii pertinent, vana fuisse, & ab eorum æmulis in vulgus sparsa, multis argumentis comper- tum habeo: Nonnius enim ob mores inculpato, & insignem pietatem, ab Isabella Regina pueritiæ Ferdinādī datus est custos; Osorius vero, etsi non admodum sedati ingenij fuit, animi tamen in Reges fidelissimi babil- tus.

tres-sage; parce qu'il auoit obtenu la grande Maistrise d'Orete sans s'estre adressé à luy. Ce mépris estoit vn crime en ce temps là, comme en cestui-cy c'est vn moyen de ne rien auoir, de ne dire pas au Cardinal, qu'on veut tenir le bien-fait de luy seul. Pour Aluare Oorius, qui estoit Precepteur de Ferdinand, il estoit en horreur à Ximenes Cordelier, parce qu'il estoit Dominicain, & qu'il y auoit vne grande ialousie entre ces deux ordres. I'apporte les raisons de ton historien, qui adjousté que Ferdinand, quoy qu'enfant voulut tuer Ximenes, qui fut sur la fin de ses iours fou, furieux & empoisonné. Il fut en execration à tout le monde, pour auoir ruiné la fortune de beaucoup de gens de bien; & sur tout, d'vn ieune Gentil-homme, nommé Moscosus, qui estoit le plus adroit d'esprit & de corps, & le plus parfait en toute sorte d'exercices, qui fust en Espagne: & afin que tu ne m'accuse pas d'estre imposteur, comme toy, i'ay mis à la marge vne partie de ce que ton autheur en a dit,

Pag 60 Tu parles de trois Officiers de Monsieur: & tu dis, *On les taffe, on les esbranfle, on les emporte.* C'est vne belle louange que tu donnes à ceux qui ont entrepris ce trafic, dans lequel nous voyons bien, par vostre confession, qu'on les a voulu acheter: mais nous ne voyons pas qu'ils vous ayent rendu la liberté de leur Maistre, comme Monsieur le Cardinal a sacrifié à son credit celle de la Maistresse. Vous ne seriez pas en cholere contr' eux s'ils l'auoient fait: & le seul sujet de vostre indignation vient de ce que leur fidelité a esté plus

forte que vostre corruption ; que leur esprit a veu qu'elle tendoit à les porter à endormir leur Maistre, cependant que vous pilleriez la maison, dans laquelle il est né ; & dissiperez le Royaume à la conseruation duquel il a le premier intherest apres celuy du Roy. Cela vous a tellement fascchez, que sur l'exemple du traitement faict aux seruiteurs d'un fils de putain, vous voulez qu'on tuë ceux qui ont garanti de vos mains un Fils de France, legitime & heritier de la Couronne, qu'on vouloit ou enleuer ou égorger. Vous conseillez ces horribles attentats, en proposant qu'un Roy peut faire, sans forme de Iustice, contre son Frere ce qu'un autre a fait contre son Fils.

Vous venez à la promesse du chapeau de Cardinal faite au President le Coigneux, & nous contraignez de dire : O sainte Pourpre, à quoy es tu reduite en ce temps, depuis que tu as esté la recompense d'une trahison ! celui qui l'a faite, confesse qu'il t'a présenté pour en attirer d'autres ; & qu'il t'a voulu mettre sur la teste de ceux qu'il appelle insensez.

Pag 61
& 62.

J'ay remarqué dans toute la suite de ton discours, que tu fais estat d'apporter plus d'exemples que de raisons. Ceux-là te sont plus aisez ; parce que trois ou quatre liures que tu as leu, t'en fournissent assez : entre autres celuy de Jean Duc de Bourgogne, le flambeau fatal de la France, auquel tu compares Monsieur. Tu ne te souuies pas, que le Frere unique du Roy ne peut rien auoir de semblable avec le meurtrier d'un Frere unique d'un Roy ; & que ceux que tu appelles ser-

Pag 64

uiteurs du Bourguignon n'estoient point les domestiques, mais des François traistres à leur Prince, que l'ambition, la vengeance, & les artifices du Duc auoient desbauchez. Tu adjoustes que Louys XI. & le Duc d'Alençon ne s'estoient

Pag. 67 retirez, l'un de la Cour de Charles VII. son Pere, & l'autre de celle de Henry III. son Frere, que par les mauuais conseils de leurs seruiteurs. Je te diray, que ce qui se passe n'a rien de pareil avec les Histoires que tu recherches. Nous confessons, que ces Princes n'auoient point de sujet de se plaindre ny d'apprehender, comme Monsieur doit auoir. Il n'y auoit point en ce temps là de Ministre si puissant, insolent, & violent, comme est la Cardinal; ny point de Reyne Mere du Roy, sage & vertueuse, emprisonnée; des trente places fortes & frontieres entre les mains d'un homme, avec les plus importantes Provinces; un Conseil composé à sa mode, toutes les grandes charges de l'Estat dans ses mains, toutes les Finances du Royaume dans ses coffres, dix mille Soldats entretenus dans ses garnisons, trois cens pieces de canon qui ne portent point d'autres armoiries que les siennes, soixante vaisseaux qui ne recognoissent point d'autre Maistre que luy, trois cens prisonniers qui sont gardez par ses Capitaines & concierges, deux Marechaux de France qui sont captifs sans crime, un autre qu'on a fait mourir en prison avec un Frere naturel du Roy; plus de deux mille personnes de qualité, hommes & femmes, bannis, pros crits, & despoillez de leurs biens sans forme de Ju-

stice. Tout cela & beaucoup d'autres choses que chacun sçait, & plusieurs ressentent, ne sont pas à ton aduis, des subjects capables de faire qu'un Frere vnique d'un Roy, qui n'a point d'enfans, apprehende pour sa personne, & pour l'Estat : qu'il se mette en peine, pour descouurir les desseins de celuy qui à toutes les marques d'un usurpateur, & qui menace effrontement de l'exclusion de Charles de Lorraine, celuy que nous tenons pour Dauphin, iusques à ce qu'il aye pleu à Dieu d'en donner vn à nostre Roy. Feuillette tant que tu voudras nos Histoires, & adjouste (comme tu fais d'ordinaire) quelque chose du tien pour mieux accommoder les choses passées à celle de ce temps, ie te defie de pouuoir ny trouuer ny feindre rien de semblable.

Parini beaucoup de reproches que ie te fais Pag. 69 avec raison, ie crois estre obligé de te faire vn remerciement d'un bon aduis que tu donnes aux seruiteurs de Monsieur, lors que tu dis, *que le desir de se faire quelque chose plus qu'ils ne sont, est le seul but de toute l'equippée qu'ils ont fait faire à leur Maistre, & que le temps, qui ne laisser rien de caché, descouurira ce que tu dis.* Tu auras Prophetisé, si l'inherest de ces Messieurs est la regle d'un accommodement; il n'y a point de doute que ce ne soit la pierre de touche de leur fidelité : mais aussi s'ils font voir, qu'ils ne desirent autre chose que la gloire de Dieu, l'honneur du Roy, le repos de la Reyne sa Mere, la réputation de Monsieur, la seureté de l'Estat, la deliurance des prisonniers, le retablissement des bannis, & sur tout le soulagement

du pauvre peuple, comme ils doiuent faire, & l'ont ainsi iuré; Cleonuille sera bien trompé: il recognoistra peut-estre à ses despens, qu'il ne faut iuger temerairement des intentions des Grands Princes, ny de celles des personnes de qualité, qui sont en consideration aupres d'eux.

Pag. 69. Apres auoir fait paroistre que tu es malicieux; tu passes pour bouffon, lors que tu nous representes la retraitte & le sejour de Monsieur à Orleans comme des conspirations contre le Roy & l'Estat: tu fais des puillantes leuées de gens de guerre en Limosin. des grands amas de provisions en Beaulieu: tu desbauches en vn instant avec ces deux Prouinces, la Prouence, le Dauphiné, & la Bourgogne; tu resuscites le vieux Royaume d'Orleans, reduit en cendres depuis tant de siecles: bref tu fais desia paroistre ce Prince deuant Corbeil & Fontoise, avec trente mille hommes sur le point d'affamer & assieger Paris. Voy-là d'estrange visions: sans faute ce sont les mesmes que le Cardinal ne croit pas; & qu'il presente au Roy, pour luy donner apprehension de ses plus proches: on te fait porter cette fausse marchandise dans le public, & on se persuade qu'elle est bonne, pourueu qu'on l'achete sur le Pont neuf, où se fait le debit de toutes les drogues des charlatans de France, qui sont aussi fidellement composées que tes escrits.

Pag. 71. Tu as voulu traiter Monsieur & ses seruiteurs les premiers; & apres les auoir bien testonnez, selon ton aduis; tu viens pour lauer la teste à la Reyne Mere du Roy: tu dis que la plus part des

sur son aduertissement aux Prouinces. 393
choſes au monde ſont ſemblables aux tableaux à deux
rapport. Il n'y a rien de plus veritable : mais tu
te mets du coſté qui te fait voir le pourtrait d'v-
ne tres-belle vie comme fort hideux ; tu le veux
repreſenter à ceux qui le conſiderent à main
droite, tel qu'il te paroift à la gauche, où tu es
avec le Cardinal, & avec les lunettes de quelque
penſion, qui n'eſt iamais ſans paſſion : mais ceux
qui n'ont ny penſion ny paſſion, ſe mocquent bien
de toy. Pour moy, qui approuue tout ce qui eſt
ſagement eſcrit ; ie te confeſſe que dans le long
discours que tu as fait, pour monſtrer que les
Rois doiuent plus à leur Eſtat qu'à leurs plus
proches, il y a quelque choſe qui peut eſtre receu ;
mais tu me permettras auſſi de me ſeruir de la
meſme ſincerité pour te reprendre des mauuiſes
inductions que tu fais, & des furieuſes cōſequen-
ces que tu tires d'vne ſeule propoſition, qui eſt
touſiours la generale, que tu taſches de prouuer
par vne grande quantité d'exemples. Pour la
propoſition particuliere, à la confirmation de
laquelle ton discours ſe deuroit principalement
arreſter, nous ne voyons rien qui nous puiſſe, ie
ne dis pas conuaincre, mais inſtruire. Et afin que
ie m'explique plus clairement, parce que ie reco-
gnois bien en ta façon d'eſcrire, que tu es discou-
reur ſans Dialectique ; ie te dis, que c'eſt en vain
que tu te tourmētes de nous prouuer, qu'vn Roy
doit auoir plus de ſoin de cōſeruer ſon Eſtat, que
de contenter ſa Mere & ſon Frere, ſi tu ne mon-
ſtres en quoy la Mere & le Frere, contre leſquels
tu écris, ont voulu ruiner cēt Eſtat. C'eſt auſſi

pag. 73
74. 75.
& 76.

vne grande folie d'aller chercher dans les liures
 tous les lieux communs, & exemples des mau-
 uaises Meres des Roys, & de leurs mauuais Fre-
 res, si tu ne fais voir en quoy la Mere & le Frere,
 que tu veux accuser, ont esté semblables à celles
 ou à ceux avec lesquels tu les compares. C'est vn
 erreur qui vous tient, & que vous desirez de iet-
 ter dans le public, que la Royne Mere du Roy est
 criminelle, & a failly contre l'Estat, sans dire, ny
 quand, ny comment. Il est certain, que si elle
 n'eust iamais esloigné de sa maison le Cardinal &
 les siens, & si elle n'eust point descouuert à sa
 Majesté les pernicieux desseins de cet homme,
 elle estoit tres-fidelle au Roy & au Royaume :
 comme si le Marechal de Marillac n'eust eu vn
 frere, auquel on ostoit les Seaux, il estoit le meil-
 leur & le mieux employé seruiteur qu'eust le
 Roy : de sorte que les crimes que vous imposez,
 sont crimes qui sont faits par les occasions, non
 par les personnes. Remarquez en la Royne vn
 peché contre le Roy, & son Estat; produisez ses
 escrits, faites le procez à ses Secretaires, & à
 ceux qui ont traicté pour elle avec les ennemis
 de la France : elle ne peut auoir negocié toute
 seule; alleguez quelque fait pour donner cou-
 leur à vos violences. Vous ne dites autre chose,
 que la Reyne Catherine de Medicis, Anne de
 Bretagne, Louyse de Sauoye, Elisabeth de Ba-
 niere, Iudith de la seconde race, Isabeau de Fran-
 ce femme d'Edouïard II. Roy d'Angleterre, Vra-
 que Royne de Castille, firent, dirent, furent
 traittées, chassées, emprisonnées : encore mar-
 quez

quez vous ou quelque faute , ou quelque soupçon en celles-là ; & lors que vous ne trouuez pas ce que vous cherchez dans les Histoires, vous auez l'esprit & la malice de l'adjouster : mais pour ce qui regarde la Reyne Mere du Roy, vous ne dites pas le mal qu'elle a fait , & voulez monstrier par les actions des Princesses criminelles (ou que vous croyez estre telles) que celle qui n'a point commis leur peché ou vray ou pretendu , doit porter leur des-honneur ou leur peine. Vous n'escriuez que pour tromper le peuple , & amuser les curieux par les Histoires, qu'ils trouuent ramassées dans vos escrits. Vous croyez , que personne ne prendra la peine de les rechercher dans leurs sources, qu'on n'examinera pas si elles sont bien appliquées , ny si vous auez prouué ce que les exemples ne scauroient faire. Ils ne sont pas argumens (comme les ignorans s'imaginent) que contre ceux qui les ont produits ; & contre les autres sont embellissemens de ce qui a esté confirmé par viues raisons , ou faits bien auerez.

Mais vous dites que la Reyne a attenté contre l'Estat , ayant entrepris de s'opposer à ce grand Cardinal par lequel il subsiste. A la verité c'est le seul crime que vous auez marqué distinctement en vostre premiere Declaration, c'est le seul fait particulier que vous auez allegué ; car pour tous les autres , nous vous auons coniuré d'en dire quelqu'un : nous auons voulu prendre le chemin de la Iustice, pour vous obliger de recriminer contre nous , lors que nous vous auons accusé.

d'entreprise contre le Roy , & son Royaume; apres tout cela nous n'entédons que ces paroles, *Elle a fait des menées , elle a eu des intelligences.* & en suite de cette belle production on remplit le sac des fautes de toutes les mauuaises Meres. Les Cardinaux ne sont pas si anciens au mode comme les Meres & les Reynes: pourtāt si le respect que nous portons à cette grāde Dignité, ne nous arrestoit, nous luy ferions voir , & à vous monsieur le rauaudeur d'exemples , que nous en scauons beauconp : mais ses fautes estant publiques & horribles , il ne faut point aller chercher dans les liures les moyens de les faire cognoistre , ny de les rendre plus hideuses. Nous confessons aussi nostre ignorance, que ny dans son ordre, ny dans toutes les Histoires des plus violens & des plus ingrats hommes qui ont iamais vescu , nous ne trouuons rien qui puisse représenter sa violence, & son ingratitude.

Can-
cuze-
nus
lib. 3.

J'ay bien leu quelque chose d'approchant dans vn bon Aucteur , d'vn nommé Apocaucus. Cet homme estoit d'vn naturel fort ambitieux , & grandement corrompu , faisant sur tout profession de cette infame tromperie. Il porta ses desseins iusques sur le thrōne de l'Empire d'Orient, & commença ses poursuites par la ruine d'Anne Mere de Iean Empereur ; la descria parmy le peuple, par des lettres supposées , comme si elle eust voulu changer la Religion. Par ces detestables artifices il la rendit execrable à son Fils, qui receut trop facilement les impressions que ce mauuais seruiteur , auancé par sa Mere , luy

voulut donner. Apres qu'il l'eut ruinée dans l'espi de ce ieune Empereur ; mais non pas emprisonnée , ny chassée ; il gouuerna si paisiblement son Maistre , qu'il eut de luy les principales charges de l'Empire : il fut Admiral , & Colonel de sa gendarmerie ; ou bien , comme quelques vns disent , Connestable ; il pillà tous les thresors publics , & les cacha dans deux Chasteaux ; lvn desquels s'appelloit Epibas , & l'autre Mangas. Pour se rendre tous les Grands fauorables , il leur faisoit esperer le mariage de sa fille vnique , & ne la donnoit à personne. Sa puissance deuenue insolente , & ne pouuant estre supportée , les principaux Officiers commencerent à s'y opposer , & luy à disposer l'Empereur à les faire emprisonner tous en si grand nombre , que le Palais , appelé le grand Iustinian , en fut tout rempli. Ne trouuant point de moyen pour les faire mourir ; & n'ayant aucune preuue des crimes qu'il leur auoit imposez , il auoit à sa deuotion vn pendart , nommé Glycas , homme lay : lequel prenant vn habit de Moyne , s'en alloit à la prison entendre les confessions de ces pauures mal-heureux , pour descouurir s'ils auoient cognoissance de quelque conspiration contre celuy qui l'employoit. Mais comme l'innocence , quel artifice qu'on puisse apporter , ne se veut iamais declarer criminelle ; Glycas ne pouuant rien tirer des prisonniers , Apocaucus se resolut de les aller voir pour les menacer : & par vn iuste iugement de Dieu , qui auiegle ceux qu'il

veut perdre , ayant laiffé à la porte fes gardes , qui estoient auffi fortes que celles de l'Empereur , il entra fans apprehenfion : mais il fut auffi toft affailli par tous ceux qu'il auoit rendu misérables ; lesquels se ruans fur les marteaux de quelques maçons qui batissoient, sacrifierent ce scele-rat à leur vengeance, & à la Iustice de Dieu. *Que* dis-tu de cette histoire, Cleonuille ? Je m'asseure que celuy, pour lequel tu escris, n'oseroit entreprendre de se trouuer sans escorte dans la Bastille, au milieu de quatre-vingts dix prisonniers qu'il y a mis , il craindroit que sa fin ne fust semblable à celle de cet homme , duquel il a imité les actions.

Je t'ay voulu donner ce petit exemple pour eschange de tous ceux que tu as apporté : il n'y a que cette difference , que cettui-cy a fait voir, qu'une partie des crimes publics du Cardinal s'est rencontrée dans la vie d'Apocæucus ; mais ceux que tu apportes des mauuaises femmes ne monstrent rien , que l'infirmité de leur sexe en general , où la malice particuliere de celles qui ont esté coupables. Tu as parlé, apres des Montagnes, d'Olympia, c'est à dire, d'une adultere ; & pour auoir sujet de comparer le Roy à Alexādre : regarde , à qui tu compare sa vertueuse Mere.

Page. 74. Tu vas sur les brisées de ce venerable aucteur, auquel tu as desrobé beaucoup de choses : mais c'est que tu as eu honte de les voir si mal vestuës, que tu as eu enuie de les habiller vn peu plus honnestement. Tu reproches à la Reyne ses grands biens : nous auons respondu à cet article ;

auquel nous adjouſtons , que la Reyne ayant apporté en France la moitié plus que les autres Reynes, ayant eſpouſé Fille vn Roy de cinquante ans, elle a eu quelques auantages, outre ceux que la Naiſſance du Roy, & la conſeruation de l'Eſtat durant la Regence, luy ont acquis. De ſon eſpargne, & avec l'aide du Roy, elle a fait baſtir le beau Palais de Luxembourg, que tu monſtres comme le teſmoignage d'une felicité qu'elle n'a paſcogneu; mais c'eſt vn preſent pour le Roy, & vn monument à la poſterité de la grandeur d'une Princeſſe ſortie de la maiſon magnifique de Florence. Le Cardinal a fait vn baſtiment à Richelieu, qui a autant couſté avec ſes deſpendances, que Luxembourg avec ſon petit clos: celui-là a eſté dreſſé, orné, & accompagné de belles terres acquiſes par le ſang du peuple, & il n'en reuient rien au Roy; ce que tu ne trouues pas mauuais, parce que tu n'eſ pas payé pour cela, comme pour faire paroître laid tout ce que la Reyne a fait de beau.

Tu as encore plus grand tort de luy repro- Pag 750
cher les bien-faits du Roy; comme s'il les pou-
uoit mieux loger que dans le cœur qui luy a
donné la vie: tu aurois plus de ſujet de dire, que
ſa Maieſté ignore qu'on aye retenu ſans forme de
Juſtice & ſans crime, non ſeulement les gratifi-
cations que la Reyne ſa Mere receuoit, mais les
reuenus de ſa dot & de ſon doüaire, qui ſont cho-
ſes ſaintes & ſacrées, qui ne peuuent eſtre rauies
que par la mort, ou par vne condamnation publi-
que. Les enfans doiuent l'entretien de la vie à

ceux desquels Dieu a tiré la leur : les Roys sont hommes, ils viennent au monde comme les autres; & il n'y a point de Dignité qui les exempte de rendre les devoirs naturels. Le Roy peut croire que la Reyne sa Mere est priuée de ses bien-faits, mais il ignore qu'elle soit despoüillée du bien qu'elle auoit deuant que le feu Roy fust son Mary, & sa Majesté son Enfant. Il semble que ces belles qualitez d'Espouse & de Mere des Roys luy doiuent plustost augmenter que diminuer ses rentes. C'est vn scandale, qu'un seruiteur qui a adjousté de si grands biens aux petits de sa maison, par la liberalité de sa Maistresse, luy rauisse ce que la Naissance luy a donné : qu'il fasse tout d'un coup tarir la fontaine, dans laquelle il a puisé vne bonne partie de ce qu'il a, pour rendre, s'il pouuoit, la plus pauvre Dame de Frâce, celle qui l'a fait le plus riche Prelat de l'Europe.

Après ce discours vient ta digression, dans laquelle tu t'efforces de monstrier, qu'il faut preferer le salut du public, non seulement aux contentemens, mais au salut des siens : tu te sers de ce meschant exemple que des Montagnes auoit apporté : ie ne sçay pas ce que tu veux inferer des feueritez & cruantez que tu allegues, & que ie n'ose point redire. Ie t'aduertis seulement, que tu es obligé de conuaincre les personnes auxquelles tu imposes des crimes, qui approchent de ceux qui ont esté chastiez par des considerations de Religion & d'Estat, capables d'arrester le cours de la nature. Nous t'asseyurons au contraire, que ceux qui la veulent faire perir par

le pretexte specieux de la Religion & de l'Estat, sacrifient des innocens à la ruine de l'une & de l'autre, dequoy ils sont cōuaincus par leurs actiōs publiques; là où ceux que tu calomnies n'en peuuent estre iustement soupçonnez, pour les plus secrettes qu'ils ayent iamais fait.

Tu es en belle humeur, lors que tu cherches les raisons pourquoy les biches ne portent point de bois: en quoy tu monstres ton imprudence d'auoir mesdit du sexe puissant en France, sur tout à Paris, & mesmes, à ce qu'on dit, apres de celuy qui t'employe. La raillerie de Louys XII. estoit vn peu desauantageuse aux Dames: mais elle ne touchoit pas d'auantage la Reyne sa femme, que les autres.

Ie ne te repartiray rien sur le massacre de Blois, que tu dis auoir esté caché à la Reyne Catherine: ie croy qu'on a satisfait sur cet article en la Responce au Sieur des Montagnes, duquel tu as tiré vne mauuaise consequence: laquelle estant ambiguë, & fort embarrassée, ie mettray icy tes paroles, pour t'obliger à les expliquer: Pag. 80
La derniere fut l'exécution de Blois, dont il luy communiqua si peu le dessein, que le desplaisir d'auoir pluſtost ſçeu l'euenement que le proiect d'une action que le Cardinal de Bourbon luy reprocha, la porta dans onze iours apres au tombeau: & c'estoit ce que le Roy pouuoit faire à la sienne; Nous ne ſçauons si tu veux dire, que le Roy deuoit faire mourir sa Mere de desplaisir ou autrement; ou que tout ainsi que le Cardinal de Bourbon dist à la Reyne Catherine, qu'elle auoit approuué le mal qui auoit esté

fait (ce qui est par ton tesmoignage contraire à la verité) aussi que le Cardinal de Richelieu a deu persuader au Roy (pour ietter dans vn regret mortel la Reyne sa Mere) qu'elle auoit (comme tu escriis) *traversé les affaires d'Italie, & entreteins des intelligences où l'on l'auoit engagée.* Tout ce que ie peux tirer de l'obscurité de ton discours, est, qu'en tout sens il est tres-malicieux; que sur des impostures en l'exemple, & en l'application, tu dōnes vn conseil pernicieux & detestable. Il me semble aussi, que si tu dis de la Reyne Catherine, qu'elle ne sçeut pas le dessein du meurtre de Blois, ce qui va à la descharge de sa reputation; aussi que tu le rapportes sans iugemēt contre toy mesme, & que tu l'employes hors de propos contre la Reyne mere du Roy.

Pag. 82. & 83. Mais on ne te sçauroit pardonner ce que tu dis, *que le Roy vsa de toute sorte de remonstrances & de prieres, pour disposer la Reyne sa Mere à se departir de ses intelligences.* Nous ne voulons, pour contraindre d'imposture celuy qui t'a baillé ce memoire, & toy qui le fais valoir, que la tres-bonne cōscience du Roy, & sa cognoissance qui n'oublie rien. Sa Majesté sçait bien, qu'elle n'a point vsé de ces paroles; parce que les actiōs de la Reyne Mere ne les ont iamais prouoquées: & nous prions bien fort celuy qui te fait trauailler, de te commander de publier les preuues qu'il a de ces intelligences, qui sont à la verité celles des Philosophes; c'est à dire, inuisibles esprits, illusions & fantasmes, qui n'ont point de corps, s'il n'est semblable à celuy que prennent les lūins.

Tu donnes du nez contre la grande pierre d'achoppement, qui est la detention à Compiegne: tu dis (pour parler à la mode) *que c'estoit vne separation pour vn peu; & apres, qu'on retrancha à la Reyne la communication avec ceux qui l'auoient portée à des extremitez.* O Dieu, que ce peintre adoucit ses pieces! mais elles sont tellement plates, qu'on n'y peut remarquer aucun traict, qui releue la verité. *Cette separation pour vn peu a duré cinq mois: c'est beaucoup pour vne Reyne innocente, & pour vne bonne Mere.* Ces rigueurs ne finissoient pas avec ce temps; puis que la resolution qui fut apportée par le Marechal de Schomberg, alloit à plusieurs années: il ne traittoit de le part de sa Majesté, que pour disposer la Reyne à prendre vne retraite plus esloignée & plus rigoureuse que n'estoit sa prison. Vous la niez, & confessez, en disant par vne contradiction manifeste: *C'estoit vne simple separation, & on luy osta les gardes trois mois apres.* C'est signe qu'elle en a eu: donc elle estoit detenuë. Ce retranchement de communication, que vous dites, alla iusques à fouiller les domestiques, à les faire conduire par des Soldats deuant vn Marechal de France, à mettre des corps de garde sous les fenestres de la chambre de la Reyne, & à ne permettre point que personne approchast d'elle, qui fust suspect au Cardinal: il changea le Gouverneur de Compiegne pour en mettre vn à sa deuotion: il logea vn regiment autour du chasteau, & corrompit quelques personnes pour luy seruir d'espions aupres de la Reyne.

C'est icy où tu commences à estaler les exemples des Reynes, ou méchantes, ou mal-heureuses: ce qui me donnera sujet de ramasser en cet endroit tous ceux qui sont épars çà & là dans ton liure; qui est, pour dire vray, plustost vn lieu commun d'histoires, qu'un discours de bonne suite. J'auois resolu vne fois de les éluder par le mépris, estant assuré que les sages, qui sont ceux auxquels nous voulons satisfaire, iugeront qu'elles n'ont point de force, que pour môstrer, qu'en tout temps il y a eu des Reynes Meres, & femmes affligées avec iustice, & avec injustice; ce qui ne rend pas criminelles les innocentes, & ne fait pas innocentes les criminelles. Vne personne ne scauroit estre blasmée, que pour le mal qu'elle a fait: on ne peut apporter contre nous que nostre mauuaise action, pour donner quelque soupçon que nous en auons fait beaucoup de semblables. Mais les fautes d'autrui ne sont point nostres: elles ne peuuent estre employées que pour disposer les esprits foibles (qui prennent les exemples pour des raisons) à faire vn mauuais iugement: elles sont aussi comme les peintures, qui ne laissent pas de donner des vilaines pensées, encore qu'elles ne représentent bien souuent que des fables. Cela seroit suffisant pour renuerfer toutes les Histoires, que tu as recueilli avec tant de soin pour enfler le cayer de frais, & augmenter la dose de ton ordonnance: tu serois digne de compassion pour la peine que tu as pris, si tu ne meritois la punition pour les choses que tu as faussemēt conté & malicieusement inuenté, adiousté, & roigné.

Tu ne te peux excuser, qu'en disant, que ton ignorance ou ta paresse ont fait que tu as crû à quelque compilateur d'exemples, quit'a abusé, & t'en a vendu pour ton argent, comme tu fais au Cardinal pour le sien, ou plustost pour celuy du Roy : où bien il faut dire, que Dieu a permis, qu'estant calomniateur en tous les faicts que tu imposes à la Reyne Mere du Roy, tu as esté menteur en toutes tes Histoires vieilles & nouvelles, affin que tu sois imposteur en tout.

Pour te faire cognoître que ie suis, tant que ie peux, d'estre semblable à toy, ie rapporteray fidellement tous tes exemples, & les rangeray par nations. Pour commencer par la nostre, il me semble que tu trouues dans nos Annales trois mauuaises Meres; Elisabeth de Baviere, femme de Charles VI. Louyse de Sauoye, Mere de François I. & de Catherine de Medicis.

Tu dis de la premiere, que Charles septiesme son fils, estant encore Dauphin la fit conduire à Blois, & de là à Tours; & comment au Connestable d'Almaignac de luy prendre ses ioyaux, iusques à ceux là mesmes qu'elle auoit mis en dépost dans les Eglises. Il n'est pas vray que le Dauphin fit esloigner sa Mere, mais la fantasia de Charles son Mari, qui auoit perdu l'esprit, & estoit en tutelle. Il alloit au bois de Vincennes voir Elizabeth, & rencontrant yn sien Gentil-homme, qui se contenta de saluer le Roy en courant; ce pauvre Prince s'imagina, qu'il y auoit quelque grand mal caché sous cette sottise: ce qui le porta à faire ietter dans l'eau ce mal-heureux courier, & à releguer sa femme à

Da
Hail.
lan li.
20.

406 *Aduertissem.de Nicocleon à Cleonuille*
Blois , & à Tours : elle y estoit en liberté ; ainsi
que nous pouuons apprendre par l'Histoire, qui
nous enseigne , que le Duc de Bourgogne la
trouua à la Messe à Marmoustier. Je ne veux
pas iustifier toutes les actions de ceste Princeesse,
quia esté tenuë pour malicieuse : mais ie dis, que
ce qui luy arriua par la folie de son Mari , ou
(comme dit du Haillan) par la meschanceté de
ceux qui le gouuernoient , n'approche en rien
de ce que nos iours ont veu , ny du pretexte qui
a esté pris , ny de l'innocence de la Reyne Mere
du Roy. Le Connestable d'Armaignac , fauori
de ce temps-là , fit piller les bagues d'Elisabeth ;
comme le Cardinal a fait inuentorier les meubles
de la Reyne Mere du Roy, & luy retient son bien :
mais tu peux sçauoir , que cette entreprise fut
cause quelque temps apres de la mort du Con-
nestable, qui estoit vn homme violent & malin.
On te peut dire aussi, que ce temps de misere &
de confusion, dans le renuersement du cerueau
d'vn Roy, ne doit point fournir d'exemple pour
regler les actions d'vn Prince sage , & d'vn Re-
gne paisible. Que si dans celuy-là on trouua fort
estrange la prison du Frere d'vne Reyne peu
auisée, qu'auroit-on dit, si on eust veu la deten-
tion d'vne Reyne innocente , & tres-bonne
Mere ?

Ton second exemple est celuy de Louyse de
Sauoye : tu dis sans autheur , en ayant cité en
tous les autres exemples , qu'elle desespera Char-
les de Bourbon , pour auoir reffusé de se marier avec luy :
comme si les Meres des Roys estoient obligées

sur son aduertissement aux Prouinces. 407
de raualler leur condition , d'abandonner leurs
Enfans , & de leur donner des sujets de mespris,
de peur de fascher ceux qui les recherchent. Tu
leur voudrois imposer vne necessité , qui ne sert
point de loy aux moindres vefues des Bourgeois
& artisans : mais ta raison est fausse, & contraire
aux aduis de tous nos

Historiens. Je ne veux
alleguer que l'autorité
d'un homme ; qui est
seruiteur du Cardinal ,
& plus veritable en
beaucoup de choses que
toy , qui es menteur en
tout.* C'est du Chesne,
lequel en son Histoire
d'Angleterre dit avec
les plus anciens, que le
Connestable fut irrité
par la perte du procez,
que Louyse de Sauoye
auoit intenté contre luy
touchât la succession de
Susanne de Bourbon : ce
qui fut vn sujet assez
foible , pour luy faire
prendre les armes cōtre
son Roy. Pour ce que
tu dis de Lautrec, qu'il
estoit mal traicté par la
mesme Reyne , & que
cela ruina les affaires

* Du Chesne liure 20.
de l'Histoire d'Angle-
terre : Charles de Bourbon
Connestable de Fraece, irri-
té du procez intenté contre
luy par Louyse de Sauoye
Mere du Roy , touchant la
succession de Madame Su-
sanne de Bourbon , vint
mesmes à s'oublier telle-
ment, qu'il prit les armes
pour l'Empereur à l'encon-
tre du Roy son Maistre.

Belleforest liure 6. de
la Vie du Roy François
dit, que ce procez intenté
par l'aduis au Chancelier
du Prât fut cause du mes-
contentement de Charles.
Il dit aussi, qu'il se despit-
ta, parce que dans la dis-
tribution des Gouvernemens
de France, le Roy François,
ne luy en auoit point donné.

d'Italie, tu l'as inuenté sans produire aucun tesmoing; de peur qu'on ne l'examina, comme on a fait les autres que tu as cotté.

La troisiésme mauuaise Mere de nos Roys est, à ton aduis, celle que des Montagnes a chargée de grands crimes, par le tesmoignage des Vies de Sainte Catherine & de Saint Nigaise, & par l'Histoire d'Aubigny, trois liures excellens, & dignes des Escriptuains du Cardinal. Tu as eu honte de les nommer, & nous as donné dans la veüe

Thuanus Historiarum lib. 57. <i>Matrem ipsam honesto Regis Poloniae in Regno nouo inuiscendi co- lore, à se ablegare con- stituerat, &c.</i>	par l'esclat de ce grand President de Thou, qui a dit, que Charles neufes- me quelque temps deuant sa mort auoit voulu enuoyer sa Mere en Polongne, sous pre- texte d'une negociation
---------------------------------------------------------------------------------------------------------------------------------------------------------------------	---------------------------------------------------------------------------------------------------------------------------------------------------------------------------------------------------------

d'importance : mais que c'estoit en effect pour s'en deffaire. Il est vray que ce bon Historien a escrit quelque chose de ce que tu dis, & que le dessein du voyage venoit de la curiosité d'une femme, & de l'affection d'une Mere qui desiroit de voir son Fils dans son nouveau Royaume. On iugera par le discours qui est rapporté fidèlement, que si Charles I X. auoit eue cette volonté d'esloigner sa Mere pour quelque temps, il auoit intention, qu'elle reuint apres qu'il auroit ruiné les maisons de Guise & de Montmorency, qui estoient, à son aduis, trop puissantes, & le troubloient par leurs querelles particulieres. Mais outre que personne ne peut asseurer que le Roy eust arresté ces choses, des-

quelles on ne parle que par coniectures; que peut auoir de semblable cette pensée, ou mesmes vne parole dite en cholere, avec ce qui est arriué par effect à la Reyne Mere du Roy? Elle n'a iamais donné soupçon d'estre inegale & injuste en ses affections, dans lesquelles S.M. a tousiours eu ce qu'un aîné peut & doit pretédre, & vn Roy meriter. Que ne proposez vous à ce Prince, sage & craignât Dieu, vn bon & asseuré exéple de Charles IX. plustost qu'un mauuais, fondé sur quelque petit dépit ou apparence legere? Representez luy ce que ce Roy dit deuant que de rendre l'esprit à Dieu; auquel temps on découure les plus sincerés & meilleures intentiōs.

Thuanus Hist. lib. 57.

L'Historien que vous citez, rapporte les dernieres paroles du Roy Charles, & asseure qu'apres qu'il eut embrassé & baisé sa Mere, qui auoit beaucoup merité en son endroit; il luy recommanda son Espouse qu'il aimoit vniquemēt, sa Fille, & son Royaume duquel, quelques iours auparauant, il l'auoit declarée Regente, iusques à ce que son successeur fust venu de Polongne.

Quibus dictis, Regina, vt optime ac de se egregie merita Parenti, post arctissimos amplexus valeauit, commendatâ Vxorē, quam vnice diligebat, & Filiolâ ex ea suscepta, ac postremo Regni cura.

Rex agnitudinem suam causatus, qua fieret vt rebus suis superesse non posset, curam negotiorum in Matris manus vt dignissima resignasse se dicebat, &c. donec Rex Polonia in Galliâ adueniret.

On pourroit dire aussi, que ce Prince mourut dans vn dessein qui n'est pas celuy de cette saison.

410 *Aduertiffem. de Nicocleon à Cleonuille*

Il auoit recogneu les mal-heurs qui estoient arriuez à son Estat , pour auoir osté la cognoissance de plusieurs affaires aux Parlemens. Il iugea, mais trop tard, que c'estoit vn moyen pour retenir les Grands en leur deuoir, les fauoris en modestie, les peuples dans l'obeissance, & pour acquerir la reputation du Prince Iuste, de laisser leur pouuoir aux Cours souueraines. Il auoit appris par l'experience, qu'il ne faut iamais quitter les chemins ordinaires de la Iustice, pour se ietter dans celuy des Commissaires; qui ne sçauroient estre si gens de bien, qu'on ne les soupçonne d'estre Ministres des passions de ceux qui sont en auctorité, parce qu'ils les choisissent. Venons aux exemples des autres Princesses, & commençons par les Imperatrices, qui ont esté nos Reynes.

Annales rerum gestarum à Ludouico Imperatore : *Vxorem autem Landuni esse, & in Monasterio sanctæ Mariæ includi voluit.*

Belleforest Historien de Cleonuille, liure 2. de la Vie du Debonnaire, dit : *Louys voyant qu'il estoit comme David persecué par son fils Absalon, il tascha de sauuer son Espouse; & pource il l'envoya à Laon en l'Eglise*

Tu en proposes vne, croyât auoir trouué vn tresor, lors que tu la fais rencontrer prisonniere à Compiègne, & plus estroittement reserrée, que n'a iamais esté la Reyne Mere du Roy. C'est Iudith, que ton ignorance te fait nommer Reyne de la secōde race; parce que tu n'as point sçeu, que c'estoit la seconde femme de Louys le Debonnaire Roy de France, & Empereur

pereur , & fille du Duc Welphe de la maison de Bauiere. En cet exemple ie te veux monstrier que tu es le plus effronté imposteur , le plus malin escriuain ; ou si on te veut descharger de ces crimes , le plus temeraire & ignorant, qui aye iamais employé les imprimeurs : & parce que i'ayme mieux par charité Chrestienne te donner les dernieres qualitez, que les premieres ; ie t'enseigneray ce que i'ay leu dans les Historiens, qui ont escrit la vie de Louys le Debonnaire. Ils disent tous, que Lothaire & Pepin ses enfans de la premiere femme, & Princes desnaturez, ayant pris les armes contre leur bon Pere , accuserent leur belle Meré , tres-vertueuse Princesse , d'auoir commis adultere avec vn nommé Bernard,

& Monastere dedié à nostre Dame; & apres en l'enuoya en Italie, en la cité de Terroune , au pays Lombard.

Le mesme est dit par Matianus Scotus.

Annales siue Gesta Francorum incerti Auctoris, anno 834. Post iudicio Episcoporum arma deposuit, & ad agendam pœnitentiam inclusus est: vxor in Italiam ducta: proximaque æstate ipse relaxatus, arma resumpsit, vxorem recepit.

Theganus de Gestis Domni Ludouici: Supradicti impij, scilicet Pipinus & Lotbarius, obicientes ei multa contraria, dixerunt Iudith Reginam violatam à quodam Bernardo, mentientes omnia, eamq; vi velantes, & in Monasterium mittentes. Ludouicus ipse inclusus

412 *Aduertiff. de Nicocleon à Cleonuille*

*Compendij in Monasterio.
Tunc impletum est elogium
Ieremia : Serui dominati
sunt nostri.*

fileul & parent de l'Empereur. Ils le forcerent de mettre sa femme dás le Monastere , non de Compiegne , comme tu dis , mais de nostre Dame de Laon , ou de Se. Ragonde de Poictiers, au mesme temps qu'ils arresterent leur Pere prisonnier, le tondirent & enfermerent dás l'Abbaye de saint Cornille à Compiegne. La femme fut la seconde fois conduite à Tortonne en Lombardie, où elle demeura sept ou huit mois , iusques à ce que Louys, qu'on auoit mené de Compiegne à S. Denis, fut remis dans le thrône Imperial: auquel temps deux Euesques, par l'ordre du Pape Gregoire 4. ramenerent Iudith à son Mary , qui la receut avec grâde ioye, & la recogneut innocente. Bernard offrit le combat (selõ la coustume du tẽps) à ceux qui

Theganus : Postquam prænauit Imperator, misit fideles suos Legatos in Italiam, ut reducerent coniugem suam sapè mendaciis afflictam : qui venientes susceperunt illam honorificè, & perduxerunt illam cum incunditate & letitia

Pauoiet accusée: person-
ne ne se voulut battre
contre luy ; & chacun
aduouia que cette Prin-
cesse , très-innocente , & très-sage , auoit esté
persecutée par ceux qui croyoient qu'elle vou-
loit auancer Charles le Chauue son Fils à leur
preiudice. Tu monstres bien que tu n'as iamais
leu ny Thegan , ny Nitard ; tu te contentes aussi
de mettre leurs noms à la marge : outre que ces
deux Historiens deschargent entierement la re-
putation de Iudith ; ils disent qu'elle fut releguée
à Tortône, non à Compiègne , où tu la renfermes
si estroitement. De mes-
me aduis sont l'Auuteur
des Annales de Louys
le Debonnaire, Martia-
nus Scotus , celui qui a
escrit les actions des
François : ton Bellefo-
rest , & Papyrius Mas-
sonius , qui a recueilli
cette Histoire de tous
les anciens Auuteurs
Allemands & François,
qui me fournissent trois
moyens de faux contre-
toy. Le premier est, que
tu as (sauf le respect de
ceux qui liront cet es-
crit) impudément men-
ti dans le rencontre de

*ad presentium Principis,
qui erat tunc temporis in
Aquisgrani palatio.*

*Vita Ludouici Pij in-
certi Auctoris coetanei:
Lotharius in Monasterio
S. Medardi Patrem sub
arcta custodia esse praece-
pit: Vxorem eius Landunē
in Monasterio sancta Ma-
ria consistere voluit.*

*Ipse autem Aquisgranum
peruenit ; ibiq; Iudith
Augustam, ab Italia reda-
centibus Ralhaldō Episco-
po & Bonifacio, recepit.*

Nitardus Angilbertus : *Iudith in Longobardiam in exilium mittitur. Interea hi qui Iudith in Italiâ seruabant, audientes quod Lotharius fugam inierat, & Pater Imperium regebat, Aquisgranum prosperè perueniunt, gratum munus Imperatori deferunt.*

Papyrius Massonius lib.2. *Impudicitie crimen diluit sacramento.*

malice, qui te deuoient porter pour trouuer quelque chose de remarquable à Compiègne à escrire : que tout ainsi que Ieanne la Pucelle fut prise en ce lieu-là, & bruslée à Roüen, par la sentence d'un Euesque traistre à la France, qu'elle auoit courageusement serui ; ainsi que par l'aduis d'un Prelat de ce temps, plus corrompu que celui-là, il failloit condamner à mort celle qui a dans sa Regence conserué le Roy, & l'Estat. Ta seconde faute est, que tu compares la Reyne Mere du Roy avec vne Princesse renuoyée en Italie, sur vne accusation, quoy que fausse, d'impudicité. La troisieme, que tu veux iustifier le Roy, en disant qu'il a traité sa Mere, comme les Princes les plus detestables qui soyent iamais sortis du Sang de France firent leur marastre. Tu dois sçauoir, qu'en ce mesme temps

Côpiègne. Pour mieux adiufter tes exemples, tu as dit qu'une Reyne ne se pourmenoit pas, qui alla de Laon en Lombardie, & reuint à Aix la Chappelle, dans vn an. Le Cardinal eust bien voulu, que la Reyne Mere du Roy eust fait la moitié de ce voyage. On a descouvert son dâssein aussi clairement comme on voit ton ignorance &

ils enfermerent dans vn Cloistre celuy qui a porté la qualité de Prince & Pere debonnaire , iusques à l'excez qui prouoque les iniures : mais pour ces deux enfans , ils meritent les titres de cruels & maudits de Dieu , ayans esté non seulement pour ce crime , mais pour toute sorte d'autres meschancetez, des monstres de nature. Tu ferois mieux, à mon aduis, de proposer à sa Majesté l'exēple d'un bon Prince, duquel il porte le nom, qui fut Louys, le troisiéme Fils de cet Empereur, qui demeura, contre les poursuites & menaces de ses freres , dans le respect & seruice de son Pere : ce qui luy acquist la benediction de Dieu, la louange des hommes , & l'Empire. Que si tu voulois faire vn beau rapport , tu deuois comparer le Cardinal à Hebo , & luy faire l'Apostrophe que fait Thegan à ce Prelat, qui fut cause de l'emprisonnement de Louys le Debonnaire, qui l'auoit auancé. Il luy Theganus : *Vestiuisti te* dist : Il t'a reuestu de *purpura & pallio* , & tu pourpre , & tu luy as *eum induisti cilicio* : ille mis le cilice sur le dos: *pertraxit te immeritum ad* il t'a logé sur le thrône *culmen Pontificale* , tu eum ne de l'Eglise , & tu *falso iudicio voluisti expellere à solio Patrum suorum.* Pas osté de celuy de *Crudelis, cur non intellexisti præcepta Domini, Non est seruus supra Dominum suum, &c. Crudelis, quis consiliarius fuit, aut ductor tuus ? nonne ille, qui est super omnes filios superbia?* l'Empire. Cruel & ingrat , tu n'a pas obey au commandement de Dieu , qui a dit : *Le ualeat n'est pas au dessus du Maître.* Qui t'a cōseillé le mal que tu as fait ?

216 *Aduertis. de Nicocleon à Cleonuille.*

c'est, sans faute, celuy qui est le prince de tous les enfans d'orgueil. Voylà vne leçon faite au Cardinal, il y a huiët cens ans.

Venons aux Histoires d'Espagne; dans lesquelles tu n'es pas plus sçauant, & plus fidele, que dans celles d'Allemagne. Tu ne peux fuir ces blâmes, qu'en declarant que tu es preuaricateur en la cause que tu defens, & traistre à celuy qui te paye. Au lieu de rechercher des exemples pour luy, tu en as rapporté contre luy, comme sont tous ceux dans lesquels on voit ou la punition des Roynes impudiques, ou ce que le vice des mauuais enfans, & les impostures des fauoris ont fait souffrir à des Princes vertueuses. Tu peux prouuer aussi que le scandale, qu'on a veu depuis peu en France, est arriué autrefois parmi toutes les nations de l'Europe; non pas si grand, mais en quelque façon approchant de celuy de nos

iours. Le premier entre les Espagnols est d'Vrraque, heritiere de Castille, & femme d'Alphonse II. Roy d'Aragon, surnommé le Gras: laquelle ne fut pas releguée ny emprisonnée par son Mari; au contraire, elle le chassa de Castille, & s'en rendit Maistresse, au moins d'une bonne partie. Il est vray, qu'elle osta

Alphonsus II. cognomento Crassus, fuit in fratribus animo non satis fraterno aut liberali; et illis & sororibus satisfacere, Summi Pontificis interminationibus & sacrorum interdictione coactus. Duardus Nonnius.

son bien à Ansure, Gentil hōme tres-vertueux, & grand seruiteur d'Alphonse, parce qu'il fauoit tantée pour ses horribles & publiques impudicitez : ce qui porta son Mari à la vouloir repudier, sous pre-
texte de la parenté. Mariana que tu as cité, rap-
pelle l'eternel des-bonneur de l'Espagne : dit qu'elle mourut au chasteau de Saldaine, en accouchant d'un bastard. Il rapporte aussi l'opinion de ceux qui assurent, qu'entrât dans l'Eglise de Saint Isidore, apres auoir pillé les tresors qui y estoiet, & mis ses mains

Mariana lib. 10. cap. 8.

*Ansurium diuione paterna
euerit ; quod grauissimè
viri increpationes, ob malè
rectas libidines, ferre non
poterat, &c.*

*Pudicitiam sanè, dum
vixit, baud satis honestè
habuit : in Saldania arce
ex partu extinctam ferunt,
aterrū Hispania dedecus ;
alij, cū thesauros D. Isi-
dori exportasset, in ipso
templi limine raptis visce-
ribus, manifesta Numinis
vindicta, expirasse.*

sacrileges sur les saintes Reliques, par vn iugemēt espouuantable de Dieu elle creua à la porte, & ses entrailles tomberent en terre ; comme celles de l'ingrat Iudas, lors qu'il se pendit, apres auoir trahi son Bien-faicteur & son Maistre. Il n'y a point d'apparence qu'on doie comparer le Cardinal à Ansure, qui estoit homme de bien. Tu approcherois d'auantage de l'Histoire du tēps, si tu disois qu'un nommé Ander fut tué par le commandement de Iean I. Roy de Portugal,

418. *Aduertiff. de Nicocleon à Cleonuille.*

pour auoir fait des faulſes lettres, par leſquelles il vouloit perſuader au Roy (comme a taſché de faire le Cardinal) que ſon Frere Fernand le vouloit faire mourir, pour auoir ſon Royaume; & que ſa Mere Eleonor, qui auoit avancé le ſcelerat Ander, en eſtoit cōſentante. Cette calomnie porta Iean à ſ'aſſeurer de la perſōne de ſa Mere, iuſques à ce qu'il euſt recogneu ſon innocence. Voyla ce qui approche plus de ce qui eſt arriué depuis peu, & de lettres qui ont eſté faulſemēt attribuées à vne grande Dame, que tout ce que tu eſcris.

Apres't'eſtre rendu criminel, & puniſſable de mort, pour auoir cōparé la meilleure Mere de la terre, à la plus mauuaife femme qu'elle aye iamais porté; tu prens dans la meſme Hiftoire d'Eſpagne l'exēple d'une Princeſſe vertueuſe, que tu veux faire paſſer pour meſchante. C'eſt Violās, ou Iolans (non pas Violente, comme tu dis, pour faire vne alluſion malicieuſe) elle eſtoit Reyne de Caſtille, femme d'Alphonſe X. & fille de Iacques I. Roy d'Arragō. Ie ne me veux ſeruir que de ton aucteur.

Mariana Rerum Hiſpaniæ lib. 10. cap. 9. *Alphonſi animus angebatur, procreanda ſobotis cura præcipua: aſſentatores, quorum in aulis Principum magnus eſt numerus, diuelli id coniugium poſſe diſputabant. Iacobus pater ad arma venit; ſed*

Mariana, que tu n'as iamais leu, ou tu eſ bien malin. Il eſcrit, que Violans fut quelque tēps mariée ſans auoir des enfans; & qu'Alphonſe, à cauſe de cela, la voulut repudier, pour eſpouſer Chriſtine fille du Roy de Danne-marck: mais comme on

la conduisoit en Espagne, Violans se trouua grosse ; dequoy son Mary fut grandement iatisfait, & en eut cinq fils, & quatre filles. Il est vray que ce Prince, qui fut depuis esleu Empereur, s'abandonna à toute sorte de vices : deuint mauuais mari, plus mauuais pere, & tres-mauuais frere, ayant fait assassiner Frederic, qui n'estoit pas frere de sa femme (comme tu dis) mais le sien propre.

Après cela il chassa son fils Sanctius, emprisonna sa femme, deuint cruel, furieux, & blasphemateur contre Dieu. Ces crimes porterent les Castillans à luy oster le Gouuernement du Royaume, duquel il fut iugé incapable. Son Fils fut mis en sa place, & Violans se retira pour mener vne vie sainte dans Burgos : où elle mourut chargée d'années, & de merites. Mariana remarque, que deuant son decez la terre trembla, & on remarqua des grands prodiges au Ciel ; comme si le bon-heur de l'Espagne eust abandonné le pays avec ceste Sainte Princesse.

Ces deux exemples sont des Reynes mal trai-

magni belli motus latissimò exitu mutatus est : Regina vterus sensim intumescere visus est, ac paulàm gravidam esse perceptum : insperata re percussus Regis animus, odium amore mutauit.

Fratrem suum interfecit, filium rebellum effecit, Regno pulsus est ob blasphemias in Deum. lib. 14. capite 5.

tées par leurs Maris, mais vne iustemēt, & l'autre iniustement : & ne peuuent estre appliquez à vne Reyne Mere, qui reçoit du mal par le moyen de ceux qui abusent du nom & de l'autorité de son Fils. Vous luy deuriez proposer l'exemple de Pierre Roy de Castille, qui receut des grandes benedictions de Dieu pour auoir aymé & honoré sa Mere; ou celuy de Fernád Roy du mesme pays, qui fut tres-heureux & vainquit tous ses ennemis tant qu'il respecta sa Mere qui s'appelloit Marie, & auoit esté la Regente : on remarqua que ses affaires allerent en desordre, lors que l'intelligence ne fut pas si estroite. Que ne dites-vous aussi, que Sanctius Troisième, surnommé le Desiré, imita Pompée Roy d'Armenie en la tendresse d'affection enuers son Frere, apres l'auoir vaincu plus par courtoisie que par armes ? Au lieu de cueillir dans les liures ces belles fleurs pour les offrir au Roy, & porter les choses à la reconciliation & à la Paix, vous ne faites vos extraicts que des violences & cruautéz, emprisonnemens, empoisonnemens & massacres des plus proches, pour tascher de disposer le Roy à imiter ceux qui s'en sont seruis. Mais la force de son bon Sang, & de la crainte de Dieu, qui ont plus de puissance sur son ame que vos discours & que les conseils du Cardinal, ne scauroient souffrir, que ce tu escrits, & que ton Maistre dit, produise l'effect qu'il desire.

Je viens aux Histo-

Rogierius de Houeres Angloises. La premiere : *Emma hirmis initio* miere est d'Emme Mere

San-
ctius
Histor.
Hispa-
nia.
Part. 4.
cap. 8.

San-
ctius
3. Parte
cap. 32.

d'Edouard , que tu dis *sine misericordia expellitur*
 auoir esté emprisonnée par *Anglia, quæ rate mox pa-*
 son Fils: pour dōner plus *ratæ in Flandriam trans-*
 d'apparence de iustice à *uebitur, & à nobili Comite*
 ceste action, tu appelles *Baldwin cum honore sus-*
 ce Roy le Confesseur. Il est *cepta est: is, ut talem virum*
 vray , que l'opinion du *decurt, quandiu necessitas*
 peuple luy a donné ce *poposcerat, ei necessaria*
 nom: parce qu'il vesquit *gratanter ministrari cura-*
 en celibat, estant marié. *uit.*

Je laisse à part, qu'il y a
 des * Historiens qui di-
 sent qu'il ne le meritoit,
 pas: premieurement parce
 qu'il se laissa conduire
 par les passions & mau-
 uais aduis de Godouuin

* Guilelmus Malmes-
 burgensis de Gestis Re-
 gum Anglorum lib. 2.
 Camdenus.

son beau bere, homme
 meschant, & qui auoit
 tué Alfhred son frere.

Polydorus Virgilius
 lib. 8. Emma sanctissima
 femina bonis omnibus spi-
 liatur, impulsore Go-
 douuina.

En second lieu , parce
 qu'il fut ingrat enuers sa Mere , qui l'auoit aymé
 tendrement, & garanti des poursuites de Ha-
 rollus , que Camdenus appelle vsurpateur, ayant
 esté auparauant Maistre d'Hôtel de Canut : les
 autres disent, qu'il estoit son Fils d'une premiere
 femme, appelée Elfgina, ou Elduina ; & qu'a-
 yant osté la Couronne à son Pere, il chassa sa
 belle Mere avec son enfant. Ce Prince fut esleué
 par le soin de Guillaume le Bastard Duc de
 Normandie : lequel, après qu'Harold eut esté
 tué, & son corps ietté dans la Tamise, ayda

Edouïard pour recourir son Royaume ; qui déclara Guillaume son successeur , en recognoissance de ce bien-fait. La Mere qui auoit sauué son enfant , & qui l'auoit grandement assisté pour le remettre dans ses Estats , fut relegué par les artifices & calomnies de Godouin , qui l'accusa faussement d'impudicité , comme il parut le miracle que Dieu fit. Son Fils (qui tesmoigna en cela son mauuais naturel) luy permist de se purger

Du Chesne liure 10. Duquel miracle le Roy fort estonné , luy rendit du depuistoute sorte de bons & pieux deuoirs.

Polyd. Virg. lib. 8. *Super ignitos vomeres incessit illæsa : quo miraculo Rex commotus , mira pietate post hac Matrem coluit obferuantique : pacem per 19. annos habuit.*

dix-neuf ans en paix par la benediction de sa Mere ; que Polydore Virgile appelle tres-sainte. Voy-là ton premier exemple Anglois , par lequel tu fais voir , que tu recherches des Reynes separées de leurs Enfans par soupçon , ou calomnie d'impudicité : & si dans toute la vie d'un Roy

par le feu , ainsi qu'elle l'auoit désiré ; & ayant fait ses prieres & protestations avec larmes , elle passa & repassa pieds nuds , sans estre bruslée , sur des focs rouges de feu , en presence du Roy & de toute la Cour. Cette merueille porta son Fils à luy demander pardon avec mille ressentimens de douleur , à l'honorer tout le reste de sa vie , & à se conduire par ses conseils. Il regna

tenu pour saint, & qui a fait pour acquerir ce titre, plusieurs bonnes actions, tu en peux decouurer vne mauuaise, tu la proposes au Roy pour le porter à l'imiter, sans luy dire la suite & verité des choses; parce que cela seroit contraire au dessein de celuy auquel tu veux plaire.

Ton second exemple tiré de l'Histoire d'Angleterre, ne tesmoigne pas moins ton ignorance & ta malice, que le premier. Tu dis, que Elizabeth Fille de Philippe le Bel, femme d'E-

doüard second, & Mere d'Edoüard troisieme, fut emprisonnée par son Fils, & reduitte à mille liures de pension.

Tu allegues Belleforest, n'ayant peu trouuer ceste fable dans les Historiens Anglois, qui disent bien, que ceste Princesse fut tres-mal traittee par son Mari grandement desbauché

& corrompu par Ganeston, homme abandonné à toute sorte de vice, & massacré par les Princes du Pays, qui ne pouuoient suppor-

ter son insolence. Au credit de celuy-là succederent les Spenciers, pere & fils, qui

Du Chesne dit : *Elle estoit plus desirée à la Cour qu'attendue; tous les Grands allerent au deuant d'elle: apres les saluts, elle raconta au Roy le sujet de son voyage, & les felonies de Hugues le Despencier.*

Polyd. Virgilius lib. 18.

Hugones Spenserij, pater & filius, duo insignes eius indolis corruptores.

contraignirent la Reyne , par leurs mespris & violences , de s'enfuir avec son enfant , & se retirer en France auprès de Charles le Bel son Frere : qui payda pour se remettre à sa dignité, & conseruer les droicts de son Fils. Elle en vint

* Camdenus : *Eduardus 11. Adami Episc. Herefordensis scelerata verjuria est sublatu*, qui *hac verba sine interpunctionibus ad eius custodes scripsit* : *Eduardum occidere nolite timere bonum est* : *ut pro sensu varieta* & *illi eadem partrarent*, & *ipse se commodè excusaret*.

Du Chesne liure 15. dit , que *Edouard 111. tua son frere de sa propre main.*

mille liures , à laquelle tu dis que Elisabeth fut reduite, pas vn Historien d'Angleterre n'en parle : au contraire Polydore Virgile Italien, qui est fort veritable , & sans passion , dit sur le sujet de la mort de ceste Princesse , qu'elle merite vne

loüange immortelle ; par Polyd. Virgilinus lib. 19. ce que iamais personne ne *Annus qui secutus est*, ressentir sa puissance, qu'à

à bout par l'assistance des Grands du Pays ; les Spenciers, ou Despenciers, furent chastiez ; le pere ayant esté pendu , & le fils mis en pieces. * Edoüard fut miserablement assassiné par la trahison d'Adam Euesque de Hereford , qui auoit esté esleué par ce Roy ; auquel son Fils succéda , qui ne fut guere meilleur, car il tua son frere de sa propre main & fit trancher la teste à son oncle. Quand à la prison , & pension de

tu dis que Elisabeth fut reduite, pas vn Historien d'Angleterre n'en parle : au contraire Polydore Virgile Italien, qui est fort veritable , & sans passion , dit sur le sujet de la mort de ceste Princesse , qu'elle merite vne

loüange immortelle ; par Polyd. Virgilinus lib. 19. ce que iamais personne ne

l'augmentation de son bien ou pour le soulagement de son mal. C'est vn eloge en peu de mots le plus grand qu'on puisse donner, ie ne dis pas à vne Reyne, mais au plus vertueux & sage Roy, qui aye iamais regné. Il adjouste, que quelques Princes la calomnierent pour s'estre opposée à son Mari; mais il dit, qu'elle estoit obligée de secourir le Royaume, n'ayant iamais eu intention de nuire au Roy. Il me semble qu'on doit adjouster plus de foy à ce discours, qu'à celui de Belleforest Historien peu iudicieux, qui accuse cette vertueuse Reyne, & bonne Mere, d'impudicitez estranges: qui ne dit pas en quel lieu elle fut arrestée; qui adjouste, que son Fils la fit estrangler, ou assassiner, ou empoisonner; ce qui auroit esté dit par quelque autre, & qui est de tres mauuais exēple, pour estre proposé à vn Roy. Si Elisabeth eust esté mal traittée par son Fils, il auroit eu grand tort, ayant fait pour conseruer sa vie & sa Couronne, tous les deuoirs d'vne tres-bonne Mere. Outre cela Edoüard III. ne fondant ses pretensions sur

nobilis fuit mortē Isabellæ, Eduardi Regis Matris, femina immortalitatis nomine longè dignissimæ: quippe cuius potentiam nemo sensit, nisi aut boni accessione, aut leuatione mali. Hæc apud nonnullos Principes non caruit calumnia, quod esset persecuta virum, tamen non nocendi viro, sed Republicæ succurrendi causa id facere coacta est: quare profecto venia danda est; si ob amorem patriæ, præ quâ reliqua omnia negligenda sunt, minus priuato officio seruiert.

la France , que sur les droicts qu'il auoit d'Elisabeth , il est certain qu'il ne la pouuoit affliger sans vn grand préjudice , & sans attirer les reproches de tous nos François. Ils n'auroient pas manqué de marquer cette ingratitude & reduction à mille liures de pension , pour la recompense d'vn grand Royaume , que Edoüard s'imaginait luy estre acquis par le moyen de sa Mere. On pourroit dire , que le Cardinal , auquel la Reyne a donné ou procuré plus de trois cens mille liures de rente , t'a fait escrire , qu'une Royne d'Angleterre a esté reduite à mille liures de pension : mais on peut repartir , que cét ingrat laissemoins à vne Reyne de France , qui a apporté huit cent mille escus , sans les autres auantages. Lors que tu as faict mention de cette somme de mille liures , tu pouuois penser que tu en auois eu deux cens d'auantage , pour auoir faict vn libelle infame appelé le Coup d'Estat ; & que le Coup d'Estat , que la Reyne fit en faisant vn Dauphin , qui est à present nostre Roy , meritoit bien qu'on la traitast plus honorablement. Tu verras , peut-estre ; que tu as eu grand tort d'alleguer dans le rencontre des affaires presentes les exemples des Reynes vicieuses , sur tout impudiques ou soupçonnées , ce que la nostre n'est pas ; ou des vertueuses , comme la nostre est , mais poursuiue comme celles-là , par les calomnies & artifices de fauoris corrompus , & detestables ingrats. Prends garde aussi , que tu fais estat de trois ou quatre Princes qui ont tué leurs freres ; que tu parles

en vñ

en vn endroit d'un Roy qui fit mourir son fils sans forme de Iustice; & de cet autre qui commanda qu'on prist son frere vif ou mort : si tu n'est pas assez sage pour considerer iusques où l'appetit d'une chetive pension a trāsporté ta passion, ceux qui n'ont ny l'un ny l'autre, iugeront sainement ce que tu merites, & où va le dessein de celuy qui est plus maistre de ta plume, que tu n'es de ton esprit. Tu dis aussi que Louys XII. faillit à estre exclus de la succession de la Courōne, pour s'estre souleuē contre Charles VIII. Tu allegues ton Belle-forest, qui dit en termes exprés, que personne ny trouua empeschement : il adiouste, que cette loy pretenduē de l'exclusion des Princes du Sang, pour auoir porté les armes contre les Roys, ne fut iamais; tu as voulu joindre cette menace avec celle que vous tirez de la prison de Charles de Lorraine, pour nous faire voir sur quoy le Cardinal veut fonder son inuasion.

Si dans le rencontre des affaires qui se presentent, tu voulois proposer à sa Majesté quelques exemples, tu en deuois chercher pour luy faire voir les maux qui arriuent aux Roys par la mauuaise intelligence avec leurs Meres, & les espouuentables effects de leurs maledictions. Tu en verras vn dans l'Histoire d'Angleterre, rapporté par Estienne Pasquier, qui en fait vn chapitre tout entier : si tu voulois adiouster à celle-là les Espagnoles & Portugaises, tu pouuois alleguer celle d'Alphonse, qui fut le premier qui porta le nom de Roy en Portugal. Il emprisonna sa Mere The-rasia, & attira sa maledictio, qui fut suiue à l'heure

Pas-
quier
en ses
recher-
ches.
Lucas
Tuden-
sis.

mesme d'un horrible iugement de Dieu. Le Roy est asseuré, que la Reyne sa Mere ne luy donnera iamais que des benedictions : le Cardinal sçait qu'elle ne prendra point les voyes extraordinaires pour se vanger ; & c'est ce qui luy donne la hardiesse de l'offenser trop librement : ce qu'il n'auroit iamais fait, s'il n'eust cognu, qu'elle oublie aussi facilement les iniures, que luy les bienfaits. Tu n'aurois garde d'escrire ce que tu escris, si tu ne croyois, que la bonté de cette grâde Princesse la portera plustost à te deliurer des mains de la Iustice, que son ressentiment ne la poussera à te faire chastier. Mais Dieu, que tu dois craindre, & le Sainct Esprit, contre lequel tu peches en combatant la Verité cogneuë, defendant le mensonge descouuert, & cõfirmant des faux faits par des faux exemples, te fera peut estre sentir les effects de sa iuste indignation. Je reprens la suite de ton discours.

Page 88. Tu blasmes la sortie de la Royne, & sa retraite au Pays bas : on a respondu à tes compagnons sur cet article. Contente toy, que la Reyne peut dire avec ce Capitaine Grec : Nous estions perdus, si nous n'eussions esté perdus. Son déplorable & forcé depart ne pouuoit trouuer hors de France un sejour plus doux ; & sa vertu n'a peu estre, ny plus honorée, ny moins soupçonnée, qu'au lieu où elle est, & parmi les personnes qui l'ont receuë. On l'a prouué si clairement ailleurs, qu'il seroit ennuyeux de le redire icy ; nostre intention n'estant pas de contenter ceux qui nous employent par la longueur de nos discours, ny

d'attirer vn plus grand payement, mais de destrô-
per les ignorâns par la verité des choses.

Tu dis vne nouuelle extraite des vieux regi- Pag 891
stres du Cardinal, qui t'a enseigné, qu'il y a
quelques années, que la Reyne fit venir d'Italie
en France vne bonne Religieuse, qui s'appelloit
Pasithée : tu luy fais prédire des choses, aus-
quelles elle ne pensa iamais. La Roync, qui sçait
mieux que personne du monde ce que cette ver-
tueuse fille luy dist, a souuent asseuré, qu'il n'y a
rien qui luy puisse donner quelque apprehension,
ny flatter l'esperance du Cardinal. Il est sembla-
ble au malin esprit, en prophétisant le mal qu'il a
enuie de faire, lors qu'il menace la Reyne en ter-
mes couuerts d'une prison perpetuelle : les sages
iugeront, si c'est le moyen d'acheminer vne bonne
reconciliation ; ie n'en diray pas d'auantage.

Les deux raisons que tu apportes, pour mon- Pag. 90
& 91.
strer que le Cardinal n'est pas tant ingrat comme
on le croit, rendent son peché plus infame, & le
noircissent au lieu de le lauer. La premiere est,
qu'il doit d'auantage au Roy qu'à la Roync. Outre
que cette raison est appuyée sur vn faux fonde-
ment ; à sçauoir que les interests du Roy & de la
Reyne sa Mere estans contraires (ce qui n'est pas,
n'a iamais esté, & ne peut estre) le Cardinal est
obligé, ayant à prendre parti, de se ietter non
seulement du costé qui est le plus fort, mais qui
luy a donné plus de bien. S'il eüst eu assez de pru-
dence & de bonté pour les cōseruer tous deux, n'y
ayant autre opposition que celle qu'il y a mise, il
n'y a point de doute que le Cardinal passoit pour

430 *Aduertiff. de Nicocleon à Cleonuille*

vn homme bien sage. Tu dis, *qu'il a deu suiure le Roy, auquel il a plus d'obligation qu'à la Reyne.* N'est-ce pas elle qui l'a donné au Roy, & qui luy a fait donner par le Roy tous les biens & honneurs qu'il possède ? Il est vray, que pour les places, les canons, munitions, & les Finances desrobées, cela ne vient point des bien-faicts de la Reyne. Le Cardinal, qui croit ceux-cy les plus grands, parce qu'ils sont les plus vtils, n'estime rien au pris de ce couuert les fondemens & tout le bastiment de sa fortune : la beauté des dernières pieces luy a fait mespriser les premières : l'orgueil luy a persuadé, que celles-cy n'auoient pas serui pour acquerir celles-là ; & mesmes que le bonnet de Cardinal n'a point attiré toute l'auctorité, & ne protege pas la puissance de celuy, qui l'a obtenu par les prieres & aux despens de la Reyne Mere du Roy. Ce que nous ne disons pas pour faire paroistre plus petits les biens, que le Cardinal a receu de son Maistre : mais pour monstrier qu'il est le plus ingrat homme de la terre, en voulant nier, que par les bonnes graces de la Mere il soit arriué à celles du Fils, & par les deux à tout ce qu'il possède de dignitez, de biens, & d'emplois. Je renuoye à la cognoissance publique le iugement de ce different.

Pag 92. La seconde raison de Cleonuille pour la de-
 & 93. fense du Cardinal, est, *qu'il a acheté plus chèrement les bien-faits de la Reyne, que ceux qu'il les luy repro-
 chent n'en voudroient auoir donné.* Il ne faut pas
 trouuer estrange, si celuy qui est arriué au der-
 nier point de la mescoissance, rendant le mal

pour le bien , a païsé au delà du premier , lors qu'il ne veut point cōfesser qu'il aye receu beaucoup de chose ; & au delà du second , lors qu'il a effronterie de dire qu'il a tout acquis à haut pris. Sa vanité luy a persuadé , que le moindre de ses seruices ne seroit pas dignement recompensé par tous les Empires du monde. Ceux qui sçauent l'Histoire du temps , & ont eu quelque lumiere de ce qui est arriué dans la conduite des affaires de la Reyne, sçauent la monnoye que le Cardinal a baillé, que nous pouuons aiseurer auoir esté toute fausse ; ses pretendus seruices n'ayant esté que tromperies, pour ne dire point trahisons. Le frere du Cardinal, *que tu demandes à la Reyne*, ne fut point sacrifié à la querelle de S. M. mais à celle de son frere, qui n'en fut pas trop marri , n'ayant iamais sceu viure trois iours en bonne intelligēce avec ses plus proches : ils sont dans le cœur les plus grands ennemis qu'il aye , & ceux qui parlent plus librement de ses deportemens. Pour te monstrier le bon marché qu'il a eu de tout ce qu'il tient de la Reyne ; vn an de mauuais seruice luy donna le chapeau de Cardinal, qui est la plus belle piece de son cabinet, avec laquelle il a acquis toutes les autres.

Mais il faut aduoüer que tu loges le Cardinal au dernier poinct de l'ingratitude, lors que tu dis, pour effacer par vn seul trait toutes les obligations qu'il a à la Reyne , *qu'elle luy a fait plus de mal que de bien ; & que la faueur de cette Princesse luy est autant fatale, comme la disgrace ; parce qu'il eust esté plus content en demeurant dans la cōdition mediocre*

d'Euſque de Luçon. A ce compte , non ſeulement il a acheté les honneurs , & les biens , mais on luy a liuré de tres-pauvre marchandife, pour la riche qu'il a donné. Ne diriez-vous pas, que le Cardinal eſt vn des bons Peres du temps paſſé? vn S. Gregoire, vn ſaint Iuſt, vn ſaint Eucher, qui eſtoient tirez par force du deſert, pour eſtre mis dans les Dignitez de l'Egliſe? comme ſi on ne ſçauoit pas avec quelles ardeurs il les a pourſuiuies, quelles deſpenſes il a fait faire à la Reyne pour les arracher, combien d'hommes il a tenu à Rome, & de quels artifices il a vſé, pour ſurmonter les difficultez que ſa mauuiſe reputation, & les iuſtes apprehenſions du Roy, & de ſon Conſeil auoiēt formé. Apres cette qualité, ſur laquelle tous ſes emplois ont eſté appuyez, quelle peine donna, & prit le Cardinal, pour entrer dans le Conſeil eſtroit de ſa M. qui auoit vne grande auerſion de ſa perſonne? Tu es bien trompé, ſi tu crois qu'il te fera aiſé de nous perſuader, qu'on a fait tort au Cardinal de le tirer de ſon repos, pour le mettre dās les affaires. C'eſt luy qui les a cherchez avec tant d'ardeur & de furie, qu'il a creu, que de l'aider pour y entrer, eſtoit acquerir ſur luy vne obligatiō immortelle; que ſa malice veut non ſeulement reduire à rien, mais conuertir en mauuais offices tous les bons que la Reyne a fait pour ſon auancement. Par ce diſcours, on voit que le ſieur de Cleonuille a produit vn eſſect contraire à ce deſſein: en voulant couvrir l'ingratitude du Cardinal, il l'a deſcouuerte en ſes trois parties; qui ſont d'oublier le bien receu, de le nier, & de le conuertir en mal.

Si le Cardinal auoit les sentimens dans lesquels tu dis qu'il est, rien ne l'empesche de chercher le repos: mais il a tant de presumption, qu'il croit que Dieu (que les anciens ont appellé *Necessité*) n'est pas plus nécessaire au monde, que luy à la France. Il s' imagine, que sa sainte Prouidence a employé, en le dōnant à cet Estat, les derniers moyens qu'elle auoit pour le sauuer; comme si ceux de la Toute-puissance n'estoient pas infinis. Il est vray que ce grand Admiral est plustost battu par les tempestes, que doucement porté sur les vagues: mais il a esmeu tant de tourmentes, qu'il est obligé de prendre la haute mer. Encore qu'il aye tantost tous les ports de l'Ocean de France; entreprendre d'engagner vn, & de relascher, c'est chercher, à son aduis, le desbris qu'il veut fuir, en se tenant loing de la terre. Il ne se peut faire autrement, que dans ces agitations son petit estomac ne fasse d'estranges efforts: mais il se digererait luy-mesme, s'il ne deuorait toute la France. Il est impossible que cette mare publique ne soit troublée par tant d'hōmes & de bestes qui entrent dedans, & que le tintamarre des vrayes & fausses alarmes n'estourdisse ce bizet: mais il faut que *Moab meure dedans le bruit*. Il croit que le silence & la nuit vont ensemble, & que la paix n'est que la compagnie de la mort. Comment pourroit-il chercher la parfaite tranquillité hors de la Cour, veu qu'il refuse celle que les sages peuent trouuer dans son tumulte? Il confond toutes choses, & mesmes ses esprits, dās la guerre qu'il met par tout: principalement dans la source

434 *Aduertiff. de Nicocleon à Cleonuille*
des diuertiffemens honnestes, qui est la Maison
Royale; & dans celle des consolations Diuines,
qui est l'Eglise de Dieu, qu'il renuerse en Allema-
gne. Penses-tu que le superbe Palais de Richelieu,
& deux cens mille escus de rente, puissent faire
aimer la vie retirée à vn homme, qui porte son
ambition, non seulement sur toute la terre, mais
sur toute la mer: qui a sur celle-là le titre de Ge-
neralissime, sur celle-cy la qualité d'Admiral; &
qui s'auance tant qu'il peut pour acquerir sur l'Y-
ne & sur l'autre le nom de Souuerain. Il a dit fort
souuent, qu'il veut voir ou la fortune peut porter
vn homme: elle n'est point la conseillere du re-
pos, son globe & sa voile la roulent, & la pous-
sent tousiours plus auant; & sa course ne finit ia-
mais qu'avec sa cheute. Je sçay bien que les reso-
lutions, ie ne dis pas d'un Chrestien, & d'un Pre-
stre, mais d'un sage Payen, ne deuroient pas estre
de suiure cette aueugle iusques au bout; & qu'il
seroit plus vtile de viure deuant que de mourir,
que de mourir deuant que d'auoir vescu. Mais
le Cardinal est du nombre de ceux qui aiment
mieux estre surpris par le mal, que de considerer
le danger; & mesurant toutes choses par son vti-
lité, il choisit plustost de nuire à plusieurs per-
sonnes dans la puissance, que si dans la vie priuée
il se nuisoit à soy-mesme. Il a l'esprit ainsi fait,
qu'il faut par necessité, ou que dans la presse du
monde il renuerse les hommes & les villes par sa
malice, ou que dans la solitude il se perde luy-
mesme par la folie.

Pag 98. Tu entreprends vn long discours, pour monstres,
& 99.

que c'est vn crime de lese Maieſté au premier chef d'at- Pag. 98
tenter à la personne des Miniſtres del' Eſt. et. C'est l'ap- & 99.
prehension du Cardinal, qui te fait mettre en ieu
cette queſtion inutile. Il voit qu'il eſt impoſſible
de rauer le bien, la liberté, la reputation, & la vie
à pluſieurs, ſans eſtre dans la crainte de quelque
violence. Celuy qui donne la terreur, la reçoit
celuy qui entreprend tout ſur autruy, à peur
qu'on n'entreprenne quelque choſe ſur luy. Que
ſi la penſee (comme tu dis) de tuer vn homme du
Conſeil du Roy doit eſtre auſſi bien vn crime en France,
comme tu veux faire croire qu'il eſt en Angle-
terre; toutes les priſons du Royaume ne ſont pas
capables de receuoir ceux, qui apres la penſee
ont eu le deſir de tuer le Cardinal. Tous les bour-
reaux ne ſçauroient dans vn an défaire tous ceux
qui voudroient eſtre ccluy d'un homme, qui a mis
la diſette par tout, pour mettre l'abondance dans
ſa maiſon. Pour ne rien dire de ceux qui ſont
pouſſez par le zele de la Religion; combien ce pri-
ſonniers, de bannis, de proſcripts, & de perſon-
nes qui leur appartiennent, combien de pauvres
payſans pillez & batus par les Soldats, accablez
par les impositions extraordinaires, & affligez de
famine & de peſte, que la mauuiſe conduite du
Cardinal a mis, & entretient dans le Royaume;
combien d'Officiers de la Reyne-Mere du Roy,
de Monſieur, des Princes, & des Grands, chaſ-
ſez ou mal traittez, voudroient eſtre transfor-
mez pour vn quart d'heure en furies, ou en ſtri-
ges, pour l'eſtrangler dans ſon liſt? Ces gens-là
ne ſont plus retenus par la conſcience, mais par

l'impuissance & par l'apprehension des supplices; Considere, si tu peux, Cleonuille, si celuy-là n'est pas plus digne de compassion que d'enuie, qui est contraint d'auoir plus de gardes que le Roy : si celuy-là n'est pas mal-heureux, qui tient ses amis pour suspects, & croit ses ennemis dangereux; qui se desie de sa table, de son liêt, de ses habits, & de faire qu'il respire; qui est contraint d'employer des Escriptuains, comme toy, pour aduertir qu'on se garde bien d'entreprendre sur sa vie, parce que ce seroit vn crime de lese Majesté au premier chef: ce qui est dire en deux mots, qu'il est Roy; il suffisoit de dire, qu'il est Prestre.

Page
190 &
191.

Après que tu as traitté cette question assez au long, tu nous veux prouuer vne chose de laquelle on ne doute point, *que le Roy n'est point prisonnier.* Je ne serois pas si mal aduisé d'auancer ces paroles, si tu ne les auois dites, & si tu n'auois fait des figures impertinentes, pour chercher en quelle prison estoit le Roy. Nous n'auons pas cette fole imagination, qu'il est enfermé entre quatre murailles; mais chacun sçait que sa Majesté est enuironnée par des artifices, qui n'ostent rien à la liberté de sa personne, mais à celle de ses grandes vertus : elles ne peuuent agir conformément à ses bonnes inclinations, lors que par vn estude & surprise estrange on destourne ses volonteés portées au bien, on dispose des choses qui viennent à vaquer contre ses desirs, on fait reuoquer les dons qu'il a fait, que son cabinet n'est l'ambrissé que de miroirs, que luy representent les especes des plus belles choses comme tres-laidés, & ne

luy font voir que des figures renuersees : nous pouuons dire aussi, que la table de son Cabinet est toute couuerte de ces cilindres inuentez depuis quelques années, qui d'une monstrueuse confusion de couleurs font vne image bien faite. Ce que nous blasmons, est le soin que le Cardinal a eu, d'oster d'aupres du Roy tous ceux qui luy pouuoient dire quelque verité; d'auoir commencé par la Reyné sa Mere, & d'auoir poursuiui en rendant suspects les Princes & Seigneurs, qui ne sont point à sa deuotion. En fin, Seneca nous te dirons avec Seneca : *Viens, & ie te mon-* lib. 6.
streray quelle est la pauureté (ou si tu veux, la prison) de de Be-
celuy qui possede tout : il est en necessité d'un homme, qui nestic.
luy dise ce qui est vray. Ce que nous loüions, est la bonté du Roy, qui n'a consenti au mal que par surprise, & ne s'est point portée à faire tout ce que la malice du Cardinal luy a conseillé. Nous sômes bien informez que la rage a tiré de sa bouche des injures horribles contre son Maistre, lors qu'il ne suiuoit pas ses passions qu'il desire de rendre les prisons de l'esprit du Roy. Mais cette Aigle genereuse rompra les filets; prendra la liberté que sa naissance, son courage, luy donnét, & que sa dignité luy recommande : Dieu (puis que les hommes, iusques aux Confesseurs, sont en default) fera voir à S.M. l'impieté des sermens qu'on a exigé d'elle, sur les choses les plus saintes, pour l'obliger à declarer au Cardinal tout ce qui auroit esté dit contre luy, mesmes en la confession. C'est vne espèce de sacrilege d'extorquer des sermens pour choses mauuaises, & qui peuuent estre

préjudiciable au public, ou aux particuliers : tant s'en faut qu'il y aye peché de les rompre , qu'il est tres-grand de ne le faire pas. Il n'y a point d'homme qui puisse, sans offenser la Majesté Divine & Royale, tirer vn serment de celuy auquel il doit le sien ; ce qui est en certaine façon le rendre son esgal, ou inferieur : ainsi que sceut fort bien représenter Charles V. estant Dauphin ; lors que les Deputez des Estats generaux de France assembles à Paris, apres la prise du Roy Iean, le voulurent contraindre de iurer, qu'il ne reuele-
 roit rien de ce qui luy seroit dit : c'est vne plus grande effronterie d'obliger vn Roy à dire tout ce qu'il sçaura.

Après auoir tasché de monstrier que le Cardinal n'est pas si meschant de tenir le Roy prison-
 nier, tu le rends plus criminel que s'il auoit osté la liberté à la personne de S. M. lors que tu nous fais cognoistre qu'il approuue tes escrits, dans lesquels il desrobe la gloire au Roy, que ce Prince genereux estime plus que sa Couronne & sa vie. Tu employes ces façons de parler : *C'est ce Cardinal qui a pris la Rochelle, qui a deliuré Cazal : bref qui depuis trois ans a fait tous ces grands coups, que les siecles suiuans admireront.* De grace, Cleonuille, reserue quelque chose au Roy, qui estoit au siege de la Rochelle. Ne veux-tu pas que l'Histoire tesmoigne que LOUVIS XIII. l'a prise ? ou bien, si tu desires que c'est le Cardinal en la presence de sa Majesté, ou (comme il a dit) contre son gré ; mais pourquoy a-il deliuré Cazal, non le Roy ? Il me semble, que les troupes qui furent

Du
 Haillan
 4.11.

Pag. 103

enuoyées pour le secours, estoient à S.M. qu'elles estoient conduites par ses officiers, & que les Ordres & Finances les faisoient marcher, non le Cardinal, qui auoit quitté sa charge, lors que les occasions se presenterent de la faire valoir. Quand tu asseures qu'il a fait tout ce que nous auons veu de grâd depuis trois ans, tu representes le Roy cōme endormi, ou malade, durant ce temps-là.

Ce qui fait paroistre que tu n'as point de iugement, est, qu'apres auoir donné toute la gloire du pag. 104 Roy au Cardinal, tu loües la modestie de celuy qui approuue ton discours, & te recompense pour l'auoir fait. Tu dis, *qu'il a veitté des bordures* (tu deuois dire, des supports de ses armes) qui le releuoient vn peu trop. A la verité nous auons remarqué dans Fauin & du Chasne, qui ne peuuent estre suspects, qu'il n'y a ny supports, ny cimier, ny Couronne, ny tourtis, ny bourlet au dessus & au tour de l'escuillon de son pere : personne ne l'a voulu flatter, iusques à ce point de luy donner quelque marque de Noblesse bien releuée. Nous pouons dire, que celle de sa Cheuallerie de l'an 1585. est la plus simple, & la plus basse qui soit dans toute l'Histoire de l'Ordre : ce qui nous fait croire, qu'elle a esté donnée à quelque extraordinaire importunité, comme celle du Surintendant. Tu dis aussi, *qu'il a fuy des comparaisons odieuses, & les robes rouges d'une compagnie de iustice, qui l'a voulu risiter avec l'habit qu'on porte en allant au deuant du Roy.* Grands effects du mespris de la vanité du monde en vn homme, qui a des deuises qui brauent les Papes, les Empereurs, & les Roys :

qui a fait autrefois tendre vn daïs dans la maison du Roy à Fontainebleau : qui t'a fait écrire , il y a vn an , que S.M. deuoit aller au deuant de luy , comme faisoit le Roy Ferdinand à Ximenes : qui a voulu mettre les Princes du Sang au dessous de luy , qui leur refuse la main droicte dans son logis : qui se tient au liect pour n'estre point obligé de loger à la mesme main les chaires des Ambassadeurs extraordinaires des Roys : qui a permis qu'on luy aye donné , dans des Theses , le tiltre Royal de Prince tres-inuaincu : qui a plus de gardes que le Roy , & mieux couuerts que les Archers appelez de là Manche : qui prend plaisir , que des flatteurs , comme toy , le comparent au Cardinal Ximenes , auquel on a donné cecy cloge insolent :

Quin
virtute
meâ iū-
ctum
est dia-
dema
cucullo
Cum
mihi
regnati
paruit
Hespe-
ria.

*J'ay ioint au Capuchon le Royal Diademe,
En Espagne ay regné par puissance suprême.*

VVol-
sey car-
dinal
d'Y-
orck.

Pour dernier tesmoignage de la modestie du Cardinal tu dis , qu'il n'a pas fait adorer son Chapeau , & n'a point passé deuant son Maistre ; cōme faisoit vn Cardinal d'Angleterre. C'estoit vn insolent , lequel estât fils d'un Boucher fut élué nō par son merite , mais par son vice : c'est celuy qui pour sa querelle particuliere fit mourir le Duc de Buckingham parent du Roy , qui fit repudier la Reyne Catherine d'Austriche ; qui fut si impudent , non pas de passer deuant son Maistre (comme tu dis) mais d'écrire, *Moy , & mon Roy*, qui voulut vendre son Roy pour estre Pape ; &

qui estant recogneu traistre , fut arresté prisonnier par le commandement de Henry VIII. qui l'auoit auancé. Ce Prince auoit resolu de le faire mourir ignominieusement , si la rage ne luy eüst donné vne fièvre chaude , qui fust suiuié de la mort ; apres laquelle il eüst , comme dit l'Escriture sainte , *l'enterrement d'un asne*. Lors que tu dis , que le Cardinal est digne de loüange , parce qu'il n'a point imité cét insensé ; i'aymerois autant ouyr dire , qu'il est vn grand Ministre d'Etat , parce qu'il n'est pas aux petites maisons ; ou qu'il a vn bel esprit , parce qu'il n'est pas beste , ou qu'il a vn tres-beau visage , parce qu'il n'a pas vne hure de sanglier.

Page

Tu reuiens à cette pretenduë prison du Roy , & t'esgayes sur ce sujet : tu contrefais le grossier , en interpretant toutes choses selon la lettre , pour auoir sujet de faire des figures d'Escolier. Nous t'auons expliqué en quelle façon le Roy est assiéié , & auons fait nostre declaration , que la vertu du Roy , qui resiste encore , ne permet pas la moitié du mal qu'on veut auctoriser de son nō , & l'artifice empesche qu'il ne sçache l'autre moitié : ainsi nous sommes contraires en tout au Cardinal , qui veut oster à sa Majesté toute sa gloire , & la charger de tous ces blasmes ; là où nous arrachons au Cardinal tout l'honneur qu'il rait au Roy , & luy donnons en la placè toute l'infamie qu'il veut rejeter sur son Maistre.

Tu dis , que nous appellons persecutiōs les procédures de Iustice , qui se font contre les coupables. Toute la Frāce a veu , & la Chrestieté sçaura

Page
107.

442 *Aduertiffem. de Nicocleon à Cleonuille*

ce qui s'est passé dans les poursuites contre le Marechal de Marillac, & les violences qu'on a voulu faire pour forcer la conscience des Iuges : on a aussi remarqué, à quoy ont abouti les accusations du crime de lese Majesté au premier chef contre Senele & du Val. On prie les gens de bien, & les sages, de donner vn nom à la detention de tant de prisonniers, qui ne sont ny accusez ny interrogez, & encoré moins iugez. On assure, qu'ils sont les captifs de l'Estat : dites donc pourquoy cét Estat ne les fait point chastier pour la seureté ? pourquoy se charge-il de leur nourriture, & la fait payer à beaucoup de pauvres innocens ? faites Iustice, ou vsez de Clemence : nous auons ignoré en France iusques à present cette inquisition, qui n'exerce point de vertu, que celle de la patience de ceux qui sont plus mal-heureux que criminels, & plus misérables que coupables.

Pag. 112 Cleonuille est bien plus cruel : car il veut qu'on estrangle, & qu'on brusle sans forme de Iustice, & figure de procez, tous ceux qui assistent les Reynes, & Freres des Roys, en leurs retraittes : & c'est icy où il loge toutes les Histoires, que
Pag. 113 nous auons rejeté. Cleonuille tu vas vn peu trop viste : mais il faut témoigner que le sang boult de zele, pour faire bouillir la marmite. Tous les exemples que tu ramasses en vray pedât, & compilateur de lieux communs, que tu as trouuez sous vn mesme titre du Polyantha, ou du Theatre de la vie humaine, ne touchent point les personnes que la tyrannie du Cardinal a ietté dans l'oppres-

Oppression. Ce qui se passe aujourd'huy en France, n'a rien de semblable avec ce que les siècles precedens y ont veu, ou qui est arriué dans tous les Estats du monde. Ils n'ont iamais porté, non pas selon ton aduis (car tu n'en crois rien) mais selon tes escrits, vn plus grand personnage que le Cardinal de Richelieu : & selon nostre iugement, qui sera suiuy de tous les gens de bien, vn si pernicieux & si violent homme ; ny vn si malicieux Escruiain comme Cleonuille. Il compare la Reyne Mere du Roy, & Monsieur Frere vnique du Roy, à ce monstre des Princes Charles d'Eureux Roy de Nauarre, qui fit faire tant d'assassinats, qui voulut deposseder les heritiers legitimes de la Couronne, qui fut le chef des seditions & sousleuemens des peuples, qui fit respendre tant de sang humain dans Paris, qui empoisonna le Dauphin, qui donna du poison au fils du Comte de Foix pour faire mourir son pere ; qui voulut estouffer toute la race de nos Roys, qui estoit vn cruel tyran à ses sujets ; traistre à sa patrie, & à son sang ; & apres auoir commis vne infinité de crimes, fut brulé tout vif par vn iuste iugement de Dieu. N'auons nous pas d'auantage de raison de comparer le Cardinal de Richelieu à l'Euesque de Laon, grand partisan du Nauarrois, & autant abominable que luy ? Ce meschant Prelat voyant ses trahisons descouuertes par le Dauphin Regent, duquel il estoit premier Con-

seiller, prit la fuitte comme vn voleur ; & se retira aupres du Roy de Nauarre. Ainsi fera vn iour celuy qui t'employe ; lequel recherchera la protection & assistance des ennemis de son Maistre, cōme il a fait l'amitié de ceux qui n'estoient point seruiteurs de sa Maistresse.

Pag. 119

Le reste de tes exemples inuentez , ou deguisez, ne tend qu'à monstrier , que le Roy doit estre non seulement seuer , mais cruel enuers sa Mere & son Frere ; parce que tu trouues le Cardinal en en cette belle humeur de ne conseiller que des meurtres , prisons , bannissemens , confiscations , & proscriptions : tu veux suiure la passion , pour poursuiure ta pension ; & en bon Courtisan tu accommodes ton discours aux sentimens du temps, qui ne seront pas ceux qui accommoderont les affaires , & qui reüniront les esprits. C'est en ce seul rencontre que le Cardinal n'est point fourbe, parce que sa furie surmontant sa dissimulation , il fait cognoistre qu'il n'en a pas assez , pour cacher le dessein qu'il feroit esclater , si nous auions fait quelque traité deuant qu'il aye perdu le pouuoir de nous attraper.

Pag. 120

& 121.

Tu me permettras aussi de te dire , que tu as oublié de mettre dans ton Histoire de la reuolte du Dauphin, qui fût du depuis le Roy Louys XI. que l'insolence de Charles Comte du Maine grād favori de Charles VII. ietta son Fils dans le desespoir. Tu as adjousté, que les confiscations des seruiteurs du Dauphin furent asséurées à ceux auxquels elles auoient esté données : cela ne peut estre , Louys ne s'estant point retiré en France,

que son Pere ne fust mort, & pour prendre la Couronne, avec laquelle il eut assez de puissance, pour remettre les siens dans leurs biens; ou beaucoup de moyens, pour les récompenser de leurs pertes. Tu remarqueras aussi, que ceux qui venoient de la part du Dauphin, n'estoient pas escoutez; mais on ne les emprisonnoit pas, pour auoir voulu presenter des lettres remplies de respect, comme on a fait ceux qui ont esté enuoyez au Roy par la Reyne sa Mere, pour apprendre des nouuelles de la santé de S. M. Ils alloient aussi pour faire cognoistre, que si les meschans auoient la puissance de retenir les effects des affections d'un bon Fils, il n'y auoit point de mauuais traitement qui peust empescher ceux de l'amour d'une bonne Mere.

Tu te retranches dans ton dernier exemple, Pag. 124
& 123. qui est celuy du Duc d'Alençon, Frere des Roys Charles I X. & Henry III. tu as soigneusement ramassé dans trois liures, ce qui se passa dans les retraites de ce Prince, & diuers mescontentemēs qu'il receut. Si tu fais estat des memoires de la Reyne Marguerite, pour autre sujet que pour blasmer les Freres des Roys; il me semble, qu'apres les auoir alleguées cinq fois, tu me dois permettre de me seruir de l'auctorité de cette Princesse, pour te faire voir qu'à la verité, vne partie du mal que tu dis a esté fait au Duc d'Alençon: mais toy, qui ne veux faire paroistre que des rigueurs, pour en attirer d'autres; t'es bien gardé de rapporter ce que la Reyne Marguerite a remarqué sur les sujets de tous ces mouuemens.

Tu verras dans ces memoires , que le Duc d'Alençon estoit vn Prince fort sage , fidele aux Roys ses Freres , ennemy des broüilleries , & grandement patient : mais il n'y a point de patience , ie ne dis pas des fils de France , qui naissent tous avec vn grand courage , mais de simple Gentil-homme , qui ne fust forcée par les insolences & brauades des fauoris de Henry troisieme , qu'on appelloit en ce temps-là mignons. Tu n'as peu extraire ce que tu as mis dans ton escrit , sans remarquer en passant l'impudence du Guast , homme de petite extraction , & si malin , qu'il faut aduoüer , que le feu Roy & le Duc d'Alençon furent retenus par vne grande crainte de Dieu , & respect merueilleux enuers Henry troisieme de n'auoir point assommé ou fait assommer ce soldat de fortune , qui employoit toute sorte d'impostures , faisoit mille mauuais offices , & tesmoignoit beaucoup de mespris au Frere vnique , & Beaufrere de son Maistre. Tu auras peu lire dans le mesme liurét les sanglantes mocqueries de Maugiron , Quelus , & autres ieunes Gentils-hommes , lesquels estans enyurez du vin de la faueur , rioient au nez de Monsieur d'Alençon , quand ils le rencontroient au bal ; portoient le Roy , sans sujet , à luy donner des gardes , à fouiller luy-mesme dans son liét , à faire emporter ses coffres en sa presence , & à d'autres indignitez indignes d'un grand Prince : desquelles il faisoit apres des reparations fort basses , iusques à demander pardon avec larmes.

Tu n'as garde d'en faire mention , parce que cela nuiroit à ton sujet ; ny de dire que le feu Roy (les exemples duquel doiuent estre puissans enuers ses Enfans) chassa du Pin son Secretaire, qu'il affectionnoit grandement , parce qu'il auoit parlé vn peu hautement à la Reyne Marguerite.

Lors que tu fais men-

tion de l'emprisonne-

ment des Mareschaux

de Montmorency & de

Cossé, & que tu cites

l'Histoire du President

de Thou, pour mōstrer

avec quelle violence ils

furent traînez à la Ba-

stille; tu ne dis pas le

sujet qui est remarqué

par ce graue Historien:

à sçauoir, que ce n'estoit pas pour quelque mal

qu'ils eussent fait, mais pour l'apprehension qu'on

auoit, qu'apres la mort du Roy Charles, en at-

tendant le retour d'Henry III. ils ne fissent du

bruit, pour se vanger de leurs ennemis. Tu as

aussi malicieusement supprimé le iugement que

fait ce grand homme d'Estat de cette iniustice, &

les Eloges qu'il donne à ces deux grands person-

nages, & bons François.

Ta rage, ou plustost celle de ton Maistre, pa-

roist dans les exemples de cruauté, que tu pro-

poses. Tu dis, que la Royne Catherine fut sur le poine

de faire passer le pas au Duc d'Alençon, & que le Roy

Henry III. commanda qu'on le prist vif ou mort, lors

Thuanus lib. 57. In-

ualefcente in dies Regis

morbo, cum Regina pa-

rens de morte eius certa de

noua Rege cogitaret, verita

ne per illius absentiam

Montmorantius & Cos-

sæus quidquam moliren-

tur, eos in potestate habere

constituit.

448 *Aduertis de Nicocleonà Cleonille*

qu'il se retirera à Dreux. La premiere chose que tu as mis en auant sans aucteur, est faulſe; la ſeconde eſt vne marque de cholere auẽgſe, qui ne doit point eſtre representee à vn Roy, ny au public, pour rgle de Juſtice, mais pour faire abhorrer les meſchantes paſſions. Tu deuois adiouſter ce qui eſt dans les memoires, qui t'ont fourni ce beau diſcours, que Henry III. auoit voulu entreprendre ſur la vie de la Reyne Marguerite, qu'il auoit fait enleuer Madamoifelle de Thorigny pour la faire noyer, qu'il auoit eſté aucteur de l'aſſaſſinat du Braue Buſſi, lequel fut attaqué par trente hommes en ſe retirant du Louure. Tu approuues toutes ces choſes avec le maſſacre de Blois; tu cognois l'humour du Cardinal, & ſçais que ſon ame bourrelée ne penſe qu'à des bourreaux, & que ſon ſang ardent ſe rafraiſchit d'as les meditations cruelles. Nous apperceũons bien où tendent tes conſeils: nous auons ſçeu ce que la rage a fait dire au Cardinal; elle l'a porté à menacer de priſon perpetuelle la Reyne Mere du Roy, & tu en as touché quelque choſe. S.E. a paſſé plus auant, & a dit qu'il feroit voir à la France ce qu'elle n'a iamais veu, vn Frere vnique d'un Roy ſans Enfans, fournir le ſujet d'une ſanglante tragedie. Il croit preparer les eſprits à ſouffrir ces cruauitez tyranniques, en te faiſant ramaffer & publier les exemples des plus mauuiſes actiõs, que nos Roys, ou les eſtrangers ayent fait, ou voulu faire, ou que tu leur impoſes fauſſemẽt. Tu perds le iugement iuſques à ce point, que tu approuues les violẽces qu'on vouloit faire au Duc d'Alẽcon.

vn d'affectiō & d'interest avec le Roy de Nauarre, qui a esté du depuis nostre Roy tres-generoux & tres-clemēt Henry IV. Il semble que tu estimes les resolutions, qui faisoient perir le Roy, Mr. & trois grandes Princeesses, en respānant le sang duquel Dieu a du depuis tiré leur vie. On te prioit, si tu auois des yeux, de prendre garde où te porte ton aueuglement, ou plūtoſt où va celuy du Cardinal, qui te paye pour escrire ces choses.

O le grand sujet que nous auons de loüer eternellement les misericordes de Dieu, de ce que nous auons vn Roy, qui le peut remercier comme Salomon, *pour luy auoir donné vne ame si bonne*, qu'elle ne peut receuoir les mauuaises impressions ny les cōseils de tenebres, que cet escrit le plus meschant de tous ceux qui ont esté imprimēz, a voulu ietter dans l'esprit de sa Majesté. N'auons nous pas raison de dire, sans estre coupables d'vn iugement temeraire, qu'il faut que les hommes, qui publient ce que nous auons remarqué, ayent des barbares & tyranniques desseins? puis que la dissimulation, de laquelle ils font si grāde profession, n'a peu retenir ce qui a eschappé non seulement à leur langue, comme nous auons sçeu; mais ce qui a coulé de leur plume, & que toute la France peut auoir leu.

Cleouille ayant esté dans tout son liuret vn serpent, qui a tasché d'empoisonner l'air, & de picquer à mort la belle reputation de la Reine Mere, & de Monsieur Frere vnique du Roy, & voulu estre scorpion en blessant par la queue de son ouurage, qu'il a conclu en cette façon:

450 *Aduertiff. de Nicocleon à Cleonuille*

De quoy se pouuoient-ils plaindre ? De rien certainement, si ce n'est peut estre de l'ignorance de ces funestes deuins, qui leur auoient promis sur la derniere maladie du Roy, ce que les autres plus amis de la France que de leur ambition, ne leur ont pas voulu tenir. C'est l'imposture qui a donné dans l'esprit du Roy le coup mortel à l'Innocence, laquelle n'a iamais eu la curiosité de rechercher la fin des années de S. M. ny la malice pour la desirer : elle sçait que la Religion Chrestienne ne permet pas qu'on fasse estat des sciences qui sont defenduës dans l'Escripture sainte ; parce qu'elles entreprennent sur la cognoissance de l'aduenir, de laquelle Dieu est aussi ialoux que de sa gloire. Cette grande Princesse n'ignore pas, que la nature ne peut souffrir, sans se perdre, qu'une Mere soit marrie de la santé de son Enfant ; & que sa raison seroit tout a fait esgarée, si la passion luy faisoit mespriser ses aydes & ses appuys. On a fait le procez à ceux qu'on asséuroit auoir esté consultez sur cet article : les Commissaires les ont deschargez de ce crime, n'ayant rien trouué qui merita la mort. Ils y auroient esté condamnez, si ce que le Cardinal dit en la Declaration faite au Parlemēt, & ce que tu escris estoit veritable : mais puis qu'un homme de sa cōdition a osé mentir, & prendre la qualité d'imposteur dans le Senat où il a celle de Conseiller ; il ne se faut pas estonner, si toy qui n'est qu'un Aduocat sans droit & sans employ, as voulu estre calomniateur, en plaidant vne mauuaise cause : ie crains fort qu'il ne soit ordonné vn iour, que tu corrigeras ton plaidoyé.

Ie te laisse pour aduertir ton Maistre , qu'il a eu tort de dire au Roy , ce que nous auons appris depuis peu, que nous blessions indirectement S. M. dans nos escrits; dans lesquels elle est traitée avec beaucoup plus de respect , sans comparaison, que dans les tiens , & dans ceux de tes compagnons. Vous l'offensez directement en sa personne, lors que vous l'accusez de precipitation & temerité en ses promesses, d'injustice & ingratitude enuers le Cardinal. Vous blessez sa dignité, lors que vous luy ostez la gloire , de laquelle S. M. est autant ialouse comme de son liect , ou de son thrône Royal. Pour le faire paroistre vn petit Roy , vous ne parlez que de ce grand Cardinal, qui a pris la Rochelle, secouru Casal, fait (comme vous dites) tout ce que nous auons veu de remarquable depuis six ans; & le comparez avec vn homme de sa condition , qui a gouuerné vn Royaume sous la foiblesse d'vne femme. Faut-il trouuer estrange, si apres cela on publie que le feu Roy estoit vn factieux & broüillon , & si on approuue les desseins de ceux qui ont entrepris sur sa personne ? Tout cela est directement attaquer le Roy : sur tout , lors que dans vn Royame où la Naissance donne la Couronne , on deschire la reputation de la Reyne Mere de S. M. & que pour monstrier que les violences qui ont esté faites à son Innocence ne sont pas sans exemples, on rapporte ceux des Reynes , ou conuaincuës , ou soupçonnées d'impudicitez : qu'on adjouste à cela , qu'elle est injuste en ses affections ; qu'elle n'en a point pour son aîné , contre lequel vous

dites , que non seulement elle a fait des factions dans la France , & des trahisons au dehors, mais qu'elle a recherché & désiré la fin de la vie de son enfant, & de son Roy. Ce sont les blâmes qui attaquent le Roy, & vôt droit à luy; où il faudroit que la parole de Dieu ne fust point veritable , lors qu'elle dit, *que la gloire du fils viët de l'honneur du pere*: qui doute que cela ne s'entende aussi de la Mere?

Les eaux des belles fontaines retiennent le goust & les qualitez de leur source, non de la main d'un fontanier. Les fruits tirent quelque douceur ou amertume de leur racine, non de celuy qui cultiue l'arbre; & les vins sentent le terroir qui les porte, non les appuis & échalias qui soustiennent les branches & les pampres. Les enfans tiennent plus des Meres, que des Peres : outre qu'elles contribuent égalemēt pour la generation, elles fournissent la plus grande partie de la matiere du corps , avec toute la nourriture de neuf mois. Quand le ventre ne seroit que le lieu de la demeure durant ce temps là , il faut confesser qu'il laisse à nostre tendresse quelques dispositions & humeurs, qui nous donnent inclination au bien ou au mal pour toute nostre vie. C'est ce qui porte tous les hommes à vouloir defendre l'honneur de leur naissance, & qui a fait prendre les armes , ou rechercher les voyes de Iustice aux enfans, pour vanger ou faire chastier les injures qui ont esté faites à leurs Meres; de peur qu'on le leur reprochast ce que disent les Grecs : Tu es vn mauvais œuf d'un méchant corbeau. Louys Duc d'Anjou, ayant esté adopté par Ieanne d'Hongrie , mena

en Italie vne puissante armée, pour tirer hors de prison celle qui ne luy auoit point donné la vie, mais vn Royaume ruiné, & qu'il falloit acquerir par les armes. Que doiuent faire pour la liberté & honneur de leurs Meres vertueuses les Enfans legitimes, & ceux qui leur ont obligation pour leur auoir conserué vne grande, riche & fleurissante Couronne? Il faut aussi prendre garde, si ceux qui accusent de mauuais naturel les Meres des Roys, n'ont point de dessein de mettre quelque tache dans leurs Enfans. Si pour confirmer cela, ils disent, qu'il y a quelques defauts dans les Freres, sans doute ils ont intention de rendre leur imposture plus probable. On a voulu attribuer à Monsieur des grandes imperfections: & on les remarqueroit dans les Sœurs de S. M. si cela seruoit à ceux qui veulent rédre au Roy tout son Sang suspect; s'ils ne disent que Dieu a fait vn miracle, en le garantissant des vices de tous les siens, desquels il seroit soupçonné avec plus de fondement, que de ceux de ses seruiteurs & Conseillers. Charles V. a esté appelé le Sage, lors qu'estant Dauphin il a esté trahi par l'Euesque de Laon, & qu'il fut trompé & volé sur la fin de son Regne par le Cardinal d'Amiens. Il semble que ç'a esté tousiours vn mal-heur fatal à Qui fu-
tous les bons Princes, d'auoir des mauuais ser- gat ma-
uiteurs. On les peut chasser & changer avec iu- trem,
stice & gloire; mais on ne scauroit changer de igoo
Mere: & on ne la peut chasser, sans conuiction de minio-
grand crime; ny la reduire à la necessité, sans sus erit
pecher contre la nature; ny la mespriser, sans & infel-
lix.
Pro 19.

se mettre en danger , par les regles de Dieu, d'estre mal-heureux & infame , & mesmes de perdre bien tost la vie. Pour les seruiteurs & Conseillers , ils sont des hommes que la seule fidelité pour recommander : ce sont des iettons , qui seruent pour compter vn grand ou petit nombre : sont des bastons qui appuyent la main du Prince , & qui la blessent quand ils sont rompus , ou corrompus par le vice : sont des miroirs qui nous font voir le monde ; mais on les doit casser lors qu'ils le représentent renuersé. C'est vne action de Iustice de chastier vn Ministre d'Estat , qui fait plus de cas de ses intherests que de ceux de son Maistre ; & c'est vn tesmoignage de bonté & de sagesse , de preferer les veritables affections de son Sang aux feintes protestations des valets. Ils font semblant de soustenir la Couronne du Souuerain , pour arracher les pierrieres & les fleurons qui l'embellissent ; & sont dans les confusions des guerres qu'ils esmeuent , comme les larrons qui nous appuyent dans vne presse pour auoir le moyen de mettre la main dans nostre poche , & emporter nostre bourse. Les imperfections de ces gens là peuuent estre contre les Roys ; mais ne peuuent point donner défiance qu'elles soient dans les Roys : elles feront dire, qu'ils sont trompez (ce qui n'est point vn peché) mais non pas qu'ils ayent des inclinations mauuaises ; dequoy on soupçonne ceux qui sont sortis d'une mauuaise Mere, iusques à la vingtiesme generation. Il est loisible aux Roys , & leur peut estre auantageux, d'esloigner vn Conseiller : mais

il ne leur est point permis d'affliger vne Mere ; & il leur est peu honorable, & tres-dangereux, de souffrir qu'on la blasme. La Prouidence de Dieu n'est pas si pauvre , ny le Roy & son Estat en si petite consideration aupres de sa Majesté Diuine , qu'elle ne puisse & vueille donner vn bon Conseiller à la France : mais sa puissance, quoy qu'infinie, ne scauroit enuoyer au Roy vne autre Mere, si les mauuais traitemens & la douleur luy auoient raiui celle, delaquelle les ordres du Ciel l'ont fait naistre. Nous auons voulu mettre ces considerations à la fin de cét ouura-ge, pour monstrier que le Roy n'est point offensé indirectement, comme on luy a voulu persuader, dans les blasmes qui sont donnez à son principal Ministre ; mais que sa Majesté est attaquée directement en ceux qu'on impose à sa personne, à celles du feu Roy son Pere, de la Reyne sa Mere, & de Monsieur. Nous aduertissons aussi toute la Chrestienté, qu'on n'a iamais abusé de ces mots *directement* ou *indirectement*, comme ont fait depuis peu quelques Escriuains François: ils s'en seruent, pour monstrier que le Cardinal de Richelieu, qui est Theologien, n'a rien fait contre sa conscience, lors que pour le bien d'un Estat, qui n'estoit point attaqué, il a assisté ceux qui renuersoient l'Eglise de Dieu, qui a esté ruinée en plusieurs endroicts par les mains de quelques Catholiques ignorans, qui ont esté pipez par vne distinction qu'ils n'ont pas entenduë. On l'employe maintenant pour tacher de prouuer au simple peuple, que le Conseiller doit

456 *Aduertisse. de Nicocleon à Clseconde*
estre plus respecté que la Mere du Prince: cômé
si elle n'estoit point considerable à l'esgal du ser-
uiteur dans vn Royaume. où la Naissance fait le
Roy, le Roy l'Estat, & l'Estat la seureté publique.
Ces raisons, contre lesquelles il n'y a point de
repartie, ne peuuent estre représentées à S. M. à
cause de la tyrannie du Cardinal; mais nous vou-
lons qu'il sçache, que s'il accable l'Innocence, il
ne fera point taire la Verité. Il a par vne lasche
vengeance rui le bien de ceux qui la soustien-
nent: mais il n'est pas en son pouuoir de confis-
quer leur esprit, leur cognoissance, leur courage,
& leur fidelité.

*Fin de l'aduertissement de Nicocleon à Cleon-
uille, sur son aduertissement aux
Prouinces.*

LE GENIE
DEMASQVE:

LE GÉNIE

DEMYSTIQUE



LE GENIE DE MASQUE.

EAire le mal, & blasmer le bien, sont deux crimes du Cardinal de Richelieu. Corrompre par argent, & tromper par belles paroles & meschans escrits, sont ses artifices ordinaires. Deguiser ses demons en bons Genies, & vouloir faire passer l'Ange exterminateur de la France pour son restaurateur, sont les effets des meditations de ses nuits inquietes. Ce qui le fasche, est, qu'il rencontre des hommes *qui scauent espronuer les esprits, & cognoistre s'ils viennent de la part de Dieu.* 1. Ioan. 4. Le dernier que nous auons veu sous le beau nom du *bon Genie de la France*, a esté iugé par toutes les personnes spirituelles vn lutin malin, & badin, qui a emprunté la fausse lumiere d'un discours affecté. Le Cardinal qui l'a veu apres Cleonville, & deuant qu'il fust exposé au public, a adiousté de sa main, conduite par son esprit aigre, des iniures beaucoup plus picquantes que celles qu'il a dit par le passé. Ces considerations nous obligent à vne responce, en laquelle nous abattons le masque de son pretendu bon Genie; & ferons voir par quatre marques, que c'est vne furie d'enfer, qui est cachée sous ce beau nom.

Pag. 3.

En premier lieu, l'esprit de calomnie ne peut estre vn bon Ange, mais plustost celuy qui est appellé diable; c'est à dire, calomniateur. Que ce Genie soit tel, il paroist en ce qu'il dit, que *les deportemens de Monsieur donnent des impressions de tyrannie*. Toute la Cour cognoist la douceur des inclinations de ce Prince, & la France ne se peut plaindre de la violence de ses commandemens, ny de ses actions: les armes qu'il a pris pour le salut du Public, sont conduites avec tout l'ordre qu'on peut mettre parmi des gens de guerre, qui ne sont pas des Moines bien reformez. Si Dijon, & son voisinage, ont ressenti quelques effects de la colere des soldats, sur lesquels on a tiré le canon; cette temerité meritoit quelque tesmoignage de rigueur: on ne s'en est point serui contre ceux qui ont reconnu ce qu'ils deuoient au Fils de HENRY LE GRAND, au Frere du Roy, à l'heritier presomptif de la Couronne, & à vn Prince, qui apres auoir demandé Iustice, est contraint d'employer la force pour la deliurance du Roy & de l'Estat. Celuy qui veut qu'on chastie par les loix vn tyran, & qui prouue qu'il est tel, fuit tant qu'il peut de paroistre semblable à celuy qu'il poursuit: & il suffit de dire que Monsieur est de la race des BOURBONS, qui sont tous bons.

Pag. 4.

C'est aussi vne calomnie, d'asseurer que *Monsieur a receu des pardons qui ont effacé ses fautes passées*. On n'a employé ny parchemin ny cire, pour luy donner des abolitions: iamais le Roy n'a vsé de ces paroles: & Monsieur n'a point flechi le genouil deuant S. M. qui est tout ce que les per-

sonnes de sa condition pourroient faire, lors que par leur ordre on auroit assommé vn insolent fauori. On ne l'a point voulu entreprendre, chacun ayant creu que la gloire du chastiment de ce grand criminel estoit reseruée à la iustice du Roy, qui sera vraiment LOVYS LE IVSIE, lors qu'il l'aura faite.

Les plus abominables calomnies sont celles qui suivent.

Il dit, que le cachet & le sein de Monsieur ont paru Pag. 126
dans les conseils des Princes estrangers, pour les assurances de la part qu'ils pouvoient pretendre au desbris de cette Couronne.. C'est vn des enigmes du Cardinal, qui est sommé de s'expliquer; & pour l'obliger à cela, nous disons qu'il est vn imposteur, sauf le respect de sa dignité, que nous ne pretendons pas de violer, pour soutenir celle d'un Fils de France, & Frere du Roy. S'il est assisté par les estrangers, sur tout par vn grand Prince qui est son Beaufrere, la compassion & le zele de la Iustice poussent ceux qui luy donnent secours; non le dessein de mettre le Royaume en pieces; pour prendre celles qui leur seroient plus commodes. Si dans le rencontre de la guerre ciuile, que le Cardinal a prouoqué, nos voisins trouuent quelque soulagement, & se peuvent garantir de celles que cet esprit broüillon a esmeu parmy eux; ce desir est si naturel, qu'il ne peut estre blasmé, ny en ceux qui le recherchent, ny en Monsieur. Il a suiet de procurer la paix à ceux qui contribuent quelque chose pour luy faire trouuer la sienne, sans qu'il la vueille acheter par la diuision d'un bien qui le regarde tout entier,

Outre que ce dessein est fort esloigné de sa pensée ; il sçait qu'il ne trouueroit pas vn Gentilhomme qui voulust prester ses mains pour mettre en pieces la Couronne de France, & pour seruir à la passion de celuy qui l'employeroit contre son propre interest.

Page
16.

De pareille estoffe est la calomnie qui est sur la fin de ce chetif Traicté, que *Monsieur remerciera vn iour les Iuges qui ont fait mourir ce detestable Medecin, qui recherché sous le nom de Monsieur, & à son insceu auoit préparé diuers poisons pour faire mourir le Cardinal.* On ne sçait pas si les rigueurs d'une torture extraordinaire ont fait dire quelque chose de semblable à vn lasche malheureux, mais on sçait bien, qu'il n'y a point eu de Medecin deffait par autorité de Iustice, ny d'homme condamné pour le suiet qui est rapporté par ce mauuais Genie, ny d'Arrest qui face mention de ce crime. On a esté aduerti, que le Plessis souffleur d'alchimie, & faux monnoyeur tres renommé, auoit esté pendu par le commandement du Cardinal, qui l'auoit traicté en Prince pour apprendre son secret : mais on n'a rien appris de ce Medecin, ny de son crime; ce qui nous fait asseurer que c'est vne pure imposture. Elle est tres malicieuse, en ce qu'on recognoist bien que ces paroles, *à son insceu*, ne sont pas adioustées pour adoucir celles qui precedēt, *sous le nom de Monsieur*; mais que la calomnie, qui n'ose point ietter tout son venin ou le presenter tout crud, le deguise, ou plustost le couure par des mots qui semblent le corriger. Il suffit de dire, que la chose estant fausse en toutes ses

parties, & mesmes en la qualité de la personne qu'on dit auoir esté executée; il ne se faut pas mettre en peine pour descouvrir la malice du discours, puis qu'elle paroist toute entiere en l'inuention de l'histoire qui n'est point arriuée.

Personne ne croira aussi, que ceux qui ont eu la puissance, sans rien hazarder, d'attenter sur la vie du Cardinal, ayent pensé de prendre des voyes lasches pour se defaire de luy. Ils ne veulent point raur la gloire que le Roy acquerra en le faisant chastier, apres que Dieu luy aura fait la grace de bien cognoistre son Ministre, & que la fin de ses actions aura apporté autant de lumiere & de naifueté, comme les commence-mens ont esté enueloppez de tenebres & d'artifices.

En second lieu, les bons Genies ne se iettent jamais dans les iniures, non pas mesme contre les demons. La parole de Dieu nous enseigne, *Iud. Epist.* que saint Michel respecta la nature qui est semblable à la sienne, encore qu'elle soit corrompuë par le peché. On nous a voulu persuader, que cet Archange estoit le bon Genie de la France, qui a pour cette raison vn Ordre de cheualerie qui porte son nom: personne ne se pourra imaginer, que cet esprit saint & sage aye perdu la modestie qu'il garda en parlant au diable, & qu'il puisse dire, *Pag. 6.* que la Royne Mere du Roy a esté ruinée par sa legereté, simplicité, & infidelité. Sans faute cet Ange iniurieux n'est pas le tutelaire de ce grand Royaume; mais plustost celuy qui manie les langues des harangeres de Paris, lors qu'elles

se querellét, & se descoiffent. On dit, que *la Royne Mere du Roy est legere*; parce qu'elle a cessé de proteger le Cardinal, lors qu'elle a recognu ses mauuais desseins: les sages ne changent pas, mais ils accommodent leurs conseils au temps & aux rencontres. On dit, *qu'elle est simple famelette*, parce qu'elle ne veut pas être trôpée deux fois. Ce qui sera trouué plus estrange, est que ce pretendu bon Genie imite les plus effrontez laquais, en conuertissant en iniure vne benediction de Dieu, qui a dit, que *la couronne des Peres & Meres sera de voir les enfans de leurs enfans*. Si Dieu a adiousté à la Couronne que la Royne a pris à saint Denis avec ioye celle des longues années, que sa sainte Prouidence luy augmente au Pays bas ses afflictions, pourquoy l'appellez vous *vieille* par mespris dans le Royaume de son Fils? il ne peut auoir trente & vn an, & auoir vne Mere bien ieune. Elle n'est point encore dans cet aage precipité, n'estant pas arri- uée à la soixantième année, & a l'esprit sain dans vn corps sain. Quand elle seroit plus auan- cée, le Roy qui craint Dieu doit augmenter son respect; & ceux qui veulent faire valoir le bon heur de son Regne, ne le peuuent louer sans re- cognoistre l'obligation qu'ils ont à celle qui a porté le Souuerain, qui l'a gouverné mineur, qui l'a marié majeur, & qui est la meilleure & la plus seure garde qu'il puisse auoir contre les en- nemis de sa vie; & sur tout, contre celuy qui luy desrobe la Couronne, en faisant semblant de vouloir descharger sa teste. Outre cela on vous peut repartir, que si vous estimez la Royne Me-

re bien vieille, vous avez plus de tort de l'affliger, & de luy oster son bien, & vous seriez obligé à en auoir plus de compassion, si vostre ame en estoit capable.

On doit aussi mettre parmi les iniures ces beaux mots que *Monsieur est Lieutenant General de ses Ministres*, & que *son procedé est trop criminel pour estre excusé par la bonté du Roy*. Qui croira que ces fleurettes soient cueillies dans le Paradis, & apportées en terre par vn bon Ange? Mais qui se persuadera que le Cardinal, qui les a semées dans cet escrit, aye quelque volonté de moyennier vne reconciliation entre le Roy, & Monsieur son Frere, qu'on appelle avec des iniures, comme si cet oyseau Royal deuoit estre reclamé de la sorte pour le faire venir sur le poing? n'est-ce pas reduire les choses au desespoir, bannir la paix pour iamais, en faisant semblant de la desirer, & vouloir tousiours regner dans la confusion, au lieu de la demesler?

En troisiéme lieu, vn Genie menteur ne scauroit estre bon, mais plustost du nombre de ceux *Ioan. 8.* qui n'ont pas esté fermes en la verité, & sont appelez *esprits de mensonge*. Tels sont les flatteurs qui disent, *qu'on ne peut trouuer à redire avec iugement & iustice dans les actions du Cardinal*. Pourquoy fait il donc fermer les portes de la Iustice, s'il est asseuré de la louange qu'elle luy donnera? Il doit rechercher & laisser ce beau tiltre dās sa maison, il luy sera plus honorable que le Palais de Richelieu, & la Citadelle du Haure, qu'on a basti, garni & muni, avec le sang de tant de Capitaines & soldats volez, avec les larmes de tant

de veſues chaffées, avec les cris de tant d'orphelins abandonnez, avec les ſueurs de tant d'artifans & payſans rançonnez, & dreſſé ſur les ruines de pluſieurs Prouinces deſolées.

Pag. 7.

La ſeconde flatterie, non ſeulement infame, mais grandement dangereuſe, eſt celle qui eſt en la meſme page, que *le Roy ne peut commettre ſes places avec plus de ſeureté qu'entre les mains du Cardinal.* Ah, Nobleſſe Françoisé ! ah genereux enfans de ces Peres, qui vous ont laiſſez pauvres pour auoir employé leurs vies & leurs biens aux ſeruices des Roys ! La fidelité hereditaire à vos maiſons eſt renduë ſuſpecte, pour releuer celle d'un homme qui a perſuadé au Roy, qu'il n'a rien d'aſſeuré que ce qu'il luy confie ou à ſes parens & alliez imbecilles : ils ſont eſtimez les ſeuls bons François, & ſeuls capables de garder nos frontieres, lors qu'on vous enuoye dehors pour vous faire tuer ſans gloire par la faim, & par la peſte. On y employe cette rufe, de peur que vos courages ne s'oppoſent vn iour à la diſſipation du Royaume. Pour auancer ce deſſein, le Cardinal a retiré dans ſes places, quaſi tout ce qui nous reſtoit de bons ſoldats, & fait perir (comme perſonnes ſuperflus) tous ceux qu'il ne peut loger dans ſes retraites.

Pag. 7.

Prou. 8.

Cet infame flatteur dit auſſi, que *le Cardinal fait regner le Roy avec toute ſorte de Maieſté.* Il le fait regner; il eſt donc Dieu, qui a dit, *Je fais regner les Roys.* Mais il le fait regner avec grande Maieſté: pourquoy ſe rend il donc ſon compagnon; ce qui abaïſſe grandement la Maieſté ? pourquoy ſouffre il qu'on imprime, *Le Roy & Monsieur le*

Cardinal feront pour vous? on parloit ainsi des as- *En la*
ciez à l'Empire. Pourquoy a on eu l'effronterie *haran-*
d'escrire dans la remonstrance de ce beau Ge- *gue de la*
nie, que le Cardinal est le second Pere de la France, *Maison*
sans dire qui estoit le premier? Pourquoy ostez *de ville*
vous la gloire au Maistre pour la donner au ser- *ris.*
uiteur, lors que vous dites, que la bonne conduire *Pag. 16.*
du Conseil du Roy, c'est à dire du Cardinal, a mis *Pag 3.*
la France à vn si haut point, qu'elle donne le branle à
toute la Chrestienté? Ne comptez vous pour rien
la generosité, la diligence & les autres vertus du
Roy? Pourquoy, si vous desirez d'apporter vn
grand esclat à la Maiesté Royale, souffrez vous
que le Cardinal prenne toutes les marques de
la Royauté, qu'il aye des compagnies de gen-
darmeries, de cheuaux legers, & de carabins qui le
gardent, & plus de cent Gentils-hommes payez
aux despens du Roy qui marchent deuant luy?
La personne de Sa Maiesté est tellement aban-
donnée, qu'on a suiet de dire, que tant de las-
ches suiuaus du Cardinal iugent qu'il peut tout
aupres du Roy, & que le Roy ne peut rien au-
pres de son Ministre. Il fait reuoquer les dons,
& passer le canif sur les breuets avec vne inso-
lence & mespris qu'on n'a iamais veu en Fran-
ce. Mais ie trouue qu'il a raison de dire, que les
conseils du Cardinal ont donné le branle à toute la ter- *Prou. 30*
re: c'est à dire, qu'il a fait danser à toute l'Eur- *Mouetur*
ope des branies au son du tambour, & qu'il a *terra per*
esbranlé toute la terre. Cela arriue (ainsi que *seruum*
nous apprenons par la parole de Dieu, & voyons *cum re-*
par vne miserable experience) lors qu'un valet *gnau-*
*regne. Vous dites, * qu'il menace toutes les autres* *rit.*
** Pag 2.*

Puissances. Il est vray: mais nous craignons qu'on ne voye à nos despens, qu'il y a grande difference entre menacer & surmonter. Des menaces insolentes, & des foibles efforts, irritent nos voisins, & les picquent pour les faire venir en France. Les sages apprehendent, que le dernier acte de la tragedie ne se ioüe dans ce pauvre Royaume, apres que les guerres estrangeres auront tiré la plus grande partie de son sang & de ses forces qui sont en ses soldats & Finances.

Pag. 3. Nous voudrions pour la gloire & seureté de la France, qu'elle eust les cent mille hommes sur pied que vous luy donnez sur vostre papier. A Dieu ne plaise que nous publions sa foiblesse: ses forces vnies sont inuincibles; mais pour celles que les desordres du Cardinal ont peu assembler, nous en scauons le nombre: nous sommes aussi asseurez qu'elles s'employeront avec vn grand courage pour le destruire, & mettrons en pieces ce Ruffin, s'il va dans les armées.

Pag. 15. Vostre Genie dit, que le Cardinal est tout au bien de la France. Si cet esprit menteur estoit forcé par quelque exorcisme de dire la verité, il ne diroit pas, que le Cardinal est tout au bien de la France; mais que tout le bien de la France est au Cardinal, ou à ses confidens.

Il me semble que ces 5. ou 6. eschantillons d'une piece de 8. fueillets sont suffisant pour montrer qu'un Ange de Dieu ne l'a pas composée, mais qu'un demon l'a griffonnée & barbouillée.

Pour la quatriesme & derniere marque de la supposition de cet Ange, il faut mettre son ignorance & impertinence. Entre les esprits bienheu-

ceux il y en a qui sont appelez *plenitude de science*:
 on les represente par des testes, pour monst^{cherub.}rer
 qu'ils sont tous remplis de iugement; & nous les
 nommons Intelligences, & Lumieres, pour faire
 entendre que l'erreur, l'opinion & les tenebres
 ne les peuuent surprendre. Iugez si on peut met-
 tre dans ce rang vn Genie, qui portant le nom de *Dan 10.*
 grand Prince du Ciel, appelle vn Prince de la *Et 12.*
 terre *Monseigneur*; qui dit, que ce *Prince n'est pas* *Pag. 3.*
Lieutenant du Roy, estant en aage de faire valoir
 cette qualité qui est acquise à sa Naissance. On
 luy reproche *son appannage & ses pensions*; comme si *Pag. 5.*
 les biens, que la nature luy donne, estoient des-
 robbez au Cardinal, qui pretend que tout est à
 luy, mesme l'entretien qui est deu & qui a esté
 osté à l'Enfant de la maison. On fait alleguer par
 cet Ange des histoires qui preuuent le contraire
 de ce qu'il veut confirmer. Il dit, que *Charles* *Pag. 9.*
VII. fit retirer le President Louuet, lors que la plussart
des villes de Frances crierent contre luy. Elles crient
 toutes avec la campagne desolée contre le gou-
 uernement du Card. de Rich. il se doit donc re-
 tirer. Mais le *President Louuet ne quita point la partie*
que lors que le Comte de Dunois son gendre fut contre luy.
 Nostre remede viendroir bien tard, s'il falloit
 attendre que le Car. eust des filles mariées, & vn
 beau fils reuolté cōtre luy: il suffit que ses actiōs
 soient condamnées par ses plus proches. Le Mar-
 quis de Brezé, qui luy tient lieu de gendre (en at-
 tendant que M. de Combalet luy en aye donné
 vn de plus grande estoffe) a dit au Roy de Suede,
 qu'il auoit esté tenté de tuer le C. tāt il auoit en
 execration son ingratitude enuers la R. Mere du

Roy. Avec pareille ignorance est rapportée l'histoire du Dauphin qui fut depuis Louys XI. On

Pag. 13. dit, *qu'il ne remua iamaïs rien en France durant les dix années de son esloignement.* Pour conuaincre cette fausseté, il faut lire nos Histoires; & pour cognoistre l'impertinence de l'esprit folet, il faut peser ce qu'il dit sur le rencontre des affaires presentes; que le Comte de Dampmartin eut ordre de se saisir de la personne du Dauphin. Par là on veut faire entendre, que le Comte de Nanteüil, voisin de celui de Dampmartin, autrement le Marechal de Schomberg, a vne pareille commission: mais il aura bien de la peine à l'executer; & sans faute le mauuais Ange du Cardinal n'est pas discret, lors qu'il descouure trop son secret. Il fait voir aussi qu'il n'est pas bien informé: s'il estoit amy de Dieu, il ne luy auroit iamaïs reue-

Pag. 14. lé, que Monsieur se retire en la Franche Comté, ou va en Prouence, pour prendre retraite en Italie. Le temps descouurira que ses espions n'ont pas bien seruy le Cardinal, & que Dieu couure beaucoup de choses au demon du pretendu grand Ministre de France, ou que le diable est esprit de mensonge dans la bouche de ses Prophetes, qui predissent les choses qu'ils desirent.

Pag. 15. Ce Genie furieux a conclu ses boutades par vne saillie contre ceux qui ont defendu dans leurs escrits la reputation de la Roïne Mere du Roy, & de Monsieur: il les appelle *parricides*, pour auoir attenté à l'honneur du *second Pere de la France*, qu'on veut faire passer pour fille de Prestre, & pour vn monstre, en disant qu'elle a deux Peres. Il dit, que nous auons allegué des faus-

setez, & mauuaises raisons: mais il n'en marque pas vne. Il adiousté que *Monsieur les detestera vn iour*: si nous n'esperons point la recompense, pour laquelle nous ne seruons pas; nous ne craignons point le blasme, que nous n'auons point merité. Cet infame Python, qui ouure sa gueulle afin qu'on la remplisse, qui employe du mauuais encre pour auoir du bon or, qui sert aux passions pour auoir des pensions, ne considere pas que les Escriptuains de la Verité ont abandonné leurs biens pour la defendre, lors que les aduocats du mensonge en acquierent pour debiter l'imposture. Le chastiment, duquel ils menacent les hommes vertueux & courageux, est à la porte des lasches corrompus: s'ils croient, qu'ils se mettront à couuert contre la iustice des hommes dans les retraites du Cardinal; celui qui les promet n'y fera point en seureté contre celle de Dieu, lequel enuoyera bien tost le vray & bon Genie de la France, qui parlera ainsi au Roy:

Grand Prince, puis que la peur ou la corruption des hommes empeschent, que les cognoissances de ce qui se passe dans vostre Royaume n'entrent dans vostre esprit; Dieu qui cognoist vostre bonne ame, enuoye l'Ange tutelaire de la France, qui est aussi celui de vostre personne sacrée, pour vous apporter les lumieres du Ciel. Il vous aduertit, que sa sainte Prouidence qui vous aime, qui a imprimé dans les cœurs de vos suiets le respect qu'ils vous portent, qui a ietté la terreur dans l'ame de vos ennemis, & qui vous a donné des aduantages sur eux, est sur le point de retirer ses graces, si vous ne faites reti-

rer celuy qui ruine l'Eglise sainte, qui trompe le Souuerain Pontife, qui abuse de la credulité des Moines, qui est cause de la desolation de l'Europe, & sur tout de vostre Royaume; qui a produit le scandale de l'emprisonnement de vostre Mere; qui a priué des alimens celle qui vous a donné la vie, qui a rauí son bien à la Vefue de vostre Pere sans forme de Iustice, qui veut faire mourir vostre Frere, qui a fait decapiter vn innocent, qui fait languir en diuers cachots trois cens prisonniers, qui a ietté la confusion dans tous les ordres, a violé toutes les loix de vostre Estat, & qui a degousté tous vos Alliez: ils sont sur le poinct de s'vnir avec vos ennemis, afin que toutes les forces de l'Europe tombent sur vos bras, que la pauvreté de vostre peuple ne scauroit plus appuyer.

Vous ne pouuez auoir vne parfaite santé ny assurance d'une longue & heureuse vie, qu'en rendant les tesmoignages d'honneur & d'amour à vostre Mere, puis que la recompense des années est donnée à la vertu de pieté. Ne reiettez pas celuy que la nature a fait vostre Frere: il est vostre semblable hors de la Royauté, & vous tient lieu de Fils, iusques à ce que la benediction de Dieu, qui est retenuë par les mauuais conseils de vostre Ministre, en aye donné vn à vostre Mariage. Rendez Iustice, ou donnez grace aux accusez. Reglez vos soldats, faites les payer & chastier; ils vivent parmy vos suiets comme barbares: vne grande partie des laboureurs a pris la fuite, pour faire des peuplades dans les pays estranges, ou pour mendier dans

les vostres. Le vray moyen de couper la racine à tous ces maux, est d'estouffer la guerre, dans laquelle vostre Conseiller veut regner, ne detestant rien tant que la paix, qui dissiperoit les broüillars qui couurent ses vengeances, & ses pillages. Il vous amuse par l'esperance de quelques petites conquestes, qui tournent toutes à son profit; & il fait dessein de rendre ce que vous prenez, pour acquerir des amis contre vous, lors qu'il recherchera ses vieux ennemis pour combattre les nouveaux. Ouurez vos yeux & vos oreilles : voyez la misere de vos peuples, & escoutez la voix de vos anciens & fideles seruiteurs. Celuy qui n'entend qu'un homme est toujours trompé. Le Conseiller qui veut estre seul, est assurément un presomptueux, & il y a grande apparence que c'est un traistre: la modestie ne reiette iamais des compagnons, & la fidelité est bien aise d'avoir des tesmoins de ses conseils. Ceux qu'on vous donne sont plus hazardeux que sages; ils ont, comme les apparitions des mauvais Anges, des commencemens agreables, mais leur fin sera remplie de trouble. Souvenez vous que vous estes Roy pour rendre Iustice, & que vostre peuple ne la peut esperer de vous, tant que vous la refuserez à vostre Mere, & à vostre Frere. Ceux qui vous engagent à beaucoup de guerres, vous iettent dans la necessité de faire un grand nombre d'Edits qui ruinent vos suiets. Je sçay que vostre bonne ame en a eu auersion, & ie suis tesmoin de vos soupirs; mais les affaires pressans vous ont contraint d'y consentir. N'attendez pas que l'extrême misere de la

France vous face hair ceux qui en sont les causes; mais arrestez les deuant que le mal soit hors de remede. Ceux qui mettent en pieces vostre Estat, seront grands Seigneurs avec vne petite partie de son desbris: mais vous ne serez iamais grand Roy, si vous ne le gardez tout entier. Vous n'auéz point d'autre moyen que la paix, que vous reestablirez en reestablissant toutes choses en leurs places; & iusques à ce qu'elles y soient, vous ne verrez que des sousleuemens & des guerres ciuiles. Escoutez des Conseilliers paisibles: les vostres ne sont pas vnis par affection à vostre seruice, mais ils sont liguez par faction pour se maintenir. Dieu vous veut faire regner avec Paix, Iustice, & Sagesse, sans l'assistance de cet homme, qui s'est imaginé, que la Puissance infinie n'a point d'autre instrument que la viuacité de ce petit cerueau, plus propre à esmouuoir qu'à resoudre: son ame est abandonnée à toute sorte de passions: l'orgueil l'a aueuglé, & la cholere luy sert de guide. Il ne vous peut estre vtile, n'estant point agreable à Dieu; de la grace duquel sortent toutes les bonnes pensées & actions. Suinez les sentimens qu'il vous donne; & croyez celuy, qui par les ordres de sa sainte Prouidence a la charge de conseruer vostre ame, vostre corps, & vostre Royaume. C'est le vray & bon Genie de la France, non ce menteur & ce badin lutin, qui a entrepris de faire vne sottise & meschante harangue à vostre Frere.

RESPONSE

RESPONCE

A

LA SECONDE

LETTRE IMPRIME'E

AVEC

LE PRINCE

DE BALSAC.

ET

REMPLEE DE

CALOMNIES CONTRE

LA ROYNE MERE

DV

ROY TRES-CHRESTIEN.



RESPONSE

LA SECONDE

LETTRE D'ADIEU

ADIEU

LE PRINCE

DE DALISAC

ET

REMPLE DE

CALOMNIES CONTRE

LA ROYNE MERE

DE

ROY TRESCHEATIN



R E S P O N C E

A

L A S E C O N D E L E T T R E Q V E B A L S A C A F A I C T I M P R I M E R A V E C s o n P r i n c e .

BAlsac, la haine ne me poussera jamais à mesdire de toy, ny l'en- uie à te dire la verité : mais la charité Chrestienne me portera tousiours à desirer ; que tu sois aussi sage Escriuain comme tu veux & crois estre agreable. L'amour propre, l'ignorance & la flat- terie t'ont persuadé, que l'esprit & le iugement estoient vne mesme chose. On voit bien que tu es entre les mains de ces mauuais conseillers, & que tu n'as point d'autres ministres de l'e- stat de ton ame, & de ta reputation, que ces trois infidelles. Pour escrire en homme, & pour les hommes, il faut reietter le stile que les an- ciens Critiques ont appellé *Metricus* : les Sa- ges l'ont banny des Republicques, comme la cause & l'effect de la corruption de la ieunesse: les mieux sensez ont iugé qu'on deuoit employer

plus de temps & d'estude, pour choisir les choses, qu'à trier les mots pour les expliquer. Vn Peintre est plus estimé pour le trait que pour le colori. Vne belle femme peut estre desbauchée, ou puante, ou folle. Qui cause mieux que les Courtisanes de Venise, qui ont acquis l'intelligence des langues en perdant leur honneur? Nous auons veu à Paris vne miserable vagabonde, qui se disoit fille du feu Roy, & d'une Princesse; elle racontoit ses auantures imaginaires de si bonne grace, & en si beaux termes, qu'ils rauissoient tous ceux qui l'escoutoient: elle ne laissoit pas d'estre menteuse, & pauvre. Le Hertie des petites maisons est vn excellent maistre d'escriture, il forme fort bien les lettres, mais ce qu'il escrit n'a point de sens. Tu perds tant de temps pour adoucir ton ouurage, & pour chercher des rencontres curieux, qu'il ne te reste point de loisir pour prendre garde à ce que tu escris: & faisant vn procez verbal sur vne particule, tu fais le procez à ta reputation. La langue begaye en vn yurongne, apres que son cerueau est esbranlé: ainsi les escrits ne disent rien en desordre, qu'apres celuy de l'ame de l'escrinain.

Tu veux faire dire: Balsac a des belles pensées; mais ces pensées ne sont ny veritez ny raisons; & celuy qui les lit, ne scauroit deuenir ny plus sage, ny meilleur, ny plus scauant. Ceux qui se mettent de faire des liures, quoy qu'impertinens, ont tous des sectateurs & disciples. Les tiens sont semblables à ces petits enfans, qui recoiuent des empoulles d'eau & de saumon; elles pa-

roissent de diuerses couleurs en sortât du tuyau, & ne laissent en la main qui les rompt, en les voulant prendre, qu'un peu de sale humidité. Les premiers hommes qui virent l'arc au Ciel, croyoient que c'estoit un pôt azuré; ils reconnurent apres que ces apparences estoient faites & defaites par le Soleil, & que c'estoit un beau mēfonge. Les bonnes gens de village qui voyent vne grande quantité & diuersité de marmousets, que certains Allemans font passer avec des ressorts cachez, s'imaginent qu'on leur enchante les yeux, iusques à ce qu'ils ont cognu le secret qui leur fait regretter le temps, & l'argent qu'ils ont perdu pour contenter leur curiosité. Il est vray, que tes escrits peuuent piper pour la premiere fois les esprits communs des ieunes gens. On voit en l'Alchimie les rencontres & passages des metaux qui amusent les souffleurs : & en tes œuvres, selon la diuersité des suiets, on remarque des gentils traiçts ; mais c'est en vain qu'on attend l'or de la sagesse, ou de quelque cognoissance releuée. I'ay pitié de toy, parce que ie sçay bien que tu ne fais rien sans grand trauail ; que ton ame sterile ne produit que par endroits, avec un extrême soin ; & que tout ce que tu peux faire, est de polir vne periode dans un iour. Ce qui te rend plus coupable, est, que tu employes beaucoup d'heures pour faire de sang froid vne sottise, là où les autres Escriuains de Monsieur le Cardinal en ont fait dans la chaleur de leur zele vne centaine à la fois. Les femmes de chābre des Dames, qui sont un peu vaines, ont gagné leur journée, lors qu'elles ont coiffé leur Maistresse,

& ont trauaillé toute la matinée à friser & passer vn cheueu apres l'autre, ou à dresler les parterres & compartimens d'une garcette. Tu adiuſtes & agences avec grand' eſtude tes paroles, & tu perds vn iour pour logger vne coniorction ou proposition : & apres tout cela tes libelles ſont des ieunes mignons, qui ont les cheueux mieux faits que la teſte. Voyons-nous rien de mieux tiré & avec plus de proportion que les toiles d'araignee? ce n'eſt que l'ouurage d'une ſale beſtion, qui le fait pour prendre des mouches. Ie ne te feray point de tort, ny à tes admirateurs, lors que ie te compareray avec eux à des petites beſtes; & que diray, qu'un liure rempli de ce que vous appelez *belles penſées*, eſt vn iardin tout couuert de pauots tres beaux & tres bigarres en leurs couleurs, mais qui ſont tous puants. C'eſt vn grand dommage d'auoir gaſié tant d'or pour faire des idoles, d'auoir peint avec tant d'artifice vn verre fragile, d'auoir adiouſté vn riche ornement à vne bouë cuite; bref, d'auoir perdu tant de belles paroles, pour faire vn ſi vilain discours. Employer des mots choiſis dans des libelles diſſamatoires, eſt faire profeſſion de bien eſcrire, & de mal viure.

Nous attendions la naiſſance de ce Prince, que Baſſac vouloit faire croire deuoir eſtre autant agreable comme ſeroit vn Dauphin. Il y a long temps qu'on nous fait eſperer la fin de ce travail : on diſoit qu'il ſeroit la derniere piece de l'embellissement du monde, & la mort de tous les liures, excepté de la Bible que Baſſac faiſoit ſemblant de vouloir reſpecter. Cet enfant a eſté

autant de temps dans le ventre de sa mere, que celui de la ville de Sens qui se petrifia, & qu'on tira avec estonnement, apres la mort de cette pauvre femme qui le porta dix ans.

Balsac a autant gardé le sien qui a fait mourir celui qui luy a donné la vie, lors qu'il a tué son honneur, & a esté supprimé par la censure des Docteurs, & sentence des Iuges vn mois apres sa naissance. Nous auons veu vne piece, qui deuoit estre tres releuée & tres serieuse, commencer par vne basse & ridicule inuention de Roman, par les descriptions des peupliers & des grenoüilles des riuages de la Charante, & par le bonnet bleu d'un Flamand, qui est le premier personnage de ta comedie. Cela nous fait voir, que l'auteur n'est pas seulement extrauagant dans l'election des choses qu'il dit, mais encore des acteurs qu'il fait monter sur son theatre. I'ay esté scandalisé en voyant ces impertinences logées apres le portraict d'un grand Roy: & n'eust esté que l'aduertissement au lecteur m'auoit instruit du dessein de l'ouurier, i'eusse creu en lisant à l'entrée l'exacte description des saisons de l'année, que le Prince de Balsac deuoit estre le Soleil qui les fait.

Après auoir examiné l'ouurage tout entier, i'ay dit en moy-mesme: Est-il bien sorty de l'inuention, & parti de la main de ce Roy d'elegance François, de cet excellent raffineur de paroles, de ce rcsueur melancolique, qui est si passé apres auoir brulé son sang en choisissant vn mot, en polissant vne phrase, en donnant la quarrure & cadance à vne periode; qui n'escriit rien pour re-

gler nos mœurs, & instruire nos esprits, mais pour nous faire dire qu'il a bien escrit? Falloit-il se bannir du monde, & chercher les solitudes pour entrer dans la Cour, en conduisant cet Orsat tant leché, & emmuselé d'or, & portant entre ses bras ce petit More emmailloté de broderie? Sans faute ce Roy des Escriptuains du temps n'est que leur Roy d'armes : son sceptre n'est que de bois doré, & sa cotte ne passe pas son genouil. Ce Monarque qu'il veut d'escrire, n'est pas ce grand Roy L o v y s XIII. incomparable en pieté, bonté, prudence, courage & iustice. Balsac a emprunté son nom, comme font les sergents de peur d'estre battus : il ne se contente pas de vouloir vendre à S. M. des paroles fardées, mais il luy voudroit debiter, s'il pouvoit, des vices fardés : son impiété & sa folie vont si auant, qu'il desire de nous persuader, que des crimes nouveaux sont des vertus qui auoient esté incognuës. A Dieu ne plaise, que nostre Roy soit tel que ce mauuais Peintre pour le naturel nous le depeint. Nous ne voyons, dans le pourtrait qu'il nous presente aucun trait ny de son ame, ny de ses vertus ; & comme nous n'aduouïrons point que le Prince de Balsac aye esté tiré sur l'original du Roy, nous serions aussi tres marris que S. M. fust formée sur le modelle de cet ouurier, qui nous a voulu faire vn Roy à la mode du Cardinal de Richelieu. Il est certain que tu luy as demandé le patron, sur lequel il voudroit que son Maistre se reglast : & c'est luy qui t'a fait escrire, *que le Prince parfait (comme ce bon Seigneur le desire) doit garder cette maxime: Sur vn sm-*

ple soupçon, sur vne legere desiance, sur vn songe qu'aura fait le Prince, pourquoy ne sera-il pas permis de s'asseurer de ses suiets factieux, & de se soulager l'esprit en leur donnant pour peine leur propre repos? Voila vne leçon pour vn tyran: voila ce que le Cardinal pratique, & que le Roy n'entend pas. On inuente des crimes, pour le porter à consentir à l'emprisonnement ou exil de quelqu'un, duquel le Cardinal a eu vn leger soupçon; ou qui a esté si malheureux, que son espee s'est présentée horrible à son imagination dans vn de ces espouuentables songes d'Apollodore, qui luy sont assez ordinaires. Sur ces apprehensions, ou malicieuses ou foles, on oste la liberté à ceux qui pourrissent dans les prisons, qui laissent des familles desolées, qui sont deshonorés comme criminels, & qui voyent leurs biens emportez, diuisez, dissipéz; estans comme le duc attachez avec des longes sur vne perche, il n'y a pas vn oyseau qu'il ne leur arrache vne plume. Apres auoir fait les songes, regles de la Iustice, & maistres de la vie & reputation des hommes, tu adioustes vne doctrine plus estrange: Ne vaut il pas mieux empescher les innocens de faillir, que d'eslire reduit à cette triste necessité de condamner les coupables? Par cette regle il faut tuer les enfans, pour empescher qu'ils ne deuiennent pecheurs. S'il n'y a point d'homme de bien qui ne puisse faire vne faute, & la fidelité duquel ne courre le hazard d'estre legerement suspecte, parce qu'il est homme, c'est à dire changeant, ou qui ne soit suiet à vn mauuais office, ou à se rencontrer par malheur dans le songe du Prince, qui sera

celuy qui pourra estre en seureté? Tu feras le Souuerain non seulement iniuste, mais insensé, & le reduiras à se faire la barbe avec vn tison, ou à tirer l'eschelle apres qu'il sera monté en sa chambre. Estudie toy de bien dire, prepare des apologies, donne la peine à tes compagnons de soustenir ton party; tu ne feras iamais receuoir ces opinions pour Chrestiennes & humaines par vn Roy tres Chrestien, qui est Prince d'une nation, laquelle a tousiours esté, & veut estre conduite par la douceur.

De mesme & plus dangereuse consequence est ce que tu dis; *que les Princes peuvent preuenir le danger de leur vie par la mort de ceux qui leur sont suspects*: Tu adioûtes, *que c'est vne excusable seuerité, & vn effect de la prudence, qui penetre dans les pensées & secrets des hommes*. Par cette doctrine tu approuues les massacres, qu'il semble que tu detestes en vn autre endroit; ayant trouué à redire à ce qui arriva sous Charles IX. qui deuroit estre iuste, si ton sentiment estoit vne Loy. Mais comment se peut-il accorder avec ce que tu as escrit en la page 97. où apres auoir reietté la nouvelle Theologie, tu dis, *qu'on laisse crier la vieille dans les escoles, & dans les chaires des Predicateurs, où elle enseigne qu'un petit mal est defendu, quand il en deuroit naistre vn grand bien. Que si le monde ne se peut conseruer que par vn peché, elle est d'aduis qu'on le laisse perdre*. Il me semble que ce discours Chrestien, tiré de saint Paul, deuroit retenir celuy que tu as fait apres; qu'un songe creux peut faire emprisonner l'innocence, & vn petit soupçon tuer vn ou plusieurs hommes pour

Pa. 290.
& 201.

La saint
Barthe-
lemy.

Pag 97.

Rem. 3.

le salut du Prince, ou du public. On les peut conseruer par des voyes plus seures & plus saintes que celles là. Les Souuerains ont la Iustice contre les indices des attentats, ou rebellions: il ne leur est pas loisible de faire massacrer personne, s'il ne resiste à la iuste puissance, ny d'emprisonner pour vn songe: autrement nous deuons prier Dieu, comme faisoient les Indiens dans Philostrate, qu'il enuoye des bons songes à nos Roys, ou desirer qu'ils ne nous cognoissent pas, de peur de nous rencontrer dans les fantasmes de leur sommeil, ou dans les resueries de leurs maladies.

Tu ingeras, si le Roy suiuant tes preceptes peut garder cette pureté de conscience, que tu loges à vn si haut poinct de perfection, que tu as osé dire, sans reuelation, *qu'humainement parlant*, Pag. 117
Et dans la rigueur de nostre iustice, s'il ne se calomnie soy mesme en la confession, il ne peut s'accuser de mal faire: qu'il a conserué pure & entiere l'innocence iusques icy qu'il a receu de son Baptisme: mais en effect il se laue bien souuent pour se rafraeschir, non pas pour se nettoier; & prend des remedes pour se confirmer en santé, non pas pour se guarir. Tu ne sçais donc pas, que si c'est vn sacrilege de taire avec malice son peché, c'est vn crime, ou vne sottise, de s'accuser de celuy qu'on n'a pas fait. Sa Maiesté n'ayant iamais offensé Dieu, n'a iamais eu l'absolution, si elle ne s'est chargée de ce qu'elle n'a point commis. *Le iuste tombe sept fois le iour, & se releue.* Prou. 14
 L'innocence telle que tu la descrits, n'est que dans la foiblesse des années ou de l'esprit: l'infirmité de la nature produit ces deux là; la grace

* Deux
Chirur-
giens re-
nommez
en la
Cour de
France.
Rom.3.

en a donné vne plus releuée à la sainte Vierge, & à saint Iean Baptiste; les Apostres la receurent aussi avec le saint Esprit. Tu fais du Sacrement de Penitence vn bain delicieux de * Despos, ou de Precontat, non du Sang du Fils de Dieu qui nous est necessaire, parce que *tous ont peché, & ont besoin de sa gloire*, laquelle paroist en la misericorde qu'il exerce en nous pardonnant. Nous le louons & benissons, de ce qu'il a fait vn rare present d'une bonne ame à nostre Prince, & qu'il l'assiste de beaucoup de benedictions pour l'empescher de l'offenser; & iugeons, par ton discours, que le Roy estant innocent iusques au poinct que tu representes, tu confirmes ce que nous auons tousiours creu, que S. M. n'a iamais sceu l'emprisonnement de la Royne sa bonne Mere, qui ne l'a point offensé ny son Estat: qu'il ignore qu'elle soit priuée de ses biens, sans forme de Iustice, sans saisie, ny condamnation; qu'on aye fait son inuentaie deuant sa mort, qu'on luy refuse les alimens, qu'on l'aye calomniée par des libelles diffamatoires: qu'on aye donné vn priuilege à tes escrits, qui rendent sa Naissance infame, & publient des impostures, qui font criminels ceux qui les liront avec autre esprit que d'execration. Il faut aduoüer, pour conseruer la vertu & reputation du Roy, & mettre S. M. hors de la necessité de se confesser, que le Cardinal employe autant d'estude à cacher à son Maistre ce qui se passe dans les desplaisirs de la Royne sa Mere, & misere de son pauvre peuple, comme tu prens de peine pour adoucir tes paroles, & à inuenter des hyperboles impies & extrauagantes.

Je ne m'estonne plus de ta mauuaise conduite, ayant recognu que ton dessein n'a esté que de plaire à celuy duquel tu as attendu ta principale recompense; & qui pour t'obliger à dresser vn Prince selon sa fantasie, t'a recommandé quatre choses. La premiere, de tascher de faire passer pour regles de Iustice, les maximes de sa cruauté & de son inquisition d'Estat, qui luy ouurent le chemin à l'vsurpation, ou dissipation qu'il veut faire. La seconde, de corner la guerre contre les Espagnols & les Italiens, de monstrier leur impuissance, d'inuiter tous les Princes & Republiques à la ruine de la Maison d'Austriche: tu n'as pas l'esprit de voir que cela sert de pretexte à celuy qui veut affoiblir le Royaume dans les efforts des conquestes estrangeres, pour auoir meilleur marché de celle de la France. En troisieme lieu, il a voulu estre loué par la desbauchée, qui courra par tout le monde, & sera trouuée belle par tous ceux qui estimeront son visage par son fard, & sa taille par son habit. Comme tu ne māqueras pas d'approbateurs (parce qu'il y a assez de personnes qui iugent des choses par les paroles) tu en trouueras aussi, apres le Pere Goulu & le Pere André, qui feront voir ton ignorance, tes larrecins plagiaires, ta presomptiō; & sur tout ton impieté, qui t'a fait prendre party avec Machiauel, qui est le seul autheur que tu as choisi pour ton Maistre, ayant traité d'escoliers tous les autres.

Deux Re-
ligieux
Fueillans
qui ont
escris
contre
Balsac

En quatrieme lieu, pour contenter ce grand Cardinal, & cet excellent Ministre (qui seroit Archiministre des pretendus reformez, s'ils n'a-

I Reg. 16

P. 2. 168

E. 182.

Pa. 99

Le ſen

R. y eſtoit

grand;

mais ce

n'eſt pas

par luy

que Dieu

a voulu

faire des

choſes

grandes.

uoient reietté la Hierarchie) il a fallu blaſmer la Royne Mere du Roy , & attacher à la fin de ton oüurage vne queue de ſcorpion , ou donner au deſſert le poiſon qui eſt dans ta ſeconde lettre. Celuy qui t'employe, ayant par vn iuſte iugement de Dieu perdu , avec la recognoiſſance, la conſcience , a toujours ſon peché deuant les yeux; non pas pour ſ'en repentir comme Dauid, mais pour entrer en furie comme Saül. Ta harpe le charme , & appaiſe en quelque façon ſa melancholie. Apres luy auoir chanté des loüanges puantes , tu te iettes tout à coup ſur l'inuectiue horrible contre la Royne Mere de ce grand Prince, que tu as exalté au meſme temps que tu as abaiffé ſa Naiffance , & que tu as meſdit de tous les Monarques anciens & nouveaux , noſtres & eſtrangers, pour mettre ton grand Cardinal par deſſus leurs teſtes, que tu eſtimes ſoles ou vicieuſes. Nous ſerions bien malheureux, ſi noſtre Roy ne pouuoit eſtre tenu pour ſage & vertueux, ſi toutes les nations , & meſmes la noſtre, n'auoient eu que des Princes inſenſez & meſchans. Tu as eu tant d'apprehenſion, que la gloire de Henry le Grand ne fiſt tort à celle du Roy ſon Fils, que tu as fait difficulté d'eſtimer ſon Pere digne d'eternelle memoire, & ie ne ſçay ſi tu le prendras pour vn de ces deux Roys moins imparfaits, & aucunement paſſables, que tu trouues dans nos trois * Races. Mais c'eſt ſans doute que ſon malheur a porté , qu'il n'a point eu de Cardinal de Richelieu pour Conſeiller, ny de Baſſac pour Eſcriuain. Ce que ie trouue plus eſtrange, eſt, que ce Prince clement & genereux

nous ayant esté rauy par vn execrable parricide;
 * de la mesme ville, qui a porté ce monstre, en
 soit sorty vn autre pour assassiner la reputation
 de sa Vefue.

* Balsac
 & Ra-
 uillie
 d'An-
 gulef-
 me.

Pour te monstrer que tu as perdu la memoire
 avec la probité, ie te prieray de te souuenir, que
 dans ton Prince, apres auoir blasmé la supersti-
 tion des Espagnols, *qui croient* (comme tu dis)
certaines propheties qui leur promettent l'Empire du Pa. 391
monde, tu reiette toutes les prediCTIONS, pour en
 faire valoir vne d'vn saint homme, qui est le pre-
 mier de ton Calendrier ; c'est Nicolas Machia-
 uel, par lequel tu fais predire à Laurens de Me-
 dicis Duc d'Vrbain, *que la miserable Italie esperoit de*
sa maison quelqu'vn qui la deliurast. Tu dis, *qu'infail-*
liblement l'esprit de Dieu, qui luy dictoit ces paroles,
voyoit de loin le Mariage de Henry le Grand, & en-
tendoit parler de Louys le Juste. Passe pour l'appli-
 cation, sans nous arrester à examiner si la Royné
 Mere du Roy est descenduë de ce Duc, & mar-
 quer ton ignorance, ou si l'esprit de Dieu estoit
 familier à vn impie. Ie pourrois dire, que si tu
 prens cette caiolterie pour vn oracle, tu dois
 grandement estimer la Princeesse, qui a porté &
 conserné le Roy qui doit accomplir la prophe-
 tie. Il est vray, que les actions que S. M. a desia
 fait, son courage & sa puissance nous donnent
 plus de suiet de bien esperer de ses desseins, que
 la terre de Messer Nicolo, l'interpretation de
 Balsac, & la conduite du Cardinal. Mais si tu
 iuges, que ce bon-heur vient au Roy du costé de
 la Royné sa Mere, pourquoy en mesme temps
 que tu trouues cette benediction dans la Naïss-

sance du Roy, la veux tu rendre vile & abiecte, pour plaire à celuy, qui s'imagine qu'on le fera passer pour fol & vicieux, si la Royne Mere du Roy est recognuë pour estre sage & vertueuse? Pourquoy dis-tu au Cardinal : *Vous endurez pour la Iustice; & vostre cause est celle du Roy & de l'Estat?* De grace monstre nous, ce qu'endure celuy qui fait souffrir non seulement la France, mais toute la Chrestienté, si ce n'est le contrecoup de sa malice, ou qu'il se charge de plus d'affaires & de biens que sa foiblesse n'en peut porter. Tu veux faire croire, que la Royne Mere du Roy fait le mal qu'elle reçoit, & que Monsieur vous persecute en se retirant. Où est le suiet du martyre pour la Iustice; duquel tu fais si bon marché, lors que tu dis, *que le Roy en chassant les Anglois a autant mervié que les Martyrs.* C'est vne saille de folie qui approche de l'impieté, apres que l'Euangile a dit, *que la plus grande charité est de perdre la vie pour la querelle & l'amour de Dieu.* Si la cause du Cardinal est celle du Roy & de l'Estat; il faut que celle de la Royne Mere du Roy, que tu tiens pour estre contraire, ne le soit pas. Il me semble pourtant que le Cardinal n'a pas sauué le Roy, & la France, durant la minorité; & que S. M. pent trouuer d'aussi fortes affections & sages conseils en sa Mere, qu'en son seruiteur. Tu le veux rendre plus necessaire à la France que Dieu & le Roy: tu tasches de prouuer que la Toute puissance n'en peut faire vn semblable; & que la sagesse d'un Prince, apres trente ans d'aage, ne se peut passer d'un Conseiller, ou en dresser vn à sa fantasie, ou discerner vn bon aduis d'auec

Pa. 106.

Ioan. 15.

d'auec vn mauuais : c'est bien accourcir le bras de Dieu, & l'esprit du Roy.

Tu poursuis : *Si vous auez de la douleur de n'estre point agreable à vne grande Princeſſe , pour le moins vous n'auetz point de remors de luy auoir eſté infidelle.* Si le Cardinal n'a point de douleur, il n'a point de ſentiment : s'il n'a point de remors (comme tu dis) il a perdu la conſcience.

Tu aſſeures, que la *priſe de la Rochelle, & le ſecours de Caſal*, plus chantez à la loüange du Cardinal que du Roy, ſont les ſeuls crimes qui l'ont rendu coupable ; & que l'eſclat de ce qu'il a fait au dehors, n'ayant peu eſtre ſupporté à la Cour, les eſtrangers ſont venus ſe meſler dans cette ialouſie domeſtique, & eſſayer de perdre celuy qu'ils ne pouuoient pas gagner. Nous te voudrions prier de t'expliquer ſur cette ialouſie domeſtique. Es-tu ſi fol de croire que la Royne Mere du Roy aye eſté enuieuſe de la gloire de ſon Enfant, ou de l'honneur qu'à peu acquerir en le ſeruant celuy qu'elle luy a donné, & duquel elle auoit reſpondu iuſques à ce que la vanité l'a changé, & que l'auarice l'a corrompu : Les conſeils de la Royne Mere du Roy, & ſes ſoins, ſont entre les cauſes principales de la priſe de la Rochelle : le Cardinal ſçait qu'elle y a plus contribué à Paris, que luy n'a fait dans le camp : elle agiſſoit & dedans & dehors, pour auancer tout ce qui pouuoit aider, & pour deſtourner tout ce qui auroit troublé cette entrepriſe. Apres le Roy elle y a la meilleure part, outre celle qu'elle prend comme treſbonne Mere dans les triomphes de ſon Enfant, n'ayant plus de Mary qui luy apporte des lauriers & des

palmes. Il est vray, qu'elle est faschée que le Cardinal les attache au Fils & à la Mere; ne laissant au Roy dans tes escrits & dans ceux de tes compagnons, que ce qu'il mesprise; & reiettant sur la Roynes toute l'infamie des fautes qu'il a fait. Il ne manquera pas de dire qu'elle seule arreste le cours des victoires & prosperitez de S. M. qu'elle a empesché la conqueste d'Allemagne, & a ravi au Roy la Couronne Imperiale. Voila les artifices avec lesquels le Cardinal pense courir son ambition, qui a esmeu plus d'affaires que sa foiblesse n'en peut conduire; & qui a l'esprit semblable à ces foyes, qui font beaucoup plus de sang que la chaleur naturelle n'en peut regir.

Voicy vne autre faillie de ton esprit: *La credulité de la meilleure Roynes du monde a serui d'instrument à la malice de nos ennemis, & la priere qu'elle fit au Roy de vous esloigner de ses affaires, ne fut pas tant vn effect de son indignation contre vous, que le premier coup de la conurasion qui s'estoit formée contre la France; & qu'on luy auoit deguisée sous vn voile de deuotion, afin qu'elle creust meriter en vous rumant.* Sauf vostre correction, Monsieur de Balsac, vous auez entassé dans cette periode trois impostures. La premiere est, que la Roynes a serui d'instrument aux ennemis de l'Estat; & que les plaintes, qu'elle fit au Roy contre le Cardinal, furent vn effect de conurasion estrangere. La Roynes n'a iamais eu intelligence avec ceux qui sont mal affectionnez à la France, ny pour tromper le Roy, ny pour estre trompée sous quelque pretexte que ce soit; les vertueuses Meres ne trompent

point leurs Enfans, & les Princesses aduisées ne se laissent point tromper. La credulité seroit vn tesmoignage de foiblesse en la femme, & la con- iuration de malice en la mere. Il n'est rien entré dans son esprit contre le Cardinal, que par ses yeux : ses actions l'ont destrompée, son insolence l'a portée à parler ; la necessité de ses affaires, & les iustes desplaisirs de ses seruiteurs, à luy oster la conduite de sa maison. Le crime qu'on veut imposer à la Royne, est feint par occasion, & vne reccrimination sans preuue. Si le Cardinal l'auoit recognu, il n'y auoit point de respect qui le deuit empescher de le declarer, & de satisfaire à son serment ; qui n'a esgard à personne, quand il s'agit du seruice du Roy. Mais son Eminence veut faire croire, que celuy trahit l'Estat, qui ne luy laisse point gouverner son esprit, & sa maison : si on recule ses espions, & qu'on se deliure de sa tyrannie, on deuiet aussi tost ennemi du Royaume. Si on n'est plus cette bonne Maistresse, qui donne trop liberalement ; on est vne mauuaise Mere ; qui veut perdre son Enfant. Si on parle librement de la ruine de la France, on deuiet Espagnol ; & ceux qui veulent persuader que les Espagnols ne desirent que nostre perte, on dit que les Espagnols font descourir nos de- fauts par la Royne. Ces discours s'accordent aussi mal comme d'estre Cardinal, Admiral, & General d'armée.

La seconde menterie que tu as dit en cet endroit, est, *que la Royne pria le Roy d'esloigner le Cardinal* : ce qui est tres faux, sauf la correctiō de ceux qui liront cet escrit. La Royne qui merite plus

de creance que le Cardinal , a asseuré qu'elle ne parla iamais au Roy de chasser le Cardinal , ny de luy oster la cognoissance de ses affaires : elle luy dist seulement qu'elle ne s'en vouloit point seruir , ny de ses parens , par lesquels elle estoit assiegée; mais que s'il plaisoit au Roy de le conseruer pour ses affaires , elle le verroit , avec ses autres Ministres, dans les conseils & ailleurs , si le bien de son seruice le requeroit. Il est vray que depuis que les violences ont esté faites, & que les perfidies ont esté recognuës, la Royne a parlé & escrit autrement : elle a iugé qu'il luy estoit impossible de trouuer la seureté qu'elle desire, & le contentement qu'elle merite aupres du Roy, que par l'esloignement de celuy que la Iustice ne peut souffrir dans l'autorité de tout prendre, ny la Prudence dans la puissance de tout entreprendre. Ne cognoistre pas le peril , seroit estre beste; & ne le fuir pas , seroit estre bois ou pierre. Ne dis pas *que sous pretexte de pieté la Royne a esté surprise.* Il n'y a point de Princesse au monde, qui sçache mieux iusques où va la Religion, qui aye vne deuotion plus solide, & qui l'accorde mieux avec l'Estat. Elle sçait tout ce que sa condition & son sexe luy permettent de sçauoir de la vraye Theologie , & ne se laisse point piper par les fausses opinions, qui ne surprennent que les foibles esprits.

Venons à ta suite : *Le Roy luy a donné là dessus toute la satisfaction qu'elle pouuoit desirer : de vostre part (Monseigneur) vous n'avez rien oublié pour tascher d'adoucir son esprit.* Disons avec plus de verité, que la Royne se porta courageusement à

tout ce que le Roy desira : elle escouta le Cardinal en presence du Confesseur de leurs Maïestez ; elle receut ses protestations , & luy donna sa parole (qui n'a iamais manqué à personne) qu'elle oublieroit les mauuais offices que le Cardinal luy auoit fait ; qu'elle sacrifioit à Dieu , & donnoit au Roy ses ressentimens ; qu'elle vouloit croire qu'il n'abuseroit iamais des bonnes graces de son Maïstre , pour en tirer occasion de procurer du desplaisir à ceux qu'il estoit obligé d'honorer & seruir. Ces paroles données & receuës avec larmes , & suiuiues de mille sermens de fidelité , furent accompagnées dès le lendemain de tres mauuais effects : il furent produits , ou par la legereté , ou par les pernicieux desseins que le Cardinal n'auoit iamais quitté , qui estoient , ou de perdre sa Maïstresse , ou d'auoir cet auantage que tous les siens fussent reſtablis aupres d'elle , & luy remis dans la Surintendance de sa maison : *Le premier* il le poursuiuit avec tant d'ardeur , qu'il fit menacer la Royne , qu'on luy osteroit tous les seruiteurs qui luy estoient plus fidelles & agreables , *President sifz* si on ne la pouuoit disposer à reprendre ceux que *cette ha-* sa prudence & sa iustice auoient chassés. Vne *rangue* Princeſſe de Naissance , la Vefue , la Mere & belle *à la* Mere des Roys , creut qu'elle deuoit tesmoigner *Royne* plus de courage , qu'un petit Gentilhomme esleué par elle n'auoit de hardiesse : elle se resolut de souffrir plustost les extrémitez de ses violences , que de porter la honte d'auoir cedé à son insolence. De là , & des paroles genercuses que Monsieur dit au Cardinal , qui a le sentiment trop delicat , sont venus tous les scandales que nous

auons veu, & de là sortiront tous les maux qui les suiuront, iusques à la ruine de la France, si Dieu n'y met la main.

Tu as donc grand tort de dire; *Les mauvais esprits qui l'environnoient, empescherent l'effet que nous attendions de vos soumissions: les diseurs de bonne fortune, & les interpretes des songes l'emporterent sur les sages conseillers, & sur les fidelles seruiteurs: la Royne se laissa persuader à vne science qui n'a iamais fait que tromper les Princes: & quelques vaines prediCTIONS furent plustost creuës, que ces eternelles veritez, que vous prononciez, lors qu'elle vous faisoit l'honneur de vous escouter.* Voilà le plus grand effort de ta mesdisance: tu crois auoir trouué vn moyen pour faire passer la Royne pour foible d'esprit, & le Cardinal pour sage, en disant que S. M. croit plus facilement des estoilles muettes que des oracles parlans, & des sottises que des raisons; que celles cy ne pouuant conuaincre le Cardinal, on le fait condamner par les songes, & par les Astres. Si nous disions que iamais la Royne n'a veu des prediseurs, le Cardinal nous tiendrait pour des personnes qui nient toutes choses. Nous confessons, que ce grand Admiral, qui fait sa carte marine des figures des Astrologues iudiciaires, & qui n'entreprend rien sans auoir consulté les deuins; a pressé quelquefois la Royne d'escouter les premiers; ce qu'elle a fait plustost par complaisance, & pour s'en mocquer, que pour y adiouster foy: elle les a ouys comme ont fait ceux qui cherchent la quadrature du cercle, la pierre Philosophale, la poudre de projection, ou le mouement perpetuel.

elle a tousiours iugé, que de leuer la teste pour contempler les Astres, sans prendre garde à ses pieds, nous peut faire tomber dās la fosse, & nous exposer, avec cet ancien Philosophe, à la risée d'une chetive seruante. La croyance qu'on donne aux vendeurs d'influences, esteint la preuoyance, sans laquelle on rencontre mille accidens qu'on pourroit destourner: elle relantit par vne sottise & oyserie esperance la vigueur des actions genereuses: on ne veut pas se tourmenter pour faire reüssir ce qu'on croit que les planettes feront toutes seules: cependant qu'elles roulent nous ne bougeons d'une place. Nous auons cette imagination, que ce que le ciel marque ou fait, sera accompli par la Prouidence de Dieu sans causes secondes, ou par la force de ce grand corps, qu'on se persuade auoir autant de puissance sur les choses libres, cōme ils en ont sur les naturelles. Cette escolle charlatane, qui ne fait que des disciples paresseux, n'a iamais esté la maistresse de celle que tu accuses faussement. Elle sçait que le Ciel est le liure de Dieu; mais que les caracteres y vont si viste, qu'il est comme impossible de les adiufter avec le moment de ce qui est arriué en terre, où les horologes ne s'accordent pas bien souuent avec le Soleil. Le monde n'ayant iamais veu deux fois tous les Astres en mesme rencontre, qui peut parler par experience de ce qui n'a esté qu'une fois? & par science, de la nature des corps si grands & si esloignez de nous, qui sommes arrestez par les difficultez que nous trouuons en la cognoissance d'une petite fourmi qui est deuant nous, & de l'ame qui est

en nous? La Royne Mere du Roy sçait toutes ces choses, comme sage Princeesse; & comme Royne tres Chrestienne elle obeit à la loy de Dieu, qui deffend d'adiouster foy aux deuins, que tu appelles *diseurs de bonne fortune*. Dans ta mesdisance tu a esté plus aduisé que le Cardinal, qui en sa Declaration enregistrée par la violence qu'il a fait au Parlement, & dans les liures infames de tes compagnons, assure que la Royne n'as pas esté seulement foible pour se laisser amuser par des predicions, mais qu'elle a esté meschante pour en esperer des effects contraires à la conscience, & à la nature. Dieu qui cognoist & sonde les cœurs, sçait que cette imposture, fondée sur les lumieres du ciel, est plus noire que les tenebres de l'enfer. Celuy qui a fait tout ce qu'il a peu pour en auoir quelque indice, & qui apres les promesses a employé les tortures pour perdre vne bonne Mere dans l'esprit d'un bon Fils, n'a rien trouué que sa cōfusion; & à conuaincre sa malice, en voulant accuser l'Innocence. Pour conclusion, tu sçauras que la Royne Mere du Roy ne cherche point sa felicité dans le ciel des estoilles, mais dans le ciel des vertus.

*Au
procez
de Sene-
le.*

Pour ces *eternelles veritez*, desquelles tu le fais autheur pour le rendre precepteur de la Royné, assure toy, qu'il n'a iamais fait cette leçon à celle qui l'a recognu pour seruiteur, non pour pedagogue. Il y a long temps que cette Princeesse n'en a plus; & tāt s'en faut qu'elle aye appris du Cardinal comme il falloit viure avec le Roy, que c'est luy qui doit à la Royne les instructions pour sa conduite. Il les a quittées lors que l'ambition

l'a corrompu: c'est ce maistre qui luy a chatouillé le oreilles, & l'a diuerty (comme dit saint Paul) *de la verité, pour le ietter dans la vanité.* Tu ^{1. Tim^e 4} dis, que cet excellent directeur des esprits a remonstré à la Royne, *qu'elle ne deuoit regarder que le Roy:* tu sçauras, que le mal qu'elle a receu luy est arriué pour ne l'auoir point voulu perdre de veüe, & pour veiller sur les actions de ceux qui mesnageoient aussi mal ses affaires, ses alliances, & son Royaume, que sa santé, & sa reputation. Tu adioustes pour second precepte du Cardinal, *que la grandeur de l'Estat ne dimmuoit point celle de la Royne.* La puissance de la France ne peut estre celle du Roy, qu'elle ne soit à sa Mere, qui à la seconde part au contentement, à la gloire, & à la seureté. Si le Cardinal luy a peu oster la dernière, il ne luy rauira iamais les deux autres: elles suiuent la nature, & la vertu, qui sont aussi entieres en Flandres qu'en France. Dans vn triste esloignement la Royne se resioüit aussi bien des vrayz aduantages du Roy, & prie Dieu avec autant d'affection de les conseruer & augmenter, comme elle feroit dans le Louure, ou dans le Palais de Luxembourg, où elle doit trouuer, avec les bonnes graces du Roy son Fils, le centre de son repos, & attendre la fin de sa vie. Le troisième aduis que tu fais sortir du Cardinal, est, *Que les conseils qui viennent d'Espagne, ne sont pas bons pour les affaires de France; & que de laisser faire les Espagnols, n'est pas demeurer en repos, mais se preparer de la peine & à toute la posterité.* Si le Cardinal eust donné ces instructions à la Royne, & s'il eust tesmoigné qu'il se deshoit de sa fidelité enuers la

*Le liure
du Prin-
ce de Bal-
zac ne
presche
que la
rupture
avec l'E-
spagne.*

France, sa temerité meritoit que Sa Maïesté le chassast de sa maison: elle l'a fait, lors que l'imposture de son Eminence a entrepris de faire passer pour vn crime la paix avec l'Espagnol. La Royne n'a iamais eu autre desir que de conser-ner la bonne intelligence entre ses Enfans, & a creu que la rupture entre leurs Couronnes pour-roit apporter vn notable preiudice à la France, comme il est arriué. L'ignorance du Cardinal, ou sa malice, a fait semblant de ne le croire pas, pour couvrir le dessein qu'il a d'affoiblir l'Estat, en nous faisant venir aux mains avec l'Empereur & le Roy d'Espagne; qui n'ôt rien entrepris qui nous doïue obliger à vne guerre ouuerte. Le Cardinal a trouué ta melancolie disposée, ou ton auarice preste pour receuoir avec honneur, sous esperance de profit, la charge de trompette fanfaron, ou plustost de soldat François, d'auant-victorieux, & de corneur infame de cette guerre: mais, selon le sentiment de tous les sages, elle s'accorde fort mal avec la pauureté, peste, & famine qui affligent le peuple, avec le mauuais traitement qui a esté fait à la Royne Mere, avec l'esloignement de Monsieur Frere unique du Roy, avec les mescontentemens des Grands & de tous les Officiers, & sur tout avec les actions de celuy qui employe ta plume de paon pour nous amuser par ses belles couleurs, cependant qu'il tasche de se rendre maistre du Royaume, ou d'une bonne partie. Tu es gagé pour crier au Roy, qu'il doit courir apres ceux qu'on accuse faussement de luy auoir coupé la bourse, lors que le Capitaine de la Matte l'em-

porte, & se sauue : mais ce grand Prince verra bien tost qu'on luy veut donner le change; il te chastiera pour tes mauuais escrits, & le Cardinal pour ses estranges fineses.

La conclusion des pretenduës leçons de ce ^{Ce Do-} Docteur politique, ou de Palestine, est : ^{Fleur de} Les estoilles ne luy pouuoient rien apprendre de plus vray ny ^{Palestine} de meilleur : ^{estoit un} & si elle se fust arrestée à ces bons oracles, ^{fol de} nous la verrions encore pleine de gloire & de maiesté ^{Paris.} auoir part à toutes les pensées de son Fils, & nous vous verrions encore receuoir ordinairement de sa bouche les commandemens de vostre Maistre : mais elle ne l'a pas voulu. Tout ce que la Royne Mere du Roy a attendu de vray & de bon des estoilles, est là lumiere & l'influence de celle qui illumine & conduit les Roys, qui leur monstre la demeure de la vertu, qui gemit & endure. Nous esperons que cet Astre s'arrestera là, apres qu'il aura caché sa clarté à celuy qui persecute l'Innocence, & qui descharge sa rage sur les seruiteurs; le conseil de Dieu n'ayant pas voulu permettre qu'elle aye fait perir les Maistres. Et afin que tu ne sois pas en peine d'interpreter cet enigme, lors que tu sçauras que celuy qui te fait escrire est vn Herode, tu trouueras l'explication du reste. I'adiousteray que le Cardinal estant vn feu folet, qui ne guide point le Roy, mais le veut conduire dans vn precipice; ce sale meteore, qui est vne exhalaison que le Soleil de la liberalité de la Royne a esleué de la terre, sera bien tost esteint, & ne laissera qu'une puante fumée.

Tu dis que la Royne n'a point voulu escouter les bons oracles du Cardinal, & que cela luy a fait perdre

sa gloire, & la part qu'elle auoit à toutes les pensées du Roy. Tu fais bien d'appeller oracles les paroles d'un Python, qui sont tousiours ambiguës : ce n'est pas un Calchas, mais un Phorbas excellent. Il sçait & pratique mieux la doctrine des equiuoques, & des euasions mentales, que ne font ceux que tu persecutes dans tes escrits. Il est

Ecl. 2. maudit de Dieu, qui a dit, Malheur à celuy qui entre dans la terre par deux trous. Le Cardinal est semblable au Renard, qui a vne porte derriere:

Psal. 11. il parle en cœur & cœur; c'est vne perdrix de Thrace qui en a deux: & il est, comme disoit le Sage,

Ecl. 37. abominable deuant Dieu, ne discourant iamais qu'en Sophiste. Ainsi les faux Prophetes trompoient les Roys de Iuda & d'Israël avec leurs responcez douteuses : ainsi celles de Delphes estoient à double sens : ainsi nous lisons dans l'Alcoran, que Mahomet persuadoit qu'il estoit inspiré de Dieu, lors que son demon, & le mal appelé diuin, le tourmentoient. Je viens à la suite de tes impertinences.

Le Roy qui luy accorda autrefois le pardon de plus de quarante mille coupables, n'a peu obtenir d'elle la grace d'un innocent; & celuy qui est venu au bout de l'obstination des rebelles, & qui n'a rien attaqué qu'avec succez, a prié sa Mere inutilement. Ce que ie peux repliquer à ce vilain discours, & à ces belles paroles, est, qu'ayant remarqué dans ton livre du Prince, que tu as mis le nez dans celuy de Dieu, ou que tu en as ouy parler; i'ay iugé, que si tu l'auois leu tout entier, tu aurois peu apprendre, que saint Paul estimant la grace que

1. Tim. 1. Dieu a fait aux pecheurs, a dit par humilité: En-

ire lesquels ie suis le premier. Le Cardinal se doit mettre à la teste de ceux qui ont receu l'abolition du Roy, si elle a esté donnée pour les affaires d'Angers, qui furent de son inuention & de sa conduite: s'il y a eu quelque crime qui aye mérité vn pardon, il le prist avec les autres; & comme le chef, ainsi qu'il arriue assez souuent, il eust cet aduantage, qu'il receust par dessus vne grande recompense, pour monstrier que les pechez, que tu confesses pour luy, ont esté si heureux, que non seulement il en a eu l'absolution, mais la benediction; & que là où les autres ont respandu & perdu la pourpre de leur sang, il a recueilly & gagné celle qui a teint l'habit qu'il porte. Voila vn des plus beaux traits de visage de cette innocence, que tu nous depeints comme belle pucelle dans le tableau qui nous represente comme vne furie horrible, l'opiniastreté de la Royne, que le Roy n'a sceu vaincre, ny la raison conuaincre, si on croit tes impostures. Mais si on recherche la verité, on trouuera que S. M. ayant désiré que la Royne sa Mere escoutast le Cardinal, & luy tesmoignast qu'elle vouloit oublier les iustes suiets qu'il auoit donné à ses plaintes; elle a fait tout ce que le Roy a désiré, & le Cardinal n'a rien accomply de ce qu'il auoit promis: il en perdit la souuenance en sortant du cabinet de la Royne, & reprit à la porte de celuy du Roy les artifices desquels il se sert ordinairement. Pour iouer ses vieilles pieces, & en inuenter des nouuelles, il changea la honte qu'il auoit eu de sa faute en rage de l'auoir confessée; & se repentant de sa penitence, il im-

portuna le Roy de presser la Royne sa Mere de reprendre ceux qu'elle auoit fait retirer de son seruice: S. M. iugea que cette priere estoit fort inciuile, & blasma celuy qui l'auoit faite. De sorte, que le Cardinal, qui nous veut représenter l'ame de la Royne comme vne place inexpugnable à la raison, & aux prieres du Roy; a trouué que S. M. auoit resisté aux attaques qu'il a voulu faire contre la Iustice & Bien-seance: mais en fin le Roy a esté forcé par toutes les calomnies que le malin esprit a enuoyé au secours des imposteurs, pour tascher de ruiner les deux grandes ennemies des Fauoris, qui sont la Nature & la Vertu.

Tu dis, *que ce n'est pas offenser la nature de ne pas abandonner la vertu.* Nous ne traitons pas de leurs droits; nostre question est du fait: nous sommes asseurez, que le Roy & la Royne sa Mere sont de tres bon naturel; mais nous ne demeurons pas d'accord que le Cardinal soit vertueux: nous croyons le contraire de ce que tu soustiens, & disons que l'artifice & le vice l'ont emporté sur la Nature & sur la Vertu: si ces deux grandes puissances cedent pour quelque temps, en fin elles triomphent de la violence & de la finesse. Le Sang de France peut estre vn peu alteré par la chaleur de la colere, ou par la froideur de l'a- uersion, mais il ne sçauroit estre corrompu: il se remet en son temperament par sa propre force, & il bault contre ceux qui l'ont voulu eschauffer contre soy mesme.

Tu es conuaincu d'insolence & impiété, lors que tu dis, *que ce n'est pas pecher contre la reverence*

maternelle que de ne point violer l'amitié. Tu traites avec esgalité le Roy & le Cardinal par le mot d'amitié: celuy qui a voulu gagner le deuant sur les Princes du Sang, s'est desia mis à costé de son Maistre; & dira dans peu de temps, comme le Cardinal d'Yorck, *Moy, & mon Roy.* S. M. ne doit pas souffrir que le nom d'un suiet aille à l'esgal du sien, ce que Tacite dit estre tres dangereux; & ailleurs il assure, que Granus Marcellus fust accusé du crime de leze Maiesté, pour auoir esleué sa statuë plus haut que celle des Césars.

Tu nous veux persuader, que S. M. a imité nostre Seigneur, lequel parlant de ses Disciples, les appelle *sa Mere & ses Freres*; ayant dit, *que ce-
luy qui fait sa volonté, est son Frere, sa Sœur, & sa Me-
re, qu'il a pensé que les Roys ne deuoient pas considerer
en telle sorte la proximité qu'ils n'ayent esgard à l'affec-
tion; & que pour regner, ils ont veritablement besoin
d'alliances & de parens, mais qu'ils ne se peuent pas-
ser de seruiteurs & d'obeissance.* Cette application ne peut estre ridicule qu'elle ne soit impie, puis que tout manquement de respect que nous deuons à la parole de Dieu, est vne espece de blaspheme. Le Sauueur du monde parloit de ses SS. qui n'auoient point d'autre regle que ses cōmandemens, ny d'autre amour que pour luy; qui ont honoré parfaitement sa S. Mere, & qui auoient en leur compagnie les cousins de leur Maistre, qu'ils aimoient grandement. Tu employes cette leçon, pour monstrier que le Roy doit, au preiudice des siens, conseruer vn seruiteur, qui n'a point de visée que celle de son ambition; qui

n'a rien a cœur que ses intereſts; qui emprisonne la Mere, & chaffe le Frere de son Seigneur. Tu dis, que le Roy se passera plus facilement de ses plus proches, que de seruiteurs & d'obeyſſance. Monſtre nous que les ſiens ayent eſté infidelles: as-tu prouué contre eux quelque choſe qui doine faire preferer la bien-veillance à l'amour? où ſont les pieces ſur leſquelles vous pretendez de faire perdre ſon procez à la nature? Puis que vous entreprenez de vous ſeruir de la parole de Dieu, ſouffrez que ie vous allegue cette maxime, que *le valet n'eſt point par deſſus le Maiſtre*. Pour renuerſer cette loy, il faut dire: *Vous voila donc Monſieur maintenu par la neceſſité de vos ſeruites, & par les intereſts de l'Eſtat; vous voila au deſſus des vents, & de la tempeſte*. Donc le bras de Dieu a eſté accourcy & affoibly depuis qu'il l'eſtendit pour preſenter ce grand Cardinal à la France, & qu'il l'a roidy pour le maintenir: donc cet Archiministre eſt l'Athlas qui porte le Ciel, qui nous accableroit, ſi ſon Eminence auoit retiné ſes eſpaulles: donc c'eſt l'ame generale qui nous fait viure, l'air que nous respirons, le Soleil qui nous eſclaire, l'influence qui conſerue l'Vniuers, qui retourneroit à ſon chaos, ſi Dieu l'auoit eſteinte. Si ce Geant de l'Eſtat auoit ſon œil creué, la France ne ſeroit qu'une lourde maſſe de chair: ſi cette clef tomboit, toute la voûte iroit en ruine: ſi ce bouclier, qui couure le Roy dans les Theſes ſcandaleuſes que nous auons veu, eſtoit fauſſé, noſtre grand & inuincible Monarque ſeroit vaincu: & ſi vn coup de vent emportoit ce Gouvernail, noſtre Vaiſſeau ſeroit le iouiet des vagues

Mat. 10

vagues & des vents; là où par la conduite de cet admirable Admiral (qui ne fut iamais sur la mer) nous allons à vogue rancade; & celuy qui tient le timon, *est au dessus des orages & des tempestes.* Il iouyt donc de la tranquillité de ceux qui sacrifioient sur le sommet du mont Olympe: il est comme les Dieux qui estoient spectateurs sans compassion, & sans crainte des combats qui se faisoient autour de la ville de Troye. Se peut-il faire que Dieu dōne tant de repos à ceux qui troublent son Eglise, qui renuersent les Royaumes, ruinent les peuples, font gemir tant de payfans, pleurer tant de veuves, languir tant de petits enfans, emprisonner tant d'innocens, & bannir tant de malheureux? Cette Marmotte dort aussi profondement dans ses filets, comme elle faisoit en songiste: ce Samson, qui est sur le sein de la Fortune, n'a point d'apprehension, ny des ciseaux de cette infidelle, ny des cordes de ses ennemis: & ce Sisara repose sans remors de conscience qui luy perce les temples, parce que la prosperité l'a assoupy avec la douceur de son lait. Disons plustost, que celuy que tu loges au plus haut du bonheur, ne peut sans vertige ietter les yeux sur le plan duquel il est monté: il croit sans doute, que tous ceux qui le regardent, le mirent pour l'abbattre; & il s'imagine, que le sommet qu'il embrasse, branlé, parce que son cœur tremble cōtinuellement au bruit des fausses & des veritables allarmes. Celuy que tu veux assieoir *au dessus des vents*, les marque tous avec la baguette qu'il tient en la main; comme faisoit l'homme qui estoit au plus haut de la tour de

Vitruue. Cette statuë touchoit sur le vent, qui estoit à l'opposite de celuy qui souffloit: on doit dire le mesme du Cardinal, qu'il fait tousiours paroistre le contraire de ce qu'il pense. Ce n'est pas vne si petite cōtrainte, qu'on puisse, sans flatterie, estimer tres heureux celuy qui est en ce miserable estat, plustost suspendu qu'assis, & agité qu'arresté; & qui ne pouuant estre abattu que par vn seul coup, cent mille qui le menacent, luy donnent plus d'apprehensions, que ne luy fera de mal celuy qui les finira toutes.

Après cela dis tant que tu voudras: *Les plaintes qu'on a fait contre vous, n'ont fait qu'asseurer vostre Maistre, que vous esliez plus à luy qu'on ne desiroit.* Tu as grand tort de blâmer la Royne, d'auoir quelque regret de ce que le Cardinal sert le Roy (comme tu crois) avec affection & fidelité. N'est-ce pas cette bonne Princesse qui l'a donné à S. M. avec intention qu'il la seruist comme il a deu faire? n'est-ce pas elle qui a surmonté l'auersion du Roy? n'est-ce pas elle qui a gagné ceux qui s'opposoient à son entrée dâs les conseils estroits? n'est-ce pas elle qui en a respondu? qui est la caution qui soit marrie quâd on la discharge, & qui se fasche lors que le principal debiteur paye? qui est la personne si folle qu'elle se resiouysse, après auoir présenté vn valet, lors qu'on luy reproche qu'il a ietté dans vne maison vn espion, vn traistre, ou vn larron? crois-tu pouuoir persuader que la Royne seroit affligée, si elle voyoit son Roy, qui est son Enfant, fort content du seruiteur qu'il a receu de sa main?

Ce qui vient en suite, est encore plus extrava-

gant : *Je ne doute point que vous ne pleuriiez l'infortune d'une Maistresse, que vous auiez conduite par vos services au dernier degré de la felicité.* Nous auons sceu ce que l'insolence a fait dire au Cardinal, & nous auons remarqué ce que la violence luy a fait faire. Nous sçauons que l'homme vertueux adiouste au bien fait, & oste tout ce qu'il peut à l'injure; & nous auons veu que son Eminence a estouffé mille graces, pour faire viure trois paroles vn peu rudes. *Pour ses larmes*, s'il en a versé, nous sommes asseurez, que la rage de n'auoir point acheué les maux qu'il a fort auancé, les tire plustost que le desplaisir de les auoir comencez. Il ne peut deplorer comme *infortuné* ce que son dessein a produit : on n'appelle pas malheur l'affliction qu'on procure : ce qu'on nomme accident, vient d'une cause qui n'a point de conseil. Tu voudrois persuader, que les embuscades des voleurs & les coups de foudre viennent d'un mesme principe. Personne ne peut croire, qu'une pierre qui assomme vn passant, estant abbattuë par vne tempeste, soit vn rencontre semblable à l'arquebuzade d'un ennemi qui tuë par vne fenestre. Le Cardinal n'a iamais serui d'Escuyer à la Royne; pour la conduire au palais de *Felicité*; mais il y est allé à la suite de sa Maistresse. Tu es mauuais Philosophe, lors que tu prens l'effect pour la cause; & tu es insensé, lors que tu t'imagines qu'une Princesse grande par son extraction, par son Mariage, par la Naissance du Roy, par ses autres Enfans, par les Alliances qu'elle a fait, & sur tout par sa conduite & sa vertu, n'aye peu estre heureuse que par le moyen

d'un homme qu'elle a tiré de la misere. L'oubliance de la condition en laquelle on l'a trouué, & des bien-faits qu'il a receu, luy a donné tant de presumption, qu'il croit auoir en main la baguette de Moÿse, avec laquelle il chasse les tenebres & ramene le iour; ou la houffine de Mercure, qui iette les ombres dans les tenebres des enfers, & les fait sortir pour reuoir la lumiere du Ciel; ou qu'il a trouué l'anneau de Giges, avec lequel il rend visibles & inuisibles ceux ausquels il le preste: ou qu'il enuelope & déuelope les personnes, comme faisoit Venus son Enée. Ainsi ou ce saint Prophete, ou ce faux Dieu, ou ce Roy fabuleux, ou cet esprit de desbauchée, donne & oste la felicité, quand bon luy semble: il a apporté le bonheur quand il a voulu à la Roync, & l'a rauï quand elle l'a faschée. En fin, Balsac qui a entrepris de renuerfer toutes les creances anciennes, & qui nous veut descouurir dans ses escrits vn monde nouueau, s'est imaginé qu'il auoit assez d'eloquence, pour nous persuader que ce n'est pas la Roync Mere du Roy qui a auancé le Cardinal, mais que c'est le Cardinal qui a auancé la Roync Mere du Roy.

Tu dis vne chose, sur laquelle tu pourras estre desaduoué: *Je m'assure que vous voudriez estre mort à la Rochelle, puis que iusques là vous auez rescu dans la bien vueilance de la Roync.* Le Cardinal ne fait pas si bon marché de sa vie, & ne l'estime pas si peu de chose, la faisant si bien garder, qu'il la voulust perdre par complaisance. Par ta foy, crois-tu que cet homme, qui est pressé de sept ou huiet Capitaines, Lieutenans, Enseignes

& Exempts , qui ont des pistolets dans leurs poches , & des dagues dans les chausses , qui porte vne cotte de maille , qui a fait armer sa litiere & son carrosse , & qui craint comme vn tyran , voulust perdre cette vie delicieuse & orgueilleuse pour cette pauvre & miserable Maistresse , à laquelle il la voudroit oster s'il pouuoit ? Mais penfes-tu que la bien veillance de cette Princefse aye abandonné le Cardinal après la prise de la Rochelle ? Personne ne porte enuie à vn bien qu'elle a desiré & auancé , comme a fait la Royne Mere la reddition de cette place : outre cela elle recognoist que le Cardinal ne l'a point forcée ; c'est le courage & la conduite du Roy , avec la puissance de son Estat , qui l'ont contrainte de se rendre. De sorte , que si la Royne enuioit cette gloire au Cardinal , elle fondroit son enuie sur vn bien , auquel elle a plus de part que luy ; ce qui seroit vn grand tesmoignage de folie : son Eminence a fait assez de mal reconnu , & fait paroistre assez d'esclat de vanité , qui donneroient iuste suiet à la haine , & à la ialousie , si on en vouloit auoir contre luy.

Tu as voulu finir par l'esperance que tu donnes au Maistre de ta plume , en disant , *que Dieu dissipera vn iour ces nuagés , & enuoyera à la Royne des plus equitables pensées de la fidelité du Cardinal*. Nous attendons que le Ciel dissipe les broüillars qui couurent la France , & que le Soleil de Verité & de Iustice escarte les tenebres du mensonge & de la confusion ; mais ce beau iour ne doit pas estre desiré par le Cardinal , s'il ne le veut employer pour pleurer les fautes que cette Lumière

rè & le repos luy feront voir , pourueu qu'il vueille ouurir les yeux, & chercher la tranquillité qu'il rait à autrui, & à soy mesme.

Tu as tort de dire, que les *pensées de la Royne seront plus equitables*: comme si elles auoient esté ou pouuoient estre iniustes. On ne la peut accuser que d'auoir eu trop de bonté, qui a prouqué les iniures d'un ingrat, lors qu'elle deuoit esmouuoir sa recognoissance. Si le Cardinal auoit souffert quelque iniustice, on diroit que Dieu le punit pour celles qu'il a fait: mais iusques à present il a esté plustost en possession d'en faire, qu'en estat d'en recevoir. Il ne sera pas aussi l'obiet de la vangeance de celle qui n'en veut point prendre sur sa personne, qu'elle a mis à couuert sous la pourpre de l'Eglise; ny sur ses biens, parce que la Royne ne destruit pas ses ouurages, & ne demande pas ce qu'elle a donné. Il est vray, qu'elle seroit bien aise que ces auantages que le Cardinal a ioint, avec celuy de l'autorité qu'il a pris, n'eussent pas la puissance de continuer les desordres que nous voyons: ils sont venus si auant, que si on ne les arreste bien tost, il n'y aura que les miracles qui nous en puissent tirer. Le Ciel reserve au Roy la gloire d'auoir fait cesser les maux de son Estat, nous esperons que **LOVY S L E I V S T E** rendra Iustice à l'Eglise de Dieu & à la Royne, qui sont deux Meres, desquelles il est le premier Fils.

Ta conclusion est merueilleuse, & n'a pas besoin d'un grand examen pour faire voir la legereté de ton cerueau; qui en se loüant, se condamne; & en s'excusant, s'accuse. Il est vray que c'est

ton ordinaire, n'ayant iamais fait escrit sans apologie. Voicy tes paroles: *Je sçay bien que ie suis bon François, & que j'aime extrêmement mon Pays, mais ie ne sçay pas si ie suis bon Politique, ny si ie cognois assez nos affaires: sans doute j'ay plus de courage que de force, & plus de zele que de science.* Balsac s' imagine, que le Cardinal & luy sont les deux meilleurs François du Royaume; parce que l'un pretend au Royaume des peuples François, & l'autre à l'Empire des Escriptuains François; mais ie ne cognois pas deux plus mauuais Gaulois, que ceux qui irritent l'un par ses actions, & l'autre par ses escrits, tous les estrangers & les citoyens pour les porter à vne guerre ouuerte, & à vn souflement. Ils croyent obliger leur Pays en y mettât le feu, pourueu que la clarté qu'il produira face esclatter la gloire de ceux qui l'ont allumé, ou qui pensent en acquérir en l'esteignant. On iugera de là, si c'est par amour que le Cardinal veut embrasser la France par les deux mers; si c'est aussi par amour que Balsac flatte ses playes, au lieu d'aduertir qu'il est temps de se mettre en estat de les guarir, deuant que la gangrene oblige au retranchement des membres qui sont desia noirs & enfléz: ne rompons pas la teste en charlatans à ce pauvre malade, mais ordonnons luy quelque bon remede.

Balsac est plaissant, lors qu'il dit; *Je ne sçay pas si ie suis bon Politique*, luy qui entreprend de traicter du Prince, qui est le chef, l'ame & la loy viuante de la Police. Il a suiet de se defier de sa science, puis que sans colere ny enuie nous

pouuons dire, que iamais homme n'a plus malicieusement, ny plus bassement, ny plus legèrement traicté cette matiere.

Ton liure commence par vne entrée de ballet, & finit par vne retraicte de furie, n'estant rien qu'un amas de pieces mal attachées, un habit de diuerses couleurs grossierement cousu; & vn escrit, dans lequel tout ce que tu as sceu & ouy dire de diuerses choses a esté non pas rangé, mais ietté. Encore que le stile soit assez coulant, il n'y a rien de plus forcé ny de plus interrompu par digressions que ton ordre: on ne remarque aucune definition ny diuision des vertus necessaires à vn Souuerain, mais vn perpetuel mespris de tous les Autheurs anciens, & de tous les Monarques, avec vn tesmoignage de presumption insupportable, accompagné d'hyperboles ou hyperbates folles & impies, & de metaphores extrauagantes, qui sont les plus riches ornemens de ton discours. Je peux asseurer, que hors du pourtrait, du nom & des louanges du Roy, qui pouuoit & deuoit estre plus iudicieusement estimé, si on auoit retiré ces trois choses dignes d'un tres grand respect, ie croirois qu'un homme d'Angoulesme nous auoit voulu d'escire Angoulement, qui estoit Prince d'un Pays, dans lequel tu pouuois estre Secretaire de ses commandemens.

Angoulesme estoit un fol de Paris, qui se faisoit appeller le Prince des fols.

Tu as raison de te defier *du peu de cognoissance de nos affaires*. Si tu en scauois autant comme le Chancelier de Sillery, Monsieur de Villeroy, & le President Ianin, tu ne cornerois pas la guerre pour faire plaisir à celuy qui est en cette belle hu-

meur de la mettre par tout. Il sçait que dans la tranquillité de la Paix, on verroit & on arresteroit ses desseins, qu'il veut cacher & auancer dans les confusions.

Tu dis que tu as *plus de courage que de force, & plus de zele que de science*. Ce que tu fais, ne vient ny du courage ny du zele; encore que ces deux choses sans prudence soient temerité & folie. Mais on peut dire avec verité, que tu as plus de vanité que de capacité, plus d'effronterie que de science, & plus de caquet que de raisons: tu es vn orfèvre qui as brüny ton ouurage avec vn peu de mercure; & tu es vn Peintre, qui pour faire esclatter tes couleurs, as employé du vernis qui les a toutes meurtries. Tu as comme le chardonneret vne iolie voix, avec des plumes de toutes couleurs, & rien plus, tu fais peu de besongne, & mauuaise, en beaucoup de temps: ta façon d'escrire lasse souuent la foiblesse de ton esprit: tu ferois plus de chemin, & plus seurement, si tu n'allois que le pas; mais Balsac n'allant qu'à balsades, avec son stile sautellant, il ne se faut pas estonner s'il est bien tost hors d'haleine.

Ce qui me fait bien esperer de ton amendement, est, que tu recognois vne partie de tes fautes aussi tost que tu les as faites; & qu'ayant rapporté toutes les pieces de ton ouurage, tu as apperceu sa difformité, qui ne paroissoit pas tant deuant qu'elles fussent assemblées. Cela t'a obligé à faire vne Apologie dans l'Aduertissement au Lecteur, & dans les 2. lettres qui sont à la fin de ton Liure: ainsi tu te defens deuant que d'estre

accusé. Il me semble que tu ferois mieux de changer ce qui est defectueux, que de l'excuser: & il seroit plus sagement fait, de supprimer des mauuais escrits, que d'en faire imprimer d'autres pour les soustenir. Sans faute tu te verras attaqué par beaucoup d'endroits sur ton Traité du Prince: il n'y a rien qui puisse resister que les louanges du Roy; encore ce grand Prince te dira ce qu'un bon Roy disoit de Dieu à ses amis flatteurs: *Il n'a pas besoin de vostre mensonge.* Il y a tant de belles veritez à dire de luy, que c'est faire voir qu'on ne les cognoist pas, de se seruir de menteries. Que deuindra ce fier Roland, si ce braue Oger ne luy sert de second? Il ne le fera point sur tout, apres que tu as offensé avec la Mere de ton grand Roy les Meres de ta petite science, qui sont les Vniuersitez; & que tu as en mesme temps ietté de la bouë dans la source de la vie de ton Maistre, & sur la face de ceux qui ont esté tes Maistres. Ces imprudences sont les premieres peines de ton orgueil, & les marques les plus certaines que nous ayons de ton auenglement. La fortune passera, la Nature demeurera; le mensonge perira, la Verité triomphera; la prosperité sera affligée, l'affliction sera consolée; & le superbe s'esleuera, iusques à ce que Dieu soit exalté en l'abaissant. Balsac ne sera pas trôpé, car il croit que cela arriuera: il ne sera pas deshonoré, ne pouuant estre plus infame qu'il est; & il ne sera pas deschargé par l'impression de la feuille qu'il a retenu, & dans laquelle (à ce qu'il dit à ses amis) il a defait tout ce qu'il a fait pour le Cardinal de Richelieu. La plus douce

Iob 13:

I. i. i. i.

I. i. i. i.


I. i. i. i.

I. i. i. i.

I. i. i. i.

penitence qu'on te puisse ordonner, sera de t'obliger à corriger tes œuvres au lieu où elles ont esté faites ; de convertir ta solitude volontaire en vn bannissement forcé , & de te condamner à estre trempé trois fois dans la Charante , comme on faisoit anciennement dans la Saone ceux qui auoient recité des mauuais escrits en l'assemblée des sçauans hommes, qui se faisoit tous les ans à Lyon. A Dieu.

*Palleas
vi nudis
pressis
qui gressibus an-
guem,
Aus
Lugdu-
nensem
Rhesor
dicturus
ad aram,*



LA
VERITE
DEFENDUE
ENSEMBLE
QUELQUES
OBSERVATIONS
SUR
LA CONDVITE
DV
CARDINAL
DE
RICHELIEV.

A. D.

VERIT

DEUS

ET

ET

ET

ET

ET

ET

ET

ET



AV SAGE LECTEUR.

Nous auons retenu quatorze mois cette responce, ayant mieux aymé laisser nostre reputation engagée, que d'esloigner un accommodement qu'on fit esperer il y a un an. Le Cardinal de Richelieu a iugé que nostre paix seroit contraire à sa fortune, & nous a fait une plus cruelle guerre: il a voulu qu'on fist un grand volume de toutes les iniures que ses Escriptuains auoient dit à la Roynne Mere du Roy, & à Monseigneur Frere unique de S. M. & que le sieur du Chastellet y adiousta une Preface plus infame que ne sont tous ces petits libelles. Nous auons reconnu que nostre prudence ne produisoit point d'autre effect que de rendre le men-

songe plus hardy, & auons creu, que la
 conscience & la raison vouloient qu'on ar-
 restâ cette insolence. Si le Cardinal de Ri-
 chelieu se contentoit de se faire louer par
 des corrompus, les bons esprits se mocque-
 roient des sottises loüanges qu'on luy donne,
 & ses ennemis se resioüiroient de ce que les
 flatteurs auancent sa ruine: mais lors que
 ces frippons calomnient tous ceux qu'il a
 offensez, & taschent de prouuer que les
 esclans de ses passions sont des effectz de sa
 raison, ils doiuent attirer les iustes defen-
 ces de ceux qui sont mal traitez dans leurs
 escrits. Celuy qui ne croit pas estre inno-
 cent, si la Royne Mere du Roy n'est coul-
 pable, merite non seulement d'estre chastié,
 mais il oblige l'Aduocat de cete grande
 Princeesse de fournir des reproches contre
 ceux qui l'accusent, & contre les tesmoins
 qu'ils produisent. Si les parasites du Car-
 dinal sont des chiens qui leschent celuy qui
 tient en sa main droite le baston qui les me-
 nace, & leur presente avec la gauche le pain
 pour

pour les amuser contre ceux qu'il veut
 faire mordre ; qu'il considere que nous ne
 craignons point ses coups estans en lieu de
 seureté, & que nous n'abbayons pas apres
 ses biens , luy ayant abandonné les no-
 stres. Nous l'auons prié souuent de com-
 mander à ses Escriuains de se taire : nous
 serions tres aises de n'estre point con-
 traincts d'effacer ses loüanges , en lau-
 ant les blâmes qu'il nous donne ; ce qui ne se
 peut faire autrement , à cause du meslan-
 ge qu'il a fait. Nous ne voulons pas
 user de violence ; nous ne pouuons auoir
 la Iustice : il ne nous reste qu'à nous def-
 fendre avec les mesmes armes qu'on em-
 ploye contre nous. Il est raisonnable que
 nous en ayons le choix , puis que nous
 sommes appelez. Les François qui sçauent
 & pratiquent cette regle dans leurs com-
 bats , ne le trouueront point estrange : tou-
 te la terre iugera que nous sommes fon-
 dez en raison , & chacun déplorera la
 misere de nostre siecle , qui voit ce qui n'a

iamais esté veu ; qu'un homme esleué
 par les bien-faits de la Royne , entreprend
 de la calomnier impunément dans le Roy-
 aume de son Fils ; & qu'il est si effronté
 de faire debiter ses impostures dans tous
 les Pays , où regnent les Enfans & Pa-
 rens de la plus grande Princesse du mon-
 de. Sage Lecteur , si la rigueur du temps
 oste la liberté à tes paroles , ie suis assuré
 qu'elle n'estouffera pas la iustice de tes sen-
 timens.





LA

VERITE

DEFENDVE

PErsecuter les exilez, calomnier les morts, oster la reputation apres qu'on a raiui les biens & la vie, dire des iniures aux miserables, se mocquer de ceux qui souffrent, & se courir de sa puissance pour mesdire sans preuve, sont les plus estranges effects de la tyrannie; & c'est à quoy s'occupent ceux qui veulent plaire au Cardinal de Richelieu. Il n'a pas laissé de recognoistre, que les violences luy reüssissent mieux que les mesdisances; & que les ministres de sa colere sont plus ardens executeurs de ses volontez, que ses Escrivains ne sont habiles flatteurs de ses vanitez. Il a veu aussi, que si la foiblesse de ceux qu'il a affligé, a esté contrainte de ceder à son pouuoir absolu, leur vertu a trouué en ses apologies tous les auantages qu'on tire de la verité defenduë parvne personne genereuse, & bien instruite. Il y a vn an que ces considerations le porterent à arrester les libelles de tous ceux qu'il payoit, pour faire des inuectives contre la Royne Mere du Roy, & Mon-

seigneur Frere vnique de S. M. Il fist bien, car outre que tous les hommes vertueux disoient que ces diffamatiōs estoient indignes d'un Chrestien, les gens d'esprit iugeoient qu'il ne gaignoit pas le procez par escrit. De l'autre costé celuy qui a pris la plume pour soustenir l'Innocence, & détromper l'ignorance; s'estoit tenu dans la modestie, ayant tousiours creu que c'estoit vne petite vangeance, d'attaquer avec des paroles picquantes ceux qui nous poursuiuent avec des cruelles actions. Nous esperions de conuertir le Cardinal, en le souffrant: & nous craignons de le rendre plus meschant, en luy resistant: nous auions aussi quelque apprehension d'endurcir son front, en le battant trop souuent; & auons voulu taire les plus enormes de ses crimes, pour luy laisser quelque pudeur. Nous sçauons que l'effronté n'a plus de honte de faire ce que tout le monde cognoit: nous voulions traiter doucement ce furieux, & auons eu peur que son desespoir ne perdit le Roy que nous aimons, & le Royaume que nous desirons de cōseruer. L'homme aduisé n'effarouche iamais vn singe, qui se iouie avec des choses precieuses & fragiles: il ne faut pas faire semblant de le regarder, afin qu'il les remette en leur place, apres que sa fantasie sera passée. Ainsi nous esperions, que la constance & la prudence de nostre bonté surmonteroit l'opiniaistreté & la folie de sa malice; & nous croyons, que les serpens qui nous auoient mordus si souuent, n'auoient plus de dents, ny de venin. Le silence que la crainte cōmandoit au Cardinal, & la vertu à la Royne, faisoit croire que

les affaires prendroient le chemin de la douceur, lors que nous auons senti vne aigreur extrême dans vn ouurage, qui a esté dressé par le cōmandement & sur les memoires du Cardinal. Le til-tre est : *Observations sur la vie & condamnation du Marechal de Marillac*. L'auteur a pris son pre-texte sur vn escrit composé pour la descharge du Marechal ; mais il n'en parle que fort peu, & sur la fin de son discours. La plus grande partie du libelle est employée pour blasmer la condui-te de la Royne Mere du Roy. Les plus moderez ont creu que cet escrit meritoit vne responce. Les Theologiens ont dit que Dieu nous obli-geoit à la faire ; & les bons seruiteurs du Roy ont iugé qu'elle estoit necessaire.

Il est vray, que celuy qui supporte trop pa-tiemment les iniures des impudens, en prouo-que des nouuelles ; que c'est vne œuvre agreable à Dieu d'arrester leur peché. Si la trop grande bonté de la Royne est la cause du mal qu'elle souffre, sa trop grande patience ne doit point at-tirer les calomnies qu'on seme dans tout le mon-de. Si S.M. veut sacrifier toutes les iniures qu'on luy dit, elle doit effacer auec soin ce qui peut re-iallir sur le Roy, sur Monsieur, & sur trois gran-des Princesses : parce qu'elle ne peut disposer de la gloire que Dieu a donné à leur Naissance. La Royne se doit deffendre, & ses Enfans la doi-uent vanger ; pour ietter dans l'esprit des Fa-uoris, qui viendront apres le Cardinal, l'ap-prehension de perdre le respect enuers les Me-res de leurs Maistres. Si c'est vn deuoir des gardes du Roy, de s'opposer aux attentats que

des parricides font sur sa personne sacrée, ceux qui scauent escrire sont obligez de faire voir les entreprises que les insolents font contre sa reputation. Ce qui nous rend hardis, est que nous defendons la verité contre le mensonge, la Mere de nostre Roy contre vn seruiteur ingrat, & la plus grande Princeesse du monde contre le plus petit calomniateur. Si le Cardinal se plaint, qu'en parant du poignard, nous luy portons quelque coup d'espée; il apprendra, s'il luy plaist, que c'est l'ordre des combats. Il est assez iniuste en toute autre chose, sans prendre cet auantage de frapper sans estre en danger d'estre touché. Il est bien armé, mais il contraint ceux qu'il a mis en chemise de chercher les deffauts de ses armes. S'il est plus fort que nous en places & en gardes, nous sommes plus forts que luy en ce que pour les choses qu'on dit à sa louange, il doit auoir des tesmoins qui soient plus gens de bien que le sieur Hay; & que celles qu'on dit contre luy sont desia prouuées, estant non seulement cognuës mais ressenties.

Il faut aussi confesser que nous auons vn grand desauantage: c'est que nous combattons contre deux desesperéz. Le premier est le Cardinal, qui a commandé qu'on fist ce dernier escri: contre la Royne Mere du Roy, & les Marillacs, parce qu'il est tourmenté par deux furies, qui s'appellent *Ingratitude* & *Cruauté*. Celle là luy a fait iuger des ressentimens de la Royne par les remors de sa propre conscience; & celle-cy luy representant tousiours le sang innocent qu'il a

respandu en forçant la peur, ou corrompant l'avarice de treize Iuges; il cherche des hommes qui appaisent ces puissans demons, qui sont les deux bourreaux de sa vie. Ce Saul ainsi tourmenté, n'a pas trouué vne harpe de David, mais plustost vn enragé prophete de Baal, qui se deschire & descoupe soy mesme. C'est vn autre desesperé par ses crimes qu'il a rendus aussi publics que la Nepueu sa desbauche. C'est vn nommé Hay, qui est hay de Dieu & des hommes. Vn Iuge concussionnaire, vn corrompu Commissaire, aux gages de toutes les tyrannies, & valet des faueurs, contre lesquelles il se rend denonciateur ou tescmoin; ou recherche d'estre rapporteur, lors qu'elles sont tombées en disgrâce. Il a fait autrefois l'office d'Aduocat general d'as vn Parlement; il conuertissoit le barreau en theatre de charlatan: ses plaidoyez n'estoient que des satyres: elles firent fondre sur luy vne gresse de coups de bastons, qui ne le rendirent pas plus sage, mais l'obligerent de quitter son pays, pour venir raffiner sa malice dans la Cour. Il y a vescu en reputation d'vn homme qui fait profession d'impieté & de trahison, & mestier de bouffon & de frippon. L'impieté luy donna l'inuention de souffler par vne salbacane à l'oreille d'vne fille de bonne maison, & assez riche heritiere; *Aime Hay*. Encore qu'il y eust de la contradictiõ en ses paroles, la Damoiselle espousa le cousin de cet Escriuain, & mourut de regret quelque temps apres. La trahison luy fist adorer le credit de Madame de Pisieux, & apres sa disgrâce demande avec instance la commission de faire

* La
Nepueu
femme d
Paris
extré-
mement
effron-
tée.

le procez à son beau pere, & à son mary: il suborna des tefmoins contr'eux, & changea les depofitions: nous auons ouy les plaintes du Prefident de Belieure fur ce fujet. Son efprit porté à la mefdifance, l'a réduit authœur des plus infames & fanglans pafquins, qu'on aye veu depuis dix ans. Il a fouuent imité les faines & fimples proffes du Miffel de Paris, pour faire des fатыres profanes & malicieufes, dans lesquelles il n'a point efpargné ceux qui le receuoient à leur table. La corruption luy a fait prendre part dans toutes celles du temps, & chercher l'occafion de profiter dans tous les changemens. Il brigua d'eftre adioint au commiffaire des Eftats de Bretagne l'an 1627. la friponnerie qu'il fit, meritoit plus iufteement vne potence, que tout ce qu'il impute au Marefchal de Marillac le moindre blafme. Ceux qui le cognoiffent, iugent que le gibet n'a point encore perdu les pretentions qu'il a fur luy, aduoüent qu'il y a quelque chofe en fon vifage qui marque ce logis, & que fes inclinations le cōduifent là. Le fieur Beautru, pour fe defaire d'un enfant trouué qu'on luy a voulu donner, & qui s'appelle, *Les vers aux absens*, dit hautement, que celuy qui vient d'efcrire en proffe, a composé autrefois en poëfie cette puante fатыre, qui appelle par derifion *puiffante Epiphanie* la Mere ou belle Mere de trois Roys. Elle attend l'eftoille qui les illumine; & qui en efclairant la verité, fera voir & payer celuy qui eft l'authœur de ce rencontre. Ceux qui aiment mieux vn bon mot qu'un bon ami, & qui preferent vne raillerie au repos de leur vie, ne confiderent pas

que les choses de ce monde sont semblables à la statuë del'Isle de Chio, laquelle paroissoit riante d'un costé, & pleurante de l'autre. Ils ignorent que le Sage a dit, que *les grandes tristesses suivent ordinairement les ioyes excessives*: que Dieu perd les heureux insolens, & sauue les miserables patients avec peu de chose; & que le mesme instant qui fait la felicité mal-heureuse, fait bien-heureuse l'infelicité: pour faire ces changemens, il ne faut qu'adiouster ou oster vne syllabe. L'homme qui ne regle point ses actions par cette pensée, qui s'engage trop auant dans le party de la prosperité, & pousse rudement la misere, fait paroistre qu'il n'est pas sage. Si l'Orateur Ciceron eust pensé que la fortune pouuoit changer, il n'eust pas trauaillé pour acquerir la reputation que luy donnerent les Philippiques, & qui attirerent la ruine de sa maison. Mais le Cardinal veut que ses Escriuains s'obligent à perir avec luy, & que ceux qui le seruent, luy fournissent les moyens de les perdre quand il voudra, pour les crimes qu'il leur a fait commettre. Il a cognu tant de legereté & de perfidie en celuy qui a fait ces belles Observations, qu'il a désiré non pas de l'acquerir, mais de le ruiner sans ressource. Il le fist mettre en prison, pour auoir menty au Roy; & il l'a tiré de prison, pour le faire mentir au public: il luy a fait acheter par un grand crime la liberté, qu'il auoit perduë (à ce qu'il dit) pour ne consentir pas à un moindre peché. Il fait voir que sa recusation estoit vne collusion; aussi ne fust-elle reccüe qu'apres qu'on fust assuré du nombre des opinions necessaires.

pour faire mourir vn innocent. Il est vray, que le Cardinal estoit aussi bien d'accord de la recusation, que le recusé de son emprisonnement; & que la prison a esté donnée à son esprit. remuant pour vn lieu de repos, afin qu'il eust le loisir de tranuiller à ce libelle, qui est sa rançon, encore qu'il ne soit pas l'assurance de sa fidelité: c'est plüstoit vn tesmoignage de son desespoir, ou vne cedulle semblable à celle que les demons exigent des sorciers. Cet homme sans iugement, & abandonné de Dieu, ne voit pas, qu'en sortant de prison il a changé de seruitude, il s'est obligé de perir avec vn Fauory, qui le perdra pour n'estre point en peine de le conseruer, & parce que ce sacrifice pourra seruir vn iour à quelque expiation. Le Cardinal n'est pas si sot de croire, que les ouurages de Hay soient des tesmoignages d'amour, mais plüstoit des effects de la crainte; qui cherchera ses seuretez, & trompera lors qu'il verra le profit, là où il voit maintenant la perte. Cet homme est à present vn serpent, qui empoisonne les herbes, & les fleurs sur lesquelles il passe; mais vn iour il troublera les eaux dans lesquelles il s'est caché. Nous auons d'sia sceu qu'il a fait vne prose contre le Cardinal, & la Dame de Combalet; il l'a recitée à des personnes qui sont parmy nous: il croit que les bons mots qu'il a mis dans cette bouffonnerie, effaceront les mauuais qu'il a semé dans ses Observations. Il iuge que les François oublieront les iniures, aussi facilement que le Cardinal perd la memoire des bien-faits. Il s' imagine que son eloquence nous persuadera, qu'il a contribué

la ruine de celuy qui l'employe. Il s'efforcera de nous prouver, que rien ne precipite tant les puissances violentes, que ceux qui les aident en qualité de Commissaires, & qui prennent celle d'Escriuains, pour les eschauffer au mal, ou pour les empescher de s'en retirer. Mais qui ne sçait, que le flatteur qui loüe le peché, est plus coupable que celuy qui le fait? Le meschant offence tout seul: celuy qui estime le crime, en fait vn exemple public. La passion peut auoir troublé celuy qui s'est laissé aller au mal, mais la malice conduit celuy qui le defend. Il fait voir, que ce n'est pas vne mauuaise inclination qui le pousse; mais vn iugement arresté qui le rend indigne de pardon. Loüer vne meschante action, est non seulement vne folie, mais vne impieté. Nous pourrions dire beaucoup de choses sur ce suiet: il vaut mieux laisser le detail à la meditation du sage Lecteur, & ne luy descourir qu'en gros le mauuais dessein de l'Antheur des *Observations*, & de celuy qui luy a fourny les memoires.

Ils veulent descrire la vie de deux Saints morts, & ils ne voyent pas qu'ils nous mettent en peine de rechercher celle de deux mal viuants. On a tousiours caché celle du Cardinal, qu'on sçait depuis le berceau; mais il semble que la pourpre sacrée efface tous les defauts que l'homme auoit deuant qu'il en fust reuestu, & qu'elle nettoye la source de beaucoup de vices. Si on force la patience & la science, on escrira des choses qui ne plairont pas à ceux, ausquels la cruauté plus que barbare a fait violer les tombeaux &

le repos des trespassez, pour ronger & casser iusques aux plus petits os. On adiouste aux deux freres de Marillac, la femme du Marechal : on
 Pag. 6. dit qu'elle estoit *vieille fille, pauvre, mediocrement belle lors qu'elle se maria, que leur fonds consistoit en grandes esperances.* Cette Dame est morte de regret dans la persecution qu'on faisoit à son mary: l'amour qu'elle luy portoit n'a iamais tiré vne parole de sa bouche contre son ennemy: sa vie & sa fin ont esté saintes: c'est vn sacrilege de les blâmer, & vne grande imprudence de traiter indignement sa memoire, apres auoir creu & publié, qu'elle auoit l'honneur d'estre parente du Roy. Cecy a esté escrit malicieusement, pour abaissier la Naissance de S. M. encore que cette parenté soit presque aussi esloignée, que celle de la maison de Dreux, par laquelle le Cardinal se fait cousin du Roy.

Certes il ne se faut pas estonner, si la furie du Cardinal rend la condition des viuans pire que celle des morts, qui trouuent la paix à la fin de la vie; là où ceux que cet homme violent a contrainct de sortir de la France, & sur tout la Royne Mere du Roy, sont persecutez mesmes dans le lieu de leur retraite, où leur ennemy leur suscite des trahisons domestiques, des rebellions & des guerres ouuertes au Prince qui les nourrit & les protege. C'est encore vn tesmoignage de plus grande inhumanité à celuy qui a tourmenté la France, l'Italie, l'Espagne, l'Allemagne, l'Angleterre, les Pays bas, la Lorraine, & la Sannoie, d'aller iusques en l'autre monde pour suivre trois personnes, qu'il y a enuoyées en diuer-

ses façons. Leur depart remply de pieté vrayement Chrestienne, qui a pardonné de si bon cœur à celuy qui les faisoit mourir, nous a persuadé, que leurs esprits sont bien-heureux. Qui doute qu'ils ne le soient, quand ils n'auroient point d'autre felicité que d'estre hors de la tyrannie du Cardinal? qui durant deux années, leur a fait apprehender cent mille morts, deuant que de leur faire sentir celle qui leur a donné vne meilleure vie. Il se deuoit contenter de leur auoir osté celle de ce monde avec les biens d'estre entré dans Paris avec deux cens cheuaux, les trompettes sonnantes comme en triomphe, ou en Roy, lors qu'on tranchoit la teste au Marechal; d'auoir fait fermer la porte de saint Honoré, de peur que le corps qu'on portoit en terre ne rendit par miracle abondance de sang deuant la porte de son meurtrier. On sçait, que les os du Garde des seaux ont esté priuez de leur tombeau qu'il auoit choisi à Pontoise. Le Cardinal qui a le gouuernement avec le domaine, & qui y fait quelquefois sa demeure, lors que le Roy est à saint Germain en Laye, a eu peur que l'esprit de cet homme de bien ne troubla le sien; il s'est imaginé que les os transportez seroient accompagnez de quelque ombre qui le tourmenteroit: il a voulu qu'ils demeurassent trois ou quatre mois à Chasteaudun priuez d'enterrement. Ils ont esté logez du depuis secretement aux Carmelines de nostre Dame des Champs.

Hay, qui est vn chien sepulchral, les va inquieter: il s'arreste d'auantage sur ceux du Marechal, qu'il a trouuez au fauxbourg saint Ho-

noré dans l'Eglise des Fucillants: il semble qu'il les veut brusser, & ietter les cendres au vent; ce que les iuges corrompus eurent honte d'ordonner aux bourreaux. Il sçait bien, que les Payens couppoient la main à celuy qui auoit violé vn sepulchre: il n'ignore point que la Religion Chrestienne les respecte: que parimy les Barbares c'est vn tesmoignage de lascheté, de tirer la barbe à vn lion mort: qu'il n'appartient qu'à vn faquin de dire des iniures à vn des plus sages & des plus vaillans hommes que la France aye porté. Ce Pigmée mesure avec le poulce de son petit esprit vn Hercule sommeillant, qui l'abattroit avec le soufflé de sa bouche, s'il se remuoit; & ce grand Capitaine feroit bailler les estriuières par ses laquais à ce Margaiat, ou Cannibale, qui trouue quelque volupté & nourriture, en mangeant la chair de ceux qu'il a tuez. Pour monstrier sa doctrine au preiudice de sa conscience, il escrit en la page 92. de son ouurage, qu'il sçait bien, que c'est vn crime d'attaquer les morts, & apporte les exemples de l'Ecriture sainte: il veut faire voir qu'il entreprend de pecher contre le saint Esprit; & ne veut point auoir de pardon en ce monde. d'où il a chassé les Saints, ny en l'autre, où il leur va faire la guerre.

*Je ne
voudrois
pas ar-
guer vn
mort, ny
mordre
ses os, ny
accroi-
stre le
nombre
des vers
qui rongent les
despoisil-
les de sa
fortune
desolée,*

Il me semble, que le persecuteur de ceux qui ne se defendent que deuant Dieu, se deuoit arrester apres auoir esté vn des principaux instrumens de leur mort. La recusation concertée deuant le iugement, n'exempte point de crime celuy qui a trauaillé à l'instruction du procez. Il a fourny les inuentions pour mettre hors de defen-

ce le pauvre innocent, & il a esté plustost sa partie que son iuge. Il a sollicité contre luy, & trouué des subtilitez, pour tascher de le mettre en desordre. Il n'a pas donné sa voix, mais il a formé treize aduis pour le condamner : il est plus coupable de tuer tout seul son honneur (comme il veut faire dans son escrit) que d'auoir massacré son corps avec son opinion, qui eust eu des compagnons de son crime.

Sortons de l'horreur des tombeaux, & apres auoir dit quelque chose pour la defence de la reputation des morts, soustenons la gloire de la plus belle vie du monde, qui est celle de la Royne Mere du Roy; laquelle est blasmée d'imprudence, pour monstrier que les Marillacs ont esté des meschans. Ces calomnies sont appuyées sur deux fondemens. Que si la Royne Mere du Roy a auancé les Marillacs contre droit & raison, & qu'ils ont eu vne si grande puissance sur son esprit, qu'ils l'ont porté à desirer & poursuire plusieurs choses contre les intentions du Roy, & interets de la France. Ce qui efface la premiere imposture, est la confession que le Cardinal fait par son Escriuain, qui dit la verité à faute de iugement, ou de memoire. En la page 119. il fait les Marillacs creatures du Cardinal, & par tout il asseure, *qu'ils ont esté ingrats enuers celuy qui les a auancez.* Comment se peuuent accorder ces contrarietez? voicy la verité.

Le Cardinal sceut qu'à l'entrée de son credit il passoit pour mauuais Chrestien; pour auoir employé le Comte de Mansfelt en Allemagne, & pour auoir refusé d'entrer en la ligue Catholi-

que: les libelles qui furent faits contre luy l'appelloient le Cardinal de la Rochelle; ce qui luy fist apprehender vn grand descry de sa reputation, & quelque attentat sur sa personne. Pour remede à ces deux apprehensions, il demanda des Gardes au Roy, & pressa S. M. de mettre dans ses Conseils, & direction des Finances, Messieurs de Marillac, & de Champigny, qui estoient estimez Catholiques zelez. Cela arriva apres la disgrace du Marquis de Vieuille; qui fust suiue dans vn an & demy de celle du Chancellier d'Alligre: auquel le Cardinal fist oster les Seaux, pour les bailler à Monsieur de Marillac, qu'il iugeoit homme plus seuer, & plus vigoureux, pour appuyer les resolutions qu'il vouloit prendre, & qui commencerent à esclatter dans Nantes au premier Mariage de Monsieur. Il est donc vray, que le Cardinal proposa Monsieur de Marillac premierement à la Royne, & apres au Roy, pour ces deux charges; & il n'est pas vray qu'il aye esté ingrat ny traistre au Cardinal, comme nous ferons voir.

Page. 28.

Chap. 29.

C'est vne calomnie qui est execrable, de dire, que la Royne aye eu quelque intelligence avec les Marillacs pour trauerser la prise de la Rochelle: ce qui console S. M. est, que le Roy sera son iuge & son tesmoin. Sans doute, l'effronterie du Cardinal ne l'a point porté à faire lire cet escrit au Roy: il a creu que sa bonne conscience le desmentiroit aussi asseurement, comme il est vray que le Cardinal parle contre la sienne. S. M. & son Ministre sçauent bien, que personne n'a desiré la prise de la Rochelle avec plus d'ardeur

que

que la Royne, & qu'elle a destourné sagement tout ce qui pouuoit empescher l'heureux succez de ce siege. Encore que les bonnes meres voyent avec quelque regret aller à la guerre leurs enfans; la Royne fust d'aduis, que le Roy l'entreprist pour forcer la rebellion dans son fort, & pour chasser les estrangers, qui entroient dans ses Estats. La Royne estoit pour lors si puissante dans les conseils, que ceux du Cardinal n'estoient receus que sous son approbation. Je diray bien d'auantage, que le Cardinal apporta beaucoup de difficultez, pour arrester cette resolution, estant timide de son naturel, & n'estant pas beaucoup ennemi des Huguenots. Il eust dissimulé & plastré leur faute, s'il n'eust esté picqué contre les Anglois, & principalement contre le Duc de Buckingham, pour des suiets que la prudence nous fait taire. La Royne Mere du Roy: & le Garde des seaux de Maillac, auoient les bonnes intentiōs pour cette guerre, qui donna tant de peine à S. M. que nous pouuons dire, qu'elle n'a iamais esté en vne si grande inquietude. Elle seule rompist la ligue de trois grands Princes, qui entreprenoient de faire des diuisions par terre & par mer. L'Espagne, quel'Escruain accuse d'auoir eu ce dessein, n'estoit point entrée dans cette vnion, & préferà les maximes de la Religion à celles de l'Estat.

La sagesse de la Royne ne trauailloit pas seulement pour appaiser les tempestes de la terre & de l'Ocean, qui pouuoient troubler le Royaume; mais sa pieté nous rendoit le Ciel fauorable. Combien de Messes faisoit elle celebrer pour ce

*Pag. 24.
Le Roy
d'Espa-
gne re-
muoit
sous la
Chre-
stienté,
pour em-
pescher
la gloire
du Roy;*

fuiet ? combien de neufuaines a elle fait à nostre Dame de Paris ? où elle alloit tous les soirs faire chanter vn Salut qui duroit vne heure. Le Cardinal scait bien, si la Royne est d'un naturel qui se puisse contraindre en toutes ces choses, si l'affection & deuotion ne la portent. Avec quel soin a-elle recherché les Autels & les Religieux, sur lesquels elle a creu que Dieu versoit plus de benedictions & de graces ? Elle fist vœu d'aller à nostre Dame de Chartres, d'y presenter la ville de la Rochelle en argent de relief, & de communier tous les ans le iour de la reddition; ce qu'elle obserue saintement, mesme dans les Pays bas. Elle fust curieuse de se faire instruire des vents, qui pouuoient estre fauorables ou contraires aux nauires des Anglois ; & ayant fait mettre en vn lieu esleué vne boussole qui les marquoit, elle la regardoit cent fois le iour, & interrompoit son sommeil, pour enuoyer des personnes qui luy rapportoient de quel costé ils souffloient. Ayant dit vn iour, qu'elle voudroit auoir perdu le doigt petit de sa main droite, & que le Roy fust maistre de la Rochelle: le Mareschal d'Estré qui l'auoit ouy, estant venu pour tesmoigner sa resiouissance; luy fist ce compliment, qu'il auoit deux grands suiets de ioye, que la Rochelle fust prise, & que S. M. eust encore son petit doigt. Le plus fort de tous les tesmoignages, est celuy du Roy, qui scait bien que la Royne sa Mere le voulust destourner de venir à Paris deuant que la place fust renduë ; qu'elle luy enuoya des courriers pour ce suiet, & prefera tousiours la reputation des armes de son Fils à la consolation

tion qu'elle receuoit en le voyant. Elle luy fist
instance de l'en priuer, & le pressa de s'en retour-
ner, pour acheuer ce qu'il auoit commencé. Tels
estoyent les bons aduis d'une Mere; laquelle n'a-
yant peu voir sur son sein les lauriers & les pal-
mes que son cher Espoux luy eust apporté, n'a
point de plus grãde gloire, que de prendre sa part
dans les victoires de son Fils bien aimé. Il scait
que nous escriuons la verité; & si on estoit si ef-
fronté de luy faire voir vos libelles, qui ne sont
que pour empoisonner les ignorans, au lieu des
recompenses que le Cardinal donne à ceux qui
mentent pour luy, ils receuroient le chastiment
qu'ils meritent. Mais il viendra dans le temps que
Dieu a destiné, pour faire cognoistre l'impostu-
re, & pour tirer d'oppression l'Innocence.

Vous dites, que le Marechal de M^rillac contribuoit p. 23
au monopole d'empescher la prise de la Rochelle, avec une
instruction à ceux de son chiffre, cõme il a conf- sse en son
proces, & que M^r Bouthiller ne vid point ses despesches,
& qu'elles fussent destournées par les femmes de chambre.
Méterie horrible en tous ces chefs! Le Marechal
n'a jamais escrit à la Royne durant le siege de la
Rochelle: il n'a point eu de chiffre avec S. M.
vous auriez sans doute nommé ceux que vous
dites auoir esté de ce chiffre. Vous deschargez
M. Bouthiller, qui est dans vostre intelligence; &
vous faites des femmes de chãbre, qui ne scauent
pas lire, des personnes intelligetes en chiffre, sans
dire qui deschiffroit pour la Royne. Mais la plus
horrible de vos calomnies, est en la conf- ssiõ que
vous dites q^{ue} le Marechal a fait. Que n'imprimez
vous le proces plustost que des observations sur

la ieunesse, & sur son mariage ? Vous avez brulé les pieces, & les procédures, pour auoir la liberté de faire passer toutes les inuentions de vostre malice pour des accusations contre la Royne Mere du Roy. Elle vous respond ; Que la lettre que vous luy faites escrire par le Mareschal apres la prise de la Rochelle, & que vous composez en ces termes, *qu'il ne vouloit despendre que d'elle, & estoit son seruiteur enuers tous, & contre tous*, est vne chose supposée, encore qu'il n'y aye point de crime de leze Majesté en ces paroles de compliment, lors que les interets de la Royne ne sont point separez de ceux du Roy.

Pag. 29.

Pag. 29.

Leur in-

terest

porte les

femmes

plustost

à l'ex-

tremité

qu'à la

raison.

Pag. 51.

Aux

rancu-

nes des

femmes,

comme

aux feux

d'auisi-

ce, toute

la plus

grande

finesse

est de les

faire du-

rer.

L'Auteur fait vne description à sa mode de l'imbecillité de l'esprit des femmes, sans prendre garde qu'il offence en general le sexe de Madame de Combalet; s'il ne veut faire quelque distinction pour vn rencontre que nous ne dirons pas. Son dessein est, de tirer la proposition particuliere, que la Royne Mere du Roy est imprudente, de la generale, que toutes les femmes sont folles. Pour la preuue, il dit, *que la Royne n'auoit pas encore conceu assez d'indignation & de ialousie contre le Cardinal.* La Royne iuge le Cardinal indigne de son indignation, & digne de sa compassion : il a esté l'obiet de ses bien-faits, & ne peut estre ianrais celuy de sa ialousie. La caution n'est point ialoué, de ce que le principal debiteur paye, & la déscharge. La Royne auoit respondu au Roy pour le Cardinal, & auoit surmonté les grandes auersions que S. M. auoit contre luy; & elle sera ialouse de ses bons seruites ? Nous voyôs icy, que le tiltre de bonne Princeesse, que l'Es-

crigain luy donne si souuent, n'est que pour la faire mettre au nombre de ceux que les Picards appellent *sots de bonté*. Aussi voyons-nous en vn Pag. 49. endroit, *Elle se laissoit gouverner.* & ailleurs, *Ils s'estoient emparez entierement de son esprit.* Elle s'empoi- Pag. 27. sonna sans le cognoistre à la fumée des flambeaux qui donnoient toutes ces fausses lumieres. Son esprit estoit abusé par des fausses apparences, & des images trom- Pag. 55. peuses, & semblables discours, qui font cognoistre, que le Cardinal veut faire passer la Roynne pour vn esprit infirme, lors qu'il a eu la force de sortir de sa tyrannie. Nous pouuons dire, que s'il a iamais peché en excez de bonté, c'est lors qu'il a fait trop d'honneur & de bien au plus ingrat homme de la terre, qui n'auoit point de plus grande ruse que de cacher sa malice, iusques à ce qu'il a eu la puissance pour la faire valoir. Il a commencé de l'exercer contre celle qui l'a donnée; & qui eust creu offencer Dieu, en preuoyant qu'il en abuseroit. Il sembloit que ce serpent n'auoit point de venin dans l'hyuer de sa paureté, mais la chaleur de la prosperité en a tant produit, qu'il a empoisonné premierement sa retraicte, & apres toute la terre.

Cette ialousie, qu'il donne faussement à la Roynne, est veritablement en luy; & nous pouuons dire, que sa vanité a si grande apprehension que quelqu'un ne prenne part à la louange de la prise de la Rochelle, que pour ce suiet il a fait plusieurs grands larrecins, que nous pouuons appeller sacrileges. Le premier est de la gloire du Roy, ayant dit à vn Cardinal qui est plus homme de bien que luy, qu'il auoit pris la Rochelle en

en despit de trois Roys; entre lesquels celuy qui luy auoit donné plus de peine, estoit le Roy de France. Nous auons ouy chanter sur le Pont-neuf, & par tout l. Royanme. *qu'le Cardinal auoit despuceé la Rochelle*, comme si le Roy estoit déclaré inuisant. Nous auons ieu ces mots imprimez : *N'est-ce pas ce grand Cardinal qui a pris la Rochelle* ? comme si le Roy n'auoit eu en cette guerre que la qualité de volontaire. La Royne n'est point jalouse des prosperitez de son Enfant; mais de la gloire que son seruiteur luy desrobe. Se faut-il estonner, si apres auoir fait ce larcecin public, il entreprend de voler l'honneur plus secret que la Royne a acquis en ce siege; ny s'il escrit, qu'elle a desiré le mauuais succez, puis qu'il assure, que le Roy a voulu empescher le bon ? Si faire la fausse monnoye est vn grand crime, que sera-ce de se masquer avec le faux visage du Souuerain? que sera-ce de contrefaire l'image viuante de Dieu, en vsurpant son autorité? que sera-ce de se reuestir de ses habits triomphaux, & de luy attacher les couronnes de laurier de la teste, pour les mettre sur la sienne ? Apres ces deux entreprises sur les Maistres, il faut remarquer celles qu'il a fait sur la reputation de tous ceux qui detendirent & se coururent l'Isle de Rhé. L'Escrivain ne donne rien aux Mareschaux de Schomberg, de Thoiras, de Marillac, ny au

Pag. 13 Commandeur de Valencé: il prend le tesmoignage du dernier, pour accuser le troisieme de poltronnerie. Nous ne croions jamais, que la liberté naturelle au Commandeur aye entrepris de combattre la cognoissance de tous les gens de

guerre, ou que les actions & les playes du Marechal ne soient des meilleures preuues de sa valeur, que le discours d'un homme qui pouuoit estre marri de le voir plusefleué que luy.

S'il ne se faut point arrester à la relation, que Hay appelle *Roman*, & qu'il soustient faussement estre l'ouurage du Garde des seaux de Marillac; Pag. 22. quinous peut obliger de croire, que le Cardinal, qui estoit en terre ferme lors qu'on chassoit les Anglois d'une isle, les aye deffaits tout seul, & que son esprit aye emporté cette victoire, lors que plusieurs braves soldats combattoient sous la conduite de quatre grands Capitaines? Cela pourroit estre receu, si nostre grand conducteur estoit vn Moÿse, qui gaignoit les batailles en leuant les mains au Ciel. Si on veut examiner ce qui dependoit plus particulierement du Cardinal, on verra que ses mauuais ordres, & le defaut de sa preuoyance, donnent vn iuste iuiet de conclurre qu'il estoit vn temeraire. Il fist passer dans vne isle quatre mille hommes sans viures, pour secourir vne citadele qui estoit sur le point de se rendre à faute de pain. Si les chefs des Anglois, ausquels la surprise osta le conseil, eussent apres le passage de nos gens fait estendre leurs vaisseaux dans le canal, & qu'ils se fussent tenus dans leurs retranchemens, il n'y a point de doute, que non seulement les assiegez, mais encore le secours, estoient obligez de se rendre à discretion; puis que les mesmes chaloupes qui auoient deschargé les hommes, furent renuoyées pour apporter les viures.

Concluez, que celuy qui veut auoir toute la

gloire ce bon succez, doit auoir tout le blasme du danger auquel il exposa la reputation du Roy, & de la France, avec la vie de beaucoup de gens de bien. Si on ne luy veut imputer le crime d'auoir voulu ruiner le Marechal de Thoiras, qui luy estoit suspect à cause de sa valeur reconnüe, & de sa faueur cachée; vos mensonges nous contraignent de dire ces veritez, & de vous faire sentir que nous scauons de vos nouuelles. Le temps nous a fait voir, que le Cardinal a voulu perdre Rhé, & son secours, pour perdre vn homme qu'il a persecuté ouuerremēt du depuis. S'il a contribué quelque chose pour la prise de la Rochelle, il l'a fait pour en profiter: & on peut dire en ce sens qu'il l'a prise, là où la Royne & les Marillacs n'ont cherché que la gloire de Dieu, l'honneur du Roy, & le repos de l'Estat. Ecrivez donc pour les * freres ignorans, desquels le Cardinal est protecteur, qu'il a esté porté à l'entreprise de la Rochelle par le zele de la Religion, & que son extrême affection au bien de l'Eglise & de l'Estat, l'attacherent à ce siege. C'est vn discours pour amuser le simple peuple, qui s'imagine que l'Euangile n'est en seurcté, que depuis qu'on a rasé le bastion que les Rochellois appelloient de l'Euangile, que la lumiere de la Foy esclatera d'auantage apres la ruine de la tour de la lanterne, & que la digue a arresté les cours des opinions de Luther & de Calvin. Ceux qui scauent l'Histoire du temps, ne peuuent ignorer, que le Cardinal n'aye fait la declaration par escrit, & scellée du grand sceau de France, qu'il n'attaquoit point l'opinion, mais la rebellion. Nous ne

Pag. 25.

* Les ho-
mies, ap-
pellez
freres
ignorans,
sont sous
la prose-
ction du
Cardi-
nal de
Riche-
lieu.

voyons pas aussi qu'il aye rien fait en France pour l'aduantage de l'Eglise; & nous sçauons qu'il l'a cruellement persecutée en Allemagne, & au Pays bas. Il est vray, que deuant le ministere du Cardinal le Roy entreprit le voyage de Bearn, pour restablir les Ecclesiastiques dans leurs biens: il est aussi tres certain, que les conseils du Cardinal empeschent que les Euesques & Abbez d'Allemagne ne soient remis dans leurs benefices, & qu'il a voulu ruiner la ligue qui auoit esté faite pour ce suiet. Il est assuré, que le zele du Roy a desiré l'extinction des erreurs contraires à sa Foy: mais le Cardinal en a eu si peu de soin, qu'il n'a point osté en aucun lieu de France l'exercice de l'heresie; & par ses assistances d'hommes & d'argent, il l'a estably en plus de dix mille Paroisses, & a mis le Presche dans Nancy & dans le Pontamousson, villes tres Catholiques. Si la pieté du Roy a fondé trois ou quatre Monasteres dans la Rochelle, l'impieté de son Ministre en a fait profaner & saccager ailleurs plus de vingt mille. Il a eu vn extrême regret de la mort du Roy de Suede, qui auoit (comme il a dit souuent) le dessein de faire vn trou au monde, de razer la ville de Rome, qu'il appelloit *Babylone*, & de sonner le dernier coup de la Messe par tout où il passeroit. Quand les conseils du Cardinal auroient apporté quelque petit aduantage à la Religion dans la France (ce qui n'est pas) il faut aduoüer, que nostre creance estant semblable par tout, & toutes les Eglises n'en faisant qu'une, c'est vn mesme crime de les violer en quelle part du monde qu'elles soient,

David
& les
Macha-
lées.

Pag. 36.
W 37.

Vn Cardinal, qui est Prince de l'Eglise vniuerselle, est obligé d'en auoir vn soin esgal, s'il ne veut confesser, qu'il est indigne de l'habit & de la qualité qu'il porte. Il pourra peut estre trouuer quelques exemples des Enfans de Dieu, qui se sont seruis de l'assistance des heretiques & payens, pour se garder d'oppression: mais il n'en trouuera point d'aucun qui aye esté estimé Chrestien, ayant esineu & assisté les heretiques & les infidelles, pour troubler la paix des Princes Catholiques, enuahir leurs Estats, & l'ancien patrimoine de leur maison. Le peché que le Cardinal a cõmis contre l'Eglise, qui luy a esté si bonne Mere, qu'elle l'a mis au plus haut rang auquel vn François puisse aspirer, ne nous peut faire oublier la suite de ses crimes contre la Mere de son Roy, qui a esté celle de sa fortune. Il accuse cette grande Princeesse de l'auoir voulu ruiner par les mauuais conseils des Marillacs.

Pag. 55. La Royne luy declara sa hayne en public à Fontainebleau.

Pag. 56. Elle travailloit en personne à sa ruine, tant elle estoit engagée à la resolution de le defaire.

Pag. 64. Le Roy scauoit, que les mauuaises volontez de sa Mere estoient toutes suggerées par vne faction estrangere.

L'Escriuain dit, que ces grands maux esclaterent à Fontainebleau lors du retour du Cardinal du siege de la Rochelle: que la Royne Mere en le voyant ne peut cacher sa mauuaise volonté; son visage s'arma de colere & de mespris, &c.

Nous dirons la veritable histoire de ce rencontre, apres que nous aurons fait remarquer, que le Cardinal

fust enyuré d'une prosperité que Dieu auoit enuoyé au Roy : son ministre receut toutes les louanges des flatteurs ; parce qu'il s'estoit rendu dispensateur des Finances , des charges , & des employes , qui sont le froment , le miel , & les trainées que ces formis , ces abailles , & ces loups ont accoustumé de suivre. Il reuint à la Cour enflé d'orgueil , & rempli de mespris : il creut , que l'honneste deference qu'il auoit rendu par le passé à la Roynne , estoit vne seruitude : il voulut subsister par luy mesme , ne despendre de personne , & assuiettir le Roy à ses volonte ; sur lesquelles il croyoit que le bon succez de ce siege de la Rochelle luy auoit acquis vn pouuoir absolu. Cet oyson auoit auallé cette ciguë , & donnant de la teste , tantost à droit , tantost à gauche , entreprit de hurter la Roynne Mere du Roy : ce qui se passa en cette sorte , de quoy nous prenons Dieu à tesmoin , & son image , qui est le Roy.

Le Cardinal entra dans la chambre de la Roynne pour luy faire la reuerence. S. M. luy ayant demandé fort civilement s'il se portoit bien , il respondit enflamé de colere , le front ridé , le nez affilé , & les léures tremblantes ; ce qui luy arriue lors qu'il est en desordre : *le me porte mieux que beaucoup de gens qui sont icy ne voudroient.* La Roynne rougit selon sa custume ; & pensant le diuertir de sa mauuaise humeur , souffrit envoyant entrer le Cardinal de Berule en habit court , & avec des bottes blanches. Le Cardinal de Richelieu s'approcha entre les

deux Roynes, & avec vn ton d'vn homme transporté, dit à la Royne Mere du Roy : *Je voudrois estre aussi auant dans vos bonnes graces, comme est celuy auquel vous vous moquez.* La Royne dissimulant cette seconde picoterie, respondit, que l'estime qu'elle faisoit du Cardinal de Berule ne nuisoit point à celle qu'elle auoit tousiours eu de luy, & qu'elle auoit ry estant vn peu surprise par son habit. La modestie de la Royne estoit vn eau qui tomboit sur vn charbon de pierre allumé : elle augmentoit les flammes de l'indignation & les fumées de l'insolence du Cardinal; qui commença à dire des choses estranges contre deux Princesses, qui auoient l'honneur d'approcher de la Royne. S. M. ne pouuant plus souffrir cette effronterie, sur tout en la presence de la Royne si belle Fille, fust contrainte de tesmoigner quelque ressentiment, & de luy dire qu'il se rendoit insupportable. Le Roy estant arriué sur ce rencontre, le Cardinal luy alla au deuant; & l'ayant supplié d'entrer dans le Cabinet, pour preuenir l'esprit de S. M. tesmoigna que la colere estoit maistresse du sien. Il fit des reproches du seruice qu'il venoit de rendre au siege de la Rochelle, & menaça de sa retraite comme d'vn mal-heur fatal à la France. Apres que le Cardinal eust quitté le Roy, la Royne sa Mere l'informa au vray de ce qui s'estoit passé. S. M. conclud, que le Cardinal auoit grand tort, & blasma son insolence. Luy mesme la reconnut, & la condamna apres que la froideur de la nuit eust temperé sa bile, & que le repos l'eust rendu plus sage. Il escriuit vne lettre à la Royne, par laquelle il luy

demandoit pardon de ce qui s'estoit passé : ne l'ayant peu faire presenter par le Confesseur de leurs Maiestez, qui estoit malade, il s'en rendit luy mesme le porteur; la donna avec larmes, qui luy sont assez ordinaires, sur tout quand il veut tromper. Il tesmoigna vn si grand ressentiment de sa faute, que la Royne le reestablit dans ses bonnes graces : sa malice & sa legereté ne les conseruerent pas long temps. Apres sept ou huit iours, le Cardinal, qui recherchoit les occasions de faire des affronts à la Royne en bonne compagnie, ayant trouué S. M. avec la Royne sa belle Fille, la supplia de vouloir ordonner qu'on paya la pension du Vicomte de Sardigny: la Royne respondit, qu'elle ne l'auoit arrestée que sur les plaintes qu'il auoit fait de luy; & que s'il en estoit content, elle vouloit qu'on luy donna satisfaction. Le son de cette harpe, qui deuoit charmer cet tigre, le rendit furieux. Il repartit: *Vous le pouuez faire payer de vostre tesle, aussi bien que vous avez donné de vostre mouuement, & sans me demander aduis, vne Abbaye à Vaultier vostre Medecin.* La Royne se sentit outrée par l'insolence de cette responce; & sa patience fust forcée de dire au Cardinal, qu'elle trouuoit fort estrange, qu'il se voulut rendre maistre de toutes ses dispositions & bien-faits: qu'elle luy auoit demandé conseil, quand il luy auoit pleu, pour la distribution de ses graces; mais qu'il s'abusoit, en s'imaginant qu'elle vouloit estre son esclau, & perdre la puissance de faire du bien à ses seruiteurs.

Le Cardinal s'estant retiré apres auoir tiré & receu ce coup; la Royne creut que sa Naissance,

son Mariage, & ses Enfans luy deuoiẽt donner plus de courage, qu'un petit Gentil-homme & un ſuĩteur auancé par elle n'auoit de hardieſſe. S. M. ſe reſolut de luy bailler ſon congé par eſcrit; qui luy fuſt apporté par un valet de chambre. La Royne luy commandoit de ſ'abſtenir de la conduite de ſes affaires. Le Cardinal fit voir la lettre au Roy, & luy proteſta qu'il ne pouoit quitter la charge du Surintendant de la maiſon de la Royne ſans abandonner ſa Cour, dans laquelle il ne voudroit point demeurer avec cette fleſtriſſure, d'auoir eſté chaffé par ſa Maĩſtreſſe. Le Roy luy promit, qu'il ſ'employeroit aupres de la Royne ſa Mere pour le remettre en ſes bonnes grâces: ce que S. M. entreprit, encore qu'elle blaſma la mauuaĩſe conduite du Cardinal. La Royne proteſta au Roy, que ſon intention n'eſtoit point de le prier d'oſter la cognoiſſance des affaires de ſon Eſtat au Cardinal (ſ'il le iugeoit vtile à ſon ſeruiſſe) mais de permettre qu'elle ne ſ'en ſeruiſt plus dans ſes ſiennes, pour n'eſtre pas obligée de traiter avec cet insolent ailleurs qu'en la preſence du Roy, & dans ſes Conſeils. S. M. ſe laiſſant emporter aux raiſons de la Royne, paſſoit encore plus auant qu'elle ne deſiroit; & ſi le Cardinal n'eũſt fait iouer tous ſes reſſorts, ſans eſpargner meſme ceux du pretexte de Religion, le Roy, ou pluſtoſt le bon Genie de la France, enuoyoit cet homme chercher le repos, qu'il a oſté du depuis à la Maiſon Royale, à la France, & à toute l'Europe. Le Cardinal ayant eſté remis deux fois dans les bonnes grâces de la Royne, ſe deſa de trois

choses: de son insolence, qui ne se pouuoit empêcher de picqueter l'esprit de la Royne dans tous les rencontres: du bon naturel du Roy, qui condamnoit l'audace & la temerité de cet ingrat; & de la generosité de la Royne, qui est née avec vn grand courage. Celle qui donne liberalement son bien, ne peut souffrir, que ceux, auxquels elle tend la main, luy frappent sur les doigts. Elle sçait, que Dieu mesmes, duquel la patience est infinie, a dit, *qu'il ne souffrira pas, que les ingrats qu'il a nourris & esleuez, disent contre sa d'vne Maieslé des paroles de mespris.* Le Cardinal qui apprehendoit ces trois choses, prist, pour vn moyen de les euitier, la resolution de persuader au Roy de passer les Alpes au mois de Ianuier; plustost pour empêcher que sa iustice & sa bonté ne fussent forcées par les raisons de la Royne sa Mere, que pour forcer Suze, & ses baricades.

Au retour de ce voyage arriua le bruit sur le fuiet de la Princesse Marie de Mantoüe. Le Cardinal qui estoit obligé de suivre les inclinations de la Royne, se declara hautement pour le party contraire; & contre la iustice, qui ne peut permettre qu'on traite le Mariage d'vn Enfant en despit d'vne Mere, & contre les raisons que son Eminence sçauoit mieux que personne de la Cour. Il dissimuloit, pour auoir l'occasion de se vanger de ceux qu'il s'imaginoit estre ses ennemis, & desiroit de les descourir dans ce rencontre; il vouloit aussi allier d'vn mesme coup les deux Enfans de la Royne leur Mere; ce qui est impie deuant Dieu, & horrible deuant les hommes.

Pag. 36.

L'Escruiain Hay s'estant donné carrière sur ce suiet, & croyant auoir trouué vn beau champ pour exercer son eloquence, il est necessaire de l'escouter, & de luy respondre. Il dit, *que la Royne fust sa seule cause de la premiere retraite de Monsieur.* Nous voudrions bien que le Cardinal eust plus de conscience, ou de iugement, ou de memoire, & que ses Escruiains eussent mieux concerté leurs escrits. Dans tous les autres que nous auons veu, les ministres de Monsieur sont les seules causes de ses mescontentemens, & dans cestuy-cy c'est la Royne sa Mere toute seule. C'est vne adresse du Cardinal, auquel la colere fait accuser en vne saison ceux qui ont eu la confiance de Monsieur, & sa finesse les descharge en vn autre temps. Lors qu'il les a voulu perdre, ils estoient *des monstres & des meschans*: lors qu'il les a voulu surprendre, ils sont honnestes gens, & n'ont point fait de mal. Il les fait condamner à mort pour la sortie de Monsieur; pour les rappeler, il les iustifie, & s'allie avec eux. Dieu vueille que cela ne soit point vn leurre pour les faire venir sur le poing, les enchapperonner & les mettre en muë. Ce qui est plus estrange, le Cardinal a fait sa grande machine dans l'esprit du Roy de l'inegalité & iniustice des inclinations de la Royne, ayant persuadé qu'elles estoient tellement acquises à Monsieur, que le Roy n'auoit point l'aduantage & le droit de l'aîné, & du Souuerain. Celuy qui a surpris S. M. avec cette calomnie, veut attraper Monsieur par le contraire, en publiant que la Royne sa Mere ne l'aime point, & qu'elle a transefé son

contentemēt dans le dessein qu'il auoit d'espouser la Princesse Marie. Ils disent, *que ce dessein estoit tout innocent de la part de Monsieur, & le repre-* Pag. 30.
sentent cōme rempli d'imprudēce & de malice de la part de la Rōyne, *qu'elle vouloit redonner à sa maison la gloire de l'alliance de Monsieur, & que ce desir luy a fait trauerser ses amours, que les Principaux de la faction (c'est à dire Messieurs de Lorraine) ne vouloient pas que Monsieur espousa aucune de ces deux Princesses, aspirans à l'honneur de le voir encore en leur alliance.* Il me semble, que les proieets de ces Mariages, qui sont appelez *glorieux pour Florence, & honorables pour Lorraine,* approchèt plus de la qualité d'un Fils de France, que ne feroit celuy de Madame de Combalet, qui à peine est Damoiselle, & est la vefue d'un simple Gentilhomme. La Rōyne pouuoit desirer avec iustice & raison, que Monsieur prist vne femme dāns la famille qui luy auoit donné vne Mere. Ce desir n'a point esclaté, non plus que celuy de Messieurs de Guise. La Rōyne n'a point trauersé les amours de Monsieur, que pour monstrier à ceux, qui le vouloient marier sans son consentement, qu'ils auoient tort de faire cette entreprise. Il y a d'autres raisons, que nous auons dit ailleurs: le Cardinal sçait la principale: il nous picque, pour violenter nostre discretion: il suffit que nous aduouons, qu'il n'y a rien en la naissance ny en la personne de la Princesse, qui la peut esloigner de cet honneur. La principale cōsideration de cet Autheur, *qu'elle estoit née en France,* est bien ridicule, lors qu'on peut alleguer beaucoup de qualitez qui la releuent d'auantage; & que les Roys, ny leurs

Enfans ne sont point obligez de prendre plustost pour femmes les filles de leurs vassaux, que celles des Souuerains qui sont leurs voisins.

Ce discours semble estre inutile depuis que le Mariage de Monsieur a assoupi tous ces differés, & a estouffé les pretentions de ceux qui le vouloient contraindre de se marier à leur mode, ou luy faire espouser le Donjon du bois de Vincennes. Il a usé du pouuoir qu'il auoit de choisir vne femme, & a fait election avec toutes les solemnitez de l'Eglise d'une Princesse belle, bonne, sage, & qui est sortie d'une Maison qui a esté souuent alliée avec nos Roys. Il n'est plus question de disputer sur les volontez que Monsieur a eu de se marier, mais de louer Dieu de ce qu'il est bien marié. Il ne faut plus parler des Princeses de Florence, ny de Mantoüe; mais desirer à celle de Lorraine des enfans, & blasmer celui qui tasche par des moyens sacrileges d'oster cette benediction à la Maison Royale, & ce support à la France.

Après auoir demeslé les confusions que le sieur Hay veut ietter dans les esprits, en resueillant les vieilles querelles qui sont assoupies par les alliances nouvelles; il reuient aux poursuites, qu'il veut persuader auoir esté faites pour faire perdre au Cardinal les bonnes graces de la Roynne, & la porter (ainsi qu'il veut faire croire) à destruire l'ouurage de ses mains. Il dit, qu'on a

Pag. 34. procuré ce malheur tantost en entretenant le chagrin de la Roynne, & sa mauuaise humeur, par vn silence artificieux, vn abaissement de teste, vn consentement des yeux,

des souffirs de compassion ou de crainte, & vn mouuement de risage ou des mains; tantost par quelque esclattement de conscience & de pieté simulée, qui furent les iargons de cette caballe, qui donnent en telles rencontres la force & l'assaisonnement aux venins: les autres faisoient entrer dans son ame les desirs iniustes de l'opprimer. Ne direz-vous pas, que les cercles qui se font deuant la Royne, estoient des cercles des forciers; qu'on ne luy disoit rien qui ne fust tiré du Grimoire, ou de la Clauicule de Salomon, & qu'on a employé tous les exorcismes de saint Leon, pour faire sortir de son esprit le Cardinal de Richelieu, comme s'il eust esté vn demon qui l'eust possedée? On dit plus bas: *Le complot & l'assemblée de tant d'ingenieurs de tous sexes, & de toutes qualitez, est la seule cause de tout ce qui s'est fait; & la personne Illustre d'une si grande Royne n'en est, à dire vray, que le moyen & l'organe, sans en estre coupable.* Ce qui est, en peu de mots, faire passer pour vne beste moins meschante vne des plus sages & des meilleures Princesses de la terre.

Pag. 35.

Ces discours nous contraignent de dire quelques veritez, que nous auons caché iusques à present: nous reseruerons les principales, & l'impudence des Escriuains du Cardinal ne forcera iamais nostre patience, à les laisser eschapper. Nous en sacrifierons quatre à l'honneur de la Royne & au desir que la charité nous donne de tirer d'erreur le public, & sur tout la Cour de Rome. Le Cardinal a esté soigneux de l'empoisonner, ayant pris vn grand soin de vomir son venin, comme font les aspics dans les plus claires fontaines, & de jeter le mensonge dans

les lieux ; où tous les Chrestiens vont chercher la verité. La voicy en quatre articles.

Le premier est, que le Cardinal n'a esté blessé que par luy mesme : son mespris, ses tromperies & menteries descouvertes, l'ont ruiné dans l'ame de sa Maistresse. La tyrannie qu'il exerceoit aupres d'elle, l'ayant assiegée avec tous les siens, qui estoient des sangsuës, des espions, des importuns & impertinens seruiteurs, l'a rendu suspect. Il a esté descié par les domestiques de la Royne, qui ne pouuoient plus souffrir l'iniustice du Cardinal, & bastoient cōtinuellement les oreilles de S.M. de plaintes, de ce qu'on leur rendoit mille mauuais offices, qu'on les priuoit des bien faits, & que toutes les parties casuelles se perdoient dans vn abyisme qui n'estoit iamais rempli.

La seconde verité est, que la Royne ny à Fontainebleau, apres le siege de la Rochelle, ny à Lyon, ny à Paris, n'a iamais parlé au Roy de chasser le Cardinal, ny de luy oster la cognoissance de ses affaires; au contraire, elle luy a tousiours protesté, que s'il le iugeoit vtile à son seruice, non seulement il le pouuoit conseruer, mais qu'elle ne feroit point de difficulté de le voir & traiter avec luy dans les conseils, & hors de là, si le Roy le desiroit. Il n'est pas donc vray, que la

Pag. 62. Royne aye voulu s'loigner le Cardinal du gouuernement du Royaume, comme dit le sieur Hay : mais il est vray, qu'il merite d'estre chastié, pour auoir escrit, que le Cardinal gouerne le Royaume; ce qui n'appartient qu'au Roy. Tous les desseins de la Royne ne tendoient qu'à se deliurer des in-

solences insupportables du Cardinal, & de l'importunité des siens, pour les raisons que nous auons dit. Si son Eminence pouuoit ou vouloit dire la verité, il contesseroit, que dans l'entreueuë des festes de Noël, apres la rupture, il ne s'est iamais parle que de son restablissement, & de celuy des siens, dans la Maison de la Royne. Le Roy a condamné d'iniustice & d'inciuité les demandes du Cardinal. Les menaces du premier President ne furent fondées que sur le refus que la Royne auoit fait, de reprendre par contrainte tous ceux qu'elle auoit chassées avec iustice. De ce veritable discours on peut iuger, si le Cardinal a eu suiet de dire, que la Royne l'a voulu perdre; si vn cōgé donné à vn seruiteur merite l'emprisonnement d'vne Royne, la disgrace d'vne Mere, & la ruine entiere d'vne Bien-faëtrice; à laquelle on a osté son dot, son doüaire; & les alimens que la loy de nature luy ordonne. Quand le Cardinal n'auroit fait autre mal, que d'auoir procuré cet auantage au Roy d'Espagne, de pouoir reprocher au Roy qu'il a nourri sa Mere, lors qu'on employoit les armes & Finances de France, pour ruiner sa Maison & troubler ses Estats, il n'y a point de doute, que le Cardinal ne merite d'estre chastié, pour auoir ietté des pierres à ceux qui donnoient du pain à sa Bienfaëtrice, & à la Mere de son Maistre.

La troisiéme verité est, que Messieurs de Marillac n'ont iamais rendu mauuais office au Cardinal, ny porté l'esprit de la Royne à aigreur contre luy, ny à le reculer de ses affaires. S. M. l'asseure ainsi : ce n'est pas pour les garder d'op-

pressio, puis qu'elle est finie avec leur vie, ny pour descharger leur reputation, qui ne pourroit estre iustement blasmée, pour auoir aidé à faire connoistre vn meschant; mais elle rend le tesmoignage, qui est deu à vne grande Vertu, & à la Verité. Celuy de la Roïne, qui ne mentit iamais, est sans comparaison de plus grand poids que n'est celuy de la Dame de Combalet, qui est citée par l'Autheur des Observations, encore que, sauf sa correction, elle soit vne menteuse, ayant manqué de parole à Dieu. Elle luy auoit promis de passer le reste de ses iours parmi les Carmelites, de ne porter iamais perles ny diamans, ny robes de grand prix, de ne mettre point fard sur son visage, ny de poudre sur ses cheueux, & de ne monstrier point sa gorge, tant qu'elle demeureroit dans le monde. Elle laissa tous ces saints propos dans le logis de la Roïne; en sortant de son seruice, elle abandonna celuy de Dieu. Ce qui me fait croire que la desbauche de son esprit auoit commencé auparauant est, que l'Escriuain confesse, *qu'elle a fait vn beau recit de quelques artifices que les Marillars employoient auprès d'elle; pour monstrier qu'elle n'estoit plus dans ces raiuissemens, qui luy estoient assez frequens lors qu'elle entra dans la Maison de la Roïne, où elle estoit estimée vna beata de casa.* Il semble que le sieur Hay iuge qu'elle est peu sensée, lors qu'il dit, *que Messieurs de Marillac auoient le secret & l'amitié de cette bonne Dame, seduite par le lustre d'une franchise desguisée.* Qui ne voit que par ces mots, *vne bonne Dame seduite*, on nous descrit Madame de Combalet, comme vne vieille

Pag. 26.

Pag. 26.

bigotte, ou comme vne ieune idiote? Ils la cro-
yoient telle, tant que la deuotion nourrissoit la
simplicité dans son cœur : mais à present ils di-
ront qu'elle est habile femme, & adroite courti-
sane, s'estant chargée de pierreries & de brode-
ries, ayant inuenté de nouuelles modes qu'on
appelle à la Combalet. On l'a veüe au Cours
chargée de plumes, couuerte d'hermines, & mon-
tée sur des hacquenées blanches : elle a esté dans
les festins somptueux, dans la liberté des come-
dies, dans la galanterie du bal, dans la coqueterie
des Thuilleries: elle a paru en Roynie dans le pe-
tit Luxembourg, & en maistresse du grand a fait
destourner les eaux des fontaines. Elles reuien-
dront dans leurs canaux, lors que la Prouidence
de Dieu remettra toutes choses en leur place.

La quatriéme & derniere verité est, que ceux
qui furent les plus ardens à desirer que la Roynie
tesmoigna ses iustes ressentimens au Cardinal,
& qui pressent qu'on luy donna congé, sont ceux
ausquels il a donné des grandes recompenses,
lors qu'il faisoit arrester Messieurs de Marillac,
qui n'auoient aucune part en ce conseil. Il a
fait mourir ceux-cy, & a bien payé ceux là. Ain-
si va le monde, & sur tout la Cour, où bien sou-
uent on donne au vice le prix qui est deu à la ver-
tu, & à celle-cy, le chastiment que le vice merite.
Nous auons veu vn Euesque de Luçon, qui a
eu vn chappeau de Cardinal, pour auoir souf-
fleué tout le Royaume, ruiné deux millions de
payfans, & fait vne trahison à sa Maistresse; &
vn Marechal de France, qui a eu la teste tran-
chée, pour n'auoir pas bien tenu le contrerolle

*Le Mar-
reschal
de Ma-
illac.*

*Le Marechal
de Thoiras.*

d'un bastiment, ny pesé exactement le pain de munition d'une armée. Le Marechal de Bassompierre a demeuré 4. ans en prison, parce qu'il pourroit faire des bonnes actions; & le sieur Hay a esté mis en liberté dans trois mois, pour faire un meschant escrit. Un autre Marechal de France a moins de recompense & de pension, apres auoir soustenu deux grands sieges, qu'un Chirurgien pour auoir pensé le siege du Cardinal. Un Conseiller de Dijon à la charge de premier President d'un Parlement, pour auoir fait perdre les debtes du pere & du frere du Cardinal; & pour auoir condamné à mort le Marechal de Marillac; & un genereux President au mortier est chassé, pour auoir parlé pour le public. Un valet de garderobe a plus acquis de bien, pour auoir vuidé la chaire persée du Cardinal qu'un Mesmes. Garde des seaux & un Marechal de France, apres plusieurs années de seruice rendu au Roy & à l'Estat. Ainsi se gouuerne le pays, où on fait la nuit du iour, & le iour de la nuit; & où la malediction de Dieu est bien souuent, parce qu'on y appelle le bien mal, & le mal bien. Le sieur Hay nous pardonnera si nous ne passons pas plus auant: un de ses anciens amis & aliez, qu'il a trahi, sçait que nous ne mentons pas.

Les Marillacs.

Après ces quatre veritez, nous ferons voir une estrange imposture. L'Escruiuin dit, qu'à
 Pag 58. Lyon le Cardinal sceut les deliberations qui furent faites contre sa personne, que le Marechal de Marillac n'adoucit point; & qu'il reuint en cette conioncture auprès de Lyon, pour les executer, toutes les troupes de cavallerie, qu'il deuoit mener de Champagne en

Piedmont. Voila le plus sale & mortel poison que la calomnie aye iamais vommy. Le Cardinal sçait bien, que le grand credit qu'il a eu aupres de la Royne, n'a iamais esté assez fort pour la porter à faire respandre le sang. Maintenant, pour donner quelque apparence de iustice aux violences qu'il a fait à sa Maistresse, il allegue trois ans apres qu'elle a pris des resolutions de faire assassiner vn Prestre, vn Euesque, vn Cardinal, en la presence du Roy, durant sa maladie, & dans le rencontre des affaires d'Italie. Il dit, *qu'on a retenu beaucoup de cavallerie pour appuyer ce dessem.* Vn seul homme le pouuoit executer sans peril, si la conscience de la Royne se fut abandonnée à faire ce commandement. Elle receut le Cardinal dans son batteau, en descendant par la riuiera de Loire: il n'estoit esloigné que de quatre doigts de la mort, que les Gardes de S. M. luy pouvoient faire trouuer dans l'eau, si elle, ou quelqu'un de sa part, eust fait le moindre signe. Il est vray, que plusieurs ont creu, qu'un peu moins de bonté de la Royne l'eust exemptée, & vn grand nombre de gens de bien, de beaucoup de maux. L'Autheur mesme des Obseruations aduoüe, que Catherine de Medicis, qu'il appelle *moins bonne Princeesse*, n'en fust pas demeurée là où la Royne s'arresta apres la rupture. Ainsi ce preuaricateur en la cause qu'il defend, ou peu iudicieux Escriptuain, monstre à la Royne qu'elle a esté trop douce, au mesme temps qu'il la blasme d'auoir consenty à vn meurtre. Il escrit que Catherine estoit moins bonne que Marie, lors qu'il asseure, que cette-cy a voulu faire tuer vn Cardinal; &

que nous ſçanons que l'autre mourut de regret, de ce que ſon Fils auoit fait mourir vn Cardinal: accordez ces choſes.

Tous ceux qui ont l'honneur de cognoiſtre les inclinations de la Royne Mere du Roy, demeurant d'accord, que S.M. ayme mieux que l'excez de bonté luy ſoit preiudiciable, que ſi quelque vice luy eſtoit profitable: elle choiſira pluſtoſt les vertus malheureuſes en ce monde, que les crimes heureux pour vn temps. Il me ſemble, que les Eſcriuains du Cardinal ne ſont pas ſages, ou ſont des traîtres, d'eſmouoir les eſprits, en publiant qu'on a voulu tuer le Cardinal: cela donne ſuiet aux curieux d'aller fueilleter les liures des Theologiens, dans leſquels quelques vns ont trouué, que le tyran qui a toutes les marques d'un uſurpateur, pouuoit eſtre tué ſans forme de iuſtice, comme eſtant l'ennemy du public. Ceux qui ont leu le directoire de l'Inquiſition, aſſeurent, que peu de perſonnes ſages doiuent condamner ſecrettement celuy qui ruine la Religion, & que les particuliers peuuent executer cet arreſt, contre ceux auſquels les peuples n'ont point preſté de ſerment de fidelité. On a douté, ſi châtier les meſchans, deliurer les innocens de la priſon ou de la mort, remettre les bannis & les proſcrits dans leurs maiſons & dans leurs biens, eſt vne vangeance deſagreable à Dieu: ſ'il eſt expedient d'arreſter celuy qui oſte la paix à la Chreſtiente, le repos à la famille Royale, & la ſeureté aux gens de bien; pourueu qu'en cette entrepriſe on recherche la gloire de Dieu: ſ'il ſe faut contenter de ſuiure les ordres de ſa ſainte Prouidence,

qui affligent les vertueux, ou s'il faut rechercher les moyens qui les deliurent : si la nature nous donne cette leçon; si la parole de Dieu y est contraire, & si elle n'a point d'exemples ny de preceptes pour cela. A la verité il semble, que s'il faut mépriser ceux qui ont la volonté de nuire sans puissance, & craindre ceux qui ont la volonté & la puissance, qu'il se faut opposer à ceux qui ont la volonté, la puissance & l'audace, s'ils sont, comme i'ay dit, des personnes auxquelles nous ne deuons point d'obeyssance par serment, & que la naissance & les loix n'ont point fait, & ne peuuent faire nos Maistres. L'Autheur de cet ouvrage n'approuue point les opinions qui ont ietté les Princes legitimes dans les perils, auxquels les vsurpateurs doiuent estre suiets. Il veut qu'on garde rigoureusement la parole de Dieu, qui defend d'attenter à la vie de ses Oints. Le Cardinal l'est comme Prestre, comme Euesque, & comme Prince de l'Eglise : outre, que la qualité de Ministre d'Estat a quelque ombre de la Maiesté Royale. Ces quatre liens doiuent lier toutes les mains : & les seruiteurs de la Royne sont obligez de suiure ses volontez, qui ayment d'auantage vne larme de penitence qu'un ruisseau de sang de vangeance. Il est aussi plus croyable, que les flatteurs, non les ennemis, ruineront le Cardinal ; & que sa fin violente viendra, ou des causes qui sont en luy, comme de sa colere & de sa folie; ou de ceux qui l'approchent. Cesar fust tué & trahy par les siens, qu'il n'auoit sceu contenter; non par les estrangers, qu'il auoit offencé.

Deuant la conclusion de tout ce qui regarde la Royne dans cet escrit, nous remarquerons en passant l'ingratitude du Cardinal, qui est excusée par le sieur Hay en ces termes : *Toutes ses faueurs doiuent passer aussi bien pour des recompenses de seruice, ou pour des moyens d'en tirer d'autres plus grands, que pour des pures liberalitez.* Il n'y a point d'hommes plus ingrats, que ceux qui croient que tout leur est deu, & qui esperent beaucoup; l'attente d'un plus grand bien estant le lien d'une ame meschante. Le Cardinal n'en pouuant recevoir de la Royne, qui fust plus releué ny plus riche que celuy qu'il auoit, & craignant qu'elle ne s'opposa à ce qu'il vouloit prendre, a perdu la souuenance de ce qu'il tenoit, en courant à ce qu'il a pris du depuis. Il s'est imaginé, que trente places fortes qu'il a arraché au Roy, estoient meilleures que trente benefices que la Royne luy auoit donné, ou fait donner; que deux cens mille escus de rente, & trois magnifiques Palais richement meublez, n'estoient rien à comparaison d'un Royaume, duquel il vouloit disposer. Il dit, *que les bien faits de la Royne sont des gages.* Il a receu dans sept ou huit ans neuf cens mille escus en argent, sans les appointemens & beaucoup de presents magnifiques. La Royne a un grand sujet de dire, O le cher seruiteur! & nous, O l'ingrat! qui nie le bien-fait duquel il porte tousiours les liurées, & qui l'a conuertty en iniure. L'Euangile dit, qu'entre dix ladres gueris par le fils de Dieu, il n'y en eust qu'un recognoissant: à la verité, il n'appartient qu'aux ladres de ne sentir pas les bons offices. L'Escruiain adioust, que

les bien-faits de la Royne sont ou des recompenses, ou des moyens pour tirer des seruices du Cardinal: il ne prend pas garde, qu'en faisant de la Royne vne marchande, & de ses liberalitez vn trafic, il nous fait cognoistre, que l'emprisonnement & les autres maux que le Cardinal luy a fait, sont vne assez mauuaise marchandise, qu'on nous dit qu'elle a achetée. Cet ingrat a fait du mal à la Royne, parce que dans les meschantes ames la haine est plus forte que l'affection; & l'opinion de l'iniure surmonte le ressentiment du bien-fait.

Tout le reste de l'escrit, qui semble auoir esté fait pour diffamer la Royne Mere du Roy, contient deux poincts. Le premier est vne inuëctiue contre le Garde des seaux de Marillac, qu'on appelle *ligueur forcené*: encore que les Edits ayent Pag. 37. défendu d'vser de ces reproches, & que le Pag. 54. temps les aye effacez, on les fait reuiure, pour Pag. 135 rendre sa memoire odieuse. Il n'y a point de doute, que les ennemis de Monsieur de Marillac n'ayent dit en l'an 1626. tout ce qui est dans cet escrit, pour luy donner l'exclusion, lors qu'on eust intention de luy bailler les seaux. On tira du cabinet d'un peintre, qui a son logement dans la galerie du Louure, toutes les pieces plus secretes de la ligue, pour les faire voir au Cardinal; & on fist des commentaires aussi sanglans qu'on pourroit estre ceux du sieur Hay. Le Cardinal s'en mocqua, & allegua la prescription de trente cinq ans, lors qu'il iugeoit, que Monsieur de Marillac luy pouuoit estre vtile: Il ne veut point maintenant, que celle de quarante ans aye lieu,

parce qu'il s'imagine, que Monsieur de Marillac a esté son ennemy. Ou il faut chastier celuy, qui se vante de l'auoir auancé, ayant sceu ses inclinations, qu'il dit estre préiudiciables à l'Estat; ou il faut aduouer, que les intereests contraires iettent la contrarieté dans son discours.

Ce qui sert grandement à la descharge du Garde des seaux, est sa pauureté avec sa frugalité: son bien ne l'a peu conduire iusques à la mort: la charité de sa belle fille l'a nourry avec ses gardes qu'on luy a fait defrayer: elle a payé aussi le petit conuoy qui a esté fait à son corps. On ne dira pas la mesme chose du Cardinal, ny de ceux qu'il a mis dans les finances & affaires du Roy: ils ont voulu estre conuaincus de l'arrecin par tant de tesmoignages publics, qu'il ne faut point d'autre iuge pour les condamner que le Soleil. C'est vne merueille de ce temps, qu'on appelle crime de peculat, de n'auoir pas pris garde à la mesure d'auoyne, & à la grosseur de la botte de foin, au poids du pain de munition, au compte des septiers de chaux, & aux pierres d'un bastiment, & que le pillage de cent & deux cens mille pistolles soit vne galanterie. Il me semble, que si ceux qui ont pris la toise pour mesurer exactement les bastions & les courtines de la fortification de Verdun, l'auoient appliquée à trois palais d'un homme que le Cardinal auoit fait Surintendant des Finances, on y trouueroit plus de millions desrobez pour affoiblir le Royaume, que d'escus mal employez en la construction d'une citadelle qui le defend.

Le second point est celuy sur lequel le sieur

Hay s'estend d'avantage, & qui semble estre le principal but de son dessein : c'est de publier les causes de l'arrest de mort donné contre le Marechal de Marillac. Le Cardinal & son Escriptuain font paroistre leur peu de iugement, lors qu'ils s'estudient de faire cognoistre à toute la terre les raisons que les iuges ont eu pour condamner à mort le Marechal; comme si toute la Chrestienté, scandalisée de cette cruauté, les auoit citez pour declarer les motifs de l'arrest; & que le Sr Hay, comme le plus eloquent de la compagnie, eust eu la commission de les desguiser. Il dit, *que le Cardinal a employé sa faueur pour faire auoir vne abolition au Marechal*: mais il n'adiouste pas que le Marechal l'a reiettee. Vn homme genereux ne se doit iamais declarer criminel pour garantir sa vie. Le meschant ne desire la confession des innocens, que pour les perdre avec plus d'iniure, & iustifier sa tyrannie. Mentir contre soy mesme, est vn peché contre nature. Il faut plustost perir par le crime d'autruy, que par nostre lascheté. Cette constance fait cognoistre, qu'on a eu tort d'appeller poltron le Marechal: il a esté si mal traité durant l'instruction de son procez, & mené en triomphe au trauers de tant de Prouinces, qu'il a souuent demandé la mort comme vn bien-fait; mais il n'a point recherché le pardon. L'Autheur dit, *qu'il estoit assez ingrat, & ses crimes assez qualifiez, pour l'abandonner à toute la seuerité des ordonnances, & le siecle licentieux requeroit cet exemple*. On aduoüe donc, qu'on a exercé sur luy toute la seuerité des loix, par lesquelles il n'y a point de Capitaine ny

de Commissaire, qui n'aye merité quelque punition. Si le Cardinal croit, qu'il peut faire avec raison tout ce que les loix luy permettent, encore qu'il soit estrange & horrible; il faut qu'il demeure d'accord, que par les plus anciennes ordonnances du Royaume, sans auoir esgard à la sainteté de sa pource, on le peut mettre entre les mains d'un bourreau, comme le moindre suiet du Roy. Qu'il sçache donc, que les hommes sages accommodent les vieilles regles aux mœurs & coustumes du temps : que les Privilèges sont des loix : qu'on fait beaucoup de choses contre raison, qui ne peuuent pas estre condamnées par les loix : & qu'il ne faut iamais prendre pour vne loy, l'exécution trop seuer d'une loy. La grande ville de Paris ne seroit pas beaucoup peuplée, si on n'y laissoit viure que ceux qui seroient absous par des Iuges extrêmement rigoureux : les sages Ministres conseillent aux Princes de dispenser de la seuerité des loix : les Conseillers cruels vangent leurs querelles par la rigueur des loix; & les bons la craignent, parce qu'elle tombe aysément dans la cruauté. Mais on dit, *que le siecle licentieux requeroit cet exemple.* Ils confessent tacitement qu'il a quelque chose d'injuste, qui est recompensé par l'utilité publique. Mais pourquoy a on choisi cette personne parmi tant d'autres beaucoup plus criminelles, pour donner crainte à ceux qui commettent le peculat? Est-ce que le Mareschal fut le plus grand voleur d'un pays, dans lequel le Cardinal s'est contenté de l'amende de tant de comptables, qu'il mit à rançon au commencement de son credit

credit pour remplir sa bourse, & celle de trente
affamez qui estoient aupres de luy : Il n'y a point
de doute, qu'entre les Financiers quelques vns
auoient desrobé des millions : il n'y eust qu'un
pauvre malheureux, qui n'auoit ny argent ny
amis, qui fust pendu; non pas pour seruir despou-
uentail aux meschans, mais d'un appast, pour fai-
re venir les timides à composition. Tous furent
mis à l'amende, qui est la punition ordinaire des
coupables: & ceux qui n'auoient point failli, se
trouuerent dans la taxe, pour monstrier qu'on
attaquoit plustost les charges que les crimes, &
qu'on ne cherchoit point la conuersion des pe-
cheurs pour l'aduenir, mais quelque satisfaction
pour le passé. Il est vray, que l'ordonnance 46.
alleguée par l'Escriuain, qui confisque le corps
& les biens, est contre les comptables, non contre
les Generaux d'armée, ny cõtre les Gouverneurs
qui ont la charge de faire bastir des citadelles:
ils n'ont point de serment à la chãbre des com-
ptes, & ne peuuent respondre de toutes les con-
cussions des Capitaines, ny de toutes les fripon-
neries de cent Officiers. Ce qui descharge fort
le Marechal, est, qu'il ne peut auoir failli tout
seul; il faut que les Tresoriers des guerres, ou
leurs Commis, les Capitaines, les Commissaires,
les Ingenieurs, les Contrerolleurs des fortifica-
tions, les Secretaires, & cent autres personnes
qui ont acheté chèrement des charges, pour pil-
ler le Roy & le public, ayent eu leur part à ces
pretendus crimes de peculat. Cependant person-
ne n'est accusé, ny adiourné, ny chastié que le
Marechal. On dit, que le siècle licentieux, qu'on

tient par ce discours estre celuy du brigandage (& il est en effect) n'auoit pas besoin de ces petits exemples.

La verité deuant Dieu, qui cognoist les cœurs, est, que la vangeance & la violence sont naturellement si odieuses, que ceux qui en veulent vser, sont contrains de les courir par l'apparence de la Iustice. Le Cardinal a persecuté le Marechal, qu'il n'a iamais aimé, & qu'il a tenu pour son ennemi. On n'a peu arrester prisonnier son frere, en luy laissant le commandement d'une armée. Ces considerations, avec l'apprehension que le ressentiment de la Roynes ne se seruit vn iour de celuy des Marillacs, sont les vrayes causes de leur mort. Le General de l'armée du Roy a esté criminel en Piedmont; parce qu'on s'est assuré de la personne de son frere aupres de Paris; & cettuy-ci est arresté à cause des patoles que la Roynes a dit au Cardinal de Richelieu. Pour monstrier que le peché du premier n'est inuenté que par occasion, & pour iustifier celuy qui le veut perdre, on a fait imprimer autrefois les lettres que le Roy escriuit au Marechal vne heure deuant que la Roynes donna son congé au Cardinal. Les sages se moquent de ce qu'on dit, qu'en ce temps, qui ne voit que les desordres que son Eminence, & ceux qu'il protege, ont fait, il falloit donner vn exemple de iustice, pour arrester la licence. Le Marechal n'a point ruiné par son auarice, comme d'autres ont fait, les armées du Roy; il n'a point perdu de place ny de bataille, pour auoir fait dissiper les troupes, ayant desrobé les monstres, comme il est arriué en Pied-

mont; où on voloit au Roy, & aux gens de guerre, dix mille liures par iour: ce qui n'a point esté recherché par le Cardinal, parce qu'il y prenoit la plus grande part. Il nous allegue la severité des loix: mais les bōs esprits disent, que chacun est aisément surpris par les choses auxquelles il prend plaisir, comme le Cardinal par la vengeance & par la crainte, qu'il couvre de la rigueur des ordonnances; ses flatteurs les vont estudier apres qu'il a fait vne iniustice; pour appaiser les agitatiōs qu'elle donne à son esprit, & pour aniufer le peuple. On luy a dit, que ce grand exemple empeschera qu'on ne desrobe plus les Finances du Roy, & que celuy du Duc de Montmorency retiēdra tous ceux qui voudroient troubler le Royaume. Pour monstrier que le Cardinal fait & empesche ces exemples, selon qu'il craint, ou qu'il aime quelqu'un; ne voyons-nous pas que le Duc de Rohan, ami du Cardinal, a eu des recompenses & des emplois honorables, ayant esté le chef des rebelles dans trois mouuemens, & apres deux abolitions? & que le Duc de Montmorency, sans parler des seruices de cinq Connestables ses predecesseurs, apres auoir gaigné deux batailles, & receu des bleffures en la presence de S. M. a eu la teste trenchée, pour auoir voulu garder d'oppression l'Heritier de la Couronne? Ainsi l'amitié du Cardinal fait non seulement pardonner, mais recompenser les plus grands crimes; & son inimitié fait donner les plus grands supplices aux plus petites fautes.

Encore falloit-il se souuenir, que pour paroître

estre bien iuste, il est expedient de poursuiure la punition des personnes de condition par les voyes les plus communes, & sçauoir cacher sa crainte, son enuie & sa colere; ce que le Cardinal n'a point fait. Si on veut oster les priuileges qui peuuent engendrer la licence, il ne faut pas que la puissance d'un fauori produise la tyrannie, ny reiette les Iuges ordinaires. On a mauuaise opinion de la iustice du Parlement de Paris, quand on luy oste la cognoissance des crimes des Ducs & des Mareschaux; où il faut aduoüer, qu'on craint qu'ils ne soient pas assez criminels, pour estre condamnez par les compagnies reglées: cette apprehension fait qu'on choisit des Commissaires de plusieurs corps, pour en composer vn monstrueux, qui aye quelques membres bien-faits, mais beaucoup plus de contrefaits, pour en tirer l'effect qu'on desire. On allegue pour la descharge du Cardinal les arrests donnez contre les Mareschaux de Giez & de Biez, & contre l'Admiral Chabot; & on confesse quand & quand, qu'ils ne furent pas condamnez à mort pour le crime de peculat. Dans les poursuites qui furent faites contre le Mareschal de Giez, il y a quelque chose de conforme à ce qui est arriué en nostre temps; j'ay iugé, pour confondre le sieur Hay, qu'il estoit à propos de faire mettre à la marge ce que luy mesme en a fait imprimer

Le Roy venient en conualescence, & le Cardinal à la Cour. La Roynie offensée de l'obstacle que le Mareschal auoit apporté à son

dans le gros volume qu'il a compilé depuis peu: il y a inseré la vie du Cardinal d'Amboise, dressée avec beau-

Coup de sincerité par le sieur Baudier, laissant au bon esprit du Lecteur à faire les rapports, & à iuger, si le Parlement de Thoulouse n'a pas esté plus equitable en l'affaire du Mareschal de Giez, que les treize Cōmissaires en celle du Mareschal de Marillac. Le sieur Hay ne dit pas aussi, le bannissement & la prison perpetuelle sont des confiscatiōs de corps portées par l'ordonnance; il cache ce qui arriua au Chancelier Poyet, pour s'estre vangé de l'Admiral Chabot, & la disgrâce pareille, qui est arriuée dans l'an à celui qui presida au procez du Mareschal de Marillac. Pour Montegu, outre qu'il estoit Surintendant des Finances, vne faction violente, comme celle du Cardinal, fist perir par Commissaires, ce-

dessein, qu'elle tient à in-
iure, le fait accuser de cri-
me de leze Majesté, où le
peculat entroit, & quel-
ques autres points. Le Car-
dinal qui pouuoit arrester
la roüe de cette affaire, la
laisse aller, mesme la pous-
se. On arreste prisonnier
le Mareschal à Orleans, où
le Chancelier de Rochefort
l'interroge: il nie ce qu'il
n'auoit pas commis, dit-on.
Deux puissans resmoins
luy sont confrontez, Ma-
dame d'Angoulesme, qui
fust mere de Francois pre-
mier, & le frere Alain
d'Albret, pere du Roy de
Nauarre. Les Gens-d'ar-
mes du Roy le menent à
Amboise, où estoit cette
Princesse, & de là à Char-
tres, & à Dreux, où estoit
Alain. Cependant on don-
ne aduis à la Royne, que
le Parlement de Thoulouse
estoit le plus seuer & le
plus rigoureux du Royau-
me. Elle y fait enoquer le
procez, y fait conduire le
prisonnier, & y fait appor-
ter les responces des grands

Jurifconsultes d'Italie, qu'elle auoit enuoyé consulter ce fait, afin d'induire les Iuges à le condamner. Hippolyte Marseille & Louys Bolognin, grands Docteurs d'Italie, devoient en leurs consultations le Marechal criminel de leze Majesté. Ce Parlement de Thoulouse, aussi equitable qu'on le croyoit seuer, nonobstant que l'accusé eust vne Royne de France & vn grand Ministre du Roy & fauory pour parties, ne trouua point de causes de mort en luy. Mais parce qu'il n'estoit pas seant, qu'estant odieux à son Maistre, il se presentat deuant luy, il l'interdit d'aller à la Cour & de se presenter deuant le Roy, & la Royne durant cinq années (ce sont presque les mesmes mots de nos Historiens) dont il se retira avec toute liberté en sa maison du Verger. L'Estat calamiteux de ce Marechal de France, personne de condition, de merite, & fort

luy qui fust declaré innocent par des Iuges. Le Roy François premier voyant dans l'Eglise des Celestins de Marcouffis le tombeau de Montegu, dit, que c'estoit grand dommage; qu'il fust mort par Iustice; vn bon Moyné repartit, Sire, il ne fust pas condamné par Iustice, mais par Commissaires. A la verité, nous deuons faire vne priere à Dieu, qu'il nous garde des Iuges courtisans & bottez, qui s'arrestent plustost à regarder le fauori, qu'à escouter le criminel, & qui n'ont point d'autres Gieffiers que leurs Clercs. Mais le Cardinal a voulu faire (comme dit le sieur Hay) vn grand exemple qui fust sans pareil. Il luy seroit plus expedient d'en assoupir la memoire, s'il pouuoit, que de la resueiller par ces foibles raisons, sans ap-

porter les responces du Mareſchal, & vouloir que ſur le plaidoyé d'une partie toute la terre condamne l'accuſé. Cela eſt iniuſte, & n'empêchera pas que tous ceux qui ſçavent la vie & la mort du Mareſchal, ne croyent que celle là a eſté remplie de gloire, & ceſte-cy accompagnée de ſaincteté. Noſtre deſſein n'eſt pas de nous arreſter d'avantage ſur les procédures faites contre luy, ny ſur les chefs de l'accuſation; il faudroit ouyr le mort en ſes deffences, & avoir le procez qu'on a brûlé malicieuſement, ou qu'un homme plus fidelle que le ſieur Hay en cuſt fait les extraicts. Il ſuffira de remarquer en paſſant, qu'au meſme

vieux, pouvoit eſmouvoir les François, non ſeulement à compaſſion, mais d'avantage leur faire concevoir de l'indignation contre celui qui le travailloit. Il eſtoit de la Maïſon de Rohan, & avoit dignement ſervi l'Eſtat, diſent nos Hiſtoires: mais cette haute conduite du Cardinal (voilà ſon animoſité de l'opinion de juſtice qu'on avoit conceu de ſes actions) & l'amour des François qu'il s'eſtoit acquis en les rendant heureux, luy firent recueillir de la gloire, d'où il pouvoit recevoir du blaſme: de ſorte que cette affaire, qui pouvoit exciter le courroux, ſe tourna en raillerie: on diſoit que le Mareſchal avoit voulu ferrer Rohan, & que Rohan luy avoit donné un ſi grand coup de pied, que de la Cour il l'avoit jetté dans le Verger.

Le Cardinal d'Amboiſe s'appelloit auſſi le Cardinal de Rohan.

temps qu'on arreſta le Mareſchal, on publia dans les Libelles du Coup d'Eſtat, & de L'entre-

rien des champs Elisées, qu'il auoit trahy le Roy & l'estat, par intelligences avec les estrangers ; dequoy ne nous voyons rien dans le procez, ni dans cedernier escrit. Il peut mentir aussi effrôtement pour ce qui regarde le peculat ; comme les deux autres sont conuaincus d'auoir menti pour le crime de trahison.

Chaste-
let &
Hay de
mesme
homme.
Pa. 104.
& 105.

Reste à faire vn peu de reflexion sur la recusation du sieur du Chastelet, pour lequel le sieur Hay son bon ami fait vne longue apologie. Il dit, qu'il n'est pas vray, que le Roy voyant la requeste de recusation qui luy fust présentée contre le sieur du Chastelet, le fist iurer sur ce qu'elle contenoit. Il assure plus bas, que la mesme requeste auoit esté présentée aux Commissaires à Verdun, & à Metz au Conseil. Toute la suite du discours n'est qu'une saillie d'iniures, qui nous font voir, que le sieur Hay est si fort picqué pour son amy, qu'il oublie d'escrire les raisons, pour lesquelles le sieur du Chastelet s'est retiré du iugement du procez, apres s'estre maintenu opiniastrément dans l'instruction. Il ne dit pas aussi, si on luy a commandé de quitter sa commission ; ou si volontairement il l'a abandonnée, & pourquoy. Il me semble, que le bel esprit du sieur Hay deuoit descharger le sieur du Chastelet, & dire que la conscience l'a pressé, ou que celle du Roy n'a peu souffrir, qu'un homme qui auoit aduoué à S. M. qu'il estoit autheur d'une prose impie & infamante, & qui faisoit profession ouuerte d'inimitié contre le Garde des Seaux de Marillac, pour auoir esté chassé par luy du Conseil, fust arbitre de la vie de son frere. Il n'estoit pas necessaire, que le Roy fit iurer sur

Les faits de la requeste, vne personne qui les auoit aduoüez, pour mettre en belle humeur le Cardinal ; auquel l'Autheur de la prose auoit recité non seulement cette sanglante raillerie, mais plusieurs autres pieces de mesme estoffe. Il n'y a point de doute, que le Sieur du Chastelet ne deuoit non plus estre de l'instruction du procez que de iugement ; puis que la mesme cause l'excluoit de l'un & de l'autre. Il est plus criminel, comme nous auons dit, d'auoir trouué mille inuentions, & changé les depositions des tesmoins, pour donner quelque couleur de iustice aux opinions de treize Commissaires, que d'auoir adiousté sa voix, qui a esté iugée superflüe, lors qu'on a esté assuré du nombre suffisant pour la condamnation. La recusation ou libre ou forcée du Chastelet, a esté vn amusement pour le public, qui n'a pas laissé de se deffier de la fripponnerie: on la voit encore plus clairement, apres qu'on a mis en liberté celuy, qui dans le loisir de la prison a fait ce bel ouurage, qui casse & met en cendres les os de deux freres tuez diuersement, pour yne mesme cause, & avec pareille iniustice.

Le Sieur Hay, qui est bien informé de tout ce qui touche le Sieur du Chastelet, l'eust bien obligé, s'il eust voulu dire, pourquoy ce bon Commissaire, qu'il dit estre si saint & si iuste, fust emprisonné par le commandement de Louys le Iuste. Cette raison est demeurée dans sa plume, qui a laissé couler, *que le Garde des Sceaux de Chasteau-Neuf luy mesme se donna la peine de l'arrester* : il fait faire l'office de Preuost au chef de la Iustice de

France, pour prendre vne personne de grande consideration. Il dit aussi, que ce *Garde des seaux* estoit son ennemy. O le malheureux homme ! qui a pour ennemis tous ceux qui sont en cette charge, auxquels sans doute cet esprit broüillon a esté suspect. Où il faut dire, que cinq ou Chanceliers ou *Garde-seaux*, qui n'ont pas estimé le Sieur du Chastelet, sont des fots ou des meschans, afin qu'il passe pour habile & pour vertueux.

Il semble que ce bon innocent vueille aduoüer, que la prose de l'an 1630. a esté le suiet de sa recusation, & de sa detention : voicy son discours peu iudicieux. *C'est commettre vn grand crime parmy ces gens là de faire des rimes Latines, parce que l'Eglise en a receu l'usage en la decadence de la bonne Poësie, & de l'elegance Romaine, &c. auourd'huy que les reformations, & principalement celles du Concile, en ont aboly l'usage.* Voila les belles defences que fournit Hay aduocat du Chastelet. Il dit, qu'il est loisible de mesdire d'un * Cardinal de Rome, d'un *Garde des seaux* de France, & d'une * Dame d'Atour de la Royne, avec les rimes profanes, lasciuës & diffamantes, parce qu'on a chanté deuant la reformation dans l'usage de Paris des simples, & des saintes. Par cette raison, les forciers qui se seruent des paroles de la Messe, seront innocens : il sera loisible d'assommer les hommes avec le baston de la Croix ; parce qu'on la porte aux Processions. Mais voyez ce fripon, qui nous veut bailler le change : il dit, qu'on trouue mauuais qu'il face des proses, lors qu'on se plaint des mesdisances. Sans faute, le Sieur du Chastelet doit reuoquer le Sieur Hay, comme vn

Pa. 106.

* Le Cardinal de Beuile.

* Madame de Fargis.

Aduocat qui trahit sa partie. Mais il adioust, *que le Sieur Viette Maistre des Requestes, qui ne cede en rien aux plus grands hommes de l'ancienne Grece, fit des* Pa. 1^{re}
rimes contre la ligue, qui ne furent pas prises pour des sacrileges. Belle autorité & digne occupation des arbitres des biens, de la vie & de l'honneur des hommes. Viette a donné carrière à son esprit vne fois en sa vie, le Chastelet fait mestier de bouffonnerie: celuy là pouuoit estre estimé plustost badin que malin, & le Chastelet a esté iugé plus malin que badin: les proses de celuy là estoient en termes generaux & dans la licence de la guerre ciuile; celles que nous auons veu depuis peu, sont contre des particuliers de grande consideration, & dans vn Royaume paisible. Hay les appelle *des fruits que le temps donne & consume aysément, qui ne meritent ny le blasme ny l'excuse.* Semblables fruits ont fait pencher autrefois des branches sur le dos du Sieur Hay: sont pommes de Gomorrhe, qui ont vne escorce vermeille, mais qui n'ont au dedans que de l'ordure. Ces fruits ne sont pas, comme dit le Sieur Hay, *aussi tost consummez que donnez*: vn mouuement desreglé d'un cerueau destiaqué les produit dans vne demie heure, & plusieurs années les conseruent. Quand à ce que l'Auther dit, *que cet ouurage ne merite ny le blasme ny l'excuse*; il confesse, qu'il est mal aduisé de le defendre, & ne se souuient pas que des railleries moins malicieuses que les siennes, & contre des personnes de moindre consideration, ont fait porter la torche au poing & la corde au col à ceux qui en estoient les auteurs: mais nous sommes en vne saison, en laquelle, pour conten-

ter la belle humeur de celuy qui fait les violences, ou pour mettre vne emplastre au contrecoup qu'il en reçoit, on compose des bouffonneries contre ceux qu'il a rendu miserables. Je ne vois pas aussi, pour quelle raison Viette peut estre comparé *aux plus grands hommes de l'ancienne Grece*: il me semble que Solon, Aristides & Socrates ne s'amusoient point à faire des chansons. Cela ressembloit plustost le Trazon que le Platon, approche plus du payen que du Chrestien. Qui doute, que Seneque n'aye esté plus estimé pour le diuin traité de la Prouidence, que pour la raillerie, en laquelle il conuertit en citrouille l'Empereur Claude.

Pour monstrier encore plus clairement que le Sieur Hay n'est pas sage, & pour le faire declarer impertinent, mesme sur le rapport du Sieur du Chastelet; il remarquera, s'il luy plaist, quelques articles entre plusieurs autres, qui font voir, qu'il a perdu l'esprit: ou il faut dire que ce flatteur trompe celuy qui l'employe, & que c'est vn chien, lequel apres auoir lesché le sang qu'il a respandu, le vomit sur celuy qu'il fait semblant de vouloir carresser. Il seroit plus honorable au Sieur Hay de quitter le party du Cardinal, que d'y demeurer pour le trahir, en le poussant à continuer les cruantez que ses ennemis desirent, pour voir bien tost sa fin. Son ame desfiante & subtile prendra garde, que le Sieur Hay a fait glisser des choses dans ces escrits, pour s'en seruir dans vn changement; en faisant voir, qu'il a en dessein de deshonorer celuy qu'il fait semblant de louer. Il luy rend la moitié du monde

ennemie, lors qu'il mesdit des femmes sous l'autorité de celuy qui ne desire pas qu'on le broüille avec elles. Il n'approuvera point, qu'on monstre à la Royne Mere du Roy le chemin qu'elle a deu tenir pour le ruiner, ny aux *a* Espagnols leurs defauts, & les moyens d'arrester le bon heur de celuy qui n'a rencontré iusques à present que des sages trop retenus, ou des courageux temeraires. Il ne veut pas aussi, qu'on escriue que les *b* Prestres & les Moines ne sont pas propres pour le gouuernement d'un Estat, lors qu'un Cardinal est le seul ministre de celuy de France, & a pour son principal Conseiller un soy disant Religieux. Ny qu'on asseure, qu'à *c* Rome on deteste fort l'ingratitude de ceux qui sont appelez en ce pays là creatures. Apres qu'on a veu la mes-

cognoissance du Cardinal, qui ne peut nier, au moins pour ce qui regarde le Cardinalat, qu'il ne soit creature de la Royne, & qu'il ne l'aye aduoué fort souuent, mesmes par escrit. Ainsi cet Aduocat preuaricateur defend sa partie.

Il trouue mauuais, que le Marechal de Ma-

Pag. 59. *a* Les Espagnols s'estonnerent deuant les François en vn moment, où leur ancienne valeur eust plustost hazardé toutes leurs Couronnes, que de faire paroistre tant de foiblesse & de peur en vne telle occasion, &c. Ils furent trop sages & retenus.

Pag. 109. *b* Les cellules & les cabinets ne produisent pas des mesmes pensées: la fumée des cassolettes, & celle de l'encens, ont des effets bien contraires.

Pag. 109. *c* A Rome la mesconnoissance des creatures est insupportable.

Le Cardinal est appelé creature de la Royne en la page 62.

Pa. 133. rillac, allant à la mort, qu'il confesse *auoir esté* constante; recommanda à son neveu de servir bien le Roy, apres Dieu toutesfois. Ce toutesfois est vne queüe de scorpion, attachée par le Sieur Hay, afin qu'il aye suiuet de faire des faillies d'impie & de furieux, & d'offenser toute la famille des Marillacs, qu'il appelle *seditieuse*. Si cet homme li-
In Apo. soit dans Tertullian, que l'Empereur est le premier apres Dieu, il brusleroit ses escrits. Le Marechal a recommandé aux siens de servir le Roy apres Dieu: est-ce vn blaspheme, ou monstrier vne inclination à la reuolte, ou s'imaginer que le Prince va charger le turban, abattre les Croix pour y mettre le croissant, & se declarer l'Antechrist, comme dit Hay auectres-grand scandale? Les parboles du Marechal furent les mesmes, que les meilleurs seruiteurs du Roy disent tous les iours à leurs enfans; & que le Sieur Hay diroit aux siens, s'il estoit homme de bien: c'est en substance le commandement de saint Pierre: Craignez Dieu, &
1. Pet. 2. honorez le Roy.

Nous ne voulons pas coter les impertinences; parce qu'elles sont en trop grand nombre: il nous faut contenter, pour ne transcrire son liure tout entier, d'auoir remarqué les plus notables defauts de son iugement, ou effects de sa double malice. Tous ces manquemens paroissent dans le dessein de son œuvre; qui entreprend de tirer les morts des tombeaux, pour esueiller beaucoup de pensées des viuans. Ioab Connestable de Dauid, ayant assassiné le vaillant Amasa, vn homme sage retira le corps du chemin public, & le couurit, pour empescher les discours & les

ressentimens des passans. Vn genereux Marechal de France, ayant esté decapité par les iniustes poursuites du Cardinal ; si le Sieur Hay eust esté son amy & bien sensé, il n'eust pas deterré ce mort, pour l'exposer dans son liure à la compassion de toute la terre.


Pour conclusion, le Sieur Hay s'esgayé dans l'interpretation d'un passage du liure de Iob, & ayant apporté hors de propos les versions Hebraïques & Grecques, il finit ainsi son ouurage: *Toutes ces veritez me font dire, qu'un factieux & qu'un* Pa. 140
larron tombé dans la disgrace de son Prince, ne peut auoir vne meilleure odeur que celle d'une lampe estemte; & que les Iuges firent leur deuoir quand ils acheuerent de brusler ce risou plein de fumée, & placé pour faire cheoir autrui; quand ils estoufferent ce flambeau de sedition dans la France, & qu'ils firent mourir celuy qui deuoroit les finances du Roy, & consumoit les personnes & les biens de ses suiets. Ces paroles de furie & d'horreur, qui donnent les qualitez de factieux, de seditieux, & de mangeur d'hommes, au Marechal de Marillac, luy imposent des crimes, desquels on n'a point fait de mention dans le procès, ny dans ce libelle. On voit bien, que le Sieur Hay est fort de son ouurage, comme un esprit malin d'un corps possédé, en deschirant & rompant tout ce qu'il a rencontré. Qui pourra croire, que cet imposteur soit dans la plus haute compagnie des Iuges de France? O pauvre Royaume, quel desordre t'a produit la venalité des charges, & la trop grande multitude d'Officiers? Estre homme de bien dans cette confusion, merite vne double loüange; estre meschant, n'est

pas vn suiet d'estonnement. Ceux qui se sont mis en danger de perdre plustost leurs offices qu'un innocent, ceux qui renoncèrent aux bonnes graces du Cardinal, pour conseruer celles de Dieu; ceux qui ne receurent pas ses embrassades, & n'assisterent point au festin qu'il fist aux treize meurtriers du Mareschal apres sa condamnation, sont dignes d'éternelle loüange. Les corrompus qui ont acheté vne condition plus auantageuse aux despens de leur conscience & de leur reputation, seront blasmez avec raison par tous les siecles, qui liront la veritable Histoire du nostre, & sur tout ce qui s'ensuit.

Puis que le Sieur Hay attaque les viuans & les morts, & qu'il esueille nos sentimens qui estoient endormis; il aura agreable qu'ils luy rendent quelques Obseruations sur les affaires du temps, en eschange des siennes qu'il a pris la peine de nous adresser au Pays bas. Il recognoistra que les esprits n'y sont point si bas qu'il s' imagine, & qu'on ne sent pas si viuement les persecutions du Cardinal, qu'on ne remarque sa conduite.

OBSER-





OBSERVATIONS
SVR LA CONDVITE
DV CARDINAL
DE
RICHELIEU.



Oute la France, & ses bons Alliez disent, que la cause de toutes les guerres qui affligent la Chrestienté, est la trop grande autorité du Cardinal de Richelieu; c'est à dire, d'un homme, lequel ayant esleué ses bastimens superbes par dessus les Royaux, a porté ses desseins à la Royauté. Ses paroles sont de Souuerain, ses actions & ses vsurpations de celuy qui le veut estre.

Il fait tout ce qu'il peut : il peut plus qu'on ne luy deuroit permettre ; & desire plus qu'on ne sçauroit dire. Encore qu'il n'acheue rien de ce qu'il entreprend, ses entreprises sont tousiours infinies.

Il ne s'arreste point à ce qu'il possède, parce qu'il court à ce qu'il n'a pas. Apres qu'il a fait vne grande affaire pour son auancement, il en

medite vne plus auantageuse ; & dans vne vie bornée, il entasse les desseins qui n'ont point de fin.

Le feu de son ambition, cherche tousiours quelque nouuelle matiere ; celuy de son ingratitude, consume tout ce qu'on y iette ; & c'est vn abyfme dans lequel toutes les liberalitez se perdent.

Il ne demande plus, mais il prend ; il croit, que tout ce qu'il peut attraper, n'est qu'une partie de la recompense des seruices qu'il a rendus ; & il s'imagine, qu'il oblige beaucoup son Maistre de demeurer aupres de luy, le menaçant de sa retraicte, comme du plus grand malheur qui pourroit arriuer à sa personne, & à son Estat.

Il a non seulement abandonné, mais mal traité sa Bienfaictrice & Maistresse, pour n'en cognoistre point d'autre que la fortune qui le flatte, qui vuide la bourse du Roy dans la sienne : abaisse l'autorité de S. M. pour releuer l'orgueil de son ministre ; en sorte qu'on ne parle plus dedans & dehors la France, que de ce grand Cardinal. Le bruit de son credit & de sa puissance, fait qu'on desire plus son amitié, que la bien-veillance de son Roy.

Ce Prince tresbon, tres pieux & tres genereux, a confié entre les mains de son conseiller ses finances, ses armes, son Estat, & mesme sa vie. Le seruiteur a pris toutes les seuretez de la Couronne de son Maistre, avec toutes les clefs de son Royaume ; & semble qu'il ne luy veut laisser que celle du tresor de la sainte Chappelle de Paris.

Le Roy est en estat de dependre plus du Car-

dinal, que le Cardinal du Roy : son Maistre l'ayant fait ce qu'il est, il a le moyen de se faire ce qu'est son Maistre. Il fait semblant de l'aimer pour son profit: mais il n'y a personne qui ne l'aime d'avantage, parce qu'il est tres digne d'amour, sans que cette affection fust si chere.

Si les malheurs, que le Cardinal recherche; auoient ruiné les affaires de S. M. il se retireroit avec les dernieres pieces du desbris; & ayant esbranlé cet Empire avec l'autorité du Souuerain, il le renuerseroit entierement avec la sienne.

Il n'y a rien de plus certain, que s'il se fortifie d'avantage: le Roy, qui luy en a donné les moyens aura plus de suiet d'apprehender sa puissance, que celuy qui les a receus n'aura occasion de craindre sa iustice; & il fera voir au Prince, qui croit qu'il ne se peut passer de son ministre, que son ministre est en estat de se passer de luy.

Le Cardinal efface les traits de l'image de Dieu qui sont en la Royauté; lors qu'il se rend plus fort que celuy qui l'a fait; puis que Dieu ne seroit point Dieu, s'il auoit tiré du neant vne creature, qui luy peut donner de la peine pour la de-faire. Il ne faut iamais mettre entre les mains d'un homme ce qu'on luy osteroit avec danger, si la iustice vouloit qu'on le fust.

On peut iuger par ces veritez, quel notable interest a le Roy d'arrester cette prodigieuse insolence de son ministre, auquel quelques temeritez heureuses ont persuadé, que c'est sa prudence qui a surmonté les difficultez; & c'est ce qui l'a rendu si hardi à entreprendre, & si audacieux en ses discours, qu'en disant & escriuant qu'il est

l'ame & l'esprit de l'Estat, il ne fait passer le Roy que pour le corps.

S'il plaisoit à S. M. d'esprouuer la fidelité de celuy qui veut estre estimé le seul fidelle seruiteur elle la cognoistroit en demadant ses places: s'il les rend, il acquerra la reputation d'homme de bien; & le Roy en les retirant, confirmera la croyance qu'on a de luy, qu'il est sage Prince.

Il amuse la France par des conquestes, qui sont plustost des fardeaux nouveaux que des nouvelles forces, qui nous affoiblissent en nous dilatant, & qui nous peuuent obliger à rendre ou à perdre avec honte, ce que nous auons pris avec facilité, ou acheté bien cherement.

Il a mis la paureté dans la France, pour entretenir les Suedois. Il a fait alliance avec les Goths, que nous ne cognoissons pas deuant son credit. Il a ruiné d'honnestes gens, pour enrichir des barbares. Il n'a intelligence qu'avec des Turcs & des Heretiques: il anime ceux là contre les Chrestiens, & soldoye ceux-cy contre les Catholiques.

Il est plus entreprenant que courageux, & plus temeraire que sage: le bon heur a plus fait pour luy, que luy pour nous acquerir le bonheur; & les Parques ont plus trauaillé pour faire reüssir ses desseins, que sa bonne conduite.

Il a fait paroistre son esprit tyrannique, en desirant de tous les hommes l'affection qu'il n'a pour personne. Il veut vendre cherement ses assistances, & veut auoir à bon marché les services. Il a prouoqué la vangeance par les iniures, & l'enuie par le faste.

Il a esté plus soigneux de nous faire voir ses palais magnifiques, ses riches ameublemens, & ses grandes terres, que ses rares vertus. Il a fait enfermer dans Paris vn faubourg fort estendu: a mis des impositions extraordinaires sur le peuple, & l'a obligé à vne despence de deux millions, pour adiouster vn iardin à sa maison.

Il ne voit pas qu'une puissance, qui n'est pas appuyée sur ses racines, est facilement renuersée; que les Roys se degoustēt apres auoir beaucoup donné; qu'ils sont bien aises de trouuer tout leur bien en vn lieu, pour le reprendre plus aisément. La plus grande marque de la Souueraineté, est d'abaisser le fauori qui se veut esleuer par dessus son Maistre: & les ieunes Princes sont aussi jaloux de leur autorité, que les vieux maris de la beauté d'une ieune femme.

Il est ennemi des sages, & des genereux; il craint que ceux là ne le descouurent, & que ceux-cy ne le destruisent. Il veut l'obeissance auuegle, & deteste la verité courageuse.

Il faut estre son ennemi, ou son esclau; les reconciliations qu'on fait avec luy, sont des victoires pour luy, & les defaites de ceux qui se sont opposez à sa puissance; il ne leur arrache les armes des mains, que pour les charger des manes; & il ne traite avec eux, que pour les deshonorer.

Ceux qui cognoissent son esprit chagrin, n'estiment pas sa felicité par sa puissance, par ses dignitez, par ses biens & par sa suite: ils le iugent malheureux dans sa teste, & dans son cœur. Pour estre heureux, il faut estre dans la posses-

sion d'un bien assuré, & en iouyr avec plaisir. Pour estre malheureux, il ne faut que le croire; ce qui peut arriuer dans l'abondance des honneurs & des biens, parce qu'il manque tousiours quelque chose à celuy qui espere plus qu'il ne merite.

Il entreprend tous les ans quelque nouvelle guerre il n'en a point eu que d'offensives; & d'une il en fait naistre deux, sans considerer si elles sont iustes & necessaires, ny s'il faut esmouuoir un vieux Estat qui est en paix, non plus que le corps d'un vieillard qui se porte bien.

On verra apres sa mort, ou apres sa disgrace, non seulement en France, mais en Piedmont, en Allemagne, au Pays bas, & en Lorraine, les ruines du passage de sa fortune: on ne demandera que des rappels des bannis, des reparations d'honneur, des eslargissemens de prisonniers, des reestablissemens dans les maisons, des restitutions de biens; & on n'entendra que des plaintes, pour le sang iniustement respendu.

L'ingratitude, l'avarice, l'ambicion, & la cruauté sont les quatre vices qui deshonnorent sa vie, & les bourreaux qui tourmentent son ame. Tous les maux qu'il a fait aux hommes, ne sont que les effets de sa peur. Il ne croit pas estre meschant & infame, en faisant les violences qui seruent à sa conseruation; parce que la presumption luy fait croire, qu'elle est necessaire à la France.

Il se fortifie de places, d'hommes & d'argent; & il ne voit pas, que ceux de sa condition ne sont iamais ruinez par leur foiblesse, mais tousi-

iours par leur imprudence : la sienne est grande en ce qu'il a tenté la fortune, estant au plus haut de la felicité.

Ce qui fait voir la bassesse de son courage, est, qu'il ne veut point negliger les petites vangeances : il ne recognoit pas, que parmi les peuples les choses de peu d'importance sont plustost remarquées que les grandes ; & nous pouvons dire, qu'à Paris on a trouué plus estrange, qu'il aye osté les pensions à quelques femmes qui auoient eu soin de la personne du Roy en son enfance, qu'on n'a fait des iniustices de plus grande consequence.

Il ne cognoist pas dans ses maladies horribles, que le Ciel n'est pas tousiours fauorable à ceux auxquels la terre donne trop de prosperitez. On peut dire de luy, ce qu'on a dit de Pisistrate & de Minos, qu'il est malheureux dans son bonheur par la seule colere de Dieu, qui luy enuoye la punition des Philisthins ; parce qu'il detient avec iniustice la verité prisonniere.

Il ne conserue point les anciennes alliances pour la seureté de l'Estat, mais il en cherche des nouuelles pour la sienne : & il ne voit pas qu'elles luy manqueront, & seront contre nous, lors qu'on ne les pourra plus acheter ; & que les Allemans, qui combattent en partie pour le pillage, chercheront celuy de la France, apres qu'il auront rauagé leurs pays.

Il n'a pas voulu acquerir l'amour & la crainte, qui viennent du respect, & qui n'ont point d'autre source que l'opinion de probité & de sa

geſſe. Il ſ' imagine qu' il eſt homme de bien, en ne faiſant pas tout le mal qu' il peut faire: qu' il eſt ſage, en entreprenant beaucoup; & courageux, en hazardant toutes choſes.

Sa colere ſe porte toute contre le dernier obiect qui la picque; & il abandonne les vieilles entrepriſes, pour ſ' appliquer entierement aux nouvelles: mais en ſe lançant comme l' ours du coſté d' où luy vient le coup, il ſe deſcouvre pour en receuoir vn nouveau. Il penſe cacher ſon impuiſſance en faiſant des efforts extraordinaires: il eſt comme vn cerf qui eſt ſur le point de ſe rendre: il fait des grands bonds, & de belles glifſées qui ne dureront pas long temps. Les plus experimentez pilotes ſe mocquent de cet Admiral, qui n' a tantost plus de voile en ſon nauire que le perroquet.

C' eſt yne choſe merueilleuſe, qu' eſtant impoſſible à ſon Eminence d' aller plus auant, elle ne peut auſſi ſ' arreſter. Il cherche tous les iours de nouveaux appuys de places & d' alliances, ſans conſiderer, que ces eſtançons qu' il met à ſa fortune, l' aduertiffent de ſa foibleſſe, n' eſtant appuyée que pour l' empescher de tomber. Pompee, pour conſeruer ſa puiſſance, faiſoit naiſtre tous les iours quelque nouveau ſuiet de guerre: à la fin ſon eſprit ambitieux ſe porta à la ruine de la Republique: il perit dans ce deſſein, & acquit l' Empire à ſon ennemi.

La furie le pouſſe à la ruine du bien d' autrui, comme ſi de là dependoit la conſeruation du ſien. Il ſ' imagine, que par mille dangers, dans leſquels il iette ſon Maïſtre, la France & ſoy

mesme, il trouuera ses seuretez, & qu'il rencontrera son bonheur dans le malheur de tout le reste des hommes.

Tantost il apprehende comme vn precipice le plan de son repos : tantost son orgueil mesure avec le sot vulgaire la hauteur de sa felicité: tantost son chagrin la considere comme insupportable à celuy auquel le peuple l'a donné. S'il n'estoit point violent, les sages auroient pitié de cet homme, qui est tousiours suspendu entre la crainte & l'esperance. Il ne peut estre assuré, parce que son esprit n'est pas plus fort que sa fortune: il se desfie tousiours qu'elle n'aille point iusques à la fin de sa vie, qu'elle n'auance sa mort, ou la rende ignominieuse.

Il force ses actions, son visage, & ses paroles, ayant iugé qu'il ne luy estoit point expedient de paroistre affligé, lors que les douleurs tuent son corps, & que les desespoirs rongent son cœur. Il voit les confusions qu'il a fait, & recognoist sa folie, qui s'imaginoit que iamais elle n'arriueroit où elle couroit à toute bride.

C'est vne tres grande imprudence, de vouloir entreprendre des choses desquelles on ne peut iamais venir à bout. La sagesse approuue ce que la puissance ne peut changer. On se mocquoit à Rome d'un nommé Pærus, qui auoit fait beaucoup de chemin pour chercher ce qu'il ne pouuoit iamais rencontrer. Que dira-on de l'entreprise que le Cardinal a fait contre le Mariage de Monsieur?

Ce qui m'estonne d'auantage, est, que son Eminence estend ses esperances au delà de cent

ans, en mourant tous les iours. Il croit que c'est viure, de ioindre ses supplices à ceux d'autrui, & de renuoyer le plus loin qu'il peut le plus grand bien qu'il luy sçauroit arriuer, qui est son repos. Il ne voit pas, qu'en bruslant peu à peu, & perdant goutte à goutte son sang, l'ame se destache insensiblement. Il ne pense pas, que ce soit vne mort qui vient du dedans : & il ne s'estudie qu'à destourner avec des gardes celle qu'il fait sentir tout à coup à beaucoup de personnes.

Le confesse qu'il estoit homme de bon esprit, s'il l'eust conduit par le droit chemin ; & s'il n'eust desiré de le faire trop paroistre, plustost que de le rendre vtile : ou s'il eust eu vne industrie paisible : ou si les passions violentes, la hauteur des dignitez, le trop grand employ, & vn peu de bon heur au commencement de son credit n'eussent esbranlé son cerueau. Il auoit aussi quelque cognoissance des bonnes lettres : mais il faut aduoüer, que les sciences & les beaux esprits, qui donnent quelque aduantage pour la vertu, sont des armes dangereuses entre les mains du vice : comme les balsanes mouchetées d'hermines affinent le cheval en sa bonté ou en sa malice ; ou, comme les Astrologues asseurent, que la planette de Mercure est tres bonne, estant iointe avec Iupiter qui est bon, & tres mauuaise avec Saturne qui est malin.

On s'estonne, de ce qu'un corps & vn esprit malade tyrannisent tant de personnes saines en l'un & en l'autre. Le Cardinal croit que son industrie iette la terreur dans tout le monde ; mais il faut aduoüer, que le nom du Roy fait qu'un

grand nombre de Noblesse genereuse obeyt aux volontez de son ministre.

Il est hay, & doit estre mesprisé : c'est ce qui donneroit la hardiessé d'entreprendre sur luy, si son habit n'estoit plus respecté que sa personne; & si on ne craignoit d'auantage la force de ses gardes, que la iustice de Dieu.

Ayant entrepris des meschantes choses, il croit que l'opiniaistreté luy sera plus honorable que la repentance; & que se laisser vaincre par la raison, est confesser vne faute. Au lieu d'examiner la nuit les mauuaises actions qu'il a fait le iour apparauant, il en medite de plus meschantes pour le lendemain.

Ayant disposé des biens de la Royne & de ses bons seruiteurs, il a enuoyé des maledictions aux pauvres qu'il a fait. Il a suscité des trahisons au Roy d'Espagne, qui les nourrit & garde d'oppression. Il veut persuader, que ce grand Prince, qui leur fait du bien par generosité, est vn marchand qui veut acheter quelque aduantage, qui sera preiudiciable à la Couronne de France.

Il fait tout ce que la colere luy conseille; & la colere luy conseille tout ce que sa fortune peut. Sa haine s'exerce d'auantage contre ceux qu'il a offensé, parce qu'il en a plus d'apprehension. Son ingratitude chasse ses bien-faicteurs; & il s' imagine que leur presence est vn reproche, ou qu'elle l'oblige à les honorer & seruir.

Il a fait mourir trois Mareschaux de France; il en tient vn prisonnier, & vn autre esloigné, qui estoient tres capables de seruir le Roy & l'Estat.

Les Mareschaux de Montmorency, de Marillac, d'Ornano, de Bassompierre, de Thoiras.

Il a retiré dans ses garnisons douze ou quinze mille des meilleurs soldats du Royaume, qui sont à charge au public. Il a caché dans ses places la plus grande partie des finances de France: il tire le dernier escu du peuple, crée des rentes sur le Roy; & affoiblit le Royaume d'hommes & d'argent: c'est à dire, il luy coupe les deux bras: il le veut laisser comme le fantosme qui se presenta à Valens Empereur gisant sur le chemin d'Antioche, couuert de playes, & ne monstrant point de vie, que dans les yeux ouuers & pleurans. Pour faire voir que nous sommes fidelles à nostre patrie, nous aduertissons que les estrangers attendent la defaillance, en laquelle nous iette celuy qui espuise toutes les veines de l'Estat.

Le Cardinal deshonne la France en ce qu'il ne se fert que des armes des foibles, qui sont les tromperies & corruptions. Il fait voir aussi, qu'il n'a ny sagesse ny generosité, n'ayant iamais employé ces deux belles vertus ny dans les affaires qu'il a entrepris, ny dans les traitez qu'il a fait. Nous ne voyons par tout que finesse & infidelité, qui sont les deux vices qui viennent d'imprudence & lascheté. Les stratagemes sont permis en guerre: mais il faut confesser que c'est vne façon de combattre, indigne d'un grand Ministre, & sur tout d'un Cardinal, de surprendre les bons par des faux sermens, & d'employer l'argent pour les rendre meschans; de n'attaquer iamais les courageux & les fidelles, & de s'adresser tousiours aux poltrons & aux traistres. S'il estoit vertueux, il seroit plus marry de voir

que semblables entreprises luy reüssissent, que de s'en resiouyr avec insolence, comme il fait.

Il a conuertty les plus grands biens de la France en ses plus grands maux. Il a tiré de la prise de la Rochelle l'orgueil insupportable, qui luy a fait attaquer la Royne Mere du Roy, Monsieur, & tous les Grands du Royaume, fouler les peuples sous les pieds, mespriser les Alliez, & irriter les voisins.

Cet homme qui nous promettoit vn siecle d'or, ne nous a fait voir iusques à present que celui de fer & de plomb. Il a tantost fait du plus riche pays du monde, vn hospital de pauvres & de malades; & il s'imagine qu'il l'est encore de fols, lors qu'il nous veut persuader dans les escrits de ses flatteurs, qu'il est sage tout seul.

Il fait voir clairement, qu'il s'aime plus que le public, en ce qu'il ne fait point de difficulté de le troubler, pour vanger ses iniures particulieres. Son interest est aujourd'huy la regle des affaires d'Estat: & la France est reduite à vn tel poinct, que si elle estoit de verre, vne des coleres du Cardinal la casseroit; ou si elle estoit vn diamant, & qu'il trouua vn marchand, il le vendroit pour acheter son salut, ou le donneroit pour vne grande alliance; c'est à dire, pour vne vanité.

Il ne iuge pas, que le fauory qui differe sa ruine par les supplices & par les guerres, c'est à dire, par le massacre des hommes, auance son malheur; & que celuy qui exerce sa puissance en faisant du mal à plusieurs, & donnant la crainte à tous, ne sçauroit se maintenir longuement. La

cruauté se peut defaire de quelques hommes; mais la bonté les gaigne tous.

La liberté de luy dire les choses comme elles sont estant esteinte, & la fidelité changée en flatterie, il ne croit pas estre trompé, parce qu'il l'est avec douceur & respect. Il perd la cognoissance de sa foiblesse, en se laissant persuader qu'il est aussi fort comme on luy veut faire croire; & que c'est estre vaincu, de ceder à la raison, aux affaires & au temps.

Il s'imagine, que tout ce qui le conduit à la felicité, va au poinct de sa fermeté; & il ne sçait pas, que les choses qui sont grandes par excez & fragiles de leur nature, doiuent estre maniées avec beaucoup d'artifice, de patience, de peine, & de peril. Vne fortune desmesurée doit estre soustenuë par plusieurs mains fortes, sages & fides: elle a besoin d'un grand nombre d'amis; qui ne sont pas ceux qui se pressent pour entrer dans le cabinet d'un fauory: un siecle ne les produit pas à la foule, la Prouidence de Dieu en crée peu dans cent ans, & la Cour n'en fait iamais.

Lors que le Cardinal vient du Louure, qu'il trouue toute la rue de saint Honoré embarrasée par les carrosses de ceux qui l'attendent chez luy; qu'il voit sa Cour, son escalier, sa salle & son antichambre chargées de Courtisans, d'Officiers & Deputez, il ne considere point que sa maison est remplie de ses ennemis: qu'il n'a ses Gardes que contre ceux qui le visitent: qu'il craint les mains de ceux qui fleschissent le genouil deuant luy: & qu'il est dans la presse des hommes sans toucher jamais vn amy.

Il fait tout ce qu'il peut, il escrit tout ce qu'il veut contre ceux qu'il desire de perdre, & enuoye en mesme temps des personnes, pour les empescher de faire & escrire ce qui luy peut des-
plaie. Ses agents font esperer ses bonnes graces, pourueu qu'on dissimule ses iniures. Ce qui est plus merueilleux, est, qu'en trompant ouuerte-
ment & esgalement ses ennemis & ses amis, il veut que les vns & les autres l'estiment homme de bien : & est si heureux, qu'il trouue tous les iours des personnes qui se confient en luy, & se laissent surprendre.

Vne de ses plus grandes passions est contre la maison de Lorraine. Il coupe la racine, pour faire secher les branches qui sont en France. Il chasse hors du Royaume Madame de Guise & Messieurs ses Enfans; il ne considere pas, que Monsieur son mary n'ayant plus de suiet de crainte, n'aura point de consideration qui arreste les effets de ses ressentimens, ou plustost les efforts de son desespoir.

Il a tenu Monsieur esloigné, iusques à ce qu'il a creu mieux trouuer son compte avec luy qu'avec Monsieur le Prince. Il a appellé Monsieur le Prince, lors que la generosité de Monsieur le Comte a reietté le mariage de Madame de Combalet: mais il sacrifieroit le Roy, & tout ce qui est entre S. M. & Monsieur le Comte, pour auoir son alliance; & le dot seroit le Royaume, duquel il tient la plus grande partie.

Il a monsté qu'il estoit par dessus le Roy, en faisant reuoker les dons & les graces de S. M. qu'il uouloit auoir plus de puissance que le

saint Pere, s'efforçant de rompre quatre grands Mariages. Les affaires qui sont suruenues contre ses intentions, ne luy ont pas permis de toucher à trois ; mais il a fait ouuertement tout ce qu'il a peu contre le quatriesme : la iustice de sa Saincteté & la vertu de Monsieur ont arresté ses poursuites.

Il a fait dans vn iour les Mariages de trois Cousines secondes, pour s'acquerir deux Provinces avec deux des plus fortes places du Royaume. Il a mis dans ses interests celuy qui a la principale confiance de Monsieur. Parmy les grandes affaires du Roy & misere du public, il a donné des sommes immenses, & fait des magnificences incroyables.

Il a voulu faire tomber toute l'Allemagne, qui est la pepiniere des soldats, armes & chevaux, entre les mains d'un Prince Protestant, & les dixsept Prouinces des Pays bas dans vn Estat populaire & Huguenot. Il a entrepris d'vnir toutes les forces qui ont dissipé antrefois l'Empire Romain, & qui eussent deuoré en peu de temps l'Italie & la France. Il a tasché en mesme temps de mettre à la porte de cette vieille Monarchie Catholique, vne Republique ieune & heretique. Les sages politiques iugeront, si cela estoit balancer les puissances de l'Europe ; & si en pensant abbaissier la Maison d'Austriche, on ne l'a point mise au plus haut poinct qu'elle aye iamais esté.

La prise de Philisbourg mal gardé, qui est la meilleure & la plus importante place d'Allemagne, la perte du magazin, del'arsenac, & des finances

finances des François, la ruine par la faim, par le froid, & par les coups des meilleures troupes du Roy, tout cela par la faute du Cardinal, doivent donner vn iuste suiet de douter non seulement de sa prudence, mais de sa fidelité. Il est assuré, qu'il aura les meilleures pieces de nostre desbris, qu'il a les plus fortes citadelles, les tresors, les vaisseaux, & ce qui restera de bons soldats. Il laisse perdre ce qui n'est point à luy, pour ne trouver point de resistance au cantonnement qu'il veut faire dans la desroute generale, qu'il attire tant qu'il peut.

Ceux qui sont dans ses interets, publient hautement, qu'il se faut mocquer de ceux qui aduertissent de ce danger. Mais son dessein est semblable à la fièvre ecétique : il est difficile à cognoistre au commencement, mal aisé à guarir en son progrez, & incurable quand il sera formé.

Pour faire semblant, qu'il veut remedier aux maux qui nous menacent apres la bataille de Nortlinguen, la prise de Philisbourg, & autres avantages que l'Empereur a eu, il prend des moyens impies. N'ayant sceu faire ruiner le Roy de Polongne par les Moscouites & Turcs, il tasche de le retirer de l'assistance qu'il doit à l'Empereur son Oncle : n'ayant peu rendre pauvre ce Prince inuincible, il voudroit le rendre perfide, en luy promettant l'Empire qu'il devroit conserver pour son Maistre, s'il estoit en sa disposition.

Il a enuoyé au Turc vne grande somme de deniers, pour faire descendre en Italie la flotte qu'il a sur mer. Il veut faire piller par les infidelles le patrimoine de saint Pierre : ce qui mettroit en danger sa Sainteté & tous les siens du souflement des peuples. Ils diroient qu'elle n'a point reprimé l'audace du Cardinal de Richelieu, & qu'elle a employé en France des hommes qui se sont laissé tromper ou corrompre ; encore qu'il soit vray, que le saint Pere fait tout ce qu'il peut, pour moyenner vne bonne paix entre les Princes Chrestiens, & que pour ce suiet il aye enuoyé en France des ministres tres sages & tres fidelles.

Au mesme temps que le Cardinal traite ces choses avec le Turc, & qu'il est excommunié par la Bulle *in Cœna Domini*, il enuoye des Ambassadeurs en Angleterre, en Dannemarc, en Hollande & à Strasbourg, pour faire des nouvelles ligues contre la Religion : & en propose vne au saint Pere toute contraire, pour exterminer les heretiques : il dit qu'il les a affoiblis en les engageant par des petites assistances à des grandes entreprises, & ayant retiré beaucoup de places de leurs mains. Qui peut iuger à quoy se resoudra cet homme, qui d'un costé ruine l'Eglise, & la menace de son desespoir, & de l'autre luy donne des esperances qu'il la rendra plus florissante qu'elle n'a iamaïs esté, pourueu qu'on ne touche point à son autorité : de laquelle il vsera selon qu'il trouuera son auantage, apres qu'il aura coniuuré la tempeste.

Il a fait entendre par plusieurs personnes, qu'il desiroit avec passion le retour de la Royne, pourueu qu'elle oubliast les affaires passées. Lors qu'elle en a donné les assurances, il a demandé des choses non seulement iniustes, mais impossibles, que Sa Majesté mist entre les mains des bourreaux ses fidelles seruiteurs, pour estre immolez à la passion de celui qui l'a trahie.

Nous auons sceu, qu'il ne s'est saisi de Madame de Lorraine, qu'avec dessein de se seruir de son autorité & de son nom, pour faire trancher la teste au Duc son mary, au Duc François, à Madame sa femme, & à la Princesse de Phalsbourg leur sœur, comme criminels de leze Majesté, pour auoir entrepris de lui oster ses Estats. Ces Princes & Princesses s'estant eschappez, le Cardinal a traicté Madame de Lorraine comme inutile, l'a mesprisée iusques au dernier poinct, & la laissée dans les incommoditez, que la ville de Paris ne peut voir sans deplorer sa miserable condition.

L'histoire de ce qui s'est passé entre le Cardinal & Puylaurens, pourroit remplir vn grand liure: il se faut contenter de dire, que iamais vn esprit subtil ne trouua vne plus franche duppe que ce pauvre malheureux; qui s'estoit imaginé, que le Cardinal souffriroit vn autre fauori, & qu'il prefereroit le mariage d'une petite cousine, à la seureté de sa grande fortune. Il fera perir ce Duc & ce cousin, pour s'acquitter du sermēt qu'il auoit fait de le perdre, lors qu'il disoit,

* Puy-
laurens
s'appelle
Antoi-
ne de
Lage.

qu'avec le temps il auroit de * l'aage. Ce qui a vn peu auancé sa ruine, est l'aduis des memoires qu'il auoit escrit de sa main, pour soustenir le Mariage de Monsieur. Le Cardinal est si iuste, qu'il veut faire trancher la teste à Puylaurens, pour la seule action de probité qu'il a fait en sa vie, au lieu de le chastier, pour auoir esté insolent contre la Royne Mere de son Roy, & de son Maistre: mais ce crime estoit plustost vne recommandation aupres du Cardinal.

Il a pour son principal Conseiller vn homme, qui sous vn saint habit cache vn corps puant & vne ame meschante; qui est deguisé en Religieux bien reformé, pour viure en mauuais Chrestien. Cet hypocrite s'imagine, que Dieu ne le cognoistra pas, lors que les plus grossiers de tous les hommes l'ont desia descouuert: son esprit fait tant de chemin, qu'il n'est pas de merueille s'il parle tousiours en homme eschauffé, n'y s'il a souuent soif. Il est plus propre à trouuer des suiets de rigueur & de cruauté, que de douceur & bonté. Comme la corruption des meilleures & plus delicates viandes est tousiours la pire; il faut dire (par la confession mesme du sieur Hay) qu'il n'y a rien de plus meschant que vn Religieux desbauché. Celuy que nous designons, est grand inquisiteur de l'Estat; interroge les pretendus criminels, fait mettre les hommes en prison sans information, empesche que leur iustification ne soit escoutée, & par des terreurs paniques il tire les declarations, qui seruent pour couvrir l'injustice du Cardinal. Il monstre

qu'il est bien preuoyant en composant des chimeres, & fournissant des expediens pour les combattre. Pour estre estimé vn excellent pilote, il fait croire à nostre Admiral, qui est assez apprehensif, que chasque vapeur doit produire vne tempeste. Il fait indignement seruir le Ciel à la terre, le nom de Dieu aux tromperies, & la Religion aux ruses de l'Estat. Ce qui est plus déplorable, est, que ce meschant moyne, ayant obtenu vne commission pour employer cent Religieux à la propagation de la foy, il les enuoye deguisez en Turquie, Perse, Fez, Moscouie, Allemagne, & Hollande, pour destruire l'Eglise. Ils portent plus seurement, & à moindres fraix, des paroles & des paquets, & se rendent solliciturs pour faire vne chose qui n'est pas mal aisée; à sçauoir, de rendre tous les ennemis de la Foy Catholique ennemis de la Maison d'Austrie. Les Princes voisins se voyans descheus des esperances que le Cardinal leur auoit fait concevoir, il enuoye les emissaires de cet apostat, pour tromper les plus esloignez. Ils sont desia arriuez en Tartarie, & en Perse; ils promettent vne inondation de ces peuples sur les Estats de l'Empereur, & font esperer sans doute vn secours de Chinois, ou de faire venir vne armée de ces dragons volans, qui sont au delà du fleuve Hyphasis, & qui enleuent les hommes armez de toutes pieces. Les visions du Pere Ioseph vont iusques là, depuis qu'il a voulu ruyner le grand Turc avec cent hommes, & sept vaisseaux.

Nous ferions vn volume de veritez auffi gros comme est celuy des mensonges compilées depuis peu par le sieur du Chastelet, si nous voulions estre auffi longs en nos Obseruations, comme il a esté dans les siennes : il se faut contenter, pour conclusion, de faire ce iugement de la vie, mœurs & conduite du Cardinal de Richelieu, que c'est vn homme, que l'ambition, l'auarice, la vangeance & la felicité ont porté si auant, & conduisent avec tant de vitesse, qu'il luy est impossible ny de reculer ny de s'arrester : encore que la hauteur où il est l'estonne, & que le precipice qu'il voit luy face tourner la teste : il tient son sommet embrassé, & ne veut tomber qu'avec luy. Il aime mieux rompre ce qui reste d'entier dans le monde, que de rabiller ce qu'il a deschiré. Il ne iuge pas qu'il est plus expedient de faire doucement la retraicte, que d'estre contraint de prendre la fuite ; & qu'il vaut beaucoup mieux obeyr à sa raison, qu'à la force d'autrui. Ce qui le retient, est, qu'il ne peut emporter tout son bon bagage : & qu'il fait plus d'estat des biens qu'il acquiert tous les iours pour luy ou pour les siens, que de la tranquillité de sa vie. Je le iuge plus digne de compassion que d'enuie, en ce que ie sçay bien qu'il a plus d'apprehension que de plaisir, qu'il se desie plus de ses amis que de ses ennemis ; qu'il est plus tourmenté dans son liect & dans sa litiere, qu'un homme constant ne seroit sur vn cheualet, ou sur vne roüe. Il n'est iamais plus malheureux, que lors qu'il est seul ; parce qu'il n'est

iamais plus meschant ; ses mouuemens dans sa solitude desployent ce que la honte & la crainte cachent au public : en cette retraicte il esguise sa colere , & effarouche son audace ; & c'est le lieu où il sent la charge de son malin esprit , qui est pesant aux autres dans ses actions ; & à luy mesme dans ses meditations. Si le sieur de la Folaine , qui a charge de renvoyer ceux que le Cardinal ne veut pas voir , pouuoit aussi bien donner l'exclusion aux mauuaises nouuelles, aux allarmes , & aux desespoirs ; il gagneroit bien les appointemens qu'on luy donne. Ce qui doit consoler ceux qui sont exclus, est, qu'ils sont plus heureux que ceux qui entrent , parce que estre mesprisé est vn moindre mal , qu'estre trompé. En fin , iugez miserable celuy qui nous montre des biens qu'il ne goust pas ; qui se repent sur plusieurs affaires , & ne reuiert iamais à soy ; qui a pris vne tres grande circonference d'employ , mais qui ne trouue iamais de repos dans son centre. Il est miré sans cesse par le changement , suiui par la repentance , attaqué par la maladie , asseuré de la mort ; & il se represente tousiours la derniere heure de sa puissance & de sa vie , qui rend toutes les autres malheureuses.

Quelle infamie pour luy , & en quel desordre doit estre son ame, lors qu'il voit que toute la Chrestienté se prepare pour le defaire , si ce n'est qu'il tire de la vanité de ce qu'il met tant de personnes en peine ? Au commencement de sa fortune, ceux qui le cognoissoient en auoient

peur comme d'un petit serpent ; mais lors que sa puissance a fait sentir ses entreprises aux quatre parties de l'Europe , elles se vont unir pour le poursuivre comme un dragon , qui empoisonne l'air & les fontaines. Nous croyons , que les Grands & le peuple de France les preiendront , & qu'ils osteront aux estrangers la gloire de l'avoir defeat , si la iustice du Roy ne la veut avoir tout entiere. Nous la luy desirons , & le supplions tres humblement , de ne souffrir pas qu'on mette le feu dans sa Maison , pour en chasser un homme qui a la peste. Nous esperons que Sa Majesté comme tres pieuse , aura soin de l'Eglise de Dieu , & desirera de remettre en sa place la Royne sa Mere. Sa Majesté comme tresbonne aura compassion de son pauvre peuple ; & comme tres iuste , fera iustice à ceux qui ont abusé de l'honneur de ses bonnes graces , & de son autorité.

Nous pourrions faire des grandes Observations sur la vie du sieur Hay , mais nous avons peur d'offencer le Cardinal en l'accouplant avec luy. Il suffira de dire en passant , qu'un ingrat defend l'autre. Hay offence la Royne Mere du Roy , qui luy a fait du bien , & deschire la reputation du Garde des seaux de Marillac , qui luy a sauvé la sienne avec la vie. Pour monstrier que nous sçavons de ses nouvelles , voicy deux ou trois veritables histoires. L'an 1626. le Duc de la Trimouille , incommodé par la mauvaïse conduite du pere du sieur Hay , qui estoit Intendant de sa maison , vendit les terres de Guel & de

Becherel, mouuantes de la Comté de Nantes, qui appartient à la Royne Mere du Roy. Le Sieur Hay s'adressa au Cardinal de Berule, pour obtenir par son moyen les droits qui estoient acquis à Sa Maiesté elle luy en fist le don, qui luy a vallu huit ou neuf mille liures; ainsi qu'on peut prouuer par sa quittance. Enuiron ce mesme temps, le Sieur Hay estant Commissaire d'un nommé Lopez, Syndic des Grenadins chassez d'Espagne, & prisonnier à la Bastille pour crime d'Estat; le Sieur Hay le fist trouuer innocent, apres auoir receu de luy vn diamant de quinze mille liures: ce qui vint à la cognoissance du Garde des seaux de Marillac, qui pour ce suiet chassa du conseil le Sieur Hay, sans le vouloir scandaliser, ny chastier plus rigoureusement, comme il meritoit. Le mesme Garde des seaux peu auparauant auoit retenu vn Prince, qui vouloit faire roüer à coups de bastons le Sieur Hay, pour auoir fait vne satyre à sa mode contre luy. La Royne luy a donné le bien, le Cardinal de Berule l'a obtenu pour luy, le Garde des seaux de Marillac luy a sauué deux fois l'honneur & la vie: il a fait contre la Royne deux libelles infames, vne prose impie contre le Cardinal de Berule, & les Observations contre les Marillacs. Iugez, si les bien faicteurs doiuent estre payez de cette monnoye, & quel supplice merite celuy qui conuertit des obligations sensibles en iniures atroces.

Il se faut contenter pour ce coup de ces deux Observations sur la vie du Sieur Hay, & ti-

rer cette consequence de celles du Cardinal; que tous les siecles passez n'ont point veu de fauory insolent, cruel & ingrat comme luy. Maximin le Thracien, qui fist mourir la sage Mamea sa bien-faïctrice, & se defit de l'Empereur Senere son fils, qui luy confioit ses secrets & la conduite de son armée; Berengarius, qui reduisit à vne extrême pauvreté la vefue de Lothaire; Anno Archeuesque de Cologne, qui fist emprisonner la vefue de Henry III. Empereur, n'ont rien fait qui approcha des violences du Cardinal. Il nous fait chanter dans tous les escrits qui blasment la Royne, les seruices qu'il a rendus au Roy & à l'Estat: en attendant que sa fin descouure aux plus ignorans s'il a esté bon ou mauuais homme, sage ou fol Conseiller, disons que le Royaume de France ne luy aura iamais tant d'obligation, que l'Empire d'Orient auoit à Eutrope; c'est ce grand Capitaine tant estimé par les Orateurs & Poëtes de son temps. Les prosperitez, les grandes charges, & la faueur, le porterent à telle insolence, qu'il mesprisa Eudoxia, vefue de Theodose & Mere des Empereurs Arcadius & Honorius. Cette Princesse ne pouuant souffrir cet impudent, porta ses enfans à le chastier: se voyant poursuiuy par les gardes d'Arcadius, il se ietta dans la principale Eglise de Constantinople, qui estoit vn azyle inuiolable, s'attacha à l'Autel. Saint Iean Chrysostome, ayant plus d'esgard à la raison qu'au mauuais traitement qu'il auoit receu autrefois de l'Imper-

trice, montant au iubé, cria au peuple, qui vouloit combattre pour le privilege du temple, qu'on laissa faire iustice. Eutrope fust donc attaché de l'Autel qu'il embrassoit; il fut enuoyé en exil, on osta son nom des fastes, on brisa ses statues, & en fin il eust la teste tranchée. Que diroit ce bon Saint s'il viuoit en cette saison, qui a veu vn seruiteur, qui a emprisonné, despoüillé de ses biens, & iniurié publiquement la plus grande Royne du monde, sa Bien-faïctrice & la Mere son Maistre? Voila vn exemple fort propre pour le Cardinal: en voicy vn autre pour le Sieur Hay. Vn nommé Gneuosius, ayant calomnié Heduge femme de Ladislas Roy de Pologne, l'imposteur fust condamné par tous les Grands du pays, à se desdire de son accusation, en abboyant comme vn chien sous la table de cette Princeesse. Si le Sieur Hay, qui a vn nez troussé en chien d'Artois, en est quitte à si bon marché; on luy fera vne belle grace. Qu'il se souuienne d'auoir escrit, que la corruption de nostre siecle a besoin de grands exemples: il doit craindre, que la punition d'une effrenée licence que le temps a donné d'escrire contre la Royne Mere du Roy, ne se prenne sur vn homme de trois lettres, qui est conuaincu d'auoir composé trois mesdisances, & pourroit bien estre estranglé en vn liect composé de trois pieces par les mains d'un Officier, qui a trois syllabes en son nom. Nous aimons mieux qu'il se conuertisse, & l'en prions. Si le desespoir luy fait continuer son peché, & qu'il se melle

encore de parler insolemment, il doit avoir apprehension, qu'en soustenant la reputation d'une Princesse, qui tient sa grandeur de Dieu & de la nature, on ne respecte point vne qualité achevée. Si Monsieur le Cardinal fournit vne autrefois des memoires pour blasmer sa Bien-faïctrice, il trouvera plus de resistance à ce dessein, qu'à la prise de Pignerol & de Nancy.





A V

S A G E L E C T E U R.

S Age Lecteur, au commencement de cet ouvrage ie vous ay donné quelques aduis; ie suis obligé à la fin d'en adiouster un. I'ay sceu que mes Veritez ont touché si viuement le Sieur du Chastelet, qu'apres un estonnement & retraite de plusieurs iours, sa santé a esté tellement alterée, que dans quelques mois il est mort en la vigueur de son aage d'une hydropisie; prouenuë de sa melancolie. Je proteste deuant Dieu, que mon intention n'a point esté de precipiter sa vie, mais d'arrester sa plume; ny de le perdre, mais de le corriger.

l'ay esté aduertý, que deuant son depart de
 ce monde, il auoit eu regret de l'auoir rem-
 ply de calomnies & railleries contre la
 Royne Mere du Roy, & plusieurs person-
 nes de condition. le me suis resiouy avec les
 Anges de sa penitence; & i'ay eu un extré-
 me desplaisir, de ce que son petit iugement
 auoit si mal conduit son grand esprit, qui
 s'estoit abandonné à la corruption du siecle,
 & à son inclination de mesdire: elle s'em-
 portoit si fort, qu'il a esté expedient de luy
 donner un caueçon: i'ay bien reconnu qu'il
 l'auoit blessé. * Vne de ses lettres escrite au
 Marquis de la Milleraye, lors qu'il estoit
 au siege de Louuain, estant tombée entre
 mes mains; i'ay veu qu'il coniure ce bon
 Seigneur, son intime amy, de faire brusler
 dans la place de Bruxelles tous les escrits
 qui l'ont deschiré, & mesmes leur autheur.
 Il assure pourtant que Monsieur le Cardi-
 nal luy a dit, qu'il engraissoit en lisant ce
 qu'il appelle mesdisances; mais ie croy que
 son Eminence le voyant enfler d'eau, tas-

* L'ale-
 xandre est du
 Samedi
 16. Iuin
 1635. à
 Paris.
 Le des-
 fus, A
 Monsei-
 gneur
 Monsei-
 gneur de
 la Mil-
 leraye,
 grand
 Maistre
 de l'ar-
 tillerie
 de Fran-
 ce. Signé
 Chaste-
 tui.

choit de luy persuader qu'il se remplissoit
 de graisse. La charité m'empesche de publier
 cette lettre, dans laquelle on voit beaucoup
 de bassesses, quelques mocqueries, princi-
 palement contre les Sieurs de Charnassé,
 & de Miromenil, & des grandes saillies
 d'un esprit esgaré. Comme Dieu ordonna
 des affaires du Pays bas autrement que le
 Sieur du Chastelet ne croyoit; aussi sa sain-
 te Prouidence disposa bien tost apres de sa
 vie, & ne voulut pas qu'elle fust reserüée
 pour un exemple de la iustice du Roy. Dieu
 l'a faite: ie l'ay prié pour cette ame, qui a
 exercé ma patience, mon esprit, & ma
main.





IVGEMENT

SVR

LA PREFACE

ET

DIVERSES PIECES

QVE LE

CARDINAL

DE RICHELIEV

PRETEND DE FAIRE

SERVIR A L'HISTOIRE

DE SON CREDIT.

IVGEMENT

OR

LA PRÉFACE

ET

DIVERSES PIÈCES

NOUVELLES

CARDINAL

DE RICHELIEU

TRETIEND DE LAIR

DE LA VIE DE RICHELIEU

DE SON CREDIT



IV GEMENT

SVR LA

PRÉFACE ET

DIVERSES PIÈCES QUE

le Cardinal de Richelieu pretend
de faire servir à l'Histoire de
son credit.



E soyn que la Prouidence de Dieu a de la Verité, n'a point permis que les escrits des flatteurs ayent duré long temps; & a fait que les liures des Historiës véritables ont triomphé des siecles. Tous les fauoris ont rencontré grand nombre de personnes qui les ont loüez : nous ne voyons point les œuures de tous ces corrompus, & admirons celles d'un homme courageux qui s'est opposé à leur puissance ; ou d'un sage, qui a remarqué leur mauuaise conduite. Il faut faire estat du

Jugement sur la Preface

jugement de ceux qui dressent des histoires sans esperance d'estre recompensez , & sans apprehension d'estre mal traictez. Si les Escriuains du Cardinal de Richelieu portoient le flambeau de Verité deuant luy , ils l'empescheroient de broncher , & produiroient apres luy l'ombre de la Vertu , qui est la gloire. Ils portent derriere luy vne fausse , ou , comme nous disons , sourde lanterne , qui produit deuant luy l'ombre de vanité , à laquelle il s'amuse ; & c'est ce qui le fait treibucher. Il ne voit pas que ses flatteurs ne veulent plaire qu'à luy seul , qu'ils reiettent tout ce qui seroit profitable à la plus grande partie de ceux qui vivent , & agreable à tous ceux qui viuront : on ne leur scauroit monstrier les ruines qu'à fait le passage de la fortune du Cardinal , qu'ils ne recognoissent qu'il n'a esté estimé que par des menteurs. En effect leurs discours ne sont que des loüanges pour luy , ou des calomnies contre ceux qu'il a offensé. Voila les deux employs de la double imposture , & les exercices ordinaires des chiens qui lechent les playes de celuy qui les nourrit , & taschent d'en faire à ceux apres lesquels on les amene.

C'est le principal estude de celuy qui a dressé vne longue Preface pour la mettre à la teste d'un gros volume , qui est vn amas de flatteries , & de mesdisances. Il a donné pour tiltre à ce bel ouvrage , *Recueil de diuerses pieces pour seruir à l'Histoire* ; encore qu'il n'y aye rien pour l'Histoire , que le suiet de faire vne periode , qui monstiera que l'imprudéce du Cardinal à creu qu'un

grand liure le loüeroit beaucoup, & blasmeroit grandement ses ennemis. Je confesse, que ie n'ay iamais veu tant de folies in folio, & crois, que les Escriptuains du Cardinal ont voulu mettre sous les pieds de ses petites actions ce gros registre, pour les releuer d'auantage; ils ont pensé aussi, qu'en iettant sur nostre teste cette lourde masse, ils nous estourdiroient. Lors que i'ay appris que Cramoisi auoit esté l'Imprimeur, i'ay dit, que le Cardinal & ses venerables compilateurs s'estoient estudiez de paroistre fols en cramoi si à double teinture. I'ay eu regret de voir, qu'on aye employé tant de papier fin pour faire vn ouurage si grossier, que les bras des tireurs se soient lassez pour lasser nos esprits, & que leurs balles enflées ayent produit tant de vent. Mon dessein estoit vne fois de mespriser ce fatras, ou de n'employer que les escritures de ses aduocats contre nostre partie, qui pourroit iuger, si elle auoit le loisir, que ses Escriptuains sont du nombre de ceux qui prennent pour duppes les puissans & les riches qui veulent estre loüez. A la verité, ie n'ay iamais veu vn homme plus malheureux en ses loüanges que son Eminence, qui n'a point esté estimé iusques à present par vn homme de bien; ny loüé par vn habile & sçauant Escriptuain. Il a recognu sa disette, & pour tascher de s'en releuer, il a dressé vne escole, ou plustost vne voliere de Psaphon, l'Academie qui est en la maison du Gazetier, c'est à dire du pere des mensonges: là s'assemble vn grand nombre de pauvres ardens, qui apprennent à composer des fards pour plastrer des laides actions, & à faire

des vnguens, pour mettre sur les playes du public & du Cardinal. Il promet quelque auancement, & donne des petites assistances à cette canaille, qui combat la Verité pour du pain.

Le chef de la bande infame est vn homme qui est d'autant plus meschant qu'il est rebelle à la lumiere, qu'il ne peche point, ny aueuglé par l'ignorance, ny pressé par la misere; mais poussé par l'ambition, & tyrannisé par la crainte. Il a quelque auantage par dessus ses compagnons, & comme Capitaine de ces enfans perdus, il paroist à la teste du grand volume, pour se donner l'honneur d'auoir fait la premiere piece de celles qu'il s'imagine deuoir seruir à l'Histoire du temps. Son nom d'Hay me fait souuenir d'vn commandement que Dieu fist à Iosué, de leuer son bouclier contre la ville d'Hay; estant sacquée par les enfans de Dieu, auxquels elle s'opposoit. Pour obeyr à sa diuine Majesté, & rendre ce que nous deuons à l'Innocence & à la Verité, nous leuerons le bouclier doré de nos iustes defences; nous sommes assurez, que son or estant exposé aux rayons du Soleil, donnera dans les yeux à nos ennemis, & les remplira de confusion.

Iosué 8.

Ie confesse, que ie suis en peine de recognoistre l'intention d'vn homme, lequel ayant esté Aduocat General dans vn Parlcment, depuis Maistre des Requestes, & qui est maintenant Conseiller d'Estat, s'est amusé à faire vn gros volume de tout ce que plusieurs petits barbouilleurs de papier ont escrit pour le Cardinal, &

Contre ceux qui ont choqué son credit. Je vois que cet Eſcriuain remplit ſa Preface d'histoires mal appliquées, & de ſimilitudes mal adiuſtées: que ſes auteurs ne ſont que ceux des femmes curieuſes, ou des ieunes gens qui reuiennent des eſcoles: il n'a leu que les Oeuures morales de Plutarque; & il a deſrobé la plus grande partie de ce qu'il eſcrit, dans le Remerciement de l'Ad-uocat d'Orleans, ou dans les libelles du Soldat François, & de l'Auant-victorieux. Il me ſou- uient qu'en ma ieuneſſe ces eſcrits eſtoient fort eſtimez par ceux qui entroient dans le monde: i'ay creu que le ſieur Hay ſ'en eſt autrefois ſeruy dans ſes plaidoyez, deſquels il a extrait la quinte eſſence, pour embellir ſa longue & ennuyante Preface. Je ne veux pas examiner ce qu'il a tiré des lettres humaines, encore que i'euſſe le moyé de faire voir en cent endroits, qu'il adiouſte aux histoires pour les accommoder à ſon ſuiet. Je ne trouue pas eſtrange, au contraire i'eſtime, de prendre hardiment dans les eſcrits d'un Sage vne belle ſentence de morale ou de police, & d'augmēter ou oſter quelque mot pour l'accom- moder à ſon ſuiet: c'eſt ſe ſeruir d'un bien que l'eſprit d'un homme ſerieux a voulu rendre pu- blic; c'eſt teſmoigner, qu'on a le iugement d'ap- prouuer les choſes bonnes, & la volonté de les rendre meilleures: mais ie ne fais point d'eſtat de ceux qui font parade dans un diſcours politi- que de certaines fleurs qui ne ſont recherchées que par des petits enfans. Les eſcrits qui trait- tent de la morale, doiuent eſtre des iardins de ſimples, qui ſeruent plus à la medecine qu'au

plaisir. La Verité les cueillit pour guarir le public, non pas en charlatan, qui avec beaucoup de discours fait valoir peu de chose ; mais en sage medecin, qui pense plustost à ordonner vn bon remede, qu'à piper son malade avec des belles paroles. On voit bien que le sieur Hay a travaillé plustost pour appaiser le Cardinal, & pour acquerir quelque reputation parmi les ignorans, que pour satisfaire à sa conscience, & pour se mettre en bonne estime parmy les sages. Les recherches curieuses de sa Preface nous font connoistre sa pensée. Le corps monstrueux de son volume, tout cōtraire à son tiltre, nous fait voir, que ce compilateur n'a voulu payer que d'un gros ouvrage, qui ne peut apporter autre lumiere à l'histoire, que celle qu'il rendra lors qu'il sera bruslé par la main d'un bourreau. Hors de trois declarations, & autant de lettres, nous ne voyons dans ce grand amas aucunes pieces, qui nous puissent instruire de ce qui s'est passé en France, & au dehors, depuis le ministere de son Eminence.

Pour dire des choses fort particulieres, il falloit parler de ses poursuites pour auoir le chapeau de Cardinal, & pour entrer au Conseil, de ses negotiations avec le Bastard de Mansfelt, des affaires & traitez de la Valteline, de la disgrâce du Marquis de la Vieuille, de la recherche des Financiers, des vray motifs de la mort de Chalais, de l'emprisonnement de Messieurs de Vandosme & du Mareschal d'Ornano, des intrigues d'Angleterre, de ce qui se passa au siege de la Rochelle & en l'Isle de Rhé, des ombrages que se

Cardinal eust de l'Euesque de Mande son cousin, des mauuais offices qu'il fit au Marechal de Thoiras, de la resolution qu'il prist de ruiner la Maison de Lorraine, de remariier Monsieur à sa fantasie, de perdre le Cardinal de Berule, & les Marillacs; sur tout, de faire despendre de son pouuoir la Royne sa Maistresse.

En suite de ces choses, nous serions tres aises de voir le secret de la rupture avec le Duc de Sa-
uoye, & du mescontentement qui fust donné au Prince de Piedmont en son voyage qu'il fist à Paris: pourquoy on entreprit si chaudement la defence de Monsieur de Mantoüe, & qu'on ne voulut pas accommoder son different par la douceur: quel dessein caché auoit la guerre d'Italie: ce qui se passa en la diette de Ratisbone; si le Cardinal traita de bonne foy: si au temps que l'Empereur desarmoit, son Eminence appelloit en Allemagne le Roy de Suede, & à quelles conditions: si apres la reddition de Mantoüe il a deu retenir Pignerol: pour quelles raisons le Duc de Lorraine a esté despoüillé de ses Estats à trois reprises; les finesses du Cardinal pour le surprendre: les entreprises contre l'Empire, les assistances extraordinaires qu'il a donné aux Hollandois & Suedois pour ruiner la Maison d'Autriche, & rendre miserable la Royne Mere du Roy: les traitez que faisoient les gens de Monsieur en allant en Lâguedoc, & les lettres qu'il enuoyoiët au Cardinal: celles qu'ils ont founy pour faire perir le Duc de Montmorency, & les vrays suiets de sa mort & les poursuites contre le Marechal de Marillac, la corruption de treize Iuges, la

pitoyable histoire de sa condamnation & supplice: les pratiques pour rendre traistre Walstein apres la mort du Roy de Suede: les desseins & les partages que cettuy-cy faisoit de l'Europe, & la fin tragique de l'autre: les efforts pour empêcher la paix d'Allemagne: les negociations de Constantinople: les allées & venuës pour attirer Monsieur en France: la defroute des siens, & la veritable cause de l'emprisonnement de Puy-laurens: les instructions, lettres, memoires, vnions, confederations trouuez dans le bagage du Roy de Suede, dans les papiers de Walstein, dans Philisbourg; tout ce qui a esté tiré des cabinets de diuers Princes surpris dans les valises de plusieurs courriers, & donné par diuers ministres des Souuerains & Republiques. Voila les pieces authentiques qui descouvriront la verité de ce qui s'est passé depuis dix ans: il faut dresser là dessus l'histoire du credit du Cardinal de Richelieu, qui sera aussi grande que le liure qu'il nous a fait voir depuis peu. Nous auons vne partie de ces papiers en nostre pouuoir, outre ce que nous ont dit ceux qui ont traité de ces affaires, & les cognoissances particulieres, que l'experience & la reflexion nous ont acquis. De ces choses secretes & originelles il faut tirer les lumieres pour escrire naïfement, non pas des panegyriques importuns du Cardinal de Richelieu, & des iniures qu'il a fait dire à la Royne Mere du Roy, à Monsieur, à tous les Princes Chrestiens, & sur tout à ceux qui ont escrit des veritez, qui ne luy sont point agreables. Quelle effronterie? que la plus grande affaire qui soit

iamais arriuée à la France, à la Maiſon Royale, & à toute l'Europe, ſoit deſguiſée par des libelles faits pour loüer le Cardinal, & pour deſhonorer tous ceux qu'il a ruinez ou troublez?

Quelle impudence, qu'on oſe appeller pieces pour l'hiſtoire l'Entretien des champs Eliſées; c'eſt à dire vn dialogue de Lucian, ou de Maïſtre Guillaume; * vne inuectiue d'un valet de college deuenu furieux, contre celui qui defend la reputation de la Royne Mere de S. M. vne lettre ſuppoſée du Cardinal de Richelieu, & pluſieurs autres diſcours de ſemblable eſtoffe? Ce qu'il faut remarquer, eſt, que toutes ces pieces qu'on dit eſtre deſtinées pour ſeruir à l'Hiſtoire, ſont ſi authentiques; qu'il n'y en a pas vne qui porte le nom de ſon Autheur, hors du Catholique d'Eſtat; l'Imprimeur meſme ſe cache, & ſur tout le compilateur, qui eſt l'Autheur de la Preface. Il faut aduoüer, que ces gens ſe deſſient de la fortune du Cardinal, ou qu'ils ſont honteux d'auoir eſcrit tant de menteries. Mais en quelle diſette eſt ce ramasseur de lambeaux pour faire vn manteau à l'Hiſtoire, lors qu'il eſt contraint pour remplir ſes cayers, & porter au Cardinal vn gros liure, de rendre l'Aduocat de la Royne Autheur de trois ouurages qu'il n'a iamais veu, de la Reſponce au Maniſteſte des Liegeois, de la Repartie à la declaration du Comte Henry de Bergue, & de l'Hellebore aux meſcontens? Les deux premiers eſcrits ſont ſi petits & ſi obſcurs, que perſonne n'en cognoit les ouuriers: le dernier a eſté fait à Bruxelles par vn pauvre Gentil-homme Walon, mort depuis cinq ou ſix mois; vous l'em-

* Lettre
de chan-
ge de Sa-
bin.

ployez comme vne piece fauorable à son Eminence, ayant esté faite par vn homme zelé pour les ministres d'Espagne. Ils seruent leur Roy avec tant de satisfaction de ses peuples, que c'est les offenser de les vouloir defendre, ou de faire cognoistre qu'ils ont besoin d'estre recommandez par des libelles impertinens. A quelle misere est reduit celuy qui dispose de tous les biens de la France, & qui a la plus grande partie de ses tresors? il ramasse avec soin, & tient pour precieux ce que nous auons ietté parmy les ordures: il emprunte les armes qu'il croit auoir esté faites pour couvrir ses ennemis; & il se declare fol en prenant l'hellebore pour soy, encore qu'il soit préparé par vn homme qui n'estoit pas des plus sages.

*Le libelle
fait pour
la défense
des fa-
uoris a
pour til-
re, Hel-
lebre
aux mes-
consens.*

Si le compilateur se mocque du Cardinal, en luy faisant vne cazaque de ce qui a esté vne ro-pille à l'Espagnolle, qu'il s'imagine auoir esté taillée par le Sieur de saint Germain; il fait paroistre d'auantage sa pauureté, en grossissant son ouurage de celuy du Theologien sans passion. On ne met point à la teste de ce discours qui en est l'Authcur: mais l'Euesque de saint Malo, qui a esgratigné la Remonstrance au Roy, assure, que cette piece est sortie de la mesme main. Le Sieur Hay ne deuoit pas adiouster au corps de son ouurage vne œuvre qu'il croit auoir esté faite par vn esprit qu'il appelle *funeste au Cardinal*, ny le Cardinal la faire inserer avec tant de soin dans le Mercure François; quin'est, aussi bien que le gros volume, qu'un magazin de toute sorte de fripperies. Le Sieur Hay a vsé en cecy de

mauuaïſe foy: puis qu'il entreprenoit de fournir des memoires pour l'Histoire, il les deuoit ranger ſelon l'ordre des temps. Le Theologien ſans paſſion fait l'an 1626. deuroit à ce compte eſtre la premiere piece de tout l'ouurage. Outre que le Sieur du Chaſtelet ne luy a point voulu faire tant d'honneur, il a eu peur qu'on ne remarqua que cet eſcrit auoit veu le iour, lors que les actions du Cardinal n'eſtoient pas œures de tenebres. On l'a loué iuſques à l'an 1626. & on le reprend depuis l'an 1628. il a eu du temps pour changer, ou pour ſe faire cognoiſtre: c'eſt vn ſu-iet qui a peu receuoir des qualitez contraires, où il a eſté aſſez artificieux, pour faire paroître quelque vertu qui le pouuoit porter à la puissance, qui n'a plus diſſimulé lors qu'elle n'a rien crain. Dans le commencement de la fortune du Cardinal nous iugions des choſes cachées par les publiques, nous faiſons maintenant le meſme; & nous imitons Dieu, qui eſtime ou meſeſtime les hommes ſelon la bonté ou la malice preſente.

Après auoir deſcouuert le deſſein qu'à eu le compilateur du gros volume en ſa grande Preface, il eſt raïſonnable que nous venions au particulier, & que nous tirions le ſecond ſuiet de la conſuſion du Sieur Hay des choſes qu'il a eſcrit contre la Royne Mere du Roy. Il faut aduoüer, que l'eſſronterie des Eſcriuains du Cardinal n'eſt pas ſi eſtrange que ſon vice. Si celuy qui rend les hommes flatteurs pour en tirer vanité, eſt plus meſchant que celuy qui ſe rend flatteur pour ſortir de la neceſſité; combien eſt plus

malin l'ingrat, qui pour couvrir son crime, achete ou menace des Escriuains, pour les porter à calomnier ses bien-faicteurs? Le mal que le Cardinal a fait à la Royne, le iette dans vn si grand desespoir, que pour l'en retirer, il veut qu'on luy represente la Royne comme criminelle; & la premiere personne contre laquelle il fait chercher des mauuaises pensées, est la premiere pour laquelle il est obligé d'en auoir des bonnes. Le Sr. Hay, qui est assez adroit courtisan, ayât cognu la maladie de son maistre, loge sur le frontispice de son ouurage, & mesmes hors d'œuvre, des iniures contre S. M. afin que le Cardinal voye tout à l'entrée, qu'on s'estudie d'appaiser le demon qui le persecute. Que pretendez-vous Sieur Hay? voulez-vous rair vn honneur qui ne depend que des actions de la Royne, qui sont plus cognuës que ne seront iamais vos escrits? Vous avez peu oster à cette grande Princeesse la presence de ses deux Fils, son dot, son douaire, son beau palais, ses meubles precieux, & l'air de France; vous ne pouuez rien contré sa gloire, qui est celle de ses Enfans: vous estes des Apharantes, qui mandifiez vn Soleil qui est regardé avec admiration par toute la terre: vous tirez des fleches contre le Ciel qui a porté les Dieux du monde; & vos mains sacrileges veulent rompre les fueilles d'une vigne plus estenduë & plus belle que celle du songe de Mandané: ne voyez-vous pas que la nostre va remplir toute la Chrestienté? Je crois que vostre dessein seroit, apres que vous auez chassé la Royne du lieu que la Prouidence de Dieu luy auoit donné pour son repos, de la jeter, si vous

pouuiez, dans l'impatience, pour luy faire perdre la place que Dieu luy prepare dans le Ciel. Si vous n'escriuez qu'avec cette intention, vous faites vn effect contraire: vous augmentez les Couronnes de S. M. & adioustez celle de la patience aux deux, que Henry le Grand son cher Espoux luy fist mettre sur la teste à saint Denis. Ne croyez donc pas que la Roynie soit tellement irritée par vos iniures, que sa colere aye commandé qu'on vous enuoye vne responce: sa bonté vous pardonne, mais nous auons interest qu'on vous cognoisse. Cet escrit, & les autres que nous auons fait, ne sont dressez que pour defendre l'honneur de la Naissance du Roy, & pour vous denoncer comme criminels de leze Maiesté diuine & humaine: en attendant que le Roy face chastier ce crime, nous enuoyerons nos protestations à tous les Roys, Princes & Republiques, & les mettrons dans toutes les bibliothèques des hommes curieux.

Nous auons assez de suiet de trauailler aux loüanges d'une Princesse, de laquelle dans cent ans tous les Souuerains de l'Europe seront descendus; comme ils le sont quasi tous à present ou de Pere, ou de Mere, de Marie de Bourgonne. Mais puis que le Cardinal a voulu que sa Bien-faïctrice fust contrainte de laisser des apologies contre ses calomnies, il doit auoir grand despit, de ce que la posterité ne pourra iamais voir l'Innocence d'une bonne Maïtresse, sans detester la malice d'un seruiteur ingrat. Toute la terre iugera, que tout ainsi que ce vice est capable de noircir toutes les actions de son Eminen-

ce; quand elles seroient belles; aussi que par vn iuste iugement de Dieu les escrits qu'il a fait dresser avec tant de soin contre la Royne, ont attiré des responces; qui le rendront infame pour iamais.

Il a fait vn gros volume, qui n'a point d'autre pris que celuy que sa grosseur luy donne, ny d'autre poids que sa pesanteur: & il a acheté toutes les copies, pour les distribuer à ceux qui apres sa faueur ou sa vie ietteront dans le feu ces abominables escrits. Si ce meschant Empereur Caligula fist razer la maison dans laquelle Seian auoit fait emprisonner sa Mere assez malicieuse; il n'y a point de doute, que nostre bon Roy ne laisse à Compiègne vne semblable marque, pour monstrier qu'il deteste la detention de sa vertueuse Mere. S. M. ordonnera aussi vne recherche tres exacte pour supprimer tous les liurets qui ont abbaisé sa Naissance; & fera mettre en leur place les nostres, qui n'osent paroistre; iusques à ce que l'iniustice & la violence ayent fait leur pointe & leur passage. Cela arriuera non seulement parce que toutes les choses de ce monde, & principalement celles de France, ont leur tour & retour; mais parce que la Verité tirée de son puy par le temps, y iettera pour iamais le mensonge.

Dieu vouloit confondre les Iuifs, lors qu'il commandoit à son Prophete de leur monstrier le temple saccagé & ruiné par leurs pechez. Le plus grand suiet de la confusion du Cardinal, & de ses Eseruains, doit venir de ce qu'ils ont entrepris de piller & rauager le beau Palais; qui a esté
la pre-

la premiere & la plus noble Maison des Roys & des Roynes. Nous ne le representons pas en l'estat où il est dans les Pays bas, qui est bien differend de celuy de son Mariage & de sa Regence; il retient pourtant sa dignité & sa majesté dans ses afflictions: mais nous le ferons voir tel qu'il nous est depeint dás les liures du Cardinal, qui y met le feu, & cherche sa gloire dans cet embrasement. Lors qu'on luy fait voir ce temple de Grandeur, d'Honneur, & de Vertu; il doit mourir de honte apres les graces qu'il y a receu, & les pillages qu'il y a fait, de s'efforcer de le noircir & profaner par mille calomnies, & de conuertir tant de bien-faits en sacrileges. Nous voulons que toute la terre les voye, afin qu'elle condamne cet attentat, qui paroist au commencement de la Preface; *Nous auons veu que sans aucun exemple ancien & moderne, les estoignemens de la Royne Mere ont fourni tant de pretextes aux ennemis de l'Estat, & qu'on a entrepris de luy redonner par la force ce que les rencontres des affaires ne pouuoient p'us souffrir entre ses mains. Apres les traictiez d'Angoulesme & d'Angers, le Roy se consoloit de deux reuoltes sous le nom d'une personne si venerable; mais il ne peut supporter, que la retraicte qu'elle a fait hors du Royaume, aye esté encore le suiet d'une troisiéme rebellion. Il faut remarquer dans ce discours, que les Escriptuains du Cardinal, iusques au Gazetier, disent tousiours la Royne Mere, estans obligez d'y adiouster du Roy: es-crite autrement durant le Regne & dans le Royaume de ses Enfans, est vn tesmoignage de mespris. Il est accompagné en cette Preface de*

Page. 23

celuy du feu Roy de glorieuse memoire , qui est nommé en ces simples termes *son pere*, en parlant du Roy qui regne. Mais où sont ces pretextes, que les esloignemens de la Royne ont fourni aux ennemis de l'Estat ? Les estrangers se sont ils meslez des affaires d'Angoulesme & d'Angers ? nous n'y auons veu que les François. Qui a produit ces esloignemens ? est-elle sortie de Paris la premiere fois de gayeté de cœur ? n'est-ce pas vn fauory qui l'a chassée, & luy a osté l'education de ses Enfans ? n'est-ce pas le mesme homme , qui par le traité d'Angoulesme ne voulut point que la Royne fust à la Cour , mais qu'elle se retira à Angers ? Quand à la troisiéme retraite, qui est celle des Pays bas , c'est vne sortie de prison : elle est forcée par le desir naturel de conseruer sa vie, & d'acquérir sa liberté : on appelle cela rebellion ; qui est le mesme nom que les archers d'un Preuost ou les sergents donnent à l'effort que fait vn homme qu'ils veulent faire prisonnier. Si vne Roynene se laisse pas estouffer dans vn vieux chasteau, ou enfermer dans vn Monastere , ou renvoyer en Italie , ou empoisonner ou tuer, elle est rebelle. Il ne se faut point estonner de cette impudence , puis que dans le grand credit du Cardinal on ose appeller les affaires d'Angoulesme & d'Angers deux reuoltes. Il est vray qu'il ne commença point le premier mouvement ; mais il en eust la recompense , qui fust le gouuernement d'Angers. Pour le second , il en a esté l'auteur & le conducteur : il l'a fait cesser , lors qu'il a trouué dans vn traicté la promesse du chapeau de Cardinal, s'estant ima-

giné, que cette Principauté de Paix ne luy ſeroit iamais donnée que par la guerre. En celle d'Angers il a eu la ſurintendance, la diſtribution des deniers & des charges; les ſiens, qui poſſèdent aujourdhuy les premiers du Royaume, auoient les regimens & les compagnies de gens de cheual & de pied; & il appelle cela reuolte. Certes c'eſt eſtre bien deſeſperé de ſe percer ſoy meſme, pour tuer ſon ennemi. Mais où trouuera-il cette troiſième, rebellion des Pays bas, de laquelle il nous accuſe? S. M. ſouffre, & prie pour ceux qui la perſecutent: on luy prend ſon bien, & elle attend que la Prouidence de Dieu le luy rende; elle enuoye au Roy pour luy demander ſon retour, elle eſcrit au Cardinal pour le porter à le procurer, elle l'aſſeure du pardon de toutes les offences qu'elle a receuës; on ne voit point qu'elle prene d'autres voyes que celles de la douceur, & on dit qu'elle eſt rebelle. Il eſt vray; que Monſieur eſt entré en armes dans le Royaume, pour l'intereſt qu'il doit prendre à la conſeruation de la Couronne que le Cardinal met en pieces. Je ne diſpute pas, ſi la Royne a le droit, apres auoir demandé iuſtice, de prendre par la force ſon bien que la nature luy a donné en Fille de Souuerain; ny ſi elle peut faire reparer par les armes vne iniure atroce faite à vne Royne, ny ſi elle ſe peut ſeruir de quelques moyens violens pour ſauuer ſes Enfans: ſi nous auions à traicter cette queſtion avec des Theologiens & Iuriſconſultes plus raisonnables; & moins corrompus que les ſix qui ont condamné le Mariage de Monſieur; nous leur ferions aduoüer, que de ſe

mettre en l'estat d'arrester les entreprises du Cardinal de Richelieu n'est pas vne rebellion, mais vn mal de la condition de ceux qui ont quelque chose de violent, qui est adouci par l'utilité publique; & que c'est vne guerre defensiva, de resister à ceux qui nous priuent des choses naturelles.

Pag. 52. L'Autheur de la Preface reuient aux affaires d'Angers, & avec vne pareille effronterie, il dit: *Il estoit mal aisé, que la Royne Mere oubliat son ancienne puissance; tous les Grands, pour se rendre considerables, entretenoient ses desplaisirs; elle estoit l'azy e des mescontens; elle se vid persecutée de tant d'offres & de tant de plaintes, que cette semonce, comme publique, l'engagea pluslost que les aduis particuliers de ceux qui la seruoient, & quelques lignes apres: Si son principal Ministre eust eu si grande puissance, si sa voix eust esté plus forte que celle de tant de Princes, & si luy mesme n'eust point eu d'autres pensées que d'estre Cardinal; n'eust-il pas accepté les offres, sans porter sa Maistresse à tant de dispen-ces & d'inquietudes, & sans courir le hazard de perdre dans la guerre le credit qu'il auoit auparauant que de l'entreprendre? Ainsi non seulement la Royne Mere du Roy, mais tous les Grands du Royaume sont criminels, pour rendre le Cardinal innocent: tout ainsi que sur les ruines de Sa Majesté & de la plus grande partie des Princes de France, il a basti sa fortune; il faut aussi qu'on fonde sa gloire sur le deshonneur de tous ceux qu'il a persecuté. On dit, que la Royne a troublé le Royaume, pour rentrer dans son ancienne puissance; & que le Cardinal, qui*

en a eu tout le profit , n'a point eu de part aux moyens qu'il a luy mesme choisi pour remettre S. M. dans le credit. Celuy qui a tant blasmé la faueur de Monsieur de Luynes , qui l'a descritee par escrit , qui l'a choquée par milles artifices secrets, qui a aspiré tout seul à prendre sa place, & qui la tient à present , auoit les bras croisez, & prioit Dieu , lors que l'ambition de la Royne & la passion de tous les Grands du Royaume trauailloient pour faire vn changement. Sans doute c'est vn miracle , que luy seul en aye profité sans y cooperer , & sans y penser : on trouuera pourtant, que toutes les instructions & despêches enuoyées au Cardinal de Guise , aux Ducs de Longueuille, de Vandomme, de Mayenne, de Montmorency, d'Espèron, de Rohan, de la Trimouille, de Bouillon & autres, sont dictées par le Cardinal ou escrites de sa main ; que les finances , qu'on a employé pour ces guerres , ont esté distribuées par ses ordres & on peut dire par dessus tout cela, qu'il y a griuelé plus de cent mille escus. Pourquoi n'arrestoit-il ces despences ? Pourquoi ne preuenoit-il ces desordres , s'il estoit (comme vous dites) *le principal Ministre* ? ou pourquoi ne se retiroit-il en son Euesché , s'il auoit tant d'orreur de cette reuolte , s'il n'auoit point de part en cette conduite, & s'il estoit sans ambition d'estre Cardinal ? Vous dites, *que cette dignité luy fut offerte deuant la guerre*. Il est vray qu'on luy monstroit ce leurre, mais de si loin , que cet oyseau ne le voyoit quasi point : il l'a voulu faire approcher par la guerre ; qui fust terminée par vn traicté, apres lequel

le Roy & la Roynne enuoyerent à Rome, pour demander cette dignité ; & la resolution ne fust prise qu'à Brissac sur les instances que le Cardinal en fist. Vous ne dites que des choses estudiées, pour plaistrer le mensonge, & nous apportons les veritables histoires : nous auons la Roynne qui est nostre oracle ; elle a vne memoire tres excellente, qui ne peut estre effacée par le temps, non plus que sa verité ne scauroit estre alterée par les iniures que vous luy dites & faites. Il ne sert de rien d'alleguer, que le Cardinal n'a point eu cette dignité durant la vie de M. de Luynes : ie dis bien d'auantage, qu'il ne l'eust iamais eüe, si le Connestable eust vescu ; ce fauori desiant, ne vouloit point procurer les auantages que donne ce chapeau à celuy qui ne visoit qu'à prendre sa place. Pour euitier vn mauuais rencōtre, il a fait esperer le bonnet rouge ; mais la crainte de se ietter dans vn plus dangereux accident, luy a fait differer & trauerfer l'execution qui n'est arriüée que huit mois apres sa mort. Vous nous renuoyez au tesmoignage de *Monsieur le Prince, des Ducs de Bellegarde & de Chaunes, & de Monsieur de Piseux*. Vous sçavez bien, qu'ils sont trop prudens pour depōser contre le Cardinal en ce temps ; & nous les escouterons volontiers quand il sera changé. Vous dites aussi, *que tous les efforts de la Roynne ne tendoient qu'à se remettre dans la puissance qu'elle auoit perduë*. Nous cognoissons son esprit, qui est fort ami du repos : si elle a eu dessein de prendre cognoissance des affaires de ses Enfans, il me semble que ce soin est bien naturel, & que Dieu le commande,

Mais pourquoy eſt-ce que Monſieur le Cardinal craint & reiette ſi fort cette authorité qui l'a mis là où il-eſt ? croit-il que ſa prudence ſoit plus grande que celle de la Royne ? où que le credit de S. M. doie eſtre plus ſuſpect que le ſien ? que ce ſoit vn deſordre qu'une Mere ſoit aupres de ſon Enfant, ſans autres ſeuretez que celles de ſon cœur ; & qu'un ſeruiteur qui eſt en eſtat de deſpoüiller ſon Maiſtre quand il voudra, ſoit en vne place bien remplie & dans vne authorité bien reglée ?

La colere de l'Eſcriuain eſtant eſchauffée contre la perſonne de la Royne Mere du Roy, elle ſeiette ſur tous ceux qui ſuuiſſent ſon parti à Angers, & appelle traîtres en general tous les François, mais en termes couuerts ; les voicy : *Les Grands s'y obligerent pluſtoſt pour le bien de leurs affaires, que pour appuyer les plaintes d'une Mere : & auoient, à la mode de France, chacun aupres du Roy quelque amy ſecret qui meſnageoit leur accommodement.* Voila vne belle loüange pour Monſieur le Comte de Soiſſons, pour la memoire de ce genereux Duc de Mayenne, pour les Ducs de Vandoſme, d'Eſpernon, de la Trimoüille, de Rohan, de Rhez & grâd nombre d'autres Seigneurs qui viuent encore. Traiter en particulier, eſtant dans vn parti, & ſans le ſceu du chef, auquel on a donné ſa foy & ſa parole, eſt, à mon aduis, vne trahiſon ; dire, *que c'eſt à la mode de France*, eſt deſhonoré toute la nation. Quelques exclamations & boutades d'Eſcriuain zelé pour la gloire des François feroit le ſieur Hay, ſi nous auions eſcrit la meſme choſe : ſans faute

Pag. 140

il diroit, qu'il paroistroit clairement dans ce discours, que la Flandre nous a rendus Espagnols. Nous n'oserions dire au Pays bas, pour flatter nos desplaisirs, que les affaires changent souvent en France: & vn homme, qui est à Paris, escrit non seulement que les Princes du Sang & les Grands du Royaume sont des traistres; mais que c'est vn vice de la nation. Il fait aussi reimprimer dans le Catholique d'Estat; que les François sont legers.

Pag. 55.

Hay reuient iusques à la troisiéme fois aux affaires d'Angers, pour donner quelque atteinte à la reputation de la Royne Mere du Roy; il dit: *Ces Escriptains ont-ils pensé que cet argument soit bien iudicieux, pour esmouuoir les peuples à prendre les armes en faueur de la Royne Mere, que de les faire souuenir qu'on les a desia leuées deux fois pour sa cause, & sans aucun profit?* Nous n'auons iamais escrit, que les peuples ont pris les armes pour la Royne, que pour respondre à ce que le Cardinal, qui a esté autheur de les leuer, reprochoit à S. M. nous ne proposons pas pour exemples les mauuais conseils du Cardinal; nous n'auons point fait d'effort pour esmouuoir les François qu'à la compassion, & pour esueille la raison des Sages. Si nous estiös contraints d'employer la force pour nous garantir d'oppression, nous aurions des considerations plus fortes que ne sont celles des affaires d'Angoulesme & d'Angers. Les poursuites de M. de Luynes n'approchent point des violences du Cardinal de Richelieu: s'est porté à de si grandes extrémitez, que toutes les considerations de ce qui s'est passé

dans le credit des autres fauoris, ſont trop foibles pour repréſenter ce qui ſe fait aujourdhuy. Si le Cardinal n'a perdu, avec la memoire des bien-faits de la Royne, celle des choſes qu'il luy a dit; il ſe ſouuiendra, que dans les plus grandes afflictions de S. M. il diſoit, que *Monſieur de Lũynes n'y entendoit rien, & que ſ'il eſtoit en ſa place, il ne la traiteroit pas ſi doucement.* Qui euſt creu que cette boutade indiſcrete fuſt vne menace? cependant vne malheureuſe experience nous a fait ſentir que c'eſtoit vne de ces prediſtions, qui ne ſont iamais entenduës, qu'elles ne ſoient accomplies.

Je laiſſe pluſieurs paroles iniurieuſes contre la Royne Mere du Roy, pour n'en rapporter que le moins qu'il me ſera poſſible. L'Autheur de la Preface dit, que la poſterité n'excusera pas l'entrepriſe Pag. 74.

de la Royne Mere, ſur la ſeule malice de ceux qui la luy perſuaderent; & l'on blaſmera à l'aduenir ſa trop grande facilité. La meſdiſance va encore plus auant en la page 83. Les ennemis de l'Eſtat auoient Pag. 83.

de certaines voyes ſecrettes, par où, comme par des tuyaux, ils luy parloient de loin: leurs voix ſe rendoient meſcognoiſſables par cette inuention; & leur parole en la bouche de ſes faux ſeruiteurs la trompoit, comme celle des Preſtres impoſteurs, par l'organe des idoles, abuſoit autrefois les peuples. Et en la page ſuiuante, pour monſtrer que le Cardinal n'eſtoit point obligé de ſe retirer pour contenter la Royne, il eſcrit en ces termes: Pouuoit-il tellement diſpoſer de ſa perſonne, que pour flatter la paſſion d'une Royne abuſée par tant d'illuſions differentes, il deuit quitter vne puiſſance qu'il ne tient que du Roy ſeul? Voila comme le Sieur Pag. 84.

Hay décrit la Royne Mere du Roy : il la veut faire passer pour temeraire, lors qu'il dit, *que son entreprise n'est pas excusable*; pour vne idiote qui se laisse conduire par les oreilles; pour vn idole, par lequel le diable ou les imposteurs parlent; pour vne famelette bigotte, abusée par des illusions des malins esprits. Voila cette grande Marie vne petite Marionette, qu'on fait marcher avec des ressorts; & on dit que cette piece de bois n'a point d'autres nerfs que ceux de ces charlatans, que les Grecs ont appellé neuropastes. Si ce que les Medecins disent est veritable, que les masses tiennent plus du temperament de la Mere que de celuy du Pere; quel honneur fait on au Roy & à Monsieur, de les faire sortir d'une Mere qui est depeinte comme vne imbecille d'esprit? Tous ces beaux eloges d'honneur se donnent en France à vne Royne, son Fils regnant, & sous le ministere de sa creature: tout cela s'imprime en gros caractere in folio, pour estre debité par toute la terre, & laissé à la posterité. Si quelqu'un y trouue à redire pour le Roy, & pour les autres Enfants de cette grande Princesse; si pour repousser l'iniure on fait voir que celuy qui la dit est vn meschant, qui ne merite point d'estre creu; si on decredite le Cardinal, qui veut que cela soit publié, qui donne les memoires pour escrire, qui commande l'impression, qui la paye, & qui la fait debiter avec soin; si pour oster l'autorité à ces calomnies on represente qu'elles viennent de la part d'un ingrat, & si on recherche la vie de ce malin denonciateur, ou de ce faux tesmoin; on veut estrangler l'Aduocat qui

fournit les reproches, & qui ſert fidellement ſa partie: on l'appelle *forcené, impudent, diable impie, ſcelerat, traifre, blaſphemateur: on le menace du gibet, de la roüe, & du feu*. C'eſt à cauſe qu'il touche à la reputation ſainte & ſacrée de ce grand & incomparable Cardinal; qui eſt ſi eſclattant en gloire, qu'il a obſcurcy celle de tous les miniſtres des Roys, & les a rendus de petits vers luiſans. Je ne veux prendre qu'un argument, pour monſtrer la generoſité de l'eſprit de la Royne contre les calomnies du Sieur Hay. Si cette ame Royale n'eſtoit de la plus forte trempe du monde, elle auroit plié ſous tant d'afflictions, de mauuais rencontres, d'apprehenſions, de maladies & de trahiſons: il faut aduoüer, que des attaques beaucoup plus foibles & moins frequentes ont abbatu les cœurs, & affoibly les eſprits d'un grand nombre d'hommes qui eſtoient eſtimez bien ſages.

On dit, que le Cardinal *ne tient ſa puiſſance que du Roy ſeul*: il doit donc reſpecter la Mere de ce Roy, qui l'a rendu puiſſant. Mais n'eſt-il pas bien ingrat de nier, que la Royne luy a acquis cette puiſſance? Elle luy a non ſeulement donné les biens & les dignitez qui l'ont porté là où il eſt; mais elle a rompu avec peine les difficultez qui s'y oppoſoient. Combien d'apprehenſions auoit le Roy de cet eſprit, qui auoit recognu peu fidelle dans les affaires d'Angoulefme & d'Angers? Ce bon & ſage Prince ſe voyoit aſſiéé & battu continuellement par tous ceux qui l'environnoient, & qui eſtoient gaignez par la Royne: ayant perdu le retranchement d'une exclu-

sion, il se iettoit dans vn autre, iusques à s'estre cantonné dans la derniere raison tirée d'un default naturel du Cardinal, que la modestie nous fait taire; mais nous le publierons, si on nous presse. Apres cela on nous veut faire croire, que le Roy de son mouuement, ou par l'inspiration de Dieu, est allé chercher ce saint homme, pour luy confier son secret, & la principale conduite de ses affaires, & que la Roynne n'y a rien contribué. Se faut-il estonner si le Cardinal n'en bien fait, qu'il a desia conuerty en crime?

L'Authreur de la Preface fait vne boutade sur la mort déplorable du Roy Henry le Grand, & la conclud ainsi : *S'il luy reste quelque sentiment des choses humaines, & si le souuenir des fortunes de la terre peut en quelque facon troubler son repos; peut-il voir avec plaisir, que celle, à qui sa bonté preparoît tant d'honneurs, soit aujourdhuy comme vn trophée parmy ses ennemis heritiers des terres & des cruantez du Duc de Bourgongne, qui tiennent en la possédant ce qui luy fust plus cher apres son Estat.* Il me semble que nous auôs plus suiet de dire, que si le souuenir des fortunes de la terre pouuoit en quelque facon troubler le repos de ce Prince, le Cardinal seroit le parricide de sa paix, comme Rauaillac l'a esté de son corps: il verroit sa tres chere Espouse, grande en sa Naissance, glorieuse en son Mariage, heureuse en ses Enfans, abbaissée, diffamée, & malheureuse, par la violence, calomnie & infolence d'un seruiteur: cette Princeesse, qui est petite Fille, petite Niepce, & Cousine germaine des Empereurs; cette Roynne, qui est la Vefue de ce Roy incomparable en generosité & clemence,

qui l'a choisie pour femme, & qui l'a aymée, estimée & honorée l'espace de dix ans; cette Mere de six Enfans, qui a le premier de ses Fils qui regne en France, le second dans le Ciel, & le troisieme Heritier presomptif de sa Couronne: qui a la premiere de ses Filles Royne de tant de Royaumes, la seconde qui n'est pas moindre que beaucoup de Roynes pour n'estre que Princesse, la troisieme qui porte trois Couronnes; & toutes trois qui ont en leurs Mariages vne si grande benediction de Dieu, que la terre ne sera pas assez ample pour dignement loger leur posterité. Cependant cette Royne & Regente de France, cette Mere, belle Mere & grande Mere de tant de Roys, Roynes, Princes & Princesses, est depouillée des biens que la Naissance luy auoit donnez plus grands, que tous ceux que les autres Roynes ont apporté en France, est priuée des conuentions de son Mariage, est frustrée de l'entretien que son Fils luy doit, a esté emprisonnée, contrainte de se retirer d'un Royaume auquel elle a donné le Roy, où elle a esté couronnée, où elle a esté Regente, où elle ne fist iamais mal à personne, où elle a fait du bien à plusieurs, & trop à celuy qui la rend pauvre, qui l'emprisonne, la chasse, la calomnie, & la persecute. Il fait escrire, que le Roy d'Espagne, qui donne avec tant de tesmoignage de bonté la protection & l'entretien à sa belle Mere, en fait *vn trophée*, comme on faisoit anciennement d'un vieux chesne esbranché. Celuy qui fait publier ces choses, luy a osté ses fueilles, ses fleurs, ses fruits & ses rameaux; la voulu rendre l'esclau des triomphes

de sa vanité, & la mener au trauers de la France comme captiue, apres l'auoir tenuë six mois prisonniere. Il appelle *heritier de la cruauté des Ducs de Bourgogne* vn Roy, qui entretient sa belle Mere avec tant de generosité & de liberalité, qu'il ne tient qu'à la modestie de la Roynes, qu'elle ne reçoie des plus grandes assistances. La Roynes d'Espagne offre toutes les choses desquelles elle peut disposer, & celles qu'on ne luy refusera pas: la Roynes sa Mere la recognoit pour vne des meilleures filles du monde, & dans les liures du Cardinal le Roy d'Espagne est vn cruel; & la Roynes Fille de France, qui a vn Fils heritier de tant de Couronnes, & qui est de si grande esperance, ne met au monde que des heritiers des cruantez de la Maison de Bourgogne. Cette Infante Isabelle, de laquelle nous pouons dire que son nom est venerable mesmes à ses ennemis, qui ont pleuré en sa mort, cette petite Fille de France, cette Princeesse, qui a esté l'ornement de nostre siecle, cette sainte dans le cours & fin de sa vie, qui a receu avec tant d'honneur la Roynes, qui l'a consolée avec tant de iugement, qui l'a assistée avec tant de charité, qui l'a visitée souuent avec tant de douceur, qui luy a fait des presens avec tant de liberalité, qui les a agencez avec tant d'esprit, qui a eu soin de la santé de Sa Maiesté avec tant d'inquietude, est vne heritiere des cruantez des Ducs de Bourgogne? Cet Infant Cardinal, qui est venu au Paysbas, chargé de lauriers, qui a passé sur le ventre à tous les ennemis de l'Eglise & de sa Maison, qui est si courtois, si complaisant, si respectueux à la Roynes,

& si soigneux de tout ce qui la regarde, qui a eu pour son premier ordre, de donner satisfaction à Sa Maiesté en tout ce qu'elle desirera, de veiller à la conseruation de sa personne, & de luy faire rendre les respects qui luy sont deus, il est, si on veut croire au Cardinal de Richelieu, vn de ces heritiers des cruautez des Ducs de Bourgongne. Mais ces Ducs de Bourgongne ne sont-ils pas Princes du sang de France? s'ils eussent eu des masses iusques à present, ne seroient ils pas nos Roys? & cette Marie de Bourgongne, de laquelle descend le Roy d'Espagne, n'estoit-elle pas fille d'une Princesse de la Maison de Bourbon? pourquoy donc deschire-on sa reputation, & celle des Princes qui en sont descendus, puis que de Pere & de Mere elle estoit Françoisse, & que nostre Roy mesme en est sorty par la Royne sa Mere? Mais se faut-il estonner si on n'espargne point les Roys d'Espagne, & si on dit qu'ils tiennent la cruauté des Enfans de France, puis qu'on ose publier, que le Roy presentement regnant est Fils d'une Mere qu'on nous represente extrauagante & sans iugement? Il faut aduoüer, qu'on voit vn estrange renuersement de discours dans celuy que le Cardinal a fait de toutes choses. On dit, que le Roy d'Espagne est cruel, lors qu'il assiste de son bien la Royne; & on assure que le Cardinal, qui luy ravit le sien, est vn homme fort equitable: quelle punition ne merite-il point, d'auoir donné cet aduantage à ceux qu'il s'imagine estre ennemis de son Maistre, de luy pouuoir reprocher qu'ils ont nourry sa Mere, lors qu'on employoit son nom

& sa puissance pour les ruiner ? Vous dites , *que s'il restoit quelque sentiment des choses humaines au Roy Henry IV. il auroit horreur de voir sa Vefue entre les mains de ses ennemis.* Mais plustost il auroit vne grande recognoissance pour ceux qui la gardent de l'oppression & de la faim , & seroit touché d'indignation contre ceux qui la veulent accabler , & qui l'ont reduite à la pension du Roy d'Espagne. Le Cardinal , pour ietter la Royne dans vne honteuse necessité, pour faire retirer le secours qu'on luy donne, & pour l'obliger à se rendre à discretion , a voulu donner des soupçons estranges; il a fait escrire dans vn liuret volant du nombre de ces obscurs , qui n'ont point d'autre priuilege ny approbation que les mesdisances contre la Royne, qu'il falloit prendre garde , *que l'Espagne nourrissoit vne Helene fatale.* Ainsi parle celuy qui n'auroit point de plus grande volupté, que de voir la Mere de son Maître & sa Bien-faïctrice reduite à vne misere si extrême, qu'elle fust contrainte de se ietter dans ses chesnes , d'aduouer qu'elle a mal fait de les rompre, d'approuver la conduite de son Eminence, & de condamner ses propres actions, pour faire paroistre iuste son ennemy ; qui est tout ce qu'il desire , & que la Royne ne fera jamais.

Mais si ce grand Roy, auquel on voudroit donner en l'autre monde des ressentimens de la cruauté des heritiers de Bourgogne, les pouvoit auoir contre quelqu'un, ne seroient-ils pas contre le Cardinal, & tant de petits frippons, qu'il chasseroit du Louure avec vn fouët, comme
nostre

noſtre Seigneur fiſt les vendeurs du temple? Sans
faute la generoſité & prudence de ce grand Prin-
ce ne pourroit pas ſouffrir cet infame trafic, qui
va tout au profit du Cardinal & des ſiens. Il a
diſpoſé depuis quatre ans des gouuernemens de
Prouence, de Languedoc, de la ſuruiuance de ce-
luy de Guyenne, de Poiſtou, Angoulmois,
Xaintonge, Aulnix, Limofin, haut & bas Auver-
gne, Bourbonnois, Anjou, Bretagne, Picardie,
Châpagne, & Bourgongne: voila les trois quarts
du Royaume. Il a pris pour luy, ou pour ſes
parens, les trente meilleures places: il a tous les
bons ports de l'Ocean, avec les frontieres de
Lorraine & d'Allemagne: celles d'Eſpagne
ſont dans ſon alliance, & il va prendre celles
de la Mediterranée. Il a vny en ſa perſonne les
charges de Conneſtable, d'Admiral, & de chef
du Conſeil; il a dans ſa maiſon les offices de
la Couronne, qui ſont ceux de grand Maïſtre de
l'artillerie, & Colonel de l'infanterie; & il eſt
ſur le poinct d'y faire entrer celles de General
des galeres, & Colonel des Suiffes, en ayant
deſia fait le marché. Ses allies ont les ſeaux &
les finances. Il eſt tout, il fait tout, il tient
tout; il eſt ſur le poinct de n'eſtre, & de ne te-
nir rien; & il veut donner des coleres aux ef-
prits bien heureux contre le Roy d'Eſpagne,
n'eſtant pas content de ſouſleuer contre luy tous
les eſprits malheureux des infideles & des here-
tiques. N'eſt-il pas plus probable, que l'ame de
ce grand Henry IV. que nous croyons eſtre de-
uant Dieu, luy demande la iuſtice, qu'il feroit
luy meſme, ſ'il luy eſtoit permis de retourner au

monde? n'est-il pas croyable, que le Cardinal ne voit iamais sa statuë de bronze, que la Royne a fait mettre sur le pont neuf, qu'il n'aye quelque apprehension de cette Majesté; ou qu'il ne reconnoisse, que si nos pechez ne nous eussent priuez de ce grand Roy, le Cardinal de Richelieu ne seroit que l'Euesque de Luçon, & les affaires de France ne seroient pas dans la confusion, en laquelle son imprudence & sa malice les ont iettées?

Voila quelques traits de la Preface du sieur Hay: il a reserué les plus empoisonnez pour la fin. Poursuivant cette belle pensée des sentimens de l'ame du feu Roy, il adioust: *N'est-ce pas encore vn estrange estonnement à ce grand Heros, de voir qu'elle (c'est à dire la Royne) aye aupres d'elle pour seul ministre celuy qui veut faire perdre la vie aux bons seruiteurs du Roy son Fils?* On fait autheur ce ministre de la carabinade tirée sur le Duc de Puylaurens, des entreprises pretenduës d'Alfession & de Chauagnac, & des sortileges & abominations de Gargand: on mesle dans toutes ces choses ou execrables ou ridicules le nom sacré & Auguste de la Royne Mere du Roy, & on tasche de persuader aux peuples, quel'esprit de vangeance luy fait rechercher toutes sortes de moyens, mesmes impies, pour se defaire de ceux qui l'ont offensée. On met le premier le Duc de Puylaurens: nous luy donnerons cette qualité, & ferons voir que nous sommes plus civils que les Escriptuains du Cardinal; lesquels, sans auoir esgard à l'honneur de sa haute alliance, & à la Duché & Pairie, ne l'ont appelé

que Puylaurens. Sans faute ils se sont defiez de leur peu de durée : on dit, *qu'il ne doit la vie qu'à trop de bales que les gens de la Royne employerent pour la luy faire perdre.* Il est vray, que si celuy qui fist cet attentat, eust chargé sa carabine aussi prudemment, comme il mira droitement, le Duc de Puylaurens ne seroit pas en danger de mourir par la main d'un bourreau : mais il n'est pas vray, que la Royne ou les siens ayent quelque part à cette entreprise; il est plustost fort probable, qu'elle a esté faite par ceux qui nous en accusent. Ils en auoient aduertty le Duc de Puylaurens, comme le diable predict le mal qu'il veut faire : ils vouloient à coups de perche donner la terreur à ce poisson, pour le faire ietter dans le filet : lors qu'ils ont veu qu'il estoit retif, ils ont hazardé le coup pour le perdre, s'il reüssissoit; ou pour le faire precipiter dans son malheur, s'il manquoit. On voit bien, que l'esclat de la carabine mal chargée n'a serui au Cardinal que de rintamarre, pour faire venir percher les bisets sur l'arbre, sous lequel il les attendoit pour les abbattre, comme il a fait. Il a persuadé du depuis au Duc de Puylaurens, que le conseil d'Espagne & les seruiteurs de la Royne auoient concerté cette entreprise; ce pauvre malheureux l'a creu, ou plustost a fait semblant de le croire, pour faire cognoistre au Cardinal qu'il rompoit sans ressource avec la Royne & l'Espagne, à quoy on l'auoit obligé long temps auparauant. De là sont venuës les insolences qu'il a fait à la Royne, & les plaintes contre les ministres d'Espagne. Apres que ce coup fust tiré, on

Il estoit prisonnier quand cecy fust escrit.

Ces deux Brugers ont esté du depuis plâyez par le Cardinal de Richelieu. miten prison deux freres nommez Brugers, qui ont esté deschargez par sentence des Iuges; & si quelques considerations ne les eussent retenus, ils auroient chastié par la rigueur des loix les faux tesmoins qu'on auoit aposté contr'eux. Mais que dira-on du Cardinal, qui a accusé le sieur de Puylaurens de crime de leze Majesté au premier chef, & qui ne trouue pas seulement vn pretexte pour le faire condamner par la corruption du sieur de Chastelet.

Cecy est extraict d'une lettre es-crite à la Royne Mere du Roy par un vieux Conseil-ler d'Estat. Tout ce que nous pouuons dire de la condamnation d'Alfiston, est, que par l'examen imprimé des procédures faites contre luy, il est constant qu'il n'a iamais eu dessein d'attenter à la personne du Cardinal; que les deux, qui l'ont accusé, sont des meschans, qui se sont denoncez eux mesmes, & ont chargé Alfiston apres l'assurance de l'impunité & promesse de grandes recompenses. Il est vray, que cestui-cy dans la rigueur de la question accusa le Pere de Chantelouue; mais en son testament suppliciaire, & sur l'eschaffaut, il protesta deuant Dieu, qu'on luy auoit arraché cette deposition par les tourmens, & que le Pere de Chantelouue ne luy auoit iamais parlé d'attentat contre la personne du Cardinal: nous auons la lettre que le Confesseur qui assistoit le patient en a escrit, & cela a esté confirmé par quelques vns de ses Iuges. Le sieur Hay, qui a mis au iour les procédures qui sont à la fin du gros volume, & qui s'est esgayé sur les motifs de l'arrest, n'a eu garde de faire mention de cette descharge: s'il auoit quelque probité, au lieu de conclurre que cet homme à

voulu tuer le Cardinal par la sollicitation des seruiteurs de la Royne, parce qu'il auoit vn cheual de l'escuyrie de S. M. il concludoit tout le contraire, qu'il n'est point probable, si on eust eu dessein d'employer Alfeſton à cette mauuaiſe action, qu'on luy eust donné vn cheual cognu & marqué à la cuiſſe. Il eſt vray auſſi, Qu'Alfeſton & le cheual eſtans retranchez en meſme temps, on donna la beſte à l'homme pour l'obliger à ſe retirer.

Pour ce qui regarde Blaiſe Rufflet, qui ſe dit tantost Chauagnac, tantost Baron d'Vrfé; il ſuſſit de dire de ce meſchant ce que le ſieur du Chaſtelet, qui a inſtruit ſon procez, en a eſcrit; *Il fuſt donné aduis de rechercher la vie de cet homme:*

On eũſt aduis de diuers endroits de fort mauuais deportemens, changement de nom, ſuppoſition de contracts & baulx de terres & ſeigneuries imaginaires, promeſſe de mariages en diuers lieux, & à diuerſes femmes; bref, qu'il auoit mené yne vie de ſourbe & d'impoſteur. On veut que cet affronteur ſi bien deſcrit, & qui s'eſt deſnoncé luy meſme, aye menty en cent extrauagances qu'il a dit: on aſſeure qu'il n'y a rien de vray dans ces reſponces; & on a deſiré qu'en l'accuſation ſeule contre les gens de la Royne, qui ne l'ont iamais veu, il ſoit veritable, encore qu'elle ne ſoit faite qu'apres la promeſſe d'impunité par le ſieur du Chaſtelet qui auoit fait cacher des teſmoins, lors qu'on caiola cet impoſteur. Il n'a rien dit de ſemblable dans les interrogatoires reglez, & toutes les procédures qui ont eſté faites contre luy, eſtans plus fripponnes que ſes actiōs; le Cardinal ne l'ayant

Pa. 892

pas osé enuoyer au Parlement (ainsi qu'il auoit promis) & les Commissaires de l'Arсенac s'estans mocquez de ses depositions, on l'a mis entre les mains des nouueaux Iuges de Mets. Ceux

Pour le
meurtre
commis
en la
personne
du sieur
Jacques
Thresor-
rier de
France
à Lyon.

cy l'ont condamné, pour vn meurtre, à estre pendu, sans luy faire donner la question, & sans produire son testament suppliciaire. Cela fait voir, que l'on ne la pas tenu pour criminel de leze Majesté, parce que sans doute on l'auroit fait roïer comme Alfeston ; il auroit esté encore plus coupable, estant entré dans la chambre du Cardinal, sous pretexte d'une entreprisede sur le chasteau de Namur, là où Alfeston n'auoit point approché de son Eminence de dix lieues. Mais ie serois d'aduis, que l'Auth eur de la Preface fust plus aduisé qu'il n'est lors qu'il escrit, *que les propositions de la prise de Namur accompagnées de tant d'apparence & facilité, luy deuioient donner toute sorte d'ac-
cez & de liberté dans la Cour.* Il ne souuient pas, qu'il n'y auoit point de rupture entre les deux Couronnes, & que la paix deuant estre conseruée par la saincteté des sermens, le Cardinal à grand interest à faire chastier ceux qui escriuent qu'il a voulu surprendre les places des Pays bas, ayant desaduouïé les pratiques qu'on a fait de sa part à Arras & à Grauelines. Sans faute, si l'Espagne rompoit avec la France, cette cy payeroit l'amende de deux millions, si le Cardinal ne reiettoit comme vn faux tesmoin ce beau faiseur de Preface pour seruir à l'Histoire du temps; dans laquelle on verroit que son Eminence à marchandé les places du Roy d'Espagne deuant la rupture.

Page 93.

Il faut ſortir de ces horreurs par la plus grande de toutes. Le Cardinal ayant voulu qu'on meſſa le nom de la Royne Mere du Roy dans ces deux procez, il la mis encore plus diſtinctement dans vn troiſième, qui eſt le plus horrible de tous. Vn Preſtre & deux layques eſtans accuſez d'auoir fait dans le ſainct Sacrifice de la Meſſe des imprecations execrables contre le Cardinal, & ces trois ſclerats ayans eſté condamnez au feu, on a fait gliffer ce traitt empoisonné dans le procez : *Tant de choſes horribles, à l'vne deſquelles aſſiſta vn vallet de pied de la Royne Mere nommé la Roche, encore aujourd'huy priſonnier à la Baſtile, ont eſlé maintenuës au procez.* Quel mortel poison, de meſſer le nom tres Auguſte de la Royne dans ces infames procedures ; de vouloir donner quelque ſoupçon, que S. M. qui eſt vne des plus religieuſes Princeſſes du monde, a eu quelque cognoiſſance de la profanation, que des impies ont fait, des plus venerables myſteres de noſtre Religion ? Ce pauvre vallet de pied eſt en priſon, parce qu'on ne l'a pas voulu ſouffrir à ſaint Germain en Laye, d'où il eſt, & où le Cardinal va ſouuent ; ſa mere preſſe depuis quinze mois qu'on luy rende ſon fils, ou qu'on luy face ſon procez ; on ne veut accorder ny l'vn ny l'autre ; l'intention de ceux qui l'ont pris n'eſtant, que de le tenir enfermé, & de faire que la qualité de ſeruiteur de la Royne, les liurées qu'il porte, & la nature de ſon pretendu crime, donnent quelque ombrage contre la pieté de S. M.

Pa 915

Voila vne partie de ce qui a esté dit de nouveau contre la Royne Mere du Roy. Voyons si le retour de Monsieur en France a produit à son Altesse vn traitement plus fauorable, & si sa reputation a esté mieux mesnagée. Je croyois, deuant que i'eusse leu l'inuentaire des pieces qu'on veut faire seruir à l'Histoire du temps, que la declaration que le Roy a fait en faueur de Monsieur, auoit fait supprimer tous les libelles qu'on a fait contre sa personne, ou pour le moins qu'on en auroit retranché les choses plus sanglantes. Cette croyance m'a porté à faire vne recherche soigneuse, & à confronter les vieilles coppies que i'auois avec le grand volume imprimé depuis le retour de son Altesse, & publié quatre mois apres; i'ay trouué, qu'il y auoit quelque chose de changé, mais fort peu. Ce qui m'a estonné d'auantage, est, que i'ay sceu de bonne part qu'il y a quelques mois, que Monsieur estant à Ruel avec le Cardinal de Richelieu, le Sr Hay se ietta à genoux deuant son Altesse, pour luy demander pardon de ce qu'il auoit escrit trop librement contre elle; il obtint sa grace, qui fust donnée à l'instance priere du Cardinal, qui promit pour luy toute sorte de services, & beaucoup de fidelité. Son Eminence se rendit caution du Sieur Hay; mais ce qui est arriué depuis, nous a fait voir clairement, que le principal debiteur & son respondant se moquoient de leur creancier. L'esprit leger & malin du Sieur Hay n'a pas laissé de recueillir avec soin toutes les pieces qui auoient esté faites contre l'honneur de Monsieur, & de les donner au pu-

blic en plus groſſe & plus belle lettre, & en meilleur papier. I'ay trouué là dedans tous les meſpris qui ſont dans la Deſence du Roy & des ministres : il eſt vray qu'ils ont oſté les combats du Pont neuf, qu'on ahoit reproché à Monsieur, l'ayant voulu faire paſſer dans le premier imprimé pour vn tireur de laine ; mais dans le ſecond in folio ils le deſcriuent comme vn Prince peu genereux, qu'il valloit mieux aller briguer l'Empire en Allemagne, que d'intenter des actions du Parlement: que s'il a teſmoigné vne ſi grande crainte au Cardinal, qu'on a demandé d'en eſtre eſloigné pour euites ſa main funeſte: que iamais on n'a ouy dire, que les Princes François ayent eu peur d'aucun peril, eſtans naturellement vaillans. Les traits plus cruels ſont dans la Remonſtrance à Monsieur par vn François de qualité. Cette piece monſtrueuſe commence par ces paroles: Monſeigneur, les monſtres d'auarice, d'enuie & d'ambition, qui vous environnent. Si le Cardinal les a creu monſtres, pourquoy a-il donné au plus grand de tous ſa couſine en mariage? ce n'eſt pas pour en tirer de la race, car il ſçait que les monſtres n'engendrent point: quand cela ſeroit, l'intention de l'Auther n'eſtoit pas de donner le loisir à ce monſtre de produire ſon ſemblable: il eſtoit aſſeuré, que deuant que l'aage permit à la fille de concevoir, ſon mary perdroit la vie; & que la clause du contract, qui portoit donation mutuelle, ſeroit, ſelon l'intention des fondeurs, fauorable à la femme: elle tire du profit de l'infamie de ſon mary, ſes charges ſont données & poſſedées deuant ſa mort par les plus proches de cette petite eſpouſe, qui a eſté le vermiſſeau.

Dans la Deſence du Roy & des ministres.

Pa. 384.

385.386.

&c.

Pa. 17.

Puy laurenſ eſt mort de deuiſen priſon.

avec lequel on a couuert l'ameçon, qui deuoit prendre & estrangler ce poisson. Toutes ces choses sont veritablement des monstres: en voicy de plus grands contre la reputation de Monsieur:

Pa. 520. *Que la vanité de ses efforts l'a decredité dans la France, & chez les estrangers: que les Princes & la Noblesse viennent dans la creance qu'il est pour esmonuoir des grands troubles, & pour en terminer fort peu: que Chalais & les autres, qui se sont rangez dans la misericorde du Roy, ont fait passer Monsieur pour coupable en*

Pa. 521. *quelque chose: qu'il a resmoigné peu de resolution, de n'auoir point enleué la Princesse Marie, qu'il eut trouué vingt mille ieunes hommes qui l'eussent assisté dans vne boutade d'amoureux, qu'il n'eust offensé en cela que la Royne sa Mere, & qu'il n'y a point de loy qui nous*

Pa. 522. *oblige d'obeyr à nos parens en leurs passions. Pensez vous que Dieu ne punisse les sermens des amoureux, & qu'il ne se souuienne pas que vous le reniastes pour tel, si iamais vous changiez de volonté? Dans le Discours au Roy touchant les libelles faits contre le gouuernement de son Estat, que le Roy a craint, que la grosse nuë de desplaisir de Monsieur ne se deschargea sur sa personne: que les ministres de Monsieur auoient promis au Roy qu'ils retiendroient leur Maistre dans l'obeyssance au eugle: que Monsieur fist vne frasque honorable pour le Cardinal.*

Pa. 472. *Dans l'Aduertissement aux Prouinces par Cleonuille, cet Antheur le plus cruel de tous, ramasse quantité d'exemples, pour monstrier que sans forme de iustice le Roy peut faire tuer non seulement les seruiteurs de Monsieur, s'ils*

Pa. 513. *guident l'esprit de leur Maistre à choses trop hautes; 514. 515. mais qu'il peut faire massacrer son Frere, &*

Iuy oster la vie qui appartient au public. Il apporte l'exemple d'un Roy, qu'il dit auoir fait tuer son Fils: il assure, que la Royne Catherine fust sur le point de faire passer le pas au Duc d'Alençon, & que le Roy Henry III. commanda qu'on le prist vif ou mort, lors qu'il se retira à Dreux: que Monsieur & ses seruiteurs ne se peuvent plaindre que de ces funestes deuins, qui leur auoient predict la mort du Roy en sa maladie de Lyon. Dans le liuret du bon Genie Pa. 180
de la France, que les actions de Monsieur donnent 681 682
des impressions de tyrannie; qu'il a receu des pardons &c.
qui ont effacé ses fautes passées: que son cachet & son seing ont paru dans les conseils des Princes estrangers, pour les assurances de la part qu'ils peuvent pretendre au desbris de la Couronne de France: que Monsieur est Lieutenant General de ses Ministres, & que son procedé est trop criminel, pour estre excusé par la bonté du Roy. Voila vne partie de ce qu'on a reimprimé & debité dans Paris en la presence de Monsieur depuis son retour en France, apres les sermens que le Cardinal a fait de le vouloir honorer; en mesme temps que le Sieur du Chastellet, qui a ramassé tous ces vieux haillons, demandoit pardon à son Altesse, & l'obtenoit par vn excez de bonté qui auoit estouffé sa iustice. On voit bien dans toute cette procedure, quelle mine que le Cardinal face à Monsieur, qu'il creuse vne mine pour le faire sauter, qu'il le veut ietter dans le mespris de France, & de tous les estrangers; afin qu'il ne soit ny plaint ny secouru, quand il le voudra perdre; & qu'il desire de le rendre infame dans les siecles suiuaus, pour s'estre opposé à son credit. Ayant iugé que ces liures

volans se pourroient facilement esgarer, il a voulu faire vn gros volume, qui eust rang parmy les grands liures de toutes les bibliothèques de l'Europe: il a creu que rien ne pouuoit tant nuire à son Altesse, que la dissimulation de cette iniure qui luy est faite avec esclat, & dans toute la Chrestienté. Il a fait imprimer dans vne fucille du Gazetier, que Monsieur est vn grand & bon Prince, parce qu'il a visité, carressé & estimé Monsieur le Cardinal Duc, apres la detention des siens, & que c'est vn tesmoignage que son Altesse aime fort le Roy & la France: ce papier sera ietté dans le feu, apres qu'il aura fait rire ceux qui le liront; mais dans cent ou deux cens ans Monsieur sera descrit dans le gros volume, comme vn meschant & imbecille, si on ne rencontre nos responce & la veritable Histoire du temps. Elle fera voir qu'on a dit, que Monsieur estoit le plus chetif & infame Prince du monde, lors qu'il a esté contraire au Cardinal; & qu'il est deuenu le plus grand & le plus triomphant, lors qu'il est allé voir le Cardinal à Ruel, & s'est entretenu vne heure avec luy. Le Duc de Puylaurens estoit vn monstre deuant qu'il fust dans l'alliance du Cardinal: apres qu'il a receu cet honneur, on a imprimé qu'il estoit descendu trois fois de la Maison Royale; qu'il auoit plus seruy le Roy & la France, que s'il auoit gagné six batailles; qu'il auoit vn esprit admirable, & vn iugement le plus solide qu'on aye iamais veu en son aage. Mais parce que dans la confession generale qu'il fist au Cardinal, il ne dit pas vn gros peché, à sçauoir qu'il auoit dans le temps du traité secret escrit de sa main

Tout ce-
la fust
dit au
Parle-
ment,
lors que
Puylau-
rens fust
receu
Duc &
Pair.

des memoires pour Rome vn peu picquantes contre son Eminence; ce peché mortel caché malicieusement a fait reuiure tous les autres: Puy-laurens n'a plus esté parent du Roy, ny allié du Cardinal, ny Duc, ny bon esprit, ny homme sage; il a plus desobligé la France, que s'il auoit perdu six batailles; & qui pis est, il est en danger d'estre sans teste.

Se faut-il estonner, si le Cardinal se ioüe ainsi de la reputation de l'Heritier de la Couronne, puis qu'il n'espargne point celuy qui la porte, & qui luy est si bon Maistre? Pour monstrier que nous sommes meilleurs seruiteurs du Roy que luy, nous ne pouuons souffrir le mespris qu'on fait de la personne de S. M. Le commandement que nous auons de la Royne estant ioint à nostre inclination, nous auons tousiours escrit avec le respect que nous deuons au Roy; & ne croirons iamais qu'on le puisse perdre, en disant que S. M. est trompée, puis que Dauid & Salomon confessent qu'ils l'ont esté: & il est vray aussi, qu'un bon Prince qui se fie à vn Conseiller qui est plus fin que luy, se descouure pour receuoir des grands coups. Le Cardinal se peut seruir de l'autorité de nostre Prince, pour nous faire du mal; mais pour nous en faire dire contre nostre Souuerain, sa violence n'est pas assez forte. Nous l'auons prié, & tous ses petits Escriuains, d'oster des escrits qu'on a fait contre la Royne & Monsieur quelques choses qui blessent grandement la reputation du Roy; mais nous recognoissons bien que nous n'auons pas creance aupres d'eux, & qu'ils n'aiment pas S. M. Le Cardinal ayant

manqué à son deuoir, il suffit que nous faisons le nostre. Nous reiterons nostre protestation, qui nous seruira peut estre vn iour; au moins sommes nous asseurez que Dieu agréera nostre zele, & que nous aurons le merite d'auoir obey aux volontez de nostre Maistresse. Nous auions donc aduertiy le Cardinal de prendre garde, que

*Reim- dans le liuret intitulé Discours au Roy touchant les
priné en libelles faits contre le gouuernement de son Estat, l'Au-
meimes theur, ou sot, ou malin, auoit fait glisser ce dis-
termes cours sur la promesse qu'il dit auoir esté faite par
dans le S. M. d'un chapeau de Cardinal au President le
gros vo- Coigneux: Vne autre fois V. M. sera plus retenüe, &
lume fol. considerera avec plus d'attention à qui elle despart ses li-
447. beralitez. N'est-ce pas dire ouuertement que le*

*Dans l'Ad- Roy est vn temeraire? qu'il ne pense point à ce
uerisse- qu'il dit & promet? n'est-ce pas le blasmer de
notre aux la mesme imperfection qu'on dit estre en la
Provin- Royne sa Mere, & faire voir qu'il la tient de sa
res. naissance? Nous auions aussi aduertiy que ces pa-
a Dans roles estoient scandaleuses: C'est ce Cardinal qui a
les Ob- pris la Rochelle, & qui a deliuré Cazal. La fidelité
serua- des conseils acquiert la louïange au Conseiller
sions sur qui les donne; mais la gloire des actions est tous-
la con- iours resernée au Prince: & celuy qui s'attribuë
damna- le premier honneur de ce qui a reüssi en la pre-
tion du sence du Souuerain, fait voir qu'il prend la pla-
Mares- ce de son Maistre. De la mesme insolence pro-
chal de cedent ces discours: a Le Cardinal gouuerne le
Maril- Royaume: le Cardinal fait regner le Roy avec toute
lac. le bon Genie de sorte de Maïesté: le Cardinal est b le second Pere de la
la Fran- France: le Cardinal est l'ame & l'esprit de l'E-
re. stat. Le Roy à ce compte n'est que le corps;*

En la harangue de la Maison de ville de Paris on met Sa Maieſté & le Cardinal enſemble ; & on en parle comme on faiſoit des associez à l'Empire, lors qu'on dit, *Le Roy & Monsieur le Cardinal feront pour vous.* L'impudence va bien plus auant, lors que le Cardinal approuue la qualité qu'on luy donne de *Prince tres inuincible* ; qu'il reçoit des Theſes qui luy ſont dediées avec vne figure en taille douce, en laquelle il ſert de bouclier au Roy, & le couure ſous des palmes qui porte ſes armoiries, ſes deuifes & ſes chiffres : *b* qu'il fait paſſer comme vne marque de modeſtie, de n'auoir point encore dit avec le Cardinal d'York, *moy & mon Roy* ; comme ſi vn homme eſtoit ſage, de n'eſtre pas ſi fol que les plus inſenſez. Il ne faut point chercher d'effronteries apres celles là, ny des preuues plus ſenſibles de la folie & de l'ambition du Cardinal. Il a autant de fortes de gardes que le Roy : il va dans Paris avec cet equipage, & mieux ſuiuy que n'eſt S.M. le peuple y a eſté ſurpris, & a ſouuent crié en le voyant paſſer, Viue le Roy. Cet orgueil intolerable ne preſſera-il point ce grand Dieu qui reſiſte aux ſuperbes ? celui qui eſt l'image de ſa puissance n'aura-il iamais la ialouſie contre vn Conſeiller qui a pris toutes les marques de la Royauté, & qui veut faire d'vn office vn Empire ? On dit que nous ſommes criminels de leze Maieſté, en deſcouurant les crimes de leze Maieſté ; & que ceux qui les commettent, ſont les plus fidelles ſuiets du Roy. Sur le bruit qui courut à Bruxelles, qu'vn Gentil-homme auoit dit quelques paroles contre le reſpect qui eſt deu à la

*a Impri-
mée l'an
1632.
Non pa-
tiatur
Princeps
priuati
hominis
nomen
iuxta
vel ſis-
pra ſui
aſſolli,
quod eſt
formi
dolofum.
Tacitus.
L'an
1632.
Theſes
de Bri-
ſacier.
b Dans
l'Al-
uerſiſſe-
mens au
Promi-
ces,*

*Le Sieur
Iacqui-
not pre-
mier va-
let de
chambre
du Roy.*

sacrée personne du Roy ; la Royne fist instance pour le faire chastier. Vn bon seruiteur, quoy que chassé de la Maison du Roy, s'est porté deux fois sur le pré pour tesmoigner son ressentiment, & a receu la seconde fois vne grande blessure: tout celan'est point estimé, & les iniures qu'on dit, escrit & imprimé à Paris contre le Roy, sont recompensées aux despens de S. M.

Pag. 99.

*Le feu
Roy estoit
grand,
mais ce
n'est pas
par luy
que Dieu
a voulu
faire des
choses
grandes.
Balsacen
son liure
du Prin-
ce.*

Le Cardinal ne se contente pas de se mettre par dessus la teste de tous les viuans, il met tous les morts sous ses pieds: il fait abbaissier les actions du feu Roy pour esleuer les siennes: il souffre qu'on escriue indignement de sa memoire: il ne fait preferer le merite du Roy à celuy du grand Henry son Pere, que pour monstrier que Louys XIII. a eu vn ministre qui en a plus sceu que Henry IV. & tous ses Conseillers. La mesme vanité luy a fait souffrir que Balsacaye escrit, *qu'à grand peine verra on dans les trois races de nos Roys trois Princes qui soient passables.* Faut-il trouuer estrange s'ils n'ont point espargné les estrangers; & si dans ce Prince de Balsac, si dans l'Epistre d'un nommé Sillon adressée au Cardinal, à la teste du traité de l'Immortalité de l'ame, dans le Catholique d'Estat, dans le Coup d'Estat, dans l'Entretien des champs Elisées, dans la Relation de ce qui s'est passé l'an 1630. dans la Responce au Manifeste du Duc de Sauoye, dans tous les autres liures ramassez en ce gros volume, & mesmes en la Preface, on deschire la reputation de tous les Princes Chrestiens, & de tous leurs ministres, pour faire valloir celle du Cardinal de Richelieu, qui ne croit pas estre grand, si tout

si tout ce qui l'est, ou l'a esté, ne deuiant petit deuant luy. S'il dit, que c'est pour faire paroistre le Roy, ie m'assure que S. M. qui tient sa grandeur de sa Naissance, de son Royaume, de sa vertu, & de ses actions, ne les voudroit pas rechauffer par les vices d'autrui: le Roy seroit bien malheureux d'estre sage & vaillant; parce qu'il est nay dans vn siecle, qui n'auroit produit que des Princes infirmes & foibles. Il me semble, que les Escruiains du Cardinal loüeroient mieux le Roy en loüant tous les Souuerains, & preferant S. M. que de les blasmer comme ils font. Qui doute que la gloire du Roy ne fust plus releuée, si on luy mettoit sous les pieds des Geans & des Colosses, qu'en disant qu'ils ne sont que des nains & des mirmidons? C'est vne chose qui fera horreur à toute la terre, de voir qu'on n'attaque pas seulement les viuans, mais qu'on va dans les tombeaux de tous les Empereurs, Roys d'Espagne, & Princes de la Maison d'Autriche, pour leur casser les os, les brusler, & ietter les cendres au vent, avec la memoire de leurs actions. Dans les Escrits & fueillets que nous auons cotté, Ferdinand Roy de Castille, Maximilian & Charles V. Empereurs, & Philippe II. Roy d'Espagne, sont des poltrons, des impies, des perfides, des traistres, & des assassins: la Maison d'Autriche n'est bastie que sur les vsurpations, iniustices, desloyautez & tyrannies, sans auoir esgard aux alliances que nous auons fait, à la paix, qui n'est point rompuë ouuertement, & à la Naissance du Roy, qui en est sorti par sa grand Mere maternelle, & sans respecter la Royne de Fran-

Voiez le Catholique d'Estât, Coup d'Estât, Enuies des champs, Elisées, Prince de Balzac, Epi- fre de Sillon, la Preface, & autres pieces

ce, qui est si vertueuse & bonne, ny tous les grâds Princes de ce nom, qui viuent aujourd'huy avec tant de pieté, règnent avec tant de clemence, combattent avec tant de generosité, & traitent avec tant de franchise. Les viuans sont encore deschiiez avec plus de cruauté. Que ne dit-on contre l'Empereur, qui est vn Prince si saint & si iuste? contre le Roy d'Espagne, qui est si sage & si genereux? contre le Roy d'Hongrie, qui est si prudent & courageux? contre l'Infant Cardinal, qui est vn des plus accomplis Princes que la terre aye veu de long temps? Les Gazettes qui sont des libelles diffamatoires avec permission, trouuent toutes les semaines quelques taches dans ces Astres. On les veut rendre tantost odieux, & tantost ridicules: on donne à leurs peuples des mauuaises impressions de leur gouvernement, & à leurs voisins des apprehensions de leurs desseins. Tantost dans la Gazette ces Princes sont reduits à demander l'aumosne, & les gardes de leurs personnes se vont mutiner: tantost tous leurs suiets sont sur le point de secoüer le ioug pour le mauuais traitement qu'ils reçoient: tantost les Grâds se vont reuolter en Hongrie, en Boheme, en Autriche, en Castille, en Aragon, en Portugal, au Royaume de Naples, à Milan, & en Flandres. On dit que des prodiges; qui presagent leur ruine, ont paru à Vienne, à Madrid, à Milan, à Naples, à Bruxelles, à Cambray, à Arras: qu'on a veu des oyseaux de diuerses especes, qui ont plumé vn aigle en l'air; & qu'un chat sauuage, qui estoit le cimier des anciennes armes de Bourgogne, ayant passé au trauers du

Regiment des gardes du Roy, eſt venu pour ſe faire tuer aux pieds de S.M. de là on tire des cōiectures de la ruine indubitable de la Maiſon d'Autriche : cependant on aſſeure ; qu'une colombe a accōpagné ſix lieuës la littiere du Cardinal Duc, & luy a parlé à l'oreille ; laiſſant à iuger au lecteur, ſi c'eſt celle qui inſtruiſoit ſaint Gregoire, ou celle qui abuſoit Mahomet. Le Roy d'Eſpagne, & ce ſage Conſeil que Baſſac veut faire paſſer pour fol, & Ferrier pour meſchant, vont à leurs fins ; & encore qu'ils ne courent point ſi viſte, ils meſpriſent ces clabaudes d'Eſcriuains, qui ſont ſemblables aux chiens des villages, qui mordent les iarets des cheuaux des couriers, leſquels ne s'arreſtent pas pour cela ; & ſe moquent de la ſottife de ces beſtes, qui ſont en hazard de receuoir vn grand coup de pied.

Le Châtelet dira icy ſans faute, que nous auõs renoncé à la France, & ſommes deſcouverts Eſpagnols. Faut-il eſtre beſte & menteur, pour eſtre François ? eſt-il neceſſaire, pour eſtre bon citoyen, de renoncer à la Religion Chreſtienne, qui nous defend de meſdire des Puiffances ſouueraines ? eſt-ce dire la verité pour ſon Roy, de mentir contre tous les autres Princes ? n'eſt-il pas plus expedient de les eſtimer tous, pour inuiter leurs Eſcriuains à louer le noſtre ? La gloire du Roy vient elle de l'infamie d'autruy ou de ſa propre vertu ? ne ſera-il pas ſage ſans eſtre comparé à des imprudens ? & ceſſera-il d'eſtre genereux, ſi les autres le ſont ? Pour monſtrer que nous ne ſommes pas d'auantage Eſpagnols qu'Anglois, ny Anglois qu'Italiens ; nous trouuons,

*Bonus
ciuis eſt
bonus
Chriſtianus.*

mauvais en general, que dans les livres du Cardinal, entassez dans le gros volume, on aye mesdit de tous les Princes Chrestiens, aussi bien que de ceux d'Austriche, encore qu'on se soit plus attaché à ceux-cy. Le sage, clement & iuste Roy de la grand' Bretagne, ce Prince qui a tant de vertus, qu'elles nous font desirer que cet ornement de nostre siecle soit vn des plus rares de nostre Eglise, n'est pas exempt de leurs atteintes. Le sieur Hay dit par vanité, qu'il est descendu des Millors d'Hay Anglois, encore qu'on soit bien informé de la bassesse de son extraction. S'il croyoit estre sorti d'Angleterre, & que cet aduisé, courtois & accompli cheualier le Comte de Carlile aye droit de s'y opposer pour la gloire de sa maison, il ne traiteroit pas si mal les Anglois. Il fait voir sa malice, ou son peu de iugement, en traduisant en bon François le mauvais Latin de quelque yurongne, qui dans vn poëlle d'Allemagne vomit il y a dix ans des iniures atroces contre la personne du Roy de la grand' Bretagne, elles ne deuoient point estre leuës en nostre langue, ny publiées en grosse & belle lettre dans le grand volume, qu'il ne falloit point remplir de ces ordures, ny les rendre immortelles. Dans l'Entretien des champs Elisées

Нова
печать
anno
1625.
Pag. 62.
de la
Preface.

Pa. 247. on dit, qu'en Angleterre, sous le gouvernement d'un imprimé homme, les affaires ne vont pas avec telle vigueur, comme du temps qu'elles estoient entre les mains d'une femme: que les Anglois ne scauent faire la paix ny la guerre, qu'ils ont attaqué la France sans suiet, & ont fait la paix sans raison. N'est-ce pas vouloir faire passer vn Roy pour moins genereux qu'une femme,

& pour vn Prince si impudent, qu'il ne sçait faire ny la paix ny la guerre? Il faudroit faire vn liure espais comme celuy des Diuerses pieces du temps, si on vouloit extraire toutes les iniures qui y sont contre feu Monsieur de Sauoye. Ce Prince qui a esté tenu pour vn des plus genereux & plus aduisez qui fust au monde, n'a point d'autres qualitez dans les escrits de ces gens, que *de perfide, de trompeur, & de fourbe*; encore qu'il soit vray, que dans vn Estat mediocre il a eu la liberalité, la magnificence & le courage d'un grand Roy. Tout ce que ie pourrois escrire pour faire voir les indignitez qu'õ a fait à Monsieur de Lorraine, & le mespris de sa personne, seroit au dessous de ce que toute la terre à veu avec estonnement: on l'a traité avec tant d'indignité; qu'il vaut mieux en assoupir la memoire; que de l'esueiller: tout ce qu'on a auancé, est, qu'en pensant le perdre, on a ouuert vn grand champ à sa vertu; & lors qu'on l'a voulu rendre vn pauvre Prince, on en a fait vn grand Capitaine. Je laisse à part les atteintes qu'on a donné en termes couuerts aux grands Ducs de Toscane, parce qu'ils tendent à abaisser la naissance du Roy; mais ie m'estonne de ce que le Prince d'Orange, qui est vn des plus grands Capitaines de ce temps, & fort estimé, mesmes par ses ennemis, est si mal traité par ses amis. Dans les Entretiens des champs Elisées ils en parlent en ces termes: *Pour le Prince d'Orange, il est d'un naturel mol.* N'est-ce pas avec des paroles moins rigoureuses-le faire passer pour vn lasche, comme ils l'ont voulu prendre pour vne

Pour Monsieur de Sauoye, pag. 64. 110. 217

&c.

Prince de Balzac.

Pa. 248

Pa. 247
248. duppe, lors que le Cardinal s'efforça de luy enlener la forte place d'Orange, apres l'auoir engagé au siege de Bolduc? mais sa Prudence preuint la finesse du Cardinal. Si les grands Princes ne sont point espargnez dans ses escrits, leurs ministres le seront encore moins. Quelles mesdisances n'auons nous point leu cōtre le Prince *a* d'Ekemberg, contre le Duc de Buckingham; mais principalement contre le Comte Duc *b* d'Oliuares, auquel les auteurs du Cardinal s'attachent d'auantage, parce qu'ils scauent la haine qu'il a conceu contre ce Ministre, qui sert son Maistre avec tant de capacité & si peu d'interest. Il est vray, que le Cardinal se picque de paroistre plus habile homme que luy; mais la fin descouvrira qui aura mieux mesnagé le bien & reputation de son Prince, & moins engagé la sienne.

a Prince
d'Ekem-
berg,
pa. 246.
b Le
Comte
Duc d'O-
liuares,
pa. 80
178.

Dans les procedures contre cet imposteur signalé Blaise Rufflet, vous donnez vne atteinte à la reputation du Marquis d'Aytone, encore que vous ayez peu apprendre par beaucoup de François, combien la vertu de ce Seigneur est esloignée de toute sorte de lascheté & tromperies. Mais dans tous vos escrits, tantost à couuert & tantost à descouuert, vous tesmoignez vostre rage contre l'Abbé de l'Escaille, l'un des plus grands hommes que nostre siecle aye porté en la cognoissance des affaires d'Estat, & experience de tout ce qui peut rendre accompli le ministre d'un Prince. Il a serui le sien avec tant de fidelité & de capacité, que ces qualitez vous ont esté insupportables aussi bien que la force de son esprit, qui a cognu la foiblesse de celui du Car-

Pour le
Marquis
d'Ay-
tone,
pa. 904.

Pour
l'Abbé
d'Escail-
le,
Pa. 540.

dinal, & luy a ſouuent reſiſté avec courage & raiſon. Vous donnez en paſſant vn petit traict de plume à Dom André Cantelmo, qui eſt vn *Pour* Cana- *Do:z* lier de grande extraction, ſage, vaillant, *André* craignant Dieu, & qui employeroit plus vo- *Cantel-* lontiers ſa vie pour attaquer la puifſance du *mo.* Cardinal, qu'vn empoifonneur pour faire perir ſa perſonne.

Pour conſequence. Tout ainſi que le Cardinal de Richelieu eſt ſeul miniſtre en France, auſſi veut-il eſtre ſeul vertueux au monde; il ſ'imagi- ne que la vertu communiquée eſt partagée, & que c'eſt vn bien qui luy appartient tout entier; au moins ſi ce Phœnix aduoüoit, que deuant cinq cens ans le monde en auoit vn, ou qu'il ſouffrit qu'après cinq cens ans il en naſquit encore vn au- tre: mais luy & ſes flatteurs ne veulent pas que la terre aye veu ſon pareil, & que Dieu luy face iamais preſent d'vn ſemblable. Ils ne diſent pas ſeulement, que tous les viuans ſont imparfaits pour relquer l'eſclat de ſes perfections, mais ils aſſeurent que tous les morts ſont des ombres qui ſont eſclatter ſa gloire; & que tous les plus ſages miniſtres qui viendront, ſeront des Pig- mées, lors qu'il ſe meſureront avec cet Hercule Gaulois.

Je vous laiſſe à penſer, ſi vn pauvre homme, qui oſe choquer les imaginations de ces inſentez, eſt bien receu: ſi celuy qui eſſace les loüanges du Cardinal, parce qu'il les trouue meſlées avec les blaſmes de la Roynie, & qu'il eſt quaſi im- poſſible de les ſeparer, doit eſtre traité avec grã- de modeſtie: ſi tous les petits ardens, qui veulent

tesmoigner leur zele pour attirer quelque bien fait, n'aboyent point, & ne taschent pas de mordre cet Aduocat, qu'ils croyent auoir l'effronterie d'attaquer son Eminence, encore que son Eminence attaque la Majesté de la Royne sa Bienfaitrice. Nous respondons à ceux qui nous calomnient, & ne touchons que ceux qui les emploient: ils blasment les viuans & les morts, ils trouvent mauuais qu'on essuye la bouë qu'ils nous iettent, quand nous deffendons nos maistres. On souffre, que ceux qui ont perdu leurs procez, disent du mal de leurs Iuges durant vingt & quatre heures: on nous a pris nos biens, on nous tient esloignez de nostre pays, & on deschire nostre reputation, si nous respondons vn petit mot.

Je suis d'aduís que nous changions de façon d'escrire, pour n'estre point obligé à repeter le nom du sieur Hay, & à luy dire souuent le mien; ie veux en nostre querelle particuliere m'adresser à luy. Vous auez esté Aduocat du Roy, & moy Predicateur. Nous auons fait profession de parler en public, nous la faisons maintenant d'escrire. Vous accusez les personnes que ie deffends, & l'accuse celles que vous defendez. Vous, en retirant du bien & des emplois de S. M. escriuez en la page quatriéme de vostre Preface, *que la vertu du Cardinal de Richelieu se trouue tellement meslée dans le bon heur & les admirables succez des affaires du Roy, que la main, l'instrument & l'ouurage de l'artisan ont moins de rapport ensemble, qu'il ne s'en remarque entre les belles actions d'un si genereux Maistre, & l'industrie d'un si fidele seruiteur.* Vous remar-

querez, s'il vous plaist, que dans le commencement de ce discours vous donnez *la vertu* au Cardinal, & *le bon heur* au Roy; qui est vn assez mauuais partage. Sur le milieu vous dites, *que le Cardinal est plus que la main, l'instrument & l'ouurage du Roy*: il n'y a rien par dessus cela que l'ame & l'esprit de l'ouurier; S. M. n'est à ce compte que le corps. Sur la fin vous luy donnez la generosité, mais vous la faites conduire par l'industrie du Cardinal, comme par vn ressort. Aduoüez que vous estes vn mauuais Aduocat du Roy. Je vous pourrois produire cent autres pieces semblables, par lesquelles ie pretends de vous faire condamner comme preuaricateur. Qui doute que vous ne le soyez, lors que dans vn Royaume où la Naissance a fait le Roy, vous descriuez la Roynne sa Mere comme vne femmelette idiote, comme vne Princeesse malicieuse, comme vne Mere desnaturalée; & que vous asseurez que le Frere du Souuerain est sans iugement, sans conduite, sans foy, & sans generosité? Je crie au larron contre ceux qui volent au Roy l'honneur de sa Naissance, & la gloire de ses actions; à la Roynne la grandeur & les biens de son extraction, le bonheur & les conuentions de son Mariage, la prudence & la generosité de sa Regence, la fidelité & la iustice de ses conseils; à Monsieur, la bonté de son naturel, la sincerité de ses intentions, & la liberté de sa personne. Vous dites, que ie touche à la reputation de ce grand ministre. Me doit il estre plus saint & sacré qu'à vous les trois personnes Royales? Pourquoy tirez-vous les loüanges du seruiteur des blasmes de son Maistre, de

la Maistresse, & de l'Heritier de la Couronne? pourquoy confondez-vous les eloges avec les injures? croyez-vous que le Cardinal m'aye obligé à tirer de la presse la reputation de la Roynes, sans donner quelque coup de coude & de pied à la sienne, qui nous serre de trop pres? Si vous liez les langues & les plumes en vn pays, qui ne sera plus François s'il n'est franc; permettez nous qu'en lieu de seureté nous crions au voleur & au meurtrier, lors qu'il emporte nostre bourse, nostre liberté, la vie de nos amis, & qu'il poursuit la nostre. Vous ne pouuez acquerir l'estime d'estre vaillans, si nous ne rendons point de combat: si vous portiez l'espée, vous n'auriez point d'honneur de vous battre avec vn homme qui auroit les mains liées: puis que vous avez esté Aduocat, vous n'ignorez pas, qu'il vous est impossible de gagner vostre procez avec iustice, si vous estes ouy seul. Faites des contredits & des saluations; mais n'empeschez pas que nos escritures ne soient mises dans le sac avec les vostres. Vous estes le seul Iuge que nous recusons: ce n'est pas que dans vostre ame vous ne soyez pour nous; & que si vous vivez, vous ne mordiez les mains que vous baisez à present: mais outre que vous avez tasté de la prison, qui vous donne trop d'apprehension, vous estes si corrompu, que tant que la faueur du Cardinal durera, vous serez le plus cruel ministre de sa tyrannie: si vous la suruuez, nous esperons de vous voir le plus ardent sollicitateur de la condamnation de sa memoire. Ie me resionys de ce que vous ne pouuez jamais estre mon Commissaire, ny mon Iuge,

vous estant déclaré ma partie & mon ennemy, par les iniures atroces que vous me dites : ie les estime heureuses, puis qu'elles me tirent hors de vostre iurisdiction : mais ie ne vous conseil-
le pas de les continuer, parce que vous en auez assez escrit pour estre recusé; & pourriez tant mentir, que vous me contraindriez de vous dire beaucoup de veritez. Ie loüe Dieu, qu'apres l'estude que vous auez fait de ma vie, de laquelle i'ay passé vingt deux ans dans Paris, vous n'auez rien trouué à redire en mes mœurs, qui ont esté irreprehensibles. I'ay tousiours creu que ie perdrois parmy les esclauës du temps la reputation d'homme vertueux : mais pour l'estre en effect, i'ay esté obligé de prendre le chemin que ie suiuray iusques à ce que la Royne aye trouué son repos.

Au commencement de vostre Preface vous auiez fait vne protestation en ces beaux termes, page 9. *Ie ne veux point appeller à mon aide les iniures & mesdisances, qui sont les principales forces de celuy qui nous persecure.* La passion emporte aussi tost non seulement vostre iugement, mais encore vostre memoire: en la page suiuant vous m'appellez *forcené*, & dans les autres *Flamand passionné pour l'Espagne, perfide, frenetique, traistre, maistre d'Escole, pedant, serpent rampant, impudent, affronteur, monstre de Sigibeit, blasphemateur*: vous me donnez toutes vos qualitez : vous estes soigneux de semer dans chasque page vne de ces fleurettes de vostre esprit modeste; & pour le faire esclatter d'auantage, vous y meslez quelque trait tiré des lettres humaines, ou vne similitude prise

des choses naturelles: vous affectez de paroistre sçauant & mesdisant tout ensemble; c'est à dire, bon escriuain, & meschant homme. Vous m'appellez par mocquerie *Sophiste* & *Rhetoricien*: & ie dis serieusement que vous n'estes ny l'un ny l'autre. Le mot de *Sophiste* est pris souuent en bonne part parmy les anciens; & ie le suis ainsi. Ie me glorifie d'estre *Rhetoricien*; c'est à dire, Orateur: ce que vous seriez, si vous estiez bon *Aduocat*. Si i'estois *Sophiste* en mauuais sens, c'est à dire, faiseur de faux arguments, vous deuriiez descouvrir en quelle forme ou figure i'ay manqué: vous ne les faites point; ce qui me fait croire, que vous ne sçaez pas discerner vn sophisme d'auec vn syllogisme. La qualité que vous me donnez, est l'iniure que les ministres Huguenots ont accoustumé de dire à nos Theologiens, lors qu'ils pressent le mensonge par vne verité concluante. I'ay pitié de vostre ignorance, & m'estonne de ce que vous auez esté receu *Aduocat General* sans *Dialectique* ny *Rhetorique*, & croyant que ces deux sciences n'estoient que pour les chaires des Colleges, ou pour celles des *Predicateurs*, non pour les barreaux: ie les ay souuent remarquées en celuy de Paris, où i'ay cognu beaucoup d'hommes eloquens & vertueux. Ie souffrirois plus aisément vostre ignorance que vostre malice: cette-cy paroist tres grande contre moy, lors que, pour me rendre criminel, vous m'auiez fait *Autheur* de trois pieces, qui ne sont point sorties de ma main. Vous dites,

que i'ay forcé mon stile, & que ie l'ay rendu aux Espagnols. Sans cette imposture, sur laquelle vous auez

dreſſé la moitié de voſtre Preface, elle ſeroit bien courte, vos penſées auroient eſté fort ſteriles; & ie ſerois meſmes à voſtre rapport coupable dans ſept ou huit pieces, que i'ay fait de ſept ou huit ou contradictions, ou beſueües. Tous les plus grands crimes que vous m'impoſez, viennent de trois eſcrits qui ne ſont point à moy, & i'aymerois mieux auoir perdu la main, que d'auoir tenu vne plume pour y trauailler. Vous faites tort, Sieur Hay, non ſeulement à ma conſcience, mais à mon eſprit: celle là ne peut ſouffrir que ie donne la moindre atteinte à la gloire de mon Roy, ny à l'honneur de mon Pays, que mon affection n'a point quitté. Il me ſemble auſſi, que ſi ces ouvrages eſtoient ſortis de ma boutique, ils ſeroient mieux polis: quelle force & violence que ie puiſſe faire à mon ſtile, ceux qui le cognoiſſent, iugeroient bien que cet Achille & cet Hercule ne ſe peuuent iamais bien cacher ſous vne robe de femme. Je vous aſſeure, que ſi la Royne Mere du Roy ſçauoit, que i'euſſe ou preſté ou vendu ma plume pour bleſſer la reputation du Roy, elle me feroit chaſtier, comme elle a pourſuiuy celuy qui auoit dit quelques paroles contre la perſonne ſacrée de S. M. que ie peux dire pourtant n'auoir pas eſté beaucoup plus eſtranges, que celles que vous auez imprimé dans Paris.

Et afin que vous ayez ma declaration par eſcrit, & que cette piece vous ſerue pour me condamner, ſi ie fais le contraire, ie vous proteſte, que dans les Pays bas ie tiens pour mon Roy celuy, dans le Royaume duquel la Prouidence de

Dieu m'a fait naistre: ie l'honore, & le veux servir comme mon Prince naturel, comme le Fils aîné de ma Maistresse, comme mon Maistre particulier, & comme mon Bienfaicteur. Je ne rompray iamais ces quatres liens: & si dans mes œuvres, qui ne sont que celles qui sont toutes d'un mesme caractere, & faites pour la defence de la Royne & de Monsieur, on y trouue quelque chose qui donne seulement le moindre ombrage à la gloire de mon Roy, lors qu'il me sera monstré par vn Iuge moins suspect & moins corrompu que vous, ie vous proteste, que i'effaceray les traits de ma plume avec mes larmes; & me condamneray à brusler le iour, si i'ay esté si mal aduisé d'obscurcir la lumiere de mon Prince. Rayez donc de vostre grande Preface, que ie sois l'Autheur de *la Flandre fidelle, de la Responce au Manifesté des Liegeois, & à celuy du Comté Henry de Bergue non plus que de l'Hellebore aux mescontens*. Ce n'est pas que i'en aduoüe, que si les ministres d'Espagne eussent désiré quelque seruice de ma voix ou de ma plume, lors que les cabales & corruptions du Cardinal taschoient de mettre en confusion tout le Pays où nous sommes refugiez, pour l'oster au Prince qui nous protege, & nous nourrit, ie n'eusse fait tout ce qui pouuoit dependre de ma profession & petite industrie, pour contenir les Grands & les peuples en leur deuoir. I'estois obligé à cela par le desir que ie dois auoir de conseruer la Royne, contre laquelle ces entreprises estoient dressées; le Cardinal ayant dit, lors qu'il esperoit qu'elles réussiroient

qu'il estoit assuré de la prendre à Bruxelles dans son
let. I'eusse aussi fait toutes les choses raisonna-
bles qu'on m'eust commandé, & que i'eusse creu
estre vtils non seulement pour me garder moy
mesme d'oppression, mais pour tesmoigner au
Prince, qui a si bien receu la Royne, que Sa Ma-
iesté a des gens de bien à son seruice, & qui
sement viure dans les Pays, où la Providence
de Dieu les enuoye. Mais tout ainsi que les Es-
pagnols sont trop sages pour exiger de moy
quelque chose contre mon deuoir; aussi ie l'ay
tellement en recommandation, que s'ils eus-
sent voulu employer ma plume, ie l'aurois fait
conformément au desir du Roy d'Espagne, qui
n'est pas de blasmer vn Roy, qui est son Parent
& son allié. I'aurois suiuy mon inclination &
obligation, qui me portent à desirer la gloire
de mon Prince, & à estimer les François, puis
que i'ay l'honneur de l'estre, encore que ie ne
possede rien en France, depuis que la vengeance
de Monsieur le Cardinal l'a voulu ainsi. Si i'euf-
se fait autrement, les Espagnols & les Flamands,
parmy lesquels ie ne suis pas marry d'estre en
quelque estime, m'auroient mesprisé: il m'est ex-
pedient de mieux mesnager ma reputation par-
my eux.

Les choses qui sont dans ces trois ouurages
que tu me donnes, peuuent estre pardonnées
à la passion d'un Flamand, d'un Walon, ou
d'un Bourguignon; mais ie confesse qu'elles
doiuent estre execrables en vn François d'ap-
peller la Royne Mere du Roy *Agrippine*, pour
faire vne mauuaise comparaison d'un monstre

Pag. 11. avec nostre bon Roy; ny de dire en general, que la nation Françoise est legere, temeraire, desloyalle, incompatible à soy mesme. Je laisse à part toutes les choses qui seroient des blasphemes en ma plume, & qui ne sont que de saillies de colere en celle des suiets naturels du Roy d'Espagne. Retranche donc de ta Preface toutes les inuectiues que tu as fondé sur cette fausseté, & sur tout, celles qui sont dans les pages 11. 12. 13. & 14. & que tu reprends avec tant de furie en la 94. Je te pardonnerois volontiers ces boutades, si ie me pouuois persuader que tu crois ce que tu escripts: mais te cognoissant comme ie fais, & m'imaginant que tu me cognois vn peu, ie suis assuré, que tu ne peux non plus penser que ie sois autheur de ces quatre ourages, comme il est impossible au Cardinal de Richelieu de t'estimer Escriuain veritable, Iuge equitable, & son seruiteur bien acquis. L'Aduocat Vibius Gallus ayant souuent contrefait le fol, le deuint à la fin: tu ne seras iamais vrayment zelé pour le Cardinal en le contrefaisant; toutes les carresses qu'il te fait, lors qu'il employe dans les commissions ton iniustice, & ton effronterie dans les escripts, ne peuuent mettre dans son esprit qu'il se doie fier au tien. Je sçay bien que dans ses railleries il t'appelle son leurier; & il a raison: car tu es celuy de ses bourreaux, lors que tu es iuge; & en escriuant pour luy tu es son leurier d'attache, mais assez mal adroit.

Pag. 10. Tu dis, que i'ay vendu mon stile enflé aux Espagnols. Si ie nie qu'ils m'ayent payé, ie suis iniuste: si ie dis qu'ils ne m'ont rien donné, ie suis ingrat: si ie

ſi ie publie que ie n'ay rien receu, ie ſuis vn impudent: cependant i'oſe faire imprimer chez eux, que ie n'ay point eu de payement, parce que ie n'ay rien vendu, ny eux rien marchandé; & que tout mon entretien, après la perte de mon bien, vient de celuy que S. M. reçoit: laquelle par ſa bonté me defend contre la neceſſité, comme ie la defens contre les calomnies. La veine baſilique, c'eſt à dire royale, nourrit avec le ſang du cœur le poulmon, qui luy donne du rafraichissement. Je n'ay point ouuert iuſques à preſent la main pour prendre des bien faits que de la Maiſtreſſe que ie ſers; & de cette incomparable & ſainte Infante, laquelle me fiſt preſent d'un calice & d'un baſſin d'argent, avec des buretes, pour quelques predications que i'auois fait en ſa Chappelle. Je crois à la verité, que la ſeule cauſe pour laquelle ie n'ay rien receu, eſt, que ie n'ay rien fait pour le Roy d'Eſpagne; & comme ie n'ay rien gagné par mes ſeruices, auſſi ie n'ay rien demandé par mes importunitéz. Apprenez ſieur Hay, qu'un homme de bien ne s'achete point; parce qu'il ne ſe met point en vente; & qu'il ſçait, que quand il le feroit, il trouueroit peu de marchands en noſtre ſiecle.

Il me ſemble que tu recognois cette verité en la page 17. où tu diſ, que ie ſuis *vn pauvre ſerpent, qui rampe en vne terre eſtrangere, pour ſupplie de vous auoir ientez.* Comment ſe peut accorder cette vente de ma plume à vn grand Roy avec cette pauureté que tu me reproches: quand

i'aurois demandé aux ministres de ce très puissant Prince vne recompense de Philosophe, ils m'en auroient donné vne digne d'un puissant Monarque ; & ie ne serois pas ce pauvre vermisseau que tu descris rampant sur le pavé de Bruxelles, & que tu appelles en la page quatre vingts vn, *rebelles affligé*. Ou ne dis point que i'ay vendu ma plume, ou recognois que ie ne suis point si pauvre que tu me fais paroistre. Je te veux descrire mon humeur : ie crois que si ie demandois, i'aurois plus que ie n'ay ; mais i'obtiens avec plus de facilité de moy de ne demander point, que ie n'en aurois à obtenir d'autrui ce que ie demanderois. Je ne feray iamais ce tort à la Maistresse que ie fers, de me plaindre de mon entretien ; ny à la Prouidence diuine de murmurer, parce qu'elle m'a remis là où elle me prist il y a vingt ans. I'obey à Dieu comme Chrestien, & comme Philosophe : ie resiste au malheur : ie tasche de suiure les ordres du Ciel, & de supporter les accidens de la terre. C'est vne consolation à ma fortune renuersée, de voir que celle du Cardinal branle. Je m'estime heureux, parce que ie ne veux pas viure selon ton opinion ; & ie ne crois pas que ma pauvreté soit pesante ; n'ayant point esté iusques à present à charge à mes amis, ny à moy mesme. I'ay quitté la France sans songer aux biens que i'y laissois, parce que la tyrannie du Cardinal ne me donnoit le loisir que de prendre garde au salut de

ma personne. Je n'ay point crâint les dangers par lascheté, mais ie les ay euités par prudence. Le ressentiment des obligations que j'auois à la Royne m'a porté à abandonner tout ce qu'elle m'auoit donné, ce que mon industrie m'auoit acquis, & ce que ie pouuois esperer. J'ay mieux aimé estre sans rentes, que sans recognoissance; & ay voulu faire voir, qu'un pauvre Predicateur en auoit plus qu'un riche Cardinal. La premiere année en laquelle ie commençois à viure un peu à mon aise, j'ay quitté mes biens; & le mesme esprit qui me les auoit acquis, m'a conseillé de les perdre. Je ne suis pas tombé dans les miseres que tu me reproches, j'y suis allé. Je suis de ces Stoyciens, qui trouuent vne si grande ioye en la vertu, qu'ils croient que les afflictions qu'elle attire, sont des nuës, qui ne peuuent iamais obscurcir le Soleil qui les a esléuées. Comme ie ne m'estime point malheureux pour estre pauvre, ie ne me crois pas infame pour estre hors de France: ie la defends couragement dans Bruxelles, & tu la trahis laschement à Paris. Je suis sorti d'un pays duquel le Cardinal a esté autrefois banny, & où tu as esté emprisonné. Il est vray, que nostre seiour au Pays bas est plus long que n'est celuy du Cardinal en Auignon, mais il n'est pas si infame; & nostre retour sera, s'il plaît à Dieu, plus glorieux que son rappel, qui renuersa toute la maison de la Royne dans un mois, & fist vne guerre dans un an. Si la mauuaise fortune s'arreste long

temps sur nous, c'est qu'elle nous a reconnu
vaillans; elle ne fist que passer sur le Cardinal,
parce qu'il n'est pas genereux : peut estre que
nous verrons, quand il sera affligé comme nous
sommes, qu'il n'est pas vn grand homme, mais
que la splendeur de son autorité a esblouy
les yeux de beaucoup de personnes, & les a
empeschez de voir la bassesse de son cou-
rage.

Pour finir ce discours, vous m'appellez *pau-
vre & affligé hors de mon pays*, au lieu de m'ac-
cuser des maux que ie pourrois auoir commis:
vous me reprochez ceux que le Cardinal m'a
fait. Cela ne me touche point, cōme fait le mot
de *rebelle*; qui n'est qu'à vostre mode, pour ne
m'estre point laissé prendre par trois Preuosts,
& estrangler sans bruiet. Je ne suis rebelle que
pour n'auoir voulu rendre le Cardinal coul-
pable de cette execution iniuste; & i'ay creu
qu'il estoit assez criminel pour la volonté qu'il
en a eu. Ce qui me console, est, que ie suis
aiseuré de n'auoir point irrité la colere d'un
homme puissant : ie me suis tiré à l'escart,
lors qu'elle s'est esmeüe, mais mal à propos,
contre moy. Les fols effarouchent les tau-
reaux, & les sages se retirent de leur passa-
de. Je n'escriis point de gayeté de cœur con-
tre celuy qui me peut proscrire : ie n'attaque
point, ie defens, & ie me mets deuant celuy
qui veut assassiner la belle reputation de ma
Maistresse, qui est la Mere de mon Roy. Me
trouuant en cette posture d'un homme de bien,

& de seruiteur fidelle, tu veux tuer mon honneur : ô que ie serois glorieux, si ie t'auois donné le change, si tu n'auois point de pensée que de mesdire de moy, non de blasmer la Royne! sans faute ie croirois auoir merité d'estre mis dans l'Histoire de France, avec plus de raison qu'Vrbinius dans celle de Rome, pour auoir pris la place de son Maistre, que ses ennemis venoient poignarder dans son liect. Il est temps que nous venions aux coups que tu me donnes pour mes veritables œuvres, apres auoir reietté celles que tu m'attribuës faussement, pour me rendre odieux.

Deuant que de venir à l'examen des fautes, que tu fais en voulant descouurir les miennes; ie te confesseray avec la modestie d'un Chrestien, qu'en escriuant beaucoup ie n'ay pas eu l'intention de rendre la sainte Esriture menteuse : elle assure, *que dans les longs discours il y aura quelques pechez.* Prou.
10. Je n'en suis pas peut estre exempt; mais c'est assez qu'ils ne sont pas si frequens, ny si grands que les tiens. Il n'y a point d'or à vingt & quatre carats. Je sçay aussi, que parmy les hommes il y a fort peu de veritez pures hors de celles de Dieu, & de son Eglise. Je suis fort aise, de ce que dans des escrits espais d'un demy pied, & dans sept ou huit pieces tu n'as trouué que sept ou huit choses à reprendre; & que ie me peux si bien deffendre ou expliquer, que deuant des Commissaires plus equitables que toy ie serois ren-

uoyé absous. Les sages & les sçauans diront, que si i'ay failly, c'est si legerement, qu'il n'y aura qu'un Momus ou vn bouffon de Cour (comme le sieur Hay) qui puisse dire autre chose de ma Venus, si ce n'est qu'elle est belle; mais que son patin a fait vn peu trop de bruiet, qui n'a pas esté agreable aux dieux de ce temps, parce qu'il les a esueillez: c'est qu'ils ne dorment pas d'un profond sommeil.

Pag. 21.

Je viens à la premiere atteinte que tu me donnes, qui n'est pas pour me reprendre, mais pour auoir vn suiet de t'esgayer sur la genealogie du Cardinal, & le piper sur vne matiere qui le chatoüille fort. Ton zele forcé fait des grandes exclamations, sur ce que i'ay dit, *que la cheualerie du pere du Cardinal estoit la plus simple & la plus basse, qui soit dans toute l'Histoire de la cheualerie du saint Esprit.* Pourquoy au lieu de m'appeller *effronté, impudent, menteur*, n'as-tu mis mon discours tout entier, & n'as-tu refuté du Chesne & Fauin que i'ay allegué? I'ay escrit, que ces deux autheurs ne disent point pour quelles raisons l'an 1585. qui fut l'année de la naissance du Cardinal, le sieur de Richelieu fut fait Cheualier par la volonté absolüe du Roy Henry III. sans assembler le Chapitre general; encore que quelques vns qui estoient de ce temps là nous assurent, que c'estoit pour vn seruice que i'ay voulu taire. I'ay dit que sa Cheualerie paroïssoit fort simple, en ce que dans ses armes, qui sont represen-

tées & blasonnées par ses Escriptuains, il n'y a point de supports, de cimiers, de couronne, de tourtis, de bourlet; que le timbre en pourfil est le plus simple qui se donne à la moindre Noblesse, & à celle mesme qui ne l'est que par priuilege. En fin nous n'auons voulu dire ce que tu confesses, & qui te feroit emprisonner vne autrefois, si le Cardinal y prenoit garde: c'est en la page vingt deuxiême où tu dis, que la terre de Richelieu estoit vn petit fief, mais le premier; releuant de la Baronnie de Faye la Vineuse, que le Cardinal a acheté pour donner quelque tiltre à sa maison, laquelle auparavant estoit vn peu plus qu'vn domaine noble. Il est vray, qu'il n'y auoit point eu encore de fauori de cette race, qui eust mis en peine tant de flatteurs pour rechercher cette genealogie de Louys le Gros; qu'on a trouué trois fois dans la maison de Puylaurés, lors qu'il a esté allié avec le Cardinal. I'ay tousiours veu que les bons esprits n'ont point manqué de semblables inuentions: il est mal aisé de les desmesler, personne n'en voulant prendre la peine. Nous auons veu que des escriuains affamez faisoient changer de place à vne lettre dans le nom de M. de Luynes, qui s'appelloit Albert, pour le faire descēdre de la maison d'Albret. Tout ce dequoy ie te peux asseurer, est, que ie ne cōtesteray point avec toy sur la genealogie du Cardinal, pour n'offencer Dieu en te donnant la peine de réplir d'impostures 10. ou 12. fueilles de papier. Ie vois que tu passes de fiéure en frenesie; & que pour tascher de me conuaincre d'vne petite menterie, tu encheris

tellement sur celles des flatteurs du Cardinal, que tu as fait dessein d'emporter le prix par dessus tous. Deuant que i'eusse dit en passant, que la Cheualerie de son pere paroissoit *fort simple*, il n'estoit descendu que de Louys le Gros, dans la lettre deschiffrée qui est inserée dans ce volume: mais dans la Preface vous allez rechercher sa source bien plus haut, & la creusez si profondement, que c'est vn abyssme. Vous dites, qu'il est descendu des premiers Comtes du Maine, & de la race d'Euillequin. Voila donc la maison du Cardinal aussi ancienne que celles des Capets: cette genealogie les fait sortir de la mesme souche, à sçauoir des Ducs de Saxe. Arrestons-nous là, & n'eschauffons pas d'auantage les Escriuains de son Eminence: sans faute ils remonteront iusques à la premiere origine de nos Roys, puis qu'ils sont desia arriuez à la seconde. Ils diront que les ancestres du Cardinal estoient plus proches parens d'Eudes que Hues Capet; & partant qu'il a vsuré le Royaume sur eux. I'ay peur aussi qu'ils n'asseurent que l'Empire & la Saxe luy appartiennent, puis qu'il y a eu quatre Empereurs Saxons sortis de cet Euillequin: mais il y auroit plus de danger, si le Cardinal de Richelieu se disoit issu de la ligne masculine de Robert Comte de Dreux; & si ce que plusieurs Historiens disent estoit veritable, qu'il estoit le fils aîné de Louys le Gros: mais que pour la bassesse de son esprit & courage, son Frere Louys le ieune fut appelé à la Couronne par le Pere, qui

le fist sacrer durant sa vie. Concluons, que son Eminence ne peut tirer vn grand aduantage d'estre descendu par les femmes d'un Prince stupide; ou qu'il a vn mauuais dessein, s'il veut prouuer, qu'en droite ligne masculine il vient des aïnez de nos Roys.

Pour appaiser ces Messieurs qui encherissent sur leurs mensonges, lors qu'on les met en colere, ie fais ma declaration, que ie n'ay iamais escrit que le Cardinal ne fust point de noble extraction; mais i'ay dit, comme ie fais encore, qu'elle n'est Royale que depuis son credit. I'adiouste, qu'il faut si peu de chose pour manquer en dressant vne genealogie, que l'erreuren vne seule personne fait qu'on se fouruoye iusques à l'infiny: la conuiction de la tromperie est difficile, & il est necessaire d'auoir tant de pieces pour la descouurir, qu'il vaut mieux en abandonner la poursuite ou s'arrester aux coniectures. Ie dis qu'elles ne sont pas aduantageuses pour le Cardinal: nous ne voyons dans sa famille qu'un petit fief, sa mere fille d'un Aduocat, & rien ne paroist ny dans ses armes, ny dans les actions de ses ancestres, ny dans leurs qualitez, ny dans leurs charges, qui ne se trouue dans la plus commune Noblesse; c'est ce que nous auons voulu dire. Si vous estiez homme de bonne foy, vous auriez rapporté tout nostre discours, qui estoit, que dans l'escuillon de Richelieu nous n'auons rien remarqué qui sentit sa maison bien releuée. Outre cela, nous vous prions de prendre garde, que l'ancien nom estant du Plessis, il y a vn si grand

** Faut
fait ces
escuillon
de la No-
blesse
commu-
ne: du
Chesne
en la pa-
ge 70 de
l'Histoire
de la
maison
du Plessis
de Riche-
lieu, n'y
met point
de tim-
bre, d'a-
chemens
ny de sup-
ports, ai-
mans
mieux
n'en met-
tre point
que d'en
feindre,
ou les
faire trop
simples.*

nombre de Gentils-hommes qui le portent en France, qu'il est mal-aisé de s'empescher de prendre l'un pour l'autre, & tres aisé de donner le change. On peut dire aussi, que ce nom du Pleffis n'a pas esté si releué dans le monde, puis qu'on le quitta il n'y a pas long temps, pour prendre celui de la petite terre de Richelieu.

Pag. 25.

Ch. 26.

Quand à ce que vous dites, *que ce Moine, duquel Popelinier parle; n'estoit pas le grand Pere du Cardinal, mais son grand Oncle;* i'ay plus de raison de croire ce que i'ay aduancé, que vous de me blasmer. L'Historien l'appelle *Richelieu*, sans le nommer cadet à la mode de Gasconne, & sans luy donner à la façon de France le nom de quelque terre, comme seroit celle du Chilou, par laquelle on a distingué autrefois le Cardinal d'auec ses freres. Vous sçauiez que les armoiries des puisnez ont des brisures, & qu'ils ont quelque difference en leurs noms, pour euitter la confusion: lors que ie n'en vois point en celui que Popelinier appelle *Richelieu*, i'ay suiet de croire, que c'est le grand Pere du Cardinal, chef du nom & des armes.

Pag. 26.

La seconde faute de laquelle vous m'accusez, & sur laquelle vous faites des saillies extravagantes, est, que i'ay dit, *que Catherine de Medicis n'estoit point parente de la Roynie Mere du Roy.* Ie persiste encore en mon opinion, & ne veux point d'autre tesmoin que le Sieur Hay, qui demeure d'accord, que les deux branches de Medicis ont esté séparées par les Enfans de Laurens de Medicis l'ancien: en quoy il a failly, c'est

en ceux de Iean de Medicis , Pere de Cosme & de Laurens. S'il plaisoit au Sieur Hay , au lieu de se brusler le sang par la colere, de faire avec science l'arbre de cette genealogie , il trouuera qu'à la verité ces deux Roynes viennent d'une mesme souche ; mais que les rameaux sont si esloignez , qu'on a peu enter leurs reiettons l'un dans l'autre sans dispence du Pape , estans separez de neuf degrez. C'est ce que nous auons voulu dire , lors que nous auons asseuré qu'il n'y auoit point de parenté. Ce qui auoit donné suiet à ce discours, est , que dans le liure de la Defence du Roy & des ministres , & dans la Responce à la Remonstrance faite par cet impertinent Pere de Sancy, on iettoit des ordures sur la Royne Catherine, pour les faire rejallir sur la face de la Royne , que le vulgaire a tenu pour sa Niepce. Nous auons defendu la reputation de la Royne Mere des Valois contre les calomnies de ces impudens , qui l'ont decrite comme vne femme abandonnée de Dieu, encore qu'elle fust tres sage & tres vertueuse. Nous ne reiettons point cette grande Princeesse par mespris , au contraire nous la defendons contre le vostre ; mais nous ne voulons pas mentir pour acquerir vn honneur de proximité, qui n'est pas iusques au point que vous le voulez faire croire. Vostre mauuais dessein nous a obligez à dire , que si Catherine estoit coupable (dequoy on ne demeure pas d'accord) cela ne faisoit aucune mauuaise consequence contre Marie , puis qu'elles n'estoient point si proches Parentes comme

*Voyez
Scipion
Admiral, &
sur tous
François
Sansonin
au liure
de l'Origine des
Maisons
illustres
d'Italie.
La Maison de
Florence
vient de
Laurens
de Medicis frere
de Cosme
premier
celle
d'Urbain
vient de
Cosme.
Voyez
Elias
Reusne.
vne pag.
90.*

le peuple s'imaginoit. Le Sieur Hay en ses Observations nous fait sentir, que si le Cardinal eust offensé Catherine comme il a fait Marie, il n'en auroit pas eu si bon marché: c'est vne verité; mais il ne la dit pas, lors qu'il assure, que la Royne ne voit point nos escrits. C'est de Sa Maiesté que nous auons appris la genealogie de sa Maison: mais l'Escriuain du Cardinal merite d'estre puny comme vn meschant, lors qu'il

Pag. 26. escrit apres le Mariage du feu Roy, *que le plus grand honneur que la Maison de Medicis aye receu, est l'alliance de Catherine avec vn Duc d'Orleans, & que la Royne s'est preualuë d'une si grande gloire: apres auoir esté l'Espouse de Henry IV. & Mere de Louys XIII. il me semble, que ces qualitez ne peuuent receuoir vn plus grand lustre: il est vray aussi, que la Royne est de la race Ducale de Toscane, & petite Fille d'un Empereur, & & que Catherine n'a pas eu ces aduantages.*

La saillie du Sieur Hay ne s'arreste point là, mais il veut faire faire croire que nous auons offensé la Maison des grands Ducs, comme si par quelque mespris elle ne vouloit point aduoüer la Royne Catherine pour sa parente; ce qui ne fust iamais nostre intention. Nous voulons dire la verité de toutes choses, pour detromper les ignorans, & faire cognoistre aux malins Escriuains du Cardinal, que les vices qu'ils imposent à Catherine de Medicis ne peuuent apporter aucun blasme ny soupçon à la Royne Mere du Roy. Voila pour ce chef.

Pag. 27. Venons à la troisiéme faute que vous trouuez dās mes escrits, & que vous dites estre de gran-

de conſequence. Le Sieur des Montagnes a comparé la Royne Mere du Roy à Conſtance femme du Roy Robert, pour monſtrer que Sa Maieſté aymoît plus Monſieur que le Roy, comme cette Royne auoit voulu faire regner ſon cadet Robert au preiudice de ſon aiſné Henry. I'ay reſpondu (ſans auoir eſgard à voſtre meſchante & abominable application, qui tend à faire perir Monſieur) que voſtre Hiſtoire eſtoit fauſſe. I'ay dit, que Aymon, c'eſt à dire la ſuite de l'Hiſtoire ſous ce nom, Paradin, du Haillan, Gaguin, * Paule Ioue, & i'adiouſte Paule Æmile, aſſeuroient, que Robert eſtoit l'aiſné de Henry, & que la Mere ſuiuoit la loy de la nature & du Royaume. Vous me gourmandez fort là deſſus, & me citez Glaber Moine, Helgaudus, le Fragment de l'Hiſtoire depuis Robert iuſques à Philippe, & Ordericus Vitalis Moine de ſaint Euroult. Vous dites, que Baronius a ſuiuy cette opinion : il eſt vray, que ce grand Cardinal s'eſt attaché à celle de Glaber, qu'il a rapporté en meſmes paroles. Vous iniuriez tous mes Autheurs, ne me pouuant conuaincre de les auoir corrompus : vous dites que Gaguin eſt vn badin, parcé qu'il a mal parlé de l'auarice du Cardinal d'Amiens, qui a quelque rapport avec celle du Cardinal de Richelieu. Vous adiouſtez, que du Haillan eſt vn ignorant, Paradin vn homme paſſionné pour la Bourgongne, à laquelle il a voulu donner les aiſnez de France : vous en faites vne affaire d'Eſtat, encôre que cette Maiſon de Robert ſoit

* Paulus
Iouus:
Successe
Roberto
Henricus
Filius,
quem ille
moriens
heredem
nunciu-
parat, ut
nonnulli
ſcribunt,
minorem
filium.
Paulus
Æmilius
de Geſtis
Franco-
rum:
Successe
Roberto
Henri-
cus, ut
nonnulli
ſcribunt,
minor fi-
lius; huius
conſilio
mater ob-
ſtabat.

a Glaber esteinte, & que la Bourgogne soit retombée
lib. 3. c. 2. dans la Maison Royale en la posterité des Va-
Nomine lois: mais vous ne dites rien contre Paule Ioue
W animo & Paule Æmile, qui sont de mon aduis. Vous
Constan- prenez la licence de vous mocquer de Gaguin,
ia in ly- que vous appelez par derision *Frere Gaguin au-*
ta Regi- *theur de fables*: vous en trouuerez d'auantage, &
na. Hel- de plus ridicules dans vos quatre Autheurs,
gaudus Glaber, Helgaudus; Ordericus; & celui qui a
ex alio: dressé le Fragment de l'Histoire: vous qui estes
Constans plus malin que beste; ne croyez pas la centies-
Et sortis me partie de ce qu'ils escriuent; principale-
quem non ment Ordericus, qui a fait vn pot pourry estran-
Constan- ge. Deux de vos tesmoins ne disent rien du des-
ta iudis. sein de Constance; mais en nommant les Enfans
Au flor de Robert; ils mettent Henry deuant Robert;
Fragment parce qu'il estoit Roy. *a* Ces bonnes gens sont
ii: Con- fort inconstans en parlant de Constance: ils la
stantia loüent tantost comme la meilleure & plus sage
cognomē. Princessse du monde; & la blasment apres com-
to Candi- me la plus malicieuse, & la plus fole. Vous n'a-
da, sire- uiez garde d'extraire ce qui est dans le Frag-
nua sanē ment de l'Histoire de Robert; & la responce
puela, que luy fit le Moine de Dijon. *b* Si à present vn
Et suo Religieux en auoit dit autant en France, il se-
nomine roit mis à la Bastille. Pardonnez au compo-
digna. siteur, qui a mis Hilduinus au lieu d'Helgaudus;
b Ex Fra- & ne m'accusez pas, car i'en estois esloigné de
gmento dix lieues. En fin toute nostre question consiste
Histōrie *Robertii:* *Memi-*
nisse con- *uenit, ô*
Rex, in- *iuriarum*
patri & matri illarum in tua iuuentute, quoniam tibi talia iussu Dei in-
dicio permittente à filiis ingeruntur. Glaber vero de Hugone: Patri &
matri seruis obediētiōr, ideo in regnum adscitus.

en vne hiſtoire, que vous auez apporté pour ruiner dans l'eſprit du Roy la Royne ſa Mere & Monſieur. Encore que le crime de Conſtance ne rendroit pas Marie criminelle, ie ſouſtiens que i'ay plus d'Autheur pour mon aduiſ, que vous n'en auez pour le voſtre: ie vois bien que vous auez deſſein d'eſtre tyrans des opinions, comme vous l'eſtes des perſonnes. Mais quelle imprudence eſt-ce d'auoir cité Ordericus Vitalis au liure troiſième de ſon Hiſtoire Eccleſiaſtique, là où il n'eſcrit rien de ce que vous dites, & fait vn grand ſaut depuis Louys d'Oultremer iuſques à la dixneuſième année de Henry premier, ſans auoir nommé ny Robert, ny Conſtance, ny leurs Enfans: le liure eſt imprimé à Paris l'an mille ſix cens' dixneuf, & eſt inſeré dans le volume des Autheurs de l'Hiſtoire des Nortmans. I'eſpere que les hommes de lettres qui liront cet eſcrit, ſeront ſoigneux de verifier voſtre impoſture, & demeureront d'accord, que i'ay eu pour mon opinion des meilleurs Autheurs, & en plus grand nombre que vous, qui n'auiez qu'un Moine Glaber; c'eſt à dire vn tondu & vn pelé.

*Glaber,
c'eſt à dire
pelé.*

Je viens à vne cruelle atteinte que vous me donnez; vous dites, que ie ne porte point le reſpect que ie dois à la pourpre ſacrée des Cardinaux, & que i'ay dit des choſes au deſauantage des Cardinaux Ximenes, d'York, Clezel, d'Amiens, & d'Amboiſe. Je n'ay rien à vous dire, ſi ce n'eſt que Cleonuille faiſant comparaifon des deux premiers, les à traitez com-

*Pag. 36.
Conſre
Ximenes,
voyez la
pag. 35.
conſre le
Cardinal
Voſſen
pag. 43.*

me des insolens, pour faire passer le Cardinal de Richelieu pour modeste. Pour le Cardinal d'Amiens vous en escriuez fort indignement en la page 274. dans le Coup d'Estat. Vous appelez le Cardinal d'Amboise ignorant en la page 173. en la page 174. vous le descriuez comme vn fourbe: en la page 274. vous dites, que luy & le Cardinal d'York ont esté traïstres à leurs Maistres; pour tascher d'estre Papes. Je ne dis rien de ce qu'on peut tirer de la vie & du testament du Cardinal d'Amboise; que vous avez fait imprimer & inserer dans vostre volume; pour faire voir ses defauts; & monstrier que le Cardinal de Richelieu est plus fidelle & plus sage ministre que luy: Je m'assure, que le sacré College ne se plaindra point de ma plume; & ne se picquera pas de ce qu'il y a eu autrefois des Cardinaux qui ont eu quelques defauts. Les Papes en ont fait chastier plusieurs; & personne ne s'estonnera; de ce que dans vn grand nombre des Princes de l'Eglise; qui ont representé les septante deux Disciples durant plusieurs siecles; il y en aye eu vn petit nombre d'imparfaits, puis qu'entre les douze Apostres nous en voyons vn traïstre. I'ay cet aduantage par dessus vous; que vous blasmez tous les Cardinaux vertueux; morts & viuans, pour esleuer le Cardinal de Richelieu par dessus eux; & i'excuse tous ceux qui ont eu quelques manquemens; en faisant voir qu'ils n'approchent point de ceux du Cardinal de Richelieu. Il a cette obligation à sa dignité, ou au respect que ie luy porte, que
ien'ay

ie n'ay point voulu toucher les vices de sa personne, ny escrire des choses estranges de ses mœurs, n'ayant esté retenu que par l'honneur que ie rends à sa robe. Je vous diray en passant, que vous devez blasmer Ferriere, qui a escrit en la page 92. *Le siecle, où nous sommes, est l'esgout des siecles passez, encore qu'il aye porté ce grand Cardinal, qui l'a rendu si florissant, si riche & si paisible, que nostre siecle en doit estre bien glorieux, & se preserer à tous les autres.*

Pour monstrier que vostre malice ne s'arreste point là, vous dites, que i'ay presché à Paris contre l'autorité du saint Siege, & que i'ay dit, *que les abus de la Cour de Rome auoient besoin de la reformation d'un Concile.* Si i'ay fait cette quippée, ç'a esté en bonne compagnie, & vous ne manquerez pas de tesmoins pour me conuaincre; mais ie suis asseuré, que vous n'en trouuerez point de gens de bien. I'ay fait deux milles predications dans Paris avec quelque reputation: ie n'ay iamais esté repris par mes Superieurs, ny aduertty par mes amis, d'auoir failli en mes discours publics. Vous faites vn grand tort à trois Prelats, qui ont esté de mon temps les Pasteurs de la ville capitale du Royaume; ils meritent d'estre blasmez, s'ils ont dormy lors que i'ay semé vne mauuaise doctrine: vous deshonnez ces sçauans Curez de Paroisses, s'ils ont dissimulé mon peché; vous blasmez tous les zelez Catholiques de Paris s'ils n'ont point murmuré lors que ie les ay scandalisez. Vous sçanez au contraire, que i'ay esté fort re-

cherché, & que le dernier Carefme de quinze que j'ay presché, j'ay esté plus fuiui & estimé que le premier. Mais qui estes vous, qui me voulez rendre odieux à sa Sainteté? vous estes mon ennemi juré, & vn impie, qui faites profession de libertinage; qui vous mocquez des choses saintes, & les reduisez en chansons. Vous avez fait imprimer dans vostre gros liure des blasphemmes contre les Papes en la page 106. des raillees contre le Concile de Trente en la page 233. contre les Religieux en la page 105. 127. & en la page 245. où vous parlez ainsi; *Il est de mestier de Moÿne*. En fin, rien ne vous est saint & sacré que cet incomparable Cardinal, ce flambeau du monde, qui donne & oste la lumiere à tous les Astres du Ciel, mesmes au Soleil de Rome. Je ne veux point salir mon papier, en y estendant les ordures que vous avez respandu dans tout le vostre: ie me contente de vous menacer, que si vous me donnez la peine d'en faire les extraicts, ie soufleueray toute la terre contre vous; qu'il vous suffise que la plus grande partie des Autheurs de vostre rapsodie sont des personnes sans religion; ie n'en veux point d'argument plus euident, que de les voir combattre la Vertu, & la Verité, pour soustenir la tyrannie, qui se fait sentir aux plus insensibles,

Pag. 44.

Vous dites, que par les saints Decrets les Escriuains des libelles diffamatoires sont excommuniez: vous estes de ce nombre, avec tous ceux qui ont fuiuy vostre exemple. Les responces sont permises, les faux tesmoins sont chassez de

l'Eglise ; & ceux qui les reprochent pour sauuer leur honneur, y sont non seulement receus, mais protegez, & fort estimez.

Vous dites, que le Cardinal fist bien de prendre la charge de Secretaire d'Estat durant le credit de la Mareschale d'Ancre, qui la luy fist donner : vous m'accusez de malice pour l'auoir trouué mauuais, & au dessous de la dignité Episcopale. Je sçay qu'en ce temps là les Euesques en firent plainte au Cardinal, & sur tout de ce qu'il auoit demandé le departement de la guerre ; qui ne s'accordoit pas avec sa profession. Vous escriuez, *qu'il ne contribua rien à cette election que sa vertu & son obeysance.* Faites ces comptes aux aueugles des Quinze vingts, qui sont voisins de M. le Cardinal ; nous sçauons les pratiques qu'il fist avec Barbin, & les promesses de luy donner en mariage sa sœur. Mais vous estes plaissant, lors que vous nous reprenez d'auoir dit, *que le Cardinal prist la charge de M. de Villeroy* ; s'il estoit hors de la Cour deuant ce temps, cela ne faisoit pas qu'on ne dit, que la charge estoit à M. de Villeroy. Encore qu'elle eust passé cinq ou six mois par d'autres mains, on la consideroit tousiours cōme sienne, n'ayant point esté destitué pour crime ny esloigné avec recompense. Ce qui confirme mon discours, est, que Monsieur de Villeroy fut remis en sa place le iour que le Cardinal en fust chassé.

Vous dites, que le Pape Paul V. n'a iamais dit, *que le Cardinal de Richelieu seroit vn grand fourbe* : cependant il n'y a rien de plus veritable. Vous

En la
lettre
deschi-
frée.

aduouiez en la page 22. qu'il demanda dispense pour estre sacré Euesque deuant l'aage : mais nous sommes asseurez, qu'apres auoir dit qu'il auoit l'aage, il demanda l'absolution; & sur ce rencontre le Pape dit, que si l'Euesque de Luçon viuoit, il seroit vn grand fourbe. Vous estes si iniuste, que pour oster la fourberie au Cardinal, vous rauissez l'esprit de Prophetie au sainct Siege; & asseurez, *que les Papes ne sont point Prophetes*, parce que le Cardinal de Richelieu est fort sincere. Certes ie doute, si vostre argument est plus impie que ridicule.

Pag. 56. Vous faites vne furieuse insulte sur la reputation du Marquis de la Vieuille. Je vois bien que tant de traiçts de vostre plume viennent de ce que sans doute la sienne vous donna quelque traiçt, lors qu'il auoit la surintendance des Finances, & que vous croyez auoir meritè des grandes recompenses, pour auoir entrepris de faire le procez au Chancelier de Sillery, & à M. de Py sieux, vos bons amis deuant leur disgrâce. Nous serions estimez des censeurs trop rigoureux, si nous monstrions que vous auez menti en tout; & nous paroistrions trop amis de nous mesmes, si nous asseurions, que nous n'auons iamais failli. Dieu dit que le long discours ne sera pas sans faute. Ecrire beaucoup n'en doit point estre exempt: nous en confessons vne qui se trouuera seule dans la premiere de nos pieces, & qui est corrigée en trois. Il est vray, que nous auons escrit dans la Remonstrance, que la Royne pria le Roy d'esloigner le Cardinal de Richelieu. le

dressay cet escrit pour employer le loisir que son Eminence me donnoit, lors que ie fus contraint de me cacher pour fuir ses iniastes poursuites: cela arriua environ trois semaines deuant que la Royne sortit de Compiègne. Je n'auois point encore consulté cet oracle, & i'estois demeuré dans l'opinion commune, que la Royne auoit prié le Roy de faire retirer de la Cour le Cardinal. Ayant sceu du depuis de la bouche de S. M. qu'elle n'auoit parlé que de luy oster la surintendance de sa Maison, avec protestation qu'elle le verroit dans le Conseil du Roy & ailleurs, si le bien des affaires de S.M. le requeroit, i'ay corrigé mon premier discours. C'est vne grande merueille, que Dieu aye permis que i'aye failli en vne chose qui est auantageuse au Cardinal. Je confesse, que si ie merite d'estre gourmandé, c'est pour auoir deschargé sa reputation. N'est-il pas vray, que si la Royne eust voulu perdre le Cardinal aupres du Roy, il auroit esté moins criminel de s'estre opposé à la volonté de sa Maistresse, encore qu'il seroit tousiours coupable d'auoir ruiné sa Bienfaictrice, pour se maintenir dans la puissance? mais s'il oste à la Royne les bonnes graces du Roy, sa liberté & ses biens; s'il la tient esloignée, & la calomnie, parce qu'elle n'a plus eu son seruice agreable en ses affaires domestiques, qui doute que son crime ne soit plus execrable? Vous voyez par là, sieur Hay, qu'en la Remonstrance i'ay deschargé le Cardinal. Mais puis que ie suis si malheureux, qu'en luy voulant faire ce bon offi-

ce, vous me reprenez avec aigreur ; ie vous prie de croire que ie ne feray plus cette faute , & ie vous remercie du bon aduis que vous m'avez donné, de prendre garde à ne rien dire qui puisse excuser les pechez du Cardinal. Pour vous recompenser en quelque façon, ie vous aduertis charitablement, que vous avez escrit, *qu'Abisay vouloit tuer Saul pour vanger David*: vous vous estes mespris iourdemment, & avez pris Saul pour Semai, qui maudissoit son Roy, lors que son fils Absalon le poursuivoit : cette besueuë est sans comparaison bien plus grande que la mienne, car elle est contre la parole de Dieu : vous en avez ouy dire quelque chose, mais vous ne l'avez iamais leuë. Ie me plains avec raison, de ce que vous trouuez mauuais que ie la cite, puis que c'est ma profession ; & que ie la sçay mieux, que vous ne sçavez le Soldat François, & l'Auant-victorieux.

2. Reg.
ca. 16.
Pag. 86.

Vous estes scandalisé de ce que nous appel-
lons le Cardinal ingrat : vous dites, *que l'vnique reproche de cette mesconnoissance est insupportable à son esprit*, combien le deuroit estre d'auantage le crime ? il apprehende d'estre appellé ingrat, & n'a point de peur de l'estre : c'est vne folie de craindre plustost les noms que les choses. En vain cacherions nous ce que toute la terre voit : les biens que la Royne a fait à son Eminence sont publics, comme le mauuais traitement que S. M. en reçoit : Monsieur le Cardinal deuroit effacer cette tache, au lieu de se plaindre de la qualité qu'elle merite.

Pag. 83.

Sur la fin de voſtre Preface, vous teſmoignez voſtre zele pour la conſernation de la vie du Cardinal, qui ne ſe fie paſ tant à ſes gardes, qu'il ne craigne quelque coup d'un deſeſperé. Vous appelez le Pere de Chantelouue *general des aſſaſins*, *Pag. 88.* & le chargez d'iniures horribles: on vous a fait *93 & 97* voir dans vn autre eſcrit, que les accusations ſur leſquelles vous fondez ces beaux tiltres, ſont des inuentions de voſtre eſprit malin: vous deuriiez auoir honte de les donner à vn homme de ſa condition, ſans autres preuues que celles que vous auez produit. Vous dites, que i'ay pouſſé les eſprits foibles, pour les faire attenter à la perſonne du Cardinal, encore que dans tous mes eſcrits ie de- *Pag. 97.* teſte ſemblables entrepriſes, & que i'aye ſupplié le Roy de faire reparer l'iniure qui eſt faite à ſa Naiſſance par des voyes douces & honorables. Vous ne *En la* laiſſez pas de dire, que le Sieur de ſaint Germain *Remon-* en la Paraphraſe qu'il a fait ſur le Pſeume 123. *ſtance:* pour conſoler les aſſtizez par la malice des hommes, leur dit ſur ce verſet, *Le lacer a eſlé rompu, & nous auons eſté deliurez, que les inſtrumens de cette deliurance & des iugemens de Dieu ſont bien ſouuent les plus che- rifs hommes de la terre.* Pour teſmoigner voſtre zele, vous criez là deſſus *au meurtrier, au parricide.* Certes vous auez tort; ces paroles ne diſent que ce qu'un ſage payen a dit, *qu'il n'y a point de grands qui ne ſoient en danger d'eſtre deſfaits par les plus petits,* & la parole de Dieu aſſeure, *qu'il a choiſi les choſes foibles pour cōfondre les fortes.* Pourquoy donc dites vous, que celui qui n'eſcrit ſur ce Pſeume que ſelon le ſens litteral, a renuerſé l'Eſcriture ſain-

te? pourquoy vous estendez-vous au long sur cette profanation , & vous iettez dans vn lieu commun des Peres de l'Eglise que vous n'avez jamais leus, & des apparitiōs que vous ne croyez pas? Pourquoy appelez-vous *blasphemateur, heretique, apostat, & homme problematique en la Religion*, celuy qui vous enuoye vn liure estimé tres pieux, approuué par les Docteurs, & qui console ceux que vous avez affligé? Quelques seruiteurs de la Royne prisonniers dans la Bastille ont esté priuez assez long temps des Sacremens de l'Eglise & de la sainte Messe: pourquoy trouuez-vous estrange qu'on tire leur soulagement de la parole de Dieu? voulez-vous empescher qu'on ne lise le Pseaume 123. à cause qu'il depeint les violences du Cardinal; comme vous avez defendu de prescher l'honneur qui est deu aux peres & meres, parce que cet *in illo tempore* n'est pas l'Euangile *in hoc tempore*? Vous appelez à vostre secours contre moy tantost l'Euesque de Bruxelles, que vous ne cognoissez pas, tantost le Pere Suffren; & vous osez-vous adresser à la Royne, pour la prier de faire chastier vn homme qui defend S. M. & console ses bons seruiteurs. Qui estes vous qui nous descrivez, & qui demandez iustice contre nous à la Princesse que nous seruons? vous estes le ministre de la tyrannie qu'on exerce contre Sa Majesté & contre nous: vous estes le Commissaire corrompu, qui par vostre meschante industrie faites trouuer criminels les seruiteurs de S. M. vous estes l'Escriuain, qui sans estre

pronoqué l'avez iniuriée à trois reprises, & qui nous diffamez pour ſon ſuiet. Nous la defendons, & vous reiettons comme faux teſmoin: vous preſſez ceux que nous ſeruons, de couper la gorge à leurs chiens, qui vous deſcourent comme voleurs des biens, de la liberté & de l'honneur de leur Maieſteſſe. On vous cognoiſt trop pour vous croire; & on nous cognoiſt aſſez, non ſeulement pour ne nous faire point le mal que vous deſirez, mais pour nous proteger, eſtiimer & recompénſer.

Vous dites, qu'on *deuroit exercer ſur nous les ſeu-
ueritez de l'inquiſition*. Si vous auez leu le Dire-
ctoire, vous y trouueriez la condamnation du
Cardinal, comme fauteur des Heretiques: & ſi
vous eſtiez en lieu où l'inquiſition fuſt eſtablie,
vous auriez porté il y a long temps le Sanbenit,
pour eſtre vn impie & libertin en vos paroles;
ce que vous teſmoignez en toutes les tables deli-
cates de la Cour, que vous auez touſiours fort
recherché. Vous auez eſté vn pillier de celle du
Preſident le Coigneux, contre lequel vous faites
reimprimer mille ordures, pour le recompénſer
de la bonne chere qu'il vous a fait, & de la belle
femme qu'il vous a donné. Vous auez compoſé
des proſes à l'ancienne mode de l'Egliſe de Pa-
ris, & les auez remplies de blaſphemes: quand
vous n'aurez point commis d'autre crime, que
d'auoir flatté, animé & defendu celui qui eſt la
cauſe de la ruine de vingt mille Eglifes, & qui
auroit aboly l'exercice public de la Religion en
Europe, ſi ſes deſſeins eu ſſent reuſſi, vous meri-

Pag. 62.

tez d'estre bruslé. Sortons de ces horreurs, & disons, que ie n'ay iamais veu Commis de Secretaire d'Estat ou de Financier qui cache mieux que vous augmentet le cayer de fraix, ny Aduocat qui face plus de roles dans ses escritures. Vous estes allé ramasser vne vingtaine de petits liurets ou fucilles volantes, que les Allemans nous enuoyèrent en Latin l'an mille six cens vingt cinq & mille six cens vingt six, vous escrimez contre des personnes mortes, & contre leurs liurets qui ne se trouuent plus. Ce que vous faites, est pour paroistre bien zelé, pour enfiar vostre Preface, & pour dire, qu'il n'y a pas vn ennemy de la belle reputation du Cardinal, que vous n'ayez defait à platte cousture. Vous luy dites, que personne ne l'a tait deuant vous; encore que le Theologien sans passion & l'Autheur du Catholique d'Estat y eussent trauaillé, sans imprimer en grosse lettre les blasphemes, que vous publiez en François, afin que le peuple les voye, donne son iugement là dessus: lequel sera sans doute, qu'au commencement du credit de Monsieur le Cardinal plusieurs personnes prophetiserent ce que nous auons veu du depuis. mais leurs predictions ont esté celles de Cassandre, qui n'estoient point entenduës qu'apres leur accomplissement.

Pag. 77.
78.79.

Vous concluez vostre ouurage par des loüanges les plus puantes que puisse inuenter vn parasite, lors qu'il est contraint de faire seruir son esprit à son ventre: vous en auiez mis beaucoup dans tout le corps de vostre discours, mais vous

auiez conserué les plus impudentes pour la conclusion, afin qu'elles laissent en belle humeur celui que vous flattez. Vous luy attribuez la gloire de tout ce qui a esté fait par la puissance & generosité du Roy: vous faites passer au Cardinal tous ses ennemis, & mettez sous ses pieds les quatre grandes nations de l'Europe. Vous l'appellez *homme extraordinaire*; & vous avez rencontré: car iamais personne n'a fait des choses si extraordinaires; c'est à dire, hors de toute sorte d'ordre & de raison.

Pa. 101.
102. 103.

Je ne veux pas estre si long & si ennuyant comme vous: ie n'ay pas tant de temps ny de papier à perdre: ceux que ie sers, ne se soucient pas que ie leur apporte vn gros liure. La ligne droite est la plus courte de toutes les lignes, & le discours de verité le plus court de tous les discours: ie finis le mien par vn remerciement que ie vous dois des bons offices, que vous nous rendez aupres de Mr le Cardinal. Pour vous faire voir que i'escriis serieusement, ie vous diray, qu'il n'y a que deux moyens pour ruiner vne puissance tyrannique; celui de la force, & celui de la flatterie. Nous ne voulons pas employer le premier, & vous nous prestez le second. Le Cardinal a trois ou quatre sortes de gardes contre la violence particuliere, il a trente places fortes avec quinze ou seize mille hommes contre la publique, & mesmes contre la iustice du Roy. Il n'est pas aisé de le ruiner par la puissance; & il est certain qu'il perira par sa folie: c'est à quoy vous travaillez plus ardemment qu'homme que ie con-

noisse, lors que vous le battez en ruine avec la flatterie, qui produit quatre grands effects pour nous. Le premier est, que non seulement vous le rendez obstiné dans le mal qui le perdra; mais vous l'eschauffez, c'est à dire, vous le faites aller plus viste à sa fin. Lors qu'il fait des choses pour lesquelles il ne craint point d'estre blasmé, & espere d'estre estimé, il passe de l'orgueil à la presumption, & de la presumption à l'arrogance, qui prouoque l'ire de Dieu, & auance sa punition. En second lieu, vous le rendez odieux au Roy, qui a vn esprit excellent & assez desfiant. Vous croyez que vous avez fermé toutes les portes à la Verité; mais celles des yeux clair voyans de ce grand Prince demeurent tousiours ouuertes, pour voir que vous luy desrobez sa gloire, & que vous la donnez ou vendez à son Conseiller. En troisiéme lieu, vous attirez sur le Cardinal la haine & l'enuie de toute la terre: celle là en blasmant tous les Princes & grands pour le louer tout seul; celle-cy en rauissant à beaucoup de gens de bien l'honneur des bonnes actions qu'ils ont fait pour le seruice du Roy. En quatriéme lieu, vous trahissez le Cardinal en ce que dans vos panegyriques vous meslez des calomnies contre la Royne Mere du Roy, & contre tous ceux qui se sont opposez au credit de son Eminence: par ce moyen vous nous obligez à obeyr à Dieu, qui veut que chacun defende sa reputation, & que le bon seruiteur se rende témoin de l'innocence de son Maistre. Si elle ne se peut soustenir sans faire voir la malice de ceux

qui l'accusent, la conscience veut qu'on la descouure; & la parole de Dieu ordonne, qu'on reprenne en public celuy qui peche publiquement. Nous appellons toute la terre pour iuger, si nous auons tort de nous defendre; & si vous auez raison de mesurer les choses de ce monde plustost par la puissance du Cardinal, & par l'opinion du vulgaire, que par la Naissance, le Mariage & autres qualitez de la Royne, sur tout par les loix, qui ne souffrent pas que les forts deshonorent les foibles, pour lesquels la Iustice est establie dans le monde. Deux choses vous ont tousiours trompé: vous auez donné à la prudence du Cardinal les bons succez de la fortune, encore qu'elle fauorise plus souuent les temeraires que les sages, & se mette plustost du costé des meschans que des gens de bien. Les crimes impetueux se font admirer au commencement; la retenuë de la prudence n'est recogneuë qu'à la fin. Les inuentions, les resolutions & dispositions des conseils sont en nostre puissance; les euenemens dependent pour l'ordinaire du rencontre. La seconde illusion de vostre imagination blessée, est, que vous regardez comme des monstres les blasmes qu'on donne à vne personne que vous ne voyez iamais que dans les prosperitez: au contraire vous croyez, que de mespriser & iniurier ceux qui sont dans l'affliction, soit vne chose bien naturelle. Il est vray, que le sage n'aigrira iamais de gayeté de cœur celuy qui luy peut faire du mal; mais le genereux desmentira celuy qui le diffame. La ciuilité enseigne d'em-

ployer sa defence avec respect enuers ceux à lesquels on le doit ; mais on n'est point obligé de le garder avec tant de rigueur, lors qu'on respond pour son Supérieur à vn inférieur. C'est aussi en vous vne lascheté plus que barbare, d'injurier ceux que vous avez rendus misérables ; & l'ingratitude est à son dernier point, lors qu'on veut accabler de calomnies ceux qui ont comblé de bienfaits. Nous vous prions de n'envoyer plus des mesdisances à la Royné Mere du Roy & à ses bons seruiteurs ; & ie vous promets que vous n'aurez plus de repartie. Si vous continuez, nous repliquerons tousiours aux despens de la réputation de celuy qui vous emploie ; & obeyrons à Dieu, qui veut, que si vne beste furieuse blesse quelqu'un ; apres l'aduis qu'on a donné à son maistre, on s'adresse à luy pour luy faire payer le dommage. Louëz Monsieur le Cardinal sans nous offenser ; nous voudrions par charité, que vous luy eussiez persuadé qu'il est heureux, que vos chansons eussent enchanté les maux de son corps & de son esprit, pourueu que Dieu l'eust conuertty. Cela ne pourroit estre sans faire sentir à toute la Chrestienté ; & à nous particulièrement, les effects de ce changement : s'il arriue, nous louerons sa penitence avec plus d'industrie, que vous n'apportez de finesse pour desguiser & flatter son peché. Ie vous prie de l'aduertir, que s'il veut escouter la Verité en particulier, il ne l'entendra plus publiquement ; & s'il peut rencontrer vn bon amy qui luy parle à l'oreille, ceux qu'il tient pour

ses ennemis , ne crieront pas contre luy . Je des-
sire aussi qu'il sçache , que la plus grande de mes
passions est, qu'il m'oblige par ses bonnes actions
non seulement à me taire, mais à l'estimer . ie le
fay , lors que ma conscience me le pourra per-
mettre.



A D V I S

DE CE QVI S'EST PASSE,

SVR LE SVIET

D'VNE LETTRE PRESENTEE

AV ROY

TRES-CHRESTIEN

DE LA PART DE LA

ROYNE MERE

DE SA MAIESTE.

THE
LIBRARY OF THE
MUSEUM OF NATURAL HISTORY
NEW YORK

1875
JAN 15 1875
RECEIVED
FROM THE
LIBRARY OF THE
MUSEUM OF NATURAL HISTORY
NEW YORK



A Royne Mere du Roy, en son heureuse Regence, auoit par vn double Mariage establi vne bonne vnion entre les deux Couronnes. S. M. a maintenu cette intelligence par ses sages conseils, lors qu'elle a esté au pres du Roy son Fils, & a destourné prudemment tout ce qui estoit capable d'alterer le repos de la Chrestienté. La Royne, comme bonne Mere, detestoit les guerres qui pouuoient mettre en quelque danger la personne du Roy; & comme fidele Conseillere elle apprehendoit la desolation de la France, & les euenemens des armes, qui sont tousiours incertains. Ceux qui pensoient tirer quelque profit des confusions, ou quelque vanité d'auoir ruiné ou affoibli les voisins, ont recognu, qu'il n'y auoit rien si contraire à leurs desseins pernicioeux, que l'amour d'une Mere, qui vouloit conseruer la paix entre ses Enfans, & trouuer son repos dans celuy de la France. Ils ont contraint, apres beaucoup de violences, cette grande Princeesse de sortir du Royaume, dans lequel il ne restoit personne qui peut avec quelque auctorité s'opposer à leurs conseils & entreprises. Nous auons veu, que depuis cette sortie ils ont sous le nom & par les armes & Finances du Roy attaqué l'Empire, despoüillé le Duc de Lorraine, jetté vne armée dans les Pays-bas. En fin ils ont déclaré la guerre au Roy Catholique, lors que les affaires d'Allema

710 *Aduis sur vne lettre présentée au Roy*
gae obligeoient vn Conseil qui eust esté sage &
fidele, à chercher plustost des moyens de paix,
qu'à esmouuoir des nouuelles guerres. Ils de-
uoient sur tout esuiter de rompre ouuerte-
ment avec vn puissant Prince, qui a ses Estats
qui enuironnent la France, & desquels elle tire
par le commerce la plus grande partie de ses
Finances.

La Roynes ayant esté contrainte l'Este passé
de se retirer en vn lieu de seureté deuant les ar-
mes de son Fils, a tousiours creu, que ce scan-
dale auoit esté couuert ou desguisé au Roy, aussi
bien que la longue maladie, que ce changement
& les déplaisirs ont causé à cette bonne Princef-
se. Elle n'a songé qu'à esteindre le feu qu'on al-
lumoit dans la France, & à faire tous les efforts
pour tesmoigner au Roy son bon naturel, & au
Royaume son ancienne affection.

S. M. estoit priuée du moyen de faire co-
gnoistre au Roy son Fils les dangers dans les-
quels on iettoit sa personne, sa reputation & son
peuple, en commençant vne guerre qui n'estoit
point d'Estat, mais de passion. L'apprehension
que le Cardinal de Richelieu a de la tendresse
du Roy, & des conseils fideles de la Roynes,
auoit fermé la porte, non seulement aux
bons aduis de S. M. mais à toute sorte de com-
plimens de l'amour maternel. L'affection na-
turelle, qui ne peut estre grande sans estre in-
dustrieuse, recherchoit toute sorte de moyens,
pour faire cognoistre au Roy qu'elle n'estoit
point diminuée, ny par l'esloignement de cinq
années, ny par toutes les affaires passées, que la

Royne n'attribuë qu'au mauuais conseil du Cardinal de Richelieu. Elle s'aduifa, que dans les occasions qui se presentoient, il n'y auoit point d'expedient que de s'adresser à Sa Sainteté, pour faire voir au Roy la sincerité des intentions d'une bonne Mere, & luy offrir les assistances qu'elle luy pouuoit donner.

La Royne estoit informée, que le saint Pere vouloit interposer son auctorité pour restablir la paix en la Chrestienté, par la reconciliation de deux puissans Roys, & Beaux-freres. S. M. croyoit que les qualitez de Mere & de Belle-Mere la deuoient porter à s'offrir au Lieutenant de I E S V S C H R I S T Prince de paix, & à contribuer tout son pouuoir pour la procurer à ses Enfans. Elle escriuit au saint Pere, & le pria de tenir la main à ce bon œuvre digne de luy : S. M. fit aussi offre de son entremise, pour seconder les desirs dignes du Pere commun des Chrestiens.

La lettre de la Royne ne faisoit mention d'autre chose, & ne touchoit ny pres ny loing le Cardinal de Richelieu: la prudence de S. M. auoit iugé qu'il ne falloit point irriter celuy qui estoit capable, par les despits qui luy sont assez ordinaires, de porter les choses aux extremitez. La Royne ne se plaignoit point des mauuais traitemens qu'elle auoit receu: sa patience, qui pouuoit estre lassée apres vn rude exercice de six années, ne s'adressoit point à Sa Sainteté, pour luy demander iustice contre vn Cardinal; ny pour le prier de s'employer enuers vn Fils, afin qu'il entendit les plaintes de

sa Mere , luy donna la liberté de le voir , luy rendit son bien , & fist reparer les iniures qui estoient faites à sa Naissance. Les propositions que la Royne faisoit, n'estoient que pour la paix vniuerselle , sans toucher à ses interets particuliers , & sans tesmoigner aucune passion contre l'aucteur de ses desplaisirs ; au contraire , dans la lettre que S. M. escriuoit à Mr. Mazarini, Nonce extraordinaire de Sa Sainteté en France, elle vsoit de ces termes : *Qu'elle croyoit que les principaux Ministres du Roy luy conseilleroient les choses iustes pour venir à vne bonne paix.* Les moyens que la Royne prenoit pour l'acheminer , pour faire cognoistre son bon zele à la Chrestienté , son amour au Roy , & son affe-

Le Cardinal auoit fait des- fendre à la Royne de la bou- che du Roy de luy en- uoyer per- sonne de sa part.

ction à la France , estoient les seuls , que la rigueur des deffenses que le Cardinal auoit fait faire à S. M. & la rupture entre les Couronnes, luy permettoient de choisir , à sçauoir d'escrire au saint Pere , & de le supplier de commander à Mr. Mazarini de donnet sa lettre au Roy : dans laquelle la Royne sa Mere luy representoit les mal- heurs qu'une longue guerre pouuoit produire , & luy offroit ses soins , pour moyenner vne paix qu'elle luy conseilloit.

Afin que chacun puisse iuger des intentions de la Royne , & recognoistre combien ses senti- mens estoient esloignez de ceux que le Cardinal de Richelieu a donné au Roy , nous auons voulu publier à la fin de ce Discours les lettres de la Royne , les Brefs que Sa Sainteté luy res- crit , & la response de Mr. Mazarini , qui con- tient celle du Roy.

Le Cardinal de Richelieu, ayant eu communication de la lettre de la Royne par la copie qui auoit esté enuoyée à Mr. Mazarini, luy donna des interpretations telles, que sa passion & son mauuais dessein de ruiner la France luy pouuoient suggerer. Ayant eu le loisir de preuenir le Roy, son artifice fut si puissant, que S. M. au lieu d'escrire à la Royne sa Mere, pour la remercier de sa bonne volonté & conseils salutaires, se resolut de respondre avec quelque esmotion à Mr. Mazarini : *Que les termes de la lettre de la Royne estoient plus propres pour vn Manifeste contre la France, que pour persuader la paix : qu'avec ces apparences elle tendoit à descrire le gouvernement present à condamner ses resolutions, & à aliener les cœurs de ses subiets : mais que par dessus toutes ces choses, il luy desplaisoit d'auoir recognu dans la lettre, que la Royne sa Mere n'auoit plus d'affection pour luy ny pour sa Couronne ; & que ce qui le confirmoit en cette creance, estoit la commission que la Royne auoit donné depuis peu à vn nommé le Clozel, pour disposer le Duc de Rohan à prendre party contre son seruice* Le premier chef de cette response fait voir clairement, ou que le Cardinal de Richelieu auoit empesché que le Roy ne iettast les yeux sur la lettre de la Royne, de laquelle S. M. auroit fait vn iugement tout autre s'il l'auoit leuë ; ou il faut dire, que le Cardinal l'auoit sinistrement interpretée.

Il est impossible, qu'une lettre, de laquelle il n'y auoit point de copies que celles qui auoient esté enuoyées à Sa Sainteté, & à Mr. Mazarini, soit vn Manifeste. C'est aussi faire

vn grand tort au bon iugement du S. Pere, qu'il auoit veu & aprouué la lettre de la Royne, de dire qu'elle tendoit à troubler la France. Il faut auoir cette bonne opinion de la prudence de Mr. Mazarini, que deuant que de la presenter, il eust remonstré au S. Pere qu'elle estoit mal conceüe, ou meritoit d'estre corrigée en certains mots ou articles. Personne n'y pouuoit trouuer à redire, que celuy qui craint toutes les veritez, & principalement celles qui viennent de la part de la Royne. S'il ne veut pas qu'on represente les dangers de la guerre, il faut qu'il change sa nature, qui est d'estre incertaine : s'il n'approuue pas qu'on parle du pauvre peuple, il doit corriger les Edicts & Declarations des Roistres Chrestiens, qui vsent tousiours de ces mots : s'il reiette les conseils du feu Roy qui sont proposez par la Royne, il condamne les sentimens de ce grand Prince, comme il fait ceux de sa Vefue. En fin, nous le sommons de coter ces termes, qu'il veut faire passer dans l'esprit du Roy *pour des Manifestes, qui tendent à esmouoir les peuples*. Tous les sages, auxquels nous sommes contraincts de communiquer la lettre de la Royne, iugeront, si elle est capable de porter les François à vne reuolte, si elle blesse l'honneur du Roy, & si elle condamne la conduite de ses Ministres.

Le Roy dit aussi à Mr. Mazarini, *qu'il respectoit la Royne sa Mere, mais qu'il estoit plus obligé à son Estat*. C'est vne maxime que le Cardinal de Richelieu a mis bien auant dans l'esprit de S. M. mais elle presuppose ce qui n'est pas ; à sçauoir, que la Royne a entrepris quelque chose contre

L'Estat de France, dequoy elle n'est point accusée, tant s'en faut qu'elle en soit conuaincuë. Dans la declaration que le Cardinal dressa apres la detention de la Royne, on ne la publie coupable que de ce grand crime, *de n'auoir point esté en bonne intelligence avec le Cardinal de Richelieu.* Depuis ce temps-là nous l'auons pressé assez souuent de dire hardiment, quel peché auoit commis la Roine contre l'Estat, sans que nous l'ayons peu obliger à le declarer, ny en Iustice ni dans tous ses libelles diffamatoires, ni mesme dans l'Histoire de France faicte par Scipion Dupleix, qui l'a dressée sur les memoires du Cardinal, & n'a rien oublié de tout ce qui pouuoit donner mauuaise impression des intentions de la Royne. Tous les sages iugeront, que ce discours qu'on a rendu si commun, *que le Roy est plus obligé à son Estat qu'à la Royne sa Mere,* est fondé sur vn faict qui n'est point : mais quand ce qui n'est pas seroit, nous demanderions volontiers au Cardinal de Richelieu, & à ses flatteurs qui couurent son ingratitude par cette maxime d'Estat, à quoy peut seruir à la France, qu'on oste ses biens à la Royne, qu'on l'emprisonne, qu'on luy desnie les alimens que le Roy luy doit, qu'on escriue cōtre elle des calomnies, qu'on ne vueille point sçauoir des nouuelles de sa santé, ni lui donner la consolation qu'elle en puisse apprendre de celle du Roy, qu'elle n'aye point de Resident à Rome pour deux affaires de pieté, qu'on face des vains efforts pour empescher que la Royne d'Angleterre n'assiste sa Mere, & qu'on la traicte & les siens avec tant de rigueur,

716 *Aduis sur vne Lettre presentée au Roy*
que toute la Chrestienté en est scandalizée. Ne
semble-il pas, que si on auoit quelque défiance
que les conseils de la Roynes ne fussent point vti-
les à l'estat, qu'elle a conserué & rendu au Roy
non seulement entier, mais florissant, il suffiroit
de n'escouter pas ses aduis, sans porter les choses
aux extremitez qui font horreur à la nature?

Pour ce qui regarde le Clozel, qu'on a faict
passer dans l'esprit du Roy pour Agent de la
Roynes aupres du Duc de Rohan, c'est vne im-
posture inuentée par l'ennemy iuré de S. M. La
veritable histoire est, que le Clozel estant pres-
sé par la necessité, se resolut de suivre le Duc
d'Elbeuf, qui se retiroit aupres du Duc de Lor-
raine, pour chercher quelque employ digne de sa
naissance & de son courage, & ensemble vn re-
mede à l'incommodité, dans laquelle on l'auoit
ietté par la confiscation de ses biens, & qui ne
pouuoit estre soulagée selon sa condition par la
bonne volonté de la Roynes. Le Clozel suivit ce
Prince iusques au Camp du Duc de Lorraine, où
il ne trouua point ce qu'il desiroit, & croyoit me-
riter: ce qui le fist resoudre d'accompagner le
President Coste, qui s'en alloit en Espagne par
l'Italie. Estans arrivez à Milan, le Clozel, qui
dans ces derniers mouuemens du Languedoc a-
uoit acquis beaucoup d'habitude avec le Duc de
Rohan, eust quelque desir de le voir, & luy en-
uoya demander permission & seureté; ce qu'il
obtint aussi facilement, comme de son naturel il
estoit trop facile à se confier: estant arrive au lieu
que le Duc luy auoit marqué, il fust arresté par
ses ordres, & ne fust trouué chargé ny de lettres,

ny d'instructions & memoires, ny d'aucun pou-
voir & creance par escrit, estant chose veritable,
qu'il n'en auoit pas mesme de parole. De là on
peut iuger s'il y a apparence, qu'un homme qui
ne manquoit pas d'esprit, & auoit traité autres-
fois beaucoup d'affaires pour le Duc de Rohan,
& pour le party qu'il auoit formé en Languedoc,
soit allé trouuer vn General d'armée par l'or-
dre de la Royne, sans auoir demandé quelque
marque d'adueu : si on l'auoit trouuée sur luy,
il seroit aisé au Cardinal de la produire ; & la
hayne qu'il a conceu contre la Royne n'auroit
pas manqué de la faire voir, non seulement au
Roy, mais au public. Il faut croire aussi, que si
de la deposition du Clozel on eust peu tirer
quelque chose contre la Royne, le Cardinal
l'auroit fait conduire à Paris, afin que cette
piece fust jouée en presence du Roy, & sur le
plus grand theatre de la France. C'est vn tes-
moignage, que la Royne ny ceux qui se meslent
de ses affaires n'ont point eu de part en celles
du Clozel, puis qu'on l'a estranglé sans bruit
dans la Valteline, & qu'il a esté condamné par
vn Commissaire, grand confident du Cardinal
de Richelieu : il l'a enuoyé de Paris en poste pour
ce seul sujet, & a fait executer ce pauvre mal-
heureux comme espion, non comme negotiant
contre le seruice du Roy. Quelle apparence a il
aussy, que le Clozel faisant profession d'estre Hu-
guenot fort zelé, eust voulu desbaucher celuy
qui assistoit si puissamment ceux de sa creance ?
Il est beaucoup plus probable, qu'il auoit re-
cours à luy, pour obtenir par son moyen quelque

718 *Auis sur vne Lettre présentée au Roy*
accommodement, & la liberté de retourner en France. Tout ce qu'on peut dire de cette mort, est, que le Duc de Rohan n'y a pas acquis beaucoup d'honneur; & qu'il est probable, que le Clozel y a gagné le Ciel par sa conuersion à la Religion Catholique.

Le Cardinal de Richelieu rendoit sur ce rencontre mille mauuais offices à la Roynes, lors que la cholere de son Eminence fust eschauffée par les offres que S. M. faisoit de s'employer pour la paix, de laquelle il hayt autant le nom comme il craint les effectz, encore qu'il face semblant de la desirer. Il n'estoit pas en son pouuoir de retenir sa passion; il la fist esclatter en vne affaire, qu'il est expedient de raconter vn peu au long, pour faire voir l'auenglement de celuy qui l'a entreprise.

Si la Roynes ne desiroit la conuersion du Cardinal de Richelieu plustost que la continuation de son peché, elle auroit grand sujet de se resioiur, de ce qu'il a faict paroistre son animosité contre sa Bien-faëtrice sur le plus haut theatre de la Chrestienté; & a voulu rendre resmoin de son insolence nostre saint Pere, qui en doit estre le Iuge.

Sa Sainteté sçait, que la Roynes ne luy a point faict de plaintes pour les maux que le Cardinal de Richelieu luy a faicts, ny pour ceux qu'il luy faict souffrir tous les iours. Elle auoit desiré, que le Sieur Abbé Fabroni eust auprès de Sa Sainteté la qualité de son Resident, qui auoit charge d'offrir au saint Pere tout ce qui pouoit dependre de S. M. pour moyenner vne bonne Paix à la

Chrestienté, & sur tout au Royaume de France. La Royne faisoit aussi poursuivre la Beatification de la Venerable Mere Anne de S. Barthelemy Carmeline : aux prieres de laquelle S. M. croit auoir l'obligation du recouurement de sa santé.

Le Cardinal de Richelieu n'a peu souffrir que Sa Sainteté aye receu le Resident de la Royne, avec les honneurs que sa Prudence & Justice ont creu estre deuës à vne si grande Princeesse, ni que ses offres, pour la Paix, ayent esté agreables : il a fait dire au saint Pere par l'Ambassadeur de France, que le Roy trouuoit mauuais que Sa Sainteté eust receu vn Resident de la Royne, & eust commandé qu'on luy fist les honneurs qu'il receuoit du sacré College, & de toute la Cour de Rome : il adiousta vne protestation, qu'il ne le pouuoit recognoistre en cette qualité, ayant deffense de lui rendre aucun respect, & commandement de dire à Sa Sainteté, que si la Royne auoit quelque chose à traiter en sa Cour, elle se deuoit adresser aux Ministres du Roy son Fils, & sur tout au Cardinal de Lyon. Nous ne croirons iamais, que cet ordre, non seulement iniuste, mais ridicule, aye esté communiqué au Roy : qui a tesmoigné mesmes d'asafflictions de la Royne sa Mere, d'estre bien aise qu'on luy rendit au Pays-Bas les honneurs qui luy sont deuës, & ausquels son bon naturel l'oblige de prendre part.

Tout ce qui est arriué en cétaffaire, est vn effect de la passion du Cardinal de Richelieu, laquelle a estouffé sa conscience, a auenglé son iugement, & a mesprisé sa reputation.

Il n'est pas si ignorant, qu'il ne sçache non seu-

720 *Aduis sur vne Lettre présentée au Roy*
lement par la raison , mais par beaucoup d'exemples , que plusieurs Femmes & Vefues des Princes ne peuuent auoir eu recours à la protection & justice du saint Siege , ou contre leurs Maris , ou contre leurs Enfans, sans auoir à Rome des Residens ; dequoy nous pourrions alleguer cent exemples.

Si le Resident de la Royne n'est point aupres du saint Pere, pour se plaindre des injures qu'on faict à S. M. & poursuivre les reparations, c'est vn tesmoignage de sa vertu : s'il y est pour des sujets qui doiuent estre agreables au Roy , & profitables à la France, on doit louer son dessein au lieu de la vouloir priver de ses droicts.

La Royne est Princeesse de Naissance, & Fille de Souuerain : elle est Royne par son Mariage, & quant & quant Princeesse Souueraine : elle a esté couronnée & oincte : ce qui confirme tous les droits de Souueraineté. La Naissance du Roy est à la verité la principale benediction de son Mariage, mais elle ne faict point sa Mere Royne ; au contraire, c'est elle qui le faict Roy. On pourroit dire , que ce bon-heur d'auoir porté le Roy luy seroit prejudiciable, s'il luy faisoit perdre ce que sa Naissance, s^{on} Mariage, & son Couronnement luy ont acquis. La qualité de sujette que le Cardinal faict valloir avec tant de bruit, ne peut rien dire en tout cas , si ce n'est que les Roynes tant qu'elles demeurent en France, sont obligées d'obeir aux loix de l'Estat : les Roys les doiuent aussi garder, sur tout les fondamentales, sans que cela prejudicie à leur Souueraineté. Mais quand les subiections des Roynes seroient

telles que le Cardinal de Richelieu veut persuader, pour les faire dépendre de son auctorité, seroit-il bien si injuste, de vouloir assuiettir la Roine à ses loix lors qu'elle est hors de France, n'ayant rien emporté du Royaume que sa Maïeste & ses droits naturels, qui la suivent dans les afflictions comme dans la prospérité? Le Cardinal de Richelieu l'a emprisonnée, l'a calomniée, l'a obligée de chercher la protection & assistance du Roy Catholique son Beau-fils, luy a osté les biens qu'elle auoit apporté en France, ceux que les conuentions de son Mariage luy ont acquis, & l'entretient que le Roy luy doit: tout cela s'est fait non seulement contre les Loix de France, mais contre celles des Gens, & mesmes de la Nature: & son Eminence veut que la Roine garde en Flandres les Ordonnances de la France, dans laquelle il fait toutes choses en ce qui regarde S. M. contre les Loix du Royaume, & de toute la terre.

Si l'iniustice du Cardinal de Richelieu se fait voir en cet article, sa folie paroist en ce qu'il offre les Ministres du Roy, pour traiter les choses que la Roine desirera de Sa Sainteté. Comment se peut accorder cet offre avec la deffence que la Roine a eu d'enuoyer & d'escrire au Roy, & de tenir aucune correspondance en France, où ses seruiteurs sont emprisonnez, quand ils viennent pour sçauoir des nouuelles de la santé du Roy? en quelle façon veut le Cardinal, apres la rupture entre les Couronnes, que la Roine, sans se rendre suspecte, face entendre ce qu'elle desire des Ministres du Roy son Fils qui sont

722 *Avis sur une Lettre présentée au Roy*
aupres de Sa Sainteté? Comment peut elle attendre vne fidele sollicitation de la part de ces Ministres, & auoir intelligēce avec eux, sans prendre la voye du Cardinal, duquel ils reçoivent les inspirations, ayant esté tout fraichement si mal traitée, que durant deux mois de maladie elle n'a pas receu vn témoignage de déplaisir de son mal, qui a esté caché au Roy, encore que le Cardinal aye sceu très-particulièrement tout ce qui s'est passé? Il semble que les affaires de la Roynē estant en l'estat auquel le Cardinal de Richelieu les a reduites, le Roy Catholique auroit plus de suiet d'offrir à la Roynē son Ambassadeur auprès de Sa Sainteté.

Le Cardinal de Richelieu se moque de la Roynē, en luy faisant presenter le Cardinal de Lyon son frere, qui n'est enuoyé à Rome que pour tascher de renuerſer le Mariage de Monsieur, & mettre la confusion dans la succession du Royaume de France: que son Eminence veut faire perdre aux Enfans de la Roynē Mais comment pourroit Mr le Cardinal de Lyon poursuivre la paix que la Roynē desire contre les intentions du Cardinal de Richelieu son frere, qui ne veut regner que par les desordres, & s'eterrer dans les ruines de la France? avec quel zele solliciteroit le mesme Cardinal de Lyon la Beatification de celle qui a obtenu de Dieu la santé de la Roynē contre les desirs du Cardinal de Richelieu, qui est la cause de toutes les maladies de S. M. qui souhaite sa mort, & tasche de l'aduancer tant qu'il peut par les desplaisirs qu'il lui donne? Il ne veut pas que l'Ambassadeur du Roy rende

au Resident de la Royne sa Mere les respects que les Ambassadeurs des autres Princes lui rendent : cela est bien esloigné de leur monstrez l'exemple, & de remercier Sa Sainteté du reglement qu'elle a fait ; & le sacré College de ce qu'il l'a approuvé & suivi. Mais si le Cardinal de Richelieu veut, contre les intentions du Roy, que les Ministres de S. M. mesprisent ceux de sa Mere, la Royne a commandé aux siens de respecter ceux du Roy.

Toute la terre verra ce mauuais & ce bon exemple dans la Ville capitale de l'Eglise de Dieu : la Chrestienté iugera iusques où va la passion du Cardinal de Richelieu contre celle qui l'a fait ce qu'il est ; & avec quelle impudence il voudroit prescrire au Souuerain Pontife des loix pour sa conduite, & blasmer les dispositions de sa prudence & iustice.

L'insolence de cet attentat a obligé la Royne d'escrire à Sa Sainteté vne lettre, par laquelle S. M. fait voir, que la poursuite faite contre son Resident, estoit vn effect de la passion du Cardinal de Richelieu, qui a tasché en cette occasion, & en beaucoup d'autres, de deshonorer la Naissance du Roy. Si la trop grande patience de la Royne dissimuloit cette iniure, S. M. manqueroit non seulement à sa dignité, mais à celle de ses Enfans, & sur tout à celle du Roy ; la reputation duquel a esté en ce rencontre aussi mal mesnagée par le Cardinal de Richelieu, comme en beaucoup d'autres affaires, où il l'a engagée mal à propos. La Royne veut qu'il sçache, que tous ces artifices & violences ne produi-

724. *Aduis sur vne Lettre présentée au Roy*
ront iamais l'effect qu'il se propose; qui est, en
donnant à S. M. quelque desgoust par les mau-
uaises interpretations de ses saintes intentions,
de la destourner de proposer & procurer la paix
generale. Personne ne peut auoir ses soings
pour suspects que le Cardinal de Richelieu, qui
est ennemi du repos d'autrui & du sien: qui veut
conseruer & augmenter sa fortune dans les con-
fusions de la France: qui ne hazarde rien qui soit
à luy, lors qu'il hazarde l'Estat: lors qu'il est pro-
diges du sang des François qu'il croit estre ses
ennemis, & qu'il espuise le Royaume de Finan-
ces tirées de l'oppression de toute sorte de con-
ditions, afin qu'il ne reste rien en France de ri-
che ny de puissant que luy. Il a peu faire souffrir
à la Royne Mere du Roy les violences qui ont
scandalizé toute la terre: il peut fermer tous les
chemins par lesquels le Roy receuroit les aduis
d'une bonne & sage Mere: mais il n'empesché-
ra pas les prieres, propositions, & protestations
que S. M. fera au saint Pere, & à tous les Prin-
ces Chrestiens, pour la descharge de sa con-
science & de son honneur. En fin la Royne veut
faire voir, que les mauuais traitemens qu'elle
a receu sous l'auctorité du Roy, n'ont point re-
froidi l'ardeur de son amour, & ne surmonteront
iamais la force de son sang.

LETTRE DE LA ROYNE A SA SAINTETE.

TRES-SAINTE PERE,

A Tant donné conte à Vostre Sainteté comme nous
auons acquiescé à tout ce que le Roy nostre tres-
honoré Sieur & Fils auoit tesmoigné desirer de nous,
& des deuoirs ausquelz nous nous estions mise pour faire
vne bonne reconciliation, pour tascher par ce moyen à
trouuer quelque remede aux malheurs qui trauaillent
toute la Chrestienté: Nous luy dirons maintenant, qu'au
lieu du bon effect qu'on s'estoit promis de cette action, elle
a produit le contraire: en sorte que les voyes nous sont
fermées à enuoyer deuers luy, & mesmes à luy escrire.
Ce procedé nous est d'autant plus sensible, qu'il nous oste
le moyen de luy faire cognoistre les dangers, qui sont à
craindre pour son Royaume; des guerres dont il est me-
nacé au dedans & au dehors, & de l'union de la plus-
part des Princes Chrestiens interessez à son preiudice.
Notre sving principal a tousiours esté (dans l'auctorité
que nous auons eue en ce Royaume) de conseruer la Paix
entre les deux Couronnes, comme celle qui leur doit estre
esgalement desirable, & en laquelle confisie en grande
partie la conseruation de la Religion Catholique. C'est
ce que le feu Roy nostre tres-honoré Seigneur & Espoux,
de glorieuse memoire, nous auoit tousiours recommandé
tres-expressement: & à quoy ne doutant point que
Vostre Sainteté n'apporte tout ce qui est de son pouuoir,
Nous sommes neantmoins obligée par le respect que nous

deuons aux bons aduis de ce sage Prince, & par l'a-
 mour que nous portons au Roy nostre tres-honoré Sieur
 & Fils, & par les interests que nous auons en tant de
 sortes au repos & à la Paix publique, de ramentenir à
 Vostre Sainteté les moyens qu'elle a d'y contribuer par la
 bonté & la pieté du Roy nostre tres honoré Sieur &
 Fils. Il a tellement la crainte de Dieu deuant les yeux,
 que V. Sainteté peut estre certaine qu'il se portera en-
 tierement à tout ce qui luy sera representé de sa part, estre
 du deuoir de sa conscience, & necessaire pour le bien
 de la Religion Catholique : pouruen que les principaux
 Ministres, sur lesquels il se repose de la conduite de ses
 affaires, secondent ses bonnes intentions. Esperant donc
 que Vostre Sainteté y donnera l'ordre qui est attendu de
 sa singuliere prudence, & de son affection pour vn bien
 si important à toute la sainte Eglise : nous continuerons
 à prier Vostre Sainteté (comme nous auons desia fait)
 que ce qui nous regarde en particulier, ne soit mis en au-
 cune consideration, au prix du bien & de l'auantage
 de nos Enfans, comme aussi de l'union & bonne intelli-
 gence qui doit estre entre les deux Couronnes : assurant
 Vostre Sainteté, que nonobstant tout ce qui s'est passé, il
 ne tiendra iamais à nous que tous les differens ne soient
 composez à l'amiable, & spécialement que la France ne
 iouisse du repos & de la tranquillité : pourquoy nous fai-
 sons à Vostre Sainteté toute l'instance qui nous est possi-
 ble. Pour la faire reüssir plus efficacement, nous auons
 exuoyé vn Gentilhomme expres vers l'Empereur nostre
 Frere. Sa pieté nous fait esperer qu'il se portera à tou-
 tes les choses iustes & raisonnables, & qu'il donnera
 moyen à tous les Princes d'y trouuer leur conte & leur
 satisfaction : ainsi que le dira de bouche à Vostre Sain-
 teté le Sieur Abbé Fabroni nostre Aumonier & nostre

Resident auprès d'elle : auquel nous prions Vostre Sainteté de donner entière creance, comme nous l'auons en luy : priant Dieu, TRES-SAINT PERE, qu'il donne à Vostre Sainteté longues & heureuses années pour le bien & regime de son Eglise. Escrit à Anuers, ce XV. Iuillet, M. DC. XXXV.

PREMIER BREF DE SA SAINTETÉ
A LA ROYNE.

VRBANVS PAPA VIII.

REGINÆ CHRISTIANISSIMÆ VIDVÆ.

CHarissima in Christo Filia nostra, salutem. Pacem, quam humani generis hostis è fidelium regionibus eliminare contendit, tamquam virtutum comitem, & conseruatricem Religionis, assiduo studio firmare conati sumus: etenim in summo Apostolatus apice publicæ felicitati seruire in Domino gloriamur, ita vt filiorum discordiis paternæ charitatis viscera dilanientur. Quocircà non solum publicis ac priuatis precibus Diuinæ clementiæ thronum adiuimus, è cuius virtute Pax pender; sed nullum per Nos, aut per Nuntios nostros prætermitten-

dum à Pastorali sollicitudine officium duximus, quod parere posset optatæ tranquillitatem concordia. Et licet exortis armorum motibus illam vndique labefactari contingat: non tamen animum ita despondemus, vt spem de meliori statu deponamus; sed, quantum in Nobis est, ea omnia præstare non desistimus, quæ ad obtinendam expetitam serenitatem conferre censemus. Quamobrem non parum auxit solatia sollicitudinum nostrarum Maiestas tua, dum omne studium intendere significauit, vt imminetia Christiani Catholici Orbis damna arceantur. Si quidem vota pietatis & prudentiæ tuæ, quibus incommune bonum præcipuâ voluntate duceris, magnam habitura auctoritatem confidimus. Perge charissima in Christo Filia; audiantur ex ore tuo consilia, quibus populorum salus muniatur, vt in congregatione iustorum regnet Deus totius consolationis. Omnium certè Nationum, & sequentium ætatum plausu memoraberis, si quæ in luctuoso bello extinguendo aggredieris, det tibi Deus perficere; cuius causâ omnia velle debemus, ingentemq; ab illo pij laboris mercedem iure proteris præstolari. Facile

enim est tanti facinoris promerita metiri
 magnitudine calamitatum, quæ discrimen Religioni, & vastitatem Prouinciis
 minitantur. Magnum hoc decus adiiciat
 Diuina bonitas Maieſtati tuæ, cui Apo-
 ſtolicam benedictionem amantiffimè im-
 pertimur. Datum Romæ apud ſanctam
 Mariam Maiorem, ſub annulo Piſcatoris,
 die XXXI. Auguſti, M. DC. XXXV.
 Pontificatus noſtri anno XIII.

Julius Roſpiglioſius.

SECOND BREF DE
 SA SAINTE
 A LA ROYNE

VRBANVS PAPA VIII.
 REGINÆ CHRISTIANISSIMÆ VIDVÆ.

CHariffima in Chriſto Filia noſtra,
 ſalutem. Nuper datis ad te litteris
 Maieſtatem ſummoperè laudauimus,
 quòd Catholicorum Principum animis
 reconciliandis, diffidijsque de medio tol-
 lendis diligentiam omnem impendat.

Etenim Nobis, qui nihil ardentius cupimus aut studiosius curamus, quam Christiani Orbis tranquillitatem restitui, gratissimum accidit, te egregiâ animi magnitudine præclaram operam publicæ incolumitati nauare, & ad communia incommoda auertenda auctoritatem tam sedulo adhibere. Itaque quod à Nobis flagitasti, dilecto filio Iulio Mazarino Nuntio nostro iniunximus; vt Christianissimæ Majestati primo quoque tempore tuam epistolam reddat. Speramus voluntatem optimi Regis piis tuis postulatis non defuturam; Deumque precamur, vt præclarum religiosi animi tui zelum vberes operatæ concordie fructus subsequantur. Majestati tuæ Apostolicam benedictionem amantissimè impertimur. Datum Romæ apud sanctam Mariam Maiorem, sub anulo Piscatoris, die XIII. Octob. M. DC. XXXV. anno Pontificatus nostri XIII.

Iulius Rospigliosius.

LETTRE DE LA ROYNE

A MONSIEVR MAZARINI NONCE
EXTRAORDINAIRE

DE SA SAINTETE, EN FRANCE.

Monsieur Mazarini, Tous moyens m'estant ostez de pouuoir faire sçauoir de mes nouvelles au Roy Monsieur mon Fils, i'ay creu que Nostre saint Pere le Pape n'auroit point desagreable, que ie m'adresse à vous, pour vous prier, comme ie fais, de luy presenter de ma part la lettre que ie luy escriis, ny ayant rien dans icelle qui luy puisse desplaire, & qui ne tende à luy faire voir les malheurs qui peuuent arriuer de la rupture entre les deux Couronnes; afin qu'il y remédie promptement: il a l'ame si bonne, que ie ne fais point de doute qu'il ne se porte à la Paix; & que ses principaux Ministres, sur lesquels il se repose de ses affaires, ne luy conseillent de faire toutes les choses iustes & equitables pour y paruenir. l'ay enuoyé à l'Empereur, au Roy Catholique mon Beau-fils, & au Roy d'Hongrie, pour tascher de destourner l'orage qui menace la France. ie n'espargneray ny mes prieres vers Dieu, ny mes soins vers ceux qui peuuent contribuer à ce bon oeuvre tant désiré des gens de bien; & quelque mespris que le Roy

mondit Sieur & Fils puisse faire de mon affecti^{on}
 & bonne volonté, ie l'aimeray tant que ie viuray,
 & son pauvre peuple aussi; pour le soulagement du-
 quel ie feray tousiours tout ce qui me sera possible.
 Je finiray par cette verité, & par la priere que ie
 fais à Dieu qu'il vous tienne en sa sainte garde.
 Escrit à Anuers le XV. Septembre 1635.

LETTRE DE LA ROYNE A V R O Y SON FILS.

MONSIEVR MON FILS,

ME trouuant plus esloigné de vous plaire,
 lors que i'en ay plus soigneusement recher-
 che les occasions, & n'ayant rien oublié de tout
 ce qui vous pouuoit donner suiet de me tesmoigner
 l'affection qu'une Mere doit attendre de son Fils;
 ie laisseray pour cette heure ce qui me touche en
 particulier, & ne parleray que de ce qui regarde
 vostre Estat. & vostre Personne. Toutes les
 voyes estans fermées par lesquelles ie vous pouuois
 donner de mes nouvelles, i'ay prié le Sr. Mazari-
 ni, Nonce de Sa Sainteté, de vous faire tenir
 cette lettre. Le suiet qui me la fait escrire, merite
 bien qu'on y employe des soins extraordinaires,

Voyant la France menacée d'un tel orage, qu'il est
 impossible, que ceux qui le sçauent, n'en soient poine
 touche^z d'apprehension. Pleust à Dieu qu'il me
 fust aussi facile d'y remedier, comme ie suis obl^gée
 de vous en deuoir escrire de la sorte, estant au lieu
 où ie suis, & dans le rencontre des affaires qui se
 presentent. Vne partie de ce que i'ay preueu. & as-
 ché de vous faire sçauoir par le moyen de Mes-
 sieurs du Parlement est proche de son effect; & la
 France estant vne fois plongée dans les guerres
 qui se preparent, tout le bien qu'on se pourroit pro-
 mettre pour elle, ne peut estre comparable aux
 maux qu'elle souffrira avec le temps. La guerre
 n'est iuste que lors qu'elle est necessaire: sa iustice.
 & sa necessité ne sont fondées que sur la conserva-
 tion & la deffense, qui ne sont legitimes, qu'au-
 cas que les autres voyes ne soient pas suffisantes.
 C'est vn mal qui n'est toleré que pour en euier vn
 plus grand. Et quel mal estes-vous contrain^t d'e-
 uier, ou quel profit pour^{ra}-vous esperer égal à la
 perte de ce que vous exposez? Iusques icy vous
 estes l'arbitre de la Paix & de la guerre: dès lors
 que vous aurez quitté la qualité de Iuge pour celle
 de partie, aucune des deux ne despendra plus de
 vous. Les forces, la conduite & les interets de vos
 ennemis seroient balancez avec les vostres: la dis-
 proportion n'estant pas extrême, les succez n'en peu-
 uent estre infailibles, & s'ils sont incertains, comment

pouvez-vous estre asseuré, que le mal qui doit ar-
 riuier à l'un des deux partis, ne puisse tomber sur le
 vostre? Mais à quoy en serions-nous reduits, si
 Dieu nous affligeoit iusques à ce point? Et quand
 pouvez-vous vous promettre du repos, & en
 donner à ce Royaume qui en a tât de besoin? D'au-
 tres que moy vous peuuent dire l'estat auquel il
 estoit apres des guerres semblables à celles que
 nous allons voir: chacun sçait ce que les peuples
 en patissent: mais ce que souffrent les Roys, ne se
 peut apprendre que des Roys mesmes. Le feu Roy
 Monseigneur, qui l'auoit experimenté plus que
 personne (quoy que ce fust avec la gloire & l'a-
 uantage de tant de victoires) m'en a soigneuse-
 ment informée, afin de vous le pouuoir tousiours
 remettre deuant les yeux: & vous sçauiez que ie
 n'y ay pas manqué quand l'occasion s'en est presen-
 tée. En vain ie vous ferois resouuenir, qu'il ne
 m'auoit rien ordonné de plus expressement pour
 la conduite de vostre Estat (pensant à ce qui pour-
 roit arriuier quand Dieu disposeroit de luy) que de
 maintenir la paix & l'union, & la fortifier des
 alliances qui se sont faites avec les principales
 Couronnes de la Chrestienté. L'ayant pratiqué de
 la sorte, Dieu m'a fait la grace de conseruer vo-
 stre Royaume, & de le remettre entre vos mains
 au mesme estat qu'il estoit sorty de celles du Roy
 Monseigneur. Maintenant que le mal qu'il

prenoyot se va rendre inévitable, i'en souffre en
 mon ame des douleurs qui n'en peuvent avoir de
 semblables: & tout moyen de vous y estre utile
 m'estant osté de vostre part, ie tasche pour le
 moins, où l'action m'est libre, de destourner ce
 qui peut venir en ma cognoissance. La disposi-
 tion des affaires presentes ne me permettant pas
 d'en dire plus de particularitez, ie me contenteray
 de vous faire sçavoir que i'ay iousiours fait (com-
 me ie feray encore) tous les offices possibles pour
 empescher cette guerre de Couronne à Couronne,
 qui ne peut produire que des mal-heurs extrêmes
 pour l'une, ou pour l'autre, & qui met toute la
 Chrestienté au plus grand danger qu'elle fut ia-
 mais. I'en ay escrit à nostre saint Pere, le priant
 de se prevaloir de la bonté de vostre conscience,
 pour s'opposer à ces desordres, & à cette subver-
 sion generale. Ne doutant point que ces instan-
 ces ne vous soient faites de la part de Sa Sain-
 teté, au nom de Dieu & de son Eglise: ie suis
 obligée de m'acquitter au mesme temps de ce
 qui m'a esté enjoinct par le feu Roy Monsei-
 gneur: que si ie vous voyois en termes d'entrer en
 une pareille guerre, i'dusse à vous coniurer par
 ses cendres, & par sa memoire (qui vous doit
 estre en veneration) de n'en point venir à ses ex-
 tremitez, où y estant entré, de vous conuier à y
 apporter un prompt remede, & vous recomman-

dant de sa part de contribuer à la Paix, comme à
 la conservation de ce qu'il vous a laissé, l'ayant
 reconquis par son sang, & par vingt années de
 perils & de peines. Les paroles de ce grand Roy
 vostre Pere me sont des Oracles, & ses conseils
 des Loix inuiolables: ie croy qu'ils n'auront pas
 moins de force auprès de vous. Et quant à moy;
 Monsieur, mon fils. qui n'exerce point d'austerité
 de Mere, & qui suis touchée au profond de l'amour
 de crainte, de douleur, & de compassion, ie me
 iette à vos pieds pour vostre Royaume, & pour
 vous mesmes; & avec ces larmes Royales &
 Maternelles, ie vous supplie au nom de Dieu, &
 de ceux qui vous ont mis au monde, d'arrester le
 cours des mal-heurs si espouuantesables; & dont il
 y a danger que ceux qui y donneront le commence-
 ment, n'en voyent pas la fin. Ayez pitié de tant
 de sang qui se va respanure, de tant d'ames qui se
 vont perdre, & de la Chrestienté qui est menacée
 de sa ruine. Conseruez-vous, & conseruez en-
 semble la plus digne Couronne de la terre que Dieu
 vous a donnée: accordez à cette Mere ce qu'elle
 demande pour vous; & si son sang & sa vie
 vous sont necessaires, elle les vous offre de bon
 cœur. A Anuers ce dernier Aoust. 1635.

RESPONSE DE MONSIEUR MAZARINI

A LA ROYNE.

SACRA REAL MAESTA.

Riceui nell' istesso tempo il dispaccio di Vostra Maesta, resomi dal suo palafreniero, & il duplicato di esso per il camino di Londra, ancorche questo fosse scruto quindici giorni dopo. E se io ho tardato à rendere humillissime grazie à Vostra Maesta del honore che m' ha fatto, & à rappresentarle la forma con cui ho essequiti li suoi ordini, e proceduto dal non voler lasciar indietro diligenza alcuna per seruirla. Era il Re nella Champagne, quando riceui la lettera, che Vostra Maesta mi commandaua presentargli: e dandoue parté al Eminentissimo Signore Cardinale Duca, mi disse con grandissima prontezza, che poteuo inuiarla à Sua Maesta per vn corriere. Così feci, e Sua Maesta rispose alla mia lettera senza mandarne alcuna per la Maesta Vostra: ma sapendo che doueua esser quanto prima di ritorno à S. Germano: & hauendo riconosciuto dalla rispota datami, che non era rimasta molto sodisfatta del contenuto della lettera di Vostra Maesta, giudicaibene tentare, se in voce hauesi potuto rimostrar à Sua Maesta, che il puro zelo della Pace, e l'amore che la Maesta Vostra portaua al suo seruiuo, l'hauena obligata à scriuerli con quella liberta, e non con altro fine. Mi son dunque abboccato con

Sua Maestà più d'una volta sopra quest' affare procurando con ogni efficacia e desirrezza insinuarli, che non poteva esser caduto in pensiero alla Maestà Vostra d'apportarli disgusto: e per quest' effetto, ho in diversi modi interpretate alcune particolarità, che conoscono essere sensibili à sua Maestà, supplicandola di volerle dar risposta: ma la Maestà Sua mi ha sempre parlato nella medesima conformità, dicendo, che li concetti della lettera di Vostra Maestà erano più propri per un Manifesto contro la Francia, che à persuadere la Pace: che con quest' apparenza haueua Vostra Maestà fine di screditare il gouerno presente, condannar le sue resolutioni, & alienare l'amore de suoi sudditi: & in fine, che sopr' ogni altra cosa gli dispiaceua d'hauere riconosciuto in detta lettera, che la Maestà Vostra non haueua più affettione alcuna per la Maestà Sua, ne per questa Corona: e che ciò rimaneua bastantemente confermato ancora dalle commissioni date da Vostra Maestà al Signore Clazel, per mouere il Duca di Roano à prender partito contro il suo Real seruitio. A che replicando io quello che doueua per disingannare Sua Maestà, mi ha soggiunto, che difficilmente io poteuo scusare le sudette cose, che consisteano in fatto; ma che voleva credere intantia, che fossero effetti di cattini consigli di qualche mal intentionato, e non del buon naturale della Maestà Vostra: à cui, mi disse, che non mancherebbe mai di render' ogni testimonio della sua affettuosa riverenza, in tutto quello che non hauesse pregiudicato al bene e riposo del suo Regno, e che risoluua di non rispondere alla sua lettera per la necessità in che si mettebbe de opporsi alli fondamenti di essa, con dir cose che apportarebbero senz' altro dispiacere à Vostra Maestà: ne io per il medesimo caso ho creduto opportuno inuiarle

copia della risposta datami in iscritto, massime che per altro non puol giouar à cosa alcuna. Il carattere ch'io porto di Ministro de Sua Santuà, e la professione ch'io porto di Ministro de Sua Santuà, e la professione ch'io faccio d'humilissimo seruitore di Vostra Maestà, non le permetterano di rinocar in dubio, che nessuna cosa mi sarebbe stata piu grata, che incontrar intieramente il suo gusto, & in conseguenza non esser astretto à rappresentarle (benche in compendio) quella Sua Maestà mi ha risposta: ma non potendo scusarmene senza mancar alla fede con cui son obligato seruire, l'ho fatto, assicurandomi, che la Maestà Vostra riceuera tutto in buona parte, e credera, che desidero con estrema passione comprobar con l'opere l'affetto della diuotione che le professo.

Quanto alla Pace, che viene dalla Maestà Vostra desiderata con quel zelo ch'è degno della sua pietà, deno dire, che qualunque volta ho hauuto l'honore de tenerne proposito al Re, mi ha sempre risposto d'esserui intieramente applicato; purchè trattandosi congiuntamente con li suoi Collegati, si fosse potuta concludere sicura, e generale per essi & per questa Corona: e così mi ha ancora ratificato in questa occasione, & fattone assicurare la Santità di Nostro Signore per il Signore Cardinale di Lione, e Conte di Neuaglie suo Ambasciatore. Conche à Vostra Maestà fo humilissima riuerenza. Di Ruel, li xxvii^a di Novembre, M. DC. xxxv.

SECONDE LETTRE DE LA ROYNE A SA SAINTETE

TRESSAINT PERE,

NOUS auons esté merueilleusement surprise, lors que nous auons appris du Sieur Abbé Fabroni nostre Resident, que l'Ambassadeur de France auoit eu ordre par vn courrier expres d'aller à Castel Candolf, pour faire des plaintes à Vostre Saincteté, de ce qu'elle nous auoit fait la faueur d'agreer que nous eussions vn Resident auprès d'elle, non pour parler de nos interests, ny pour demander raison des outrages que nous auons receu du Cardinal de Richelieu (laissant à Dieu la vengeance des offences que nous auons receuës, & receuons continuellement de luy) mais bien d'offrir à vostre Saincteté dans le louable dessein qu'elle a de reünir par vne Paix generale des Princes Chrestiens) de contribuer à ce bon œuvre par nos soins vers l'Empereur & le Roy Catholique. Le Cardinal de Richelieu, qui est le seul auteur de cette harangue impertinente faite à Vostre

Saincteté) veut que nous nous seruions des Ambassadeurs du Roy nostre tres-honoré Sieur & Fils : ce qui choque le sens commun ; estant tres-certain que lesdits Ambassadeurs ne feront rien de tout ce que nous desirons d'eux , sans un ordre expres du Roy nostredit Sieur & Fils. Et comment le ferons-nous donner , veu que le Cardinal de Richelieu nous a osté tous les moyens de luy faire scauoir de nos nouuelles , soit par lettres ou autrement : ce qui a fait que nous n'auons osé dans nostre derniere maladie (laquelle nous auoit reduite à l'extremité) enuoyer en France quelqu'un des nostres vers nostredit Sieur & Fils, pour luy demander des Medecins , de crainte que nous auions que ledit Cardinal de Richelieu ne fist oster la vie , ou du moins la liberté à ceux que nous enuoyerions ; selon les menaces qu'il en auoit faites au dernier des nostres qui y auoit esté de nostre part. Vostre Saincteté scait comme toute voye nous estant fermée , nous nous sommes serui de celle du Sieur Mazarini son Nonce, pour le prier de faire tenir nostre lettre au Roy nostre tres-honoré Sieur & Fils , de laquelle nous auons enuoyé la coppie à vostre Saincteté. Et pource que ledit Cardinal entend que d'oresnauant nous nous adressions ausdits Ambassadeurs, Nous le ferions tres-volontiers , si nous croyons qu'ils suiussent les sentimens du Roy nostredit

Sieur & Fils. Mais estans neceffitez de despendre absolument des volontez du Cardinal de Richelieu, ils sont contrains, pour éuiter la perte de leur vie, biens & honneur, d'agir selon les passions dudit Cardinal, de sorte qu'ils ne traittent que de fomenter les desunions qui sont entre les Princes Chrestiens, de porter à rebellion les fuiets contre leurs Princes souuerains, de mettre le feu aux quatre coings & au milieu de la Chrestienté, de parler incessamment de Paix sans auoir intention de la faire, de renuerser les loix diuines & humaines, de choquer directement l'auctorité Apostolique, de violer les Sacremens, en voulant rompre le Mariage de mon Fils le Duc d'Orleans, & de la Princeffe Marguerite de Lorraine ma Fille. Le Cardinal de Richelieu va mesmes iusques à l'impudence de menacer Vostre Sainteté, en cas qu'elle ne consente à ses volontez. Ce procedé a grandement descrié ledit Cardinal parmy tous les Princes estrangers, qui ont loué & donné mille benedictions à Vostre Sainteté, pour auoir mesprisé toutes ses menaces. Nous qui auons les intentions bien esloignées de semblables meschancetez, & qui voulons rendre toute sorte d'honneur à vostre Sainteté; qui auons tousiours durant nostre Regence respecté le Saint Siege, & fait tout ce qui nous a esté possible pour maintenir en vnion les Princes Chrestiens, particulièrement

les deux Couronnes de France & d'Espagne, & qui sommes resoluë de faire ce que nous pourrons pour procurer la reünion ; prions Vostre Sainteté de trouuer bon que nostredit Resident demeure auprès d'elle, pour luy rendre conte de toutes les choses que nous apprendrons qui pourront faciliter la Paix, desirée de tous les gens de bien ; & aussi pour receuoir par luy les bons conseils de Vostre Sainteté, & la maniere avec laquelle nous nous deuons conduire en vne affaire de si grande consequence, comme est celle de la tranquillité & repos de toute la Chrestienté. Le Cardinal de Richelieu fait ouuertement paroistre sa rage, & la haine qu'il a contre nous, de faire tous ses efforts auprès de Vostre Sainteté pour nous oster, s'il pouuoit, vn honneur qui est deu à nostre Naissance, & à la dignité de Royne, que nous auons receu du plus grand Roy qui ait iamais esté, & de Mere de celuy qui regne maintenant ; qui n'a point de part à toutes ces violences, & qui n'oseroit ouurir son cœur à ceux qui l'environnent, qui sont tous ou gagnez du Cardinal par argent, ou retenus par la crainte des supplices, qui leur seroient infailibles, s'ils tesmoignoient l'affection qu'ils ont pour leur Roy. Vn exemple tout recent confirme la verité de nos paroles, qui est, que le Roy ayant commandé au Comte de Carman (de qui la vertu, la qualité, & le courage est assez connu

d'un chacun) de luy donner son aduis sur le voyage qu'il alloit entreprendre ; il representa à sa Maïesté qu'il n'y auoit point du tout d'apparence qu'elle se trouuaſt en perſonne dans ſon armée : s'il arriuoit qu'il ſe donnaſt vne bataille (l'euenement en eſtant incertain) qu'il valloit mieux qu'elle demeurast dans le cœur de ſon Royaume , que d'eſtre contrainte de ſe retirer en deſordre. Le Cardinal de Richelieu luy donna la Baſtille pour recompense de ſon bon conſeil ; dont certainement le Roy aura eſté fort ſenſiblement touché. Voila le pitoyable eſtat auquel le Cardinal de Richelieu a reduit le Roy & ſon Royaume. Il voudroit bien s'acquérir vn absolu pouuoir ſur les volontez de Voſtre Saincteté par ſes menaces : mais nous la pouuons aſſeurer , qu'encores qu'il ſoit capable de toutes ſortes de meſchancetez , qu'il eſt d'un naturel ſi timide , qu'il n'entreprendra iamais vn ſi horrible ny impie attentat contre le ſainct Siege , comme eſt celui dont il le menace : il ſçait bien que ſa ruine ſ'en enſuiuroit , & que les pierres ſ'eleueroient pour l'accabler. Nous finirons par vne verité , qui eſt à la conſuſion du Cardinal de Richelieu , & à la louange de l'Empereur & du Roy Catholique , en la proteſtion duquel nous ſommes , & auquel nous ſommes extrêmement obligée. Ils n'ont point condamné l'affection que nous auons pour la France ; ny deſapprouuée les

tesmoignages que nous leur auons rendu du desir
 que nous auons pour la Paix : au contraire ils
 nous en ont d'auantage estimée. Le Cardinal de
 Richelieu n'en est pas de mesme, estant tres-certain
 qu'il consentiroit plustost au bouleuersement de toute
 la France, que d'approuuer que nous nous en-
 tremettions de la Paix. Mais nous desirons si
 passionnément le bien de l'Eglise, le repos de la
 France, & la tranquillité de toute la Chrestienté,
 que s'il est nécessaire pour paruenir à ce bon-heur
 que le Cardinal de Richelieu demeure & subsiste
 dans l'auctorité en laquelle il est maintenant pres
 du Roy nostre tres-honoré Sieur & Fils, & que
 nous demeurions dans la misere à laquelle il nous
 a reduite : Nous prions Dieu qu'il le conserue en
 son credit, & nous donne la force de supporter avec
 patience, & à sa gloire, les persecutions qui nous
 viendront de sa part. Nous esperons que vostre
 Saincteté nous obtiendra cette grace par ses prie-
 res ; priant Dieu, TRES-SAINT PERE,
 qu'il donne à Vostre Saincteté longues & heuren-
 ses annees, pour le bien & regime de son Eglise.
 Escrit à Anuers, ce 7. Decembre 1635.

LETTRE DE SA MAIESTE
IMPERIALE
A LA ROYNE MERE DV ROY
TRESCHRESTIEN.

FERDINANDVS Secundus
Diuinâ fauente Clementiâ electus
Romanorum Imperator semper Augustus
ac Germaniæ, Hungariæ, Dalmatiæ, Scla-
uoniæ, &c. Rex, Archidux Austriæ,
Dux Burgundiæ, Stiriæ, Carinthiæ, Car-
niolæ, & Wirtembergæ, &c. Comes
Tirolis, Serenissimæ & Christianissimæ
Principi Mariæ, Reginæ Franciæ viduæ,
Sorori nostræ, Patrueli charissimæ Sa-
lutem ac mutuæ beneuolentiæ omnisque
felicitatis continuum incrementum.

Serenissima Princeps, Soror, Patruelis
charissima, litteras Serenitatis Vestræ,
quibus tam amanter de suo Nobis studio
in Pacem & trāquillitatem publicam te-
statur, simûlque Nos, vt eodem operam &
studia nostra conferre velimus, hortatur,
perquàm libenter accepimus. Intellexi-

mus etiam benignè quæ in eandem sententiam, ex mandato Serenitatis Vestræ, eiusdem huc ablegatus Internuntius Dominus de la Riviere viâ voce benè ac prudenter Nobis exposuit. Quemadmodum igitur à Nobis quidem nihil hætenus intermissum scimus, quod ad tranquilum Christiano Orbi statû conciliandum conducere; ita sanè haud mediocri Nobis solatio est, idem Pacis studium in Vestrâ etiam Serenitate idem idem recognoscere: in cuius verbis, dum ad cogitationes Pacis Nos vocat, actiones nostras approbari videmus. Itaque quibus hætenus ea cura tam altè insedit, quàm in animo quietis & concordiaë amantissimo insidere potest, non commitemus vt hæc Serenitatis Vestræ tam beneuola adhortatio apud Nos frustrâ fuisse videatur. Atque vtinam eam, ad tractatum qui nunc apparatur super eâ re, omnes quam Nos dispositionem adferant; breui beata illa tranquillitas in Orbe Christiano reflorescat. Quò tamen Serenitas Vestra, si eadem efficacia sua officia apud eos etiam qui hæc bella ex alieno nutriunt interposuerit, multùm cooperari poterit. Quod reliquum est, Serenitati Vestræ omnia

beneuolentissimi Patruelis officia deferentes, eidem omnia ex animi sententia euenire optamus. Dabantur in ciuitate nostrâ Viennæ, altera die mensis Nouembris, anno Domini supra mille sexcentos quinto & trigesimo; Regnorum nostrorum, Romani septimodecimo, Hungarici duodeuicesimo, Bohemici verò vndeicesimo, &c.

Eiusdem SERENITATIS VESTRÆ

Bonus frater Patruelis

FERDINANDVS.



L V M I E R E S
P O U R
L' H I S T O I R E
D E F R A N C E.

P O U R F A I R E V O I R
*les Calomnies, Flatteries, & autres
defauts de Scipion du Pleix.*



CALOMNIER les Vertueux, louer les vicieux, & mentir par corruption à tous les hommes, en faveur des meschans, sont les plus abominables crimes que puisse commettre vn Historien, qui doit travailler pour la Vertu, pour la Verité, & pour l'Eternité. Thucidide a dit, qu'il faut cultiver l'Histoire comme vne terre qui produira iusques à la fin du monde: cette commission doit

estre donnée aux plus gens de bien, & aux plus sages d'un estat. Parmy les Iuifs les Souuerains Pontifes auoient cette charge: ceux des Romains gardoient dans les Temples les memoires des choses passées: & Pline le Jeune donne non seulement la maïesté, mais la diuinité à l'Histoire. Pour la bien dresser, il est necessaire d'auoir vne parfaite cognoissance des affaires; la prudence politique, avec le talent de coucher nettement par escrit: cela regarde la capacité de l'Historien: mais sa principale partie est la probité, qui n'apprehende & n'espere rien: elle estime d'auantage la Verité que l'amitié des grands; & prefere sa reputation aux recompenses des riches: elle craint plus les reproches de sa conscience que la puissance des Fautoris: elle ne veut pas estre agreable à peu de personnes viuantes, mais elle desire d'estre utile à tous ceux qui viuront apres nous. Celuy qui porte le flambeau du temps, pour noircir avec la fumée de sa passion les actions des personnes vertueuses qu'il deuroit esclairer; celuy qui rasche de donner la lumiere de la gloire, qui est l'esclat des vertus heroïques, aux plus noirs & plus abominables crimes: faict de l'Histoire (qui est appellée la maïtresse de la vie) vne sorciere, qui sacrifie les enfans au malin esprit. Qui en doute, puis qu'elle massacre la reputation des innocens pour en faire vne offrande à vn Tyrant?

Tous ceux qui liront sans hayne & sans enuie le dernier Volume de Scipion Dupleix, iugeront qu'il est le plus infame que la corruption

de nostre siecle aye produit vn Fauory, qui ache-
toit cherement ses loüanges & les blasmes de
ses ennemis. La temerité de l'Historien paroist
en ce qu'il a entrepris vn ouurage tres difficile
& tres-dangereux, lors qu'il a voulu publier
son Histoire durant la vie & credit de ceux qui
en font la plus grâde partie, & qui veulent estre
loüez avec excez. Dupleix seroit estimé ver-
tueux, s'il auoit preferé la sincerité aux bonnes
graces & payement de ceux qui peuent & don-
nent beaucoup: il feroit voir son courage, si
pour la verité il auoit mesprisé les ressentimens
de leur cholere: il paroistroit bien instruit, s'il
ne pouuoit estre desmenty par tous ceux qui
ont veu ce qu'il a escrit: & il passeroit pour tres-
aduisé, s'il auoit si bien conduit sa plume, que
sans blesser la Verité elle ne toucha point ceux
qui la craignent. Si on remarque en luy ces qua-
tre qualitez d'un parfait Historien, en vn
temps qui a rendu la generosité & la sincerité si
criminelles; ie confesserois, qu'il est non seule-
ment le plus homme de bien, & le plus capable
de ce siecle, mais qu'il est si heureux, que ie n'en
vois point dans toute l'antiquité auquel vn
semblable dessein aye bien reüssi. Si au contrai-
re on recognoit dans tout le discours de Du-
pleix, qu'il a escrit l'Histoire de son temps pour
acquérir la bien-veillance & les biens-faicts
des hommes puissants: qu'il a flatté laschement
ceux qui sont dans la hayne du public: qu'il ne
sçait pas ce qui est arriué, ou le déguise malicieu-
sement: qu'il est si mal adroit ou si meschant,
qu'estant obligé de passer entre la Verité & la

Puissance, il heurte celle là pour ne toucher point cette-cy : Nous publierons avec grande raison que Scipion Dupleix est vn homme sans vertu, sans courage, sans cognoissance des affaires, & sans iugement. Je vois bien aussi qu'il ne veut pas seulement commettre vn peché, mais qu'il choisit vn crime remarquable, comme est celuy de mentir impudemment dans l'Histoire de France. Estant auaricieux, il est contraint d'en vser ainsi, parce que le Cardinal de Richelieu ne donne point de récompense qu'à vn vicieux extraordinaire.

Je ne veux pas estre estimé ennemy de celuy duquel i'ay eu assez bonne opinion tant qu'il a escrit la vie des morts, & iusques à ce que l'auarice plustost que la necessité l'ont porté à vendre la liberté de l'Histoire, pour la rendre esclaue du temps. Nous auons sçeu, qu'outre les appoinremens de l'Historien de France, il a receu douze mille liures, pour auoir contredit en sa faueur non seulement ce que l'Europe sçait & entend, mais ce qu'elle voit & sent. Je sçay bien qu'il ne faut iamais demander des tesmoins à vn Historien ; la qualité le dispense d'en produire : il ne doit point abuser de ce priuilege : s'il a le droit de pouuoir estre creu sans alleguer ses auteurs ; la prudence luy doit conseiller de faire en sorte, qu'il ne soit point desmenti par tous ceux qui escriront apres luy.

Seneque parlant d'un Historien appellé Ephorus, homme d'assez mauuaise foy, disoit qu'il auoit esté trompé & trompeur. Le mesme est arriué à Dupleix ; il a demandé des memoires à

*Seneca
in Apo-
colocyn-
tosi: Quis
vnumquam
ab Histo-
rico iura-
tores exi-
git?*

ceux qui l'ont employé ; & pour auoir sujet de les louer, il s'est deshonoré : il a voulu estre mal informé, pour mal informer toute la terre, & s'est rendu autant criminel en cherchant le mensonge, qu'en le debitant. La Religion nous defend de louer vn homme durant sa vie ; & la prudence nous enseigne, lors qu'une personne entreprend de manier des choses grandes & fragiles, d'attendre qu'elles soient bien remises & asseurées en leur place ; ce qui n'arriuera point que par vne Paix vniuerselle. Nous ne reconnissons iamais que par la fin, si le bon-heur ou la sagesse ont conduit les entreprises ; & si quelques bons succez au commencement ont esté les effectz d'un esprit sage, ou des amorces de la fortune ; ou, pour mieux parler, des traictz du secret iugement de Dieu.

I'aurois dissimulé la faute de Dupleix avec mespris, s'il se fust arresté dans les louanges du Cardinal de Richelieu : mais ie n'ay peu souffrir, qu'en dressant vn Panegyrique à celuy auquel il a voulu plaire, il face vne Satyre contre tous ceux qu'il n'ayme point, ou qui se sont opposez à son credit. Ce n'est pas que ie ne sçache, que c'est vn crime aussi grand de louer celuy qui faict mal que de blasmer celuy qui faict bien : l'Histoire estant le miroir des choses passées, ne les doit pas représenter renuersées : c'est jetter la confusion dans le monde, & commettre le plus horrible de tous les sacrileges, de donner au vice ce qui appartient à la vertu, & à la vertu le partage du vice. Je peux aussi asseurer, que celuy qui loue vn broüillon qui bouleuerse toutes

choies, doit estre plus execrable que l'aucteur du desordre, parce qu'il y a plus de scandale d'estimer le mal que de le faire; & que c'est le vray moyen de l'augmenter, de persuader à vn homme vain, qu'il acquiert la gloire par des actions qui produisent l'infamie.

Dupleix n'a trauaillé que sur ce dessein, & ie peux dire que son Histoire est vn pourtraict des passions du Cardinal: l'Escrivain les a eues deuant les yeux, & n'a pas tiré vn traict de plume sans les regarder: son intention n'a iamais esté de peindre la Verité, mais de faire vn tableau selon la fantasie de l'homme qui le deuoit payer: son desir estoit d'estre estimé innocent, en faisant paroistre criminels tous ses ennemis. Voyons, si l'ouurier qui a entrepris ce chef-d'œuvre, y a reüssi, & s'il a bien gagné la recompense qu'il a receu.

L'Historien a voulu commencer ses crimes par celuy de leze-Maiesté, lors que les premiers traicts de sa plume ont esté employez contre la Royne Mere du Roy. Il est vray, que cette grande Princeesse est tellement releuée par dessus son seruiteur ingrat, qu'elle l'a tousiours regardé comme faict le Soleil ces peuples d'Ethiopie, qui maudissent le principal instrument de leur bien, & deuiennent plus noirs en le regardant avec cholere. La Royne a pitié des salies de ceux qu'elle a nourris & esleuez, comme Dieu mesprise, & neant moins chastie les blasphemes des imoies, qui ressentent à tous momens les effects de sa Providence. Tout ce qui desplait à S. M. est, que le Cardinal ne recognoisse pas, que ce
qu'il

qu'il faict escrire pour couvrir son ingratitude, la descouvre d'avantage : & que son peché paroist plus grand, lors qu'il s'estudie de le rendre petit.

Il a fait travailler tous les Ecrivains corrompus du Royzume de France pour calomnier celle qui luy avoit mis en main les moyens d'acquiescer l'honneur : il cherche quelque soulagement à ses maux, en escoutant des personnes, yures, ou foles, qui iettent de la bouë vers le Ciel, qui a porté les astres qui brillent dans toute l'Europe : & sur tout le Roy, que le Cardinal doit tenir pour son Soleil. Si le bois pourri du navire Argos fust mis entre les constellations ; parce que les Dieux y estoient entrez pour se pourmener sur la mer : il me semble qu'il seroit plus à propos de donner la lumiere au vaisseau qui a porté les Dieux de la terre, que de le vouloir environner de tenebres. On l'a jetté dans les tempestes des emprisonnemens, des fuites, de la priuation des biens, des maladies, des trahisons, des apprehensions pour le Roy, & pour Monsieur : Dieu l'ayant retiré de tous ces dangers, on le veut bruler avec les feux artificiels des médifances & calomnies. Je sçay bien que l'esperance d'un changement, & le desir que tous les interessez ont de reserver la gloire au Roy d'avoir chastie cette insolence ; retiennent les plaintes des Princes, & lient les mains des serviteurs : mais cette consideration ne doit pas arrester les Chirurgiens qui doivent appliquer un emplastre aux playes chaudes, en attendant que les Juges instruisent le proces de ceux qui les ont faites.

Je trouue que les plus cruelles sont les dernières : la furie qui ne deuoit auoir qu'une pointe, si elle estoit d'un homme, & principalement d'un François, est conuaincuë d'estre d'un demon, ou d'un More, lors qu'elle ne se peut rompre ny par les efforts ny par le temps : ie vois au contraire qu'elle redouble sa force, & que ny la pitié de l'Innocence qui souffre, ni la grandeur de la Personne qui est poursuivie, ny la modestie de celuy qui defend sa Vertu, n'arrestent point la cholere des persecuteurs, & l'effronterie des imposteurs.

Nous auons veu au commencement de nos afflictions des petits liurets de sept ou huit feuillets, qui ont attaqué la reputation de la Royne Mere du Roy, comme enfans perdus qui estoient destachez de l'auant-garde : depuis vn an on a choqué avec le gros Volume de plusieurs pieces qui composoient la bataille : on nous gardoit pour l'arriere-garde l'ouurage de Dupleix, qui est estimé d'autant plus fort, que c'est vne Histoire dressée par celuy qui a trauaillé à la generale de la France, qui publie celle du Roy, qui se couure du seau & du Nom de S. M. & qui met dans les loüanges du Fils des injures contre la Mere. Cét homme s'est imaginé, que personne n'oseroit choquer cette qualité d'Historien, appuyé d'un priuilege & d'une approbation ; & sur tout protégé par le Cardinal de Richelieu, qui donne la tetteur par tout, qui a garrotté les mains, lié les langues, arraché les plumes, estouffé les soupirs, & opprimé la liberté Francoise. Mais il faut que son Eminence sçache qu'elle en fait trop dire pour n'ecouter point

quelque chose : son Ecrivain apprendra , que nous auons promis dans nos autres ceures qu'il ne viendrait rien à nostre cognoissance qui peut blesser tant soit peu la reputation de la Royné, qui ne receut sa repartie: cōme nous promettons avec raison, nous nous acquitons avec iustice: elle nous oblige à dire quelques veritez à Dupleix.

La premiere sera, que ie m'estonne de ce qu'un homme qui a escrit toute l'Histoire de France, n'a point sçeu dans son dernier ouurage la premiere loy de sa profession , qui est , comme dit Cicero, de ne rien dire qui soit faux , & de ne rien cacher qui soit vray ; de ne faire paroistre ny affection, ny aduersion. Il estoit impossible à Dupleix de garder cette regle , s'estant proposé la recompense , qui l'a faict hastier d'escire, de peur qu'elle luy eschappa avec le credit ou la vie de celuy duquel il atendoit un riche present. Il s'est informé avec grand soin de ses appetits: pour les contenter, il a meslé la douceur des loüanges qu'il luy donne , avec l'aigreur des iniures qu'il dit à ses ennemis : l'auarice a precipité son esprit & sa main , en luy faisant presenter à tout le monde vne viande fort mal assaisonnée.

Le grand Dieu, qui montre aussi euidentement sa puissance infinie en tirant le bien du mal qu'en creant le monde de rien, fait cognoistre sa bonté, en ne permettant iamais qu'on aduance le mensonge, que pour faire sortir de cette nuit le iour de la Verité. Ce que Dupleix a voulu escire pour l'estouffer, sert pour la faire esclatter d'auantage. Il a dressé l'Histoire de son temps

avec ignorance & corruption, mais il a esueillé ceux qui sont amateurs de la sincerité, & plus sçauans que luy dans les affaires: il leur a mis la plume en la main pour le desmentir, & les a portez a vouloir laisser à la posterité le recit veritable de ce qui s'est passé en France, & ailleurs, durant le credit du Cardinal de Richelieu. Cet ouurage pourra voir le iour apres les tenebres du temps; & dira avec science & iugement, sans esperance & sans crainte, ce que nous auons veu & senti de bien & de mal; depuis dix années de trouble & de confusion.

L'Architecte Gnidien, qui bastit la tour du Phare, mit le nom du Roy d'Egypte sur le plastre, & graua le sien au dessous sur le marbre: le temps qui fit tomber la crouste pourrie, descouurit ce qui estoit sur la pierre solide. Les Historiens qui ne trauaillent que pour leur aage, qui placent des mauuaises actions, & couurent les bonnes, ne voyent pas que la Prouidence de Dieu, amoureuse de la Verité, a tousiours fait perdre les œuvres des flatteurs, & a conserué celles des veritables: nous deuons escrire en Chrestiens, qui en dressant les exemples des iugemens de Dieu, esleuent vn Phare qui fait voir les bans & les escueils des vices, & montre la route de la Vertu qui conduit au port de salut.

Le Sieur Dupleix n'a pas eu toutes ces considerations, lors qu'il s'est engagé à publier l'Histoire de son temps, dans laquelle il s'est proposé de flatter les passions d'un Fauori: il a recogny que la plus violente estoit contre la Royne Mer-

re du Roy : il s'est estudié de masquer en furies toutes les actions & paroles de cette grande Princesse, & d'habiller en vertus toutes les insolences & salies d'un seruiteur ingrat. Venons aux preuues.

Cet Aucteur ayant escrit la vie du feu Roy de glorieuse memoire, rend par tout à la Royne son Espouse les tesmoignages qu'il doit à ses rares vertus naturelles, acquises, & surnatureles : ce qui fait voir, que l'Escrivain n'a changé de discours dans l'Histoire de Louys XIII. faite sous le credit du Cardinal de Richelieu, que pour sacrifier à la hayne d'un seruiteur ingrat les blâmes de sa Bien-faëtrice. Cela sera trouué estrange, que du Regne du Roy son Fils, sa Mere & sa Regente soit plus mal traitée, apres auoir plus trauaillé pour luy, & pour son Estar, que sous la douceur de l'Empire de son Mary. Outre cela, il me semble que le nom de Mere est encore de plus grand respect que celuy d'Espouse; & que d'auoir gouuerné fort sagement la France & de l'auoir conseruée entiere & florissante, sont des preuues de Vertu, là où estre Femme & Mere des Roys sont des effects de la benediction de Dieu. Ce qui est plus extraordinaire, est, que ces respects qui deuoient croistre avec les merites, actions & aage de la Royne, sont violez, non par son Enfant (à Dieu ne plaise que nous ayons cette pensée) mais par son seruiteur tres-obligé : ou, pour mieux dire, tellement chargé de ses bien-faicts, qu'il semble que le trop grand poids l'a plongé dans l'abyeme de l'ingratitude. Dupleix qui dissimule, ou nie, ou

conuertit en injures ces bien-faits en cent en-
droits de son Histoire, les aduouë vne seule fois
en ces termes: *Le Cardinal ne vouloit pas contredire*
cette grande Princesse Mere de son Roy, de laquelle il
reconnoissoit tenir toute sa fortune. Iugez, si les fruits,
que nous vous presenterons, deuoient sortir
d'un arbre planté & cultivé par cette main
Royalle: nous ne voulons defendre ses actions
qu'en les faisant voir. Si l'Empereur Titre Ves-
pasiën, estant sur le poinct de mourir, fist ouvrir
sa litiere; pour dire en regardant le Ciel qu'il
n'auoir rien commis en sa vie qui luy donna du
repentir, qu'une seule chose qu'on n'a point
sceu: la Royne peut asseurer, qu'elle n'a rien fait
qui luy aye peu apporter du déplaisir; que d'a-
uoir trop abraucé le Cardinal de Richelieu. Il
est vray aussi qu'elle pourra dire au Roy, ce que
Agésilas mere du Roy Agis disoit à son fils:
Vostre grande bonté vous a faict du mal, & à
moy aussi. Elle adjousterà: Vous auez trop gar-
dé le Cardinal de Richelieu, & ie vous ay trop
prescé de le prendre.

Il faut remarquer ce que nous auons dit autre-
fois; que jamais ny Duplex ny les autres Escri-
uains du Cardinal ne disent la Royne Mere du
Roy; mais seulement la Royne Mere: ce qui
pourra faire défier les siècles suiuans; si elle
estoit Mere du Roy regnant. Le suiet d'en douter
sera augmenté par la cognoissance du mauuais
traictement qu'elle a receu, & sur tout dans les
escripts du temps: en voicy quelques eschantil-
lons. Dans la Preface de l'Historien: *La Royne*
Mere mesme, qui en auoit fait son oracle, ayant presté

L'oreille à ses ennemis, & conceu des sinistres impressions de luy, avec ce qu'elle le voyoit plus attaché au service du Roy & au bien de l'Estat, qu'aux interets de tout le reste du monde, tascha de le descrediter & disgracier envers le Roy : mais ce fut en vain ; Sa M. deservant plus aux preuves sensibles, dont la France recoit le fruit, qu'à des paroles de cholere. De sorte que la Royne Mere en remuant toutes pierres pour le perdre, r'affermist d'autant plus son credit & faueur envers le Roy : & luy arriva ce que les Poëtes chantoient de la Deesse Iunon, qu'elle accreut la gloire & reputation d'Hercule, en opposant des monstres à sa vertu. Le Cardinal pourtant ne voulant pas se roidir contre la passion d'une si grande Princeesse, Mere de son Roy, à laquelle il recognoissoit avoir des grandes obligations, mais plustost la laisser r'allenir par son estoignement de la Cour, & du maniment des affaires d'Estat. supplia Sa Majesté de luy permettre de se retirer, dont il fut esconduit, & au contraire obligé par son commandement tres-expres à continuer son ministere. Delà que la Royne Mere ne pouuant plus supporter l'esclat de la faueur du Cardinal aupres du Roy, transportee d'indignation, & poussee par un mauvais conseil ; se retira en Flandres : retraicte que la precipitation de sa passion luy fist choisir plustost qu'une raison, ou consuleration bien digeree : car outre qu'elle ne pouvoit estre en pire conduion en lieu de ce Royaume, que chez l'estranger ennemy du nom François, ce n'estoit pas là un refuge convenable à une Princeesse, qui avoit en l'honneur d'estre Royne & Regente de France.

Dupleix a iugé que le Cardinal de Richelieu impatient de son naturel, chastie par des mala-

dies horribles, agité par le mauuais succez des affaires qu'il a entrepris, n'auroit ny la patience ny le loisir de lire, ou d'esconter tout cét amas de mensonges, dans lequel l'Ouurier a cherché vn plus grâd payement par le nombre des feuillets. Les premieres pensées de l'Historien ont esté, de faire dans la Preface, qui est la seule piece qu'il a leuë au Cardinal, vn abbrege des injures qu'il a semé dans le corps de son Histoire contre la Royne. Ce qui est encore plus considerable, est, qu'en acquerant les tiltres de calomniateur & de flatteur, il fai&t cette protestation: *Au demeurant, ie sçay combien il est difficile d'escrire, & plus encore de publier l'Histoire de son temps sans soupçon de hayne ou de faueur, passions trop ordinaires aux hommes.* Il a dit deux fois dans la mesme page, que la Royne a esté emportée & transportée par ses passions: il veut qu'on croye qu'il en est exempt, lors qu'il mesdit de la Mere de son Roy: il assure qu'il n'a point d'esgard à la faueur, lors qu'il s'en couure pour calomnier, & en retire la recompense: il nous promet qu'il escrira avec toute la sincerité & candeur de celuy qui a desja acquis l'approbation: & ne voit pas qu'il perd la creance dès l'entrée de son ouurage: il n'y a rien plus contraire à la sincerité de l'Histoire, que de dire des injures à ceux qui sont dans l'affliction, & de chanter les louanges de ceux qui sont en prosperité. L'Historien qui voudra paroistre homme de bien, dira les choses naïfvement comme elles sont arriuées: ceux qui les liront, donneront dans leurs ames les noms aux vertus & aux vices. Ce n'est pas estre vn Hi-

Historien, mais vn declamateur importun, d'escrire comme fait Dupleix : *Ce grand, ce divin, cét incomparable Cardinal, qui n'a point eu & n'aura jamais son pareil.* Et au contraire : *Cette Royne poussée de cholere, portée de passion, transportée d'indignation, Junon qui enuoye des monstres pour les opposer à la vertu d'Hercule, qui est le Cardinal.* Certes, voila bien debutté pour vn Historien sincere. Si Lucian auoit leu cette entrée poëtique, il en feroit des railleries aussi plaisantes qu'il a fait sur celle qui commençoit par le Chenal aislé, qui marchoit sur les ondes de la mer, & sur la pointe des espics. Je croirois, si Dupleix estoit vn ieune frippon, & qu'il traictast vne matiere indifferente, que le fouiet de l'escole le pourroit corriger : ie laisse à penser si estant desia vieux, & maniant des suiets de si grande importance, comme sont la reputation du Roy & de la Royne sa Mere, l'estat des affaires de France, & les conseils qui l'ont reduite au point où elle est à present, on ne iugera pas que des verges plus rudes & plus infames que celles d'un Regent doiuent punir non pas son ignorance, mais son crime. Quel monstrueux discours est-cé cy ? *La Royne tascha de disgracier le Cardinal, parce qu'il estoit attaché au seruice du Roy.* Si la Royne qui l'a lié à ce seruice, & l'a conserué lors que le Roy l'en a voulu chasser, ne peut souffrir que celui, pour lequel elle a respondu, descharge sa caution; il faudroit aduoüer, que S. M. auroit l'esprit bien foible. Dupleix adiouste, que *la Royne ne pouuant plus supporter l'esclat de la faueur du Cardinal, se retira en Flandres.* Ceux qui liront cette Histoire apres

cent ans, croiront que la Royne n'est pas sortie d'une prison de six mois pour aller aux Pays bas, & n'a pas esté contrainte par l'apprehension de plus grandes violences de quitter le séjour de la France: mais que son enuie, qui n'a peu supporter l'esclat que sa bonté auoit donné à son seruaiteur, luy a fait abandonner le magnifique Palais de Luxembourg, pour de plein vol s'en aller à Bruxelles. Quelle impudence de jeter dans le public vne Histoire qui renuerse la Verité, confond la suite, & destruit l'ordre des choses qui sont si fresches dans la memoire de tant de millions de personnes? Si Dupleix vouloit escrire en homme de bien, il deuoit dire les causes de la mauuaise intelligence, & se contenter d'une simple relation des actions & paroles de la Royne, sans faire des inuectiues, pour nous desbeindre cette sage Princeesse comme vne personne furieuse; qui a voulu de gayerie de cœur rompre l'ouurage de ses mains apres l'auoir paracheué. Si cet escriuain auoit suiuy les preceptes de son art, & s'il nous auoit laissé la liberté de iuger des affaires, sans leur donner des bonnes ou mauuaises qualitez selon la fantaisie ou corruption: il auroit tesmoigné qu'il a eu bonne opinion de nostre iugement, & nous serions obligez d'en porter vn favorable de luy: mais ou bien il a creu que nous estions tous des bestes, qui ne sçaurions pas tirer les conclusions de ses propositions, ou il s'est persuadé, qu'en faisant le zelé, pour le Cardinal de Richelieu, & l'eschauffé contre ses ennemis, il produiroit ses passions dans toutes les ames de ceux qui liron

son ouvrage. Je me souviens à ce propos d'auoir
eu que les Absterres avant ouy la tragedie
d'Archelaus sur le suiet d'Andromede, l'ardente
chaleur du Soleil, qui fraploit sur les testes des
spectateurs, donna à la plus grande partie la fié-
ure chaude : ces pauvres gens dans leurs resue-
ries recitoient tout ce qu'ils auoient retenu de
cette action, & representoient les affections &
gestes des acteurs: peut estre que Dupleix s'ima-
gine qu'apres que nous l'aurons duy declamer
contre la Royne Mere du Roy, & chanter les
louanges de ce grand Cardinal, nous tomberons
dans sa frenesie, qui nous fera dire les mesmes
choses : mais ce pauvre homme ne voit pas que
le soleil qui fait bouillir son sang, & a corrompu
ses humeurs, n'a point touché les nostres; outre
que personne ne sera si bien payé pour croire,
comme Dupleix l'a esté pour escrire. S'il a esté
gagné par argent, le Cardinal n'a pas assez de
fonds pour obliger tous les viuans & ceux qui
viuron, à suivre les mouuemens que son Histo-
rien leur veut donner. Les esprits des hommes
sages qui lisent vn escrit, sont comme vn feu qui
fait aller en fumée l'argent vif des passions, qui
est incorporé avec l'or de quelques veritez. Ce-
luy qui compose vn liure, mais principalement
vne Histoire, se doit persuader, que tous ceux
qui verront son ouvrage, examineront en parti-
culier non seulement toutes les choses, mais pe-
seront les paroles, côme les changeurs regardent
& tournent vne piece de monnoye apres l'autre.
Le Cardinal deuoit pour son honneur faire le pre-
mier examé, reietter ses louanges, & corriger les

blasmes qu'on donne à la Roïne. Il eust esté encore plus vertueux & plus sage, s'il eust mis ce gros liure dans le feu, comme Alexandre le Grand ietta dans l'eau l'Histoire d'Aristobulus, qui luy attribuoit des actions fausses, ou comme Attila fit brusler à Paue les vers qui luy furent presentez par Marulle, parce qu'il le faisoit descendre des Dieux. Combien est esloigné de cette generosité celuy qui achete cherement des Panegyriques, qui recompense les iniures qu'on dit à ses Bien-faïcteurs, & fait brusler par les mains des bourreaux les Apologies que les bons seruiteurs font pour l'innocence de leurs Maistres? Nous l'auions prié de se contenter de l'exercice de nos patiences, puis que celuy de nos plumes ne luy estoit point agreable: il se pouoit garantir de ce desplaisir, & nous esparagner cette peine: mais puis que sa colere emporte sa prudence, il met à couuert la nostre: la sienne luy deuoit conseiller de ne prouoquer iamais ce qu'il craint, qui sont les veritez ardenres & cuisantes, puis qu'il n'aime que les luisantes & plaisantes: il fait voir, que la vanité surprend pluost les esprits subtils que les grossiers, parce qu'elle entre plus aisément dans vne ame ouuerte que dans vne serrée. Je sçay qu'il crie, lors qu'on luy perce cette enflure: mais nous ne pouons guarir autrement la playe que les picqueures de ses Escriuains ont fait à vne belle reputation. Tout ce que Dupleix dit contre celle de la Roïne Mere du Roy en plusieurs endroits de son Histoire, peut estre reduit à quatre chefs: 1. Aux affaires de la Regence. 2. A ceux de la

premiere sortie de la Cour, seiour a Blois, mouuemens d'Angoulesme, & d'Angers. 3. Aux suiets qui ont fait perdre au Cardinal l'honneur des bonnes graces de cette Princesse. 4. A ce qui s'en est ensuiuy contre S. M.

Nous reduirons à ces quatre articles tous les discours de l'Historien. Encore que nous ayons en nos responce à diuers Libelles ietté au vent toutes ces impostures, & que Dupleix n'adionste à ce qu'il a pris dans les amusemens du Pont-neuf que des mauuais memoires du Cardinal; cét Autheur croiroit estre plus habile homme que ses compagnons, parce qu'il a fait vn plus gros liure, si on ne luy faisoit voir que sa malice & son ignorance surpassent de beaucoup celle des Escriuains de dix ou douze fueilles.

Le premier blasme qu'il donne à la Royne, est, d'auoir donné des charges & des biens au Marechal d'Ancre : il dit, que le prodigieux auancement de cét estranger esleué de la poussiere au plus haut degré d'authorité, & plus encore son arrogance, seruirent d'vn tres-apparent pretexte de iuste mescontentement, & quasi à toute la Cour : & leurs ressentimens se communiquerent aisément à tous les Ordres du Royaume, n'y ayant rien qui attire plus l'ennie & la hayne de plusieurs, que la faueur du Prince enuers vn seul, & plus encore s'il est estranger, & qui pu est insolent, orgueilleux & incapable de telle charge. En la page 136. Le Roy est vny d'affection avec la Royne sa Mere, & tous deux se rendent les deuoirs auxquels la nature & la decence les oblige, mais quant aux affaires d'Estat, leurs volontez sont grandement estoignées: car elle se laisse emporter à la passion du Marechal

I:

Pag. 411

d'Ancre, par les charmanes impressions de Galigä sa femme; & le Roy recognoissant la malice du Marefchal, se refout à s'en deffaire; &c. L'Historien ne croyant pas auoir dit assez d'iniures au Marefchal d'Ancre, les fait escrire par le Marefchal de Bouillon; & composant la lettre à fa mode, le fait appeller *faquin Florentin*. Il ramasse auſſi avec ſoin toutes les remonſtrances que le Parlement fit durant & apres la Regence, & les lettres que les Princes meſcontens eſcrivirent à la Royne, durant les trois mouuemens qui arriuerent dans le Royaume ſous le pretexte du Marefchal d'Ancre, mais qui ne tendoient qu'à empêcher le Mariage du Roy. Sur quoy il faut remarquer quelques contradictions tirées des elcrits de cét Historien. La premiere eſt, qu'en vn endroit il deſcrit le Marefchal d'Ancre comme vn *faquin*: ailleurs il dit, qu'il eſtoit *homme d'eſprit, adroit aux armes, qu'il tranchoit du grand Capitaine*: en pluſieurs lieux il le blaſme d'eſtre *Italien*; & tache de faire paſſer ces mots, en *Italien, d'Italien, à l'Italienne*, pour des iniures: comme ſi cette nation, qui eſt des plus ſages & des plus polies de la terre, qui fournit maintenant à l'Egliſe les Souuerains Pontifes, qui remplit le Sacré Conſittoire, & qui a donné vne Mere au Roy, eſtoit la plus infame du monde. L'Historien accuſe la Royne pour auoir mediocrement aduancé vn homme de ſa nation, auquel elle ſe conſioit. On a obiecté la meſme choſe à Blanche Mere & Regente de ſainct Louys. Dupleix aduoné, que le Marefchal auoit les bonnes qualitez, que nous auons dit; &

Pag 42.
en la let-
tre que le
Maref-
chal de
Bouillon
aſcrit à
Mōſieur
le Prince.

Pag. 146.

Pag. 147.

ce pauvre homme, aveuglé par les passions, & par l'argent du Cardinal, ne voit pas qu'il blasme d'avantage le Roy que la Royne sa Mere, lors qu'il dit, que ce Prince fut porté par les persua- Voyez la
sions de Luynes, & mesme encouragé pour faire tuer le pag 159.
Mareschal d'Ancre. Il dit aussi, que le Roy ayant
desia comblé d'honneur & de biens Luynes, le fortifia
encore de l'eminente qualité de Duc & Pair de France;
& à cet effect erigea en Duché & Pairie le Comté de
Maille sous le mesme nom de Luynes, qui n'avoit esté
donné qu'à vne petite maison champestre, mais noble,
en Provence. Voila vne touche donnée à l'extra-
ction du Connestable: en voicy de plus rudes à
son esprit & à ses mœurs: il dit, qu'il estoit incapa- Pag. 239.
ble de la charge de Connestable: que le plus nouveau Pag. 24.
Capitaine y aspira par vne ambition desreglée: que Pag. 294.
le Roy ne l'estimoit pas: qu'il avoit esté eslé plus Pag. 295.
par la faveur extraordinaire du Roy que par son me-
rite: qu'il s'estoit rendu agreable en dressant des moi-
neaux à prendre des mouches: qu'il estoit Connesta-
ble sans experience, & Garde des Seaux sans suffi-
sance: que ces emplois le rendoient ridicule, & que les
titres d'honneur ne luy acqueroient que de la honte.
En vn autre endroit il dit, que Luynes ne pouvoit
garder le secret. De tous ces beaux eloges que Pag. 173.
Dupleix donne au Duc de Luynes, ie tire cette
consequence, qu'il ne faut pas s'estonner si cet
Historien peu iudicieux ose blâmer la Royne,
pour avoir fait du bien apres dix-sept ans de ser-
vice, à vn Gentilhomme de sa nation, qui avoit
de l'esprit & du merite; puis que dans l'Histoire
du Roy, & en son vivant, on ose imprimer
sous le privilege de son sceau, qu'il a aduancé aux

premieres charges vn sot, vn lasche, vn ignorant, vn indiscret, qui n'auoit point d'industrie que pour attraper des mouches. Sur ce rencontre, ie demanderois volontiers aux plus sages François si ce n'est pas faire tort à l'esprit & a la iustice du Roy, d'escrire qu'il a donne sa confiance à vn lourdaud; qu'il a fait du bien, & a dit tous les secrets de son cœur à vn homme incapable de toutes choses. Il n'y aura pas vn homme de bon iugement, qui ne voye que Dupleix est veritablement criminel de leze Maieste. Celuy qui a escrit que le Roy a peu estre surpris aussi bien que Salomon & Dauid, par vn homme subtil, artificieux, sçauant, beau parleur, vigilant, mais grand trompeur & tres-malin, ne donne aucune atteinte ny à l'esprit ny à l'ame du Roy: cependant, dans la iustice distributiue du siecle, Dupleix a eu douze mille liures de recompense; & celuy qui descharge la reputation de son Prince, & qui deffend son honneur, perd autant de rente que Dupleix acquiert de salaire.

Page 241.

Il dit, que le Roy ne rend conte de ses actions qu'à Dieu seul, & qu'il peut faire honorer ceux que bon luy semble, pour des considerations telles qu'il luy plaist. Je m'assure, que S. M. qui veut conseruer le tiltre de Louys le Iuste, ne demeurera pas d'accord de cette regle: celle de la iustice ne vient jamais de la volonte & de la puissance absoluë; mais de la loy qui ordonne d'estimer les hommes avec le poids, de les recompenser avec nombre, & se confier en eux avec mesure. Vn flatteur semblable à Dupleix dit à Antigonus, que toutes choses estoient honnestes & iustes pour les Roys,

Roy. Ce sage Prince responoit, que c'estoit vne leçon pour les tyrans, mais que pour les bons Roys, il n'y a rien d'honneste que ce qui est honneste, ny de iuste que ce qui est iuste. En effect le Souuerain est le ptocteur, & doit estre le premier exécuter de ce qui est equitable & honorable.

Le second chef du blasme que l'Historien donne à la Regence de la Roïne, est la profusion des Finâces: il allegue sur ce suiet toutes les remonstrances qui furent faites par le Parlement, & les plaintes des Princes qui escriuirent diuerses lettres: toutes ces pieces sont rapportées pour faire le procez à la memoire de la Roïne, qu'on accuse d'auoir esté mauuaise mesnagere. Il est constant, que le feu Roy n'auoit laisédans la Bastille que quatorze ou quinze millions de liures: ce fonds fournit à l'extraordinaire de six ans; on n'en tira iamais rien que par lettres verifiées à la Chambre des Comptes, qui faisoient expresse mention de l'extreme necessité. Il est vray, que par les secrettes cabales de ceux qui armoient pour s'opposer au Mariage du Roy, la Chambre refusa les lettres & iussions pour prendre deux millions & demy, qui estoient nécessaires pour subuenir aux frais de la guerre, despeses du voyage, & magnificences pour les deux Mariages. Sur ce refus le Roy alla prendre cet argent dans la Bastille: il voulut que la Roïne sa Mere y fust presente, & que le Chancelier, Secretaires d'Estat, & Chefs des Finâces fussent tesmoins. L'Historien ne trouue rien à redire en tout ce procedé: mais il a si peu d'esprit, ou tant

II,

de malice, qu'il ne voit pas, ou ne veut point écrire, que jamais Finances ne furent ny plus saintement mesnagées, ny plus vtilement employées: elles aiderent au reuenu ordinaire durant trois ans pour acheter la Paix, & durant les autres trois pour faire cesser la guerre. Les Grands qui en auoient eu la meilleure partie, ne se plainquirent de la pretenduë profusion, que lors qu'ellen'alloit plus à leur profit, ou qu'on ne fust pas en humeur ou en pouuoir de conuinuer les presens qui les auoient retirez de l'incommodité. La Regente de la Royné sera eternellement louable, de ce qu'avec peu de Finances elle fit appeller les quatre années de sa Regence le siecle d'or; & les dix années du credit du Cardinal de Richelieu seront à iamais execrables, de ce qu'avec des grands thresors tirez du sang du peuple, il n'a fait qu'un siecle de fer & de plomb, & un deluge de sang & de larmes: il a plus despensé dans chaque année de son pouuoir, que la Royné ne fist dans toutes celles de son auctorité. S'il dit qu'il a fait des choses plus remarquables, ie demeure d'accord, qu'il en a remué de tres grandes: mais il me semble qu'il n'en a point fait de bonnes, ou qu'il les a aussi tost conuerties en mauuaises. Il a fait transporter en especes tout l'or & vne partie de l'argent de la France: il a fermé la porte au trafic, qui pouuoit remplacer nos Finances espuisées: il n'a point tiré de la Bastille vne espargne de quatorze ou quinze millions, mais il a ietté hors de nos frontieres plus de quarante millions qui rouloient parmy le peuple: il n'a plus que des monnoyes

estrangetes ou de bas aloy, lors que le meilleur demeure caché dans les places qui sont destinées à la retraicte de celuy qui a appauvry le Roy, le public, & quasi tous les particuliers, hors d'une centaine d'hommes de sa faction. Tout cela me fait dire que Dupleix a fort peu d'obligation au Cardinal de Richelieu, qui fait tout ce qu'il peut pour faire trouver menteur son Historien.

Le Marechal & la Marechale d'Ancre n'ont pas laissé quarante mille liures de rente: M^r. de Luynes eut tout cela dans un iour sans merite, comme dit l'Historien: le Cardinal en possede dix fois davantage, pour avoir engagé la France à sa ruine; à quoy il a employé autant de millions, comme on a fait mourir de milliers d'hommes, pour acheter des places des Suedois, pour entretenir ce party, pour partager les Provinces des Pays-bas avec les Hollandois, pour ruiner la maison d'Autriche, pour despoüiller le Duc de Lorraine, pour brider celuy de Savoie, pour acquerir celuy de Parme, pour corrompre diverses personnes, pour avoir des intelligences imaginaires dans des places. Nous n'avons retiré de tout cela que de la confusion & de la perte, & il faut sans remboursemēt rendre; qui est la parole qui escorche la langue, comme disoit le bon S. Louys: & nous sommes reduits à nous deffendre, non seulement contre les ennemis que nous avons irrités, mais contre les allies que nous avons achetés.

Pour conclusion de ce discours, la Roynie avec treize ou quatorze millions de liures a conservé ses enfans, & l'Estat, qu'elle a rendu entier & florissant.

rissant au Roy: & le Cardinal de Richelieu avec plus de cent millions d'extraordinaire a appelle quatre armées estrangères aux frontieres de France, & leur a fait piller en quatre endroits le Royaume.

Pag 196. Mais n'a il point de honte de recompenser aux despens du Roy vn homme qui escrit, que du temps du Connestable de Luynes, l'espargne estant espuisée par les despenses sans besoin, & tant de comptans par lesquels on conuiron les dons immenses, il fallut auoir recours aux moyens extraordinaires, qui sont les Edicts: estant de necessité, que les Finances espuisees par l'ambition & par l'auarice, soient remplacées par des exactions iniques?

L'Historien n'a pas consideré qu'il escrinoit la vie de Louys le Juste. Il fait dire des choses bien estranges au President de Verdun, & à l'Aduocat General Seru. Il rapporte les traicts plus hardis de leurs harangues; par le premier, il fait menacer le Roy des iugemens de Dieu sur sa personne Royale: & il fait dire au second, que S. M. se faisoit tort de venir en son Parlement, pour audoiser par sa presence ce qui ne se pouoit faire par raison & par iustice. Encore que ie ne croye pas que ces Messieurs ayent parlé si crûement, quand cela seroit, Duplex a mauuaise grace de coucher dans son Histoire publique ce qui a esté osté des registres secrets du Parlement, pour en faire perdre la memoire. Si ces remonstrances auoient esté faites durant le credit du Cardinal, qui a fait verifier cent fois plus d'Edits que le Conestable de Luynes, l'Escriuain n'auroit pas osé rapporter ces discours, & ne condamneroit pas les Edits cême

iniustes. Il peut dire pour son excuse, qu'il seroit mis à la Bastille, s'il disoit vray: mais il s'exempteroit de la prison & de l'infamie, s'il n'escriuoit point. Il faut aussi confesser que le Parlement n'a garde de faire les remonstrances avec cette liberté qu'il auoit durât le credit du Duc de Luynes. Le pouuoir du Cardinal a rompu la seule barriere qui restoit en France pour arrester la tyrannie des Fauris: nos bons Roys ont mis ce milieu entre leur puissance absolüe & les droits & priuileges des Prouinces, des Officiers & des peuples. Il est aussi necessaire de remarquer sur cet article des Finances, que durant la Regence on n'a point fait d'Edits ny des partys pour auoir de l'argent par voyes extraordinaires: & que dans les deux premieres années du credit de Mr. de Luynes, les plaintes furent faites, & la France fut sur le poinct de se reuolter à cause des nouvelles impositions, charges & offices qu'on creoit tous les iours, outre la reuente des domaines qu'on engagea denant le temps, & qui eussent fait au Roy dans peu d'années vn fonds pour subuenir à toutes les affaires extraordinaires, & pour soulager grandement le pauvre peuple. Toutes ces confusions, impositions, creations d'offices & inuentions des Partisans, ne sont rien à comparaison de ce que le Cardinal a fait pour establir & cōseruer sa fortune, pour satisfaire à sa folie, qui le portoit à vouloir ruiner la maison d'Autriche & pour contenter sa colere: elle le poussoit à se venger de tous les Princes voisins, pour quelques vetilles qu'il auoit à démeller avec leurs Ministres, contre lesquels il se picquoit mal à

propos, comme nous ferons voir plus ample-
ment dans nostre Histoire.

III.

Dupleix fait paroistre sa passion, en ce qu'il
semble approuver les mouuemens des Princes
durant l'auctorité de la Royne: parcé, dit-il, que
le *Mareschal d'Ancre* les vouloit opprimer. En vn
autre endroit il dit, que c'estoit *une persecution*. Il
tasche de les rendre innocens, encôre que sur le
suiet de la detention de Monsieur le Prince il
apporte la Declaration du Roy, qui contient des
choses estranges qu'il falloit taire, puis que S.
M. a voulu qu'elles fussent tirées du Greffe du
Parlement.

Pour faire cognoistre l'esprit partisan de l'Hi-
storien, il est necessaire de remarquer, que les
principaux souleuemens des Princes sont arri-
uez le Roy estant Mineur, & la Royne ne sub-
stant en auctorité que sous le bon plaisir de S. M.
cepen-tā ces guerres ne sont point condamnées
par Dupleix, ny appellées *reueltes*, *rebellions*, *fa-
ctions*, & *crimes de leze Maieité*, qui sont les quali-
tez ordinaires que cet Antheur donne aux mou-
uemens d'Angoulesme & d'Angers, arriuez deux
ou trois ans apres; & dans lesquels, hors du pre-
mier Prince du Sang, se trouuoient quasi tous
ceux qui estoient dans les premiers troubles;
avec plusieurs Officiers de la Couronne, vne
partie des Grands du Royaume, & vn Prince du
Sang Royal, sous l'adueu de la Royne Mere du
Roy, & principale direction du Cardinal de Ri-
cheliu, pour lors Euesque de Luçon. Ce party
est appellé *rebelle*, *fâcheux*, & *ennemy du Roy*: cer-
tes il me semble qu'il ne merite pas ces qualitez,

Pag. 135

Pag. 141

Pag. 139.

& 131.

ou il les faut donner aux mouuemens des Princes, qui vouloient empescher le Mariage du Roy, & pouuoient estre soupçonnez de mauuais dessein, pour approcher leurs testes de la Couronne. Mais l'Historien dit, que les premiers troubles estoient contre le Marechal d'Ancre qui *persecutoit les Princes* : & ie diray aussi que les seconds estoient contre le Duc de Luynes qui *persecuroit la Mere du Roy, les Princes, & les Grâds du Royaume*. Mais le Marechal d'Ancre estoit estranger, & le Duc de Luynes estoit François: ces distinctions sont des amusemens pour le peuple. Dupleix demeure d'accord que le Marechal estoit plus habile homme que le Connestable; & il nous fait voir dans les sanglantes remonstrances du Parlement, que cestuy-cy auoit fait du mal au public par les Edicts qu'il appelle *iniustes*, là où l'autre n'en fut iamais accusé. Le Connestable auoit mis dans sa maison en deux ans beaucoup plus de charges, de Gouvernemēs & de biens, que le Marechal n'auoit fait dans la sienne en sept ans avec plus de merite: le Connestable auoit blessé l'honneur de la Naissance du Roy, & auoit priué contre toute sorte de iustice, diuine & humaine, la Royne de l'education de ses Enfans, que personne ne luy pouuoit oster sans conuiction d'un defaut qui l'en rendit incapable. Cependant il plaist à l'Historien Dupleix, que ceux qui suiuirent les interets de la Royne contre vn Fauory, soient des rebelles, ennemis du Roy; & que ceux qui ont suivi les partis de Monsieur le Prince soient des persecutez & opprimez iniustement. Il est vray que si

la desroute du Pont de Séne fust point arriuée, le traitté qui eust esté fait autoit esloigné pour iamaïs la qualité de rebellion : mais le desordre qui vint de l'intelligence que l'Euesque de Luçon auoit avec les ennemis de la Royne, fist acquerir au party qu'il auoit dressé le nom de rebellion, & luy donna doublement, & pour son inuention, & pour son infidelité, le nom de rebelle. Si son Eminence auoit eu ou le iugement ou le loisir de consilerer tous les discours, & peser tous les mots de son Historien, il l'auroit plus tost chastié que recompensé.

IV. Dupleix veut persuader, que les années de l'auctorité de la Royne ont esté blasquées de cruauté, encore qu'il l'attribuë au Mareschal d'Ancre: il dit, que le peuple de Paris estoit en continue apprehension des cruantez de cet homme, qu'il auoit fait trancher la teste à Stuard Gentilhomme Escossois, & à Hurtevant Gentilhomme Normand : il dit, que ces deux furent trouuez coupables de mort par des iuges seueres : mais que l'animosité & la precipitation, avec laquelle le Mareschal les fit poursuivre, les faisoit plaindre de tout le monde. Si vn homme de la garde du corps du Roy est condamné à mort avec seuerité, estant conuaincu d'auoir intelligence avec les Princes contre le seruice du Roy, qui peut estre criminel de leze Maiesté? Pour Hurtevant personne n'a donné de la iustice qu'on luy a fait : l'honneur qu'on veut conseruer à sa famille, fait faire beaucoup de choses. Si Dupleix auoit veu les plaintes de plusieurs villes de Normandie, & entr'autres de celle de Caen, il ne diroit pas que Hurtevant fut deffait pour

auoir desobey au Marechal. Ou il faut que Dupleix s'abstienne de parler de cette mort, ou il est necessaire pour sa descharge qu'il produise les procedures. Il semble aussi qu'il vueille adiouster pour vne circonstance de cruauté, *la force beauté, & haute taille de Stuard*: mais ie luy repar-
tiray, que le Duc de Montmorency estoit beau, ieune, bon, genereux, liberal, le premier & le plus riche Gentil-homme du Royaume, descendant de cinq Connestables, Duc & Pair, Marechal de France, victorieux sur terre & sur mer, conuert de playes pour le seruice du Roy: i'adiousteray que le Cardinal de Richelieu luy donnoit la qualité de son fils: & il est vray, que pour tascher d'acquérir son amitié, il auoir perdu celle de plusieurs personnes. Cependant ce pere, sans auoir esgard à cette alliance, ny aux assistances qu'il a receu de ce fils adoptif, ny à toutes ces autres considerations que i'ay apporté, veut estre estimé iuste, pour auoir mis entre les mains d'un vilain bourreau vne si belle vie, condamnée à mort contre ses priuileges, qui sont de loix en France. Son crime a esté d'auoir voulu garder d'oppression l'heritier de la Couronne, Frere vnique de son Roy. Et Dupleix veut que Stuard soit innocent, *pour auoir fait des leues*
pour les Princes qui estoient à Saisons. Mais il dit, qu'en cette poursuite l'animosité du Marechal d'Ancre parust. Que dira-il des procedures qu'on a fait contre le Marechal de Marillac, de tant de changemens de prisons, de iuges & de formes? comment pourra-il desguiser la condamnation à mort d'un homme de cette condi-

Pag. 138.

Pag. 138.

tion & merite, pour n'auoir pas exactement pesé du pain & du foin, ny bien tenu le controolle d'un bastimét, outre cent mille tours de souplesse secrete, & traicts d'injustice publique, qui ont esté faicts pour faire perir vn Officier de la Couronne, qui auoir seruy, & pouuoit seruir si utilement le Roy & l'Estat? Que sera-ce, si on adjouste à ces deux exemples cent autres de moindre poids pour la qualité des hommes, mais autant extraordinaires en l'accusation & pourfuittes? Peut-on dire, que depuis la fondation du Royaume on aye veu les supplices si frequens, les prisons si remplies, & tant de personnes proscriptes, bannies, confisquées, diffamées & ruinées, comme on a fait depuis cinq années? Celuy qui est l'auteur de tous ces maux, s'imagine qu'il est innocent, lors qu'il fait imprimer, que le Marechal d'Ancre, sous l'auctorité & protection de la Royne, a desiré qu'on fist iustice à deux hommes conuaincus par les voyes ordinaires de crime de leze-Majesté. Pour conclusion de cette premiere partie, ie prie tous ceux qui liront cét escrit, de iuger que le Cardinal de Richelieu, estant le seul homme en France qui est en consideration de tous ceux qui estoient dans les conseils & interests du Marechal d'Ancre, & qui par son moyen auoit esté mis dans les charges, il a mauuaise grace de payer vn Historien qui poursuit cruellement la memoire de son bon amy & bien-facteur. Il s'estimoit heureux de pouoir baiser les mains qu'il faict deschirer par son Escrinain, & il prend plaisir en luy voyant mordre ceux qui ont esté les premiers

instrumens de sa grande fortune. On trouuera estrange, que celuy qui iette tant d'ordures dans les premieres sources de son bien, s'imagine qu'il mettra son ingratitude à couuert, lors qu'il faict louer Barbin, auquel il auoit de l'obligation. Ces eloges extraordinaires, desquels nous parlerons en vn autre lieu, me donn n'plustost vn iuste sujet de soupçonner, que l'Historien a receu quelque grande courtoisie de Barbin, lors qu'il estoit dans la direction des Finances. J'ay remarqué en plusieurs lieux de son Histoire, qu'il a imité du Haillan, qui payoit en louanges ceux qui le faisoient payer de ses appointemens, & donnoit des coups de dents à ceux qui luy haussioient le ratelier: il ne faisoit rien qu'il n'eust promis, & de quoy il n'eust menacé: mais ce procedé estoit bien esloigné de la grauié & sincerité de sa profession. Mon autre coniecture est, qu'on a approuué ce qui a esté escrit en faueur de Barbin, parce que tous ceux qui estoient dans la Cour en ce temps-là, scauent que le Cardinal luy voulut donner en mariage sa sœur, qui a esté depuis la Mareschale de Brezé, & est morte apres auoir esté enfermée quinze ans pour vne maladie d'esprit. Ce dessein du Cardinal ayant esté cognu par plusieurs personnes qui viuens encore; ie m'estonne comme il souffre que Barbin soit qualifié par l'Historien, *Procureur de Melun, & Contrôlleur general de la Maison de la Royne*. La premiere condition se pouuoit cacher, & il n'a iamais eu la seconde: mais bien celle d'Intendant, qui est plus honorable. Ce qui doit estre trouué plus

estrange, est le peu de recognoissance que le Cardinal a tesmoigné à Barbin, & le peu de respect qu'il a rendu à tant de belles qualitez que Dupleix luy donne, lors qu'il n'a iamaïs souffert qu'il soit retourné en France, & l'a laissé mourir à Bruxelles dans vn bien fort mediocre. Il faut dire sans doute, que ses vertus l'auoient rendu suspect au Cardinal, qui sçait bien qu'elles ne vont iamaïs sans la verité qu'il apprehendoit.

La seconde partie de nostre traicté examinera l'Histoire des premiers déplaisirs de la Royne Mere du Roy. Dupleix a vsé d'un grand artifice pour la deguïser : il a couuert malicieusement les outrages qui ont esté faicts à S. M. & a flatté, mais assez grossierement, toute la conduite du Cardinal de Richelieu. Nous diuïserons cette piece en quatre. La premiere traittera des choses qui arriuerent à Paris. La seconde des affaires de Blois. La troisieme de celles d'Angoulesme : &, La quatriesme d'Angers.

L'Historien raconte au long la mort du Marechal & de la Marechale d'Ancre : il les charge des crimes que nous auons dit : il rapporte la lettre que le Roy escriuit sur ce suiet aux Gouverneurs des Prouinces, dans laquelle S. M. blasme la Royne sa Mere, d'auoir donné à ces gens-là trop de pouuoir sur son esprit. Mais le vray motif de ce changement est descouvert dans ce discours de l'Escruiain : *En cette conioncture on voyoit diuerses faces au Louure : car Luynes & ses amis tressailloient de ioye, & ayant desia en partage les biens de Conchini, se promettoient pour le moins autant*

de fortune par la faueur du Roy qu'il en auoit en par celle de la Roynes Mere. Il dit, que le peuple croit qu'on n'auoit pas changé de taverne, mais seulement de bouchon : les autres, qu'on n'auoit pas changé de tyrannie, mais de tyrans; & qu'on afficha au Louure ces trois mots, Aux trois Roys. Pour dire vray, lors qu'il y a vn Favori dans vne Cour, on ne se trompe iamais, en iugeant des grands changemens par l'interest de celuy qui entre dans le principal credit, & qui a la plus grande part de la dépouille du mort, ou disgracié.

Les hommes sages voyoient ce dessein au travers des pretextes specieux, qui amusoient le peuple, & luy faisoient crier, Viue le Roy. Il me semble, que pour estre Historien non seulement curieux, mais religieux, il falloit rapporter les choses plus importantes qui se passerent en ce rencontre; à sçauoir tout ce qui arrina au quartier & auprès de la personne de la Roynes: on défarina ses gardes, & on en mit d'autres en la place: on entra iusques dans sa chambre & cabinet: on regarda sous ses coffres, pour voir, comme dit à la Dame d'honneur celuy qui faisoit la recherche, s'il n'y auoit point de caque, de poultre pour faire sauter le Roy qui logeoit au dessus: on fist murer vne porte, on rompit le pont leuis du iardin, on empescha que quelques personnes ne parlassent à la Roynes, & on remarqua avec rigueur toutes ses paroles & les mouuemens de son esprit. Ce qui arrina le lendemain, fust plus horrible; l'intolence ayant passé si auant, que la Couronne du Roy en pouuoit receuoir non seulement des taches, mais des se-

coulles. Je ne dis rien aussi des poursuites qui furent faites contre la Mareschale, ny de ce que les sollicitateurs de sa mort disoient à l'oreille des Juges de la part du Roy, qu'il ne croyoit point que sa vie fust en seureté, si on ne faisoit mourir la Mareschale. Sa Maïeste ignoroit toutes ces abominables pratiques, qui ne tendoient qu'à asséuer la confiscation par la mort de cette pauvre femme, qui rendit ses plus grâds ennemis admirateurs de la constance de sa fin. Dupleix en cet endroit dit en termes expres, que ce fut une injustice de donner au Duc de Luynes la confiscation de la Mareschale, & que le Garde des sceaux du Vair y consentit, ayant esté gaigné par le present qu'on luy fist de l'Ensché de Lyseux. Ces paroles accusent le Roy d'injustice, & le Garde des sceaux de corruption.

Ce que l'Historien adiouste, est en partie faux, & en partie ambigu. A raison dequoy la Royne desira de s'esloigner de la Cour pour quelque temps, attendant que des nouveaux accidens fissent cesser les discours de ceux de sa Maison, qui seruoient d'entretien à tout le monde. Je n'entends pas ce qu'il veut dire du langage des domestiques de la Royne : mais je sçay bien que la violence des choses qui se passioient, les appréhensions qu'on luy faisoit donner, & l'estat auquel elle se voyoit reduire dans le Louvre, luy pouuoient faire souhaitter d'estre en plus grande liberté & seureté. Mais on ne peut dire avec verité, qu'elle aye demandé la retraite de Blois, ny la separation du Roy & de ses autres Enfans, ny la sortie hors de Paris en la façon qu'elle arriva : outre que cet esloignement fut un effect de la peur de ceux qui l'a-

noient offensée. Les desseins de leur ambition ne souffroient pas la presence d'un œil qui eust descouvert leurs entreprises. Il me semble pourtant, que la response de la Roynie apres la mort du Marechal, & qui est rapportee par l'Historien, estoit tres-sage, & capable de contenter le Roy, si les effets de son bon naturel n'eussent esté diuertis. *La Roynie protestoit, qu'elle* Pag. 155
n'estoit pas marrie de la mort du Marechal d'Ancre,
puis que le Roy l'auoit iugé vtile pour son service: mais
bien se sentoit elle outrée de la des fiance que Sa Maie-
sté auoit en d'elle, en luy tenant secrette la resolution
de le perdre. Ce que Dupleix adioust, pour
monstrer que ces paroles venoient de dissimu-
lation, est vn iugement temeraire, & contre la
iustice Chrestienne, qui nous oblige de iuger
des choses secrettes par les publiques, & ne veut
pas que nous condamnions les publiques par les
secrettes: sur tout là où il y a suiet d'interpreter
les volonteiz plustost en faueur du naturel d'une
Mere, que de la fortune d'un seruiteur. Si Ploti-
ne, femme du sage Empereur Traian, disoit
qu'elle entroit dans l'Empire, comme elle desi-
roit d'en sortir; Nous pouuons dire que la Royn-
ne est sortie de la Regence, & des affaires, com-
me elle y estoit entrée, ayant laissé la France en
la mesme force & splendeur, qu'elle l'auoit
trouuée: dequoy elle auoit esté louée & remer-
ciée par le Roy, par le Parlement, & par les Estats
generaux du Royaume.

Je viens à ce qui touche en ce changement le
Cardinal de Richelieu. pour lors Euesque de Lu-
çô. L'Historien embarrasse sur ce suiet beaucoup

de choses ; & fait voir la lumière de la Verité à
 traueus de tous les faux iours ; qu'il veut donner
 Pag. 153. à la probité du Cardinal : il dit, qu'ayant esté nom-
 mé par la Royné pour faire la charge de premier Secre-
 taire d'Estat (encore qu'il n'y aye ny premier ny
 second que par l'ancienneté) luy qui estoit ieune,
 genereux & ambitieux , considerant que c'estoit vne
 charge en laquelle il pouuoit rendre des signalées preu-
 ues de l'eminence de son esprit, l'accepta : mais comme
 il fust appelé par necessité, & à desaut d'un autre qui
 en fust capable, & mal-gré luy, qu'il fut contraint
 de quitter un employ plus agreable. L'Historien
 dit, que c'estoit vne Ambassade extraordinaire en
 Espagne : aussi ne creust-il pas perdre beaucoup, en
 estant destitué par le mal-heur d'autrui, & non par sa
 faute. De ce deguisement de discours on tire
 quatre choses. La premiere, que le Cardinal est
 appelé *Ambitieux* : la seconde, qu'il estoit seul
 capable en France d'estre Secrétaire d'Estat : on
 luy donna pour l'instruire Mr de Beauclerc, qui
 en deuoit scauoir plus que luy apres quarante
 ans d'experience : il a du depuis seruy tres-di-
 gnement en cette charge. La troisieme remar-
 que est, qu'il fust forcé de prendre cet employ, encor
 qu'il l'eust recherché ; qu'il s'y maintient contre
 les aduis & reproches de tous les Euelques ses
 Confreres. La quatrieme, qu'il en fust destitué
 par le mal-heur d'autrui, & non par sa faute, ayant
 esté le principal conseiller du Marechal & de
 la Marechale d'Ancre. Dupleix dit, qu'apres
 leur ruine Mr de Luynes di au Roy. Ouy Sire, Mr
 de Luçon a tousiours bien seruy Vostre Maiesté, c'est à
 dire, au gré de celuy qui rendoit ce tesmoignage ;

ce qui ne pouuoit estre sans auoir deseruy la Royne, & ceux qui se confioient en luy. Voicy les soupçons que l'Historien en donne. Il dit: *Pag. 155*
*l'ay appris du Sr. Deagen, que peu de iours auant le meurtre du Mareschal, le Roy s'entretenant à l'Ar-
 senac avec l'Euesque de Luçon, luy donna des grands
 tesmoignages de sa bien-vueillance, & de la confiance
 qu'il auoit en luy. Deagen, qui est allegué pour
 tesmoin, lia la partie de cét entretien secret en
 vn lieu destourné, où le Roy & Luynes se trou-
 uerent seuls. Dieu sçait si ce qui fut traicté estoit
 à l'aduantage de la Royne: il y a vn grand suiet
 d'en douter, puis que Deagen, principal com-
 mis & confident de Barbin estoit en grande in-
 telligence avec Luynes; ce qui esclatta le iour
 que le changement arriua: il est probable qu'il
 engagea l'Euesque de Luçon à cette conference.
 Les apparences de cette vnion sont confirmées
 par les paroles que Luynes dit en sa faueur, &
 par la declaration que le Roy fist, qu'il vouloit *Pag. 156*
*que Mr. de Luçon le seruist, comme auparauant, dans
 son Conseil, & luy donna Mr. de Vignoles pour decla-
 rer sa volonté au Chancelier.**

Voila donc le Mareschal tué, la Mareschale prisonniere, Mr. Mangot Garde des Seaux re-
 duit à estre homme priué, Barbin arresté, &
 l'Euesque de Luçon estimé & conserué en sa pla-
 ce dans le Conseil. Il faudroit estre bien pas-
 sionné pour le Cardinal de Richelieu, pour ac-
 corder à son aduantage tous ces rencontres.

Luynes & les hommes nouveaux qui l'appro-
 choient, estoient bien contens d'auoir tiré de
 l'infidelité de l'Euesque de Luçon le fruit du-

Pag 155.
& 156.

quel ils commençoient de iouyr : mais soit qu'ils entraissent bien tost en apprehension de sa subtilité, ou qu'ils le iugeassent plus vtile à leurs desseins aupres de la Royne, ils l'enuoyerent à Blois. L'Historien dit, que l'Euesque de Luçon le demanda au Roy, & nous veut faire passer cette resolution pour vne action heroiique, parce qu'il pouuoit espérer des grands emplois dans le Conseil, ou l'Ambassade de Rome, où on eust pensé de l'enuoyer ; ce qui luy estoit vn chemin de paruenir au Cardinalat, où il est arriué depuis par autre voye. J'ay dit les raisons qui ne le pouuoient souffrir aupres du Roy dans le commencement de la fortune de Luynes, & desseins de ses parens & creatures. Quand à l'Ambassade de Rome, on sçait bien que depuis long temps on ne la donne pas à vn Ecclesiastique pour beaucoup de considerations : mais ie croy que l'Historien appelle legation vne relegation à Rome, à laquelle ie sçay bien qu'on pensa: mais on se contenta d'un renuoy en Auignon, ville Papale. Apres que l'Euesque eust fait vn peu de seiour à Blois, & eust esté quelque temps en son Diocese, son esprit remuant, & comme l'Historien dit, *ambitieux*, s'employoit tousiours à la recherche des moyens qui pouuoient faire vn changement qui le remist dans le chemin du Chapeau de Cardinal, & du maniement des affaires : il y vouloit arriuer en despit de toutes les destinées. Le voila en Auignon, où il n'aura pas vn long repos. Voyons ce qui suruint à la Royne durant qu'elle fust à Blois, & ce que Dupleix en dit.

Il nous fournira peu de sujet sur le séjour de la Royne à Blois, parce qu'il n'a rien sceu de ce qui s'y passa, ou n'en a rien voulu dire : mais ie peux asseurer, que S. M. demouroit dans ce Chasteau comme dans vne prison : elle estoit non seulement obseruée par ceux qu'on auoit corrompu aupres d'elle, & qui furent en partie esloignez ; mais encore par plusieurs personnes qu'on luy enuoyoit. Les Grands & les Dames qui passoient à Blois, ne l'osoient visiter sans auoir demandé permission à Mr. de Luynes. Le Roy y auoit enuoyé Mr. de Roissy pour prendre garde à tout ce qui se faisoit, & pour luy en rendre conte : encore que ce vieux & sage Conseiller d'Estat executa sa Commission avec toute sorte de respect & de retenue, il estoit pourtant obligé de recevoir & enuoyer tous les aduis de beaucoup de broüillons, qui l'eussent accusé de trahison. La deffiance, qui accompagne tousiours ceux qui offensent les Grands, faisoit employer au Duc de Luynes tous ses soins, pour tenir la Royne comme prisonniere : outre ce que nous auons dit, il logea des compagnies de cheuaux legers autour de Blois, qui gardoient vne partie des passages, & donnoient vn grand soupçon à la Royne qu'on ne la voulust reserrer plus estroitement. On luy deffendit à la fin de se pourmener hors de la ville, & on parla de murer quelques portes. Dupleix n'a rien dit qu'une chose en laquelle il fait voir sa mau-

Pag. 169.

Pag. 172.

* bouger

c'est son

nos.

neulx auoit obligé la Royne à ne * bouger point de Blois

Sans le consentement du Roy. l'aduoué que dans le discours il dit, que ce bon Pere, cognoissant combien le retour de la Roÿne à la Cour seroit preiudiciable, estant en la mauuaise humeur qu'il la consideroit, luy fist faire serment sur les Euangiles, en la presence du Pere Suffren, directeur de sa conscience, qu'elle ne viendroît point trouuer le Roy, sans qu'au precedent il en fust aduertÿ, & qu'il y consentist. Je laisse à part si le P. Arnoux se deuoit charger de cette commission : ie desire seulement qu'on remarque, qu'entre ce discours de Dupleix, son tiltre & sa marge, que la plupart des curieux se contentent de lire, il y a vne grande difference. Si ce que le tiltre dit estoit veritable, la Roÿne passeroit pour pariure : ce qui est dans le discours, la rend seulement digne de compassion, & fait voir l'apprehension que les Fauoris ont tousiours eu du bon naturel du Roy. Nous voyons que cét esloignement de la Mere a esté le principal moyen qu'ils ont pris pour se maintenir, & pour ruiner leur Maistre & son Royaume. Le Cardinal de Richelieu, qui a plus de cognoissance que personne du monde de la sympathie qui est entre les cœurs de la Mere & du Fils, ne peut permettre qu'ils s'approchent : parce qu'il luy seroit impossible d'empescher qu'ils ne s'vnissent, & que leurs amours ne se messassent aussi tost que leurs larmes. La conionction des meilleures planetes est la santé du monde : ceux qui ne subsistent que par les maladies du public, ne la desfirent pas. Il faut aussi remarquer, que dans six lignes l'Historien est contraire à soy même : il dit au

commencement, que le P. Arnoulx prist resolution de demander à la Royne ce serment, ayant reconnu combien son retour à la Cour seroit preiudiciable. Et apres il adiouste, que c'estoit le but & la fin de son voyage, dont les apparences estoient force ciuilitex. Accordez ces choses, & concluez, que la Royne n'estoit traictée que par apparences de respect & de courtoisie: mais que le fonds n'estoit que mauuais dessein.

Apres ce que nous auons remarqué, on trouue estrange que la Royne aye cherché vne honnesté liberté, pour faire entendre ses iustes plaintes au Roy, sans estre en danger d'estre plus mal traictée. Voicy comme nostre Historien parle de la resolution que S. M. prist de sortir de Blois: Cette Princeesse accoustumée au Gouvernement languissoit à Blois, où depuis deux ans elle estoit comme en solitude: l'Abbé de Ruscelay, Chancelouue, & d'autres esprits broüillons fomentans sur cela sa langueur, luy representoient son depart de la Cour comme vn bannissement. Et vn peu plus bas: L'esprit d'une femme, quoy que grande Princeesse, desia outré des choses passees, sensible aux presentes, & redoutant l'aduenir, se trouua susceptible de toutes ces impressions, & se resolut facilement de sortir de ce lieu, qu'elle appelloit sa prison. Il est vray, que ces considerations du passé, du present & de l'aduenir, porterent la Royne à vouloir sortir de Blois. Il ne faut pas vne grande rhetorique pour persuader à vne personne qui sent son mal, qu'elle est malheureuse; & il n'est pas besoin d'employer beaucoup d'artifice

Pag. 172

Pag 173

pour luy faire desirer vn remede que la nature luy enseigne. Je croy que la Royne, qui apprehende fort de se voir resserrée, demanda plustost à ses seruiteurs les expediens pour se mettre au large, qu'eux ne luy proposerent d'en prendre la resolution. Ce qui est à remarquer, est, que l'Historien aduouë, *que le Roy par sa derniere lettre permettoit à la Royne sa Mere d'aller en telle part & en telle ville de son Royaume que bon luy sembleroit.* Elle n'executa donc que ce que le Roy luy auoit permis; & la guerre qui suiuoit, fut plustost vn effect de la precipitation du Duc de Luynes, que de la mauuaise volonté de la Royne.

Dupleix à tort de dire, que *la Royne cherchoit le Gouvernement*: ie peux asseurer avec verité, qu'elle s'en est esloignée, ayant recogneu qu'il n'y auoit rien qui fust plus ennemi de la tranquillité, que d'estre suiette à l'enuie & mauuais offices des Fauoris. S. M. s'est approchée des affaires quand le Roy l'a desiré, & que le bien de son seruice l'a obligée à cela. L'Historien n'est pas sage de parler mal à propos de l'esprit des femmes: il ne se contente pas d'offenser la qualité de la Royne, mais il veut encore iniurier son sexe; il blasme en l'un & en l'autre les œuvres de Dieu, ce qui est vn espee de blaspheme. I'en trouue vn bien plus grand en ce discours:

Les Fauoris du Roy qui gouvernoient l'Estat sous le nom de S. M. Si ces paroles estoient eschappées à nostre plume, nous consentirions que la main qui l'auroit tenuë fust mise dans le feu: celle de Dupleix a esté renuoyée remplie de pistoles.

apres avoir escrit, que le Roy prestoit son nom à Mr. de Luynes pour gouverner son Estat. Nous verrons en d'autres endroits des façons de parler qui sont encore plus criminelles ; mais il semble que l'usage du temps les ayent rendues innocentes, en les faisant ordinaires entre les flatteurs du Cardinal.

Sur le sujet de la sortie de Blois, l'Historien fait vn ample recit de tout ce qui arriva au Duc d'Espéron, durant les deux premieres années du credit du Duc de Luynes: il dit, que les apprehensions du Fauory, & que les artifices du Garde des Seaux du Vair l'obligerent à se retirer à Mets, & que plusieurs Conseils furent tenus pour le surprendre. Il dit, qu'il fust resolu de s'asseurer de sa personne, & la mettre dans la Bastille ; & qu'il croit que cette resolution fust descouverte par le Duc de Luynes, qui ne gardoit point les secrets. En tout ce discours, & plusieurs autres, qu'il fait du Duc d'Espéron, j'ay remarqué, que Dupleix apprehende vn peu d'offencer ce Seigneur genereux, & fort sensible aux iniures. L'Historien fait dire au Parlement ce qu'il n'ose point auancer contre luy, de peur de quelque rencontre des * Simons. Il ne laisse pas de picquer le Duc iusques au vif en l'affaire du soldat, qui fut retiré des prisons du Fauxbourg S. Germain: ce qui ne faisoit rien pour l'Histoire, non plus que le despit du Comte de Candale, qui pouuoit estre dissimulé : & il me semble que ses bonnes qualitez & grands seruices ne meritoient pas vn traitement si rude. Je recognois au trauers de toutes les craintes & dissimulations de l'Historien,

Pag. 173.

174. &

175.

Pag. 77.

* Les est-

fiers du

Duc d'Es-

pernon

siroient

appel &

Simons.

Pag. 76.

Pag. 21.

qu'il n'a pas beaucoup d'inclination pour la Maison de la Valette : & ie m'estonne comme il nous veut faire passer pour vn monstre de rebellion , que la Royne aye recherché l'assistance d'un Seigneur , & ce Seigneur la protection de la Royne , pour se deffendre contre leur ennemy commun. Il est vray , que le Duc presta la main à la sortie de la Royne , & luy donna retraite ; mais il est vray aussi que cette occasion para vn grand coup qu'on vouloit descharger sur la teste du Duc , & de toute sa Maison : de sorte que si le Cheualier empescha que la Tour ne prist la Royne ; la Royne empescha aussi que le Fol ne prist le Cheualier. L'Historien a tort de nous représenter la Royne comme peu recognoissante de ce signalé service : S. M. a tousiours estimé le Duc , & a gratifié les siens en tout ce, qu'elle a peu.

L'ambition de l'Euesque de Luçon, qui guettoit les occasions qui pouuoient seruir à son dessein, prist ardemment celle que cette sortie luy presentoit : il en fut aduertiy en diligence , & escriuit aussi tost au Duc de Luynes , qu'il r'abiliteroit toutes choses , & retireroit la Royne d'Angoulesme , où Luynes l'apprehendoit : il communiqua les offres de l'Euesque à son conseil ; lequel estant plus fin que luy , & ayant cognoissance de l'esprit de Mr. de Luçon , iugea qu'il estoit propre pour mettre la confusion dans vn party qui se formoit ; & pour rendre suspects à la Royne ceux que Luynes craignoit le plus. On prist la resolution de l'enuoyer querir en diligence : & pour luy donner d'auantage de

*Similitu
de tirée du
ien des es-
chers.*

Pag 136.

chaleur, le Duc de Luynes luy escriuit vne lettre, que l'Historien appelle *Fort gracieuse*; il assure que le Roy y adiousta de sa mains ces paroles: *Le vous prie de croire, que ce que dessus, est de ma voloné; & que vous ne me sçauriez faire vn plus grand plaisir que de l'executer.* Sur cette lettre, & avec vn passeport, le Prelat s'acheminant en diligence à Angoulesme, fust arresté par les ordres de Mr d'Alincourt Gouverneur de Lyon, qui ignoroit vn mystere qu'on eust tenu caché, si ce rencontre n'eust obligé à le publier; & peut estre l'Euesque eust dit, pour estre moins suspect, qu'il s'estoit sauué pour venir seruir la Royne en cette occasion. L'Historien nous décrit ses adresses en ces termes: *Il estoit seul capable de moderer ses aigreurs par la douceur de ses persuasions, de combattre ses ressentimens particulieres par des considerations d'Estat, & fléchir son obstination par ses belles remonstrances, & de calmer les boüillons de sa cholere par les charmes de son eloquence.* Ces aigreurs, ces obstinations, ces boüillons de cholere, sont des façons de parler estranges, meslées avec les louanges d'un seruiteur: mais c'est la mode, qui veut qu'en cueillant des roses pour le Cardinal, on iette les espines sur la teste de la Royne.

Le Roy preparoit cependant vne grande armée, & s'acheminoit à Tours: encore que l'Historien dit, que *grands appareils se dressoient pour punir le Duc d'Espernon*; cela ne pouuoit arriuer sans donner ombrage à la Royne & la desobliger: ce qui fist resoudre S. M. à se tenir sur ses gardes, & à employer ses seruiteurs, comme le

Pag. 177.

Pag 177.

Pag. 179.

Duc d'Espernon fist ses amis, pour se defendre contre l'oppression qu'on vouloit couvrir par le pretexte du châtiment du Duc (ainsi l'appelle Dupleix.) Tout ce qui se passa dans les armes, fist vn peu de bruit, & peu de mal; l'Euesque ayant si bien trauaillé, qu'il seruit vtilement ceux qui l'employoient, mais avec vn si grand malheur pour luy, qu'il se deuoit pour iamaïs rebutter de la Cour, & confiner dans son Euesché, si l'ambition n'eust estouffé tous ses ressentimens naturels. Il perdit à Angoulesme son frere aîné, qui fust tué en duel par le Marquis de Termes Capitaine des gardes de la Roynie, pour vn manquement de parole de l'Euesque. Il ne tesmoigna pas beaucoup de regret de cette perte; il auoit peur d'arrester, par vn plus grand bruit, le cours de son aduancement. Les intrigues qu'il fist, luy reüssirent, comme l'Historien adit: il attaqua le premier l'Abbé Ruscelay, lequel estant de sa robbe, donnoit plus d'apprehension à ses desseins: *Ayant trouué que le Duc d'Espernon n'en estoit pas satisfait, il se ioignit avec luy: & se seruant dextrement de la haine du Duc pour la faire descharger de cét importun, se conduisit en sorte, qu'il eust bien tost son paquet, sans qu'il s'en peult plaindre luy mesme, ayant demandé son congé, & ne pensant pas qu'il deust estre pris au mot.* Apres cette ruse, il ne restoit plus à combattre que le Duc d'Espernon: mais il n'estoit point aisé de le ruiner chez luy, ny de le tromper en sa presence: il fallut pour retirer la Roynie moyenner la paix; qui fust faicte avec la promesse secrette

Pag. 178

Paroles
de Du-
pleix.Ruse de
Cour, de-
gouter
les hom-
mes pour
leur faire
demander
leur con-
gé.

d'un bonnet de Cardinal pour l'Euesque, & en donnant trois places de seurété, desquelles il retint la meilleure pour luy, qui fust Angers, où la Royne deuoit faire sa retraicte. Dupleix compose vne harangue que l'Euesque fai& à la Royne, pour la disposer à la paix: encore que S. M. y fust toute resoluë: mais il descouure, que durant la negotiation & la rene, le Duc de Luynes par vne intelligéce que le Comte de Schomberg entretenoit dans Angoulesme, auoit eu dessein de faire mettre le feu dans le magasin des poudres: ce qui eust mis en danger la personne de la Royne, qui estoit logée pres du magasin: encore que l'aucteur assure qu'on n'en vouloit qu'au Duc d'Espernon, qui auoit son logis à l'autre bout de la ville. Pag. 182

Lors que ces choses se passoient en Angoulesme, le Mariage de Madame, seconde Sœur du Roy, se faisoit à Tours avec le Prince de Piedmont: il desira d'aller visiter la Royne, & le Roy le trouua bon. L'Historien sur ce rencontre inuente vne estrange imposture: Il dit, que la Royne auoit quelque mescontentement du Prince, & qu'au second entretien elle luy fist des grandes plaintes, de ce qu'on ne luy auoit rien communiqué de son Mariage: il adioust, que la Royne tesmoigna quelque emotion, qui paroissoit en l'accent de sa voix, & en son geste, luy disant qu'elle n'enst iamais creu qu'il l'eust mesprisée iusques-là, que de ne l'honorer pas seulement d'une visite. Il dit aussi, que le iour suiuant la Royne se plaignit, de ce qui s'estoit passé en la mort du Mareschal d'Ancre, & de sa femme, & aussi de son Pag. 181
Pag. 179

esloignement. Dupleix s'esloigne de la verité en tout ce discours : nous aurions mauuaise grace du viuant de Mr le Prince de Piedmont, à present Duc de Sauoue, de desguiser ce qui se passa en cette entreueüe : nous pouuons dire que tant s'en faut qu'il fust mal receu de la Roynes, qu'elle luy fist vn si bon accueil, qu'il promit à S. M. d'embrasser tous ses interests, & d'estre ennemy de tous ceux qui luy rendroient du desplaisir. La Roynes n'vsa point de reproches, comme dit l'Historien, mais de toute sorte de ciuilité, en laquelle S. M. est tres-bien instruite : elle employe les complimens enuers ceux qui les meritent, avec si bonne grace qu'elle ne cede en cela à aucune Princeesse de la Chrestienté. Le Prince tesmoigna, qu'il en auoit receu tant de satisfaction, que le Duc de Luynes en eust quelque défiance, qui fist aduancer le depart de leurs Alteesses de Piedmont.

Toutes ces choses qui se passerent en Angoulesme, furent suiuiues de la paix & de l'entreueüe à Cousieres pres de Tours : les bons naturels du Fils & de la Mere donnerent des grands tesmoignages de tendresse : leurs Maiestez firent voir que le Sang Royal auoit quelque chose de diuin, qui escartoit en vn instant, & avec grande force, tous les charmes que les malins esprits des enfers & de la terre employoient pour l'alterer. Ceux qui ne payent leurs maistres que d'affections dissimulées, n'apprehendent rien tant que les veritables : la separation des personnes qui s'aiment par sympathie d'humeurs, & par principe de vertu, est le moyen que pra-

tiquent ceux qui n'aiment que par interest & en grimace. Le Duc de Luynes ne pouuoit consentir, que la Royne Mere du Roy vint au centre de son repos : qui n'estoit pas le *gouvernement* Pag. 125.
 (comme dit l'Historien) mais la presence du Roy & de ses autres Enfans. Le foible pretexte que prist le Duc pour faire enuoyer la Royne à Pag. 125.
 Angers, fust que la contagion estoit à Paris ; Pretexte de l'Histoire rien,
 comme si le danger eust esté plus grand pour elle que pour le Roy : ou si Luynes eust eu plus de soing de la vie de la Mere qu'il auoit offensé, que de celle du Fils qui le conseruoit avec sa fortune. Il est vray, que cét homme ayant reconnu l'ambition de l'Euesque de Luçon, & sçachant vne partie des tours de souplesse de son esprit ; ne vouloit point rendre sa place à la Royne, de peur que Richelieu ne luy osta la sienne : il desira de le tenir loin de la Cour : il promit à la Royne son retour à Paris dans peu de mois : & ie croy que le Roy auoit intention de luy donner ce contentement : mais que les affections de leurs Majestez furent esgalement amusees par les belles promesses de leurs seruiteurs. Je ne peux oublier sur ce rencontre de l'entreueüe de Coufieres vne chose que l'Historien a remarqué, à sçauoir, que la *Marquise de* Pag. 123.
Guercheville estoit fort auant dans les bonnes graces Elle estoit
de la Royne, pour la gentillesse de son esprit. Il est vray Dame d'honneur
 que la Marquise, que nous pouuons appeller veritablement Dame d'honneur, a esté estimée en de la Royne,
 sa ieunesse pour sa chaste beauté, & en sa vieillesse pour sa grande prudence : mais la bonne Dame ne s'est iamais picquée de cette extraordi-

naire gentillesse d'esprit, que l'Historien lui donne: elle ne se pressoit point aussi pour auoir vn plus grand credit, que celui que sa vertu & serui-ces luy auoient acquis aupres de la Royne, qui l'a estimée durât sa vie, & la regretée apres sa mort.

Venons apres cette petite digression à la retraicte à Angers, qui estoit fort desagrecable à la Royne: mais qui pesoit bien d'auantage à son Conseiller: il scauoit que ce n'estoit pas vn lieu où il peut faire ses affaires; que les absens de la Cour sont oubliez: encore que dans les secrettes & desrobées conferées avec le Duc de Luynes il eust tasché de tirer des promesses & des sermens pour le bonnet de Cardinal, il ne voyoit pas qu'on fist les diligences pour l'obtenir du saint Pere. Le Duc de Luynes estoit dans la défiance d'un naturel ambitieux, qui desiroit d'auoir part au gouuernement: il ne se pouoit resoudre de luy acquerir vne qualité qui l'en approcha & qui le rendit plus considerable dans l'Eglise & dans la Cour.

Il faut adiouster, que le Duc de Luynes, susceptible de toute sorte de conseils; & particulierement de ceux qui pouoient augmenter ses soupçons, iugeoit tousiours des ressentimens de la Royne par la cognoissance de sa faute: il craignoit aussi que l'Euesque n'eust dessein de bastir sa fortune des desbris de la sienne, de luy rendre ce qu'il auoit presté au Marechal d'Ancre, & de faire perdre la memoire de ce qu'ils auoient traicté ensemble: ce qui ne pou-uoit estre qu'en aduancant la mort de celui qui estoit le seul tesmoin. Ces pensées le portoient

à prendre ses leuretez. L'Historien assure que
le Duc de Luynes cherchoit des appuis contre la Royné. Pag. 190
 & que cette consideration plustost que l'affection
 luy fist procurer la liberte de Monsieur le Prin-
 ce: il l'obtint fort aisément du Roy, & se fist don-
 ner la commission de l'aller retirer du Bois de
 Vincennes, avec vne lettre de S.M. que l'Histo-
 rien rapporte en cest termes: *Mon Cousin, ie ne* Pag. 191
vous diray pas combien ie vous aime, vous le voyez.
Mon cousin le Duc de Luynes, qui sçait tous les secrets
de mon cœur, vous le dira plus amplement, &c. Du-
 plex fait que le Roy escrit ainsi: & il se peut
 faire que le Duc de Luynes, au lieu de cacher à
 l'enuie son credit, en faisoit parade pour la pro-
 uoquer d'auantage. Les Fauris ont aussi cette
 coustume, de porter leurs Maistres à donner la
 terreur aux ennemis de ceux qu'ils aiment, par
 des caresses publiques & par des discours à leur
 aduantage. Cela sert à deux effects, pour ietter
 le Maistre dans l'apprehension de se dedire, &
 pour empescher que ceux qui voyent ces fa-
 ueurs, ne choquent celuy qu'ils croyent estre
 inseparable du cœur du Prince. Les Fauris
 font aussi proteger leurs crimes par la puissance
 de leurs Maistres, & font du mal aux Grands
 pour faire craindre la leur. Le Cardinal de Ri-
 chelieu a praiqué ces artifi. es plus souuent, &
 plus ouuertement, que ses predecesseurs: en quoi
 il a témoigné qu'il auoit plus grande défiance du
 Roy, & qu'il vouloit acquerir cette creance,
 qu'il ne pouuoit iamais perdre les bonnes gra-
 ces d'un Maistre qui s'obligeoit par des actions si
 solemnelles à le conseruer. Duplex dit, que Pag. 192

Pap. 179. Roy despescha le Duc de Monbascon vers la Royne sa Mere, pour la prier de venir à la Cour: Mais il n'adjouste pas que le Duc de Luynes chargea son beau pere, de dire de la part du Roy à la Royne, que si elle ne venoit on l'iroit querir. Les oiseaux de cette espee Royale se peuvent prendre avec le leurre : mais ils ne s'attrapent jamais avec le tintamarre : reclamer ainsi vne aigle, estoit l'ef-faroucher.

pag 179. Je ne peux souffrir, que l'Historien escriue en ces termes insolens ; Toutes les belles protestations que la Royne Mere auoit faictes au Duc de Luynes, ne luy ostoient pas la defiance qu'il auoit de sa cholere; doutant tousiours que le desir de vengeance assez naturel à ceux de sa nation, & trop commun aux femmes, ne luy esueilla la memoire des choses passees. Dupleix ne veut pas que la Royne soit Italienne, ny femme : comme si elle pouuoit estre fille de son Pere sans estre Italienne, ou Mere du Roy sans estre femme. Cét homme equitable tire ses iniures des ordres de la Prouidence de Dieu : & attache les vices, comme bon luy semble, aux nations, & aux sexes. Si le Duc de Luynes apprehendoit la Royne parce qu'elle estoit Italienne, & femme, on pourroit dire, que S. M. se defioit de luy, parce qu'il estoit homme du Comté d'Auignon : mais à Dieu ne plaise que nous iniurions les pays que Dieu a fait. Si l'Historien confesse que ce Fauori se fortifioit de biens d'alliances, de charges, de gouuernemens, & sur tout de la bien-veillance du premier Prince du Sang contre la Mere de son Roy : cette Princesse, qui n'auoit ny l'auctorité ny les armes
du

du Roy son Fils, & se trouuoit esloignée de sa
presence, & peut estre de son affection par les
artifices des meschans, auoit plus de suiet de s'as-
seurer de ses seruiteurs : faut-il trouuer estran-
ge, si elle les appelloit pour se garder de l'op-
pression de celuy qui faisoit assez cognoistre sa
crainte, laquelle pouuoit chercher ses derniers
seuretez dans la totale ruine de la Royne?

Ie sçay bien que dans les grands desseins des
Princes, les Maistres ont quelquefois vne visée,
& les seruiteurs en ont vne autre : ce qui me fait
croire que dans la resolution de l'armement
d'Angers, la Royne se proposoit vn but, &
l'Euesque de Luçon en auoit vn autre : il estoit si
accort, qu'il ne representoit à S.M. que les dan-
gers pour sa personne, & mesmes ceux qui me-
naçoient le Roy, Monsieur & Madame, qui est à
present Royne d'Angleterre : il adioustoit les
desordres du Royaume si grands, que le Parle-
ment fist les sanglantes remonstrances, desquel-
les nous auons faict mention : la France estoit
sur le point de se souleuer sous des chefs de par-
ty qui eussent passé au dela de la reformation de
l'Estat & bien du seruice du Roy, ce que la Roy-
ne apprehendoit. Ces considerations la porte-
rent à vouloir reünir sous son auctorité tout ce
qui pouuoit mettre la France en pieces : elle la
vouloit conseruer entiere, se rendre l'arbitre de
la guerre & de la paix, & chercher son repos. Le
dessein de la Royne estoit tel : mais celuy de
l'Euesque de Luçon estoit bien different : il
voyoit que ce bonnet rouge ne venoit point, &
qu'on ne faisoit aucune instance à Rome pour

le faire aduancer. Dupleix ne remarque pas toutes les pensées de la Roïne, parce qu'il les a ignorées, ou les a cachées malicieusement : il fait cognoistre en ternies generaux les interets de l'Euesque de Luçon, & prend pour sujet des mouuemens d'Angers. Premièrement, *quelque malheureux ressort incognu aux hommes* : il voudroit monstrier ce ressort ; mais il n'ose descouurir l'homme qui le faisoit jouër. Voicy comme il parle : *Quand à la Roïne Mere, elle auoit plusieurs sujets de mescontentement : le premier estoit l'execution de plusieurs promesses qui luy auoient esté faites, mesmes pour aucuns de ses seruiteurs ; lesquels en demandant quelque effect, n'en auoient receu que des rebuts, bien souuent accompagnez de paroles iniurieuses.* L'Historien ne dit pas vne des raisons que nous auons marqué, & que la Roïne tenoit pour essentielles : il met là premiere celle de l'aduancement du Cardinal, ne se trouuant pour lors aucun seruiteur de la Roïne qui eust à demesler chose importante avec le Duc de Luynes, que celui qui en auoit tiré parole pour le Cardinalat : il le falloit arracher par la force des armes, ou par vn traicté qui fust exécuté pour ce chef à l'heure mesme. Il ne faut pas donc asséurer, que le sieur de

Pag 188. *Chantelonne fust le principal auteur de cette guerre contre les aduis de l'Euesque de Luçon : estant chose veritable, que celui qui est accusé n'auoit aucun interet dans la Cour, ny mesmes dans le monde, ayant les ordres du P. Berule, pour estre receu dans les Peres de l'Oratoire : & desia Dupleix l'appelle Pere de Chantelonne, encore qu'il n'ay eu cette qualité qu'un an apres.* La passion de l'Hi-

Pag 189.

Historien paroist en d'autres lieux, où il le nomme
 seulement Chantelouue, le joignant avec des
 personnes qui n'estoient pas de meilleure con-
 dition, ny peut estre de si bonne, auxquelles il
 donne du sieur. Mais comment à peu estre au-
 theur de cette guerre vn homme qui n'auoit veu
 la Roynie de six mois, & s'estoit tenu tousiours à
 son gouuernement de Chinon, depuis que S. M.
 arriva à Angers: Il y fut appelle par le conseil de
 l'Euesque de Luçon, lors que tout le party fust
 formé, & receut la commission peu de iours de-
 uant l'esclat, d'aller disposer Monsieur le Com-
 te de Soissons & le Grand Prieur de sortir de Pa-
 ris. Apres ce voyage il se retira à Chinon, pour
 laisser à l'Euesque tout le maniment d'vne affai-
 re qui estoit de son inuention, & de sa conduite.
 On trouuera encore cent lettres escrites de sa
 main sur ce sujet: les commissions furent dres-
 sees par luy fort aigres au commencement: mais
 elles furent adoucies par l'aduis du P. Ioseph: il
 en donna à tous ses parens & alliez: il ordonna
 des Finâces: le Prieur de la Cochere, sa creature,
 fist toutes les intrigues de la Cour, & de Paris: il
 ne se passa rien que par les aduis & par les ordres
 de l'Euesque, qui griuela cent mille escus. Le
 Marquis de Brezé son beau frere, le Marquis
 de la Fosseliere oncle de Brezé, le Baron du
 Pont du Chasteau, & plusieurs autres parens
 ou alliez du Cardinal, auoient du commande-
 ment dans les troupes: l'Historien le dit, & ne
 fait aucune difficulté (encore qu'ils ayent à
 present des grandes charges) de les ioindre avec
 ceux qu'il appelle Rebelles, afin d'auoir occasion

Pag. 105.

& 108.

d'estimer leurs courages. C'est vne mauuaise pratique en France, que ceux qui ont plus de part dans vn mouuement, ont la meilleure recompense dans l'accommodement; d'où ie peux conclurre, que l'Eueque de Luçon, ayant tiré profit tout seul de la guerre & de la paix d'Angers, a esté le principal arbitre de l'une & de l'autre. C'est vne plus grande merueille, que tous ceux qui agissoient dans ces rencontres, soient condamnez comme criminels, lors qu'on nous veut persuader, que celuy qui en est l'auteur, est le seul innocent. Il est vray que cét esprit non seulement vacillant, mais peu entendu aux affaires, ou par malice, ou par ignorance auoit mis la confusion par tout: il auoit emoussé la pointe des courages de ceux qui recognoissoient qu'on ne s'en vouloit seruir que pour faire peur, & qui se desioient de l'intelligence secrette entre l'Eueque & le Duc. Ces deux Ministres estoient fort timides; chacun n'auoit que sa fortune deuant les yeux: ils se craignoient l'un l'autre, & on ne pouuoit dire qui auoit plus d'enuie de perdre son compagnon. L'Eueque apprehendoit vn mauuais succez qui obligea la Roynes à passer la riuere de Loire, pour s'aller ietter dans les troupes des Ducs de Mayenne & d'Espèrno, où il ne seroit pas le Maistre, & où ses artifices seroient descouverts: il iugeoit aussi, qu'un aduantage du party de la Roynes pourroit porter les choses à vne perilleuse extremite contre luy, & à vne reuelation de tous les mysteres secrets. De l'autre costé, le Duc de Luyne se desioit grandement des euenemens incer-

tains de la guerre, & sçauoit bien que sur le moindre eschech qu'il receuroit, toute la France se soufleueroit contre son credit. Pour gagner le temps, qui est tousiours favorable à ceux qui s'aduancent, il n'estoit question que de faire des poursuites à Rome pour auoir vn bonnet de Cardinal, qu'on pouuoit reculer sous main, comme on fist. Ces considerations porterent ces deux esprits à la paix, & les mirent d'accord deuant le rencontre du Pont de Sé. Le Duc de Rhez apprist quelque chose de cette fripponnerie par les aduis de son oncle le Cardinal, qui estoit dans le Conseil: il se cabra sur cet aduertissement, & fut cause par sa retraicte de la desroute; laquelle eust esté d'une autre façon & plus sanglante, si elle ne se fust passée de la sorte. L'Euesque auoit donné si mauvais ordre dans le Pont de Sé, qu'il n'y auoit ny poudre, ny balles, ny mesches, ny dans Angers moyen de subsister trois iours: si la Royné eust esté pressée, le passage du Pont de Sé estant fermé, il ne restoit plus que d'aller chercher celui d'Ansenis, à quoy on s'estoit resolu dans vn Conseil, où il n'y auoit que cinq personnes. L'Euesque en donna aduis au Duc de Luynes, qui enuoya la Canallerie du Roy pour empescher ce dessein, qui renuersoit tous ceux de M^r de Luçon: il se deuroit souuenir que nous auons sçeu & remarqué tout ce qui se passa en ces occasions: que nous auons avec nous plusieurs personnes qui agissoient dans les affaires: que i'en ay veu & sçeu vne bonne parrie: mais sur tout, que la Royné est vn Oracle de verité, qui a tres-bonne memoire de

tout ce qui est venu à sa cognoissance. On faisoit peur aux meschans dans la ville de Sparte de la Lampe du Pritanée; on disoit qu'elle faisoit voir les crimes plus secrets: le Cardinal de Richelieu & son Historien se deuoient souuenir, que nous auons non pas vne lampe, mais vn Soleil qui a tout veu & cognu, encore qu'il aye dissimulé beaucoup de choses.

Je soustiens donc, que la harangue de l'Euesque de Luçon, faicte, comme Dupleix assure, à la Royné Mere du Roy deuant l'armement d'Angers, est de l'inuention de l'Historien, encore qu'il vœuille persuader qu'il la tient de bon lieu. Ce discours ne se peut accorder avec les desseins de l'Euesque: il est vray, qu'ayant veu la desfroûte & pris ses assurances, il descouurit, & executa l'accommodement qu'il auoit desia faict. Mais quelle apparence y a-il, qu'en parlant à la Royné, il aye vsé de ces termes: *Ceux qui ont engagé vostre Maiesté en cette leuée de bouclier, &c. que Dieu fauorisolt les iustes armes du Roy*: il auroit dans le premier discours blasmé ses propres conseils que la Royné sçauoit, & dans le second il eust accusé sa conscience, & condamné le Manifeste qu'il auoit faict composer, pour monstrier la iustice des armes de la Royné, laquelle l'eust tenu pour vn esprit leger, s'il se fust meslé de luy faire cette sorte remonstrance. Mais il faut remarquer que Dupleix, pour prouuer que le Cardinal de Richelieu a esté tousiours fidele au Roy, s'esche de le faire passer pour infidele à la Royné; & au party qu'il a non seulement suiuy, mais formé. C'estoit vne chose impossi-

Pag. 308.

Pag. 307.

ble dans le rencontre des affaires de ce temps-là, de servir le Roy selon ses inclinations, & la Royne selon ses intentions.

Je laisse à part vne grande quantité de mengeries que l'Historien dit sur les affaires d'Angoulesme & d'Angers : ie veux croire que ce ne sont que des effects de son ignorance, comme les choses importantes qu'il n'escriit pas sont des tesmoignages de sa negligence, ou precipitation.

Je conclus cette seconde partie par la paix qui produisit à la Royne la consolation de voir le Roy, & la liberté d'aller à Paris.

L'entreueuë se fist avec des grandes tendresses de cœur pres du Chasteau de Brissac, d'où le Roy dépecha le iour suiuant vn Courrier à Rome, qui portoit les ordres à son Ambassadeur, de poursuiure avec grande instance & chaleur la promotion de l'Euesque de Luçon au Cardinalat: la Royne enuoya aussi vn Gentil-homme pour prier le saint Pere de luy donner cette satisfaction, & l'Euesque y fist aller le Prieur de la Cochere, son grand confident, avec Martin son Secrétaire. Tous les Princes & Seigneurs qui estoient dans le parti, auoient la dague dans le sein; sur tout le Cardinal de Guise, & les Ducs de Mayenne & d'Espernon : ils rougissoient de honte, de ce que leur armement n'auoit produit que la sollicitation d'un bonnet rouge. Le Duc de Luynes auoit des ressorts secrets pour le reculer; & il y auoit apparence, que s'il eust vescu en credit, l'importunité de l'Euesque luy auroit esté à la fin fort funeste, & peut estre desagréable à la Royne. Sans doute l'ardeur de l'ambi-

tion eust precipité le Prelat dans quelque mauvais conseil ; ou le Duc de Luynes eust pris vn estrange pretexte pour n'executer pas vne chose qui auoit esté promise avec tant de sermens , & cimée par l'alliance de la niepce de l'Euesque, fille du sieur du Pont de Courlay, avec le nepueu de M^{re} de Luynes, appellé Combalet. Ce lien de mariage n'eust pas esté assez fort pour arrester le Duc: celui de la Consine du Cardinal de Richelieu avec le Duc de Puylaurens, emprisonné six semaines apres les nopces, nous fait voir, que les Fauoris ne respectent ny Sacremens, ny contracts, ni promesses, quand il est question de conseruer leur fortune : vn ombrage donne la peur qui renuerse tout ce qu'elle rencôtre, & souuent apprehende son secours comme ses ennemis.

Si le Duc de Luynes fust retourné de Montauban, ou il eust contraint l'Euesque de venir aux extrémités, ou il eust esté obligé de souffrir ce qu'il a fait sentir à Puylaurens. Dieu en disposa autrement : il fist mourir le Connestable : par ce moyen il ouurit à la Royne le chemin à vn plus grand credit, & osta les obstacles qui empeschoient que l'Euesque ne monta à cette eminente dignité : il y arriva apres cette mort, & par celle de quelques autres Ministres, qui moururent dans les voyages de Montauban & de Montpellier. Ce changement fist naistre vn autre regne, dans lequel la Royne Mere du Roy ne trouua pas tout à coup son contentement, ny le credit qu'elle meritoit ; rien ne le recula tant que l'apprehension que le Roy & ses Ministres auoient de l'Euesque de Luçon. On

Le Cardinal de Richelieu, le Duc de Luynes, le Garde des sceaux du Vair.

ſçauoit bien que le deſſein de la Royne eſtant de ne l'aduancer dans les affaires, cet homme n'y ſouffriroit iamaïs ny ſuperieur ny compaignon: cette crainte retint vn peu le Roy, qui ſe relâcha aux prieres de la Royne ſa Mere, pour faire pourſuiure le bonnet de Cardinal, qui vint huit mois apres la mort du Conneſtable, mais il n'apporta point l'entiere confiance. La connoiſſance des doubles ieux que le Duc de Luy-nes deſcouurit, & ceux que le Roy ſçauoit, auoient produit dans l'ame de Sa Maieſté vne ſi mauuaiſe opinion du Cardinal, qu'elle ne le vouloit point dans ſes Conſeils: ceux qui auoient l'honneur d'y eſtre, ne ſe pou-uoient reſoudre de le deſirer parmi eux, de peur qu'il ne ſe miſt par deſſus eux: la Royne ſurmon-
ta toutes ces difficultez. Et d'autant que l'Hiſtorien ne dit rien de tout ce que cette grande Princeſſe fit pour l'auancement de ce ſeruiteur ingrat, il eſt neceſſaire que cette troiſième partie de noſtre diſcours donne quelque lumiere aux affaires qui ſe paſſerent depuis le retour de la Royne dans la Cour, iuſques à ſa ſeconde ſortie; c'eſt à dire, depuis la naiſſance du credit du Cardinal de Richelieu, iuſques à ce que ſon autorité eſt arriuée à vn tel point, qu'elle a peu & voulu ruiner celle qui en auoit ieué les fondemens, & dreſſé tout le baſtiment. Il a eſtimé les bien-faits de la Royne, tant qu'il a eſperé de s'en pouuoir acquitter: lors qu'il a eſté accablé, il a deſeſperé de la recognoiſſance, & s'eſt ietté dans la haine.

Nous ne ſerons pas en peine de refuter ce

que l'Historien en dit : mais de le reprendre de ce qu'il n'en dit rien: son silence est autant coupable en cette partie de son Histoire, comme son insolence est criminelle dans toutes les autres.

Tout le temps qui s'escoula depuis l'an 1621, qui fust celuy de la mort du Duc de Luynes, iusques en l'an 1630. auquel arriva la rupture, fust la saison des moissons du Cardinal : il acquist les rentes, les dignitez, les emplois & la puissance; par le moyen de la Royne, qui luy donna les biens, & luy procura tous autres aduantages qu'il a fait valloir contre elle. Tous ces bien-faits, qui deuoient estre marquez dans l'Histoire, ne peuuent estre niez, puis qu'ils esclatent avec l'escarlata, paroissent avec les bastimens, & font du bruit avec la suite: mais ils ne sont point dans les memoires que le Cardinal a donné à Dupleix, qui n'en dit pas vn seul mot : il parle ainsi dans la Preface : *Le Connestable de Luynes deceda en Gascogne : par son trespas la Royne Mere ventra en credit, & le Cardinal de Richelieu fust employé en la direction des affaires d'Estat.* Il n'a pas voulu adionster ces trois ou quatre paroles, *par le moyen de la Royne.* Je feray voir dans cette Histoire de l'aduancement du Cardinal, qu'on remarque son ingratitude en ces trois chefs, qui sont, cacher le bien-fait, le nier, & le conuertir en iniure : celuy qui le cache est sans courage, celuy qui le nie est sans probité, & celuy qui le conuertit en iniure, doit passer pour vn monstre, non seulement parmi les hommes & les bestes, mais entre les choses qui n'ont point d'autre sentiment que celuy d'une espee de reco-

gaoissance, que la nature ne leur a pas voulu refuser, comme à certaines fleurs de suivre le Soleil, & aux autres de s'ouvrir quand il monte, & se fermer quand il descend : on voit en tous les corps composez quelque marque de ce qu'ils reçoivent de la Lune: sa plénitude les fortifie, son deffaut les affoiblit, & ses eclipses les font souffrir. Il est vray que le Cardinal de Richelieu a receu de grands biens dans la plénitude de la Royne : mais tant s'en faut qu'il aye compaty à sa defaillance, qu'il en a voulu estre l'auteur, & que cette vapeur esleuée des marais de Poictou, a osté sa clarté à ce bel astre qui l'auoit attirée, Luci, quo. exulit, obfians.

Il n'y a point de symbole d'ingratitude parmi les animaux : & dans toutes les especes des plus farouches, il y a des exemples de recognoissance. Vn petit dragon auoit esté nourri par Thoas, lequel ayant veu que son pensionnaire deuenoit trop grand, il le mit hors de son logis: Thoas estant tombé entre les mains des voleurs, cét animal entendit la voix de son bienfaicteur, & accourut pour le deliurer. Si la Royne, pour des considerations que nous dirons, a fait sortir de sa Maison le Cardinal de Richelieu, qui en effect estoit trop puissant: il est plus cruel que les dragōs, lors qu'il n'a point esté esmeu en oyant les plaintes de cette Princesse, transportée d'un si grand amour enuers le Roy, que depuis peu elle a demandé l'assistance de son seruiteur pour s'approcher de son Enfant. Cera- Democri-] mus. Ælianus.
nus auoit racheté d'un pescheur quelques dauphins pour leur dōner la liberté: ils receurent cét

homme sur leurs dos apres le desbris de son vaisseau, & le porterent au riuage. Le Cardinal de Richelieu a veu les tempestes de la Roynie, s'en est resiouy, s'en est mocqué, & les a esmeuës apres auoir esté tant de fois retiré des filets par les soins & auctorité de cette Princesse. Ce qui est plus estrange, est, que ne s'estant iamais trouué personne qui aye voulu seulement excuser les ingrats: le Cardinal de Richelieu rencontre des gens qui le loüent. Mais nous sommes assurez que toutes ces flatteries ne charment pas les desplaisirs de celuy qui est deschiré par le reproche de sa conscience: son habit, ses ameublemens, ses maisons, & sa suite luy rafraichissent la memoire des bien-faits, qu'il ne peut oublier qu'en quittant toutes ces marques. Pindare a dit, qu'Ixion pour sa mesconnoissance, & pour auoir violé le respect qu'il deuoit à Iunon, estoit sans cesse tourné & deschiré par vne rouë, sur laquelle ces paroles estoient escrites: *Il faut faire du bien à ceux qui nous en ont fait.* Je sçay que le Cardinal est plus tourmenté par ce peché, que par tous les autres qu'il a commis: il voit bien qu'il est le plus sale de tous ceux qui deshonorent sa vie, & est tellement public, qu'il ne se peut cacher, comme il a fait la cruauté, l'ambition & l'auarice. Quiconque porte les liurées d'un bien mal reconnu, porte celles de son ingratitude: descouurons l'infamie de la sienne par les trois degrez, qui sont, l'oubliance, le desauœu, & l'iniure.

Pour le premier, l'Historien n'a rien dit ny de la promotion au Cardinalat, ny de l'arriuée

Lumieres pour l'Histoire de France. 813
du bonnet, ny en quelle façon il fut donné & receu, ny des remercimens & harangues qui furent faites au Roy & à la Roynne: tout ce qui se passa dans la ville de Lyon, est oublié pour faire oublier ce bien-fait. Dupleix ne dit autre chose de tout ce qui meritoit vn discours de quatre fueilles, si ce n'est, que le Roy trouua les Roynes à Lyon, & que le Prince & Princesse de Savoie y vindrent visiter S. M. Puis que l'Historien a voulu estre si soigneux en tout ce qui regarde celui auquel il vouloit agreer, qu'il a remarqué ses plus petites actions, & mesmes celles de ses ancestres, il me semble qu'il deuoit dire quelque chose du plus notable rencontre de la vie du Cardinal: il estoit obligé d'escrire au long ce qui se passa à Rome pour la promotion, & à la Pacaudiere, où la nouvelle fust apportée, lors que celui qui l'auoit attenduë deux ans, estoit logé en la maison où pend pour enseigne le Chapeau rouge: mais principalement ce qui arriva à Lyon, meritoit bien d'estre escrit. Le Cardinal en partit pour aller trouuer le Roy en Avignon, où il fit ses premiers remercimens, & fut receu assez froidement. S. M. vint à Lyon, où cette ville magnifique luy fit la plus belle entrée qu'on aye veu dans le Royaume: l'Historien la deuoit estimer.

Le Bonnet rouge fut donné par le Roy dans la Chappelle de l'Archeuesché: celui qui le receuoit fist vne harangue à S. M. fort bien conceüe, estudiée avec soin, & recitée de bonne grace. S'il eust pleu à son Eminence de la donner à son Historien, comme il a fait celles d'An

goulesme & d'Angers, faites à plaisir, & selon le temps qui court, nous eussions veu quelque chose de mieux poly, & de plus veritable: mais sur tout nous admirerions le remerciement que le nouveau Cardinal alla faire à la Roïne, en apportant son Bonnet à ses pieds: ce que i'en ay bien retenu, est, qu'il promit à S. M. de respandre son sang pour son service; & qu'il dit, que cette escarlante, qu'il tenoit de sa seule bonté, le feroit tousiours souuenir de ce vœu solennel. Ceux qui ont eut l'honneur d'estre auprès de cette Princesse dans les persecutions que le Cardinal luy a fait, sçauent qu'il s'est si mal acquitté de ce vœu; qu'au contraire, outre vn seau de larmes qu'il a fait sortir des yeux de S. M. les maladies venues de ses desplaisirs ont fait tirer de ses veines cent poillettes de ce sang, duquel Dieu a fait les Roys & les Roynes. Misérable ingrat, qui ne veut pas qu'on escriue la moindre chose des instances que sa trop bonne Maistresse a fait en France & à Rome pour arracher ce morceau de pourpre, que i'ose appeller fatale, parce qu'elle a esté le fondement de cette fortune insolente & cruelle. Combien de passions a eu la Roïne pour rompre les difficultez si grandes, que ny Paul V. ny Gregoire XV. ne vouloient point ouyr parler de mettre dans le sacré Collège ce Prelat? Le premier le cognoissoit: & il auoit esté bien descript au second par l'histoire de sa vie, qui luy auoit esté enuoyée. Combien de Finances a employé S. M. pour des voyages & pour des presens? que ne donna-elle au Cardinal pour augmenter son train, & faire son

emblement ? Celuy qui l'eust ouy dans ce
 magnifique festin qu'il fist à Lyon aux Prin-
 ces & Grands de la Cour, le iour qu'il receut
 le bonnet, n'eust iamais creu, qu'un cœur qui
 faisoit sortir de sa bouche des paroles d'un
 ressentiment d'obligation si extraordinaire,
 eust produit des actions si contraires à son dis-
 cours, & si estoignées de son deuoir. Je sçay
 que la Royne oublie plus facilement les biens
 qu'elle a fait, que le Cardinal de Richelieu ceux
 qu'il reçoit : S. M. donne avec tant de generosité,
 que les Graces ne sont point accompagnées chez
 elle de la memoire, comme elles sont parmy
 les Poëtes : si leurs inuentions en posent quatre
 sur la main droicte d'Apollon, & mettent son
 arc desbandé à la gauche : c'est pour nous faire
 voir, qu'il ne faut iamais employer les armes de
 la puissance contre les loix de la recognoissan-
 ce, & qu'il faut plustost oublier sa main droicte
 que les obligations. I'affeure que la Royne ne
 se souuiet pas des biens qu'elle a fait au Car-
 dinal : ce n'est pas seulement à cause que le trop
 grand nombre a peu confondre sa memoire,
 mais parce que Sa Maïesté donne avec toutes les
 qualitez de la plus genereuse liberalité : entre
 lesquelles vne des principales est, de perdre la
 souuenance avec ses bien-faits, qu'elle ayme
 mieux voir perir dans vne ame ingrate, que de
 les conseruer dans ses mains. Ce n'est donc pas la
 Royne qui fait des reproches au Cardinal : mais
 les seruiteurs de S. M. qui ont veu vne partie de
 ce qu'elle a fait pour luy, qui taschent de le fai-
 re souuenir, qu'outre la dignité de Cardinal,

Obluion
 deur dex-
 tera mea,
 non me-
 mero
 tulo

& l'employ dans le ministere de l'Estat; il a reçu de la Royne dans dix ans plus de neuf cens mille ecus en argent comptant, ou en presens; entre lesquels il y a vne Chapelle de cent mille pistolles. S. M. luy a aussi donné tous les grands benefices qui ont vacqué de sa nomination, & la pluspart des autres pour ses parens & amis: elle a obtenu du Roy plusieurs Abbayes pour luy: elle a fait pour son aduancement, & pour celuy des siens, tout ce que nous auons veu iusques au siege de la Rochelle. Je ne dis rien de ses appointemens ordinaires, ny des profits que luy & ses creatures ont tiré des principales charges de la Maison de la Royne, qu'ils ont possédé & vendu, ny des parties casuelles des domaines de S. M. qui tomboient toutes dans leurs mains. De toutes ces riuieres s'est faite cette mer de sommes si immenses, qu'il ne se faut pas estonner si la memoire du Cardinal est vn peu confondue: mais il a tort d'oublier le tout en gros, & principalement cette Dignité, de laquelle son Historien n'a pas voulu dire vn seul mot, de peur de rougir en parlant de l'Escarlatte.

Passons à la seconde marque de l'ingratitude, qui nie le bien-fait: elle est euidente dans l'Histoire de Dupleix. Il commence par la description des qualitez necessaires à vn Ministre d'vn grand Estat: il dit, *qu'elles n'ont iamais esté toutes en vn seul homme, ny mesmes en vn Senat: cependant il les fait toutes rencontrer en vn degré de si haute eminence en la personne du Cardinal, que tout ce qui a esté deuant & apres, se trou-*

uera

Page 363.

364. 365

& 366.

uera au dessous. Sa conclusion est : Les suffrages de toutes les personnes iudicieuses l'anticipant par vœux & desirs, & le Roy mesme, le plus capable de iuger des merues de ses subiers, y ayant vne grande inclination, il fut eslu le premier Ministre d'Estat par S. M. à Compiègne, avec tant d'advantages, qu'elle luy remit en main toute la direction de son Estat. Sauf correction de Monsieur l'Historien, dans ce discours il n'y a rien de veritable que la loüange du Roy, qui est accompagnée d'un horrible blasphème contre sa personne sacrée : nous le descouvrons apres que nous avons remarqué l'ingratitude du Cardinal. Il veut qu'on escrive de luy, qu'il a esté aduancé au ministere par les vœux de tous les sages François, mais sur tout par l'inclination du Roy. Taire malicieusement ce que la Royne y a contribué, est nier tacitement son bien-fait : il est tel, qu'apres la promotion au Cardinalat, qui deuoit servir pour paruenir au maniement des affaires, celle qui auoit fait vn Cardinal avec deux ans de peine, en eust d'auantage, & employa autant de temps pour faire vn Ministre d'Estat : tant s'en faut que tous les aduisez de la Cour le desirassent, qu'ils s'y opposoient formellement. Le Chancelier de Sillery, homme tres-sage, & Mr. de Pisieux, y resisterent vn an; au bout duquel ils tomberent en disgrâce. Le Marquis de la Vieuille succeda à leur credit, & l'employa pour donner l'exclusion au Cardinal, qu'il ne vouloit point auoir pour compagnon, de peur qu'il ne deuint son maistre. La Royne auoit vn ardent desir de voir son seruiteur dans le Conseil, tant pour la sou-

lager, que pour le fortifier, en sorte que dans le service du Roy qu'elle se proposoit tousiours, elle peut asseurer son contentement, qui auoit esté sans cesse trauersé par les hommes de faueur. Le Roy qui auoit cogneu le Cardinal dans les affaires d'Angoulesme & d'Angers, & dans celles qui se passerent deuant & apres la mort du Marechal d'Ancre, apprehendoit cét esprit qui luy sembloit estre plus fin que prudent. Le Connestable de Luynes, & plusieurs autres, luy auoient fait voir les destours de ses souplesses, qui donnoient à S. M. vne si grande auersion, qu'au lieu de cette forte inclination, que l'Historien nous veut persuader auoir de siré ardemment ce nouveau Ministre, nous pouuons dire, que ce grand Prince s'en deffendoit avec toutes les armes que son bon esprit luy pouuoit fournir, & ne le nommoit iamais sans luy donner la qualité de fourbe. Apres auoir representé familierement à la Royne sa mere les iustes suiets de ses deffiances, cette benne Princesse (à laquelle le Cardinal auoit tousiours caché avec grand estude ses imperfections) asseuroit que tout ce qu'on auoit dit contre luy, estoit des inuentions de ses ennemis. Le Roy füst contraint, se voyant trop pressé, de se retrancher dans vn deffaut naturel que nous ne voulons point publier. Le Marquis de la Vieuille, qui auoit la plus grande part dans la bien-veillance du Roy, & dans les affaires, craignoit que le Cardinal n'en approcha: la Royne prenoit beaucoup de peine pour asseurer le Marquis: lequel, apres plusieurs protestations & dilayemens, prit

la hardiesse de dire, qu'elle luy commandoit vne chose; par laquelle il preuoyoit qu'il seroit ruiné dans peu de temps, & que S. M. en receuroit vn iour du desplaisir: mais puis qu'il la voyoit resoluë à cela, il aimoit mieux hazarder sa fortune, que perdre l'honneur de ses bonnes graces. Le Cardinal entra donc par ces moyens dans le Conseil, & le premier iour qu'il y prist seance, il donna suiet au Marquis de venir à vn esclatcissement avec luy. Les Historiens qui entreprennent de parler de ces choses, & celuy qui les fait desguiser, sont bien effrontez de ietter ces menteries dans le public, non seulement durant la vie de la Royne, mais de tous ceux qui agissoient dans ces affaires; comme sont, le Marquis de la Vieuille, le ieune Beautru, & moy-mesme, qui estois employé pour faire reüssir le dessein de la Royne. Je ne dis rien de ceux qui sont parmi nous, qui ont fait des voyages pour gagner des personnes que la Royne croyoit estre contraires à ses volonteiz. Je peux d'oc conclure avec raison, que ce n'est pas oublier le bien-fait, mais le nier, de dire que le Cardinal aye esté appelé dans le Conseil par la iustice des inclinations du Roy, & par le grand mérite de sa personne. La Royne y a beaucoup plus contribué que tout cela, par des intentions tres-bonnes, qui ont esté frustrées; parce que les actions du Cardinal n'ont point répondu aux esperances de sa Maistresse. Je remarque aussi, que par ces mots, *par la iustice des inclinations du Roy*, le Cardinal fait ietter le fondement de son ingratitude enuers S. M. lors qu'il tasche de nous persuader, que le plus grand honneur qu'il

a receu de son Maistre, n'est pas vn effect de sa bonté, mais vne action de sa iustice, qui luy deuoit cette charge. C'est aussi vne impudence bien estrange, d'asseurer qu'il fust leu premier Ministre de l'Estat avec tant d'auantages, que le Roy luy remit en main toute la direction de son Royaume. En la page 372. en l'an 1624. Le Roy le crea premier Ministre d'Estat, Chef de son Conseil, & Directeur general sous l'autorité de S. M. au gouvernement du Royaume. Page 381. Ce grand Cardinal ayant donc la direction du Royaume en main sous l'autorité de S. M. Souueraine, &c. Si cette qualité de premier Ministre regarde la plus releuée personne, on la doit à la Royne, qui estoit pour lors dans le Conseil: si dans l'egalité des conditions elle appartient au plus ancien Conseiller; on ne la peut oster au Cardinal de la Rochefoucault, sans luy faire vne iniure: il estoit dans le sacré College & dans les affaires deuant le Cardinal de Richelieu; & auoit sa place au dessus de luy. Si on n'en fait point d'estat, parce qu'il n'a pas esté si entreprenant, il en est plus louable. Mais se faut-il estonner de ces discours, qui tendent à oster ce qui est deu aux seruiteurs du Roy, puis qu'on arrache le sceptre de la main de S. M. par ces paroles horribles, que le Roy à Compiègne remit en la main du Cardinal toute la direction de son Royaume? n'est-ce pas escrire en termes, qu'il semble que le Roy soit deuenu mineur, ou foible d'esprit, & que d'un Conseiller il aye fait vn tuteur ou vn Regent? Qui a iamais ouy dire, qu'il y aye eu vn Directeur general des affaires de France, comme Oxestern l'estoit des Sus-

dois, apres qu'ils n'eurent plus de Roy? Cependant l'Historien nomme Directeur (& peut estre appellera Dictateur perpetuel) le Cardinal de Richelieu, parce qu'il a honte de dire qu'il est simple Ministre, ce nom estant trop commun; comme ceux de General des armées & d'Admiral, au lieu desquels on a fait expres pour le Cardinal lestiltres de Generalissime, & de Surintendant des mers. Je peux dire aussi, qu'il n'est pas vray qu'à Compiègne le Roy déclara le Cardinal, ny premier Ministre, ny Directeur: il estoit vn Conseiller iusques à ce qu'il eust chassé tous ses compagnons, pour composer vn Conseil à sa mode, ou demeurer seul. Il esloigna deslors le Connestable de Lesdignieres, & le sieur de Buillon par la guerre contre les Genoïs: il desgousta le Cardinal de la Rochefoucault, qui se retira peu à peu des affaires: dans quelques mois il rendit prophete le Marquis de la Vieuille; il fist que non seulement il fut chassé, mais emprisonné. Il ne restoit plus que le Chancelier d'Aligre, auquel vn an apres il fit oster les seaux, & la liberté d'estre à la Cour: il dressa vn Conseil selon sa fantasie, & distribua toutes les principales charges à ses creatures. Il a si bien fait du depuis, qu'il est demeuré tout seul dans le ministere; c'est le premier & dernier Ministre, mais non pas le Directeur general de l'Estat. Nous ne voulons pas faire cette iniure au Roy, qui ne pourroit abandonner à vn seruiteur le gouvernement de son Royaume, sans faire dire, que * là où le valet regne, la terre est esbranlée. Je m'assure que Dupleix n'a pas

Pag 367;
Le Cardinal de la Rochefoucault se feroit désirer la retraite: son aage ne luy permettoit pas d'agir assez vigoureusement, & son inclination le faisoit préférer au repos. & à la conversation avec les personnes valétueuses.
* Pro. 30;

osé écrire, que la Royne mit le Cardinal dans le Conseil du Roy à Compiègne: parce qu'il auoit honte de dire que cet ingrat a trouué l'establissemēt de son credit au mesme lieu, où six ans apres il a fait arrester prisonniere celle qui luy auoit procuré ce grand aduantage. Il me semble pourtant qu'il eust esté plus à propos de dire la verité de ce que la Royne auoit fait pour l'aduancement du Cardinal, que de faire vne longue digression sur sa genealogie, & employer sept ou huit pages, pour prouuer que par les femmes il est descendu de Louys le Gros. Il a dresé vn abregé de la vie & hauts faits de ses ancestres, a rapporté toutes leurs alliances, & les terres qui ont esté en leur maison: il a estallé ce que son pere & luy ont fait depuis le berceau, & a dit que *la charge de grand Preuost, ou selon du Tillet, du Roy des Ribands, que le pere a exercé, faisoit anciennement vne partie de la dignité de Maire du Palais, que le fils a affecté toute entiere: l'Historien ne voit pas qu'il esueille beaucoup de pensees. A quel propos aussi faire ce grand Panegyrique, remply de tous les rencontres & actions de la ieunesse du Cardinal, & rascher par vn long discours de prouuer contre la pratique du monde, & de tous les grands Roys, qu'ils ne doinent auoir qu'vn Conseiller, parce que la perfection consiste en l'vnié, que la Monarchie est le plus excellent gouuernement, & qu'vn carrosse qui est tiré par plusieurs cheuaux ne v i pas si seurement, comme celuy qui n'est traîné que par vn? & semblables traicts d'impertinence, qui vont iusques à comparer le Cardinal à vn cheual de carrosse,*

Pag. 365.

Pag. 369

Pag. 373.

Cependant il est vray que Dupleix a plus acquis les bonnes graces de son Eminence par ces folies de sept ou huit fuilllets, qu'en tout le reste de son trauail : celuy qui ne se proposoit que la recompense l'a arrachée par cette genealogie imprimée dans tous les liures du temps : tous les Comediens du Cardinal luy ont souuent ioué cette piece, qu'ils auoient recognen luy estre tres-agreable, & semblable à celle que Paterculus recitoit à Seian, qu'il faisoit descendre des Roys par les femmes. Où sont ces saintes Loix de l'Histoire, qui ne permettent pas qu'on quitte la suite des choses pour se ietter sur des louanges, ny mesme qu'on porte vn iugement des actions, & beaucoup moins des intentions des hommes, ny qu'on serende caution pour celuy qui est encore en estat de faillir, ny qu'on escriue ce qui n'est pas arriué? Dupleix est fol, s'il se persuade, qu'avec vresprit lourd & avec des paroles grossieres il changera les choses faites, & qu'il honorerà le Cardinal en se deshonorant. Xenophon, Thucydide, Iules Cæsar, qui sont entre les plus veritables & serieux Historiens, escriuent ce qui s'est passé, & laissent iuger ceux qui le liront. Dupleix nous prend pour des pauures ignorans, lors qu'il nous veut donner avec vn mauuais discours le mesmes pensees qui luy ont fait donner des bonnes pistoles : il ne voit pas que personne se mettra en peine d'apprendre la verité de celuy, qui eust esté chastie s'il eust dit ce qu'il sçauoit, & qui a esté recompensé pour auoir esrit ce qu'il ne croyoit pas.

Les digressions de Dupleix nous obligent à

*Les fleurs
de sainte
Marthe,
du Chef-
ne, le Cha-
selet, le
Mercur
François,
Et plu-
sieurs au-
tres, ins-
crites aux
Gazettes.*

Pag 130.

Pag 445

446. &c.

l'Euesque

de Mende

Prelat il

lustre en

extraict d,

pietè &

d'etrine

luy remon

stra gene

rensen-çs,

&c.

nous esloigner de nostre discours, pour faire voir la sottise du sien. Reuenons à Compiègne, qui a esté le theatre, sur lequel il semble que l'ingratitude aye affecté de iouër son dernier acte; parce que la Royne Mere du Roy y auoit fait paroistre le plus remarquable effect de sa bonté, pour l'auancement du Cardinal. L'Historien dit qu'en ce mesme lieu, au commencement de l'employ du Cardinal, fut raicté le Mariage d'Angleterre: il adiousté, que les Anglois ayans receu les sommes qui leur furent promises, se monstrent peu soigneux de l'exécution de leurs promesses. Vous diriez, en lisant cét escrit, que ce grand Roy de trois Royaumes attendoit la dot de la Royne pour disner, & avec dessein de se mequer de nous apres qu'il l'auroit receüe: mais tout cela n'est rien en comparaison de horrible calomnies, qu'on ose imprimer contre les personnes du Roy & de la Royne d'Angleterre sur le suiet du renuoy des François. On ne peut voir sans horreur les iniures atroces que l'Historien dit à leurs Maiestez: il fait faire vne harangue insolente à l'Euesque de Mende; & pour auoir suiet de loier vn parent du Cardinal, qui par sa mauuaise conduite auoit prouoqué la iuste indignation de ce Roy, il nous le décrit comme vn Prince sans foy & sans parole, il le menace comme vn simple Gentil-homme, il le veut faire passer pour vn pauvre bourgeois, qui n'a pas le moyen d'entretenir sa femme selon sa condition; & pour vn maistre qui querelle ses seuiteurs pour s'exempter de leur payer leurs gages. En suite de cét estrange discours, la Royne d'A-

gleterre est descrite comme vne personne furieuse, & desesperée pour le renuoy de ses domestiques; encore que cette Princesse aye, avec le bon esprit & le courage qui reluisent en elle, vne sagesse si grande, qu'elle n'a iamais permis à sa bonté la moindre demonstration qui fust indigne de sa Naissance. Pour ce qui regarde le Roy, la Police de ses Royaumes qu'il entretient en paix, les richesses de ses suiets, l'amour qu'ils luy portent, la magnificence de sa Cour, les plaisirs innocens qui s'y voyent, l'obeïssance & le respect des Grands, sa clemence, sa douceur, sa liberalité, & sur tout les belles esperances que le Prince de Galles donne à ses Estats, nous font voir qu'il est non seulement vn Roy tres-avisé, mais tres-heureux. Il ne se peut rencontrer dans la bonne opinion du Cardinal, parce qu'il n'a pas voulu suiure ses passions, ny se laisser tromper & piper, comme ont faict quelques autres Princes moins prudens & gouvernez par des Fauoris. Ce grand Roy a aussi consideré, qu'il ne pouuoit, sans flestrir sa belle reputation, appuyer les desseins d'vn homme qui ostoit la liberté & les biens à la Royne sa belle Mere, & taschoit par des calomnies de luy rauenir l'honneur, auquel ses Enfans ont grande part. La generosité de la Royne son Espouse n'a peu souffrir toutes ces entreprises contre les entrailles qui l'ont portée; les siennes qui sont tendres, ont esté esmuës: elle sçait que Dieu luy fera rendre par les Princes & Princeses ses Enfans, ce qu'elle tesmoigne de bon naturel à la Royne sa Mere. Tout cela ne s'accorde pas

avec les intentions du Cardinal, qui voudroit que S. M. fust abandonnée & reietée de tout le monde, & mesme de ses plus proches. Il luy a rauy les personnes du Roy & de Monsieur, & voudroit desrober les affections des Filles: il auroit fait ses efforts en Espagne, mais il a peu d'accez dans cette Cour, & encore moins dans le cœur de la Roynie, tres-fidèle à la nature: il a tasché de faire quelques pratiques en Angleterre, & n'en a receu que de la honte. La haine qu'il en a conceu, a commandé à son Historien de nous descrire le Roy & la Roynie comme des furieux: mais les actions de ce grand Prince, & de cette vertueuse Princeesse, cognues de toute la terre, effacent aisément ce qu'un petit calomniateur escrit dans vne fueille de papier. L'Histoire du credit du Cardinal fera voir plus au long les suiets de la mauuaise intelligence avec l'Angleterre; l'indiscretion & la violence de l'Euesque de Mende en feront vne bonne partie: le Cardinal l'en a souuent accusé, & de ce qu'en partant il auoit pillé sa Maistresse: il ne se faut pas estonner s'il luy a esté infidelle, puis qu'il l'a esté du depuis au Cardinal auteur de sa fortune; auquel peu de temps deuant sa mort il auoit tasché d'oster l'auctorité pour auoir le Bonnet rouge plustost que le Cardinal de Lyon. Il est vray aussi qu'il n'auoit faict le zelé en Angleterre, que pour estre recommandé à Rome: & nous pouuons dire, qu'apres son depart Dieu a comblé d'une si grande benediction cet heureux Mariage, que chacun admire les beaux Princes & Princeesses qui sont en sortis.

On trouvera aussi fort estrange, que l'Histo- Pag. 442.
rien aye asseuré, que les Ambassadeurs extraordi- Les Com-
naires d'Angleterre qui traictient le Mariage, ayent us de
en mesme temps machiné la ruine de la France avec Carlile
quelques-uns des plus malins esprits de la Cour & des & de
Religionnaires. Il n'y a point d'apparence que le Holland,
Roy Jacques, Prince tres-pacifique, qui vivoit
pour lors, eust donné cette commission à ses Am-
bassadeurs: & on ne croira jamais, que deux Sei-
gneurs des plus sages & vertueux non seule-
ment d'Angleterre, mais de la terre, ayent tra-
uillé contre les intentions de leur Roy, ou con-
tre les loix de la bonne foy. Le Comte de Carlile
est cognu en France, & par touté l'Europe,
pour les grands emplois qu'il a eus, & desquels il
s'est acquitté avec autant de probité, comme il a
faict paroistre de capacité. Le Comte de Holland
n'est pas vn esprit de cabale, & est si prudent & si
bon, qu'il ne voudroit pas sous la couverture
d'un traicté de paix & d'amour cacher des prati-
ques de guerre & de haine.

Ce qui sera trouué encore plus extraordinai-
re, sont les horribles iniures que Dupleix dit à
toute la nation Angloise; qui les souffre mal vo-
lontiers, parce qu'elle a du courage. Voicy ses
paroles: *La nation Angloise aussi ambitieuse qu'or-* Pag 443.
gueillense, & aussi legere qu'elle est couragense: il l'ac-
cuse de felonnie, de perfidie noire, de malice determi- Pag 450.
née: il l'appelle *Pirates les Anglois*; & dit, qu'ils n'ont Pag 451.
eu regret à la perte de la Guyenne que pour les bons vins
Je sçay bien que toutes les Nations qui ont eu
des grandes guerres les vnes contre les autres,
ne s'aiment pas: mais ce n'est pas la marque

d'un sage Ministre ny d'un Historien iudicieux de fomentier ces aduersions ; & d'irriter les voisins par des salies de cholere : on les mesprise dans la bouche du petit peuple , mais on les vange quelquesfois, quand on croit qu'elles sont approuuées par le Conseil du Prince.

Psal. 7.

Sap. 16.

L'apprehension que j'ay eu d'entrer dans les horreurs des ingratitude du Cardinal , m'a arresté plus long-temps dans la consideration des folies de son Historien : il me conduit à la dernière partie de la mesconnoissance , qui rend le mal pour le bien ; encore que ie sçache que plusieurs aucteurs n'ont pas voulu loger ce monstre entre les vices des ingrars. David veut estre ruiné par ses ennemis , s'il se trouue conuaincu de ce crime : & le Sage nous assure , que les esperances de celuy qui en est atteint , fondront comme les glaces de l'hyuer. Le Cardinal de Richelieu craint si fort ses ennemis , qu'il a pris pour s'en deffendre trente bonnes places , & plus de Gardes que le Roy : il a un si grand soin d'affermir sa maison , qu'il semble l'auoir voulué assurer non seulement contre le temps qui defait tout ce qu'il fait , mais contre les ordres du Ciel , qui se moquent des precautions des hommes. La parole de Dieu qui nous enseigne toutes ces veritez , nous aduertit aussi que la reconnaissance est la meilleure garde des riches , & la plus grande seurété des familles. Ou il faut dire qu'un Cardinal n'est pas assez bon Chretien , pour croire ce que la sainte Escriture dit ; ou qu'un grand Ministre de France n'est pas assez sage , pour chercher à petit traix les moyens

de se conseruer : cela nous fait croire , & nous voyons desia toutes les apparences , que le seul peché d'ingratitude contribuera plus à la ruine du Cardinal , que toutes les violences & iniustices qu'il a commis. Il est vray aussi , que ce vice qui deshonnore sa vie plus que tous les autres , est celuy qui la tourmente d'auantage , & qui la fera finir plustost , & avec infamie. Les preuues de ce que i'ay auancé , se recognoistront mieux dans le discours de Dupleix que dans le mien ; & on verra que le Cardinal est plus ingrat dans les liures de son Historien , que dans ses propres actions. Elles n'ont attaqué que la liberté & les biens de la Royne ; l'Histoire de Dupleix a fait la guerre à la reputation , que S. M. estime plus que sa vie. Ces mortelles atteintes se voyent dans les suiets de la rupture : dans lesquels le Cardinal s'estudie de rendre la Royne criminelle pour paroistre innocent : quand la Royne auroit peché (ce qui n'est pas) son obligé n'auroit pas acquitté sa dette , mais il seroit plus pressé de la payer pour secourir sa Bienfaitrice.

Je ne veux pas repeter icy ce qui a esté dit dans la Verité defenduë des iustes suiets que la Royne eust de se plaindre du Cardinal , de vouloir qu'il s'esloigna de ses affaires , & de le priver de ses bonnes graces : il suffit de dire , qu'il s'en rendit indigne apres la prise de la Rochelle , lors que la vanité qu'il tira du service qu'il croyoit auoir rendu , luy fist perdre le respect qu'il deuoit à la Royne : il luy parla deux fois à Fontainebleau avec vne insolence , qui fist assez co-

*Voyez le
liure de la
verité defen-
dûe.*

gnoistre, qu'il auoit iugé que son credit pouuoit subsister sans l'appuy de celle qui l'auoit esleué; il s'imaginoit aussi, que le bon succez de la prise d'une place qu'on croioit imprenable, luy auoit acquis tant d'auctorité, qu'elle estoit plus necessaire à la Mere de son Maistre que la bonté de cette Princesse ne luy auoit esté utile pour le faire monter si haut que la teste luy tournoit. Comme il ne pouuoit est autrement, que durant ce long siege de la Rochelle quelques seruiteurs de la Roïne ne luy eussent donné des iustes defiances de cet esprit; qui se vouloit maine-nir aupres du Roy par luy-mesme, & faire dependre tous les autres de son auctorité; il estoit aussi tres-certain, que le Cardinal auoit travaillé sans cesse pour s'acquérir cet aduantage sur l'esprit de son Maistre, lors qu'il estoit esloigné de la Roïne sa Mere. Le bon succez, duquel le Cardinal prist toute la gloire, & l'estime des seruices signalez que ses confidens faisoient sonner iour & nuict aux oreilles du Roy, luy acquerirent vne tres-grande créance: elle n'estoit point telle, que S. M. ne conserva tout l'amour & l'honneur qu'il doit à sa Mere, & ne condamna souuent les salies du Cardinal, & mesmes il pria deux fois la Roïne de les vouloir oublier en sa consideration. Nous pouuons asseurer pouraant, que Sa Maiesté estoit par fois aussi mal satisfaicte de ses boutades, comme pouoit estre la Roïne sa Mere; & que si elle eust voulu se seruir de l'occasion, le Cardinal eust esté ruiné. Mais outre que cette bonne Princesse ne se pouoit résoudre à condamner son choix,

& à deffaire l'ouurage de ses mains , elle n'auoit point encore perdu la creance que le Cardinal estoit vtile à l'Estat. Qu'il se souuienne, que la veille de son depart pour aller exercer en Piedmont sa charge de Generallissime , il fist des reproches au Roy avec tant d'indiscretion, que si la Royne l'eust voulu pousser , cette honorable commission eust esté changée pour le moins en vne disgrace , & peut estre en vne prison. En ce temps-là il menaçoit souuent le Roy de sa retraicte : c'est à dire , il vouloit que Sa Maiesté creut que le plus grand bien qui luy pouuoit arriuer , & à son Estat , eust esté leur extrême malheur. Il est aussi veritable qu'en plusieurs autres rencontres la Royne a retenu les iustes indignations du Roy , & l'aguarý de beaucoup d'apprehensions que S. M. auoit des alliances du Cardinal avec le Surintendant des Finances , de l'aduancement des siens dans les premieres charges , & de sa trop estroite vnion avec les autres Ministres: ce qui sembloit au Roy vne conspiration. L'Historien a tort de Pag. 159 dire que *la Royne auoit tesmoigné beaucoup de passion contre le Cardinal devant qu'il allast en Piedmont* : si cela auoit esté , il n'eust pas abandonné le Roy: la Royne estoit pour lors si puissante , que si elle eust retiré sa main, qui soustenoit le Cardinal , il tomboit avec toute sa fortune. Cette grande Princesse , qui ne reproche , ne demande , & ne deffait point les biens qu'elle a donné , n'a iamais eu intention de ruiner le Cardinal , mais de le faire retirer de la Surintendance de sa Maison. S. M. ne vouloit point estre

obligée dans les conferences particulieres & frequentes que cette charge requiert, de souffrir les esclans d'un esprit presomptueux, qui s'estoit persuadé qu'il pouuoit donner plus d'appuy à la Royne, qu'il n'en auoit receu pour arriuer là où il estoit. Les paroles qu'elle luy dit le iour de la saint Martin ne tendoient qu'à un esloignement de ses affaires : elles furent accompagnées d'une protestation au Roy, que s'il le iugoit utile à son Estat, elle confereroit avec le Cardinal dans le Conseil : mais que sa resolution estoit de ne s'en seruir plus dans sa Maison. La Royne qui apprehende plus que personne du monde les salies des insolens, & qui a un courage qui supporte plustost tout autre imperfection que le defect de respect, ne vouloit point estre fuiette à traiter souuent avec un esprit rempli d'une aigreur, en laquelle les douceurs des prosperitez se changent aisement. S. M. ne fuyoit pas de voir le Cardinal en la presence du Roy, croyant qu'il se contiendrait deuant son iuge, & deuant ceux qui pourroient estre tesmoins de son insolence. Outre ces considerations la Royne estoit pour lors dans la mesme creance, qui empeschoit le Roy de faire retirer le Cardinal : qu'il n'y auoit que luy qui sceut l'estat des affaires, desquelles il s'estoit emparé tout seul. S. M. craignoit aussi que deuant l'accomplissement du traité de Ratisbonne, un grand changement n'apporta quelque alteration aux intersts de la France. Ainsi la Royne estoit trompée par sa bonté, & par l'opinion qu'elle auoit que le Cardinal executeroit avec bonne foy

foy la paix qui auoit esté signée. Dieu qui vouloit donner vn exercice merueilleux à la patience de la Royne , ne permettoit pas que sa prudence couppast tout d'un coup la racine du mal, comme elle pouuoit faire en y disposant le Roy : ou plustost il faut dire , que les pechez de l'Europe , qui a esté depuis grandement affligée par le Cardinal , arresterent ce bien qui eust espargné le sang d'un million d'hommes, & la ruine d'autant de familles. Mais puis que l'effronterie de l'Escruiain de son Eminence nous contrainct de faire voir le fonds de la verité , nous publierons la plus forte consideration qui porta la Royne à faire cognoistre au Roy son Fils, qu'elle ne se confioit plus au Cardinal.

S. M. auoit descouuert qu'il arrachoit du Roy les meilleures places du Royaume, pour les garder, comme il disoit, sous le nom de la Royne, qui ne vouloit point de seureté que dans le cœur de son Fils : elle iugea qu'il estoit expedient de faire cognoistre au Roy que le Cardinal surprenoit les places en surprenant son esprit sous le pretexte d'une secrette intelligence avec sa Maistresse. Cette entreprise pouuoit donner vn iuste suiet de deffiance au Roy, à Monsieur, & à toute la France, que la Royne ne se voulut cançonner dans le Royaume, comme le Cardinal a fait du depuis, avec vn tel aduantage qu'il y est plus fort que le Roy.

On peut voir par ce discours veritable, iusques où allerent les iustes ressentimens de la Royne: on a veu du depuis où sont allez ceux de la colere du Cardinal : il a preferé la fortune à la

vertu, l'utile à l'honneste, le credit au repos, & il a mieux aimé estre presentement infame pour son ingratitude, que de se voir en danger de perdre son auctorité. La Royne luy faisoit ombre, & les paroles qu'elle auoit dites, donnoient quelque terreur, qui estoit augmentée par la cognoissance qu'il auoit du bon naturel du Roy, & par la confiance de la force du sang. Ces passions, mais principalement celle de la colere, qui est la predominante dans les humeurs du Cardinal, ont produit tous les scandales que nous auons veus du depuis : ils sont desguisez si grossierement par Dupleix, que nous ne pretendons pas acquerir autre louange en les discourant, que celle de la fidelité que nous deuons à l'Histoire.

Pag 588 Dupleix veut faire croire, que l'ambition de la Royne est la cause de tout le mal entendu qui est-arrivé. Pour offenser vne grande Princesse, il accuse toutes les femmes. C'est (dit cet Auteur) *vne chose toute naturelle aux femmes, de ne demordre pas volontiers du commandement qui leur tombe vne fois en main : parce que leur sexe, ayant de soy plusieurs foiblesses, recherche l'appuy : & l'ayant trouué, s'achete de le conseruer à quel prix que ce soit. Il adiouste, que cette inclination naturelle fait encore des plus grands efforts en celles, à qui l'illustre Naissance donne des plus puissans mouuemens au gouvernement. Il veut prouuer, que ceux de la Royne ont esté plus violens, parce qu'elle est Italienne. Quel monstre est-ce cy ? le Cardinal fait dire à la Royne, qu'elle est vne femme, qu'elle est Princesse, & qu'elle est Italienne. le m'eston-*

ne de ce que l'Historien n'adiouste à ces trois qualitez, qu'il s'imagine d'estre des iniures, que la Royne est petite Fille de l'Empereur Ferdinand, petite Niepce de Charles Quint, Vefue de Henry le Grand, & Mere de Louys XIII. Puis qu'il vouloit attaquer les œuvres de Dieu, il en devoit faire vne plus exacte recherche: nous reconnoissons par cet estrange procedé, que Dupleix ne trouue rien à mordre dans les mœurs & actions de la Royne, s'estant amusé à abayer contre le Ciel qui l'a faite femme, Italienne, & Princesse. Il nous fait représenter comme ambitieuse vne Princesse qui ne peut estre plus grande en terre: qui ne veut pas estre plus riche qu'elle estoit; & qui ne scauroit estre plus heureuse en ce monde, si le Cardinal luy eust permis de iouir paisiblement de son bon-heur. S.M. estoit tres amoureuse de son repos, ennemi des affaires pressantes: elle le vouloit chercher dans ce beau Palais que sa magnificence auoit fait bastir & meubler, lors que son seruiteur l'en a chassée. Cét ambitieux qui n'a esté esleué que par les bien-faits de la Royne, reproche à sa Bien-faCTRice, comme vn crime, la puissance qui l'a fait ce qu'il est, & il appelle le credit qui luy a acquis le sien; vn desir iniuste de commander. Personne ne se peut imaginer hors du Cardinal de Richelieu, qui se dit *Directeur general du Royaume*, que quelqu'un (sans se rendre criminel de leze MaieSté) puisse aspirer au gouvernement qui appartient au Roy seul. L'Historien a tres-mal parlé vsant du mot de *commandement*, au lieu de celui de credit ou faueur. Si Dupleix manque dans

les paroles, le Cardinal est plus coupable en ses desirs : Il ne veut pas que la Roynie aye aucune auctorité apres qu'elle l'a toute employée pour luy. Il dit, que *la Roynie a voulu commander*. La France l'en a iugée digne durant la Minorité du Roy, depais la Majorité, & sur tout apres la mort du Duc de Luynes. Elle n'a pretendu que de donner des bons conseils au Roy son Fils, lors qu'il les a demandez : il me semble que ce dessein est plus naturel & mieux reglé, que ce-luy d'un seruiteur, qui a tesmoigné vne ambition extrême pour estre vn des Conseillers du Roy ; qui a voulu estre le premier, qui a fait en forte qu'il est demeuré seul, & qui en fin a pris les qualitez inouyes en France de *Directeur general*, & *Gouverneur du Royanme*. Il penle couvrir l'horreur de ses entreprises & de ces tiltres, en nous donnant ce change, que *la Roynie a voulu commander* : il croit qu'il passera pour vn homme que tous les ennemis de la France ont grandement apprehendé, s'il peut persua der qu'ils ont fait des furieuses cabales aupres de la Roynie, pour le faire effoigner des affaires. L'Historien dit, que le Cardinal apres le retour de Montauban trouua la Roynie tellement animee contre luy, qu'il demanda au Roy son congé : ce fut lors qu'il fist à le Roynie des boutades tres-insolentes, qui sont plus amplement descrites dans le liure de la Verité deffenduë. Il n'est pas vray qu'il demanda son congé au Roy : mais pour disposer S. M. à faire la paix avec la Roynie, il dit qu'il ne pouuoit pas assister aux Conseils avec cette flestrif-seure & desplaisir d'estre hors des bonnes graces

Pag 589.
 Pan 1619
 Perdit le
 respect
 qu'il de-
 uoit à la
 Roynie
 mere du
 Roy, de-
 vant la
 Roynes
 sa
 Beile fille,
 & quel-
 ques Prin-
 cesses,

de la Roïne. Pour tâcher d'y rentrer, il fit des grandes protestations, & versa beaucoup de larmes : mais ne pouvant faire mentir la parole de Dieu, qui dit, que *l'homme double de cœur est inconstant en toutes ses voyes*, en effuyant ses yeux il effaçoit les promesses; soit que cela vint d'une legereté naturelle, ou d'un orgueil qui le portoit à se repentir de sa repentance. Le Roy a souvent remarqué ces changemens deuant & apres la rupture : S. M. qui dans ces occasions a toujours condamné la mauuaise conduite du Cardinal, se lassoit de toutes les saillies de ses passions, & se fust portée aisément à s'en décharger pour vne bonne fois, si la Roïne eust voulu pousser les choses aux extrémités, mais elle a mieux aimé hazarder son repos par vn excès de bonté, que de ruiner son ouurage par vn effect de iustice. Dupleix dit, que pour perdre le Cardinal on y apporta tant de soin & d'artifice, qu'on y fist resoudre entierement la Roïne Mere, laquelle tâcha par tous moyens de le rendre suspect & odieux au Roy : mais S. M. ayant assez de cognoissance de sa fidelité, résista toujours avec autant de bonté que de prudence. Il adioutte, que la Roïne obsédée de ces malicieux esprits, sollicitoit le Roy avec obstination. Dupleix va plus auant, & iusques à blasmer la Roïne d'indiscretion, ou de peu d'affection, lors qu'elle pressoit le Roy dans la maladie qu'il eust à Lyon de se défaire du Cardinal : il baille aussi comme chose certaine, qu'on proposa en la mesme ville à la Roïne de gagner M. d'Alincour, pour faire vn mauuais tour au Cardinal. Voila vne partie des couuertures qu'il donne à son in-

Iac. 15

Pag. 590

gratitude, & qui nous fait voir que la haine qu'il tesmoigne à la Royne, ne vient pas de l'amour qu'il porte à l'Estat, mais du ressentiment d'un desplaisir qu'il pretend auoir receu en son particulier, ou des apprehensions qu'il a eu pour sa fortune. La Royne ne parla iamais au Roy contre le Cardinal, durant la maladie de S. M. si quelque grand Seigneur eust fait des propositions pour le perdre par la violence, nous pourrions dire que c'est un tesmoignage asseuré que la Royne ne les auroit pas approuuées, puis qu'elles ne furent pas executées, ayant tousiours esté en son pouuoir de faire perir le Cardinal, si elle en eust eu la volonté. Dupleix accuse comme criminels de leze Majesté tous ceux qu'il s' imagine auoir contribué quelque chose pour eschauffer les ressentimens de la Royne; Il nomme le Cardinal de Berule, la Princesse de Con-ty, la Duchesse d'Elbeuf, la Dame de Fargis; le Duc de Guise, le Duc de Bellegarde, le Marechal de Bassompierre, & le sieur Vaulhier, premier Medecin de la Royne, mais par dessus tous les deux freres de Marillac: il asseure que le Garde des seaux concerta avec la Royne, dans les Carmelines du fauxbourg saint Jacques de Paris, les moyens pour chasser le Cardinal d'aupres du Roy; lequel sollicité derechef à ces fins par la Royne sa Mere, y resista puissamment. Ce discours s'esloigne de la verité en tous ses chefs. La Royne asseure, que personne ne l'a disposée à dire ce qu'elle dit au Cardinal de son propre mouuement: que Messieurs de Marillac, qui ont perdu diuersement la liberté & la vie pour ce suiet, n'ont iamais trauaillé pour irriter

S. M. contre luy : que la descente qu'elle fist aux Carmelines, n'estoit point vne assignation pour affaires, mais vn effect de la deuotion de la Royne, qui auoit vn petit logement avec ces bonnes Religieuses : le Garde des Seaux ayant tousiours esté comme leur Protecteur, auoir sa demeure dans la basse court du Monastere, où deuant son grand employ il estoit plus souuent que dans sa maison de Paris. Il ne se parla point en ce saint lieu d'intrigues de Cour; mais on y loua Dieu de l'heureux retour de Sa Maiesté, & sur tout de la conualescence du Roy. La Royne de France fust presente à tout ce qui se passa : le Garde des Seaux qui estoit hors du Conuent, ne pouuoit estre avec leurs Maiestez, qui estoient entrées pour les raisons que nous auons dit, & pour voir l'ameublement qu'on auoit mis dans la chambre de la Royne Mere du Roy. Ce qui sera trouue plus estrange, est, que l'Historien tasche de faire croire comme vne verité, qu'on chercha les moyens pour chasser le Cardinal de la Cour : à quoy la Royne ne pensa point, & ses discours avec le Roy & avec le Cardinal ny conclurent iamais; mais seulement à l'esloigner (comme nous auons dit) des affaires de la Royne, qui ne vouloit plus estre obligée à souffrir les boutades de son orgueil. Peut-estre que le Roy, qui trouua cela tres-iuste, se fust porté plus auant, si la Royne eust voulu mettre en œuvre tout ce qu'elle pouuoit sur son bon naturel : ou si la porte du cabinet de Luxembourg eust esté fermee, lors que leurs Maiestez furent surprises par le Cardi-

nal qui entra sur le discours qui le touchoit, ou si la Royne eust suiuy le Roy à Versailles. Ce fut là où le Cardinal, qui auoit resolu de faire la retraicte, reprit ses esprits qui estoient fort esgarez : ils furent ralliez par les conseils de trois personnes interessees dans la conseruation de son credit. Mr. de Chasteau-neuf qui en estoit vn, profita de la despoüille du Garde des seaux de Marillac, qui fust arresté. On donna aussi tost les ordres pour s'asseurer de son frere le Mareschal : cette occasion le rendit criminel en Piedmont le mesme iour qu'on luy enuoya la commission pour commander seul toutes les troupes que le Roy auoit delà les monts. La Royne fist sortir de sa Maison, & de son seruice, tous les parens du Cardinal, & ceux qui luy estoient plus acquis qu'à elle : entre autres la Dame de Combalet, Dame d'atour, Niepce du Cardinal, & le Sr. de la Milleraye Capitaine des gardes son cousin : ce qui le ietta dans vne telle furie, lors qu'il se vit asseuré des bonnes graces du Roy, qu'il s'emporta contre le respect qu'il deuoit à la dignité de la Royne, & contre les deuoirs d'un seruiteur, auquel mille obligations deuoient estre plus sensibles que trois paroles dites avec quelque chaleur : mais dans vne ame peu genereuse vn souffle emporte tous les bien-faits qui sont escrits sur la poussiere, les desplaisirs estant granez sur le marbre. Combien de malheurs produit vn petit mot ? on ne peut faire cesser le bruit qu'il a esmeu dans le monde, parce que celui qui a fait les iniures, ne les veut pas oublier aussi facilement comme celle qui les a

receuës Que le Cardinal face publier tant qu'il voudra par son Historien, qu'il n'y eust sorte de *sub-mission* qu'il ne rendit à la Royne pour appaiser son courroux, elle mesme a depuis tesmoigné souvent qu'il n'auoit obmis aucun deuoir pour regaigner sa bien-veillance : mais personne n'a iamaï sceu le suiet d'une si extraordinaire indignation. Pourquoy est-ce que Dupleix, qui dit qu'il a sceu de bonne part tout ce qui s'est passé en cette occasion, ne l'a escrit au long, comme il estoit obligé par les loix de l'Histoire, qui ne souffrent pas qu'on cache des choses veritables & importantes ? Il estoit necessaire de dire ce qui arriua le iour de Saint Estienne, lors que le Roy par l'entremise du Cardinal de Baïgne, & de son Confesseur, qui estoit aussi celuy de la Royne, fist en sorte qu'elle pardonna au Cardinal de Richelieu toutes les choses passées, & promit qu'elle ne luy en tesmoignerait iamaï aucun ressentiment, pourueu qu'il seruiſt bien le Roy. Il receut cette grace avec des grandes protestations, accompagnées de larmes qui coulent aisément de ses yeux, elle ne furent pas plustost seches, qu'il alla dire sechemēt au Roy, qu'il ne croyoit pas estre obligé de garder sa parole, si la Roine ne remettoit dans sa Maison tous les siens qu'elle auoit chassés. Le Roy iugea que cette demande estoit inciuile, & trouua tres-mauuais que son seruiteur voulust traicter non seulement comme égal avec sa Mere, mais comme superieur, en luy prescriuant des conditions desagrecables & deshonestes. Le Cardinal entra en vne telle furie pour ce refus, qu'il n'y eust sorte de mauuais offices qu'il ne

rendit à la Roynne: il disposa le premier President du Parlement à luy dire, que si elle ne resoluoit de reprendre les parens du Cardinal à son seruice, on la renuoyeroit hors de la Cour en quelque vne de ses Maisons. La Roynne ayant fait ses plaintes au Roy de l'insolence de ces menaces, S. M. eust horreur de ce discours, & protesta avec larmes, qu'il ne se separeroit iamais de la Roynne sa Mere. Ces demandes & ces refus rendirent les choses irreconciliables, & des lors tout l'esprit du Cardinal s'employa à la recherche des moyens pour perdre la Roynne. La sortie de Monsieur arriua bien tost apres cette occasion; & les paroles qu'il alla dire au Cardinal dans sa maison, rapportées avec infidelité par l'Historien, seruirent de pretexte à vn homme qui faisoit valoir tous les mauuais rencontres contre la Roynne. Monsieur ne dit iamais au Cardinal qu'il prenoit en main la cause de la Roynne sa Mere contre luy: mais entre les plaintes qu'il luy fist de sa perfidie, il adiousta, qu'il ne pouuoit souffrir le traitement qu'il faisoit à la Roynne sa Mere. S. M. protesta deuant Dieu qu'elle n'auoit rien sçeu du dessein de Monsieur; & en ayant pris l'exécution, elle s'escria qu'elle craignoit que ce conseil ne fust imputé. Le Cardinal ne manqua pas de faire entendre au Roy que c'estoit vne conspiration: il eust le pouuoir de le persuader en telle sorte, que tout ce que la Roynne peut dire pour faire cognoistre la verité, ne fust point capable d'effacer les impressions premieres & violentes que le Cardinal auoit donné à l'esprit du Roy. On trauailla dès lors à la recherche des

moyens pour perdre la Royne : le conseil fust pris d'aller à Compiègne, ou pour la separer du Roy, ou pour l'attirer hors de Paris dans les pieges qu'on luy auoit preparez. Elle voulut fuire, pour oster par sa presence les mauuaises impressions qu'on pourroit donner de sa conduite ; sur tout dans le rencontre de la sortie de Monsieur, laquelle faisoit quelque bruit dans la France. Elle scauoit bien que la grande machine, avec laquelle le Cardinal la battoit dans l'ame du Roy, estoit la calomnie de l'inegalité des affections, encore que la Royne aye tousiours aimé fort tendrement le Roy. Cette inuention malicieuse & le discours impie de deux Theologiens appostez firent resoudre S.M. à consentir qu'on arresta la Royne sa Mere à Compiègne, d'où le Roy partit sans luy dire à Dieu; & le Cardinal demeura pour donner les ordres à la garde, qui fust posée aux portes, & au dessous des fenestres: vn regiment d'infanterie fust employé pour cela, trois cens cheuaux logez aux faux-bourgs, & sur les aduenuës: le Marechal d'Estrée establi Gouverneur avec ordre d'interroger tous ceux qui iroient & viédroient, & de remarquer les personnes qui parleroient à la Royne. Son premier Medecin, qui auoit seul la cognoissance de ce qui estoit nécessaire pour la conseruation d'une santé qu'on attaquoit si rudement, fust pris & conduit prisonnier à la Bastille; quelques autres seruiteurs de S.M. y furent mis aussi, entre autres l'Abbé de Foix. L'Historien ne dit pas vn seul mot de toutes ces choses, comme si elles estoient de si petite consideration, qu'il

*Declara-
tion au
21 Fe-
vrier.*

les eust ingées indignes de son Histoire, qu'il a remplie de tant de sottes loüanges du Cardinal de Richelieu, & de mille bagatelles. Les hommes sages iugeront s'il a peu oublier le plus estrange attentat que la France aye iamais veu, ou si par pure malice il n'en a rien voulu dire, ou s'il a eu honte de publier ce qui s'est passé en vne affaire qui est en toutes ses circonstances tres-infame pour celuy qui l'a entreprise. Dupleix n'a pas osé faire mention de la belle declaration que le Cardinal enuoya au Parlement le iour que ce scandale arriua: il pensa desguiser l'horreur; lors qu'il le fit voir plus à descouvert par cét estrange discours, *que la Roynes auoit esté laissée à Compiègne, parce qu'elle n'estoit pas en bonne intelligence avec le Cardinal.* Je sçay bien qu'ayant esté aduertty par des personnes plus rusees que luy de l'insolence de ces paroles, il voulut retirer toutes les copies, mais les registres du Parlement en estans chargez, & l'impression en ayant semé plus de deux mille, il faut que les Greffes des Cours souveraines, & les cabinets de tous les curieux resmoignent à la posterité, qu'une grande Princesse de naissance, Vefue de Henry le Grand, Mere de Louys XIII. & de Monsieur: qu'une Roynes, qui auoit esté Regente en France, belle Mere du Roy Catholique, du Roy de la Grand' Bretagne, & du Duc de Sauoye. qui ont tous trois des heritiers du Sang de S. M. a esté emprisonnée pour ne s'estre point accordée avec son seruiteur. Si cette mauuaise intelligence attire sur la Bien-faëtrice du Cardinal vn si rude traictement, il doit estre cōdamné à tous les plus

cruels supplices, pour auoir meprise les bonnes graces de cette Princesse, & pour auoir perdu le respect qu'il luy deuoit. Lors que ie recherche les suiets qui ont porté le Cardinal à dresser cette Declaration, ie trouue qu'il a esté pousé par vne extrême colere qui l'a auéglé; & par vne vanité, qui a desiré de faire cognoistre non seulement à la France, mais à toute l'Europe, qu'il ne falloit point entreprendre de choquer son credit, qui estoit si grand, qu'il pouuoit faire emprisonner la Mere de son Roy; & chasser hors du Royaume, comme il fist bien tost apres, l'heritier de la Couronne de France: ainsi cet ingrat exerçoit sa puissance contre ceux qui la luy auoient acquise.

Dupleix qui ne dit pas vn seul mot de toutes ces choses, se contente de nous assurer, qu'il Pag 52
 a ouy dire à diuerses personnes notables, qu'on n'a jamais ouy, que le Cardinal aye parlé de la Royne Mere du Roy qu'avec vn respect indicible, & des témoignages de l'estime qu'il fait de sa vertu, & avec grande gratitude des graces qu'il en a receues. Il a iousté: Aussi ay ie appris, que dans Compiègne, & au plus grand esclat de sa colere dans Bruxelles, en presence de l'Infante; & diuerses fois deuant Monsieur & les siens, elle a fait paroistre la grande estime qu'elle faisoit de ce personnage, par la cognoissance qu'elle a de ses rares qualitez, & affection au service du Roy & de l'Etat. Pour conuaincre le premier discours de menterie, nous ne produirons point les témoigns qui ont ouy ce que les passions desreglées, & la presumption ont fait dire au Cardinal dans son cabinet, ou dans celuy du Roy: il suffit

que nous voyons des effects, qui sans doute ne viennent point de l'estime qu'il a fait de la vertu de la Royne, mais des mauuais offices que sa mesdisance luy a rendus aupres du Roy. Pour confondre l'Historien, il faut produire trente libelles diffamatoires, & entré autres l'Histoire de Dupleix. Le Cardinal a non seulement approuué ces escrits, mais il leur a faict donner priuilege, a fourni les memoires, & a payé des Escriptuains pour descrier la Royne par toute la terre : & on tasche de nous persuader qu'il a tousiours parlé de la Royne avec le respect qu'il luy doit. On dit aussi qu'il estime grandement la vertu de S. M. il est donc par sa confession vn Tyran de persecuter cette vertu, & de luy rauer son bien & sa liberte. Quand à ce que Dupleix assure, que la Royne a loüé ce grand personnage, mesmes à Compiègne & à Bruxelles : ce tesmoignage rendu à la bonté de la Royne est fort desauantageux au Cardinal, qui n'a pas cessé de luy faire du mal, au contraire il l'a tousiours augmenté. Barlané femme d'Alexandre composa vn hymne à la loüange de Neprune, qui auoit agité son vaisseau : c'est assez que S. M. ne blasme pas ceux qui ont esmeu les tempestes qui la battent encore. Si la Royne a estimé l'esprit du Cardinal, il ne doit point tirer de vanité d'vne chose que les demons ont plus excellente que luy, & qui l'appliquent au mal comme luy. Si S. M. a quelquefois admiré le bon-heur du Cardinal, c'est vn effect de l'aveuglement de la fortune, ou plustost vn ordre de la Prouidence diuine, qui s'est seruie iusques à present des pro-

spéritez le Cardinal, pour chastier ceux qui sont moins meschans, & pour affliger des plus sages & plus vertueux que luy. Mais comment pourroit asseurer la Royne que le Cardinal sert bien le Roy, l'ayant embarrassé dans les plus mauuaies affaires que la France aye iamais eue: avant ruiné l'Estat, & tous ses alliez par sa folie, presumption, vengeance, vanité, querelles particulieres, & pour prendre dans ces confusions les meilleures places du Royaume? Il l'a épuisé de Noblesse, de soldats & d'argent: il luy a ietté sur les bras les plus grandes forces de l'Europe, & les a coupez lors qu'il les falloit roidir, pour repousser les ennemis qu'il a faict de gayeté de cœur. C'est faire vn grand tort à l'amour que la Royne apour le Roy & pour Monsieur, & à son affection enuers la France, de dire qu'elle tient le Cardinal pour bon seruiteur, & grand Ministre, lors qu'il tasche de ruiner ses deux Enfans, & de renuerfer vn Estat, qui est possédé par l'vn d'iceux, & qui peut estre possédé par l'autre. Nous desirons que Dupleix sçache, que la Royne prend la loüange qu'il luy a voulu donner, pour la plus grande iniure qu'il aye dit à Sa Maiesté, elle ne veut point que sa bonté face tort à son iugement, ny que le Cardinal tire quelque auantage d'vn discours qu'elle n'a point faict contre sa science & sa conscience: Dieu veut bien qu'on pardonne les iniures: mais il ne veut pas qu'on mente en faueur de son ennemy.

Dupleix qui n'a rien dit de la plus importante

affaire qui soit arriüée durant le Regne du Roy, croit auoir contenté les curieux, en mettant à la
 Pag. 388. teste d'un chapitre en grosse lettre, *Monopoles*
 389. &c. *contre le Cardinal*; & en un autre, *Mescontentemens*
de la Royne & de Monsieur; sans faire voir ces monopoles, ni dire le suiet de ces mescontentemens: il saute tout d'un coup à la sortie de la Royne, & à son entrée dans les Pays-bas: il cache que les gardes n'estoient pas ostées, mais un peu reculées: que le Cardinal faisoit donner des apprehensions à la Royne, pour l'obliger à chercher ses seuretez dans les terres du Roy d'Espagne, afin de la rendre plus suspecte: qu'il en estoit bien embarrassé à Compiègne, n'osant ou ne pouuant pas interdire le commerce des lettres & enuois au Roy: ce qui donnoit tousiours des atteintes à son esprit, & esueilloit les affections de son ame. De l'autre costé la Royne languissoit, ne pouuant prendre la hardiesse de sortir d'un vieux chasteau, de peur qu'une petite pourmenade ne fust le commencement d'un voyage en Italie, duquel S. M. estoit menacée: elle apprehendoit aussi, que Monsieur faisant des leuées pour tesmoigner ses ressentimeus au Cardinal, il ne prist suiet de la reserrer plus estroittement. Il ne dis rien d'un dessein horrible: si l'Histoire ne l'ose point mettre au iour, celui de Dieu le fera voir.

L'Historien sur le suiet de cette sorte de la Royne veut dire quelque chose, non pas de ce qui se passa, mais des pretextes pour la descharge du Cardinal, qu'il noircit d'auantage en le voulant lauer. Son Escriuain faict vne Preface
 de

de la nature de l'Histoire, qu'il dit estre *vn theatre de verité*, lors qu'il en fait l'isle des songes, ou le palais de l'imposture. Ce que ie trouue plus estrange, est, qu'il aye escrit toute celle de France sans auoir sceu les loix des Historiens; ou bien qu'il soit si malicieux, qu'il n'en a point voulu garder vne seule en son dernier ouurage, que le long exercice & le beau suiet du Regne du Roy deuolent rendre le meilleur de tous. Il a ignoré qu'un homme de sa profession doit auoir vn grand iugement pour garder la bien-seance; l'esprit prompt pour disposer, & la memoire excellente, qui luy fournisse les mots propres pour exprimer ce qu'il veut dire. En cet endroit il fait vn essai contre ceux qui ont respondu aux calomnies que le Cardinal a fait imprimer contre la Royne, & contre Monsieur: & cet esprit bien reglé appelle les refutations de toutes ces ordures, *des salies furieuses, des esprits forcenez*: voila les noms que la passion dône à la raison, & ce que la flatterie escrit contre la vertu de ceux qui perdent leurs biens pour soustenir l'innocence de leurs Maistres, lors qu'on donne des recompenses à ceux qui deshonorent non seulement la Mere & le Frere de leur Roy, mais le Roy mesmes, auquel ils donnent vn Directeur.

Les plus horribles blasphemés de Dupleix sont en ce chapitre de la sortie: il s'imaginé que sur son témoignage acheté la Royne sera estimée ingrate enuers le Cardinal, ou moins affectionnée que luy à la personne du Roy, & au bien de l'Estat: il dit, que *la Royne auoit fait au parauant son oracle du Cardinal de Richelieu*. Discours

de pedan, qui veut faire paroistre la Royne comme ignorante de toutes choses, & tasche de faire passer le Cardinal pour vn Dieu. La suite est plus estrange: il ose escrire, que *la Royne n'a esté picquée contre le Cardinal, que lors qu'on luy a faict entendre que toute son auctorité estoit allée d'elle à luy, & du createur à la creature; avec ce qu'elle le trouuoit si attaché au respect du Roy, & aux interests de l'Estat, que nulle consideration ne l'en pouuoit separer.* Je laisse à part ces paroles impies, *du createur à la creature*, pour dire, que la Royne se pouuoit plaindre avec raison, si ayant acquis l'auctorité à son seruiteur, il s'en seruoit contre elle; & si son dessein estoit de faire dépendre de son credit le contentement & le repos de sa Maistresse. Il me semble qu'on ne trouuera point ce procedé dans l'ordre de la raison: cependant il est vray que le Cardinal l'a tenu, & delà est venu tout le desordre. Mais où va la folie de l'Historien, lors qu'il nous dit, que la Royne s'est esmeuë contre le Cardinal, *parce qu'elle le trouuoit attaché au respect du Roy, & aux interests de l'Estat*? n'est-ce pas vouloir persuader, que la caution faict vn procez au principal debiteur, parce qu'il la descharge en payant ce qu'il doit? La Royne auoit respondu au Roy pour le Cardinal; & on dit qu'elle est marrie lors qu'il s'acquitte: qu'elle ne prend point plaisir de voir son Roy, qui est son Fils, respecté par son seruiteur, & bien serui par vn Ministre qu'elle luy a donné. N'est-ce pas vouloir dire, que cette Princesse reconnuë par la conduite des grandes affaires, & par l'essay des plus sensibles afflictions pour vn es-

prit tres-fort, est vne femmelette imbecille, qui ne peut souffrir qu'on honore & qu'on serue les Enfans, encor qu'elle soit honorée & seruie dans l'honneur & seruice qu'on leur rend?

Les calomnies vont croissant: lors que Dupleix a eu la teste échauffée, & a frotté son front, sa plume a escrit tout ce que la passion & la corruption luy ont dicté: il faict le Cardinal si modestes, qu'il ne contredit point la Royne, de laquelle il recognoit tenir toute sa fortune: il le rend si sage, qu'il dit, que par toute sorte de soumission il a tasché d'adoncir l'aigreur de ses passions: il nous le décrit si religieux, qu'il luy faict employer tous les gens de bien qui auoient quelque credit aupres d'elle pour escouter ses iustificacions: il le dépeint si humble, qu'il le faict ietter aux pieds du Roy, pour le supplier d'y adousser ses prieres & coniuations. Ayant donné tous cestémoignages de vertu au Cardinal, il attache toutes ces imperfections à la Royne: il l'appelle, preoccupée de passion, obsédée par des mal-heureux esprits, qui ne garde point ce qu'elle a promis au Roy, & qui fait paroistre son auersion avec vne indignation extreme. La furie de Dupleix va plus auant: il adiouste, que le Roy employa derechef leur Confesseur commun, qui fist des belles remonstrances à la Royne pour la porter a ce deuoir d'une ame Chrestienne, d'une Mere enuers son Fils, & de suiette enuers son Prince: mais son auersion procedant de l'auctorité que le Cardinal se conseruoit par la fonction de son ministère, luy parler de l'y maintenir, estoit plustost irriter qu'appaiser sa cholere. Ce que nous auons dit, refute tout ce discours flatteur pour le Cardinal, & iniurieux à la Royne, le veritable

Pag. 609.

recit de ce qui se passa à Paris le iour de saint Estienne, doit conuaincre de fausseté ce que l'Historien escrit: il n'apporte pas vn seul fait particulier: il s'amuse a composer des figures d'escolier, au lieu de nous instruire du secret des affaires, qui est tout ce que les curieux doiuent rechercher dans vne Histoire. Il prie en cét endroit le St Dupleix, de se souuenir qu'il a escrit, que *iamais on n'a peu descourir le suiet de l'auersion de la Royne*: cependant il assure en cét endroit, que *l'auersion de la Royne procedoit de l'authorité que le Cardinal se conseruoit en la fonction de son minislere*. Il fait aduoüer que cét homme pour vn menteur & mauuaise memoire: son iugement n'est pas meilleur, lors qu'il donne *l'authorité* au Cardinal, qui ne doit appartenir qu'au Roy: vn Ministre ne la peut prendre sans crime: si le Cardinal s'en est emparé, son Historien est mal adroit de le confesser, & de dire que pour la conseruer, & non pour l'intereſt du Roy & de l'Eſtat, il s'est porté à toutes les extremitez que nous auons veu, en disant, que la Royne n'a eu pour fondement de son auersion que cette ialousie; il fait voir que le Cardinal qui l'a creu, n'a point eu de suiet de faire tout ce qu'il a fait: mais qu'il a voulu maintenir son credit, qu'il appelle *authorité*: elle luy a fait mettre sous les pieds toutes les vertus, qu'il a mieux aimé perdre, que de hazarder sa puissance: il en veut faire enuieuse la Royne; mais S.M. est trop sage pour porter enuie à ce qu'elle a fait, à ce qui est au deſſous d'elle, & à ce qu'elle pouuoit destruire avec vne parole.

L'Historien vient à la sortie de la Royne Me-

re du Roy, & renuersant l'ordre des temps, comme il a fait par tout celuy des choses, il la met deuant celle de Monsieur, & ne dit de toutes les deux que ces paroles : Ceux qui se sentoient les plus coupables de la diuision entre la Mere & le Fils, ne se trouuans pas en seureté dans le Royaume, persuaderent à la Roynne Mere d'en sortir, & de s'en aller à Bruxelles; & aucuns de ceux qui estoient auprès de Monsieur conspirans avec ceux là, luy donnerent la mesme impression pour se retirer en Lorraine. Monsieur auoit pris retraicte en Lorraine quatre mois deuant que la Roynne la prist au Pays bas: cela ne se pouuoit faire par le concert des seruiteurs, que Dupleix a accusé comme auteurs des mescontentemens que la Roynne a eu du Cardinal de Richelieu. De tous ceux que l'Historien a nommé, il n'y en auoit pas vn avec la Roynne ou en vie ou en liberté. Le Cardinal de Be-rule estoit mort, la Princesse de Conty aussi, la Duchesse d'Elbeuf esloignée: les Marillacs, le Mareschal de Bassompierre & le sieur Vaultier estoient prisonniers; & le Duc de Bellegarde avec Monsieur: voila tous ceux qui ont esté accusez par Dupleix de la mauuaise intelligence, pas vn desquels n'estoit avec la Roine, ny aucun autre qui aye esté soupçonné d'auoir rendu mauuais office au Cardinal. On peut donc conclure que l'Historien est vn imposteur, lors qu'il nous allegue, que les seruiteurs de la Roine ont esté les auteurs de son depart de Compiègne. Pourquoy ne recognoit-il point, que le desir naturel de sa liberté, & celuy de sa conseruation, luy ont conseillé de se rendre maistresse

de ses actions, & de garentir sa vie, de laquelle ses ennemis pouvoient disposer ? S'il est vray que tout prisonnier est esclaué, la Royne a eu horreur d'estre esclaué de son seruiteur, lors qu'il tiroit quelque vanité dans sa declaration de l'auoir peu mettre en cét estar, pour ne s'estre point accordée avec luy. On nous veut faire vn grand crime de la retraicte au Pays bas. Mais où deuoit aller la Royne plus commodément qu'au lieu qui estoit le plus proche ? où pouuoit S. M. estre plus honnorablement, qu'avec la feu Infante, vefue comme elle, vertueuse comme elle, & sa parente ? où falloit-il croire, qu'elle trouueroit consolation, qu'avec cette sainte Princesse, ny assistance en sa necessité, ny assurance pour sa personne, que dans les terres de son premier Gendre, puis qu'elle estoit si malheureuse d'estre mal traictée par vn seruiteur qui abusoit de l'auctorité de son premier Fils ?

Ceux qui liront dans quelques années l'Histoire de Dupleix, & mesme les viuans qui n'ont pas remarqué la suite des choses, croiront que le Cardinal fust visité à Paris par Monsieur apres la retraicte de la Royne en Flandres, parce que l'Historien a logé en cét endroit ce rencontre. Il faut auoir cette bonne opinion de la generosité de Monsieur, qu'il eust agi d'autre façon avec le Cardinal, s'il eust veu prisonniere la Royne sa Mere, qui fust arrestée vingt & quatre iours apres. I'espere qu'on verra chaque chose en sa place dans vne exacte & veritable Histoire.

renuoya vn Ambassadeur au Roy, pour luy faire des excuses de ce qu'elle auoit retiré la Royne Mere : lesquelles eussent esté bien receues, s'il n'y eust eu que cela : mais elle en ayant eu cognoissance auparauât, & ayant permis depuis que l'on imprima à Bruxelles & à Anvers des discours diffamatoires contre les Ministres de l'Estat, qui faisoient coup par reflexion sur le Roy mesme avec ce qui se passa en suite, l'on iugea assez que l'Espagne auoit contribué à cette retraite. Cét Ambassadeur extraordinaire ne fust qu'un enuoyé que le Cardinal corrompit : il n'alloit point pour faire des excuses d'une chose bien faicte. Cette Princesse qui estoit tres-aduſſee, ſçauoit iusques où vont les droits de Souueraineté, & ce que les Princes se doiuent les vns aux autres, quand mesmes il n'y auroit ni parenté ni alliance entr'eux. Pour écrire en termes de verité, il falloit dire que l'Infante fist représenter au Roy, & dire au Cardinal, qu'il ne falloit point mal traiter les seruiteurs de la Royne, ny les emprisonner, quand ils alloient de sa part pour apprendre des nouvelles de la santé du Roy, ou demander quelque chose de sa iustice & bonté. S. M. ne le trouua point mauuais, & renuoya de son mouuement le Sr de la Barre Gentilhomme de la Royne, qui auoit esté arresté pour lui auoir apporté vne lettre de compliment. Il est vray, qu'au mesme temps le Cardinal fist des ſalies estranges contre les Liures qui furent imprimez au Pays bas : mais comme il auoit tesmoigné sa folie en faisant publier plusieurs escrits contre la Royne, il faisoit voir son iniustice, lors que non seulement il condamnoit les responses, mais entroit en furie pour vn

desplaisir qu'il attiroit, & duquel il parloit sans cesse aux Ministres d'Espagne, qui venoient pour traicter d'affaires avec luy. Au lieu de prendre les armes de la raison, il se iettoit sur celles de la puissance: il despoüilloit de leurs biens, & proscriuoit ceux qui deffendoient la reputation de la Roynes, & faisoit toutes les actions d'un homme qui estoit percé dans le cœur, & troublé dans le cerueau: Dieu l'auoit aueuglé en ce que s'estant estudié à faire des actions plustost de grand bruit que de rare bonté, & ayant fait dessein de se faire estimer par tous les Escriptuains de son temps, il prouoquoit ceux qui le cognoissoient à luy dire beaucoup de veritez. En tout ce procedé il se faut estonner de son imprudence, qui luy faisoit chercher vn mal qu'il craint plus que tous les hommes de la terre, parce qu'il est le plus vain.

Mais l'historien a bonne grace, lors qu'il dit, que *les discours contre les Ministres de l'Estat faisoient coup par reflexion sur le Roy*. Je laisse à part cette sottise façon de parler, pour ne m'attacher qu'aux choses. Je voudrois bien que Dupleix dans tous les escrits faits pour la deffense de la Roynes marqua vne seule chose qui approcha des blasphememes qu'il a dit, non pas *par reflexion*, mais directement contre le Roy. Nous en auons rapporté vne partie, & dirons le reste en vn autre endroit. Dans quelle escole de Physique, ou de Iurisprudence, peut auoir appris le sieur Dupleix, que le Roy soit blessé *par reflexion* (comme il dit) dans les fautes de son Ministre, & qu'il ne le soit pas dans les deffauts qu'on impose à sa

Mere. Il me semble qu'il y a plus d'apparence de soupçonner d'imperfection le Fils à cause de la Mere, que le Maistre à cause du seruiteur. L'ordure qui est dans la source du temperament, rejallit sur les descendans iusques à la centième generation: le vice d'un valet ne peut donner atteinte à la reputation du maistre, que pour ne le cognoistre ou ne le chastier pas. Nous auons tousiours dit, que le mesme artifice qui empeschoit la prudence de S.M. de cognoistre les mauuais desseins du Cardinal, arrestoit les ordres que le Roy peut donner pour rendre plus sage son Ministre, ou pour arrester ses folies. Nous pouuons asseurer de luy, ce que Iosephe a dit d'Albin Prefect de la Iudée, qu'il est plus adroit à couvrir le mal, qu'il n'est hardy pour le faire. Nous ne desirons pas que la dignité qu'il possede en l'Eglise, soit violée par vne emotion du peuple, mais que ses entreprises soient rompuës par la prudence du Roy. Cela estant arrivé, nous ne craindrons point que S.M. voye nos Liures, & les face examiner par les Iuges les plus seueres de son Royaume. Nous sommes asseurez, que les escrits du Sr Dupleix, qui se couurent maintenant de la protection du Cardinal, seront non seulement mesprizez comme impertinents, mais condamnez comme meschans: les nostres tireront vne plus grande lumiere du feu qu'on a allumé pour les brusler; & ceux que les flateurs ont composé en faueur du Cardinal, passeront des flammes aux tenebres: cela arriuera, parce que les ordres de la Prouidence de Dieu, qui permettent que la Vertu soit affligée, & que la

Verité soit combattuë pour vn temps, font que toutes deux triomphent pour iamais du vice & du mensonge.

Pag. 644. L'Historien ne dit rien de ce qui touche la Royne depuis sa retraicte dans les Pays bas, que trois ou quatre menteries. La premiere est, que l'Euesque de Leon, qui n'a parlé à la Royne d'aucune sorte d'affaires, & ne l'a iamais entretenue vn demy quart d'heure, a donné des mauvais conseils à S. M.

Pag. 671. Il dit aussi, que la Royne estant malade à Gand d'une dangereuse fievre double tierce, avec vn commencement d'hydropisie, le Roy luy enuoya offrir tout ce qui dépendoit de luy pour son assistance, & y fist acheter promptement deux Medecins des plus excellens de son Royaume. Dupleix a trauaillé sur des mauvais memoires. La fievre que la Royne eust à Gand, estoit continuë: elle n'estoit point accompagnée d'hydropisie, encore que les seruiteurs du Cardinal l'eussent publié, pour flatter les desirs de leur Maistre: les Medecins qui furent enuoyez, auoient esté demandez au Roy par la feuë Infante, qui despescha vn courrier expres. Ce mot de *promptement* est mal employé pour des gens qui furēt guidez par le messager ordinaire. Le bon naturel de S. M. commanda au Sr de Roches fu née d'aller voir la Royne sa Mere; mais ou le Cardinal trompa le Roy ayant changé ses commandemens, ou il empescha les effects de l'affection de S. M. Elle eust sans doute rendu à la Royne sa Mere vne partie de son bien, ou luy eust offert quelque assistance du sien; & mesmes son retour en France, où la Royne eust esté gua-

rie par vn meilleur air, & principalement par la
presence du Roy. La Royne a esté malade du
depuis à Anuers, & a eu iusques à vingt-cinq
accez de fièvre tierce, dangereuse en son aage,
dans ses afflictions, & à l'entrée de l'hyuer. Le
Cardinal qui a sçeu tout ce qui s'est passé, a em-
pesché que ce mal ne vint à la cognoissance du
Roy, de peur que la tendresse de son cœur ne fust
esmené à compassion. La cruauté du Cardinal a
esté bien plus grande, en ce qu'ayant fait vn par-
tage avec les Hollandois, & disposé (comme il
croyoit) toutes choses pour mettre en confusion
les Pays bas, sur tout la ville de Bruxelles, où la
Royne estoit; il a fait tout ce qu'il a peu, pour
faire prendre S. M. dequoy le Marechal de
Brezé l'auoit menacée. Ou nous sommes forcez
de croire, qu'il vouloit auoir ce contentement
d'auoir obligé celle qui l'auoit fait grand Surin-
tendant des mers, de s'en aller errante sur l'O-
cean, ou en Angleterre, ou en Espagne, ou qu'il
desuoit d'enfermer la Royne dans vne place
assiégée, ou que son dessein estoit de luy faire
rendre quelque desplaisir par les peuples irritéz
contre la nation Françoisse. Nous pouuons dire
avec verité, que ceux d'Anuers, où le Serenissi-
me Infant auoit trouué bon que S. M. se reti-
rast, pour estre en seureté, ont gardé tousiours
le respect qui estoit deu à vne grande Royne,
Belle Mere de leur Souuerain, & Grand' Mere
de leur Prince. Mais le Cardinal a fait tout ce
qu'il a peu, & par la guerre, & par des pratiques
secretes; pour luy faire receuoir quelque af-
fliction, qui luy eust causé la mort. La prudence

du saint Pere remarqua, & sa bonté trouua fort mauuais qu'en cette equippée contre les Pays bas le Cardinal n'auoit point respecté le lieu où la Roine s'estoit retirée, & que l'insolence d'un seruiteur furieux eust obligé la Mere à fuir deuant les armes de son Enfant: il faut croire, qu'on luy auoit ou caché ou desguisé cette entreprise, que Dieu maudit autant pour cette cruauté, que pour les sacrileges commis à Tirlemont.

Dupleix ayant conduit son Histoire iusques à la fin de l'an 1634. n'a point voulu dire, que sur le commencement de l'année la Roine enuoya au Roy pour luy demander son retour. L'ardent desir qu'elle auoit de le voir, luy fist oublier sa condition de Roine & de Maistresse: les vertus Chrestiennes ayant secondé les naturelles, elles gaignerent sur S. M. qu'elle escriroit au Cardinal, pour le prier de s'y employer.

Tous ceux qui iugeoient des choses par les maximes de sagesse, croyoient que le Cardinal embrasseroit cette occasion pour releuer sa reputation, & appuyer sa fortune: on ne trouuoit point de difficulté en l'exécution de ce dessein, la Roine ayant accompli ce que le Roy auoit désiré; qu'elle oubliât les choses passées, & fist paroistre n'auoir point d'aigreur contre le Cardinal. Le Pere de Chantelouue, l'esloignement duquel S. M. auoit demandé, le sacrifioit au contentement de la Roine: le Sr de Laleu Rebours auoit donné toutes les assurances de sa part, & sa conduite auoit esté tres-bonne: le Cardinal, qui a tousiours iugé des ressentimens de la Roine par la grandeur de sa faute, ne se pouuant ima-

giner qu'il y eust en terre vne bonté qui luy peust pardonner son peché, retint l'Ambassadeur huit iours, sans luy faire voir le Roy, qu'il vouloit preuenir : il fit en sorte par des calomnies estranges, que S. M. deffendit à la Roine de luy enuoyer aucun des siens, si elle ne mettoit entre les mains de sa iustice, c'est à dire des Cômmissaires choisis par le Cardinal, trois de ses plus fideles seruiteurs, que leur ennemi faisoit passer pour criminels de leze Maiesté, parce qu'il n'auoit iamais peu corrompre leur fidelité, ni esbranler leur courage. Il me semble que l'Historien deuoit dire quelque chose d'une affaire qui est assez considerable: mais il n'a pas eu assez d'esprit pour la desguiser, & il a eu assez de malice pour la taire; ou plustost le Cardinal a iugé qu'il seroit moins infame en faisant perdre la memoire de cette negociation.

Ne valloit-il pas mieux coucher cette Histoire au long, que de remplir trois grandes pages du pretendu enleuement de la Dame de Combalet? dequoy on fait vne affaire autant importante à la France, comme si cette petite Damoiselle estoit heritiere de la Couronne.

Dupleix grossit aussi son ouurage de quelques attentats imaginaires sur la personne du Cardinal : il dresse un abregé des procez faits à Alfe-
ston, à Rufflet, à Gargan, & autres: il fait au-
theur des pretendues entreprises des deux pre-
miers le Peré de Chantelouue, aussi bien que
du dessein d'enleuer la Dame de Combalet: il dit
aussi qu'il fust soupçonné d'auoir fait tirer le
coup de carrabine au St de Puilaurens, encore

Pag. 667.
Pag. 668.
*Ces impos-
tures ont
esté effe-
cées dans
la lestre
d'un
vieux
Cōseiller
d'Etat.*

& dans le
 Jugement
 sur les di-
 vers
 piéces.

 qu'il assure que quelques-uns ont creu que les Espagnols auoient choisi cette façon pour s'en deffaire, & que les autres iugeoient que la Maison de Lorraine luy auoit dressé cette partie. Il deuoit adiouter, que plusieurs ont creu que le Cardinal de Richelieu en estoit autheur: ce qui est arriué du depuis, a confirmé beaucoup de personnes en cette creance. L'Historien se rend ridicule, lors qu'il veut persuader que les Espagnols, qui auoient la iustice & la puissance en main pour chastier Puy-laurens, & qui sans violer l'honneur qu'ils ont tousiours rendu à Monsieur, auoient plusieurs moyens pour ruiner cet imprudent, ont esté si meschans; de commander qu'on hazarda vn assassinat de plusieurs personnes pour faire mourir vn homme. Il voudroit faire croire que le Marquis d'Aytona, tres-sage Ministre, auoit tellemét oublié le respect qu'il portoit à la Maison de son Roi, qu'il a entrepris de le violer par vn horrible massacre; pour la recherche duquel il a vsé de toute sorte de diligences. Dupleix fait paroistre aussi son peu de iugement, accusant en general la Maison de Lorraine, sans dire qui sont ceux de cette Maison qui ont voulu faire perir Puy-laurens, toute la famille ne pouuant agir par concert en ce rencontre.

Voila vne partie des choses qui peuuent toucher la reputation de la Royne dans l'Histoire de Dupleix: laquelle estant, comme nous auons dit, vn mélange d'iniures & de loüanges, il est raisonnable que tout le monde cognoisse, qu'il n'est pas moins puant flatteur, qu'il est picquant calomniateur.

Il se deuoit estudier de nous représenter les actions du Cardinal, desquelles nous aurions tiré son eloge, si elles le meritoient, sans faire des exclamations de petits enfans. Les hommes sçauans en la nature de l'Histoire iugent, que les exploits hardis des grands Capitaines, les inuentions ingenieuses des Conseillers prudés, & les resolutions genereuses des Roys, sont des diamans; ausquels estre bien taillez & estre mis en œuvre fort proprement, ne donnent pas vn grand prix dans l'estime des plus grands lapidaires, mais vn peu de lustre, qui surprend ceux qu'on nomme en France les Duppes. L'Historien doit naïfvement & nettement représenter vne belle action, comme font Xenophon & Cesar; mais non pas la desguiser ny l'exalter en Poete ou Declamateur: quand cela arriue, ceux qui ont du iugement voyent aussi tost l'artifice, comme vn orfeure expérimenté cognoit s'il y a vne fucille sous vn saphir, ou sous vne esmeralde, pour releuer leur couleur.

Si le Cardinal de Richelieu est le plus grand personnage des siècles passez, le nostre, & ceux qui viendront apres, en iugeront par les choses qu'il a fait, pourueu qu'on les descriue sans faire des sortes figures, qui les rendent plustost suspectes qu'admirables. A quel propos dire si souvent: *Ce grand & incomparable Cardinal?* 1 Les affaires aisées ne sont que le iouet de ce fort & puissant Genie: celles qui sem'ent mal-aisées aux autres luy sont assez faciles, & celles qui paroissent impossibles, ne luy sont pas trop difficiles. 2 Le Cardinal excelle en toutes les facultez de l'ame: il a l'imaginatiue prompte & puissante,

1 Pag 6.

2 Pag 7.

le iugement solide, le raisonnement subtil, la memoire
 heurense, la vivacité de l'esprit, en l'action la dili-
 gence, assiduité & vigilance. Et apres, il a la probité,
 & candeur des mœurs pour la reputation, la noblesse de
 l'extraction pour l'honneur, une dignité eminente
 pour l'autorité, l'eloquence pour la persuasion,
 la grace pour les traits, le secret pour la secreté,
 l'adresse pour la conduite; & apres tout, pour
 l'exécution le courage & la hardiesse: étant mal aisé
 que tant de riches ornemens & tant d'excellentes con-
 ditions se trouvent mesmes en un Senat, il sembloit im-
 possible de les trouver en un seul homme, toute fois pour
 le bon-heur de la France elles se rencontroient vraye-
 ment en la personne du Cardinal de Richelieu. Ce dis-
 cours est suivi de sa genealogie, de la recom-
 mandation de tous ses ancestres, & d'un abrégé
 de sa vie: tout cela contient sept fueillets, sur la
 fin desquels il feint les loüanges que divers
 Pag. 373 grands Ministres lui ont donné: il conclut, que
 c'est le grand luminaire de l'Estat, & que ses ennieux
 1 Pag. 463 sont contraincts de confesser cette verité, que iamaïs la
 France ne fust conduite par un si excellent Genie. 1 Ce
 très-illustre Prince de l'Eglise a un esprit qui penetre
 6 Pag. 53 tout, & qui n'ignore rien. 2 Le Cardinal le plus adroit
 de tous les hommes. 3 La iustification de ce grand Car-
 3 Pag. 58 dinal se trouve bien plus clairement en ses actions glo-
 rieuses, qu'en toutes les responce aux calomnies que
 l'envie a fait vomir contre la reputation de son Eminen-
 4 Pag. 65 ce. 4 Le bruit courut par toute la France, voire par
 toute l'Europe, que le plus grand homme du siecle estoit
 5 Pag. 654 alié d'une maladie incurable. 5. Cét excellent Mi-
 nistre d'Estat, sur la solidité des conseils duquel le Roy
 fonde ses resolutions, commet les secrets à sa confiance,

& bien souvent l'exécution de ses plus hardies entreprises (en l'absence de S. M.) à son courage. Il dit, que
 6 Pag 669
 le Roy en visitant le Cardinal malade, monstra à tout le monde les preuues de son bon naturel, & particulièrement au Cardinal des tesmoignages de sa gratitude & bien-veillance. Je n'ay point voulu prendre la peine de recueillir mille autres flatteries, qui ressentent plus le parasite ou chercheur de lipée franche, que l'Historien : ie me contente de tirer de ces ordures l'or d'une instruction charitable, que ie dois à Dupleix. Il nous auoit promis qu'il escriroit dans l'Histoire de ce regne la vie pleine de merueilles du *Directeur general de l'E-*
 3 Pag 372
stat; mais qu'il n'y apporteroit ny affecterie, ny flatterie : ie laisse iuger par les pieces que i'ay fait voir si cét homme s'est bien acquitté de sa promesse, lors qu'il a cherché des epithetes de vray sycophante. Je peux asseurer avec verité, qu'il a employé plus de temps à louer le Cardinal de Richelieu, qu'à descrire tout ce que le Roy a fait de grand, & tout ce qui est arriué dans vn Royaume composé de tant de Prouinces, & agité de tant de troubles que nous auons veu. Celuy qui prendroit pour vn Historien ce discoureur importun, ne scauroit rien en cét art : le iuge qui renuoyeroit absous ce criminel, seroit iniuste, & celuy qui le tiendrait pour homme sage, ne le seroit pas luy mesme. Vn Orateur ayant loué Antipater des vertus qu'il n'auoit pas; Alexandre le Grand, qui auoit ouy tout le discours fait en faueur de son Fauory, respondit, il est vray qu'il est vestu d'escarlata. Le Roy pourroit dire le mesme, si on lisoit à S. M. les

louanges que Dupleix donne au Cardinal. Il n'a pas gardé le precepte de Pythagore, qui deffend d'allumer vn flambeau deuant le Soleil, & d'apporter la chandelle vis à vis du miroir, c'est à dire, de louer le seruiteur deuant le maistre. Cette façon deuoit estre suspecte au Roy, aussi bien qu'à toute la terre; qui recognoistra que le Cardinal est blasmé par plusieurs personnes; puis qu'il est estimé par excez; & qu'il a mieux aimé faire chanter son nom, que de faire cognoistre sa vie. Les loix de l'Histoire sont si rigoureuses, qu'elles ne souffrent pas qu'on loue son Prince & son pays, ny qu'on blâme les ennemis de l'un & de l'autre avec trop de chaleur. C'est le vice qu'on a remarqué en Poggio Florentin; duquel vn homme de son temps escriuit; qu'en donnant des grandes louanges à sa patrie, & condamnant tous ceux qui l'auoient affligée, il n'estoit pas mauvais citoyen, mais il n'estoit pas bon Historien. J'ay crëu qu'il estoit expedient de faire voir à Dupleix son peché: encore que ie sois assuré qu'il a senty ses pointes lors qu'il le commettoit. Il est impossible qu'il n'aye aperceu qu'il travailloit nō seulement contre les loix de sa profession, mais cōtre celles de sa religion: elle nous enseigne que le plus grand crime est la flatterie, c'est vn scandale qui ruine la charité publique. Dieu donne sa malediction à ceux qui appellent le mal bien, qui fortifient les mains des meschans, mettent des carreaux sous leurs coudes & sous leur teste, pour faciliter le repos que les remords de leur conscience osteroyent. Entre les flatteurs ceux-là sont les plus detestables, qui re-

*Dum patriam
laudat,
damnat
dum Pogg-
ius ho-
stis.*

*Nec ma-
lus est ci-
uis, nec
bonus
Histori-
cus.*

*Isaïe 5.
Ezech 13*

marquent des vertus en vn hōme qui est atteint des vices contraires, qui veulent faire passer pour vn grand Ministre vn petit broüillon, & taschent de persuader qu'un Royaume a esté retiré de la milere & infamie par celuy qui luy a rauy sa felicité & sa reputation. Outre que ces eloges qu'on est soigneux de faire voir aux Princes, les font opiniastrer à conseruer, comme bons seruiteurs, ceux qui leur rauissent l'honneur & les biens : la liberté de dire ce qui est vray estant esteinte, toutes les veritez sont prises chez eux pour des cabales. Ce qui console les gens de bien, est, que cette flatterie qui farde les pechez, est composée de sublimé qui penetre dans le cerueau, & empoisonne peu à peu celuy qui s'en est frotté trop souuent. Ce desordre est suiuy d'un autre plus grand, lors qu'on persuade à celuy qui a la principale conduite, qu'il est aussi puillant comme le flatteur luy veut faire croire, il entreprend des guerres par dessus ses forces; il émeut ce qu'il deuoit laisser en repos, il fait des ennemis à son Maistre, il rompt la Paix, & il renuerse ceux qui s'opposent à luy. Le seul bien que la Prouidence de Dieu tire de ce mal, est, que celuy qui va plus viste, perd plustost haleine : la chaleur que luy donne la flatterie, accompagnée de la fumée de vanité, estouffe la prudence : & celuy qui le charoüille avec la main plaisante, est le mesme qui le pousse avec la main pesante. C'est vne chose tres certaine, que l'homme qui n'entend plus de veritez, doit attendre bien tost toute sorte d'aduersitez. Il arriue aussi, que celuy qui a commence à faire le mal par la

flatterie d'autrui, périr en se flattant soy mesme; lors qu'il croit que les secrets iugemens de Dieu & la nature changeante des choses de ce monde, ne seront point contre luy. La presumption fait que le Fanory, qui se mesure à la hauteur de sa fortune, ne peut voir le précipice qui est encore plus profond: il bronche lourdement, & tombe avec rudesse, parce que les amusemens des caïoleurs qui luy font lever les yeux, l'empeschent de voir les pierres d'achopement qui sont deuant ses pas. La cedrie ou poix de cedre s'appelle la vie des morts, & la mort des viuans; parce qu'elle contregarde les corps morts, & corrompt les viuans: les loüanges produisent le mesme effect: si elles sont données aux hommes vains, elles font mourir les bonnes actions, & viure les mauuaises, & sont autant contraires à vn esprit leger, comme le vin a vne petite teste. De ce discours on peut iuger, que ceux qui esperent de trouuer quelque soulagement en la ruine du Cardinal de Richelieu, auroient vne grande obligation à ses flatteurs; & entr'autres à Dupleix si son intention auoit esté de les deliurer d'oppression. Nous sommes entre les plus affligez, mais nous ne desirons pas que personne se rende criminel pour nous tirer de misere. Dieu aura cette gloire, & nous le prions de donner le merite à nostre Roy. Ce changement estant arriué, si Dupleix est viuant, il sera plus honteux que Velleius Paterculus apres la fin de Scianus, ou de Narcissus, ou de Pallas: les images desquels il portoit dans son sein, comme plusieurs font la medaille du Cardinal, qu'ils

ont plus sur le cœur que dās le cœur. Concluons ce discours par cette verité, que les plus cruels ennemis de la France & du Cardinal de Richelieu, sont ceux qui l'ont trop estimé.

Si celuy qui a conduit son Histoire iusques à la fin de l'an 1634. la veut paracheuer, & qu'il trouue que l'année suivante le Cardinal a ruiné trois grandes armées qu'il deuoit conseruer pour deffendre la France: qu'il a rompu la Paix avec le Roy d'Espagne, lors qu'il estoit temps de la faire, si nous eussions eu la guerre: qu'il a interdit le commerce, quand le Royaume a esté espuisé de Finances: qu'il a esté contraint d'entretenir dix ou douze armées, lors qu'il estoit réduit à l'arriereban, duquel nous tirons nos dernieres forces, qu'il a attaqué l'Italie, l'Allemagne, & les Pays bas, lors que la France estoit sur la deffensive: qu'il a mal traité la Noblesse, rançonné les Officiers, & accablé le pauvre peuple, lors qu'il estoit necessaire d'eschauffer tous les cœurs des François au seruice du Roy.

Si le desordre causé dans tout le corps du Royaume par cēt empyrique d'Estat nous produit vn bon ordre par la ruine du Cardinal, que deniendront ces beaux tiltres de *grand Directeur*, de *puissant Genie de la France*, de *grand Luminaire*, de *plus adroit de tous les hommes qui penetre tout, mesmes l'aduenir*, de *plus excellent homme du siecle*, qui n'ignore rien & mille semblables qualitez qui nous font desirer à la France vn homme qui les possède, & qui garentiroient de misere nostre pays, si nous auions vne meilleure caution que Dupleix? Il s'est retiré avec son payement, ayant mieux aimé

laisser à ses heritiers quelque bien, que de faire à toute la posterité vn beau present des veritez de son temps : elles sont la vie de l'Histoire, que Dupleix nous donne morte, lors qu'il la fait menreüse : il change les choses vraies avec des paroles faüsses, & fait d'vne grande Princeße & venerable Dame, vne seruante du temps qui se prostituë pour de l'argent.

Je ne veux remarquer que douze ou fautes ou crimes entre plusieurs que l'Historien a commis. Je serois obligé de faire vn Liure aussi gros que le sien, si ie voulois dire tous ses deffauts. Deuant que d'entrer en ce discours, il est necessaire d'en faire vn qui descourrira non seulement le dessein du Cardinal de Richelieu & de son Escriuin, mais tout l'estat des affaires presentes.

Le Cardinal est vn homme qui a l'esprit, le corps & la fortune bien malades : son imagination qui roule tousiours, cherche des moyens pour subsister, & pour venir à bout de ses desseins par la ruine de ses ennemis : il se perd là dedans, & ne trouue point de repos, si on ne le berce en luy proposant mille inuentions qui flattent ses esperances. Ce qui est plus estrange, est, que parmi toutes ces foibleßes & malices, le Cardinal s'imagine qu'il est sage & homme de bien, parce qu'il entend tous les iours le P. Ioseph, qui est plus temeraire & plus malin que luy. Ce rencontre me fait dire, qu'on peut comparer le Cardinal à vn grand peintre qui fait avec estude vn tableau de sa main : il a vn maistre compaignon, qui est ce bon Pere, qui traueille à copier plusieurs pieces de diuers maistres : sous celuy-là,

quantité de garçons & d'apprentifs barbouillent sur la toile, & font des grotesques & des môstres. Ceux-cy sont les donneurs d'aduis, les ardents qui debitent les nouvelles, les Escriptuains qui loüent ce grand Ministre, & blasment tous ceux qu'il a perdu, ou veut perdre. Dupleix, à cause de sa belle qualité d'Historien, & de son aage, a esté estimé vn des plus capables de cette dernière espeece : voyons s'il s'est bien acquitté de sa commission.

Ie dis premierement, & mets en fait, qu'il est criminel de leze Maïesté Divine, s'estant meslé de parler de la Religion tres-mal à propos, en rapportant les paroles que le Duc de Montmorency dit deuant que de mourir : voicy les termes ; *l'espere de voir bien tost face à face ce bon Dieu, que ie viens de recevoir en Sacrement.* Cela n'est pas de la naïfue é de nostre langue : en Sacrement, dans le Sacrement, & sous le Sacrement, est dire avec les heretiques, en figure. On m'a dit, que le Libraire ayant esté repris, a corrigé avec la plume en plusieurs copies, & a mis *au Sacrement* : mais cela est encores trop crud, & la chose meritoit bien qu'on reimprimaît la feuille avec vne autre façon de parler moins suspecte & moins obscure : il falloit aussi vser de termes plus religieux, & dire avec tous les Chrestiens, le saint Sacrement. Ie ne dis rien de ce que cet homme s'est voulu mesler de parler de l'autorité du saint Pere, & des Conciles, des limites de la puissance spirituelle & temporelle, en proposant au long avec beaucoup de bassesse d'esprit & d'ignorance quelques difficultez, sans rien

I.

Pag. 649.

Pag. 31.
33. 34.
Pag 64.
65. 66.

decider. C'est la façon de cét auteur, laquelle peut produire des scrupules dans les ames, par-rager les esprits, & agiter les ignorans, qui seront capables de concevoir ce que l'Historien a écrit, sans auoir le moyen de résoudre par les principes de la vraye Theologie, tous les broüillards que son foible escrit peut esmouvoir.

Pag 416.
& 432.
II. Je ne veux pas aussi m'arrester à ce qu'il dit du liure de Sanctarellus : il ne deuoit point exagerer vne chose que la police du Royaume veut estre mise sous le silence, & de laquelle le S. Pere auoit deffendud'escire.

La Maiefté humaine, image de la Diuine, a esté fort mal traitée par l'Historien. Outre que Dupleix dans tout son Liure louë avec moins de chaleur le Roy que le Cardinal de Richelieu, nous pouuons dire de ce Comedien en Histoire, qu'il a le pied gauche dans vn patin bien releué, lors qu'il veut faire paroistre les actions du Ministre : mais qu'il a le pied droit tout nud, & va bouëtant, lors qu'il faut estimer les rares qualitez & grands exploits du Roy. Dupleix ne luy laisse que la louange d'un Maistre de camp, donnant tousiours au Cardinal celle d'un sage General d'armée. Si son Eminence vouloit mesnager les bonnes graces de son Maistre, elle ne souffriroit pas qu'on luy attribuaft les bons conseils & belles entreprises : tout cela seroit reserué au Prince, comme au premier auteur, ainsi le seruiteur fueroit l'enuie, & ne laisseroit pas d'auoir grande part à l'honneur.

Le Roy a receu mille iniures couuertes dans cette Histoire : en voicy plusieurs à descouuert,

qui rendent l'Historien criminel de leze Maie-
 sté au premier chef. Nous en auons desia remar-
 qué quelques vnes que nous remettró's icy com-
 me en leurs places. Il escrit, que 1 *Luyne* a gouver- 1 Pag. 2.
 né le Royaume, & que 2 le Cardinal a esté chargé par 2 Pag. 3.
 necessité de tout le poids de l'Estat: que 3 depuis que le Cardinal a eu le gouvememēt de l'Estat en sa main, tous Notez,
 ces deffauts ont cessé par l'exacte reformation qu'il y a 3 Pag. 6.
 apporté avec vne prudence surhumaine: 4 la mauuaise 4 Pag. 17.
 conduite des *Fauoris*, lesquels gouvernoient l'Estat sous
 le nom de S. M. 5 les Finances espuisées par l'ambition 5 Pag. 196
 & par l'avarice, estoient remplacées par des exactiont
 iniques. Il parle des Edits que le Roy fit verifier
 en sa presence; & en vn autre endroit il dit, que
 6 donner la confiscation des terres du *Mareschal* & 6 pag. 161
Mareschal d'*Ancre* estoit vne iniustice. Il appelle
 7 vn meurtre la mort du *Mareschal*. Il rapporte les 7 pag. 155.
 paroles dites dans le Parlement par le premier
 President, 8 qu'il y auoit des gens qui abusoient de la 8 pag. 195
 bonté & iustice de S. M. à raison dequoy il prioit Dieu
 qu'il destournast loing de sa personne sacrée les mal-
 heurs qu'il en falloit attendre: 9 tant s'en faut que 9 pag. 443
 ce qui regarde la diminution des charges du peuple aye
 eu l'effect qu'on desiroit, qu'au contraire iamais on ne
 tira tant de Finances des impôts & des subsides qu'à
 present. Il appelle 10 *Mr de saint Simon Fauory* du 10 Pag.
 Roy: dequoy il veut tirer la consequence de *Pli- 471.*
ne le Jeune, que tout Prince qui a des *Fauoris*,
 n'est pas vn grand Prince. Mais tout cela semble
 peu de chose, lors qu'on examinera ce que nous
 auons dit du mauuais iugement que l'Historien
 fait du Roy, pour auoir donné sa confiance à vn
 preneur de mouches, & pour l'auoir auacé (com-

me il dit) contre injustice & raison. Ce qui surpasse tous ces blasphemes, est la qualité de *Directeur general de l'État*, qui est attribuée au Cardinal de Richelieu en plusieurs endroits de cete Histoire: mais le nom de Conseiller estant trop peu de chose, & celui de Ministre odieux, il falloit chercher vn tiltre plus releué; ce qui se pouuoit faire sans iniure notable à la personne du Roy. Nous qui sommes des pauures confisquezz & proscrits, ne voudrions pas auoir changé nostre misere innocente avec le bon-heur criminel du Si Dupleix. J'ay tousiours escrit du Roy avec le respect que ie dois à mon Souuerain, & au Fils de ma Maistresse. Je ne m'esloigne pas de mon deuoir, lors que ie dis que le Roy est trompé: comme tout homme peut tromper, aussi tout homme peut estre trompé, les Princes plus aisément, & entre les Princes les bons plustost que les meschans. Celuy qui dit que les escrits faits contre les Ministres touchent indirectement le Roy, a attaqué directement sa personne sacrée. J'adiouste qu'ayât iniurié le Duc de Luynes, encore qu'il soit mort, l'Historien à son conte seroit autant coupable que ceux qui blasment le Cardinal, quoy que vivant. Mais il dit que celuy-là estoit blasnable, (c'est dequoy le Duc de Chaunes ne demeura pas d'accord:) & il assure que celuy-cy est loüable, ce que les trois quarts de la France & de l'Europe n'aduouërôt iamais, & que Dupleix ne croit pas. Je suis assuré que ces sortes loüanges ne sortent point du cœur, mais coulent seulement de la plume: & si le Cardinal estoit bien aduisé, il ne les estimeroit pas dauantage que le son de la guiterre d'vn charlatan.

Je viens au troisieme crime de Dupleix, par lequel il semble qu'il aye voulu obliger le Cardinal, en faisant voir au monde qu'il y auoit vn homme plus ingrat que luy. L'Historien aduouë qu'il a esté à la Roine Marguerite de Valois, du nombre de ceux que cette sçauante & liberale Princeesse entretenoit, pour le plaisir qu'elle prenoit à escouter des gés de lettres. Dupleix estoit en ce temps-là vn pauvre homme, qui se mesloit de mettre la Philosophie en François: il receuoit des bons appointemens de la Roine Marguerite, & auoit la qualité de son Maistre de requestes: il a commencé sa fortune chez elle, & du theatré de cette petite Cour, il passa dans celuy du grand monde: sur lequel il fait voir la plus sale & plus abominable ingratitude que iamais homme aye commis. Que ne dit-il contre cette magnifique & vrayement Royale Princeesse, qui a facilité le repos de la France: encore qu'elle n'aye fait en cela que des choses iustes, elle les a faites avec bonne grace & affection: elle a donné au Roy tout ce qu'elle luy pouuoit donner, a aimé tendrement, & a honoré grandement sa personne. Quelle infamie que sous le Regne de son heritier, auquel on a caché cet attentat, on'imprime contre elle des calomnies si estranges, que toute la terre en a horreur? On veut faire passer pour vne abandonnée vne Princeesse fort vertueuse, & pour vne hypochondriaque vne femme qui auoit l'esprit plus gentil, plus fort, & plus sçauant que son sexe n'auoit permis à routes celles de son siècle. Ces discours, que ie n'ose point transcrire au long, sont faits par vn homme

Pag. 470.
de la vie
de Henry
IV.
Pag. 79.

qui a converti son pain en pierres, avec lesquelles il luy va casser les os dans le tombeau du Roy Henry II. Il deshonnore dans vne Histoire de France la memoire d'une Fille de France, qui l'a honoré de ses bonnes graces, & assisté par ses bien-faiçts : il produit les tesmoignages d'un Religieux emancipé, que nous auons veu chercher dans la Cour vn Euesché, avec l'imposture que cet ingrat rapporte, & que ce Moyne lassé de la rigueur de sa regle, racontoit comme vn cheuallier errant des auantures de Roman. Cependant si on veut croire Dupleix, il a descouvert des grands secrets, & a sçeu ce que Dieu seul peut sçauoir : outre cela il dit, *qu'il declare les imperfections qui n'ont esté cognûes que par quelques domestiques.* Seruiteur infidèle ! qui ose reueler ce qu'il dit auoir aperceu dans vn cabinet ; & qui imprime les defauts supposez, desquels le public ne peut tirer ny instruction ny exemple. Ce qui doit estre plus assésuré, est, que Scipion Dupleix sera estimé le plus ingrat, & quant & quant le plus scelerat homme de la terre. Le Cardinal de Richelieu a suiet de s'en defier, & doit croire qu'il ne le loue pas par recognoissance des bien-faiçts qu'il a receu de luy, mais par esperance de ceux qu'il attend : celuy qui traite si mal sa Maistresse morte, n'espargnera pas son Maistre, s'il perd la puissance, ou la vie. Les Perses marquoient avec vn fer chaud les ingrats : il n'est pas besoin de mettre sur la face de Dupleix vne autre tache que l'eternelle qu'il s'est imprimé avec son ancre. Comme il est vray, que l'homme recognoissant a toutes les vertus, & l'ingrat tous les

vices ; il faut croire que Dupleix n'est pas seulement deshonoré par ce crime, mais par tous les autres. l'en remarqueray quelques vns : le premier sera, qu'il est iniurieux aux Nations entieres, aux Princes, & a beaucoup de personnes vertueuses ; & sur tout s'ils n'ont pas esté amis de celui, aux passions duquel il fait vn sacrifice sanglant de la reputation de ses ennemis.

Commençons par les principales parties de l'Europe. Il fait vne iniure de ces mots honnorable, *Italien*, à l'*Italienne*, en *Italien* : il ne se faut pas estonner, si la haine que les François portent aux Espagnols a eschauffé vn Gascon qui se recommandoit en faisant le zélé : il blasme cette nation *d'ambition dereglee, de meschant artifice, & de perfidie*. Nous auons rapporté ce qu'il a dit contre les Anglois, il n'y a rien à adiouter, si ce n'est qu'en vn autre endroit il décrit comme peu genereux ceux qu'il auoit appellé couragex. Les Hollandois, quoy qu'alliez, ont aussi leur coup de bec en passant : il dit, *qu'apres auoir retenu l'argent de France, ils se monstrerent peu soigneux de l'execution de leurs promesses* : ce qui est en termes moins rudes, les faire passer pour des affronteurs. Il ne resté que les Allemans, desquels Dupleix n'a point mesdit : mais n'ayant conduit son Histoire que iusques à la fin de l'an 1634. il dira sans faute des choses estranges contre la nation Allemande en l'an 1635. lors qu'il parlera des traitez des Electeurs de Saxe & de Brandebourg, des autres Princes, & des villes Imperiales, qui ont abandonné la fortune du Cardinal, pour rabiller le desbris de la leur. Il ne faut pas

IV.

Pag 178.
181. 370.Pag 381.
382. 485.

Pag. 496.

Pag. 380.

trouuer estrange, si cét Escriptuain iniurie tous ses voisins, puis qu'il méprise tous les François. En vn endroit il dit : *Ils dormoient à la Française.* Ailleurs il les accuse d'estre insolens, & d'auoir laissé vne mauuaise odeur de leur nom en Italie. Et en fin il dit, *qu'ils sont mal adroits pour faire des fortifications.* Mais il est encore plus mal adroit pour dresser vne Histoire.

Venons apres les Nations aux Princes qui les gouuernent par les ordres de la Prouidence Diuine, qui a deffendu d'en mesdire. Nous auons veu qu'il a escrit contre nostre bon Roy, & contre celuy d'Angleterre, qui regne avec tant de Paix, vraye marque de sa prudence. Sans faute le Roy d'Espagne ne sera pas mieux traitté; la grandeur, la pieté & la prudence de ce Prince ne le garantiront pas des atteintes de cét homme furieux : il l'appelle *persecuteur des Religioneux & Protestans.* Il est vray qu'il n'aime pas leur erreur, & l'extermine tant qu'il peut : mais vn Catholique se rend indigne de ce nom, lors qu'il donne celuy de persecuteur à vn Prince zele au bien de la vraye Religion. Il semble aussi qu'il le veut accuser de mauuaise foy, dans les dernieres propositions qui furent faictes pour la treue avec les Hollandois : mais vn grand Roy ne s'appuye point sur des petits artifices; il surmonte ses ennemis avec la generosité & la force : ses Lyons de Brabant & de Frandres ne se peuuent reuestir des peaux des renards. La rage de l'Historien va iusques à l'Empereur, & ose appeller celuy qui est saint en ses mœurs, & iuste en son gouuernement, *Vn Tyran qui opprime les peuples*

que Dieu a mis sous sa charge. Enfin ie ne trouue point de Prince loué dans cette Histoire que les Roys de Suede & de Maroc ; l'un Protestant, & l'autre Mahometan, parce qu'ils ont seruy, ou tesmoigné de vouloir seruir à la conseruation de la fortune du Cardinal, qui ne se maintient que dans les troubles, & ne s'appuye que sur les ennemis de sa creance. Il me semble qu'il n'est pas necessaire de rapporter les iniures que l'Historien a dit contre le feu Duc de 1 Sauoye, & contre le Duc 2 Charles de Lorraine : perſonne ne peut douter, qu'un homme gagé pour escrire contre ceux auxquels le Cardinal a arraché leurs Estars, n'aye deschiré leur reputation : il s'est attaché sur tout au Duc de Lorraine, pour conten-ter les dernieres passions, qui sont tousiours les plus violentes. On a remarqué qu'à mesure que ce Prince a voulu faire des efforts pour rentrer dans ses pays, la cholere du Cardinal a entrepris quelque chose d'extraordinaire contre luy, ou contre le Mariage de Madame sa Sœur : tantost il a faict donner des Arrests au Parlement de Paris, tantost il y a enuoyé des Edicts & Declarations : il a faict des poursuites à Rome, qui n'ont peu esbranler la iustice de Sa Sainteté ; laquelle a condamné ceux qui croient que les mariages des Grands se deuoient defaire aussi promptement que la conionction des astres. A la fin son Eminence contente sa mauuaise humeur, en lisant les iniures que son Historien dit au Duc & à la Maison de Lorraine. Il a creu donner quelque couleur à vne mauuaise cause, en faisant descrire vn Souuerain, qu'il a

1 Pag. 71

529 576.

&c.

2 Pa. 615

660. 663.

682. &c.

Est appel-

é impru-

dent, vain

leger, four

ue, tombé

en sens

reproché,

meraire,

perſide,

peruere,

&c.

forcé d'estre son ennemi. Mais le Cardinal, auquel j'ay veu bien accorder vn luth, deuoit mieux accorder la France avec ses voisins & Alliez : ce n'est pas qu'il n'aye monté beaucoup de cordes, & mesmes trop : mais c'est avec cholere, qui en a rompu vn grand nombre.

Rentrons dans le Royaume de France, où nous trouuerons qu'apres le Roy Monsieur est descrit
 Pag. 611. comme vn Prince qui abandonne son esprit à des
 Pag. 610. mauuais conseils. On adioute : *Monsieur a faict des folies, a menacé le Cardinal.* Monsieur le Prince est accusé en deux endroits 1 de *chaleur d'esprit* ;
 1 Pag. 52 en d'autres 2 d'*auenglement en ses passions & inter-*
 2 Pa. 101 rests : 3 qu'il a forcé le Roy à reuquer le serment faict
 3 Pa. 129 en son sacre ; & qu'il donna suiet à son emprisonnement : qu'on eust plustost exercé la vengeance que la iustice, s'il eust changé le gouuernement. Monsieur le Comte de Soissons n'est pas exempt des atteintes de l'Historien : il dit, qu'il sortit du Royaume à la persuasion des siens, non pour apprehension d'estre arresté, & qu'il s'estoit opposé au premier Mariage de Monsieur, parce qu'il eust desiré le party pour luy-mesme. C'est en peu de paroles dire, que Monsieur le Comte est sorty du Royaume sans suier, & que pour son interest il a voulu empescher que Mademoiselle de Montpensier n'espousa Monsieur : ce qu'il pouuoit arrester, s'il eust voulu faire tout ce qu'il pouuoit : mais sa generosité est autant esloignée de la violence que de l'artifice ; & il se contente de meriter vne grande & belle Princesse sans faire des cabales & des efforts pour l'auoir, ou pour l'enleuer.

Je viens apres les Princes du Sang Royal aux
 Cardi-

Cardinaux. Celuy de Ioyeuse est appellé en termes couuerts ignorant, sans liberalité, & sans Pag. 317.
 charité. Le Cardinal de la Rochefoucault est, selon l'aduis de Dupleix, peu vigoureux, & plus en- Pag. 364.
 clin à la conuersation des personnes Religieuses qu'à maniment des affaires politiques. Mais il semble qu'il fait profession particuliere d'estre ennemy de la memoire de ce grand homme de corps & d'ame, le Duc de Mayenne: tantost il l'appelle plus cou- Pag. 198.
 rageux que prudent: tantost fougueux & temeraire, n'ayant ny le iugement ny la prudence necessaire pour commander, ny les conditions requises à vn Gouverneur de Prouince. Je ne peux descouurir pour quelle consideration il est passionné, non seulement contre la memoire du Fils, mais contre celle du Pere, qu'il a tousiours mal traité dans l'Histoire du feu Roy. Non seulement la France, mais toute l'Europe sçait, qu'il a esté homme de bonne foy, Prince sage, tres grand Capitaine, & qu'il n'a iamais hay ny le feu Roy ny le Royaume.

J'ay rapporté vne partie des iniures qu'il a dit au Connestable de Luynes, mais j'ay oublié qu'en vn endroit il l'appelle impudent. Le Con- Pag. 162.
 nestable de Lefdiguieres, si on le croit, conseilloit la guerre de Gennes par auarice: en vn autre endroit Pag. 413.
 il dit nettement, que luy & le sieur de Bullion re- Pag. 417.
 tindrent trois monstres aux soldats. Il fait descharger le dernier par vne lettre du Roy, parce qu'il Pag. 418.
 est à present Surintendant des Finances, & luy peut faire plaisir. Les Ducs & Pairs ne sont pas mieux traittez: il appelle en termes clairs ceux de Montmorency & de Rohan, des bourreaux. Pag. 514.

Nous auons remarqué ce qu'il a fait dire par Messieurs du Parlement de Paris au Duc d'Espernon, ne l'osant pas attaquer luy mesme, comme il a fait au Duc de Candale : on voit bien qu'il n'est pas amy de cette Maison, encore qu'il en soit voisin. Je veux croire en lisant que le

Pag. 317. Duc de Sully estoit *le plus pernicious homme du Royaume*, que l'Historien a voulu dire le plus *pecunieux* ; qui est vn mot peu François : mais si l'intention de l'Escriuain a esté telle, il deuoit faire vne correction ou de la faure de ses mauuais yeux, ou de la sottise du libraire, estant vne chose assez importante, & cette negligence pouuant faire croire que le dessein de Dupleix a esté mauuais. Entre les Mareschaux de France il iniurie celuy de Boisdaphin, en escriuant qu'il fut

Pag. 57. *accusé d'intelligence avec les enneinis, ou de deffant de hardiesse, ou d'ignorance en son mestier*. Il dit du Mareschal de Themines, qu'il estoit plus propre à ex-

Pag. 469. *cuter qu'à conduire, qu'il vinoit en confusion en sa maison, & retenoit iniustement les biens Ecclesiastiques*. Le Mareschal de Bassompierre, qui a esté loué par tous les hommes vertueux pour estre vn des plus accomplis Seigneurs de la Cour de France & de nostre siecle, est, selon l'aduis de Dupleix, vne

Pag. 391. *personne qui s'est embarassée dans des mauuaises affaires par la legereté de sa langue* ; encore qu'il ne s'en soit iamais seruy que pour bien parler, ou pour obliger tous ceux qui auoient recours à sa courtoisie. Je m'assure que si le Comte de Carman auoit esté emprisonne vn an deuant, l'Historien auroit deschiré la belle reputation de ce Cavalier sans reproche ; auquel la generosité & la ve-

rité ont rendu ennemy celuy qui l'est de ces deux vertus, parce qu'il les craint. Ce sage & vaillant Mareſchal de Thoirax, obiect de la deſſiance & eſprit melancholique du Cardinal de Richelieu, eſt appelle *homme negligent en ſa charge*. L'Historien ſe rend perſecuteur de la reputation du Mareſchal de Marillac, pour plaire à celuy qui a eſté le meurtrier de ſon corps. Il louë au meſme endroit le Mareſchal d'Effiat, & le fait paſſer pour vn des *plus excellens Capitaines*, & des *plus ſages Conſeillers de noſtre ſiecle*: ſans doute il a fait payer les penſions de l'Eſcriuain; ſ'il l'eult meſcontenté, il n'eult pas manqué de nous monſtrer ſes grands Palais & acquisitions, qui font voir qu'il a mieux fait ſes affaires que ceux du Roy: en recueillant les miettes qui tombent ſous les pieds du Cardinal, il en a fait plus de cent mille eſcus de rente dans cinq ou ſix ans de maniment de la bourse du Roy, outre vn million d'or en baſtimens & ameublemens Royaux. Celuy de tous les Mareſchaux de France, que l'Historien pourſuit avec plus de paſſion, eſt le Colonel d'Ornano: il paroist par tout ennemy de ſa perſonne & de ſa maiſon, encore qu'il louë le Marquis de ſaincte Croix ſon frere, il luy donne pourtant vne touche; mais la peur d'en recevoir des plus rudes de luy, fait qu'il l'eſpargne en ſon particulier, lors qu'il deſhonore les ſiens. Tous les Chanceliers & Gardes des Seaux qui ont eſté durant ce Regne, qui en a plus fait que les quatre precedens, recoiuent vne picqueure de la plume de Dupleix: il a creu agréer en cela au Cardinal de Richelieu, qui n'a point eſté amy

Pag. 461.

Sur tout
voy. 2. la
marge.

Pag. 621.

Pag. 189.

386. 415.

433 434.

&c.

de ces Messieurs, & qui en a mal traitté quelques vns. Ce sage Chancelier de Sillery, grand ennemy des guerres ciuiles & estrangeres, qu'il destournoit avec prudence, pour conseruer la reputation, les forces & les richesses du Royau-

Pag. 141. me, est appellé *flatteur & ambitieux*. Dupleix est

Pag. 347. contraire a luy mesme, lors qu'il louë le Garde

Pag. 168. des Seaux du Vair de *sa pieté* : & adiouste aussi

roist, que *de trois ans qu'il fust Prestre & Euesque, il ne diu point la Messe, & ne prist aucun soin de son Diocese* : il l'accuse aussi *de trop grande seuerité, d'orgueil, d'inegalité, & de colere* : avec toutes ces imperfections qu'il luy attrache, il assure qu'il estoit vn des plus grands hommes du siecle.

Tout ce discours discordant est de dix ou douze lignes. Encore que le Garde des Seaux de Vic eust passé par toutes les grandes charges & emplois plus releuez, & qu'il fust tres-sçauant, non pas peut estre dans la subtilité ou chicane des écoles, mais dans les bonnes lettres qui seruent à la conduite de la vie, & à la iustice, il est

Pag. 346. décrit comme ignorant par Dupleix, qui ne sçait pas la premiere loy de son mestier, & se veut mesler de iuger de la capacité des premiers Officiers du Royaume. Il appelle le Garde des

Pag. 346. Seaux de Commartin, *bilioux, hardy, & peu complaisant* : mais il faut aduoüer, que l'Estat perdit beaucoup, & que sa mort aduancée, aduancan nos miseres, auxquelles il se fust opposé avec courage. Je confesse, que l'Historien donne des loüanges au President Ianin : mais ie ne crois pas que tous ceux qui les liront, trouuent bon qu'il

Pag. 346. assure, qu'en suiuant le party de la Ligue il estoit bon

François. Par la suite du discours on voit bien que les eloges qu'il donne à ce sage Ministre d'Estat, ne viennent pas de la cognoissance de ses merites, que du ressentiment de quelque plaisir que l'Historien en a receu dans les Finances. Comme il trouue le Cardinal de Richelieu passionné contre le Garde des Seaux de Chasteau-neuf, il le charge aussi plus rudement: il dit, *qu'il a eu vne mauuaise conduite*: il semble aussi qu'en termes couuerts, il le vueille blasmer d'auoir abandonné le Cardinal malade à Bourdeaux, & qu'il a esté fort criminel d'auoir dit, *Il se porte fort mal*: il assure, que le Roy s'est plaint souvent du peu de secret, de l'ambition extrême, & de l'humeur cabalante de ce personnage. Nous auons touché quelque chose du vray sujet de la disgrace du Marquis de la Vieuille; laquelle estant vn effect de l'ingratitude & ambition du Cardinal, l'Historien l'attribuë aux abus qu'il commettoit en sa charge de Surintendant des Finances, qu'il a fait avec grande fidelité & capacité: mais non pas au gré de beaucoup de Courtisans: leurs plaintes l'affermissoient dans l'esprit du Roy, mais les artifices du Cardinal le renuerserent. Je ne m'arresteray pas aux mespris que Dupleix a fait de quelques particuliers, plus sçauans que luy en sa profession. Il dit, que *Matthieu n'a pas obserué les loix de l'Histoire*: il est vray qu'il les a mieux sçeuës, & plus religieusement gardées que Dupleix: ce barbare reprend vn homme elegant, & dit que son stile est trop fleurissant, mais sa corruption l'empesche de sentir que le sien est puant: il veut que sous sa mauuaise foy on

pag. 398.

pag 653.

Pag 645.

Pag 385.

Pag. 128.

Pag. 486.

croye que Don Laurens Ramirez de Prado, vn des plus sages & des plus sçauans hommes d'Espagne, luy a tenu quelque discours, que sa prudence & la retenue ordinaire de ceux de sa nation ne peuuent souffrir : mais ie m'asseure que ce grand personnage s'inscrira en faux contre ce petit calomnieur. Il donne vn coup de dent en passant à ceux qui dressent les *Mercures François*: lesquels, quoy que seruiteurs du temps, n'en sont pas si esclaués que *Dupleix*, & nous enseignent plus de veritez que luy, qui a tiré vn grand nombre de cognoissances de ces ramas, & ne les met pas en meilleur ordre ny en termes si bons. Il accuse de peu de iugement & de trop de complaisance & flatterie ceux qui travaillent à ces ouurages: mais ces trois deffauts paroissent d'auantage en celuy qui les reprend. Personne aussi, quoy que bon Catholique (s'il sçait les loix de l'Histoire) ne peut approuuer qu'un homme qui la doit escrire sans passion, mette en grosse lettre sur l'inscription des chapitres, dans lesquels il traite des sousleuemens & entreprises des Rochelois, *impudence, insolence, effronterie des rebelles*, &c. ce sont les termes ordinaires avec lesquels *Dupleix*, pour contrefaire le zélé, paroist passionné. L'homme sçauant a vne mesme creance avec le peuple, mais il la fait cognoistre plus sagement.

Je serois obligé de faire vn liure aussi gros comme est celuy de *Dupleix*, si ie voulois produire toutes les iniures qu'il a dit; il y en a peut estre qui sont veritables, mais elles ne sont pas bien seantes à la grauité & prudence de l'Histoire.

Pag. 114
1^{er} *Mer-*
cure qui
rapporte
toutes
chores
avec peu
de discus-
ion & sou-
uent par
complai-
sance &
flatterie.

Pag. 218
& ail-
leurs.

re. Theopompe blasme dans la sienne plusieurs personnes par auersion particuliere: Dupleix en iniurie beaucoup d'auantage, ou pour auoir receu quelque desplaisir, ou pour obeyr à la passion de celuy qui se repaist de ces ordures. Je ne m'estonne pas dans la terreur qui a saisi toute la France sous la violence du Cardinal de Richelieu, s'il ne se trouue pas vn homme entre tous les Grands qui sont offensez ou en leurs personnes ou en leurs parens, qui aye fait souuenir Scipion, que ce nom signifioit vn baston. I'ay creu qu'en vn autre siecle il auroit couru plus de fortune, mais il me semble qu'en cette saison toute la France est assise en vn amphitheatre tournant, comme estoit celuy de Curio: on ne regarde pas tant aux esclats des bestes farouches, ny aux esclats des armes des escrimeurs à outrance, cōme on fait au remuemēt de toute la machine, qui nous porte & fait tourner la teste; chacun considere, que la vie de tant de personnes qui sont en France despend d'vn ou de deux ressorts, lesquels venans à se rompre, tous les assistans seront accablez. Ce grand, ce puissant, ce riche, & ce horissant Royaume est auourd'huy en vn estat, par les mauuais conseils du Cardinal de Richelieu, que personne ne songe ny à ses vengeance, ny à ses affaires particulieres, parce qu'on craint la cheute de la Monarchie que ce Conseiller temeraire a esbranlé, & fait aller comme bon luy semble avec deux foibles ressorts, qui sont vn esprit furieux, & vn mauuais dessein. Si Dupleix dit, qu'il a donné quelque loüange à chacun de ceux qu'il a blasme, nous luy repartirons, que

Plinius
lib. 36.
cap. 15.

c'est vne des malices que Plutarque a remarqué dans Herodote. Vne iniure entre deux recommandations est vn vent coulis, qui fait plus de mal que les orages qui nous battent en pleine campagne.

V.

Ce chien de Diogene, qui mord ses ennemis, leche tous ses bons amis, & fait voir dans ses flatteries la cinquième mauuaise qualité d'un Historien. L'aduouë que de charger d'iniures, est estimé vn plus grand crime que de chanter des loüanges, mais c'est vn deffaut égal en vn Historien. Dupleix est autant blasmable d'auoir esté prodigue en ses eloges, comme d'auoir paru furieux en ses mesdisances : ie ne veux pas repeter les principaux Panegyriques qui sont pour celuy qui l'a employé & payé : il croit auoir mis sa reputation à couuert, ayant fait publier l'Histoire de son credit, lors qu'il subsiste encore; mais il ne voit pas que le changement d'affaires apportera celuy des discours, & ne donnera pas moins de liberté aux plumes qu'aux langues. Plusieurs remarquent les actions des Tyrans, mais personne n'ose se presenter à leur furie en son passage : lors qu'elle est passée, la verité produit toutes les pieces qu'elle auoit caché dans ses sacs, qui sont les cabinets des sages & des curieux, qui instruisent le procez des ennemis du public, & de tous leurs complices.

Il n'y a iamais eu homme plus liberal en belles epithetes que Dupleix, quand il veut gratifier les amis de son Maistre & les siens : il recite plus de belles qualitez que de bonnes actions, desquelles ceux qui lisent l'Histoire doiuent tirer

les veritables loüanges. Quelle abondance de
 beaux tiltres à Barbin, qu'il appelle *homme de* Pag. 149.
gentil esprit, poly, adroit, accord, agreable, liberal;
 il assure, qu'il estoit sans argent quand le Mareschal
 fust arresté: ce qui fera que plusieurs le prendront
 pour vn mal aduisé: mais lors qu'il adiouste,
Procureur de Melun, il fait voir qu'il met la teste
 d'un geant sur le corps d'un Pigmée. Il dit, que le Pag. 616.
Chancelier de Suede Oxestern a le plus excellent & le
plus fort esprit que la nature aye produit de long temps;
 il ne voit pas qu'il a assuré ailleurs, que le Car-
 dinal est ce Phœnix, sans faute il sera ialoux de
 ces loüanges données à vn Goth: il est vray qu'il
 en a tant dit à son Mæcenas, qu'il ne peut pas
 douter qu'il n'aye eu la plus grande part de ces
 sottises, sur tout quand il s'efforce de prouuer,
 qu'il ne faut qu'un Ministre ou vn Directeur ge-
 neral dans vn grand Royaume, qui aye toutes les Pag. 373.
qualitez necessaires pour faire les charges de plusieurs 374. 375.
hommes, & que nostre siecle l'a produit par miracle en
la personne du plus grand Heros que nous ayons veu
depuis l'establissement de la Monarchie tres-Chrestien-
ne: c'est icy où il luy donne le nom de grand lumi-
naire d'Estat. Vn Orateur que j'ay cogneu à Paris, Voyez la
 l'eust appellé innocemment le grand Phalot. pag. 518.
 Ceux qui le nomment le *luminaire d'Estat*, ne
 voyent pas que nous iugeons de ce discours que
 l'Estat est mal esclairé: & ceux qui disent qu'il est
 l'appuy de la France, nous font apprehender sa
 cheute. L'Historien se rend soigneux de louer
 tous les parés du Cardinal: il dit que le *Sr du Plessis* Pag. 621.
Euesque de Mende, estoit vn personnage signalé en pieté,
science, eloquence, & zele ardent au service du Roy. Le

Mareschal d'Effiat s'estoit acquis dans peu de temps beaucoup de reputation dans les armes par son courage, dans le Conseil par son bon iugement, dans les Ambassades par son adresse, dans la Surintendence des Finances par sa vigilance, prudence, & bonne conduite. Je laisse toutes ces recommandations ineptes, que l'Historien donne à tous ceux qu'il a voulu gratifier pour plaire au Cardinal: ie ne veux point contester sur le merite de ceux qui sont loüez, ni sur la verité des choses: mais i'assure que l'Historien est vn impertinent, s'il se persuade que nous tiendrons des hommes pour grands personages, lors qu'il leur aura donné beaucoup de titres d'honneur, sans nous faire voir les actions desquelles vn sage Lecteur les tirera plustost que des figures d'un Escriptuain, qui ne sçait pas seulement flatter avec des belles paroles.

Page 491. Je m'assure, que la modestie du Roy n'approuuera pas qu'en son viuant on face les procez de sa canonization sur le rapport du sieur Bernard son Lecteur: nous auons cette obligation à Dieu, qu'il nous a donné vn Roy qui peut dire comme Salomon, *qu'il a esté partagé d'une bonne ame.* Si la Prouidence Diuine, qui luy a fait present de beaucoup de merueilles, luy a octroyé la grace des miracles, comme dit l'Historien; ie laisse iuger à tous les hommes sages, si durant la vie de S. M. il les faut loger dans son Histoire, & assurer, qu'outre le priuilege que le Roy a de guarir des escroüelles, il a fait *marcher les paralytiques, & parler les muets.* Ce n'est pas que nous ne voulions croire tout ce qui est à l'aduanage de nostre Prince: mais il me semble que cette pu-

lication deuoit estre differée, & qu'en son vivant elle pourroit estre soupçonnée de flatterie, encore qu'elle fust veritable.

Le sixiesme defect que ie rencontre dans l'Histoire de Dupleix, & le plus contraire à sa profession, est la menagerie; que ie distingueray en malicieuse & ignorante. Je sçay bien que Flavius Vopiscus a dit vray, lors qu'il assure qu'il n'y a pas vn Historien qui n'aye escrit quelque fausseté: il ne le faut pas reietter s'il est trompé par des mauuais memoires. C'est estre trop cruel d'appeller fabuleux en tout Iulius Capitolinus, parce qu'il l'est en certains endroits; & de dire que Procopius est entierement ridicule, parce qu'il a fait renuerfer vne armée des Goths par la flèche d'un soldat: ce qui est digne de reprehension, est vn manquement de fidelité, qui vient de malice ou de negligence. Celuy qui dans vne Histoire veut mentir impunément, doit escrire celle des siecles qui ont precedé le sien: ceux qui viennent de loin, nous font croire plus aisément ce qu'ils disent, que ceux qui racontent les merueilles d'un pays voisin. L'infidelité est si ordinaire à Dupleix, que sans passion on peut condamner tout son ouurage. I'en feray voir quelques eschantillons, & commenceray par les menageries qui partent d'un mauuais dessein. La plus criminelle de toutes les faussetez, est celle qui assure, que *Monsieur le Prince par le traité de Lodun fist reuoquer au Roy le serment solemnel fait en son Sacre*. Il y a difference entre vne reuocation, & la declaration, que le Roy fist, que par son serment il n'auoit pas entendu s'obliger à

VI.

Pag. 119.

- violier les Edits faits en faueur de ceux de la Religion pretendue reformee. Il escrit aussi contre
- Pag. 149. la verité, qu'une partie des coffres de la Mareschal d'Ancre furent trouvez plains d'or, d'argent, de pier-
 reries & bagues : qu'en l'entreueu de Couliers la Roy-
 ne regnante prist la chaire de main droicte, & la Roy-
 ne sa Mere celle de la gauche : qu'en la desroute du
 Pont de Sé, ceux qu'il appelle rebelles y perdirent cinq
- Pag. 188. cens hommes, n'en estant pas mort deux cens. Il ad-
 iouste, que les sieurs de Nerestan & Desmarais, ayant
 esté bleffez du costé du Roy, le dernier mourut de ses
 blessures; cependant il est vray qu'ils y moururent
- Pag. 207 tous deux. Les remonstrances que Dupleix fait
 & 208. faire à la Royne par le Cardinal de Richelieu,
 pour la disposer à la paix d'Angoulesme & d'An-
 gers, sont de l'inuention de l'Historien, & tout
 à faict impertinentes : le Cardinal n'a iamais
 proposé que des considerations de petite finesse
 pour gagner le temps; non de solide iustice,
 pour tascher de le rendre meilleur. Il apporte
 vne plaisante cause de la mort du Cardinal de
- Pag. 254. Guise : il dit, que c'estoit pour auoir ben du vin clai-
 ret meslé avec du blanc au lieu d'eau, apres s'estre es-
 chauffé en vne attaque de saint Iean d'Angely. Il
 auoit la fièvre quarte depuis long-temps, & l'ar-
 deur du Soleil, qui fist boüillir son cerueau, fust
- Pag. 369 la vraye cause de sa mort. Pour gratifier le Car-
 dinal, & faire voir que son pere a esté fort consi-
 derable, il fait valoir la charge de grand Preuost
 iusques à vn point, qu'il la veut faire aller du pair
 avec celle de grand Maistre, assurant que celle
- Pag. 371. du Maire du Palais a esté diuisée en ces deux. Il
 & 372. nous veut faire croire, que la Royne a pris le Car-

Cardinal de Richelieu pour chef de son Conseil, pour les bonnes impressions que le feu Roy luy en auoit laissé. Il feint qu'avec ce grand Prince, le Cardinal du Perron, le Sr de Chasteauneuf le pere, & le President Ianin, ont esté Prophetes de l'aduancement du Cardinal, & il leur faict dire ce à quoy ils ne penserent iamais: mais il est plus vray, que le President Ianin dit à Angers de l'Euesque de Luçon, qu'il entroit dans les affaires en ignorant, & en sortiroit en furieux.

L'Historien escrit, que le Roy ordonna à Nantes Pag. 430
des gardes pour la seureté du Cardinal de Richelieu: mais il les auoit vn an deuant le vóyage. Il dit, que S. M. a augmenté les gardes du Cardinal à mesure que la malice & l'enuie se sont accrúes contre son Eminence. Disons avec plus de verité, que c'est à mesure qu'il a fait plus de violences. Il a cherché ses assurances lors qu'il les a ostées à tous les Grands, & qu'il a fait ou mal ou peur à tous les petits. Il attribuë la cause de la mort du Duc de Pag. 575
Savoie au déplaisir qu'il eust pour la prise de Saluces, & à la superstition qu'un Almanach luy auoit donné. La perte de Saluces, qui n'estoit point place forte ny importante, n'estoit pas capable de le faire mourir; & cet esprit genereux ne s'amusoit point aux predictions: les mauuaises affaires, la fatigue, & le Soleil du mois du Iuillet, ajouttez à son aage de soixante dix ans, tuerent ce Prince. Dupleix ne rapporte pas bien les pa- Pag. 610
roles que Monsieur dit au Cardinal dans sa maison: il ne les a apprises que sur le Pontneuf, ou de ceux qui ne luy ont pas voulu aduoier, que Monsieur blasma le Cardinal de manquement

Pag 671. de parole ; ou, pour mieux dire , Dupleix ne l'a pas ose escrire. l'ay remarqué que l'Historien a deguise trois ou quatre fois la verite en ce qui regarde l'enuoy des Medecins à Gand, où la Roine Mere du Roy estoit malade. Il est menteur

Pag 695. malicieux , quand il dit, que *Monsieur donna du mescontentement aux Espagnols lors qu'il ne fist point des feux de ioye comme la Roine sa Mere, pour le gain de la bataille de Nortlingen*. Cela ne pouuoit facher les Espagnols, Monsieur estant loge dans le Palais où les feux furent faits au dépens du Maître de la Maison : ceux que la Roine commanda qu'on fist deuant son logis, estoient pour le bien que cette victoire apportoit à la Religion, à l'Empereur son Cousin germain , au Roy Catholique son beau Fils , qui la nourrissoit , & à son petit Fils le Prince d'Espagne. L'interest du Roy ne paroissoit point en ce rencontre, encore que la folie du Cardinal eust precipité les Suédois à presenter la bataille. Les considerations de la Roine furent diuines & naturelles : l'Historien est ennemi de la Religion & de la raison ; lors qu'il semble vouloir blasmer cette action de S. M. Il n'est pas veritable , que le Marquis d'Aytona mit des corps de garde durât quelques nuits dans les ruës où il y auoit des François logez, ny qu'il fist prier Monsieur de les faire tenir dans leurs logis durant 3. ou 4. iours : la verité est que la prudence de Mr Rose President des Pays bas iugea qu'il estoit expedient de représenter à Monsieur , qu'il n'estoit pas à propos, que les gens courussent par les ruës le soir du feu de ioye. Ce sage Ministre auoit peur qu'un mauuai

Pag 695.

rencontre ne produisit quelque querelle dans l'excez de l'allegresse du peuple, & indiscretion de ceux qui se picquoient de paroistre bôs François parmy les Espagnols, & qui faisoient voir qu'ils estoient marris de cette victoire. Cela ne hasta pas la retraicte de Monsieur, comme Dupleix a dit: la resolution estant desia prise, on n'attendoit que l'ordre du Cardinal de Richelieu pour le iour du depart: & ce dessein, qui estoit bien cogneu, ne fut pas rompu pour le respect qu'on portoit à Monsieur. Je peux aussi asseurer, qu'apres cette retraicte le Pere de Chantelou ne fut point rebuté comme imposteur par les Espagnols, ainsi que l'Historien l'escrit: au contraire ils recogneurent, qu'il leur auoit predict ce qui arriva, & auoit descouuert ce qui se traitoit. Dupleix tesmoigne son ignorance, & ensemble sa malice, en ce qui regarde le differet pour l'hommage de la Duché de Bar. Le Duc de Lorraine n'a iamais refusé de le rendre: la difficulté estoit pour Madame de Lorraine, à laquelle on demandoit l'hommage pour nuire aux pretentions de son mary. Cette question est trop longue, les menneries de Dupleix le sont encore d'auantage. Laissons la plus grande partie des malicieuses, & venons à celles qui viennent de son ignorance, ou paresseuse ou precipitée.

Estre aueuglé & vouloir courir, sont deux moyens pour broncher souuent. Dupleix a les yeux creuez par l'interest qui l'a fait haster pour rendre promptement vn ouurage, duquel il attendoit vne recompense qu'il craignoit que le temps ne luy ostast: de là vient le se prierme des-

faut que j'ay remarqué en s'œuvre. Je l'appelle mensonge à faute de soin. L'Historien, sur tout le Chrestien, doit estre religieux : il se souviendra qu'il escrit pour l'éternité : il sera instruit en la Cosmographie, pour ne manquer point en la situation & assiette des Pays & des places. Je ne luy demande pas le soin de l'Empereur Adrian, qui vouloit voir tous les lieux qu'on luy descriuoit : mais il en doit estre assuré, & sur tout des choses qui se sont passées : il ne les apprendra pas d'un homme seul, mais de plusieurs qui ne seront ny passionnez, ny interessez. Il feroit expedient que l'Historien d'un Roy fust tousiours à sa suite, ou dans les principales armées, si le Prince n'y est pas ; ou qu'il fust Secrétaire d'Estat, ou employé dans les Ambassades. Je feray voir que Dupleix n'a point eu toutes ces preuoyances ny ces aduantages, qui eussent conserué à tous les hommes la verité, & à l'auteur la reputation. Je ne diray rien qu'une partie de ce qui est venu à ma cognoissance : & m'assure, que si j'auois recueilly tout ce que plusieurs braves hommes, qui ont esté dans les occasions ou dans les affaires, ont remarqué, ie cotterois à l'Historien autant de mensonges comme il y a des pages dans son Volume.

Pag. 21. Il dit, que *l'Archeuesque de Treues est le premier Elekteur de l'Empire* : c'est celuy de Mayence. Il a escrit que le President de Harlay fist la remonstrance au Roy l'an mil six cens quinze, sur les pretendus abus qui auoient esté commis durant sa Minorité : il se trompe, c'estoit le President de Verdun ; & Monsieur de Harlay estoit hors du Parlement

Parlement deux ans auparavant.

Il dit, que *Barbin estoit Contreroleur general de la Maison de la Royne Mere du Roy* : il ne l'a iamaï esté, & en ce temps-là cette charge n'estoit point encore erigée. Pag. 142

Il dit, que le fils du Mareschal d'Ancre fust donné en garde au Comte de Fiesque: c'estoit vn nommé Fiasque, qui n'estoit point d'une condition si releuée: il auoit esté aduancé par le Mareschal, & apres se declara son ennemy. Pag. 142

Il dit, que le Mareschal d'Ancre fut tué le iour de saint Marc, & que les sieurs d'Ornano & de Preaux furent enuoyez par le Roy au Parlement, pour luy en apporter la nouuelle, & qu'il estoit assemblé extraordinairement. Cette mort arriva la veille de saint Marc, qui estoit vn Lundy ordinaire, iour ouurier, & d'assemblée. Pag. 150

Il fait ouyr de grands tonnerres du canon au pont de Sé, & en fait prendre trois: il y en auoit que deux, qui ne tirerent qu'un coup chacun. Pag. 151

Il dit que le Vicomte de Betancourt fut blessé d'un coup de picque dans les cuisses: ie croy qu'il veut représenter ce braue homme comme fuyant, mais il eut le bras cassé d'un coup de picque en résistant, & le Marquis de Neste le porta par terre. Pag. 151

Il appelle le Duc de Luxembourg *Colonnel des cheuaux legers du Roy*: il confond cette charge avec celle de Lieutenant de la compagnie des cheuaux legers du Roy. Pag. 151

La mesme iustice qui ne veut pas que nous souffrions les calomnies contre la Royne Mere

pag. 335. du Roy, nous porte à reietter les loüanges fauf-
ses qu'on luy donne: l'Historien dit, que la Roï-
ne Mere du Roy donna ordre à Paris avec le
Chancelier de Sillery aux leuées qu'on fist pour
s'oposer au Comte de Mansfelt. La Royne Mere
du Roy estoit en ce temps là à Pougues; & la
Royne Regnante contribua ses soings pour em-
pescher que ce soldat de fortune n'entreprist
rien contre la France.

pag. 386. Il dit que l'Isle de Narmoustier où se retira le
sieur de Beaumarchais, appartient au Mareschal
de Vitry son gendre: elle est au Marquis de Nar-
moustier, fils du premier liêt de la femme du
Mareschal.

Au mesme lieu il dit, que le Mareschal d'Or-
nano fut donné pour gouuerneur à Monsieur, au
lieu du St de Breues; auquel auoit succédé le
Comte de Lude, duquel l'Historien n'a rien dit.

pag. 386. Le Baron de Guepré n'estoit pas Soullieutenât
de la cōpagnie des gend'armes de la Roine Mere
du Roy, lors qu'on attaqua les Anglois dans Rhé,
comme Dupleix assure, il n'estoit qu'Enseigne.

pag. 387. Il veut faire passer le Sr de Marillac de Lan-
guedoc pour Lieutenant des gardes du Duc de
Vantadour: il estoit Guidon de sa compagnie des
gend'armes.

pag. 313. Il dit, que le Roy receut l'extrême Onction
en sa maladie de Lyon: ce qui n'est pas, mais on
fust sur le point de la luy donner.

Nous pouuons mettre dans le rang des negli-
gences de l'Auteur les changemens des noms,
qu'il n'a pas este soigneux d'apprendre: comme
pag. 313. lors qu'il met pour Malisby, tantost Malzic, tan-
& 336.

roist *Maleſie* ; ou pour *Boyer de Prouence* , en deux endroits *Royer* : *Varigneraillè* , pour *Varignernille* : qu'il confond la *Coſte* avec la *Cote* : de *Meaux* & de *Mus* , la *Roque Naſſant* , pour *Maſſebœnf* ; & autres en grand nombre, qui font voir que l'Auteur n'a point eſté curieux de ſe bien informer des noms de beaucoup de braues hommes, qu'il a deſobligez contre ſon intention : ie laiſſe à deſcouvrir mille autres fauſſetez & deſguiſemens de verité par ceux qui ont eſté dans les actions que *Dupleix* a deſcrit.

Quelques Autheurs ont creu, qu'un Historien VIII.
deuoit eſtre ſçauant en la Jurisprudence , parce qu'il faut rouiſſours ioincre les faits avec les droits. *Dupleix* fait profeſſion de cette ſcience, qui marque en ſon nom deux vertus, qui ne ſe peuuent ſeparer, la Juſtice & la Prudence. L'Historien n'a point la premiere : nous l'auons fait voir en ſes calomnies, flatteries, & menſonges. Comment pourroit eſtre iuſte celuy qui donne les louanges aux vices, & les blaſmes à la vertu ? Il fait voir qu'il n'a point de prudence , lors qu'il a aduancé beaucoup de choſes qu'il deuoit taire. Apportons quelques preuues : entre pluſieurs, la principale a eſté d'eſcrire l'Histoire du Cardinal de Richelieu , qui n'eſt pas acheuée ; de laquelle il faudra iuger par ſa fin, qui peut-eſtre obligera à changer de diſcours, ou à ſe deſdire honteuſement : ce qui eſt arriué depuis vn an , nous en donne de grandes apparences. L'Empereur *Pſcenninus* , ſurnommé le Noir , dit à vn Orateur qui luy preſentoit vn Panegyrique , qu'il deuoit eſcrire les

louanges d'Annibal, ou de quelque autre grand Capitaine, parce qu'il ne falloit iamais louer ceux qu'on craint, ou desquels on espere. C'est aussi vne extrême folie de mesdire des affligez dans la France, qui est vn pays où les changemens assez frequens remettent aisément en credit les miserables, & leur donnent la despoüille de ceux qui les ont persecutez. Dupleix se trompe, s'il croit que le Cardinal de Richelieu a trouué ce clou de diamant, que tous les heureux ont cherché: cette rouë que nous nous donnons à la fortune, est conduite par celles des Cieux; c'est à dire, par les ressorts de la Prouidence, qui ne peuvent estre arrestez par la prudence, ny rompus par la puissance des hommes.

Le respect que nous portons au Roy, fera que nous ne dirons rien du plus impertinent de tous les discours de Dupleix, qui est en la page 170. où il parle de la consommation du Mariage du Roy: si la iustice doit chastier l'Escrivain pour ses crimes, il merite pour les sottises qu'il a dit en cet endroit d'estre berné par les valets de pied de S. M.

Il me semble aussi que l'Historien n'est pas sage, de dire que *Henry III. communiqua au Pere du Cardinal de Richelieu le dessein du massacre de Blois*: cela feroit iuger à Messieurs de Guise, que la haine contre leur Maison est hereditaire à celle de Richelieu. Si le Cheualier de Guise viuoit, ce discours seroit demeuré dans la plume de l'Escriuan.

Son imprudence paroist plus grande, lors qu'il assure que *Sainneterre, le mîstier du cabinet du*

Roy auoit osé penser aux moyens de proposer au Roy la repudiation de la Royne son Epouse ; & que ce crime horrible n'auoit esté puny que d'un bannissement de la Cour : ceux qui auoient voulu empescher le Mariage de Monsieur , ayant esté emprisonnez & chastiez plus seuerement : cela ne deuoit point paroistre dans vne Histoire de ce temps , où la hardiesse d'un petit valet deuoit estre punie plus rigoureusement.

De la mesme source d'imprudence vient le long discours que Dupleix a fait pour monstrier que les trois Mariages de mes Dames Filles de France n'ont produit que du mal à l'Estat : ce qui offense deux grands Roys , & vn grand Prince. La mauuaise conduite du Cardinal de Richelieu a esmeu contre nous tantost l'un, tantost l'autre. Deuant son credit les trois Beaux freres du Roy ont vescu avec S.M. comme bons amis & alliez ; principalement tant que la Royne leur Mere a eu quelque credit. Pag 448

La prudence deuoit conseiller à l'Historien de ne publier pas si clairement , comme il fait , la tromperie que le Sr de Guron fist à Dom Gonzales de Cordoia , pour entrer dans Casal comme Ambassadeur de Paix , & se porter aussi tost en ministre de guerre. Pag 512

La sottise de l'Escriuain fait grand tort à la reputation du Cardinal de Richelieu, lors qu'il appelle le Comte Vrbain de Scalingue, Gouverneur de Pignerol, *homme lasche, qui n'auoit pas sceu resister*. Les autres flateurs du Cardinal nous auoient fait valloir cette conqueste comme vn exploit heroïque : cestui-cy fait voir qu'on ne

peut acquerir beaucoup de loüange, en prenant vne place qu'un Capitaine n'a sceu ny deffendre ny vendre. Pour faire paroistre Achille bien vaillant, il ne luy faut point donner pour ennemy Therfite.

Mais il me semble que l'imprudence de l'Historien passe iusques à la temerité, lors qu'il se monstre si partial contre le Mariage de Monseigneur le Duc d'Orleans avec Madame Marguerite de Lorraine, qui est vne des plus belles & des plus vertueuses Princesses de la Chrestienté; & de laquelle nous pouons dire ce que Platon disoit de Carmides, que celuy qui verroit la beauté de son ame, mespriseroit celle de son corps. Les Euesques & Docteurs qui ont esté consultez sur le suiet de son Mariage, peuuent trouuer quelque excuse ou interpretation, qui ne manque iamais à ceux qui ont bon esprit & mauuaise ame. Mais que peut alleguer pour sa deffence vn homme qui condamne nettement ce Mariage, qu'il appelle *Clandestin, & vray rapt*, ce que ny le Roy, ny son Conseil, ny les Docteurs ne disent plus, apres auoir esté bien informez par la declaration de Monsieur; il n'y a que Dupleix qui demeure en cette opinion.

Pag. 69.

IX.

Ces imprudences peuuent prouenir de malice: en voicy qui n'ont point d'autre source que l'imbecillité de l'esprit, qui leur fait donner le nom de niaiseries. Les entrées des temples doiuent estre releuées: il faut faire en sorte que celles d'une Histoire, qui est sacrée, le soient aussi. Dupleix n'a point observé cette regle, lors qu'il

Pag. 71. commence ainsi: Les Roys sont mortels en France

comme ailleurs (voilà vne grande nouuelle) mais pourtant la Monarchie Françoisse n'est iamais en Anarchie. Il est vray qu'une Monarchie n'est iamais Anarchie: c'est à dire, vn n'est iamais plusieurs, ny l'vnité confusion: voilà des belles sentences. L'Historien se rend ridicule, lors qu'il dit, que le Cardinal en sa ieunesse deuint malade par vne grande euacuation des esprits animaux: ce qui prouenoit de l'estude. Je croy que ce pauvre homme veut prouuer que le Cardinal n'est point beste, tous ses esprits animaux s'estans euaporez. Avec pareille adresse d'esprit Dupleix dit, qu'estant allé voir le champ de bataille où le Duc de Montmorency fut pris, il y remarqua le giste du cheual du Duc, & de celui du Comte de Rieux. Voilà vne iolie curiosité d'un grand Historien, & le mot de giste, qui ne se dit que des lièvres, qui est bien employé en cet endroit. Il nous appreste vn grand sujet de rire, lors qu'il rapporte l'arrest donné contre l'Euesque d'Alby: il dit que ce Prelat fust condamné à estre priué de son benefice, & déclaré incapable d'en posseder d'autres à l'aduenir: mais que le Roy comme Fils aîné de l'Eglise, en consideration de la dignité d'Euesque & successeur des Apostres, a agréé qu'il fust enfermé dans vn Monastere, pour y manger le pain de douleur, boire l'eau d'affliction, & pleurer son crime. L'Historien est si plaisant, qu'il nous veut faire passer cette peine imaginaire, pour vne grace que S.M. auroit fait à l'Euesque.

Pag. 637.

Pag. 644.

Je croiray tousiours que c'est plustost par sottise, que par malice, que Dupleix met souuent les noms du Roy & du Cardinal ensemble, à la mode des flatteurs de nostre siecle: mais ie

Pag. 345.

Pag. 693. n'auois pas veu qu'un autre eust dit deuant luy.
 Et dit que La Royne & le Cardinal sont regalez à Cadillac:
 Monsieur c'est la faire aller du pair ; & ce mot de regaler
 fust regaie n'est pas bien logé pour vne Royne. Il est aussi
 par le mal aduisé, quand il assure, que Ganelon, qu'il
 Cardinal appelle le plus insigne traistre que les Romans, &
 Duc. mesmes les Historiens ayent remarqué en France, estoit
 Pag. 652. un Prestre Euesque d'Eureux: il n'y a point de doute
 que ce discours ne soit vne digression faite hors
 de propos, pour monstrier, dit-il, que le Duc de
 Montmorency n'estoit point descendu de luy. Il ne deuoit point dire ce qu'il ne sçait pas bien
 de la qualiré de cet homme, & n'a pas pris garde
 qu'il fournissoit vne mauuaise pensee à beau-
 coup de personnes, qui croiront que ce pretendu
 Prelat n'a pas esté le plus malin qui soit dans
 l'Histoire de France, puis qu'elle a esté conduite
 par Dupleix iusques à l'an 1634.

Il vse de deux façons de parler bien plaisan-
 tes: la premiere, lors qu'il dit, que le Sr. de Gordes
 Pag. 656. fist commandement au Garde des Seaux de Chasteau-
 neuf de s'en aller à Ruffec, sous la conduite de cinquante
 cheuaux legers, qui sur le chemin receurent ordre de le
 conduire à la citadelle d'Angoulesme. Qui a iamais
 ouy dire, qu'on commande à vn homme d'aller
 là où cinquante maistres le menent par force: La
 seconde façon de parler de ce graue Historien
 Pag. 672. est lors qu'il dit, que le Sr de Hauterive ayant eu le
 vent de la defauur de son frere, fist un tron à la nuict.
 Il ne voit pas aussi la mauuaise application qu'on
 peut faire sur la prise de ce loup, qu'il appelle
 carnassier au groin pointu & roux, ou rouge, qui fist
 armer tant de peuple sous la conduite du Comte de

la Saize, pour en deffaire le pays voisin de la forest d'Eureux. Il parle en termes fort ciuils de Monsieur, lors qu'il dit, qu'il vint de Blois ou d'Orleans à Paris, pour visiter Puylaurens, qui s'estoit vn peu bleßé à l'espaule par le renuersement de son carrosse, & que de là Monsieur prist occasion d'aller voir le Roy à saint Germain. Sans doute ce Prince, qui a bon esprit, n'aduouera pas ces mots prist occasion, qui ne ressentent pas son parfaict courtois. Je serois estimé vn trop rigoureux censeur, si ie remarquois cent autres passages qui font voir le petit iugement de Dupleix dans l'eslection des choses: il ne paroist pas plus grand dans le chois des paroles: celles-là doiuent estre vrâyes, & celles-cy belles, avec cette difference, qu'un Historien grossier sera Historien, mais il perdra son nom, s'il est menteur: il faut pour bien faire qu'il soit fidelle comme les anciens, & qu'il parle comme les modernes. Dupleix faict le contraire: car il est corrompu comme vn homme de ce temps, & parle comme vn homme du temps passé.

On iaisse à la posterité la memoire des belles actions des Roys, ou par les escrits, ou par les peintures: comme ceux-là sont des peintures parlantes, celles-cy sont des liures muets. Ces deux moyens, pour rendre immortels les hommes vertueux, ont beaucoup de rapport: vn des principaux est, que tout ainsi que la beauté de la peinture consiste dans le traict & dans le colory, la bonté de l'escrit doit estre iugée par l'ordre & par les paroles. Je ne suis pas d'aduis qu'on recherche trop curieusement les beaux mots

Pag. 13.

105. 136.

148. 171

176. 333.

355. 690.

l'Histoire est vne matrone chaste & sage, qui ne veut point de fard: l'Eloquence causeuse est indigne de cette venerable Dame; mais l'Elegance nette & polie est bien seante à sa grauité, & tesmoigne qu'elle a esté esleuée avec grand soin, & en fille de bonne maison. Dupleix me pardonnera, si ie dis hardiment que la sienne n'a pas cette marque: il n'est pas possible de le croire, lors qu'on luy entend dire, *femelle pour fille ou femme*: qu'il se sert de ces mots, *violentement, elochemens, enfondremens, inconcussement, tourbe pour troupe, aqua reparts, salie pour sortie, Choraque pour maistre de musique*. Il se sert souuent du mot *aucla*, pour dire *accourut*, ou *vin* en diligence, & d'*impieux* pour *impie*, *translué* pour *transporté*. Je laisse vn grand nombre de paroles des vieux Romans, & beaucoup d'autres qui estoient en vsage il y a cinquante ans, ou qui sont de la rude inuention d'un pedan, qui a esté barbare à son siecle, duquel il n'a pas sceu le langage: il le deuoit apprendre, ou prier quelque homme plus poli que luy, de passer la lime douce sur ses escrits. Je ne diray rien de l'inegalité de son stile, ny de ce qu'on remarque aisement, que les deux descriptions des batailles nauales sont faites par vne plume mieux taillée que la sienne. Il parle des autres combats, & de tous les sieges, comme vn goujat qui auroit veu les choses en confusion, ou comme vn soldat qui venteroit son parti dans vn cabaret.

XI.

Il doit estre accusé de n'auoir pas sceu que la briueté est vne des plus belles qualitez de l'Histoire: ce n'est pas que celle de Dupleix n'aye peu

estre plus longue, s'il eust sceu ce qu'il a ignoré, ou s'il eust voulu escrire ce qu'il a sceu. On disoit de celle de Tite-Liue qu'elle seroit courte si on ostoit les harangues : on peut aussi assurer, que si les articles des Lignes les Traictez & declarations n'estoient point dans le grand volume de Dupleix, si on effaçoit les iniures, loüanges, importunes digressions d'un pauvre discoureur, la genealogie du Cardinal de Richelieu, la vie de ses predecesseurs, les panegyriques, les inuectiues contre les ennemis, & mille pieces de mauuaise & basse estoffe : ce qui resteroit digne de la vraye Histoire, seroit fort peu de chose : mais il falloit payer d'un gros ouurage, pour auoir vne grosse recompense, & faire dire que l'ouurier auoit bien trauaillé.

Je ne dis pas, que s'il eust esté bien instruit, ou qu'il eust voulu dire beaucoup de veritez, il n'eust peu faire vn Liure encore plus grand que le sien : il le falloit remplir des bonnes actions du Roy, des negotiations secretes du Cardinal, des intrigues du Pere Ioseph, des memoires & instructions qu'il a dressé, des conseils qu'il a donné, des intelligences chimeriques qu'il a eu, des Agens qu'il a enuoyé, des practiques qu'il a fait dedans & dehors le Royaume, des vrayes motifs des resolutions, du mouuement particulier des affaires qui se sont passées durant ce regne, qui a plus produit de changemens que les trois precedens. Sans doute l'Historien eust fait vn volume bien espais, si le Cardinal de Richelieu & le P. Ioseph, ou leurs Secretaires, l'eussent aidé de tout ce qu'ils sçauent : mais il faut auouer, que Du-

pleix, hors de ce que le Cardinal luy a dicté contre la Royne, n'a sceu que les nouvelles de la basse cour, ou des Mercurès qu'il blasme, ou des Gazettes qu'il ne blasme pas.

Nous auons donc sujet d'asseurer, que le douzième défaut de cet Escriuain est, d'auoir ignoré ou caché ce qu'il deuoit escrire, pour escrire ce qu'il deuoit ignorer ou cacher : ces deux fautes sont esgales en vn Historien, qui est autant criminel en couurant la verité, comme en publiant le menfonge ; & qui est ou mal instruit ou meschant, s'il ne dit pas les choses qui sont cognues de plusieurs, ou qui sont estimées grandes par les plus sages. Je diray de Dupleix ce que Theocrite disoit d'un Poète impertinent, que ce qu'il n'a pas escrit me plaist d'auantage que ce qu'il a escrit. Si ie luy cottois tous les conseils, resolutions, exploicts, actions, & affaires remarquables qu'il a oublié, ie ferois l'Histoire qu'il a deu faire, pour conseruer sa qualité d'Historiographe du Roy, & gagner ses appointemens. Je me contenteray de dire quelques manquemens que ie trouue estranges, parce qu'ils choquent la cognoissance & les sentimens de toute la France. Pourquoy n'a-il rien dit des resolutions que la Royne Mere du Roy prist au commencement de sa Regence, du bon ordre qu'elle mit dans le Royaume, des assistances qu'elle donna aux Alliez, des magnificences faites pour les deux Mariages, du superbe Palais de Luxembourg, le plus rare ornement de la Ville de Paris, des fontaines d'Argueil, du cours bordé de beaux arbres, & autres embellisse-

mens que S. M. y a adiousté pour la commodité & diuertissement de la Cour, & du peuple; des fondations que sa pieté a faict, & de ses soins, pour empescher que les estrangers ne troublasent la France durant le siege de la Rochelle? Tout ce que l'Historien met en la place de ses grandes actions; sont l'aduancement du Marechal d'Ancre, & des aigreurs pretenduës contre le Cardinal de Richelieu. Il a oublié, ou il n'a rien voulu dire des beaux exploicts que le Marechal de Themines a faict en Languedoc, & n'a touché qu'en passant ceux du Duc de Montmorency. Il a aussi grand tort, puis qu'il se mesloit de faire les eloges de la plus grande partie des personnes de condition qui sont morte sous ce Règne, de n'auoir rien dit du Duc de Mayenne le pere, contre lequel il paroist passionné; ny du Connestable de Montmorency, duquel il ne faict aucune mention, non plus que du trespas du Garde des seaux de Marillac, ny de la balle de mousquet qui entra par la fenestre de sa chambre, & perça son liët; ny de ses derniers propos, ny de la contestation pour sa sepulture. Il ne deuoit pas oublier ce qui se passa en l'instruction du procez, condamnation & execution du Marechal son frere, en la prononcia-tion de l'Arrest, en la conduite en Greue, en son testament, & en son enterrement, duquel il ordonna: il deuoit dire comme il recomman-da aux siens de bien seruir le Roy, & pria Dieu pour ceux qui le faisoient mourir. Il me semble que ces bons exemples ne deuroient pas estre desrobés à la posterité: mais ils ne plaisent

pas à ceux , auxquels l'Historien veut agréer.
 Pourquoi ne dit il pas la belle action que fist le
 Baron de Bussi Lamet dans l'isle de Rhé , où il
 chargea le premier les Anglois : & pour quelle
 raison ne fait il point de mention de ce gene-
 reux Comte de Vauvert , frere du Duc de Van-
 tadour , qui fust tué en la bataille nauale, que son
 oncle le Duc de Montmorency gagna contre
 les Rochelois ? le ne veux pas icy faire l'Aduo-
 cat de cent grands Seigneurs , & de mille braues
 Gentilhommes François , qui ont droit de se
 plaindre, ou leurs amis pour eux, d'un Historien
 qui leur desrobe l'honneur, qu'ils ont acquis
 avec la perte ou de leurs vies , ou de leur sang,
 ou de leurs biens. Dupleix donne la gloire aux
 parens & seruiteurs du Cardinal de Richelieu,
 pour la raur à ceux qui n'ont pas esté en ses bon-
 nes graces, ou dans son alliance, ou dans ses in-
 terests : ceux de l'Historien ont conduit sa plu-
 me ; lors qu'on les descouurira, on ne s'estonne-
 ra plus de ce qu'il a chanté les louanges du Car-
 dinal , & les blasmes de ceux qu'il a creu estre
 ses ennemis. Le petit peuple de Romé regardoit
 avec admiration ces Tritons , qui estoient au
 dessus du temple de Saturne , parce que les co-
 quilles, qu'ils embouchoient, faisoient vn grand
 bruit sans tons reglez , & sans mesures de musi-
 que. L'estonnement cessa, lors qu'on descouurit,
 que le vent qui venoit de la terre, entroit dans
 ces statuës par la queue , & remplissoit leurs
 trompes. Celuy qui a enflé le poulmon & la
 bouche de Dupleix, est vn vent terrestre d'aua-
 rice, qui luy fait corner sans methode & sans art

Macro-
 libro 1.
 Satur.
 cap. 8.

tout ce qui a blessé nos oreilles, & offensé nos esprits.

Après avoir prouvé qu'il n'a aucune bonne qualité d'Historien: ie suis obligé par la charité Chrestienne, de tesmoigner la compassion que ie porte à cet homme, & le desplaisir que ie recois du peu d'esperance que son aage avancé me donne de son amandement. Je voudrois avoir travaillé pour le corriger, & proteste que mon dessein n'a jamais esté de le deshonnorer. Je suis obligé de rendre la gloire à Dieu, en disant la verité pour la modestie de l'Innocence, contre l'effronterie de l'Ingratitude. Je suis marri que ce vice aye tellement deshonné le Cardinal de Richelieu, qu'il semble que l'esclat de ses dignitez, de ses biens, & de toutes les actions qu'il peut avoir fait, ne sont que pour faire voir plus clairement cette vilaine tache. Dupleix la rend plus sale, & se fallit luy mesme en la voulant laver. Il a désiré d'estre l'Historien du temps favorable; mais il ne sera jamais celuy de la venerable antiquité: son escrit passera avec la saison qui court, & rien ne demeurera que son infamie: il a flatté le Cardinal en singe, c'est à dire, en tremblant; & en chien, c'est à dire, en demandant. La cholere troubloit le cerneau de celuy qui luy donnoit des memoires, & l'avarice corrompoit le cœur de celuy qui les recevoit: si elle luy a fait croire que la fortune du Cardinal seroit de diamans, nous esperons que Dieu fera voir qu'elle n'est que de verre: si le Cardinal la vouloit conserver & rendre belle, il devoit montrer son courage aux estrangers, sa vertu

aux François, & sa prudence par tout : mais il a fait voir sa malice aux voisins, sa violence aux sujets du Roy, & toute la terre remarque desia sa folie. Ce qui l'a rendu plus insolent & plus cruel sur le theatre de la France, est, que ce Comedien tragique s'est persuadé, qu'on souffriroit vne partie de ce qu'il disoit & faisoit, à cause de son nom & de son habit. Avec toutes ces imperfections reconnues à present par toute l'Europe, son Historien en fait vn Dieu. Pour nous faire peur, il le peint avec le foudre, comme Apelles peignit Alexandre : mais s'il rencontre iamais vn Lyssippus, il luy mettra vn flambeau noir en la main, afin qu'il aye la vraye marque de ce qu'il a faict. Il ne laisse pas d'estre estimé par quelques ignorans, & corrompus : ce qui est plus extraordinaire, est, qu'il est si heureux, que nous voyôs, parmi les estrangers qu'il a offenzés, quelques personnes qui disent, qu'il seroit expedient pour la France qu'il ne mourut iamais : mais le nombre est bien plus grand de ceux qui assurent, que ce beau & grand Royaume seroit heureux, si cét homme n'y estoit iamais nay. Je sçay bien que la plume de Dupleix n'escrira point cela : mais ie crois qu'à present son cœur le confesse : ie iuge encore par ses escri's, qu'il les eust remplis de beaucoup plus d'iniures & de loüanges, si on luy eust donné d'auantage : luy & ses compagnons en ont dit assez, pour nous contraindre d'aduouer avec grand regret, qu'il y a des François qui sont plus flatteurs & calomnieux, que n'estoient anciennement les Siciliens & les Grecs. Ces Escriuains, & leur Macenas

peuuent

peuvent auoit eu quelque plaisir , en dressant & escoutant les ouurages que nous auons veus : mais ie tiens pour tout certain , qu'ils prendront ce contentement en lisant nos responses. Ie ne me peux imaginer, qu'on nous oblige à en fournir d'autres pour la Royne Mere du Roy : nous n'en escrivons plus aussi , à cause que son Innocence se voit desia dans les actions du Cardinal, & sera cogneuë plus clairement par la fin de son persecuteur. Les passages de sa fortune , qui se verront dans toutes les parties de l'Europe , & particulièrement en France , condamneront assez sa mauuaise conduite : l'histoire que nous luy preparons, ne fera autre chose que les monstrier. S'il estoit homme de bien, il diroit avec l'Empereur Othon, qu'il aime mienx quitter le gouvernement, que de le retenir avec le sang de tant de personnes : s'il estoit sage, il ne s'opiniastieroit pas pour conseruer ce qu'il ne peut garder, ny pour acquerir ce qu'il n'aura iamais, ny pour defaire ce qu'il ne peut ruiner. Il se veut maintenant dans la plus norable iniustice, qui est, de prendre ce qui ne luy appartient pas, d'entreprendre ce qu'il ne doit pas faire, de tyranniser son pays, de renuerser les loix, de violer sa foy, d'affliger ses Bien-facteurs, d'oster à ses ennemis la liberte de leurs personnes, & à ses amis la liberte de leurs conseils; de faire perir ceux-cy, pour se vanger de ceux là; de ne pouruoir pas aux moyens de conseruer la France, mais de se conseruer soy mesme. Il a interdit, & il interdira les plus gens de bien & les plus courageux du Parlement de Paris, dans lequel il ne veut laisser

que ceux que la corruption fera agir pour ses desseins, ou que la crainte empeschera de s'y opposer : il preuoit qu'on fera bien tost le procez ou à sa personne ou à la memoire, ce qui le porte à quereller les plus vermineux de ses iuges, afin que luy ou les siens puissent fournir des causes de recusation contre eux : il accompagne tant de mauuaises actions des maldifances, des mespris, des cruantez ; & en faisant tant de choses basses & infames, il veut estre loüé avec excez. Il ne voit pas que le temps esleue peu à peu les loüanges mediocres, fondées sur la verité, mais qu'il renuerse tout à coup les excessiues, qui sont dressées sur le mensonge. Les sages croient qu'on verra bien tost toutes ses finesses en desordre : parce que l'homme imprudent ne se demesse iamais bien de la mauuaise fortune lors qu'il l'a rencontrée.

Je veux finir, en rendant conte au Lecteur du tiltre de *Lumieres pour l'Histoire de France*, que j'ay donné à ce discours. Les anciens Grecs ont dit, que le Soleil en faisant sa course ordinaire historioit le monde : nos François appellent historié ce qui est peint de diuerses couleurs, comme nous voyons que le Soleil colore en plusieurs façons l'air, le dessus & le dedans de la terre. L'Histoire doit estre vne lumiere, qui doit esclairer tous les esprits avec les rayons de la verité, pour produire dans toutes les volontez l'amour de la vertu, & la haine du vice. Les bons Princes y recognoissent ce qu'ils font, & les meschans ce qu'ils deuroient faire : c'est vn thresor dans lequel les curieux cherchent & trouuent ce

qui a esté deuant leur vie, ou esloigné de leur
 veuë: les vertueux y rencontrent les exemples
 de leurs semblables, & les vicieux y voyent les
 coups des iugemens de Dieu sur les impies &
 cruels: ceux qui sont trompez par les mauuais
 impressions que les calomniateurs leur ont don-
 né des innocens, & par la bonne que les flatteurs
 ont voulu acquerir aux criminels, sont destrom-
 pez en faueur de l'Innocence, & au desauantage
 de la malice. En fin par le moyen de l'Histoire
 nous acquerôs l'experience des choses que nous
 n'auons pas veu; & nous deuenons sages deuant
 la vieillesse. Je proteste que mon flambeau du
 temps n'est allumé que pour ces vsages, qu'il
 n'est point puant en flatterie, ny fumant en cole-
 re, ny ardent pour brusler nos ennemis. Il fait
 voir l'esclat de la gloire de mon Prince, en des-
 fendunt celle de sa Naissance, & de ses inten-
 tions: si les nostres sont mal interpretées, nous
 appellerons du iugement des hommes à celuy
 du grand Dieu; deuant lequel nous esperons de
 rendre meilleur conte de nos responses, que le
 Cardinal de Richelieu ne fera de ses actions, &
 Dupleix de son Histoire. Je tremble pour luy,
 lors que ie lis dans le liure de Dieu, qu'il con-
 damne celuy, qui pour auoir du pain abandonne
 la deffence de la Verité, & ie dis en moy mesme,
 Quel chastiment ordonnera la Iustice Diuine à
 l'homme, qui pour faire meilleure chere a voulu
 combattre pour le mensonge?

Les discours d'une grande Lumiere de nostre
 siecle donneront le dernier esclat à nos Lumie-
 res. Iuste Lipsé en vne de ses lettres escrit à vn

* Petto
Diuzo.

fi en * amy en ces termes: Que l'Histoire perisse
plustost que de la voir remplie de flatteries, &
sottises. Vous sçavez que nous avons eu souuent
horreur en lisant les Historiens de nostre temps.
Parmy les anciens ie ne me souuiens iamais de
Velleius Paterculus sans entrer en colere: il
comble Seian de toute sorte de vertus & d'elo-
ges; comme s'il auoit entrepris de le loier sur vn
theatre avec des gestes de charlatan. O l'impu-
dent Escriuain! qui veut faire passer pour hom-
me de bien celuy que nous sçauons n'estre venu
au monde que pour le renuerser. Il estime ce
meschant, & couure par vn silence malicieux les
belles qualitez & bonnes actions de Germani-
cus. En fin il iouë le personnage d'un esclaue du
credit de la Cour. Vous me direz que la verité
n'estoit point en seureté durant ce temps là: mais
s'il ne vouloit point escrire les choses veritables,
rien ne l'obligeoit à escrire les fausses: on n'est
point persecuté pour se taire. Sans doute ceux
qui aimeront la sincerité, donneront vn sembla-
ble iugement sur le dernier ouurage de Scipion
Dupleix.

A R N O B I V S

LIBRO PRIMO.

*S*Ed cum scriptores nostri mendaciter ista prompse-
runt, extulere in immensum exigua gesta, & an-
gustas res satis ambizioso dilatante preconio.



LETTRE DE CHANGE PROTESTEE,

O V

*Responce à la lettre de Change de Iean
Sirmond, caché sous le nom de Sabin.*



Ne lettre de change signée par vn Marchand qui est sans credit, & sans biens, qui a fait banqueroute à la vertu, à l'honneur, à la raison, & au sens commun, ne doit point estre acceptée par vn homme riche en tout ce qui manque à ce saffranier: Celuy auquel on adresse cette lettre, est Prestre, & Docteur: il a les armes de l'Eglise, & de son estude: il doute s'il se doit seruir des premieres contre vn Escrivain qui paroist en tout son discours possédé du malin esprit. Si le calomniateur, & le diable, ne sont qu'un mesme nom, c'est encore trop peu d'appeller celuy qui calomnie, endiablé. Il semble qu'il faut employer contre luy les exorcismes de saint Leon, & prendre l'estole & l'eau

beniste, au lieu de la plume & de l'ancre : ainsi que fist nostre gentil Poëte Ronfard contre le Predicant heretique, qui auoit entrepris de censurer ses œuvres. Si les Theologiens ne iugent que Sabin Sr de Cleonuille doit estre traicté comme vn possédé : les Medecins seront d'aduis de le penser comme vn frenetique; & que pour l'arrester, il le faut garrotter avec tous les liens d'Hypocrat : Cardan ordonneroit qu'on luy tira quasi tout son sang; & cét autre qui deuant luy guarissoit les fols à Milan, le tremperoit iusques au col dans la mare de sa basse court. Il est vray qu'on nous escrit que cét homme contrefait le furieux, pour n'estre point chastié, & que pour oster de son col la corde d'un pendu, il prend les manottes d'un furieux : mais il l'est en effect, & i'en suis marry. Ceux qui le veulent excuser, disent que sa folie l'a changé en singe, qu'il ne sçait rien faire que sauteler, qu'il ne va iamais droict, qu'il mord, & qu'il fait rire.

Je confesse que ie l'ay flarté dans mon Nicocleon, parce que i'auois dessein de manier doucement son ame, que ie cognoissois fragile : ie le voulois corriger, l'empescher d'aller si viste, & le conseruer pour nous, ayant esperé qu'il condamneroit vn iour les actions du Cardinal de Richelieu : mais Dieu l'a voulu punir pour les auoir soustenuës.

Je sçay bien que ceux qui composent des liures pour ce Fauory, sont semblables aux habitants de Geneue, qui font des fifflets pour les pelerins de saint Claude : ils se moquent de leur ouvrage & de ceux qui l'acheteront. Ce qui me

fait iuger que Sabin est veritablement fol, est, qu'il rompt ses bandes, & iette quelques emplâstres que i'auois mis sur sa teste pour la rafraichir. Je ne l'ay point repris pour le deshonorer, mais pour l'enseigner, & mon dessein n'estoit pas de luy faire vne playe, mais de coudre celle que sa passion luy auoit faite.

Je l'auois loué de son stile (quoy qu'inégal) pour l'obliger à l'employer sur vn meilleur sujet : il reiette l'estime que ie fais de luy, & prend mes remedes pour des poisons. Il dit : *Cleonille est vn ingrat, il ne te sçait point de gré de l'honneur que tu luy fais : son opinion estant que tu n'escriis du tout rien qui vaille, il s'offence de ton approbation.* Quels efforts fera ce farieux lors qu'il sentira mon bistory & mon trepan, puis qu'il crie si haut lors que ie le rase & que ma main le flatte. Je proteste que ie ne m'offense non plus de ses discours, qu'un Medecin des iniures d'un enragé, ou un exorciste des blasphemés du demon : tout ce à quoy ie prédray garde, est, de n'approcher point de luy : i'ay beaucoup plus d'apprehension de ses dents que de sa langue, & de ses ongles que de sa plume : ie ne crains pas ses saillies, mais ses ruades : parce que ie sçay qu'il est du pays des mullets. Je n'auois rié dit contre sa vie & ses mœurs : ie n'ay point voulu prendre la peine de m'en informer. Je suis d'un naturel qui craint si fort les puanteurs, que ie ne veux iamais remuer des fumiers : si i'eusse touché sa personne, sans faute il se seroit deffaict, puis qu'il deuient frenetique lors que ie responds à son escrit, & par un iuste iugement il perd l'esprit, qui en a esté

Pag. 717.

Pouurier. l'aduouë que i'ay grande compassion de son ame, parce que ie ne crois point que la folie qui l'a mis hors du pouuoir d'offenser Dieu l'aye faisi en bon estat.

Il se deuoit imaginer que nous estions deux Aduocats qui plaidions l'vn contre l'autre ; & que i'auois raison de refuter ce qu'il auoit dit contre ma partie, puis que i'estois le deffendeur. Il prend le change que ie luy ay voulu donner pour destourner la rage qu'il exerçoit contre la Royne Mere du Roy : il quitte S. M. & se rue sur moy : il s'entortille comme le serpent Millet autour de mon corps : il me lie les bras, & portant sa teste sur mon cœur, il veut succer le sang de mon ame, qui est l'honneur. Il est vray qu'il ne dit rien contre mes mœurs. Mon seiour durant vingt & trois ans en la Cour, & les grands emplois que i'ay eu dans la ville capitale de la France, ne luy ont rienourny contre ma reputation : il va rechercher le seiour que i'ay fait en Auignon, il y a vingt-huict ans, croyant que la longueur du temps, & l'esloignement des lieux rendront plus difficiles les conuictions de ses impostures. Quand i'aurois esté criminel en ma ieunesse (ce qui n'est pas) ma vieillesse auroit prescrit mes crimes ; & ie ne rougirois plus pour les fautes que i'aurois effacé par la repentance. Il me reproche dix fois vn changement que i'ay peu & deu faire en conscience, & duquel i'ay rendu vn compte, qui a donné satisfaction aux plus scrupuleux. Il suffit de faire cognoistre que ie n'ay rien fait pour mener vne vie plus libre, & que i'ay plus seruy l'Eglise en

la condition que i'ay pris, que ie ne pouuois faire en celle que i'ay quitté. Les tesmoins de ce que i'escriis, sont, toute la Cour du Roy, celle de la Roynne sa Mere, ceux qui restent de celle de la feu Roynne Marguerite, & le plus grand Theatre de l'Europe, qui est la ville de Paris, qui ne m'a iamais veu que dans les actions d'esprit, de lettres d'honneur & de vertu. Je n'escriis point cecy pour me louer, mais pour faire voir au public la conduite d'une personne publique, qui ne veut point perdre la bonne opinion qu'il a meritée en seruant d'outil à la main de Dieu. Comme ie peux asseurer avec saint Paul, que *ie suis vn ouvrier qui ne peut estre confondu* : aussi veux-je dire avec ce Maistre des Predicateurs, que *i'aymerois mieux mourir que si on m'auoit rayé ma gloire* : ie ne la defends pas pour moy, mais pour Dieu qui est glorifié, lors que ceux qui instruisent de sa part, & exhortent les peuples, sont estimez gens de bien: comme son nom est blasphemé par les foibles, si les meschans scandalisent ceux qui annoncent sa sainte parole.

Sabin s' imagine de m'auoir iniurié, lors qu'il dit que i'ay esté *Curé de nostre Dame des Vertus*, apres de Paris. La charge, dans laquelle les Papes, les Cardinaux, & les Euesques ont esté esprouez durant quatorze cens ans, est infame dans cet esprit bien réglé. Il vse de ces paroles scandaleuses, que *ie vendis cette Cure*. Je la remis entre les mains de fen Mr Galemant, premier Directeur des Carmelines en France. Je ne peux auoir commis simonie qu'avec vn Saint, qui a fait tant de merueilles en sa vie, & tant de

miracles apres sa mort , qu'on parle de le beati-
fier. Ainsi pour me precipiter en Enfer , Sabin
veut arracher vn bien heureux du Paradis. La
verité est , que la Royne Marguerite de Valois
me tira de ce lieu , où le grand abord du peuple
faict des bruits qui sont ennemis du repos ne-
cessaire à vn homme de lettres. Le Cardinal de
Ioyeuse me fist commander par cette Princeesse
de remettre ce benefice entre les mains de Mr de
Galemant, qui auoit esté son grand Vicaire à Ro-
han : il le resigna bien tost apres aux Peres de
l'Oratoire , qui le possèdent encore , & sçauent
que ie n'en eus iamais recompense. Je peux
dire que ie trouuay cette Eglise de brique , &
que ie la laissay d'or : trois riches autels , le ba-
stiment de la Chappelle de la Vierge, la vaisselle
d'argent, les ornemens precieux, & le bon ordre
qui escarta la confusion , sont les ouurages de
deux de mes années. Tous les habitans qui m'y
ont veu, tesmoignent assez souuent par leurs
louanges & larmes , que la memoire de mon
nom est chez eux en benediction. Sabin dit aussi
que les bulles de l'Euesché de Toulon m'ont
esté refusees : il se trompe. Le Cardinal de Ri-
chelieu a peu les arrester par ses artifices , mais
non pas les faire refuser. Sa Sainteté est trop ius-
te pour me raur la recompense des seruices
que i'auois rendu vingt ans à l'Eglise : & le Roy
trop genereux, pour souffrir qu'on aye condam-
né sa nomination. Certaines personnes con-
tre les preceptes de charité se joignirent aux ap-
prehensions du Cardinal , qui me trauersoit :
mais la difficulté estoit leuée , lors que de moa

mouuement ie demanday au Roy qu'il me permit de choisir vn Euesque : ce que S. M. m'ostroya avec regret. Ie retins vne partie du reuenu : que la vengeance du Cardinal m'a osté, parce que i'ay deffendu la repuration de la Princesse qui luy en a donné cent fois d'auantage. Il n'est pas vray que sur ce rencontre le Cardinal Spada aye iamais veu mes larmes, ny que i'aye apperceu ses mocqueries : ie peux dire de son Eminence que i'ay admiré son bel esprit, & i'ose asseurer qu'il n'a pas mesprisé le mien. Pour le Cardinal de la Rochefoucaut, il a peu estre surpris par ceux qui ont eschauffé son grand zele : mais il ne fera iamais vne iniustice, estant vn des plus vertueux & des plus sages Princes de l'Eglise. Sabin est si malin qu'il veut rendre vn Cardinal mocqueur, & vn autre mal faisant pour deshonnorer vn Predicateur. Il dit qu'il a faict autrefois vn escrit contre vn Iesuite : cela, sans la correction, n'est pas veritable. Il me reproche que i'ay eu amitié avec des personnes de la Cour du Palais : il veut designer Mrs Seruin, Gillot, & Deriuau. Ie me glorifie d'auoir esté estimé par ces bons Gaulois, sçauans Magistrats & Iuges incorruptibles : il y deuoit adiouster, que i'ay esté familier à Mrs de Beauclerc Secrétaire d'Estat & Heroüard premier Medecin du Roy, qui estoient des hommes si vertueux, que la Cour ne les a peu corrompre dans cinquante ans. Ie ne sçay pas ce qu'il veut dire par ces amis de la place Royale qui font estat de mes œures : ie crois auoir des amis dans toutes les rues de Paris, depuis que i'ay preaché dans toutes les

Paroisses. Je n'ay point écrit pour estre loüé, mais pour dire la verité. Je sçay qu'elle est si agreable aux hommes, & que les affaires qui se passent en France ont rendu si sensible ce que ie descris, que j'auray plus d'approbateurs dans le cœur que Sabin que n'en aura dans la Cour. Ceux qui font semblant de priser ses escrits, sont les valets du temps, auquel ils prestent leur paroles; ceux qui estiment les miens, sont les amateurs de la vertu, à laquelle ils donnent les bons sentimens de leur ame. Sabin peut auoir pour sectateurs ces ardens de l'Academie Gazetique, qui esperent quelque aduancement par le credit du Cardinal. Les miens ont suiet de craindre ses violences, ce qui faiët cacher leurs pensées: les siens font des exclamations d'escoliers, lors qu'il leur recite ses liurets avec vn ton de pedan, & sont semblables aux apprentifs des boutiques qui font vne huée apres auoir ouy vn cry public faiët par vn tambour, ou par vn trompette. Ceux qui lisent mes liures, souspirent de voir la verité, contrainte de se cacher lors que le mensonge triomphe publiquement avec la tyrannie.

Pag. 713: Il dit aussi que mon *Nicoclean* a esté retiré d'*vn esgoust dans l'arné des mauuaises paroles*: où j'ay veu que le Cardinal a demeuré l'espace de trois ans. Sabin ne sçait pas que pres d'*vn esgoust* on a trouué quelquefois des bagues, & des escus. Le musc, la ciuette & le castorée sont tirez des plus sales parties de trois vilaines bestes; & l'ambregris conserue son pris & son odeur parmy la vase de la mer. Les fondateurs des Empires de

Perse & de Rome furent exposez aux loups : & ce grand Moÿse, qui a esté le Lieutenant de Dieu en la conduite de son peuple, fust ietté dans le Nil pour estre la proye des crocodiles. Sabin n'a jamais considéré, que tout ce qui est le plus précieux est couuert de la terre, & noyé dans la mer. Les premiers hommes croyoient, que la nature estoit semblable à vn petit Mercier qui estalle ce qu'il a de plus beau : ceux qui vindrent apres ouvriront son sein, ils y trouuerent l'or, & les diamans, quileur firent iuger, que ce qui paroissoit n'estoit qu'une monstre peinte, à comparaisson de ce qui estoit dans le magasin. Si Sabin auoit esté du temps des premiers Chrestiens, sans doute il auroit condamné leur religion, parce qu'ils estoient contraincts d'en cacher l'exercice. L'Imposture est vne debauchée qui leue la teste, & parle plus haut que la Verité, qui est vne Vierge fort honteuse, & tres-discrete. Sabin dit, que *nostre marchandise est vile, parce qu'on la baille pour rien.* A ce compte, la grace de Dieu, qu'il promet de donner gratuitement, doit estre mesprisée ; & il ne faut point faire estat des Sacrements, puis que c'est vn crime de les vendre. Nous achetons plus cherement les vanitez que les veritez, & on donne à meilleur marché le pain qui nous faict viure, que le poison qui nous tuë. La lumiere, le feu & l'eau sont des presens de la nature ; personne ne les a jamais vendus que les Tyrans. Pour monstrier à Sabin qu'il est mal aduertí ; si ses espions le seruoient fidelement, il apprendroit que quinze ou vingt fucilles de mes ceuures ont esté recherchées avec pe-

ril, & achetées sept ou huit pistolles: & il ne découvrira iamais que dans la liberté de vendre les siennes, on aye donné plus de cinq sols du plus gros liure qu'il aye faict.

• Je renouvelle ma protestation, que ie ne parle point à luy, non seulement parce que ie le iuge indigne de mon indignation: mais parce que la justice de Dieu l'a faict l'object de ma compassion. Il le confesse luy-mesme, lors qu'il dit qu'apres auoir leu ma response à son Aduertissement aux Prouinces, *il tomba malade, & demeura deux mois au lict, ce qui rompit le dessein que le Cardinal auoit de l'enuoyer en vn long voyage pour le seruice du Roy.* La vraye cause de la maladie, qui a rompu le col à son ambassade, & à sa fortune, vient de la folie que mes escrits luy donnerent: cela paroist en tout le discours que sa rage vomit, dans lequel nous recognoissons clairement qu'il a perdu les deux facultez qui nous distinguent des bestes, à sçauoir la memoire & l'entendement. Commençons par la premiere, & voyons que non seulement elle ne se souuiet point des choses passées, mais encore des presentes: il iure qu'il ne dira point d'injures, *parce qu'il n'employe pas volontiers cette mauuaise monnoye qui n'a cours que parmy des ignorans & imposteurs comme moy: en voila deux dans sa protestation.* Tout le reste est parsemé de ses fleurettes, *asne, goinfre, simoniaque enragé, tu seras pendu, tu seras mis en gallerie: tonse seulement; redresse ta moustache, ie m'en va faire ton profne le n'aurois pas escrit eccy, si i'eusse creu que cela ne t'eust point saché ie vous bien qu'en lisant tu n'as plus d'esprit, l'impatience t'emporte, & ta cholere*

Pag. 715.
& 716.

Pag. 716.

Commence à se tourner en fureur. Il repete apres, ie te le nie Nicocleon, ie te le nie. Il me dit en vn autre endroit Parle, Respon. Souuiens toy Sabin que tu m'as prie d'une chose de laquelle tu te repentiras. Mais en quelle rage est entré cét hōme? l'en ay veu autrefois vn tout nud dans vne cage de fer à la Bastille, qui estoit moins furieux que cét errage : s'il luy estoit eschappé quelque parole de mespris, i'aurois creu que c'estoit le cry d'un petit enfant, qui se mocque de ce qu'il admirera lors qu'il sera plus grand & plus sage.

Pag 741:

Ce grand amas d'injures & de calomnies, ces figures de crocheteur yure, de harangere decheuelee, & de laquais insolent, me font iuger sans temerité que Sabin *no es sabio*. Celuy qui a perdu l'esprit, s' imagine que les mouuemens detraquez de son cerueau esbranleront la fermeté du mien. S'il estoit capable d'apprendre quelque chose, ie voudrois qu'il sceut qu'il m'a fait rire, encore qu'il ne soit pas plaisant fol. l'ay vne ame de Plotin, qui peut estre enchantée. Je me suis persuadé que j'auois quelque ascendant sur celle de Cleonuille: & que mes escrits sont les serpens de Moyse qui deuorent ceux des magiciens du Cardinal. Je peux aussi dire avec Caton, que dans le combat des médifances i'aurois vn grand desaduantage, n'estant point enclin ny dressé à faire le mestier de quelques insolens qui voyagent sur les riuieres, qui demeurent dans les moulins, qui roulent dans vn chariot, ou qui sortent d'un estable. Si ie voulois entasser des injures pour eschauffer la teste fumante d'un insensé, ie luy dirois qu'il a affecté le nō de Sabin

qui a les deux syllabes & la terminaison de beaucoup de noms infames. Je ne recherche pas des epithetes pour deſcrire celuy qui eſt naiſſement depeint dans ſa lettre de change, que ie peux appeller ſa marote. Vn homme bien ſenſé ne s'offenſera pas de tout ce qui luy peut chanter celuy qui n'offenſe plus Dieu; & il ne le voudra iamais chaſtier, puis que les loix luy pardonnent. La dernière de toutes les punitions eſt, de n'eſtre plus homme: on enferme comme vn monſtre celuy qui a perdu la raiſon; ou s'il eſt furieux on l'eſtouffe comme vne beſte farouche. Pour faire voir que Sabin eſt en cét eſtat, conſiderez ſes autres extrauagances. Il dit au commencement de ſa lettre qu'il n'eſt pas le Sr de Cleonuille, & en pluſieurs endroits de la ſuite, il ſe deſcouure, diſant, *Tu m'aſ imposé; tu diſ que i'ay eſcrit.* Se faut-il eſtonnier s'il rejette le *Coup d'Eſtat* qu'il a faiſt pour le Cardinal de Richelieu, puis qu'il n'oſe point aduoüer l'Apologie qu'il a faiſt pour ſoy-meſme? ny s'il renie ſon maiſtre deuant ſa paſſion, puis que dans la ſienne il ne ſe cognoit pas? ny s'il a honte de ſon Eſcrit, puis que en le dreſſant, il proteſte qu'il ne l'a iamais compoſé? ſon excuſe eſt, qu'il eſtoit malade, & ſe prepa- roit pour faire vne ambassade, qu'il appelle grand voyage: qui n'a eſté que depuis le quartier de l'Vniuerſité de Paris iuſques aux petites maiſons du faubourg Saint Germain. Nous confeſſons que ce voyage eſt tres-grand, le pelerin eſtant paſſé de la raiſon iuſques à la beſtiſe.

Celuy qui meſcognoit le Cardinal de Richelieu ſon Mæcenas, & qui ſe deſaduoüe ſoy-meſ-

me, dire peut estre vray, lors qu'il assure
 (côme il fait) *qu'il ne me cognoit pas*. S'il parle de la
 portée de mon esprit, il sera veritable: il n'a ia-
 mais cognu qu'il estoit semblable à vn liurè, du-
 quel on desplie vn fueillet apres l'autre; la où le
 fol, comme luy, se produit tout à la fois. S'il dit
que mon visage luy est incogneu, ie suis bien malheu-
 reux d'auoir esté 23. ans dans les chaires des Egli-
 ses de Paris, en charge dás la Cour, & estimé par
 tous les hommes de lettres & vertueux, sans
 auoir eu l'honneur d'estre cogneu du Sieur de
 Cleonuille, Roy des sçauans, grand Reforma-
 teur de la Grammaire Françoisse, & Escriuin
 iuré de toutes les faueurs: c'est vn signe qu'il n'a
 point frequenté les Sermons, la Cour, & les sça-
 uans: qu'il s'est contenté de se brusler le sang
 pour apporter sur la fin de l'année quelque che-
 ritif Escrit de dix ou douze fueilles, ou vn Sonnet,
 ou vn Epigramme, à celuy qui estoit en credit,
 pour auoir vne ordonnance de cent escus, &
 pour donner quelque traitt de louange à tous
 ceux, par les mains desquels il deuoit passer
 pour receuoir son payement.

Ie confesse, que i'ay trouué quelque fois ce
porteur de rogatum, qui cachoit sous son manteau
 de satin gofré des libelles couuerts de papier ias-
 pé, à telles enseignes, que s'il estoit court d'vne
 iambe, il auroit toutes les mauuaises marques de
 Zoilus. Ie me souuiens aussi qu'il estoit tousiours
 botté comme vn solliciteur de procez, crotté
 comme vn attacheur de placards, & vestu de
 quelque habit de la fripperie comme vn baste-
 leur. Apres auoir dit qu'il ne me cognoit pas, il

Prou 19.
*Totum
 spiritum
 suum pro-
 fert stul-*
tum.

esueille sa memoire, & se souuient qu'il m'a veu porter la barbe large, & qu'il m'a ouy parler à la table de la Royne Marguerite. Il dit, *que j'auois la voix rauque, & que ie ne disois rien qui vaille.* Ainsi Sabin calomnie non seulement mes paroles, mais encore ma voix : mais il recognoit qu'il y a long temps, que i'estois parmi les hommes doctes, & à coste de la chaire d'une grande & sçauante Princesse, lors qu'il estoit au bas de la sale avec les violons & parmi les valers : la distance faisoit que ma voix luy paroissoit enrouée, encore que durant vingt ans, la Cour & la ville de Paris l'ayent trouuée bien nette : mais ie pouuois estre enrheumé par grand malheur le iour que i'eus l'honneur d'estre escouté par le Sr Sabin. Il dit, *que i'estois vn ignorant.* I'aduouë que i'ignore plus de choses que ie n'en sçay, & qu'un plus habile homme que le Sr de Cleonuille me peut enseigner : mais i'ay beaucoup appris depuis vingt-cinq ans, & i'ay peu oublié : cependant i'ose dire que Sabin passeroit pour sçauant, s'il auoit dans sa memoire ce qui a eschappé de la mienne.

Pour monstrier son extrauagance, il dit que ie me suis serui dans mes liures de certains termes
 Pag. 719. bas : il m'en impose, comme *sabots, escornifleurs, pots, pintes* ; & il trouue estrange que i'aye mis dans mes escrits, *des verres, des folliers, des colporteurs.* Cét homme delicat dit, que ces paroles le blesses ; mais sur tout les noms *des fols de Paris*, parce qu'il s' imagine qu'on le veut loger avec eux. Il protette qu'il ne tombera point dans ces bassesses : aussi tost apres il dit, que ie fais *des*

Tragi-comedies d'Estat: Il employe ces mots, *Opérateur du Pont-neuf, escroqueurs, palfreniers, galopins de cuisine, beluter, goinfre, moilon, cahots, fretin, & ailserlate, maussade, tremie de moulin.* Tous ces beaux traicts de plume, & beaucoup d'autres, m'ont fait voir que la passion de Sabin luy ayant creué les yeux, il veut chercher à rastons vn festu dans les miens. Il ne se contente pas d'vser de paroles rampantes, les Histoires le font aussi; il n'en a point apporté que celle d'un *Marguillier de village, & d'un moulin bannier.* C'est la doctrine qu'il a logé dans sa lettre de change, qui fait voir qu'il ne sçait que des nouvelles des païsans, & des moulins, qui sont les hommes & les lieux parmy & dans lesquels il a esté esleué.

Si Sabin ne se souvient pas sur le milieu de sa lettre de change de ce qui est au commencement, ny sur la fin d'une page, de ce qui est à la teste, ny dans la ligne suivante de ce qu'il a dit en la precedente, il n'y aura pas tant de suiet de s'estonner, si en composant ce liure six mois apres qu'il eust publié son *Cleouille*, il oublie en faisant le second ouvrage. ce qui estoit dans le premier. Il nie en plusieurs endroits de sa lettre de change, qu'il aye rien escrit en son Aduertissement aux Prouinces qui puisse blesser la reputation de la Royne Mere du Roy, qu'il appelle tres-grande & tres-vertueuse Princeesse: voicy les mots: *Après avoir accusé Cleouille d'auoir médit de la Mere, & du Frere de son Roy, sans auoir cité ny les mots, ny les lieux, tu luy fais insolemment son procez. Sur quoy ie ne puis me tenir que ie ne m'escrie avec ce Romain: O temps, O mœurs! Quelle tranchée de furie, ou*

quelle oubliance par maladie, ou quelle effronterie de malice ? Il appelle en vn autre endroit le R. P. Suffran Confesseur de la Royne pour luy servir de tesmoing, comme il n'a rien escrit contre S. M. Il est vray que les prieres de cét homme de bien seront plus vtils à Sabin pour le remettre en son bon sens, que ses témoignages ne luy peuuent estre aduantageux pour le faire declarer innocent. Le R. P. Suffran a non seulement soupiré, mais pleuré, en voyant l'Aduertissement de Cleonuille, & a iugé avec nous que cét escrit estoit le plus cruel de tous ceux que l'imposture a dressé en faueur de la violence, contre la vertu de la Royne Mere, & de Monsieur Frere unique du Roy. La conuiction est tres-aisée, puis que cét escrit de Cleonuille est dans vn mesme volume avec la lettre de change, & qu'il ne faut auoir la patience que de voir ce qui commence par le feuillet 479. Nicocleon a fait ses extraicts sur l'imprimé de l'an 1631. avec tant de fidelité, qu'il n'y a pas adiousté vne syllabe : il a cotté les pages de cette impression, & prendra la peine de recueillir ce qui est de plus remarquable dans la vieille, & dans la nouvelle, qui est celle du gros registre des mensonges, que j'ay collationné avec le petit linnet.

P'espere que tous ceux qui ont eu la curiosité de voir tous les escrits que les flatteurs du Cardinal de Richelieu ont sacrifié à sa vanité, & à sa vengeance, iugeront que le plus sanglant de tous a esté celui de Cleonuille, & que si ses compagnons meritent quelque chastiment, ils deuroient estre fouëttez autour de la poten-

ee en laquelle Sabin seroit pendu, s'il estoit en estat d'estre puny par les loix. Voicy ce qu'il a escrit.

En la page 35. de la premiere impression, il dit, que la Royne Mere du Roy ayant esté d'aduis d'assister le Duc de Mantouë, se tourna du costé de l'Espagne par les persuasions du Cardinal de Berule, & du Garde des Seaux de Marillac. En la page 39. Les exemples du passé nous apprennent ce que peut ordinairement l'esprit irrité d'une femme, & d'une femme de cette marque : la violence de ses mouvemens irreguliers, qui iette par fois la raison des plus sages hors de son accustomed assiette. En la page 42. il compare l'esprit de la Royne à un corps possédé du malin esprit. En la page 43. il dit, que toutes les broussailles & immondices des cabales contre le Cardinal, se lierent & attachèrent autour de la Royne Mere du Roy. Pages 74. & 75. il reproche à la Royne ses grands biens, & les bien-faits du Roy : la voila ingrate. En la page 80. il se moque de S. M. en rapportant la raillerie de Louys XII. contre les femmes, pourquoy les biches n'ont point de bois. En la 81. il parle avec tant d'ambiguité qu'on a suiet de douter, s'il veut dire que le Roy a peu faire mourir sa Mere. En la page 94. que la Royne a plus fait de mal au Cardinal que de bien, & que la faueur de sa Maistresse luy a esté plus fatale que sa disgrâce, & qu'il a acheté chèrement ses bien-faits. En la page 82. & 83. Elle a traversé les affaires d'Italie, & entretenu des intelligences, où on l'auoit engagée, & que le Roy usa de toute sorte de Remonstrances pour l'en faire departir. La detention à Compiègne n'estoit que pour retrancher à la Royne la communication de ceux qui l'auoient

portée à des extrémités ; & ce n'estoit pas vne prison, mais vne simple separation. Je ne remarque que les mesdisances, & cache les blasphemes qui ne doiuent iamais estre repetez. Mais ie ne peux taire, que Cleonuille a esté le seul autheur qui a ramassé avec grand soin toutes les Histoires qu'il n'a pas leu, mais qu'il a pris à la volée dans les discours de ceux qu'il a fréquenté. Il veut monstrier que la Royne Mere du Roy est mieux traictée que n'ont esté toutes les Roynes affligées, ou par leurs Maris, ou par leurs Enfans, & pour mieux ajuster ses exemples, il a fait cent faussetez. Il a arresté Iudith femme de Louys le Debonnaire à Compiègne: il a fait estroitement enfermer cette Princeesse, qui fit plus de six cens lieues dans vn an. Il a cōparé avec S.M. des Roynes soupçonnées d'impudicité: il a voulu faire passer des sainctes pour des meschantes: il en a recherché quelques malicieuses & infames; entr'autres Vrraque, que les Historiens d'Espagne appellent *l'eternel opprobre de leur nation*. Il a representé au Roy, qu'il pouuoit imiter ceux qui auoient maltraicté leurs Meres, ou leurs Femmes. Si vn Prince vertueux a fait vne seule mauuaise action, comme Edoiard II. d'Angleterre, qu'il appelle le Confesseur, il ne propose que cét exemple au Roy, & luy cache tous les bons, & mesmes les miracles que Dieu fit pour faire esclatter l'innocence d'Emme, & ietter son Fils dans le repentir. Il assure que le Roy peut prendre les biens de sa Mere, comme Charles VII. prist ceux de la sienne: qu'il la peut enuoyer hors de son Royaume, comme Henry III.

Mariana.

oulut faire Catherine de Medicis : qu'il luy est loisible de la reduire à vne petite pension, comme Edoüard III. d'Angleterre reduisit sa Mere Elizabeth à mille liure par an, ce qui est faux. Mais il se rend ridicule, lors qu'il tâche de nous prouuer, *que le Roy a l'auantage du sexe par dessus sa Mere.* Il me semble que nous aurions autant de raison de dire, que la Roynes a l'auantage des années par dessus le Roy son Fils. Leurs Maiestez se peuuent preualoir de quelques autres considerations qui sont plus importantes: ie passe le plus promptement que ie peux sur ces ordures, avant dans mon Nicocleon montré au long que Cleonuille a fait en dix ou douze exemples cent faussetez, & autant de mauuaises applications. I'ay rapporté fidelement tout ce que les Historiens François, Espagnols, Italiens, Anglois & Allemans auoient escrit, & que le Sr de Cleonuille n'auoit iamais leu. S'il eust esté soigneux de conseruer sa reputation, il falloit refuter cent Autheurs que i'ay allegué, ou monstrier que mes inductions estoient mauuaises, au lieu de faire des faillies de furieux, & ne dire autre chose pour s'excuser dans sa lettre de change, si ce n'est qu'il n'auoit point dit, que *Iudith fust arrestée à Compiègne, mais que la resolution de l'arrestier y auoit esté prise* : encore qu'il aye affecté d'y faire trouuer prisonniere vne Imperatrice, pour monstrier qu'une Roynes y auoit esté mieux traitée, parce qu'on ne l'auoit pas mise en basse fosse. Ie ne peux sortir de ces horreurs, s'as entrer d'as des plus grandes : cét Auteur a esté si malin, qu'il a entrepris dans son Cleonuille, de por-

Pag. 717.

ter le Roy à faire massacrer Monseigneur son Frere vnique; & il a apporté des faux exemples, pour monstrier que S. M. s'en peut deffaire par l'assassinat. Il dit que *Monseigneur & les siens ont consulté les deuins sur la vie du Roy*, & plusieurs autres choses beaucoup plus execrables que les Escriuains du Cardinal ont publié, pour mettre la confusion dans le Royaume. Ce qui est plus estrange, est, qu'on reimprime ces abominations in folio en grosse lettre dans vn grand volume, & en presence de Monsieur; c'est à dire, lors qu'on pourroit executer ce que ce traistre conseille. Mais le Roy a la conscience trop bonne; & celuy qui nourrit ces monstres, n'a point l'assurance de faire voir ces escrits à S. M. Sabin qui ne se souuiert pas de ce qu'il a escrit, & qui est relié dans vn mesme liure avec sa lettre de change, croit auoir bien rabillé tout ce que sa rage a deschiré, lors qu'il dit de la Roynne Mere du Roy, *Cette tres-grande & tres-vertueuse Princeesse*. Si vous croyez qu'elle est tres-grande, pourquoy raschez-vous dans vos escrits de la faire paroistre petite? & si vous aduoüez qu'elle est tres-vertueuse, pourquoy faites vous tant de libelles pour la rendre infame? Que ne desirez vous dans le Royaume de France cette grandeur & cette vertu? & pour quelle raison en esloignez-vous celle, qui le peut embellir par sa vertu, & soustenir par sa grandeur? Je vois bien que ces paroles, *tres-grande & tres-vertueuse*, ne viennent pas des cœurs, & que vous les dites en crachant des iniures, comme les valets & les flatteurs du Pontife, en iectant des sales excremens

Page 134.
& ailleurs, de la premiere impression.

de leur bouche puante sur la sacrée face de I E-
S V S- C H R I S T, l'appelloient *Maistre & oinct*
de Dieu. Il est vray que Sabin seroit contraint
de donner à la Royne les deux qualitez de *gran-*
de & vertueuse, s'il faisoit vn iour amande hon-
norable deuant la porte de nostre Dame de Pa-
ris: mais sa folie, qui l'a mis entre les mains d'un
gouverneur des insensez, l'a tiré de celles d'un
bourreau.

Pag. 741.

Il dit, que ie suis *protecteur honnoraire des Meres*
des Roys: cét employ est plus honorable que ce-
luy de calomniateur des Roynes. Cleonuille l'a
choisi, pour monstrier que la Royne Mere du
Roy n'a suiuy que les exemples des meschantes:
il les recherche avec soin, & en forge pour les
faire seruir à son dessein. L'aduoue que i'excuse
plusieurs Roynes, & n'accuse qu'Vrraque, qui
n'a point eu de posterité. Je ne veux pas, à la mo-
de des Escriuains du Cardinal, chercher ou iet-
ter des ordures dans les sources des Roys &
Princes Chrestiens, & principalement dans cel-
de S. M. Si Sabin est si effronté, de dire qu'il n'a
rien escrit contre la Royne, sans faute le Chaste-
let dira qu'il luy a faict vn grand honneur, lors
qu'il l'a appelée *Epiphanie*, parce qu'on crie à ce
iour, Le Roy boit.

Le pourrois apporter cent autres contrarietez,
pour faire voir que la maladie de Sabin luy a osté
la memoire, qui reste quelquefois à ceux qui
ont perdu le iugement: voyons quelques mar-
ques de la perte du sien.

On voit clairement dans toutes les lignes de
son ouurage qu'il est forcené, & que l'imagina-

tion destraquée est la seule piece qui iouë en lui. Elle me voit d'abbord en figure d'asne : si ie l'estois, i'espererois que ce printemps me remettrait en forme d'homme, avec les roses que celui d'Apulée mangea. Si la folle fantasie de ce peintre de grotesques m'auoit donné seulement vn traitt qui me rendit recognoissable, i'aurois quelque regret, & ie prendrois la peine de l'effacer, ou ie le mettrois en iustice, si les iuges ne s'abstenoient de la rendre contre luy, apres que Dieu l'a fustigee. Il dit, que *ie n'ay ny doctrine, ny suffisance, & qu'à peine dans mes ouurages paroist il quelque rayon de sens commun.* Je recognois, que les choses que ie sçay ne font pas la milliesme partie de celles que i'ignore : ie confesse, que ie ne me picque pas d'estre grandement sçauant : mais ie ne crois pas aussi, qu'à prendre la science, & l'ignorance, comme on les prend parmy ceux qui ne vivent pas long-temps, & ne font pas des Anges, ie ne passeray pas pour vne beste. Mon extrême ignorance feroit vn grand tort à la memoire de la Royne Marguerite, qui m'a entrete-
nu deux ans entre les hommes de lettres : au iugement du Cardinal du Perron, qui me presenta au Roy l'an 1613. pour la charge de Predicateur de S. M. apres la mort du P. Portugais : au Roy mesme qui m'a faict l'honneur d'escouter mes predications, avec tesmoignage de satisfaction. Toute la Cour les a estimées, les Docteurs, les Bachilliers, les Religieux, & les plus celebres Aduocats de Paris les ont recherchées : beaucoup de curieux y ont rempli leurs tablettes, & vn grand nombre de bourgeois de bon sens y ont

trouué de quoy se contenter. La Royne Mere du Roy seroit mesprisee de m'auoir donné, il y a dix & sept ans, la charge de son Predicateur ordinaire. On voit dans ces veritez, que tout ce qui a esté de plus releué en mon temps, m'a retenu à son seruice. Le Cardinal de Richelieu, que tous ses flatteurs tiennent pour le plus docte, & pour le plus delicat esprit de ce temps, a souuent employé & esprouué le mien en choses solides & curieuses, en Latin, en François, en prose & en vers : il n'a point de iugement, si celuy que vous faictes de moy se trouue veritable; ou il faut dire que j'ay esté flatté par celuy que vous flattez. Son Eminence a faict imprimer plusieurs fois quelques-vnes de mes œuvres; entre autres le *Theologien sans passion*: il est encore inferé comme vne piece excellente dans le *Mercur*, & dans le grand volume des pieces du temps. Mais pleut à Dieu que son Eminence, & vous qui faictes semblant de ne m'estimer pas, m'eussiez mesprisé par effet, ie n'aurois pas receu tant de mal, ny souffert de si grandes pertes de biens, ny plusieurs attaques en ma personne. Vn ennemy puissant, comme est M^r le Cardinal, ne s'obstineroit point à vouloir ruiner & perdre vn homme qui ne peut rien, & qui n'a, comme vous dites, ny l'esprit ny le style pour le faire cognoistre. Je ne veux point d'autre tesmoignage que le vostre, pour monstrier, que ie ne dois pas estre mis parmi le nombre des ignorans. Sabin aduoué que ie suis *Theologien*, & que ie scay quelque chose en *Pag 718*
l'Eseriture Ste. J'ay desia la science des Ss. qui est la principale, & celle de ma profession. En vn autre

endroit il dit, que j'ay enseigné en ma ieunesse les lettres humaines. Le Chastellet auteur de la Preface confesse, que ie suis *Rhetoricien*, & *Philosophe*, *iusques à estre Sophiste*. Ie n'ambitionne pas de passer pour grand Medecin, ny pour Iuriconsulte, encore que j'aye les clefs de ces sciences: ie me contente de sçauoir ce qui est propre à ma condition, & que vous l'ayez reconnu. Sabin distingue la cognoissance, en celle des choses & des paroles: il dit, qu'il ne trouue point des choses relevées dans mes escrits. Il les a leus avec vn esprit d'ennemy & de corrompu. Ie ne luy sçaurois plaire en estant sage, en disant la verité, & mesprisant les biens. Il est vray qu'en vne affaire serieuse & politique ie n'ay pas suiny la façon fanfaronne du Soldat François, ou de l'Auant victorieux. Les traicts de lettres diuines & humaines, qui paroissent dans mes liures, sont plustost eschappez qu'affectez: ils sont sortis de mon abondance, non recherchez par ma curiosité. Ie n'inuente pas de belles pensées, qui sont bien souuent de fots discours; mais ie remplis mes escrits de bonnes maximes, ie les donne au public avec charité & verité. Ie ne travaille point pour acquerir reputation, mais pour satisfaire à ma conscience. Ie ne desire pas les acclamations des médifans, des valets des fauoris, & des escoliers du Gazetier; ie serois tres-mari d'estre estimé par ceux qui disent, escriuent, & font toutes choses contre raison. J'ay apporté quantité d'exemples que ma memoire m'a fourny, & qui sont tres-propres pour ce que ie traictois. Cleonuille en son Aduertissement en a

produit dix ou douze faux en toutes leurs circonstances & applications : il s'imagine qu'il sçait l'Histoire de France, d'Espagne, d'Allemagne & d'Angleterre : mais l'erreur n'est pas science, c'est plustost son contraire. Sabin m'appelle le ignorant des choses qu'il ne sçait pas, & ie fais gloire de ne sçavoir point ce qu'il sçait. Il n'a rien trouué à redire dans cent citations qui sont dans mon Nocolon : ou il se deuoit arrester, comme à vn ouurage qui estoit fait contre luy : il s'esgoue dans mes autres lures, & crie comme vn insensé, que dans mon Caton Chrestien i'ay mis le *cheual canterius*, au lieu de dire le *cheual hongre*. Il faict des huées de fol, & dit : O la beste, qui ne sçait pas que *canterius* signifie vn hongre. Mon dessein n'estoit pas de mettre ny *canterius*, ny hongre, mais seulement cheual : i'auois logé à la marge *canterius*, que l'Imprimeur a faict sauter dans la suite du dit cours : ie sçay, ce que *canterius*, *mannus*, *baricus*, *burda*, *tolutarius*, & *Asturco* signifient ; & ie m'affeure, que si Sabin auoit son bon sens, il luy faudroit consulter le Calepin, pour apprendre ce que i'escri sans l'auoir veu depuis trente ans. Je sçay aussi que les interpretes de Senèque doutent, si *canterius* signifie vn cheual hongre, ou vn chariot. Si Sabin ne cherchoit de pointriller en frippon, il m'auroit plustost accusé d'auoir mis vn mot Latin pour vn François, ce qui sentiroit vu peu l'escole, mais non pas l'ignorant.

Il vient à la façon d'escrire : il dit que mon eloquence sent le sauuage : il vaut mieux qu'elle sente vn peu le sauuage, que trop le priuè : com-

Quin ac-
curatè lo-
quuntur,
nisi qui
vult pu-
sillè lo-
qui? Se-
neca Epi-
stola 75.

me faict la sienne. Vn sage dit, qu'il n'y a point de gens qui affectent d'auantage de bien parler que ceux qui parlent puamment. I'escris en homme aduisé, & Sabin en femme debauchée. Il m'iniurie en furieux; ie marque ses fautes en censeur. En fin ie peux faillir en vne parole, mais Sabin manque en toutes les choses: & i'aimerois mieux passer pour ignorant, que d'auoir vendu ma science à vn Tyran. Ie ne recherche point les sottises exclamations des demy sçauans: mais les approbations secretes des hommes sages. Mon discours conduit des bonnes choses: mon eloquence est vne ombre qui les suit. Ie n'escris pas tant pour les oreilles delicates, comme pour les forts esprits: ie sçay pourtant que ie n'offense point celles li, & ie suis asseuré que ie contente ceux cy. C'est vne petite occupation, de ne trier que des mots. Le discours est le visage de l'ame: si elle est genereuse, sa face le fait paroistre; si elle est vaine, on le lit en ses yeux. Ie ne fais point estat des paroles bien polies, ie me contente de renger assez bien les choses solides: ie laisse le fard pour les laides & vieilles, & ie n'en donne iamais aux belles & ieunes. Sabin dit, qu'en nostre aage on prend pour defauts tout ce qui se peut mieux dire. Par cette fausse regle qu'il establit, il condamne tous les escrits.

Sabin me veut enseigner vne leçon nouuelle; & il assure que i'ay failly en vn seul point, de
 Pag. 711. mettre quel au lieu de quelque. Il dit que c'est la mode d'escrire, de quelque qualité & condition qu'ils soient: quelque changement qui puisse arriuer: en quelque estat que la Providence de Dieu nous loge: de

*quelque costé que les affaires tournent : en quelque fa-
 çon que la tribulation se termine. l'aduoué que du
 temps que i'estois en France, il y a sept ans, si on
 eust parlé de la sorte, on eust este berné. Ces fa-
 çons d'escrire sont venuës avec les garsettes, les
 galants, & les assassins du cœur, & sont plus foles
 que ces mots nouveaux. Depuis que la puissan-
 ce du Cardinal a changé les loix, la sortise de ses
 flatteurs a changé les paroles: ie sçay bien qu'el-
 les meurent, & naissent comme les hommes:
 mais ceux qui se veulent donner l'auctorité d'en
 produire, doiuent chercher quelque apparence
 de raison: où est elle de confondre *quel* & *quel-
 que*, & de traduire *qualis* en *quelque*, qui signifie
aliquis? Je renuoye cette censure au sens com-
 mun, mieux à propos que Sabin ne me renuoye
 à celle des Sieurs de Vaugelas & de Boissat: ie
 defere beaucoup au iugement de ces Messieurs:
 mais ie n'ay pas mauuaise opinion du mien. Je
 ne crois pas que le premier, qui est Sauoyard,
 nous vueille enseigner à parler François: ie le
 cognois pour honneste homme & doux en con-
 uersation: mais ie n'ay rien veu de luy par es-
 crit. Boissat est aussi en bonne reputation: ie
 m'accuse de n'auoir pas eu la curiosité, ou plu-
 tost ie suis marry de n'auoir pas eu le loisir de
 lire ses œuvres. I'ay veu celles des Sieurs O-
 ger, Barbin, & Faret, qui n'approuueront pas à
 mon aduis cette nouveauté, qui n'est venue
 au monde qu'avec le renuersement de la cer-
 uelle de Sabin: ce pauvre mal-heureux vou-
 droit bien qu'on demanda, Quelque homme*

estes vous? Quelque marchandise vendez vous? Ainsi parloit le Herti, duquel il a pris la place dans les petites maisons, où il nous a desjà forgé trente mots, comme, *desdupper, maußade, fretin, frelaté, Lunaisons*, & autres de pareille estoffe, qui n'estoient que parmy les laquais, crocheurs, & petits Artisans de Paris, & n'entroient point dans le Louure de mon temps: Sabin en faißt maintenant les ornemens de ses liures, aussi bien que de ce serment, *le meure*: qui n'a point de construction Françoisé, encore qu'il soit ordinaire aux petits garçons & fillettes qui font l'amour. Mais que faisons-nous, de nous amuser à des vetilles, lors que nous voyons passer deuant nos yeux les plus importantes affaires qui soient arriuées au Royaume de France, depuis sa fondation? nous rompons avec nostre caquet la teste a vn grand malade, au lieu de chercher des remedes pour le guérir.

Celuy qui dit, que ie ne peux oublier mon gros jargon de Vellay, ne se souuient pas, qu'entre l'Auuergne, d'où il est, & le Vellay en Languedoc, d'où ie suis, il n'y a qu'un ruisseau. Il est vray que l'Auuergne a cét aduanrage, que le Cardinal de Richelieu l'a honoré de son passage. Sabin sous le nom de Iehan Sirmond (Poëte rudement enflé) a faißt vn Poëme Latin, dans lequel il nous assure que son Eminence a laissé toute sorte de benedictions & de graces dans le pays d'Auuergne: ie croy qu'il y aura semé en courant mille beaux mots, qu'il y aura adoucy toutes choses. Les pauvres miserables du pays
de

de Vellay Yont demeurez dans leur esprit grossier, parce que le subtil des subtils n'a point esté pariny eux, comme parmy les Auvergnats. Ils ont veu à Effiat l'Eminentissime par dessus tous les mortels: mais ce bon-heur ne les exempte pas des passages des gens de guerre, & ne les descharge point de la taille: puis que le Marechal d'Effiat, qui traicta si bien son Eminence, n'a pas laissé de mourir ieune; & que l'employ d'escrire ses louanges, n'a point empesché son Poëte & son Orateur de perdre l'esprit.

*Episthe
du Car-
dinal en
l'Epistre
liminaire
du Par-
nasse des
Muses.
Pag 734.*

Il dit, faisant allusion à mon nom, que Morgand le geant est le fondateur de ma maison. Il est vray qu'on la trouuera plustost que la sienne, qui n'a point d'autre lustre, que celuy que luy donne son oncle le Iesuiste, qui est homme de bien, & sçauant. Si ie suis descendu de la race de Morgand (comme dit Sabin) i'ay vn aduantage, que Louys Puleius, precepteur du Pape Leon X. a loüé mes ancestres, là où ie m'asleure que personne n'a cognu les Sirmonds, que leurs proches voisins, denant les doctes escrits de l'oncle, & denant les folies du neveu.

Ie crois qu'il m'est impossible d'estre sage, si ie ne souffre patiemment, que quelque fol s'imagine que ie suis semblable à luy. Iamais Sabin n'a faiët paroistre si clairement sa manie, que lors qu'il me reproche la confiscation de mes biens, comme vn effect de ma folie, estant vn action de la tyrannie du Cardinal, & vn tesmoignage de ma vertu. Ie suis marri que Sabin n'aye sceu que ma perte de six mille liures de rente, & qu'il n'aye descouuert qu'hors de la Prouence

Pag 734.

on n'en a volé encore autant, pour auoir soustenu contre les calomnies du Cardinal l'honneur d'une Princeſſe, qui luy en a donné cent fois plus qu'à moy. Sabin s'imagine qu'il me dit vne iniure lors qu'il m'appelle *pauvre*. Certes la pauvreté ne doit point eſtremée vn crime parmy les Chreſtiens; & entre les Payens c'eſt vne laſcheté de s'en mocquer, apres l'auoir procurée à vn ſeruiteur qui deffend ſa Maieſteſſe.

Si le Cardinal pouuoit eſcouter ſans rire le Sieur de Cleonuille, ie le prierois de demander à ſon Eminence, ſi elle entretient tant de gens aux deſpens du Roy, avec autre eſperance que de s'en ſeruir au cas que la fortune luy tourne le dos? ſ'il ne croit pas que ceux qui l'abandonneront feront des laſches? ſ'il les cognoiſſoit, comme le temps les fera cognoiſtre, n'aduanceroit il pas les fideles & courageux par deſſus les traîtres & poltrons, qui ne ſont amis que de ſa proſperité? Pourquoy donc deſpoüille-il de leurs biens ceux qui ont ſuiuy la Royne en ſes afflictions? & pourquoy tache il de rendre miſerable celui qui deffend l'honneur de ſa Maieſteſſe? Si le Cardinal n'eſtoit ennemy du ſien, il tiendrait pour ſon meilleur amy l'Eſcrinain qui feroit des apologies en ſa faueur, & il baille-
roit la meilleure de ſes places à vn Capitaine, qui la conſerueroit pour retraicte de ſon Eminence apres le renuerſement de ſon credit. Pourquoy donc trouue-il eſtrange, que ie face pour ma Bien-faëtrice ce qu'il deſire de ceux qu'il croit auoir obligez? Pourquoy veut-il faire

perir, ou enleuer, ou tuer de sang froid vn soldat, qui fait bien le iour d'une bataille? sans faute celuy qui ne l'estime pas, n'est point genereux, & il n'ayme pas les bonnes actions, s'il veut couper les mains à ceux qui les font.

Sabin m'a menacé d'une espece de mort, de laquelle ma naissance & ma condition m'exemptent : elle peut estre cruelle, mais elle ne sera jamais infame. Si le Cardinal a le pouuoir de faire ce que les Tyrans ont fait; i'ay le courage de souffrir ce que les Saincts ont souffert. Le coupable perit pour son crime, & l'innocent par celuy d'autrui. Les Escriptuains du Cardinal le seruent mal, lors qu'ils nous aduertissent de prendre garde à nous : ils sont des meschans, en injuriant ceux qu'ils croient estre miserables; & ils sont des fols, lors qu'ils vsent de menaces contre ceux qui ne sont pas en leur puissance. Ils disent qu'ils me feront mourir : pour me faire peur, il me faudroit menacer de me faire viure sous la tyrannie du Cardinal de Richelieu. On me veut espouuenter : mais ie ne seray point deshonoré pour tousiours, de peur d'endurer la douleur d'un quart d'heure. Ie suis de ces Philosophes qui n'estendent point leurs desplaisirs, qui ne vont point au deuant des maux ; & ie ne seray pas presentement miserable, de peur de l'estre vn iour : rien ne me tourmente ny deuant son temps, ny apres son temps, & peu dedans son temps. Si ie me mocque des predctions de ceux qui assurent qu'ils ont consulté les astres, à plus forte raison ie mesprise ceux qui n'ont veu que les ardens & feux folets de

Pag 712.

Au de-

faut de la

potence

de Castrin

la galere

de Rondin

ne te man-

quera pas.

leurs passions. En tout cas j'auray cet avantage, si ie meurs par oppression, que deuant que de mourir j'auray faict cognoistre à la posterité le Tyran qui m'a persecuté, & le suiet pour lequel il m'a faict du mal. On verra aussi si ie dois finir par violence, que ie la reçois pour auoir soustenu la iustice. Je sçay oster de toutes choses l'opinion du vulgaire : ie les considere en elles mesmes, & vois clairement qu'il n'y a rien d'horrible en la mort que la disgrâce de Dieu ; en laquelle ie tacheray de ne mourir point. Voila les remedes que ie prends pour me preparer contre les efforts des meschans. Ce qui me console contre la mort naturelle, est, que ie suis de l'aage du Cardinal, & que nous sommes tous deux mortels : sa fin ou la mienne me rendront exempt de ses poursuites. Si i'estois vindicatif, ie prendrois vn extrême plaisir, de le voir plus menacé & tourmenté par sa puissance, que ie ne suis par ma foiblesse. Son grâd credit est tousiours alarmé : il tourne sans cesse sa teste de tous costez : il croit que le dernier coup le mire ; & il est semblable aux oyseaux, qui sont espouuentez par la fonde qui claque sans pierre. Vous dites qu'on m'a rendu pauvre : ie supporte volontiers la pauvreté que j'ay choisi. Vous estimez cette election en vn ieune homme ignorant, qui entre en Religion ; pourquoy la mesprisez vous en vn vieux Prestre, qui sçait quelque chose ? Les lettres qui bien souuent ne guarissent de rien, sont des puissans remedes pour moy : elles m'enseignent à ne regarder pas ce que ie souffre, mais ce que ie dois faire. Quand

la recognoissance m'a faict abandonner mon bien pour suiure la mauuaise fortune de la Royne Mere du Roy, ma vertu a produit ma necessité: quand ie souffriray les incommoditez & les injures, ma necessité conseruera ma vertu. l'ay rendu mes maux plus legers, ayant pensé souuent qu'ils pouuoient arriuer; & ie suis tres aise, que vous croyez que ie suis miserable & perdu, si cela vous empesche de rechercher les moyens de me faire petir, comme vous l'auiez entrepris autrefois. Je ne suis persecuté que par vn Tyran, & ie suis Chrestien: Socrate estoit poursuiuy par trente, & il estoit Payen. Celuy qui me faict du mal, n'a foüetté iusques à present que mes habits. Anaxarque estoit broyé dans vn mortier, & il se mocquoit de celuy qui ne pouuoit briser sa constance. Outre que tout ce qui plaist à Dieu, me plaist; & que j'obeys avec respect & plaisir aux ordres de sa Prouidence, qui me traîsneroit, si ie ne la suiuis. Je m'estime forthonnoré & riche, d'estre agité dans le vaisseau qui porte la plus grande Princesse du monde, & la Mere de mon Roy: ie suis mieux à mon aise dans ma bassesse, qu'elle n'est à proportion de sa grandeur. Le Cardinal de Richelieu luy a ravi son bien, & luy veut oster la reputation: ie souffre les mesmes choses: n'ay je pas suiet de me glorifier plustost que de me desesperer? ie vois aussi, que celuy qui me descharge de mes rennes, ne peut plus supporter les siennes: & que ie ne suis pas tant pressé par l'incommodité, comme il est accablé par l'abondance. Je recognois, que la trop grande au-

thorité qu'il a pris, est vne beste farouche, qui craint que sa chaine d'or ne se mette autour de son col; & qu'elle ne l'estrange: il n'est pas maistre de sa felicité; mais il en est esclau, ayant plus besoin d'elle pour se maintenir là où il est, que pour y arriuer. Ce qui fait que sa vie est remplie d'anxiété, de soupçons & de craintes, est, qu'il apprehende non seulement les forces de toute l'Europe, qu'il voit bandées contre luy: mais tous les accidens & rencontres du temps, desquels il croit que la fortune dispose. En fin si on veut sçauoir la difference qui est entre le Cardinal & moy, c'est qu'il conuertit tous les iours ses biens en ses maux: & que ie tasche de conuertir mes maux en mes biens. I'ay pitié de luy, parce que i'ay veu avec quelles peines il est monté là où il est: ie sçay combien il a trauaillé pour s'y maintenir, & iuge assez bien de l'apprehension qu'il a d'en descendre. I'ay cét aduantage par dessus son Eminence, que dans ses apprehensions ie luy ay ouy souuent desirer vne condition semblable à la mienne, & elle ne m'a iamais ouy souhaitter vne autorité pareille à la sienne: il sçait qu'il m'appelloit Philosophe, quand ie mesprisois les choses que le monde appelle grandes, parce que ie les ay tousiours regardées de haut en bas. Ie l'asseure que ie suis content d'auoir trouué les petites en cherchant les mediocres; & que la seureté qu'ont les gens de bien là où ie suis, donne vne grande liberté à mon esprit. Ie me resiouys aussi, de ce que les iniures qu'il m'enuoye sont des recommandations pour moy aupres de la Roynie; & sur

tout, de ce que par toute la terre elles sont des
marques asseurées de la passion du Cardinal, de
la sottise de ses Escriuains, & de ma vertu. Ma
Philosophie va bien plus auant: ie confesse que
i'ay quelque obligation à son Eminence, qui
m'a demandé pour me faire perir, parce qu'il me
tient esloigné d'un pays qu'il veut ruiner, &
dans lequel vn homme de bien est tousiours en
apprehension. Je ne fuys pas la iustice de mon
Roy; mais i'ay peur de la fortune furieuse de son
Ministre: ie trouue plus de paix en la guerre
qu'il me fait, que ie n'en pourrois rencontrer
dans vne reconciliation avec luy; qui me don-
neroit suiet de craindre à tout moment quelque
effect de sa legereté, de ses soupçons, du mau-
uais rapport d'un flatteur, ou d'un effort de la
violence qui luy est naturelle: s'il estoit bon Fau-
connier, il scauroit, que tout oyseau hardy est
farouche au leurre. Je scay que sa puissance attra-
quera tout ce qui pourra estre l'obiet de sa co-
lere; qu'il ne peut aimer ceux qu'il a offensez: si
leur bonné se fioit en luy, sa malice s'en diffiera
tousiours. Ces considerations sont, que non seu-
lement ie souffre mes maux, mais que i'y prens
plaisir, que ie pense & compte mes playes, &
que i'ayme le Capitaine pour lequel ie suis
blesé, & veux mourir. En fin, ie suis fort glo-
rieux de voir que le Cardinal de Richelieu a
plustost despoüillé des grands Princes, que sur-
monté la Constance d'un pauvre Prestre. C'est
donc vn resmoignage de la folie de Sabin, de me
reprocher la perte de mes biens: il a perdu les plus
precieux, qui sont les vertus & la raison: & le

Cardinal a moins que rien, puis qu'il a changé (comme i'ay dit) ses biens en ses maux, & que son cœur tombe deuant la cheute de sa fortune, là où, apres le renuersement de la mienne, mon ame demeure debout. Personne ne me peut oster ny diminuer mes vrayz biens : i'ay fait cognoistre au contraire, qu'ils estoient augmentez, lors que dans mes escrits on a veu que mon esprit auoit tiré du profit de mes pertes. Les afflictions sont les pierres de touche, non seulement des consciences des Chrestiens : mais des cerueaux des hommes : ie ne veux point d'autre preuue de la bonne assiette du mien, que ce que i'ay respondu tout seul à dix ou douze furieux, qui ont entrepris de fallir la belle reputation de la Royne Mere du Roy. Ce qui m'a vn peu soulagé dans mon trauail, est, que i'ay tousiours esperé que bien-tost le iour de la verité fera cacher dans leurs nids tous ces oiseaux de mauuais presage, qui criaient dans la nuit des miseres publiques, & se paissent de quelques vilaines tripailles qu'on leurs iette. Je sçay aussi, qu'on se peut promettre toutes choses de la Prouidence de Dieu. Estre sage & patient vont rarement sans recompense : peut estre que les violences qui m'ont fait sortir de mon pays, me preparent vn retour fort honorable : la misere qu'on procure à vn homme de bien, iette souuent les fondemens d'vne plus grande felicité. Pour conclusion, arriuera ce que le Ciel ordonnera : mais dès à present ie m'estime heureux en ma pauvreté, lors que ie sçay mieux que Sabin, que le Cardinal est malheureux dans son abondance. Cleon.

nille plus digne de cōpassion que de colere, n'aura pas deuiné sur la fin de son discours, lors qu'il assure, *qu'en lisant son escrit l'impatience m'emportera, & qu'elle se conuertira en fureur.* Je proteste au contraire, que sa lettre de Change ne m'a fourny qu'un suiet de rire. Je me suis moqué de cent impostures que la cognoissance publique effacera. Je me suis resiouy de ce que la malice, qui est passée en frenaisie, n'a rien à desgorger de plus sale que ce qu'elle a vomy : & qu'après vingt-trois ans de sejour, & d'employ honorable dans Paris, ceux qui ont recherché ma vie, n'ont rien trouué qui luy puisse donner le moindre blasme.

J'assure que les iniures ne m'ont point esmeu, mais que la charité m'a obligé à recevoir avec horreur ce discours de Sabin : *Je n'aurois iamais escrit contre toy, si ie n'eusse sceu que cela te fasseroit.* Certes j'ay grande compassion de ce pauvre homme : si la prudence ne iugeoit qu'il faut pardonner toutes leurs faillies à ceux qui ont perdu l'esprit : la Religion ne pourroit souffrir que Sabin, qui se dit Chrestien, escriuist qu'il ne reprend point celui qu'il pretend auoir failly, avec intention de le corriger & rendre meilleur (mais avec vn desir de l'affliger, & de le jeter dans le desespoir, s'il pouuoit. Je louë Dieu, de ce que les feux de la colere de Sabin, qui ne peuvent brusler que des pailles, seruent pour raffiner & faire esclatter mon or, & que le plomb qu'il y veut mesler s'en va en fumée. Je prie de tout mon cœur la bonté

Divine, qu'elle le remette dans son bon sens,
& qu'il luy donne la grace de mieux employer
sa plume, qu'il n'a fait iusques à present. S'il
continuë de l'exercer contre moy, ie ne refuse-
ray point les fols & les flatteurs avec mes es-
crits; mais ie tascheray de contenter les sages
& les gens de bien avec mes actions.





ABREGÉ DE LA VIE DV

CARDINAL

DE RICHELIEV;

POVR LVY SERVIR

d'Epitaphe.

Par le Sieur de Saint Germain.



A premiere chose que ie demande de toy, amy Passant, est la loüange que tu dois à Dieu, de ce que tu peux lire en France avec seureté ce qui s'en suit.

Dans ce petit espace est enfermé vn mort, qui en son viuant ne pouuoit estre arresté par toute la terre. Apres l'auoir esbranlée, il a voulu donner le mouuement aux Cieux, ayant choisi cette deuise insolente: *Esprit qui ment les Astres.*

Asin que tu cognoisses au vray qu'elle a esté cette intelligence, ou esprit mouuant. Il auoit vne in lustrie agissante, mais inquiete, & autant ennemie de son propre repos, comme de la tranquillité publique.

Ceux qui l'ont practiqué plus familièrement

ont recogneu dans son bel esprit (que plusieurs ont admiré) vn grand meſlangé de folie ; que tout le bleſſoit , & rien ne le guerifſoit , ne pouuant ſouffrir ny ſes biens, ny ſes maux.

Il s'eſt maintenu long temps , non paſtant par la bien-veillance , eomme par l'autorité d'un grand Roy , qu'il a trompé avec beaucoup d'eſtude.

Les bons ſuccez pluſtoſt que les ſages conſeils l'ont fait appeller heureux , n'ayant eſté malheureux qu'en ſoy-meſme , par la ſeule colere de Dieu , qui l'auoit rendu ſuiet à des maladies eſtranges.

Il n'a point ſceu en quoy conſiſtoit la felicité , l'ayant touſiours cherchée dans l'infelicité d'autrui. Ne s'eſtant iamais perſuadé qu'il fuſt heureux , & n'ayant ſceu faire croire à perſonne qu'il fuſt homme de bien.

Il a eſté tourmenté par l'une & par l'autre bile , c'eſt à dire ; par les deux bourreaux de la vie : ayant ſouffert continuellement les feux de la jaune, & les fumées de la noire. Ainſi nous pouuons dire qu'il a ſen'y le premier ce poiſon qu'il a reſpandu ſur pluſieurs.

Il a eſté le plus ambitieux de tous ceux qui ont veſcu , & le plus couuert auaricieux du monde , eſtant prodigue des finances du Roy , & chiche des ſiennes.

S'il a eſté cruel à ceux qui l'auoient offencé , il l'a eſté encore dauantage à ceux auxquels il auoit commencé de faire deſplaiſir.

Ayant eſté enrichy par les bien-fais de la Royne Mere , aduancé par ſes ſoings , & rendu

puissant par son autorité, il luy a ruyv les bonnes graces du Roy son Fils, la liberté, son dot & son douaire. Apres l'avoir tenuë esloignée douzeans l'a faite mourir à Cologne. Pour ne luy pardonner pas (mesmes apres la mort) il a fait mespriser ses dernieres volonte, & a laissé pourrir son corps dans la chambre où elle estoit decedée, iusques à ce qu'il l'a snuie en la mort, (mais non en la façon de mourir) cinq mois apres.

Il a violé le respect qu'il devoit au Frere unique du Roy, & a voulu perdre sa personne.

Non seulement il a mis la mauuaise intelligence entre l'Enfant & la Mere, & entre les Freres; mais il a voulu faire le mesme entre le Mary & la Femme.

Il a fait decapiter le Marechal de Marillac contre droit & Iustice. Le Duc de Montmorency par vn droit souverain & absolu. Le Marquis de Cinq mars avec droit & iniure, & le Conseiller d'Etat de Thou, avec plus d'iniure que de droit.

Il a escarté, & obligé à la fuite quelques Princes, a emprisonné beaucoup de grans, en a chassé de la Cour vn bon nombre, & a pros crit toutes les personnes qui se pouuoient opposer à ses desseins, sans avoir esparigné les plus vertueuses Princesses & Dames. De sorte que nous pouvons dire que la France, gouvernée deuant son credit avec douceur, n'auoit iamais veu tant de rigueurs.

Il a mesprisé & baffoué les Prelats. A abusé de la generosité de la Noblesse, & l'a renduë totu-

riere. A deshonore & rançonné les Officiers, & a accablé le menu peuple.

Il a cassé tous les Priuileges des Prouinces & des Villes, & pour faire regner le pouuoir absolu, Il a osté l'authorité des Cours souueraines, que les Roys ont estably entr'eux & leurs sujets, pour faire recevoir & estimer leurs volontez comme iustes.

Lors qu'il brusloit son sang par les passions, & consumoit ses esprits par des agitations continuelles, Il mesnageoit encore plus mal la santé du Roy.

Estant soustenu par la puissance de son Maître, & abusant des richesses d'un Royaume abundant, il a perdu vne infinité de flèches pour frapper vn but qu'il a failly : Mais celuy contre lequel son cœur miroit, estant contraire à celuy contre lequel son bras tiroit, il gaignoit selon son dessein secret tout ce que la France perdoit.

Ses prosperitez sont venuës principalement de quatre causes. De l'action continuelle de son esprit. De son audace, qui entreprenoit tout. De la seuerité qu'il exerçoit contre toute sorte de personnes. Et de l'amour que les François ont pour leur Roy.

Il eust esté bien tost ruiné, si entre les estrangers, quelques-vns eussent esté plus aduisez, & si entre quasi tous les François qui l'ont hay, il eust rencontré vn ennemy.

Ce quiluy a beaucoup seruy, est de n'auoir point esté cogneu, & qu'on n'a point adiousté foy à ceux qui le cognoissoient.

Il a esté si heureux que les Gentils-homme & les Soldats en detestant son gouvernement le conseruoient, & respendoient leur sang & celuy d'autrui, lors qu'il allioit le sien avec le Royal.

Il deuoit perir en cette entreprise, qui fut funeste à Sejanus, s'il n'eust trouué le moyen de faire perir le genereux Comte de Soissons.

L'Italie, l'Espagne, l'Allemagne, les Pays-bas, la Lorraine & la Bourgogne (mais sur tout la FRANCE) ne releueront pas dans vn siecle les ruines, que le court passage de sa fortune a fait.

Tirant son plus grand plaisir des miseres des voisins, & sur tout de celles des François pour arracher les cheueux à ceux-la, il a deschire les entrailles de ceux-cy. Ayant couppe quelques bras & jambes aux Estrangers, il a percé le cœur à son Pays, lors qu'il a fait la guerre non seulement aux hommes, mais aux Loix & aux bonnes mœurs, qui conseruent la Religion & l'Estat.

Le voyage au Roussillon n'estoit pas tant pour la prise de Perpignan, comme pour executer son grand dessein. Dieu, dans quelque temps descouurira ce mystere d'iniquité: Il fut renuerse par sa maladie, & il eust esté ruiné si vn ieune imprudent ne se fust perdu pour le perdre.

La Iustice diuine luy pourrit & roidit le bras droit qu'il auoit roidy souuent contre le Ciel; & apres luy secha la main qui auoit signé beaucoup de guerres & d'iniustices.

Ce qui est à desplorer est, que celuy qui se sentoit frappé ne recognoissoit pas assez d'où luy venoit le coup.

Nous auons sujet de le croire ainsi; lors qu'en cét estat nous l'auons veu plus ardent à la poursuite de ses ennemis particuliers.

Nous auons sceu aussi qu'en mourant il a plu-
stost fait le Politique que le Chrestien, ayant esté plus soigneux de recommander les siens au Roy, que son ame à Dieu.

Il n'a pas considéré qu'en cette dernière action qui couronne ou condamne toutes celles de la vie; l'exemple de sa vraye penitence nous pou-
uoit estre plus vtile que toutes les fausses maxi-
mes d'Estat:

Peu de iours deuant sa fin il inuenta la Co-
medie à laquelle il donna le nom d'Europe,
ayant fait représenter avec vne magnificence
Royale tous ces pretendus triumphes, mais sa
maladie ne luy permit pas de voir iouïr ce qu'il
auoit mieux dressé que les comptes qu'il alloit
rendre à Dieu.

S'il eust examiné sa conscience, il eust trou-
ué qu'il auoit persécuté l'Eglise estant Cardinal:
qu'estant Prestre il auoit respandu beaucoup de
sang: qu'estant Chrestien il n'auoit iamais par-
donné à ceux qui l'auoient offensé: & qu'estant
homme il ne s'estoit pas souuenu qu'il estoit
mortel, lors mesmes que les vers naissans dans
beaucoup de ses vlcères, l'aduertissoient qu'il
auoit vn corps non seulement corruptible: mais
en partie corrompu.

Ayant durant dix-huict ans couru à la fin
qu'il

qu'il s'estoit proposé, & ayant pris toute sorte de moyens pour y arriuer, sans auoir iamais consulté ny la conscience, ny l'honneur, ny l'utilité publique. Ayant sacrifié la Religion, l'Estat, & vne infinité de personnes à la conuersation de son credit. Il arriua enfin à la fin commune à tous les hommes par vne mort assez douce en apparence, mais venuë trop tard pour ceux qu'il auoit fait passer deuant luy.

Il est mort à Paris où il estoit nay cinquâte sept ans & trois mois auparauant.

Abandonnant la France & sa maison, Il tascha de mettre le feu dans celle-là par la declaration qu'il extorqua contre le frere du Roy, & dans cette-cy par son Testament dicté par vne femme.

Il a fait voir qu'estant nay fort pauvre, Il ne pouuoit laisser des richesses immenses acquises en peu de temps, sans auoir mis la main dans celles du Roy, & de beaucoup de particuliers. Il est vray aussi qu'il auoit destruit quasi toutes les grandes maisons du Royaume pour relener la sienne.

Si la France n'a iamais enrichy homme à l'égal de cettuy-cy, on peut dire qu'estant assez impatiente, elle n'a iamais souffert si long-temps vne tyrannie pareille à la sienne; & que le desir de la paix a fait qu'elle n'a iamais veu vn mort avec plus de ioye.

Je crois sage Passant que durant sa vie tu as caché dans ton cœur les mesmes sentimens que sa mort a rendus publics.

Si tu rencontre quelque ignorant qui en doute,

ou quelque corrompu qui assure le contraire, prie les d'adjouster foy à celuy qui a tiré tout ce-cy de ses secrets, & veritables cognoissances.

Il desire que tous les hommes se persuadent, que la moindre bonté doit estre plus estimée que la plus releuée autorité, & qu'il ne faut point faire estat de la grande, mais de la bonne reputation.

Confondre beaucoup de choses n'est pas faire des grandes choses, empescher qu'elles ne se confondent est beaucoup faire, & les desmesler quand elles sont confuses est tout faire.

Le menu peuple prend pour des vertus les crimes heureux; mais il n'y a point de plus grand malheur que d'estre heureux en faisant le mal, parce que cette fausse felicité nous fait perdre la veritable.

RICHÉLIEU, grand ouurier de toutes sortes d'artifices, a trompé plusieurs personnes durant vn moment: mais peut estre qu'il s'est trompé soy-mesme eternellement dans les mauuaises pensées qu'il a eu de l'Eternité.

Helas! il ne desmeslera pas tout ce qu'il a embarrasé, ayant creu que la paix qui ne s'accordoit point avec son naturel, estoit ennemie de sa fortune: Et de là sont sortis tous les maux qui ont affligé la Chrestienté durant son credit.

Priez Dieu qu'il ne recherche point avec rigueur celuy qui auoit besoin de grandes misericordes, pour effacer vn grand nombre de grands crimes.

Pensez serieusement que tout ce qui passe en

Vn instant n'est rien. Seneque. Pas vn de ceux que nous voyons vestus d'escarlate n'est heureux pour cela, non plus que les Comediens qui sur le Theatre portent le Sceptre & l'habit Royal: Apres qu'ils ont marché avec orgueil, relenez sur des patins, au sortir de là on les deschausse, & ils retournent à leur taille ordinaire.

Nous pouuons adjouster que celuy qui estoit vn grand feu, est maintenant vn peu de cendres, & que l'esclair qui esbloüissoit nos yeux, n'est à present qu'une vapeur puante à nostre nez.

Dieu vueille qu'il n'aye point esté vn flâbeau à soy-mesme, ayant embrasé toute la Chrestienté. Elle espere maintenant que ses feux s'esteindront, celuy qui les allumoit estant estouffé.

Encore que ie t'aye arresté assez long-temps, Amy passant, ie te supplie de croire que ie n'ay pas tout dit.

Ie t'exhorterois de faire priere à Dieu qu'il luy donne la paix, si ie ne craignois de luy procurer du desplaisir en le priant de luy desirer ce qu'il hayssoit par dessus toutes choses. Ne laisse pas pourtant de la demander pour luy, puisque Dieu t'oblige à aymer tes ennemis: Si la paix que tu luy souhaitteras n'arriue point iusques à luy, elle reuiendra à toy. Luc. 10. Ainsi le commande IESVS-CHRIST, en qui ie te conseille de viure pacifique si tu veux mourir paisiblement en luy. A Dieu.



